


Xtiidx Dios



New Testament in Zapotec, Santo Domingo Albarradas

(MX:zas:Zapotec, Santo Domingo Albarradas)

Xtiidx Dios

New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
fb4ebcb8-e1f4-5bfc-b08c-f590e137d86d

Contents

San Matew	1
San Marcw	59
San Lujc	96
San Juan	157
Ni been ree apóstoles	201
Gui'ch par ree bén Rom	257
Gui'ch yaløj par ree bén Corinto	282
Gui'ch barojp par ree bén Corinto	307
Gui'ch par ree bén Galacia	323
Gui'ch par ree bén Éfeso	331
Gui'ch par ree bén Filipos	339
Gui'ch par ree bén Colosas	345
1 Ts	351
2 Ts	356
Gui'ch yaløj par Timoteo	359
Gui'ch barojp par Timoteo	366
Gui'ch par Tito	371
Gui'ch par Filemón	374
Gui'ch par ree bén Hebreos	376
Gui'ch bacaa Santiaaw	394
Gui'ch yaløj bacaa San Pedr	400
Gui'ch barojp bacaa San Pedr	407
Gui'ch yaløj bacaa San Juan	411
Gui'ch barojp bacaa San Juan	417
Gui'ch bayon bacaa San Juan	418
Gui'ch bacaa San Judas	419
Ni balüü Jesucrist loj San Juan	421

Xtiidxza'c Jesucrist ni bacaa San Matew

Xdiaagulal Jesucrist

(Lc. 3:23-38)

¹ Guie zëëd laj ree bén naj xdiaagulal Jesucrist, bén zëëd ree loj xdiaa rey Davi në loj xdiaa Abraham.

² Abraham brier laj xdad Isaac, abi' Isaac gojc xdad Jacob, guiaad Jacob gojc xdad Judá con ree bijchaman.

³ Dxel Judá cwa'man Tamar, abi' guyu xi'n reeman brier laj reeman Fares con Zara. Fares gojc xdad Esrom, Esrom gojc xdad Aram.

⁴ Aram gojc xdad Aminadab, Aminadab gojc xdad Naasón, Naasón gojc xdad Salmón.

⁵ Salmón gojc xdad Booz, guiaad xniaa Booz brier laj Rahab. Booz cwa'man Rut, abi' xi'n reeman brier laj Obed. Obed gojc xdad Isaí,

⁶ Isaí gojc xdad rey Davi. Dxel rey Davi con bén goc lacheel Urías guyu xi'n reeman brier lajman Salomón.

⁷ Dxel Salomón gojc xdad Roboam, Roboam gojc xdad Abías, Abías gojc xdad Asa.

⁸ Asa gojc xdad Josafat, Josafat gojc xdad Joram, Joram gojc xdad Uzías.

⁹ Uzías gojc xdad Jotam, Jotam gojc xdad Acáz, Acáz gojc xdad Ezequías.

¹⁰ Ezequías gojc xdad Mainán, Mainán gojc xdad Amón, Amón gojc xdad Josías.

¹¹ Dxel Josías gojc xdad Jeconías con ree bijchaman, tiamp ni guzu ree bén Israel Babilonia zi'c bén yu' ladxguuib.

¹² Chi ma barii reeman Babilonia lod guzu reeman zi'c bén yu' ladxguuib, gojl Salatiel, xdadaman gojc Jeconías. Dxel Salatiel gojc xdad Zorobabel.

¹³ Zorobabel gojc xdad Abiud, Abiud gojc xdad Eliaquim. Eliaquim gojc xdad Azor,

¹⁴ Azor gojc xdad Sadoc, Sadoc gojc xdad Aquim. Aquim gojc xdad Eliud,

¹⁵ Eliud gojc xdad Eleazar. Eleazar gojc xdad Matán, Matán gojc xdad Jacob.

¹⁶ Jacob gojc xdad Xiëb lacheel Li. Dxel Li gojc xniaa Jesús, bén la gajc Cristo.

¹⁷ Zian gojc, diizd xtiamp Abraham xt xtiamp rey Davi, guyu chidaj generacion, dxel chidaj generacion guyu diizd xtiamp rey Davi xt tiamp ni guzu ree bén Israel Babilonia zi'c bén yu' ladxguuib, abi' zachidaj generacion guyu diizd tiamp ni barii ree bén Israel Babilonia xt chi bidxin dxej gojl Jesucrist loj guidxliuj.

Gojl Jesucrist

(Lc. 2:1-7)

¹⁸ Ze gojc gojl Jesucrist: Li, xniaaman, ma naj tia' Xiëb laaman. Per chi gad reeman tia' lasa', guyu xi'n Li por xSprijt Dios.

¹⁹ Abi' Xiëb guial najman benza'c, ad guyëntaman nusa'nxtuman Li. Beenman xgab niro'nldaxaman laaman ralanzi.

²⁰ Per la'tgaj cayünman xgab zian, balüüloj tijb xianjl Dios lojman loj bacaal, rëb anjl guin lojman:

—Xiëb, xdiaa Davi, ad bal rdxebil tia'l Li, din xindo nüüm por xSprijt Dios zëëdix.

²¹ Tijb xindoniguiaaw gac xi'n Li, yagu'l lajx “Jesús”, din por laax gra ree xbejnx gac perdon xtol.

²² Gra ree ni guie gojc persi guzojb xtiidx Dios zi'c gunee bèn badëë xtiidxaman loj ree bejn, chi rëbaman:

²³ Tijb biinxdüb chu' xi'n,
abi' chi galix grii lajx Emanuel,
rën guiëban: Dios za'në dunuj ree.

²⁴ Chi baban Xiëb, dxel beenman zi'c gunabee xianjl Dios laaman, cwa'man Li,

²⁵ per ad bagaalt Xiëb laaman xt chi bidxin dxej gojl xi'nman. Dxel bagu' Xiëb laj xindobëz guin JESÚS.

2

Bignaj ree bèn rajc Jesús

¹ Jesús gojlaman Belén tijb guiedx naaz Judea, tiamp gunabee rey Herodes. Dxel bidxin ree bèn rajc, Jerusalén, laa reeman naj magos, za reeman niz oriente.

² Abi' gunabdiidx reeman, rëb reeman:

—¿Con xrey ree bèn Israel, bèn ma gojl? Din dunujn diizd duladxan baguiaan xbajlaman xanyabaa, zeel zio'pan din yazuxiban lojman.

³ Chi biguien rey Herodes zian, dád guyunawëëgaman, nëgajc gra ree bèn Jerusalén guyunawëëg.

⁴ Zeel gurejdx Herodes gra ree bixhioz rniabee ree bixhioz, në ree mextr rajc ley, persi gunabdiidxaman loj reeman banguin naj gal Cristo.

⁵ Dxel rëb reeman:

—Belén naj galaman, tijb guiedx naaz Judea, din ze bacaa bèn badëë xtiidx Dios loj ree bejn:

⁶ Lüy Belén, tijb guiedx naaz Judea,
majsi guiedx dobëz najl loj gra ree guiedxro' naaz Judea.
Per lasajquil din luguiedx Belén guin grii tijb bèn nabee
guiniaj tëëman da bèn Israel reen.

⁷ Dxel ralanzi gurejdx rey Herodes bèn rajc guin ree, persi gunabdiidxaman goc balüüloj bajl xanyabaa guin loj reeman.

⁸ Abi' guxhaalaman laa reeman Belén, rëbaman loj reeman:

—Gol wej, gol bignabdiidxchaaw graczi xcwent xindobëz guin. Abi' chi yadxejlidi laax, laa gol bagojn gajc naj, din në naj chigzuxib lojx.

⁹ Chi gulox rëb Herodes loj reeman zian, dxel zë reeman. Abi' bajl xanyabaa baguiaa reeman diizd ladx reeman, nedan loj reeman, xt lod yu' xindobëz guin guzudxen.

¹⁰ Chi baguiaa reeman bajl guin, dád babaa reeman.

¹¹ Abi' chi guyu reeman lënü guin, baguiaa reeman xindo guin con xniaax Li. Abi' bazuxib reeman gojp reeman laax respejt. Dxel guxhal ro' xcax reeman, abi' bazaladx reeman or, në yaal, nëtëë mirra par xindo guin.

¹² Chi ma guidxin dxej yaza reeman, dxel bagojn Dios laa reeman loj bacaal chitëë yayejc reeman niz lod za' Herodes, zianan zeel bayejc reeman niz lood ren.

Zë reeman Egipto

¹³ Chi ma zia ree bèn rajc guin ladx reeman, dxel balüüloj tijb xianjl Dios loj Xiëb loj bacaal, rëbaman:

—Bixche, cwa' xindo guin con xniaax, gol chej niz Egipto. Ni gol guzuj xt chi ganin lëjt, din zaguiil Herodes laax din gugüjtaman laax.

14 Dxel bixche Xiëb, cwa'man xindobëz guin con xniaax, abi' guxhin guin brii reeman zë reeman niz Egipto.

15 Ni guzu reeman xt güjt rey Herodes. Zian guzobj xtiidx Dios ni guneë bën badëë xtiidxaman loj ree bejn, chi rëbaman: “Babedx da xi'nan Egipto.”

Gunabee Herodes guiët ree xindobëz

16 Chi gogbee Herodes guial basquiee ree bën rajc guin laaman, dád bidxe'chaman. Dxel gunabeeman guiët gra ree xindoniguaaw diizd ree xindo qui gojlri ree xt ree xindo ma yu' ree guia' tio'p ijz, xindo yu' ree Belén nê gra ree guiedx riga' niz ni, guial yu'guijcaman ni rëb ree bën rajc guin guial ma gojc tio'p ijz ni baguiaa reeman bajl guin.

17 Zian gojc cumplid ni bacaa Jeremías, bën badëë xtiidx Dios loj ree bejn, chi rëbaman:

18 Biguien cha' tijb bejn guiedx Ramá, yu' guialroon nê guialrbixdiaj, Raquelan cayoon por ree xi'nman, abi' ad rîle't chu gusquiejn laaman guial güjt ree xi'nman.

19 Per chi güt Herodes, dxel balüüloj tijb xianjl Dios loj Xiëb loj bacaal lod zobj reeman, Egipto, abi' rëbaman lojman:

20 —Bixche, cwa' xindobëz guin con xniaax. Gol baguiaj niz Israel, din ma güjt ree bën guyën nugüjt laax.

21 Dxel bixche Xiëb cwa'man xindobëz guin con xniaax, bayejc reeman niz Israel.

22 Per chi gogbee Xiëb guial Arquelao, xi'n Herodes, naj bën canabee niz Judea, bidxebaman naguiaj reeman niz ni. Dxel bagojn Dios laaman loj bacaal din che reeman niz Galilea, dxel zë reeman.

23 Chi bidxin reeman ni, gurej reeman guiedx Nazaret. Zian gojc persi guzobj diidx ni guneë ree bën badëë xtiidx Dios loj ree bejn, guial grii laj Jesús bën Nazaret.

3

Diidx guneë Waj bën baroobnijs bejn ree (Mr. 1:1-8; Lc. 3:1-9, 15-17; Jn. 1:19-28)

1 Lën ree dxej ni bidxin Waj, bën baroobnijs bejn ree, loj yujbidx niz Judea catie'chaman xtiidx Dios.

2 Rëbaman:

—Gol bayüjn xgab por xtolidi din ma zidyob xguialrniabee Dios.

3 Xcwent Waj guinan bacaa Isaías, bën badëë xtiidx Dios loj ree bejn, chi rëbaman:

Rguien cha' tijb bën rbidxa' niz loj yujbidx, rëbaman:

“Gol beenchaaw xnejz dux Dad ree Dios, gol guxhal tijb nejz nali.”

4 Con guidxlad camell gojcnë xab Waj, abi' lënman bixii tijb guid. Gudaw tëëman bi'tsu con dxijn yu' dajn.

5 Dxel bën Jerusalén ree nê los demazri ree bën Judea nëtëë gra ree bën zobj gadëd ro' guiiw Jordán, brii reeman bicaagdiajg reeman ni rníee Waj.

6 Dxel guxhoobdol reeman, abi' baroobnijs Waj laa reeman loj guiiw Jordán guin.

7 Per chi baguiaa Waj zien ree bënfarisew nê ree bën saducew bidxin din tiobnijs reeman, rëbaman loj reeman:

—¡xi'n xindxab! ¿Chu bagojn lëjt din laadi loj castiro' ni zëed?

⁸ Gol gubajn zagdxe din guiguien guial waliquidi ma bayüjndi xgab por xtolidi,

⁹ abi' ad bal rlies xvalorgajquidi, rëbidi: “Dunuñ zio'p loj xdiaa Abraham”, din naj rni lëjt xt guiaj guie ree zile' yayüjn Dios xdiaa Abraham.

¹⁰ Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rutüügaman laan din che'can.

¹¹ Naj rni lojdi, curobnijsan lëjt con nijs zi'c tijb sen guial ma bayüjndi xgab por xtolidi. Per bën zidnal naj, laaman guroobnijs lëjt con xSprijt Dios con në bajl, din laaman mazri rajp guialrniabee guial lon, abi' ni'qui xgurëchaman ad rayalt gaxhiecan.

¹² Abi' zi'c raya trigo zian güünnëman bejn. Din bën zinal ree xnejz Dios chinëman laa reeman lod rniabeeman, guiáad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

Gurobnijs Jesús

(Mr. 1:9-11; Lc. 3:21-22)

¹³ Lën ree dxej zii guza Jesús niz Galilea wejman ro' guiw Jordán lod za' Waj, din guroobnijs Waj guin laaman.

¹⁴ Per ad nuyëntaman nuroobnijsaman Jesús, rëbaman lojman:

—Lüj rayal guroobnijs naj, ad najt rayal gurobnijs lüj.

¹⁵ Dxel rëb Jesús lojman:

—Yo guna gac zian, din mazri zagdxe yaguieen gra zi'c rniabee Dios.

Dxel cwëjb Waj baroobnijsaman laaman.

¹⁶ Chi gulox gurobnijsaman, naabzi bariiman loj nijs guin, dxejczy bixal xanyabaa, abi' baguiaaman zidguiajt xSprijt Dios zi'c tijb palom xt guijcan.

¹⁷ Dxel biguien cha' tijb bejn xanyabaa, rëbaman:

—Bën guie naj da Xi'n'an, bën rën da'tan bën rabaanë' tëen.

4

Goj Jesús prueb

(Mr. 1:12-13; Lc. 4:1-13)

¹ Dxel binë xSprijt Dios Jesús niz loj yujbidx, din güün xindxab laaman prueb.

² Ni guzuman tiuu dxej tiuu guiaal sin guialraw, dxel gulaanman.

³ Abi' bidxin xindxab beenx laaman prueb, rëbix:

—Bal wali najl xi'n Dios, gunabee yayajc guiaj guie ree guidaxtil.

⁴ Per badxi' Jesúsán rëbaman:

—Loj xtiidx Dios rëb: “Ad ganaxtizi guidaxtil guiban bejn, nëgajc gra diidx rniee Dios.”

⁵ Dxel binë xindxab guin laaman Jerusalén, abi' gulë'pix laaman guijc yadooro' zojb luguiedxzii,

⁶ abi' rëbix lojman:

—Bal wali najl xi'n Dios, gudidya' diizd guie, din loj xtiidx Dios rëb:

Dios guixhiaal ree xianjlanan din guinia reeman lüj.

Guiniaaz reeman lüj con yaa reeman

chitëe ladx ni'czi tijb guiaj guia'l.

⁷ Badxi' Jesúsán, rëbaman:

—Rëb gajc loj xtiidx Dios: “Ad güünl prueb xDadil Dios.”

⁸ Dxel binë xindxab guin laaman tijb guijc guia' ya da't, lod balüüx laaman gra ree guiedx riga' loj guidxliuj në ree guialnaza'c yu' loj reen.

⁹ Abi' rebix lojman:

—Naj gune gra ree ni guie lojl, bal guzuxibil lon guiniajchi' tēēl naj.

¹⁰ Badxi' Jesúsán, rēbaman:

—Biquied, xindxab, din loj gajc xtiidx Dios rēb: “Gunajchi' xDadil Dios, tijbzi lojman been sirv.”

¹¹ Dxel biquied xindxab guin lojman, abi' bi't tio'p choon ree xianjl Dios persi been reeman laaman sirv.

Rzuloj Jesús rtie'chaman xtiidx Dios niz Galilea

(Mr. 1:14-15; Lc. 4:14-15)

¹² Chi gogbee Jesús guial yu' Waj ladxguiib, bayejcaman Galilea.

¹³ Per ad gurejtraman guiedx Nazaret, wejman bisobaman guiedx Capernaum, tijb guiedx riga' gajxh ro' nijs Galilea niz lod goc ree xdajn Zabulón nē Neftalí.

¹⁴ Zian gojc persi gojc cumplid ni bacaa Isafás, bēn badēē xtiidx Dios loj ree bejn, chi rēbaman:

¹⁵ Bēn Zabulón con ree bēn Neftalí,

nē ree bēn zojb gajxh ro' nijsdoo, nētēē ree bēn zojb xijch guiw Jordán

con gra ree bēn zojb niz Galilea,
lod zojb ree bēn ad najt bēn Israel,

¹⁶ gra reeman gubajn loj xcay.

Yan ma brii tijb biani par laa reeman,

abi' biani guin guxhal xquiarguejn ree bēn ad nabant xnejz loj Dios.

¹⁷ Diizd dxejzii guzuloj gutie'ch Jesús xtiidx Dios, rēbaman:

—Gol bayūjn xgab por xtolidi din ma zēēd gajxh xguialrniabee Dios.

Rbejdx Jesús tajp ree bēn gac xbejnman

(Mr. 1:16-20; Lc. 5:1-11)

¹⁸ La'tgaj caza Jesús gajxh ro' nijsdoo Galilea, baguiaaman Simón bēn la gajc Bēd con bijchaman Andrejs. Cuzaal reeman guijxh loj nijs din guiniaaz reeman bējl. Guial laan naj xchiin reeman.

¹⁹ Dxel rēb Jesús loj reeman:

—Gol tanal naj, din gulūn lējt xhienaag güūndi din guto'pidi bejn par Dios luar guiniaazidi bējl.

²⁰ Loj hor guin gajc basa'n xguijxh reeman abi' zinal reeman laaman.

²¹ Guzaman zatibda'n dxel baguiaaman zatio'p ree bejn, Jacob con bijchaman Waj, xi'ngaan ree Zebedeo. Yu' reeman loj tijb barcw con xdad reeman cayūjnchaaw xguijxh reeman. Dxel gurejdx Jesús laa reeman,

²² abi' basa'n reeman barcw guin con xdad reeman, dxel laa zinal gajc reeman laaman.

Rulūi Jesús zien ree bejn

(Lc. 6:17-19)

²³ Wej Jesús guidibczi niz Galilea, abi' tijbgaj ree guiedx wejman lēn ree yadoo persi balūūman bejn ree. Balūūman laa reeman xtiidx Dios, rēbaman loj reeman xhienaag naj xguialrniabee Dios, abi' bayūjnman bēn rdoob ree nē gra ree bēn rajc xhietēēz guialguijdxan.

²⁴ Guidibczi niz Siria bire'ch xtiidx Jesús, abi' bidnē reeman bēn cusagdiaj ree gadxagayaa ni mal nē graloj ree guialguijdx, bēn yu' ree xindxab luxdoo, nē ree bēn rējtya', nētēē ree bēn ad rilet' sulí, abi' bayūjn Jesús laa reeman.

²⁵ Dád zien ree bejn binal laaman, bēn Galilea ree, bēn zēēd ree Decápolis, bēn Jerusalén ree, bēn zēēd ree niz Judea nē ree bēn zēēd stiblad ro' guiw Jordán.

5

Ni balüü Jesús tijb guiyc guia'

¹ Chi baguiaa Jesús bén guixiuj ree, wë'paman tijb guiyc guia' abi' gurejman, dxel gubig ree xbejnman lojman.

² Abi' guzuloj culüüman laa reeman, rëbaman:

Xiquilbaa ree bejn

(Lc. 6:20-23)

³ —Xiquilbaa ree bén ragbee guial ryaadx gagnë Dios laa reeman, din por zian yayal reeman lod rniabeeman.

⁴ Xiquilbaa ree bén yu'naya, din Dios yagu' luxdoo reeman zagdxë.

⁵ Xiquilbaa ree bén naj bén chaawladx, din laa reeman tia' guidxliuj ni rëb Dios gudëëdaman loj reeman.

⁶ Xiquilbaa ree bén rzajc zi'c chi rliaan bejn o chi re'caman nijs zian rën da't reeman güün reeman zi'c rniabee Dios, din Dios gagnë laa reeman din güün reeman zi'c ruladxaman.

⁷ Xiquilbaa ree bén raya lasa', din zian yaya Dios laa reeman.

⁸ Xiquilbaa ree bén naya loj Dios, din laa reeman guguaa laaman.

⁹ Xiquilbaa ree bén rüjn naguiejn cwedxenë lasa', din laa reeman grii laj xi'n Dios.

¹⁰ Xiquilbaa ree bén cadëd loj gualzi por graløj ni rujnnë bejn laa reeman guial cayüjn reeman zi'c rniabee Dios, din laa reeman yayal lod rniabeeman.

¹¹ Xiquilbaadi, chi rüjnnë reeman lëjt xhiernarajc në chi rnieeguijdx reeman lëjt nëtëë chi rudxiib reeman guijquidi graczi, guial najdi da bejnan.

¹² Gol badxe' luxdoodi nix, gol babaa tëë din narooob naj ni guneë Dios lojdi xanyabaa. Abi' lëjt ragbee guial ziangajc basagzi reeman bén badëë ree xtiidx Dios loj ree bejn gocli chi gadidi gui't loj guidxliuj.

Lëjt naj zi'c zëd në zi'c bajl

(Mr. 9:50; Lc. 14:34-35)

¹³ 'Lëjt naj zi'c zëd loj guidxliuj guie. Per bal id naxijran, ¿xhieza naag yayajcan naxij zatijb? Achetri dxiin güünan, gaz guire'chan abi' chë'p ree bejn guijcan.

¹⁴ 'Lëjt naj zi'c tijb biani loj guidxliuj guie, naj tëëdi zi'c tijb guiedx ni riga' tijb guiyc guia' abi' ad zajct guiguie'chan.

¹⁵ Ad ritiaguij tëët tijb gui par guida'cwan lën tijb yagalm, rtiaguijn persi rzojban ya din gusnin loj gra ree bén yu' lënü.

¹⁶ Ziangajc lëjt, gol gojc zi'c biani loj ree bejn, din chi guguaa reeman ni zagdxë cayüjndi guza't reeman xDadidi Dios zagdxë bén yu' xanyabaa.

Rülüü Jesús xcwent ley

¹⁷ 'Ad naladxidi zialan par günan ley tiblax, ley ni badëë Dios loj Moisejs o ni balüü ree bén badëë xtiidx Dios loj ree bejn, zialan par günanan cumplid.

¹⁸ Din naj rni lojdi, la'tgaj yu' xanyabaa në guidxliuj, ad ziquiedt tijb punt o tijb lejtr loj ley xt chi gac gra ni naj gac.

¹⁹ Zianan zeel bén ad ruzoobt tijb mandamient ni zëëd loj ley guin majsi nidobëz naj mandamient guin, bal rülüü tëëman bejn ree güün reeman zian, laaman lasajc ta'nzi lod rniabee Dios. Per bén ruzoob gra ree mandamient ni zëëd loj ley guin, rülüü tëëman bejn ree guzoob reeman laan, laaman naj mazri bén lasajc lod rniabee Dios.

²⁰ Zeel naj rni lojdi, bal id zabajndi mazri zagdxë guial loj ree mextr rajc ley në ree bënfarisew, ad zayaltidi lod rniabee Dios.

Ruliü Jesüs xcwent guialrdxe'ch lasa'
(Lc. 12:57-59)

²¹ 'Lëjt ragbee guial rëb Dios loj ree xbéngulalidi: "Ad gugüjtil bejn, din bén gugüjt bejn yayalaman casti."

²² Per naj rni lojdi, chutëëz bén rdxe'chnë lasa', yayalaman casti, në bén rniee diidxguijdx lasa' xt loj guxtis zajc cheman, guiáad bén rëb loj lasa' achet sirv lüj, laaman yayal loj bajl yu' gabijl.

²³ 'Zeel bal zinël gon lën yadoo abi' yagaj rusaaladxil guial yu' bén rdxe'chil,

²⁴ basa'nsii xgonl yagaj, yalojxgaj babenë bén rdxe'chil zagdxe, dxel ma zile' yayejqul din gusa'n xgonl.

²⁵ 'Bal chu bén rudëed lüj loj guxtis, baya'nnëman diidx zagdxe la'tgaj yu' tiamp, chitëë yayüman lüj loj guxtis, abi' guxtis guin nabee chu'l ladxguuib.

²⁶ Naj rni lüj, ad zariitil ladxguuib guin xtczi quixil gra ni na guxtis guin.

Ruliü Jesüs xcwent guialrznë lacheel ben ren

²⁷ 'Lëjt ragbee guial loj ley rëb: "Ad sunël lacheel ben ren."

²⁸ Per naj rni lëjt, chutëëz bén rüjn xgabmal chi ruguiaaman tijb béngunaa, con laan ma beenman dol lën luxdooman por béngunaa guin.

²⁹ 'Bal laagajc guiaaløj ladbeel rüjn din güünl dol, mazri zagdxe naj gulëen bazaalan zijt. Din mazri zagdxe naj nit tiblåd guiaaløj lvar che guidibil gabijl.

³⁰ 'Abi' bal laagajc yaa ladbeel rüjn din güünl dol, gutü'n bazaalan zijt. Din mazri zagdxe naj nit tiblåd yaal lvar che guidibil gabijl.

Ruliü Jesüs xcwent guial rala' lasa' bejn
(Mt. 19:9; Mr. 10:11-12; Lc. 16:18)

³¹ 'Ma bacaagdiajg tëedi: "Chutëëz bén rala' lacheel, rayal gudëedaman gui'ch lojman guial ma bala' lasa' reeman."

³² Per naj rni lëjt: Xinguaaw rala' xbéngunaa, abi' ad za'nët béngunaa guin xin ren, laagajc laax cayüjn din sunë xbéngunaax xin ren. Abi' xin tia' béngunaa guin dolan cayüjnx.

Ad rayalt guza't xlia' bejn Dios

³³ 'Rëb tëë Dios loj ree xbéngulalidi: "Ad guza't xlia'di Dios, rayal güüнди cumplid ni rëbidi gudëëdidi lojman."

³⁴ Per naj rni lojdi: Ad rayaltczi guza'tidi Dios, ni'qui xanyabaa par chililadx reeman lëjt din ni zojb Dios,

³⁵ ni'qui guidxliuj din loj guidxliuj naj lod ruzuj guia'man, ni'qui Jerusalén din laan naj ladx rey mazri rniabee.

³⁶ Ad guza't tëë guijquidi par chililadx reeman lëjt, din ni'qui tijb guidxguijquidi ad zajct güüнди ni ya's o ni naquich ya.

³⁷ Zagdxeli con gol güjdx "an" o "a'n", din los demazri ree ni guinieedi loj xindxab zan.

Ad yadxi'di ni mal por ni mal
(Lc. 6:29-30)

³⁸ 'Lëjt ragbee guial loj ley rëb: "Bén cwëë guiaaløj l, gulëë gajc guiaaløjman. Guiáad bén cwëë layil, gulëë gajc layaman."

³⁹ Per naj rni lëjt: Ad yadxi'di ni mal por ni mal, bal chu chëëz xhajg ladbeedi, gol badëë stibladan chëëzaman.

⁴⁰ Bal chu bén tilë lüj din cwëëxuuman xmanguil, badëë në xchamarril tia'man.

⁴¹ Abi' bal rüjn reeman lüj nagueijn güül tijb yuu din sanëlan tib kilometro, guzanën tio'p kilometro.

⁴² Chutëez Bén rniab xhienin lojl, badëedan, bal chu tëë rgui'n xhienin lojl ad bal cwexuul gudëedilan.

Guyën bén rdxe'ch lüj

(Lc. 6:27-28, 32-36)

⁴³ Ragbee tëëdi rëb ree bejn: “Guyën bén rën lüj, bidxe'ch tëë bén rdxe'ch lüj.”

⁴⁴ Per naj rni lojdi: Gol guyën bén rdxe'ch lëjt, gol gurejdx tëë Dios por ree bén rzunal lëjt, din güün reeman lëjt ni mal.

⁴⁵ Din zian gaquidi xi'n xDadidi Dios bén yu' xanyabaa, din laaman ruslejn xgubijdxaman par ree benza'c në par ree benmal, ruscal tëëman guia par ree bén naban zi'c rayal në par ree bén ad nabant zi'c rayal.

⁴⁶ Din bal rëndi ganaxzi bén rën lëjt, ¿xhieza tia'di loj Dios zian? Din xt bëndol ree rüjn zian.

⁴⁷ Abi' bal ganaxzi bén rëndi rugajpdiozidi, ¿xhieza ni zagdx cayüjndi? Din xt bén ad nünbeet ree Dios rüjn zian.

⁴⁸ Zeel gol gojc benza'c, zi'c naj xDadidi Dios bén yu' xanyabaa.

6

Xhienaag gagnë lasa' bejn

¹ Ad güündi ni zagdx niz loj ree bejn naabzi par yadxaloj reeman lëjt. Din bal güündi zian, xDadidi Dios bén yu' xanyabaa achet gunee man lojdi.

² Zeel chi güünl yudar Bén ryaadx xhienin, ad gutie'chil diidx par gagbee bejn xhie cayüjnl zi'c rüjn ree Bén rusquiee, lën ree yadoo në ree lunejz, din guilies bejn xvalor reeman naj reeman benza'c. Per diidxliczi rnin lojdi, laazan naj ni rayal reeman.

³ Zeel chi güünl yudar Bén ryaadx xhienin, ni'czi loj xmiwda'til ad gül diidx ni cayüjnl.

⁴ Mazri zagdx lüjzi gagbee ni cayüjnl, abi' xDadil Dios laaman cuguiaa ni cayüjn lüjzi, laaman gunee ni rayalil.

Xcwent xhienaag cwedx guiniab bejn Dios

(Lc. 11:2-4)

⁵ Chi cwedx guiniabidi Dios, ad güündi zi'c rüjn ree Bén rusquiee, Bén ruladx ree rzuli par cwedx guiniab reeman Dios lën ree yadoo në ree xquin nejz, din yadxaloj bejn laa reeman. Din naj rni lojdi, laazan naj ni rayal reeman.

⁶ Per lüj chi cwedx guiniabil Dios, bayu lënü lidxil, basiaaw ro' port, dxel gurejdx gunab Dios Bén za'në lüj. Abi' laaman cuguiaa ni cayüjn lüjzi, laaman gunee ni rayalil.

⁷ Chi rbejdx rniabidi Dios, ad radxi'di diidx guin guië'tzi guië't naabzi par gacxhie xtiidxidi, zi'c rüjn ree Bén ad nünbeet Dios. Din laa reeman naladx guial zien ni rniee reeman mazri guidxga' Dios laa reeman.

⁸ Ad güündi zi'c rüjn reeman, din xDadidi Dios ma ragbeeman xhie ryaadx-idi chi gadidi guiniab laan.

⁹ Zeel chi cwedx guiniabidi Dios, gol güjdx:

Dad, lüj yu' xanyabaa,
rayal yaya'p da'tan lajl respejt.

¹⁰ Gac zi'c rniabeel.

Gac zi'c rēnl loj guidxliuj zi'c rajc xanyabaa.

¹¹ Banee ni yadaawan guixie guixie.

¹² Been dunujn perdon gra ree ni mal ma baguieenan zi'c raguieenan perdon bēn rŭjn ree dunujn ni mal.

¹³ Ad guslaal dunujn yaguieenan dol, babēē dunujn loj gra ni mal.

¹⁴ Din bal gŭndi perdon bēn rŭjn lējt ni mal, ziangajc xDadidi Dios bēn yu' xanyabaa zŭjn gajcaman perdon xtolidi.

¹⁵ Per bal id zŭjndi perdon bēn rŭjn ree lējt ni mal, ziangajc xDadidi Dios ad zŭjntaman lējt perdon.

Xcwent guialrba'n

¹⁶ 'Chi rba'ndi ad gŭn lojdi naya, zi'c rŭjn ree bēn rusquiee din guguaia bejn guial naba'n reeman. Naj rni lojdi, guial laazan naj ni rayal reeman.

¹⁷ Per lŭj, chi rba'nl, gudiib lojl gudŭjn tēē guijquil

¹⁸ chitēē gagbee ree bejn guial naba'nl. Tijbzi xDadil Dios bēn za'nē lŭj naj bēn gagbee laan, abi' laaman guneē lŭj ni rayal tia'l.

Guialnaza'c yu' xanyabaa

(Lc. 12:33-34)

¹⁹ 'Ad guto'pidi guialnaza'c loj guidxliuj guie lod zajc tiabe reen o xhin reen o chu' xingubaan cwan laa reen.

²⁰ Zagdxeli gol been naguiejn gol been gan guialnaza'c yu' xanyabaa lod ad zacabet reen, lod ad zaxint reen, lod ad zu tēēt xingubaan cwan laa reen.

²¹ Lod gapil guialnaza'c guin yagaj su luxdool.

Guiaaloy bejn naj zi'c biani

(Lc. 11:34-36)

²² 'Guiaaloy bejn naj zi'c tijb biani par xcuerpaman. Zeel bal cayŭjnl ni zagdxē, guidib xcuerpil rajp biani.

²³ Per bal cayŭjnl ni mal, guidib xcuerpil naj zi'c lod nacay, zi'c naj lod nacaybuu.

Dios ya o milia

(Lc. 16:13)

²⁴ 'Ad zile't chu gŭn sirv loj tio'p patron, din zadxe'chaman tijbaman abi' guiēnman stjbbaman, o gacaman benza'c con tijbaman abi' ad zēntaman stjbbaman. Zeel ad zile't gŭndi sirv loj Dios nē loj milia.

Achetczi rayal chu' bejn xgab

(Lc. 12:22-31)

²⁵ 'Naj rni lējt: Ad chu'di xgab por ni gawidi nē por ni guiē'di din guibandi, ni'qui por lajd ni gacwidi. Guialnaban mazri lasajc guial loj guialraw, abi' xcuerp bejn mazri lasajc guial loj xabaman.

²⁶ Gol baguaiaa ree be rzuj xanyabaa, ad rxŭbint reeb, ad rato'p tēēt reeb guialnaza'c, ad naj tēēt lod cu'chaaw reeb guialnaza'c guin. Per xDadidi Dios bēn yu' xanyabaa rudēēd ni raw reeb. Abi' mazri lasajquidi guial loj reeb.

²⁷ Abi' tēē, ŷwen guial ru da'tidi xgab ma gŭn lējt mazri ziool ya?

²⁸ ŷChexquiza zeel dād rudi xgab por xabidi? Gol baguaiaa xhienaag rni's ree guiaa dajn. Achet dxiin rŭjn reen ad rguib tēēt reen,

²⁹ per ni'qui rey Salomón ad guzujchaawt zi'c za'chaaw ree guiaa majsi mast guzujchaawaman.

³⁰ Abi' bal gui'xh dajn ruzujchaaw Dios yan, majsi guixiezi che'can. Di-idxgui lëjt bën ad rliladxza'ct ree laaman, nid zuneeman ni gacwidi ya.

³¹ Zeel ad rudi xgab xhie gawidi, o xhie guiè'di, o xhie gacwidi.

³² Din bën ad nünbeet ree Dios rüjn zian, laa reeman ru xgab por gra ree ni guin. Per lëjt yu' xDadidi xanyabaa, abi' laaman ragbeechaaw xhienin ryaadxidi.

³³ Per yalojxgaj gol baguuil güündi zi'c rniabee Dios, gol been tää zi'c rënman, dxel laaman gunee gra ree ni ryaadxidi.

³⁴ Ad chu'di xgab por ni gac guixie, gol basa'nan par guixie, zagdxeli gol guyu xgab tib dxejgaj.

7

Xcwent guialrula'ch

(Lc. 6:37-38, 41-42)

¹ Ad gula'chidi bejn chitëë saquidi zian.

² Din bal rula'chidi bejn ziangajc saquidi, zi'c rüjnnëdi bejn ziangajc güünnë reeman lëjt.

³ Ad gula'chidi bën ren por falt dobëz ni rajpaman, zagdxeli gol guyu xgab por falt narooob ni rajpidi.

⁴ Abi' bal mazri falt narooob rajpidi, ¿xoxa guiëbidi loj stijb bejn: “Ad laat naj ni rüjnl”?

⁵ ¡Bën rusquiee! Yalojxgaj gol been zi'c rayal, chi ma rüjndi zian dxel ma zile' guiëbidi loj stijb bejn: “Ad laat naj ni rüjnl.”

⁶ Ad güündi naguiejn güüncwent ree bën ad rënt güüncwent xtiidx Dios, chitëë xhie güünnë reeman lëjt. Din bal güündi zian, laan naj zi'c chi ruzaal bejn tijb ni nagle' loj bë'cw, o chi ruzaal bejn tijb ni lasajc loj cüch abi' chë'pzib guijcan.

Ni guiniabidi zaca'dan

(Lc. 11:9-13; 6:31)

⁷ Naj rni lëjt: Gol gunab loj Dios, abi' laaman gunee ni rniabidi. Gol baguuilaman, zadxejlidi laaman. Gol gurejdx gunabaman, züjncwentaman lëjt.

⁸ Din bën rniab, zaca'man. Abi' bën rguuil, zadxejlaman, guiáad bën rbejdx rniab laaman, züjncwentaman laaman.

⁹ Lëjt najdi dad, ¿wen zudëëdi tijb guiaj loj xi'ndi ya chi guiniabix guidaxtil?

¹⁰ ¿o zudëëdi tijb bëel ya chi guiniabix bëjl?

¹¹ Nacli lëjt najdi bëndol rajc rudëëdi ni rën xi'ndi. ¡Diidxgui xDadidi bën yu' xanyabaa, nid zudëëdaman ni zagdxel loj ree bën rniab laan ya!

¹² Gol beennë ree bejn zi'c rëndi güünnë reeman lëjt. Din zian rniabee xley Dios në ni bacaa ree bën badëë xtiidxaman loj ree bejn.

Port nadëë

(Lc. 13:24)

¹³ Gol been naguiejn din chu'di niz ro' port nadëë. Din port gulajg në nejz gulajg, laa reen naj ni zinë bejn loj nejz mal, abi' zien bejn zë loj nejz guin.

¹⁴ Per port nadëë guin në nejz nadëë guin laa reen naj ni rnë bejn lod yu' guialnaban tiblayaa, abi' ta'nzi ree bejn zë loj nejz guin.

Por ni rüjndi zayünbee ree bejn lëjt

(Lc. 6:43-44)

¹⁵ 'Gol gojp cudad con ree b́en rusquiee rēb rudēēd reeman xtiidx Dios. Din rulūū dád b́en chaawladx reen, per rŭjnzi reeman par gusquiee reeman bejn.

¹⁶ Per zayŭnbeedi laa reeman por ni rŭjn reeman, din ad rtiat uv loj yaquiējch ad rtiá tēēt higo loj gui'xh guiējch.

¹⁷ Zeel gra yag zagdxē rtiá ni zagdxē lojn. Guiáad gra yag guijdx rtiá ni guijdx lojn.

¹⁸ Ad rtiat ni guijdx loj yag zagdxē, ad rtiá tēēt ni zagdxē loj yag guijdx.

¹⁹ Gra yag ad rtiat ni zagdxē, rirugan dxel re'can.

²⁰ Ziangajc lējt zayŭnbeedi laa reeman por ni rŭjn reeman.

Ad grat bejn chu' lod rniabee Dios

(Lc. 13:25-27)

²¹ 'Ad grat ree b́en na lon: "Dad, Dad," chu' lod rniabee Dios, ganaxzi ree b́en rŭjn zi'c rēn da Dadan, b́en yu' xanyabaa.

²² Dxejzii, zien ree b́en na lon: "Dad, Dad, por lŭj batie'chan xtiidxil, abi' gual baza'tan lajl balēēn xindxab ree luxdoo ree bejn, baguieen tēēn zien ree milagr gual baza'tan lajl."

²³ Dxel guiēn loj reeman: "Ad benbeetczan lējt, gol gubi'ca lon b́endol."

Tio'p loj cimiant

(Lc. 6:47-49; Mr. 1:22)

²⁴ 'Chutēēz b́en rucaagdiajg da diidxan abi' rŭjnman ni rēn, laaman naj zi'c tijb b́en nasin gules xcimiant lidx loj guiaj.

²⁵ Abi' gol guia, dxel biguiajt nijs ro' gubi' tēē bidoxh, gulaj reen lad yu guin, per ad gulenxantan gual naj xcimiantan loj guiaj.

²⁶ Per b́en riguiējn da diidxan abi' ad rŭjntaman ni rēn, laaman naj zi'c tijb b́en ad nasint bazoob lidx loj ũx.

²⁷ Abi' chi gol guia biguiajt nijs narooob, gubi' tēē bidoxh. Abi' gulaj reen lad yu guin zianz gulenxanan, ni'qui tibda'n'an ad baya'nt.

²⁸ Chi gulox guneeñē Jesús b́en guin ree, graczi reeman badxa da't loj zi'c balŭūman laa reeman,

²⁹ gual rulūūman laa reeman zi'c b́en rajp gualrniabee, ad zi'c rulūūt ree mextr rajc ley.

8

Rayŭjn Jesús tijb b́en rajc gualguijdx la lepra

(Mr. 1:40-45; Lc. 5:12-16)

¹ Chi baza Jesús ruguia' guin, dád zien bejn nal laaman.

² Dxel gubig tijb bejn lojman rajcaman gualguijdx la lepra, abi' bazuxibaman lojman, rēbaman:

—Dad, bal tiēbil, zile' yayŭjnl naj.

³ Dxel basli yaa Jesús baqui'man laaman, rēbaman:

—Rēnan. Bayajc.

Chi rēb Jesús zian, loj hor ziigajc biquied gualguijdx guin abi' bayaman.

⁴ Dxel rēb Jesús lojman:

—Bacaagdiajg ni ganin lŭj. Achu loj guiēbil gual ma bayajquil. Lojzi bixhioz wej din guguaaman lŭj, binē gon ni rayal chinēl zi'c gunabee Moisejs, din gagbee gra ree bejn gual ma bayajquil.

Bayajc xmojs tijb b́en suldad rniabee ree suldad

(Lc. 7:1-10)

⁵ Chi guyu Jesús luguiedx Capernaum, tijb suldad Rom rniabee ree suldad bibig lojman, guzajcaman laaman liaadx,

⁶ rëbaman:

—Dad, laa da mojsan naga' lidxan ragxuux. Ad rile't chixchex, dád cusagzi guialguijdx guin laax.

⁷ Dxel rëb Jesús lojman:

—Gan din yayünan laax.

⁸ Badxi' bén rniabee ree suldad guinan, rëbaman:

—Dad, ad rayaltan chu'l lidxan, per gunee diizd guie din yayajc da mojsan.

⁹ Din zi'c naj yu' ree bén rniabee naj, ziangajc naj yu' ree da suldadán xin rniabeen. Chi rën loj tijb reex: “Wej”, rejx, chi rën loj stijbix: “Guda,” ri'tix. Abi' chi rë loj da mojsan: “Been ni guin”, rüjnxan.

¹⁰ Chi biguiejn Jesús zian, dád badxalojman abi' rëbaman loj ree bén zinal laaman:

—Naj rni lojdi, ni'qui Israel ad wadxaaglojtan tijb bén rliladx Dios zi'c rliladx bén guin Dios.

¹¹ Naj rni lëjt, dád zien ree bén gralad yayal gawnë Abraham, në Isaac, në Jacob lod rniabee Dios.

¹² Guiáad ree bén rayal niu lod rniabee Dios, laa reeman yayal lod nacay da't lod goon reeman lod gaw tëë lay reeman.

¹³ Dxel rëb Jesús loj suldad rniabee guin:

—Baguiaj lidxil, gac tëë zi'c ma bililadxil.

Abi' loj hor guin gajc bayajc xmojs bén guin.

Rayüjn Jesús xnasuegr Bëd

(Mr. 1:29-31; Lc. 4:38-39)

¹⁴ Chi we Jesús lidx Bëd, baguiaaman xnasuegr Bëd naga'man yu'man xliaa.

¹⁵ Dxel gunaazaman yaaman, abi' bariiman xliaa guin, dxel bixchewan guzuloj cuyanman laa reeman.

Rayüjn Jesús zien ree bënragxuu

(Mr. 1:32-34; Lc. 4:40-41)

¹⁶ Chi ma caxhin, binë ree bejn zien ree bén yu' xindxab luxdoo loj Jesús. Abi' con tijb diidx ni guneeaman babëëman xindxab guin luxdoo reeman, bayüjn tëëman gra ree bënragxuu.

¹⁷ Zian gojc persi gojc cumplid ni rëb Isaías, bén badëë xtiidx Dios loj ree bejn, chi rëbaman: “Laaman zignë dux guialguijdx ree, laa tëëman zignë dux guialzi ree.”

Bén rën chinal Jesús

(Lc. 9:57-62)

¹⁸ Chi baguiaa Jesús bénguixiuj nayaw laaman, gunabeeman tédaman stiblad ro' nijs naj yagaj.

¹⁹ Dxel gubig tijb mextr rajc ley loj Jesús, rëbaman:

—Mextr, rënan guidaalan lüj bantëëz guin chel.

²⁰ Abi' rëb Jesús lojman:

—Bëz ree yu' xbiliaa reeb, abi' ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

²¹ Dxel rëb stijb ree bén zinal laaman:

—Dad, baslaa naj gabenë' da dadan xt chi guiëtaman.

²² Per rëb Jesús lojman:

—Tanal naj, basa'nman con ree b́en ad ŕent guidnal naj, laa reeman guquie'ch laaman chi guiétaman.

Racwëez Jesús bidoxh
(Mr. 4:35-41; Lc. 8:22-25)

²³ Guyu Jesús loj barcw con ree xbejnman,

²⁴ abi' la'tgaj zë reeman loj nijs guin dxejlczi gubi' tijb bidoxh, ma cazëëbczi barcw guin xan nijs. Per Jesús naga'yëjsaman.

²⁵ Dxel bicwëen ree xbejnman laaman, rëb reeman:

—¡Dad, gunaj dunujn! ¡Ma cayzëëban xan nijs!

²⁶ Badxi'man laan rëbaman:

—¿Chexc zeel dád rdxebidi? ¿Chexc zeel ad ŕiladxza'ctidi naj?

Dxel bixchewan abi' gunabeeman bacwëez bi guin në nijs guin. Loj hor ziigajc babedxe reen.

²⁷ Abi' ree xbejnman badxa da't loj reeman, zianz gunabdiidx loj lasa' reeman, rëb reeman:

—¿Chu b́en guin, zeel xt bi në nijs ruzoob xtiidxaman?

Tio'p ree b́en yu' xinxab luxdoo
(Mr. 5:1-20; Lc. 8:26-39)

²⁸ Chi bidxin Jesús stiblad ro' nijs guin, loj xguidxliuj ree b́en Gadara, dxel tio'p ree xinguaaw yu' xinxab luxdoo b́rii reex lād ree baa abi' wej reex loj Jesús. Dád nadoxh reex, zeel ad ríle't chu téd lunejz guin.

²⁹ Chi baguiaa reex Jesús, gurixdiaj reex rëb reex:

—¿Xhie ŕenl con dunujn, Jesús, Xi'n Dios? ¿Zëëdil guie ya din gusagzil dunujn chi gadli dxej guidxin?

³⁰ Per gajxh yagaj za' zien ree cüch, cayaw reeb,

³¹ abi' guzajc ree xinxab guin liaadx loj Jesús, rëb reex:

—Bal yabëél dunujn, banee mod yadxu'n lën ree cüch guin.

³² Dxel rëb Jesús:

—Gol wej.

Dxel barii ree xinxab guin luxdoo ree b́en guin bayu reex lën ree cüch guin. Abi' gra reeb guzuloj cuxüün zianz bitidia' reeb ro' tijb bala' xt loj nijs, lod gu' reeb nijs abi' güjt reeb.

³³ Abi' ree b́en cayajp cüch guin ree, baxüün reeman. Dxel chi badxin reeman luguiedx guin, be reeman diidx gra ni goc në gra ni guzac ree b́en yu' ree xinxab guin luxdoo.

³⁴ Dxel gra ree b́en guiedx guin b́rii wej lod za' Jesús, abi' chi baguiaa reeman laaman, guzajc reeman laaman liaadx, din yazaman ladx reeman.

9

Bayüjn Jesús b́en nëjt xcuerp
(Mr. 2:1-12; Lc. 5:17-26)

¹ Dxel bayu Jesús loj tijb barcw, badëdaman stiblad ro' nijs guin abi' badxin ladxaman.

² Yagaj binë ree bejn tijb xin nëjt xcuerp, naga'x loj da. Chi baguiaa Jesús guial ŕiladx reeman laaman, rëbaman loj xin ragxuu guin:

—Bagu' luxdool zagdxe, xi'n. Ma benan perdon xtólii.

³ Dxel tio'p choon ree mextr rajc ley been reeman xgab: “Diosan rüjnx tiblād guial ŕnieex zian.”

⁴ Per guial gogbee gajc Jesús xhie xgaben cayüjn reeman, dxel rëbaman loj reeman:

—¿Chexc zeel rüjndi xgabmal?

⁵ ¿Conin mazri nawëëg gac? ¿Guial guiën ya: “Ma benan perdon xtolil” o guiën: “Bixche, guza”?

⁶ Per yan, gulün lëjt guial naj, Bén guxhaal Dios ra'pan gualrniabee loj guidxliuj guie par günan perdon dol ree.

Dxel rëb Jesús loj xin ragxuu guin:

—Bixche. Baca' ni go'til loj. Baguiaj lidxil.

⁷ Laa bixchegajquix zia lidxil.

⁸ Chi baguiaa ree bén guin zian, bidxeb reeman, abi' baza't reeman Dios zagdxë por gualrniabee ni badëëman loj ree bejn.

Rbejdx Jesús Matew

(Mr. 2:13-17; Lc. 5:27-32)

⁹ Chi baza Jesús yagaj ziaman, baguiaaman tijb xin la Matew. Zojbix lod ruquijxix impuest, abi' rëbaman lojx:

—Tanal naj.

Dxel bisu Matew zinalix laaman.

¹⁰ Tijb dxej chi cayaw Jesús lidx Matew con zien ree bén ruquijx impuest në ree bén zëëb xtiidx ad nabant xnejz, gra reeman zobjnë Jesús xan mex con ree xbejnman.

¹¹ Chi baguiaa ree bénfarisew zian, gunabdiidx reeman loj ree xbejn Jesús rëb reeman:

—¿Chexc zeel cayawnë xmextridi bén ruquijx ree impuest në ree béndol?

¹² Chi bigueijn Jesús ni rëb reeman, dxel rëbaman:

—Bénnadaan ree ad ryaadxt reeman doctor, bénraxuu ree laa reeman ryaadxt doctor.

¹³ Gol chej, gol basiid xhie rën guiëb loj xtiidx Dios lod rëb: “Ni mazri rënan naj guial yaya lasa'di luar guidnëdi gon lon.” Yan, naj ad zialtan par ree benza'c, zialan par ree béndol, din yayüjn reeman xgab por xtol reeman.

Rniabdiidx reeman loj Jesús xcwent gualrba'n

(Mr. 2:18-22; Lc. 5:33-39)

¹⁴ Dxel ree xbejn Waj, bén baroobnijs bejn ree, bibig reeman loj Jesús, zianz gunabdiidx reeman lojman, rëb reeman:

—¿Chexc zeel dunujn con ree bénfarisew dád zienvolt raba'nan, guiáad ree xbejnl ad rba'nt reeman?

¹⁵ Badxi' Jesúsán rëbaman:

—Lod yu' gualruxhliia, ¿wen runaya ree biooz ya chi za'në xin cuxhliia guin laa reeman? Per guidxin dxej chiquiedix, dxel guiba'n reeman.

¹⁶ 'Achut rata' lajd cüb loj lajd yojx din zaxü'n lajd cüb guin, abi' mazri quixya'n lajd yojx guin.

¹⁷ Ad rgu' tëët reeman vin cüb lën anfr yojx din zaxya' anfr yojx guin, abi' zi'c anfr guin zi'c vin guin zaxin reen. Zeel naj guial chu' vin cüb lën anfr cüb, din ni'qui tijb reen ad zaxint.

Bayajc xi'n Jairo në béngunaa bagaal xab Jesús

(Mr. 5:21-43; Lc. 8:40-56)

¹⁸ La'tgaj canee Jesús zian, bidxin tijb bén rniabee lën xyadoo ree bén Israel, abi' bazuxibaman loj Jesús, rëbaman:

—Yangajczi güjt da xi'ndxa'pan, per bal gui'til guixhioob yaal guijquim zabanm.

¹⁹ Dxel zinë Jesús laaman con ree xbejn Jesús.

²⁰ Abi' tijb béngunaa ragxuü ma gojc chiptio'p ijz ad rbézt ryajbaman rejn, gubigaman niz xijch Jesús abi' bagaalaman guial' xabaman,

²¹ guial gunaladxaman: "Bal gugaalaman majsi xabzaman, zayajcaman."

²² Per badxi' loj Jesús, abi' baguiaadxijchaman béngunaa guin, dxel rëbaman lojman:

—Zagdxe bagu' luxdool, xi'n. Ma bayajquil guial bililadxil naj.

Abi' loj hor ziigajc bayajc bën guin.

²³ Chi bidxin Jesús lidx bën rniabee guin, baguiaaman ma riga' ree xinrucwejdx din chiquie'ch reex xi'nman, abi' ree bejn roon rbixdiaj reeman guijquim.

²⁴ Dxel rëb Jesús loj reeman:

—Gol barii guie, din ad güjtt bindo guin, naga'yëjszim.

Abi' baxijdxné reeman laaman.

²⁵ Chi ma barii reeman, zianz guyuman. Gunaazaman yaa bindo guin dxel bixchem.

²⁶ Abi' guidib niz yagaj bire'ch diidx ni goc.

Rayüjn Jesús tio'p bénlutia'p

²⁷ Chi baza Jesús yagaj, binal tio'p bénlutia'p laaman, rbixdiaj reeman, rëb reeman:

—¡Jesús, xdiaa Davi, baya dunujn!

²⁸ Chi badxin Jesús lod zojbaman, dxel bibig ree bën guin lojman, abi' gunabdiidxaman loj reeman, rëbaman:

—¿Rliladxidi ya guial zile' yayünan lëjt?

Badxi' reeman laan rëb reeman:

—Raliduladxan, Dad.

²⁹ Dxel bagaal Jesús guiaaloj reeman, rëbaman:

—Gac zi'c rliladxidi.

³⁰ Abi' bayajc guiaaloj reeman, dxel rëb Jesús loj reeman:

—Ad bal chu loj guiëbidi guial bayajc guiaalojdi.

³¹ Per naabzi baza reeman yagaj, guzuloj catie'ch reeman diidx guidib niz yagaj ni been Jesús.

Rayüjn Jesús tijb bengop

³² Chi baza ree bën bayüjn Jesús guiaaloj, dxel bidxinnë ree bejn tijb bengop, yu' xindxab luxdooan.

³³ Abi' guloxzi babëë Jesús xindxab guin luxdoo bengop guin, laa guzuloj gajc caneeman. Abi' dád badxaloj ree bejn, rëb reeman:

—Ad goct waguiaa ree lasa' milagr guie niz Israel.

³⁴ Per ree bénfarisew rëb reeman:

—Bën guin rabëë xindxab luxdoo ree bejn por xgualrniabee gajc xindxab rniabee ree xindxab.

Raya Jesús bejn ree

³⁵ Wej Jesús gra ree ciuda në ree guiedx ni riga' niz yagaj, abi' beegaj lod rejman ruman lën ree yadoo persi rulüüman bejn ree xtiidx Dios, rëbaman loj reeman xhienaag rniabee Dios, rayüjn tëëman graloj guialrdoob në graloj guialguijdx ni rajc ree bejn.

³⁶ Chi baguiaa Jesús benzien guin ree, bayaman laa reeman, guial dád naya riga' reeman, riga' reeman zi'c xiil ad rya'pt.

³⁷ Dxel rëbaman loj ree xbejnman:

—Walican zien bejn rën gucaagdiajg xtiidx Dios, per ad zient bën gulüü laa reeman yu'.

38 Zeel gol gunab loj Dios din guixhiaalaman mazri ree b́en gulüü laa reeman.

10

Gulej Jesús chiptio'p ree apóstoles (Mr. 3:13-19; Lc. 6:12-16)

1 Gurejdx Jesús chiptio'p ree xbejnman, abi' badëëman gualrniabee loj reeman din yabëë reeman xindxab luxdoo ree bejn din yayüjn tēë reeman bejn ree graloj gualrdoob nē graloj gualguijdx.

2 B́en guie ree naj guidxiptio'p ree xi apóstoles Jesús: Simón b́en gulëëljajman Béd, con bijchaman Andrejs, nē Jacob con Waj, b́en naj ree xi'n Zebedeo.

3 Nē Felip, Tol, Tumajs con Matew b́en baquijx impuest, nētëë Jacob xi'n Alfeo con Lebeo b́en la gajc Tadeo

4 nē Simón b́en bi'ch loj ree b́en Cananistas con Judas Iscariote b́en yayü Jesús.

Rxhiaal Jesús gra ree xbejnman chiglüü reeman xtiidx Dios (Mr. 6:7-13; Lc. 9:1-6)

5 Chi guxhaal Jesús guidxiptio'p ree xbejnman, rëbaman loj reeman:
—Ad chedi niz lod zobj ree b́en ad najt b́en Israel, ni'qui ree guiedx riga' niz Samaria,

6 gol chejli niz lod zobj ree b́en Israel b́en ad zinalt ree xnejz Dios.

7 Gol güjdx loj reeman gual ma zëëd gajxh xgualrniabee Dios.

8 Gol bayüjn b́enragxuu ree, gol basban b́en ma güjt ree, gol bayüjn b́en rajc ree gualguijdx la lepra, gol babëë tēë xindxab luxdoo ree bejn. Zi'cgajc cwa' lagajdi gualrniabee, ziangajc yayüjndi bejn lagajzi.

9 'Ad chinëdi or, ni'qui plajt, ni'qui cobr,

10 ni'qui gujxh. Ad bal chinë stib neyz xabidi, ni'qui stib neyz xgurëchidi, ni'qui yagriadxidi, din b́en rüjn dxiin rayal gudëëd ree bejn ni gawaman.

11 'Chi guidxindi tijb guiedx o tijb ciuda, gol gule'c ruson chu b́en naj benza'c yaya'ndi lidx, yagaj gol baya'n xt chi yazadi luguiedx guin.

12 Abi' chi chu'di lënú guin, gol güjdx loj ree b́en zobj yagaj: “Yabe'cdxe Dios luxdoodi.”

13 Bal rayal reeman gualnaza'c guin, zaya'nan con laa reeman guiáad bal id rayal reeman laan zayejcan con lëjt.

14 Guiáad bal yu' guiedx o yu ya lod ad raca't reeman lëjt o bal id rën reeman gucaagdiajg reeman ni guiëbidi, gol baza yagaj, gol gudxijp guxyuj guia'di zi'c tijb sen gual ad bazoobt reeman xtiidxidi.

15 Naj rni lëjt gual dxej ni yadëëd ree bejn cwent loj Dios, mazri casti narooob yayal reeman gual loj ree b́en Sodoma nē Gomorra.

Gualzi ni zëëd

16 Rëb tēë Jesús loj ree xbejnman:

—Gol bacaagdiajg ni rnin, naj rxhial lëjt zi'c ree xiil loj ree cuyojt. Zeel gol gojc nasin zi'c bëël, gol gojc tēë nadoo zi'c palom.

17 Gol gojp cudad din zayü ree bejn lëjt loj ree guxtis, zaguijn reeman lëjt lën ree yadoo.

18 Abi' xt chinë reeman lëjt loj ree gobernador nē loj ree rey gual rliladxidi naj, zian güdi da diidxan loj reeman nē loj ree b́en ad zinalt xnejz Dios.

19 Per chi chinë reeman lëjt loj guxtis, ad chu'di xgab xhie guinieedi xhie tõe naag guinieedan, din chi guidxin hor guinieedi, Dios yazaladx lëjt diidx ni guinieedi.

20 Din ad lëjttan guiniee, xSprijt xDadidi Diosan guiniee por lëjt.

21 'Zadxin dxej yayü ree bejn laagajc bijch reeman par guiët reeman. Guiáad ree dad yayü laagajc xi'n reeman, abi' ree bejn zadxe'ch xdad reeman në xniaa reeman abi' yayü reeman laa reeman par guiët reeman.

22 Gra bénguidxliuj guidxe'ch lëjt guial najdi da bejnan, per bén sudxi'ch loj guial riladxaman naj xt dxej chigra guibanman, laaman yayal xanyabaa.

23 Chi sunal reeman lëjt tijb luguiedx par güün reeman lëjt xhienin, gol chej stijb guiedx, din naj rni lojdi, ad warat xguiedx Israel chedi chi gui't Bén guxhaal Dios.

24 'Tijb bejn ad mast lasajc loj xmextraman, ni'qui tijb mojs ad mast lasajquix loj xpatronx.

25 Bén cusiid rayal xhienladxaman chi ma rajcaman zi'c rajc xmextraman guiáad tijb mojs rayal xhienladxix chi ma najx zi'c xpatronx. Nacli naj rniabeen lojdi, gulëëljaj ree bejn naj Beelzebú, diidxgui lëjt najdi da bejnan.

Chu rayal guidxeb bejn

(Lc. 12:2-9)

26 'Ad guidxebidi bejn ree, din achet ni ralan yu' ni ad zaguiet, ni'qui tijb ni naguie'ch ad yu't ni ad zagbeet bejn.

27 Ni canin lëjt naguie'ch, gol güjdxan loj ree bejn, guiáad ni canin lëjt ralan, gol güjdxan loj gra ree bejn.

28 Ad rdxebidi bén rën ree gugüjt lëjt. Din zile' gugüjt reeman xcuerpidi, per xsprijtidi ad zile't gugüjt reeman laan. Gol bidxebli Dios din laaman zile' gunijt xcuerpidi abi' guixhiaalaman xsprijtidi gabijl.

29 'Lëjt ragbee guial biguijndoo ree ad lasajct reeb wayëjx, per ni'qui tijb reeb ad zëjtt sin xpermiss xDadidi Dios.

30 Guiáad lëjt xt guidxguijquidi graczan nayab loj Dios.

31 Zeel ad rdxebidi din mazri lasajquidi guial loj zien da't ree biguijndoo.

Bén rëb loj ree bejn guial najman xbejn Jesucrist

(Lc. 12:8-9)

32 'Bén guiëb niz loj ree bejn guial da bejnanan, ziangajc naj guië loj da Dadan Dios bén yu' xanyabaa guial da bejnanan.

33 Per bén guiëb niz loj ree bejn guial ad da bejntanan, ziangajc guië loj da Dadan Dios bén yu' xanyabaa guial ad da bejntanan.

Por Jesús rlia' lasa' ree bejn

(Lc. 12:51-53; 14:26-27)

34 Rëb tõe Jesús:

—Ad zialtan par yabecdxeen luxdoo bejn, zialan din guial chililadx reeman naj chu' wadijl.

35 Din guial chililadx bejn naj, zadxe'ch xinguaaaw xdadix, guiáad biinguaa zadxe'ch xniaam, abi' biinwalidx zadxe'ch xnasuegrim.

36 Abi' laagajc bén zojb ree lënülixidi guidxe'ch lëjt.

37 'Bén rën xdad o xniaa mazczi guial lon, ad zajct gacaman da bejnan. Ziangajc bén rën xi'ngaana o xi'ndxa'p mazczi guial lon, ad zajct gacaman da bejnan.

38 Bén rën guidnal naj, abi' ad rëntaman sagdiajman por naj, ad zile't gacaman da bejnan.

³⁹ Bén rniajchi' guialnaban rajpaman loj guidxliuj guie, zadxin dxej gunij-taman laan, per bén guiët por naj, zajpaman guialnaban tiblyaaa con Dios.

Ni tia' ree bejn

(Mr: 9:41)

⁴⁰ Bén ridxga' lëjt, najn ridxga'man, guiáad bén ridxga' naj, bén guxhaal najn ridxga'man.

⁴¹ Bén ridxga' tijb bén rudëë xtiidx Dios loj ree bejn, guial zëëdaman por Dios, zaca'man lasa' ni rayal tia' bén guin loj Dios. Ziangajc bén ridxga' tijb bén naban zi'c rën Dios, zaca'man lasa' ni rayal tia' bén guin loj Dios.

⁴² Abi' chutëëz bén gudëëd majsi tib xijgzi nijs naalyuj loj bejn guial najman da bejnan, naj rni lojdi guial yu' ni gudëëd Dios tia' reeman.

11

Bigneenë ree xbejn Waj Jesús

(Lc: 7:18-35)

¹ Chi gulox rëb Jesús loj guidxiptio'p ree xbejnman con ree nin chiguieen reeman, dxel bazaman yagaj ziglüüman bejn ree xtiidx Dios loj ree guidedx riga' niz yagaj.

² Abi' Waj, la'tgaj yu'man ladxguiib, cwa'man ruson gra ree ni cayüjn Jesús. Dxel guxhaal tio'p choon ree xbejnman,

³ bignabdiidx reeman lojman, rëb reeman:

—¿Lüj naj Cristo ya bén naj gui't, o yalëjzan ben ren ya?

⁴ Dxel rëb Jesús loj reeman:

—Gol chej gol güjdx loj Waj ni cuguiaadi në ni cucaagdiajguidi.

⁵ Gol güjdx lojman guial ma ruguiaa ree bénlutia'p, ma rajc rza ree bencoj, ma bayajc tëë ree bén rajc guialgüjdx la lepra, ma rigueijn ree bén nacwa't guiáad ree bengüt ma baban reeman, abi' ree bénprob ma cagueijn reeman xtiidx Dios.

⁶ Xiquilbaa ree bén ad zucwëëzt chililadx naj.

⁷ Chi baza ree bén guxhaal Waj, dxel guzuloj Jesús caneeman loj ree bejn xcwent Waj, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui ni runiib bi?

⁸ ¿O xhienaag naj bén biquiaadi? ¿Najman tijb bén najcw lajd zagdxe ya? Lëjt ragbee guial bén rajcw ree lajd zagdxe lën palas zobj reeman.

⁹ ¿Chuza biquiaadi? ¿Tijb bén rudëë xtiidx Dios loj ree bejn ya? Per naj rni lojdi guial biquiaadi tijb bén mazri zobjloj guial loj bén rudëëd xtiidx Dios loj ree bejn.

¹⁰ Wajn din laaman naj ben ruza't loj xtiidx Dios lod rëb:

Naj rxhial tijb bén ned lojl,
ben güünchaaw xnejzil.

¹¹ Naj rni lëjt, loj gracia ree bénguidxliuj, ad wayut bén mazri zobjloj guial loj Waj. Per majsi zian, bén ad zobjlojt loj xguialrniabee Dios, laaman mazri zobjloj guial loj Waj.

¹² Diizd chi bi't Waj xt yan, zien bejn rüjn da't naguiejn chu' lod rniabee Dios. Abi' ree bén rüjn da't naguiejn laa reeman chu' lod rniabeeman.

¹³ Diizd ley badëë Dios loj Moisejs con loj ree bén badëë xtiidx Dios loj ree bejn, xt Waj, laa reeman guneë xcwent xguialrniabee Dios.

¹⁴ Abi' bal chililadxidi ni ganin lëjt, naj rni guial Waj naj Elías bén badëë xtiidx Dios loj ree bejn.

¹⁵ Bén rën ree gucaagdiajg, gol bacaagdiajg.

¹⁶ ¿Xhienaag ganin lëjt naj ree bén riga' loj guidxliuj guie yan? Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex:

¹⁷ “Bacwejdxan bidxa, per ad baya'tidi, badoolan ni naya ree per ad biintidi.”

¹⁸ Din bi't Waj bén baroobnijs bejn ree, ad rawtaman ad rë' tëetaman vin, abi' rëbidi xinxab yu' luxdoooman.

¹⁹ Yan, bi't Bén guxhaal Dios, rawaman rë' tëeman vin abi' rëbidi nalaman ruladx tëeman guië'man, ruchajg tëeman béndol ree con ree bén ruquijx impuest. Per ree bén ma ca' xgualrniabee Dios, por laa reeman rguien guial gra ni rüjn Dios naj zagdx.

Bén ad bazoobt ree xtiidx Dios

(Lc. 10:13-15)

²⁰ Dxel guzuloj Jesús cadilëman bén zojb ree guiedx lod beenman mazri zien ree milagr. Din bén guin ree ad bayüjnt reeman xgab por xtol reeman, abi' rëbaman loj reeman:

²¹ —¡Proba lëjt bén Corazín! ¡Proba lëjt bén Betsaida! Din bal luguiedx Tiro në luguiedx Sidón niajc ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman.

²² Per rnin lëjt guial dxej yadëed ree bejn cwent loj Dios, mazri casti narooob yayalidi guial loj ree bén Tiro në ree bén Sidón.

²³ Guíaad lëjt bén Capernaum, ad naladxidi yayalidi xanyabaa, lëjt yayal gabijl. Din bal luguiedx Sodoma niajc ree milagr goc ladxidi, xt yan sta yu' guiedx guin.

²⁴ Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bén Sodoma.

Gol guda lon din yaziiladxidi

(Lc. 10:21-22)

²⁵ Lën ree dxejzii rëb Jesús:

—Dad, ruzatan lüj zagdx, din ni baquie'chil loj ree bén rajc në loj ree bén rignia', laan ma balüül loj ree bén ad rajct.

²⁶ Zian gojc Dad, din zian guyën.

²⁷ “Da Dadan banee gra lon. Abi' achut nünbee Jesucrist xi'n Dios, tijbzi Dios, achu tëet nünbee Dios, tijbzi Jesucrist xi'nman, con ree bén rënman güünbee Dios.

²⁸ Gradi, bén ma badxag rüjn xhienin din yaya'ndi zagdx loj Dios, ma badxag tëedi nüü xtolidi. Gol guda lon, naj gune guialraziiladx lojdi.

²⁹ Gol bazoob da diidxan, gol basiid tëë gaquidi benza'c në bén chaawladx zi'c naj, din yabedxe luxdoodi loj Dios.

³⁰ Din ad nawëegt guial guzoobidi da diidxan, ad nawëegt tëet guial güündi zi'c rënan.

12

Rgui'ch ree xbejn Jesús trigo dxej raziiladx ree bén Israel

(Mr. 2:23-28; Lc. 6:1-5)

¹ Tijb dxej raziiladx ree bejn, chi cadëd Jesús con ree xbejnman loj tijb guiniaa lod yu' trigo, dxel calaan ree xbejnman abi' guzuloj cagui'ch reeman trigo persi cayaw reeman laan.

² Abi' chi baguiaa ree b́enfarisew ni cayũjn reeman, rēb reeman loj Jesús:

—Baguiaa ree xbejn nial cayũjn reeman ni ad rayalt güün reeman dxej raziiladx ree bejn.

³ Dxel rēb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

⁴ Guyu Davi lēn xyadoo Dios abi' cwa'man guiadxtil ma nagle' ree gudawaman con ree xcompniaraman, ni ad rayalt niajw reeman, bixhiosi ree rayal gaw laa reen.

⁵ ¿O gadidi gool loj xley Moisejs ya guial achet dol rũjn ree bixhioz chi rũjn reeman dxiin lēn yadoo majsi ad raziiladxt reeman dxej raziiladx ree bejn?

⁶ Abi' naj rni lējt guial naj, b́en za'nē lējt mazri lasajcan guial loj yadoo.

⁷ Bal rignia'di xhie rēn guiēb loj xtiidx Dios lod rēb: “Ni rēnan naj guial yaya lasa'di, ad guial guneeetidi gon lon.” Bal rignia'di diidx guin ree ad zudxiibtidi guijc ree b́en ad rajpt dol.

⁸ Abi' B́en guxhaal Dios rajpaman gualrniabee dxej raziiladx ree bejn.

Rayajc tijb b́en nējt tibladyaa

(Mr. 3:1-6; Lc. 6:6-11)

⁹ Chi gudēd gojc zian, dxel baza Jesús abi' guyuman lēn tijb yadoo naj niz yagaj.

¹⁰ Lēn yadoo guin za' tijb b́en nējt tibladyaa. Abi' guial ree b́enfarisew raguuil reeman mod xhie gudxiib reeman guijc Jesús, dxel gunabdiidx reeman lojman, rēb reeman:

—¿Zile' yayũjn bejn tijb b́enragxuu dxej raziiladx bejn ya?

¹¹ Badxi' Jesúsán rēbaman:

—Bal tijb lējt rajp tijb xiil, abi' yabib lēn bala' dxej raziiladx bejn. ¿Nid zabēēdi laab dxej guin ya?

¹² ¿Wen id mazri lasajc tijb bejn guial loj tijb xiil ya? Zeel achet güünan zajc güün bejn ni naj zagdxe dxej raziiladx bejn.

¹³ Dxel rēb Jesús loj b́enragxuu yaa guin:

—Basli yaal.

Abi' basli yaa b́en guin, loj hor ziigajc bayajc yaaman zi'c naj stibladan.

¹⁴ Per chi barii ree b́enfarisew guin lēn yadoo guin, guzuloj cayũ reeman diidx xhienaag güün reeman din gugũjt reeman Jesús.

B́en gule Dios

¹⁵ Chi gogbee Jesús zian, laa zia gajcaman, abi' zien ree bejn binal laaman. Dxel bayũjnman gra ree b́enragxuu,

¹⁶ abi' gunabeeman laa reeman chitēē guitie'ch reeman diidx chu bayũjn laa reeman.

¹⁷ Zian guzojb xtiidx Isaías, b́en badēē xtiidx Dios loj ree bejn, chi rēbaman:

¹⁸ Gol baguiaa, b́en guie naj b́en gulen

din güünman naj sirv,

laaman naj b́en rēn da'tan,

rabaanē' tēēn laaman.

Gudē da Sprijtan lojman

abi' guiēbaman loj ree b́enguidxliuj

xhienaag naj da gualrniabeen.

¹⁹ Achut tilnēman,

ad zabixdiaj tēētaman

achut tēēt guien cha'man niz lunejz.

²⁰ Ad zudëedtaman casti bën ad za'dxi'cht ree loj da nejzan, në ree bën ad ridxga'za'ct naj, xt chi ma beenman gan gac guialguxtis.

²¹ Abi' xt ree bën ad najt bën Israel cwëz reeman yabëëman laa reeman loj dol.

Rëb ree bejn ca' Jesús xguialrniabee Beelzebú
(Mr. 3:19-30; Lc. 11:14-23; 12:10)

²² Binë ree bejn tijb xinguaaw lod za' Jesús, yu' xinxxab luxdoox, natia'p lojx naj tëëx gop. Dxel bayün Jesús laax abi' guzuloj rnieex ruguiaa tëëx.

²³ Graczi ree bejn dád badxaloj reeman, abi' rëb reeman:

—¿Id bën guinan zëed loj xdiaa Davi ya?

²⁴ Chi biguiejn ree bënfarisew zian, dxel rëb reeman:

—Bën guin rabëë xinxxab luxdoo ree bejn por xguialrniabee Beelzebú xin rniabee ree xinxxab.

²⁵ Per Jesús gogbee gajcaman xgab cayün reeman, abi' rëbaman:

—Gra nacion o ciuda bal id nadxag riga' bejn, rlia' lasa' reeman, ziangajc tijb famil bal id nadxag riga' reeman, rlia' lasa' reeman.

²⁶ Ziangajc bal xinxxab su contr laagajquix, nayob nitix.

²⁷ Lëjt na guial naj rabë xinxxab luxdoo ree bejn por xguialrniabee Beelzebú, per bal zianan, ¿chuzada rudëë guialrniabee loj xbejndi din yabëë reeman xinxxab? Zeel laagajc reeman rulüü guial ad laat rnieedi.

²⁸ Per naj, bal por xSprijt Dios rabën xinxxab luxdoo ree bejn, rën guiëban guial ma za'në xguialrniabee Dios lëjt.

²⁹ 'Din ¿xhieza naag chu' tijb bejn lidx tijb bën gojl par cwanman ni rajpaman, bal id zaxhiixgajman laaman? Zian güünman din chile' cwanman ni rajpaman.

³⁰ 'Bën ad za't con naj, za'man contr naj. Guiáad bën ad ruto'pt bejn par naj, rtie'chaman laa reeman.

³¹ 'Zeel rnin lëjt: Zün Dios perdon xhietëëz dolan, në ree diidxguijdx ni rnieetzi ree bejn, per ad züjntaman perdon bën rnieeguijdx ree xSprijt Dios.

³² Chutëëz bën guinieeguijdx Bën guxhaal Dios, zajcaman perdon, per bën guinieeguijdx xSprijt Dios ad zajctaman perdon yan, ni'qui chi yaguaian.

Nünbee bejn tijb yag por ni rtia lojn
(Lc. 6:43-45)

³³ 'Lëjt ragbee, bal tijb bejn ruzuj tijb yag zagdxe, rtia ni zagdxe lojn, per bal guzujman tijb yag guijdx, rtia ni guijdx lojn. Din tijb gaj yag nünbee bejnan por ni rtia lojn.

³⁴ 'Xi'n xinxxab! ¿Xoza guinieedi diidx zagdxe ree awa benmal lëjt? Din ni yu' luxdoo bejn laan rnieeman.

³⁵ Benza'c rnieeman diidxza'c, din laan yu' luxdooan. Guiáad benmal rnieeman diidxmal din laan yu' luxdooan.

³⁶ Per naj rni lëjt guial dxej ni güün xguialguxtis Dios, gra ree bejn yadëëd cwent lojman por gra ree diidxguijdx ni rniee reeman.

³⁷ Din por xtiidx gajc bejn guiguien bal rayalaman xcasti Dios o ad rayaltaman laan ya.

Rniab ree bënfarisew tijb milagr
(Mr. 8:12; Lc. 11:29-32)

³⁸ Yu' ree bënfarisew con ree mextr ni rajc ley, rëb loj Jesús:

—Mextr, rayënan yaguaian güünl tijb milagr.

³⁹ Badxi' Jesúsán rëbaman:

—Lějt benmal, bėn ad rŭjnt ni rėn Dios abi' rėndi gŭnan tijb milagr. Per achetri guguaaadi, tijbzi zi'c guzac Jonás bėn badėe xtiidx Dios loj ree bejn.

⁴⁰ Din zi'c guyu Jonás lėn bėjl narooob choon dxej choon guiaal, ziangajc Bėn guxhaal Dios, choon dxej choon guiaal chu'man lėn baa.

⁴¹ Abi' chi yadėed ree bejn cwent loj Dios, bėn guban ree Nínive zaban reeman abi' guiėb reeman guial ree bėn riga' yan, yayal reeman xcasti Dios. Din bėn Nínive ree bayejc reeman loj Dios chi bacaagdiajg reeman xtiidx Dios ni gunee Jonás. Abi' yan, bėn za'nė lějt mazri lasajcaman guial loj Jonás.

⁴² Ziangajc bėn goc reina niz sur, zabanman chi yadėed ree bejn cwent loj Dios, dxel guiėbaman guial ree bėn riga' yan, yayal reeman xcasti Dios. Din laaman dád zijt guzaman persi bicaagdiajgaman xguialrajc rey Salomón. Abi' yan, bėn za'nė lějt mazri lasajcan guial loj Salomón.

Xindxab ni rayejc (Lc. 11:24-26)

⁴³ 'Chi rariŭ tijb xindxab luxdoo tijb bejn, abi' rzax niz loj yujbidx rguilix lod yaziiladxix. Abi' chi ad rdxejlt lod yaziiladxix, dxel rŭjnx xgab naladxix:

⁴⁴ “Zagdxeli yaye'can lod guzaan.” Abi' chi rayejquix ruguiaax luxdoo bėn guin najn zi'c tijb lėnŭ lod achut zojb, lod bilioob lod najcchaaw tėe.

⁴⁵ Dxel rica'x za gajdx xindxab naj ree mazri xinmal guial lojx. Abi' ru gra reex luxdoo bėn guin. Dxel mazri benmal gacaman guial loj ni gocaman yaloj. Ziangajc sac ree benmal riga' loj guidxliuj yan.

Xniaa Jesús con ree bijchaman (Mr. 3:31-35; Lc. 8:19-21)

⁴⁶ Sta canee Jesús loj ree bejn, bidxin xniaaman con ree bijchaman, za' reeman lule', rėn reeman guinieenė reeman laaman.

⁴⁷ Abi' yu' tijb bėn rėb lojman:

—Laa xniaal con ree bijchil za' lule' guin, rėn reeman guinieenė reeman lŭj.

⁴⁸ Per Jesús badxi'man xtiidx bėn guin rėbaman:

—¿Chu naj da nan chu tėe ree nin naj da bichan?

⁴⁹ Dxel con yaaman balŭ ree xbejnman rėbaman:

—Bėn guie ree naj da nan nė ree da bichan.

⁵⁰ Din chutėez bėn rŭjn zi'c rėn da Dadan bėn yu' xanyabaa, laaman naj da bichan, da zanan, nė da nan.

13

Xcwent bėn rtie'ch bin (Mr. 4:1-9; Lc. 8:4-8)

¹ Dxejzii briŭ Jesús yu lod zojbaman, bisobaman ro' nijs Galilea.

² Abi' guial dád zien ree bejn bido'p yagaj, beenan naguiejn wė'p Jesús loj tijb barcw dxel gurejman lojn, guiáad ree bėn guin za' reeman ro' nijs guin.

³ Zien ree ni guzuloj culŭuman laa reeman, per con ganax zi'c cwent ree, rėbaman loj reeman:

—Tijb bejn, briŭman bigtie'chaman bin loj xguiniaaman.

⁴ Chi catie'chaman bin guin, ta'n nan biajb loj nejz, abi' bi't ree biguijn gudaw reeb laan.

⁵ Sta'n nan biajb loj ree guiaj lod ad riga't zien yuj, cari gulejnan guial ad zient yuj riga'.

⁶ Per chi briŭ gubijdx, baze'can laan, abi' guial ad yu't liujn gubidxan.

⁷ Dxel sta'nan biajb loj ree yaquiëjch, chi guni's ree yaquiëjch guin banidloj reen laan.

⁸ Per sta'nan biajb loj yuj za'c, abi' dád gojcan. Yu'n cwa tibgayuu bin loj, yu'n cwa gayojn yu' téen cwa gajlbichii.

⁹ Bén rën gucaagdiajg, gol bacaagdiajg.

Chexc zeel rulüü Jesús con ni naj ree zi'c cwent

(Mr. 4:10-12; Lc. 8:9-10)

¹⁰ Dxel gubig ree xbejn Jesús lojman rëb reeman:

—¿Chexquiza zeel rulüül bejn ree con ganax zi'c cwent ree?

¹¹ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xgualrniabeeman, per bén guin ree ad basa'nt Dios laa reeman chignia' reeman laan.

¹² Din Bén ma rignia', gusnuu chignia'man mazri, abi' zignia' da'taman. Per bén ad rignia'za'ct ad rüjn tëëtaman nagueijn chignia'man mazri, xt ta'n ni rignia'man zayanladxaman.

¹³ Zeel rnien'ën laa reeman con ganaxzi zi'c cwent ree. Din majsi rani loj reeman per rüjn reeman zi'c bén ad ruguiaat, abi' majsi rigueijn reeman per rüjn reeman zi'c bén ad riguejnt, bén ad rignia' tëët.

¹⁴ Zian rzojb xtiidx Isaías, bén badëë xtiidx Dios loj ree bejn, chi rëbaman: Majsi rigueijn reeman, per achetzi chignia' reeman.

Abi' majsi rani loj reeman, per ad ruguiaat reeman.

¹⁵ Din ma been luxdoo reeman gojl,

nayaaw guidiajg reeman,

nayaaw tëë guiaaloj reeman.

Chitëë guguaa reeman,

guiguiejn reeman,

chignia' tëë reeman.

Din ad rënt reeman gui't reeman lon din günan laa reeman perdon.

¹⁶ Per xiquilbaadi cuguaaadi cagueijn tëëdi.

¹⁷ Din naj rni lojdi guial dád zien ree bén badëë xtiidx Dios loj ree bejn, në ree bén guban zi'c rayal, guyën reeman nuguiaa reeman ni cuguaaadi per ad baguaaat reeman laan. Guyën reeman niguiejn reeman ni caguejndi per ad biguejnt reeman laan.

Rusignia' Jesús xcwent bén rtie'ch bin

(Mr. 4:13-20; Lc. 8:11-15)

¹⁸ Yan gol bacaagdiajg xhie rën guiëb ni rnin lojdi xcwent bén bigtie'ch bin.

¹⁹ Bén rigueijn xtiidx Dios abi' ad rignia'taman laan, laaman naj zi'c bin biajb loj nejz, guial laa ri't gajc xindxab rquiedix ni bacaagdiajgaman.

²⁰ Guiaád bin biajb loj ree guiaj naj zi'c bén rigueijn xtiidx Dios, abi' dád nix ru luxdooan rigueijnman laan,

²¹ per guial najman zi'c cwaan ni ad yu't xliuj, ad rzudxi'chtaman. Chi rzagdiajman o rdxe'ch ree bejn laaman por xtiidx Dios, laa rusa'n gajcaman ni rliadxaman.

²² Abi' bin biajb loj ree yaquiëjch naj zi'c bén rigueijn xtiidx Dios, per guial mazri ruman xgab por ni yu' loj guidxliuj guie, rusquiee guialnaza'c riga' loj guidxliuj guie laaman, abi' zianzi rucwëéz rucaagdiajgaman xtiidx Dios achet sirv been ni bacaagdiajgaman.

²³ Per bin biajb loj yuj za'c naj zi'c bén rigueijn xtiidx Dios abi' rignia'man laan rüjn tëëman zi'c rën Dios, zi'c ni cwa tibgayuu bin loj o zi'c ni cwa gayojn o ni cwa gajlbichii.

Trigo con gui'xhguijdx

²⁴ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c tijb bën badxe' ganax bin zagdxe loj xguiniaa.

²⁵ Per la'tgaj naga'yëjs gra reeman, bidxin bën rdxe'ch laaman guxübinman gui'xhguijdx ree loj trigo guin dxel ziaman.

²⁶ Abi' chi gulen trigo guin brii tëë dojn lojn në ree gui'xh guin ma yu' lojn.

²⁷ Dxel bicojn ree xmojs bën naj xguiniaa laan laaman, rëb reeman: “Dad ¿nid ganax bin zagdxe badxe' loj xguiniaal ya? yan, ¿banza guza gui'xh yu' lojn?”

²⁸ Badxi'man laan rëbaman: “Wed tijb bën rdxe'ch naj bidgadxe' laan.” Dxel gunabdiix ree mojs guin lojman rëb reeman: “¿Xhie nal zudojxhan gui'xh guin ree ya?”

²⁹ Dxel rëbaman loj reeman: “Yajqui, chitëë guial gaxhidi gui'xh guin gaxhidi në trigo guin.

³⁰ Zagdxeli gol basa'nan din ni'snën trigo guin xt chi ma gojcan. Abi' chi guidxin dxej yado'p trigo guin guiën loj ree bën guto'p laan din yalojxgaj gui'xh guin yato'p reeman din gui'xhii reeman lënan zianz che'can. Dxelri yato'p reeman trigo guin din cu'chaaw reeman laa reen lod ruchaaw reen.”

Xcwent xhaj moxtajs

(Mr. 4:30-32; Lc. 13:18-19)

³¹ Be Jesús stijb ni naj zi'c cwent loj reeman, rëbaman:

—Xguialrniabee Dios naj zi'c xhaj moxtajs, ni rudxe' tijb bejn loj xguiniaa-man.

³² Abi' bin guin naj mazri ni wit loj gra ree bin, per chi rni'san laan rajc mazri ni narooob loj gra ree cwaan. Abi' guial narooob da't rajcan, xt rünj xguixbitia's ree biguijn xidxan.

Xcwent levadur

(Lc. 13:20-21)

³³ Be tëë Jesús stijb ni naj zi'c cwent loj reeman, rëbaman:

—Xguialrniabee Dios naj zi'c levadur ni rugo'ch tijb bëgunaa choon midid harin, abi' laan rusaaguij gra cob guin.

Chexc zeel ruliü Jesús con ni naj ree zi'c cwent

(Mr. 4:33-34)

³⁴ Gra ree ni balüü Jesús bejn ree, balüüman laa reeman con ganax ree ni naj zi'c cwent, achet balüüman laa reeman con ni ad najt ree zi'c cwent.

³⁵ Zian gojc persi guzojb xtiidx bën badëë xtiidx Dios loj ree bejn, chi rëbaman:

Con ganaxzi ni naj ree zi'c cwent gulün bejn ree, guiën loj reeman ni gad reeman gagbee düzd chi gocchaaw guidxliuj.

Rusignia' Jesús xcwent gui'xhguijdx

³⁶ Chi ma bazaadiidxnë Jesús benziin guin ree, dxel bayuman lënü con ree xbejnman, abi' gunabdiidx reeman lojman, rëb reeman:

—Basignia' dunujn xcwent gui'xhguijdx ni gulen loj guiniaa guin.

³⁷ Badxi' Jesúsán rëbaman:

—Bën rudxe' bin zagdxe guin naj Bën guxhaal Dios,

³⁸ abi' guiniaa guin naj guidxliuj. Guiáad bin zagdxe guin naj ree bën naj par loj xguialrniabee Dios. Abi' ree gui'xh guin naj bën naj ree par xinxxab.

³⁹ Guiáad bën rdxe'ch, bën guxübin trigo guin naj xinxxab. Abi' guial rado'p guialnaza'c guin rën guiëb chi nit guidxliuj, guiáad ree bën yato'p guialnaza'c guin naj ree xianjl Dios.

⁴⁰ Zian zi'c rado'p ree gui'xhguijdx guin par che'c reen, zian gac chi nit guidxliuj.

⁴¹ Bén guxhaal Dios guixhiaal ree xianjlaman din yabëë reeman bén rayal ree yarii loj xguialrniabeeman, bén ruzaalguiiw bejn ree din güün reeman dol në gra ree bén cayünj dol.

⁴² Abi' guzaal reeman laa reeman loj bajl lod goon reeman xt gaw lay reeman.

⁴³ Dxel bén naban ree zi'c rën Dios, guidiin reeman bacha' loj xguialrniabee xDad reeman Dios, zi'c rdiin gubijdx bacha'. Bén rën gucaagdiajg, gol bacaagdiajg.

Xcwent ni lasajc

⁴⁴ Xguialrniabee Dios naj zi'c tijb ni lasajc da't, ni naguie'ch loj tijb guidxliuj. Abi' rdxejl tijb bejn laan zianz ruquie'chaman laan stijb, lod gulëëman laan. Abi' dád rabaaman ruto' gra ni rajpaman persi rsiiman guidxliuj guin.

Xcwent perl

⁴⁵ Rni tëën lëjt: Xguialrniabee Dios naj zi'c tijb bén rguuil perl zagdxe din siiman laan.

⁴⁶ Chi rdxejlaman tijb perl lasajc, ruto' gra ni rajpaman abi' rsiiman laan.

Xcwent guijxh rniaaz bëjl

⁴⁷ Abi' tëë xguialrniabee Dios naj zi'c tijb guijxh ni ruzaal reeman loj nijs abi' rniaazan graloj bëjl.

⁴⁸ Dxel chi ma gudxa guijxh guin rabëë reeman laan ro' nijs guin, abi' rbej reeman rabe reeman loj bëjl guin, dxel ragu' reeman be zagdxe lën dxüm guiáad be ad najt zagdxe rusëëb reeman.

⁴⁹ Zian gac dxej nit guidxliuj, gui't ree xianjl Dios yabe reeman benmal loj ree benza'c.

⁵⁰ Abi' guzaal reeman benmal guin ree loj bajl lod goon reeman abi' xt gaw lay reeman.

Bén rbe nicüb në ni yojx

⁵¹ Dxel gunabdiidx Jesús loj ree xbejnman, rëbaman:

—¿Rignia'di gra ni canin lëjt ya?

Badxi' reeman laan rëb reeman:

—Rayignia'nan, Dad.

⁵² Dxel rëb Jesús loj reeman:

—Gra ree mextr ni rajc ley, abi' cusiid reeman xhienaag naj xguialrniabee Dios, laa reeman naj zi'c tijb bén rbe nicüb në ni yojx loj gra ni rajpaman.

Badxin Jesús Nazaret

(Mr. 6:1-6; Lc. 4:16-30)

⁵³ Chi gulox gunee Jesús loj reeman zian, zianz bazaman.

⁵⁴ Dxel badxin ladxaman, ni guzuloj culüüman bejn ree lën xyadoo reeman. Abi' dád badxaloj ree bén guin, rëb reeman:

—¿Ban guin basiidaman gra ree ni rajcaman? ¿Chexquiza zeel rajc rünman milagr ree?

⁵⁵ ¿Nid laaman naj xi'n carpinter ya, abi' xniaaman naj Li, guiáad ree bijchaman naj Jacob, Xiëb, Simón, në Judas?

⁵⁶ ¿Nid luguiedx guie zojb ree bizanman ya? ¿Banza guin basiidaman gra ree ni rajcaman?

⁵⁷ Abi' ad bidxga't reeman Jesús. Per rëbaman loj reeman:

—Bantëez guin rajp ree bejn respejt tijb bèn rudëe xtiidx Dios loj ree bejn, per ladxaman achut rajp laaman respejt ni'qui lidxaman.

⁵⁸ Abi' ad zient milagr beenman yagaj guial ad bililadxt reeman laaman.

14

Güjt Waj Bén baroobnijs bejn ree

(Mr. 6:14-29; Lc. 9:7-9)

¹ Tiampzii Herodes bèn canabee niz Galilea, biguiejnman ni cayüjn Jesús.

² Abi' rëbaman loj ree xbejnman:

—Waj bèn baroobnijs bejn ree, laaman baban zatijb, zeel rajpaman guial-riabee rüjnman milagr ree.

³ Rëb Herodes zian guial laaman gunabee biniaaz Waj, abi' bixiiman con caden dxel badxe' reeman laaman ladxguiib. Been Herodes guin zian por Herodías lacheel bijchaman bèn la Felip,

⁴ guial rëb Waj guin loj Herodes:

—Ad laat guial zojbnël laagajc lacheel bijchil.

⁵ Guyèn Herodes nugüjtaman Waj, per bidxebaman xhie nüjn ree bejn laaman guial graczi reeman rëb Waj naj tijb bèn rudëed xtiidx Dios loj ree bejn.

⁶ Per chi baza' Herodes ijz, brii xi'n Herodías baya'm loj ree xbioozaman. Abi' dád bayuladx Herodes zi'c baya'm,

⁷ dxel rëb Herodes gudëedaman xhietëez ni guiniabim.

⁸ Abi' xniaam rëb lojm xhie guiniabim, dxel rëbim loj Herodes:

—Banee guijc Waj bèn ruroobnijs bejn ree, baneen loj tijb pliajt.

⁹ Dád guyunaya rey Herodes, per guial mal baya'n reeman diidx niz loj gra ree xbioozaman, gunabeeman xsuldadaman gudëed reeman ni gunabim.

¹⁰ Dxel gunabeeman guitü' reeman guijc Waj lën ladxguiib guin,

¹¹ abi' bidxinnë reeman laan loj tijb pliajt badëed reeman laan lojm, dxel bayümin loj xniaam.

¹² Zianz bidxin ree xbejn Waj baca' reeman xcuerpaman persi biquie'ch reeman laaman. Dxel bicojn reeman Jesús.

Ruyaan Jesús gaay mil bejn

(Mr. 6:30-44; Lc. 9:10-17; Jn. 6 :1-14)

¹³ Chi gogbee Jesús zian, guyuman loj tijb barcw zëman niz lod achutczzi zojb din su laazaman. Chi gogbee ree bejn, dxel brii ladx reeman zë guia'zi reeman lod guidxinman.

¹⁴ Chi bariü Jesús loj barcw guin baguiaaman bèn guixiuj ree riga' yagaj, bayaman laa reeman abi' bayüjnman bënragxuü zinë reeman.

¹⁵ Chi ma gudxe, gubig ree xbejnman lojman rëb reeman:

—Ma gudxe yan, abi' achut bejn zojb niz guie. Güjdx loj ree bèn guin ma gojl yaguiaj reeman, din che reeman guiedx lod sii ni gaw reeman.

¹⁶ Per badxi' Jesúsán rëbaman:

—Ad rüjnt naguiejn yaguiaj reeman, lëjt gol badëe ni gaw reeman.

¹⁷ Badxi' reeman laan rëb reeman:

—Per gaayzi guidxtil naca'n con zatio'p bëjl.

¹⁸ Dxel rëb Jesús loj reeman:

—Gol tanë reen guie.

¹⁹ Dxel gunabeeman gurej gra ree bèn guin loj guixya'. Abi' cwa'man guigaay guidxtil guin con grop bëjl guin. Dxel gules lojman xanyabaa

badëeman quixtëe loj Dios, abi' gula'man guidxtil guin badëeman laan loj ree xbejnman persi gudi's reeman laan loj gra ree bën guin.

²⁰ Gra reeman gudaw xt bigdxinladx reeman, abi' staczi bacha reeman za chiptio'p dxüm ni baya'n.

²¹ Bën gudaw guin ree naj reeman cost gaay mil xinguaaw garenqui ree béngunaa con ree xindoo.

Riza Jesús loj nijs
(Mr. 6:45-52; Jn.6 :16-21)

²² Dxel gunabee Jesús xbejnman guyu reeman loj barcw din ned reeman téd gaj reeman stiblad ro' nijs guin, la'tgaj cuzaadiidx nëman benzien guin ree.

²³ Chi ma gulox bazaadiidx nëman laa reeman, dxel zë xtijbaman guijc tijb guia' din cwedx guiniabaman Dios. Chi gure guiaal xtijbzaman za' guijc guia' guin.

²⁴ Guíaad barcw guin zigt ma zën loj nijs, dád rliaro' xtüjp nijs guin laan guinal rliaj bi niz loj barcw guin.

²⁵ Chi ma cayreguiaal, zibig Jesús loj ree xbejnman rzaman loj nijs guin.

²⁶ Dxel baguiaa ree xbejnman laaman rzaman loj nijs guin, dád bidxeb reeman abi' gurixdiaj reeman rëb reeman:

—iTijb anman!

²⁷ Per guneenë Jesús laa reeman rëbaman:

—iGol bagu' luxdoodi! iNajn, ad rdxebidi!

²⁸ Badxi' Bëdan rëbaman:

—Dad, bal lüjn, gunabee gazan loj nijs guin guialan lojl.

²⁹ Abi' rëb Jesús lojman:

—Guda.

Dxel baguiaajt Bëd loj barcw guin, rzaman loj nijs guin zëman loj Jesús.

³⁰ Per chi baguiaaman bidoxhan cabi' dxel bidxebaman, abi' guial guzuloj cazëebaman xan nijs guin guridxa'man rëbaman:

—iGognë naj, Dad!

³¹ Loj hor ziigajc basli yaa Jesús gunaazaman yaa Bëd, rëbaman lojman:

—iChexc zeel ad riladxza'ctil, chexc zeel yu' nawëëguil?

³² Abi' chi bayë'p reeman loj barcw guin, laa bacwëëz gajc bi guin.

³³ Guíaad ree bën yu' loj barcw guin bazuxib reeman loj Jesús, rëb reeman:

—Diidxliczi lüjn naj xi'n Dios.

Rayüjn Jesús bënragxuu ree Genesaret
(Mr. 6:53-56)

³⁴ Chi gudëd reeman loj nijs guin dxel bidxin reeman xyuj ree bën Genesaret.

³⁵ Abi' ree bën niz ni bayünbee reeman Jesús, abi' guidibczi niz yagaj gutie'ch reeman diidx guial za'man ni. Dxel binë ree bejn bënragxuu ree lojman,

³⁶ guzajc reeman liaadx lojman din tiëbaman gugaal reeman majsi guia'zi xabaman. Abi' gra ree bën bagaal xabaman bayajc.

15

Ni rüjn persi rajc bejn bëndol
(Mr. 7:1-23)

¹ Bénfarisew ree con ree mextr rajc ley, bën za ree Jerusalén, gubig reeman loj Jesús abi' gunabdiidx reeman lojman, rëb reeman

² —¿Chexc zeel ad zinalt ree xbejn costumbr ni basa'n dux béngulal ree? ¿Chexc zeel ad zinalt reeman costumbr zi'c rayal gunaa reeman chi gad reeman gaw?

³ Dxel rëb Jesús loj reeman:

—Laadx léjt, ¿chexc zeel rüjndi xtiidx Dios tiblax persi zinal xcostumbridi?

⁴ Din Dios rëb: “Gojp respejt xDadil con xnial”, abi’ “Bén rniee diidxguijdx loj xdadaman o xnialaman ya, rayal guiétaman.”

⁵ Per léjt rëb zile' guiëb bejn loj xdadaman o xnialaman: “Ad zile't günan lüj yudar, din gra ni ra'pan naj par Dios.”

⁶ Rëbidi gual bén guinee zian, ad zile't güün yudar xdadaman con xnialaman, abi' zian rbëëladxi xtiidx Dios persi zinal xcostumbridi.

⁷ ¡Bén rusquiee! ¡Rüjnzidi gual nabandi xnejz! Waliqni ni gunee Isaías, bén badëë xtiidx Dios loj ree bejn, chi rëbaman:

⁸ Bén guie ree rëbzi reeman rniajchi' reeman naj, per ad rënt reeman naj con guidib luxdoo reeman.

⁹ Xlia'czi rniajchi' reeman naj,

abi' rulüü reeman bejn ree ganaxzi ni rbëëguijc ree bénguidxliuj.

¹⁰ Dxel gurejdx Jesús ben zien riga' ree yagaj, abi' rëbaman loj reeman:

—Gol bacaagdiajg, gol bignia' tëë ni ganin lojdi.

¹¹ Ad ni rawt bejn rüjn laaman béndol, ni ririi ro'man laan rüjn laaman béndol.

¹² Dxel gubig ree xbejn Jesús lojman, rëb reeman:

—¿Gogbeel ya bidxe'ch ree bénfarisew chi biguiejn reeman ni guneel?

¹³ Badxi' Jesús laan rëbaman:

—Gra ni ad zëéd por za Dadan Dios bén yu' xanyabaa, yu' dxej nitan.

¹⁴ Zeel gol basa'n reeman din laa reeman naj zi'c tijb bénlutia'p rulüü stijb bénlutia'p ban niz cheman. Abi' bal tijb bénlutia'p gulüü stijb bénlutia'p guin, zayajb grop reeman ro' bala'.

¹⁵ Dxel rëb Bëd loj Jesús:

—¿Basignia' dunujn xhie rën guiëb ni guneel?

¹⁶ Badxi' Jesúsán rëbaman:

—¿Wen, ni'qui léjt ad rignia'tan ya?

¹⁷ ¿Id rignia'di ya gual gra ni raw bejn rej lénman abi' rariin?

¹⁸ Per diidx ririi ro' bejn, luxdoozan, abi' laan rüjn laaman béndol.

¹⁹ Din luxdoo bejn za graloj ree xgabmal, gualrugüjt bejn, gual rüjn nidx-uudx, gualrzunë lacheel ben ren, gualrban, gualrusquiee në gualrniee diidxguijdx loj lasa'.

²⁰ Gra ree ni guie naj ni rüjn bejn béndol. Per gual ad zunaat bejn zi'c naj costumbr ni rayal güün bejn chi gadaman gaw, ad laatan naj ni rüjn laaman béndol.

Tijb béngunaa Canaán bililadx Jesús

(Mr. 7:24-30)

²¹ Chi baza Jesús yagaj zëman niz Tiro në niz Sidón.

²² Abi' yagaj zojb tijb béngunaa za niz Canaán, briiman, rbixdiajman rëbaman loj Jesús:

—¡Dad, xdiaa Davi, baya naj! Da xi'ndxa'pan yu' bendxab luxdoo, dád rusagziman laam.

²³ Abi' Jesús ad badxi'taman xtiidx béngunaa guin. Dxel gubig ree xbejnman lojman, rëb reeman:

—Bidxga' béngunaa guin, din yaguiajman, din rbixdiajman nalaman dunuj ree.

²⁴ Dxel rëb Jesús:

—Dios guxhaal naj din günan yudar ganaxzi ree bén Israel zë loj nejz mal.

²⁵ Per béngunaa guin bigzuxibaman loj Jesús, rëbaman:

—¡Dad, gognë naj!

²⁶ Badxi' Jesúsán, rëbaman:

—Ad zagdxet naj chiquied bejn guidxtil loj xi'nman din gudëëdaman laan loj ree bë'cw.

²⁷ Badxi' béngunaa guinan, rëbaman:

—Waliquil, Dad, per në ree bë'cw ruto'p guiadxtil laay ni ryajb xan xmex bën naj xbë'cw laa reeb.

²⁸ Dxel rëb Jesús lojman:

—¡Na, waliquil rliladxil con guidib luxdool! Gac zi'c rënl.

Loj hor guin gajc bayajc xi'n bén guin.

Rayüjn Jesús zien ree béragxuu

²⁹ Baza Jesús yagaj, bidxinman ro' nijs Galilea, dxel wë'paman guiyc tijb guia' abi' gurejman yagaj.

³⁰ Dád zien bejn bido'p lod za'man. Binë reeman bencoj ree, në ree bénlutia'p, në ree bén ad rüjnt xu'c dxiin, con ree bengop në zien ree béragxuu ren ree, badxig reeman laa reeman loj Jesús, abi' bayüjnman laa reeman.

³¹ Dád badxa loj ree bejn chi baguiaa reeman ma rníee ree bengop, ma bayajc xu'c ree bén ad rüjnt dxiin xu'c, guiáad ree bencoj ma rza reeman abi' ree bénlutia'p ruguiaa reeman. Zianz guzuloj cuza't reeman zagdxë xDios ree bén Israel.

Ruyaan Jesús tajp mil bejn

(Mr. 8:1-10)

³² Abi' gurejdx Jesús bén naj ree xbejnman, rëbaman loj reeman:

—Rayan bén guin ree, din ma gojc choon dxëj za' reeman con naj, abi' achet ni gaw reeman. Ad rëntan yagu'nejzan laa reeman sin guialraw ad nial yadaj reeman niz lunejz.

³³ Dxel rëb ree xbejnman lojman:

—Per ¿ban guin yuca'n ni gaw ree benzien guin, zi'c naj guie lod achutczí bejn zojb?

³⁴ Gunabdiidx Jesús loj reeman, rëbaman:

—¿Bël guidxtil ca'di?

Badxi' reeman laan rëb reeman:

—Gajdx guiadxtil con zatio'p choon bëjl.

³⁵ Dxel gunabee Jesús gurej gra ree bén guin luyuj.

³⁶ Abi' cwa'man guigajdx ree guiadxtil guin con ree bëjl guin, badëëman quixtëë loj Dios. Dxel gula'man laa reen, badëëman laa reen loj ree xbejnman persi gudi's reeman laa reen loj gra ree bén guin.

³⁷ Gra reeman gudaw xt bigdxinladx reeman. Abi' staczi bacha reeman gajdx dxüm ni baya'n.

³⁸ Bén gudaw ree naj reeman tajp mil xinguaaw, garenqui ree béngunaa con ree xindoo.

³⁹ Dxel bazaadiidxné Jesús laa reeman, abi' guyuman loj barcw ziaman niz Magadán.

16

*Rniab reeman güün Jesús tijb milagr**(Mr. 8:11-13; Lc. 12:54-56)*

¹ Bénfarisew ree con ree bénsaducew bidxin reeman lod za' Jesús, abi' par güün reeman laaman prueb gunab reeman lojman din güünman tijb milagr din guiguien guial Dios guxhaal laaman.

² Per badxi' Jesús laan rëbaman:

—Wadxe ree chi ruguiaadi naxnia xanyabaa, rëbidi: “Zagdxe gac guixie din naxnia xanyabaa.”

³ Guíaad rsil chi naxnia xanyabaa yu' tée zäj, rëbidi: “Ad laat gac yandxej.” ;Bén rusquie!, bal ragbeedi xhie rën guiëb sen yu' xanyabaa, ¿chexc ad rignia'tidi xhie rën guiëb gra ni cuguaadi yan?

⁴ Bén mal, ad rliadxtidi abi' rniabidi günan tijb milagr, per achet guguaadi, tijbzi zi'c guzac Jonás.

Dxel basa'n Jesús laa reeman, ziataman.

*Xlevadur ree bénfarisew**(Mr. 8:14-21)*

⁵ Dxel gudëdnë ree xbejnman stiblad ro' nijs guin, per bayanladx ree xbejnman ninë reeman guiadxtil.

⁶ Abi' rëb Jesús loj reeman:

—Gol gojp cudad con xlevadur ree bénfarisew në ree bénsaducew.

⁷ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

⁸ Gogbee Jesús ni canee reeman abi' rëbaman loj reeman:

—¿Chexc zeel rëbidi guial ad ca'tidi guiadxtil? Ta'nnijt rliadxidi naj.

⁹ ¿Staczi ad rignia'tidi ya? ¿Nid rusaaladxidi ya chi gudi'san gaay guiadxtil loj gaay mil bejn, abi' zabël dxüm ni baya'n bato'pidi?

¹⁰ ¿Nid zaladx téeädi ya chi gudi'san gajdx guiadxtil loj tajp mil bejn, abi' zabël dxüman bato'pidi?

¹¹ ¿Chexc zeel ad rignia'tidi guial ad guiadxtiltan cuzatan lojdi, chi rnin lojdi gapidi cudad con xlevadur ree bénfarisew në ree bénsadusew?

¹² Dxel bignia' ree xbejnman guial ad xlevadurt guiadxtilan cuza'taman loj reeman, rëbaman zian din gap reeman cudad con ni rulüü ree bénfarisew në ree bénsaducew.

*Rëb Bëd guial Jesús naj Cristo**(Mr. 8:27-30; Lc. 9:18-21)*

¹³ Chi bidxin Jesús niz Cesarea de Filipo, gunabdiidxaman loj ree xbejnman, rëbaman:

—¿Chu rëb ree bejn, naj Bén guxhaal Dios?

¹⁴ Badxi' reeman laan, rëb reeman:

—Yu' reeman rëb guial Wajn, bén baroobnijs bejn ree. Yu'za reeman rëb guial Elíasan, bén badëë xtiidx Dios loj ree bejn, yu' tée reeman rëb guial Jeremíasan, bén badëëd xtiidx Dios loj ree bejn o stijb ben ren ya, bén badëëd xtiidx Dios loj ree bejn.

¹⁵ Dxel rëbaman loj reeman:

—Laadx lëjt, ¿xhie nadi, chu naj?

¹⁶ Badxi' Simón Bëdan, rëbaman:

—Lüjn naj Cristo. Lüjn naj Xi'n Dios naban.

¹⁷ Dxel rëb Jesús lojman:

—Xiquilbaal, Simón, xi'n Jonás, din ad bénguidxliujt guna lojl ni guinieel, da Dadan bén yu' xanyabaa laaman naj bén guna lojl.

¹⁸ Abi' naj rni lojl, Béd, (rèn guiéban “guiaj”) lüj naj zi'c tijb guiaj ni gacné lidxan, din por lüj grii ree bén gac da bejnan abi' ni'qui guialgüjt ad zunijtt laa reeman.

¹⁹ Naj gune lüj guialrniabee ni za xanyabaa, abi' gra ni tiëbil gac loj guidxliuj guie ma naj gacan xanyabaa, guiáad ni ad zatiëjbtíl gac loj guidxliuj guie ad najt gacan xanyabaa.

²⁰ Dxel gunabee Jesús loj gra ree xbejnman guial achu loj guiéb reeman guial laaman naj Cristo.

Rugojn Jesús guiétaman
(Mr. 8:31-9:1; Lc. 9:22-27)

²¹ Diisd nadxel guzuloj Jesús bagojn ree xbejnman guial naj cheman Jerusalén, abi' ree guxtis Israel con ree bixhioz rniabee ree bixhioz në ree mextr rajc ley, laa reeman naj bén gusagzi laaman, gugüjt reeman laaman, per ni yayon dxej yabanman.

²² Dxel gulëëcaan Béd laaman, rëbaman lojman:

—¡Dios ad zabëëladxt lüj, Dad! ¡Laaman ad zatiëjbt saquil zian!

²³ Per badxi' loj Jesús, rëbaman:

—¡Basa'n naj, xindxab!, ad rüjn nawëëguil lon. Din ad por Diost zëéd ree xgab ni rüjnl, xixgab bénguidxliujn rüjnl.

²⁴ Dxel rëb Jesús loj ree xbejnman:

—Bal yu' bén rën gac da bejnan ad zajct güünman zi'c naj xixgabaman, siibnejzaman guialzi ni tëdzaman abi' guidnalaman naj.

²⁵ Din bén mazri rën xguialnaban ni rajpaman loj guidxliuj guie zadxin dxej gunijttaman laan. Per bén guiët por naj, zajpaman guialnaban tiblyaa con Dios.

²⁶ Xhieczy gan gap bejn gra ni yu' loj guidxliuj, abi' nitaman loj Dios. Din ad zile't sii bejn xguialnabanman xanyabaa.

²⁷ Abi' Bén guxhaal Dios, gui'taman con xguialrniabee xDadaman Dios në ree xianjl Dios din gudëëman ni rayal tijbgaj bejn, bal gonin been bejn.

²⁸ Diidxliczi rnin lojdi guial yu' ree bén riga' guie ad zëjtt reeman chi gad reeman guguiaa Bén guxhaal Dios, gui'taman con xguialrniabeeman din nabeeman.

17

Bidxaa Jesús loj choon ree xbejnman
(Mr. 9:2-13; Lc. 9:28-36)

¹ Chi gudëé xho'p dxej, binë Jesús Béd, në Jacob con Waj bijch Jacob, binëman laa reeman guijc tijb guía' ya.

² Ni bidxaa Jesús niz loj reeman. Dád balaa bacha' lojman zi'c rulaa gubijdx bacha', guiáad xabaman bayajcan naquich, balaa tëën bacha' zi'c guij.

³ Abi' loj hor guin baguiaa reeman Moisejs con Elías cayünë reeman Jesús diidx.

⁴ Dxel rëb Béd loj Jesús:

—Dad, ¡zagdxe naj nadxu' ree guie! Bal rënl, günan choon ranch, tijban par lüj, tijban par Moisejs, stijban par Elías.

⁵ La'tgaj canee Béd zian, biguiajt tijb zaj xt guijc reeman ridiinan bacha', loj zaj guin brii cha' bejn rëbaman:

—Bén guie naj da Xi'n'an, bén rën da'tan, bén rabaanë' tëën, gol bacaagdiajg xtiidxaman.

⁶ Chi biguiejn ree xbejn Jesús diidx guin ree, bazuxib reeman basajb loj reeman xt luyuj, dád bidxeb reeman.

⁷ Dxel gubig Jesús lod za' reeman, baqui'man laa reeman, rëbaman:

—Gol guzuli, ad ridxebidi.

⁸ Abi' chi gules loj reeman achutri baguiaa reeman, tijbzi Jesús za' yagaj.

⁹ La'tgaj cayguiajt reeman ruguia' guin, rëb Jesús loj reeman:

—Achuczi loj guiëbidi ni baguiaadi, xt chi yaban Bén guxhaal Dios.

¹⁰ Dxel gunabdiidx ree xbejnman lojman, rëb reeman:

—¿Chexquiza zeel rëb ree mextr rajc ley guial yaløj Elías gui't?

¹¹ Badxi' Jesúsán, rëbaman:

—Walican guial yaløj Elías gui't, laaman guzuxnejz gra.

¹² Per naj rni lëjt guial mal bi't Elías, abi' ad bayagbeet ree bejn laaman, beennë reeman laaman ni guyëntzi reeman. Abi' ziangajc gusagzi reeman Bén guxhaal Dios.

¹³ Dxel gogbee ree xbejnman guial Wajn bén baroobnijs bejn ree cuza'taman.

Rayün Jesús tijb xin rëjtya'

(Mr. 9:14-29; Lc. 9:37-43)

¹⁴ Chi badxin Jesús con guiyon ree xbejnman, lod cabëz ree ben zien laaman bibig tijb xinguaaaw lojman, bazuxibix lojman rëbix:

¹⁵ —Dad, baya da xi'n'an, din dád rzagdiajx rëjtya'x. Bëlczi volt riyajbix lojguij o lojnijs ya.

¹⁶ Bidnë'n laax loj ree xbejnl, per ad rajct rayün reeman laax.

¹⁷ Badxi' Jesúsán, rëbaman:

—¿Benguijdx, bén ad rliladxt! ¿Xt goc gazunë'n lëjt? ¿Xt goc gadaanán lëjt? Gol tanë xinzii guie.

¹⁸ Dxel gudilë Jesús xindxab guin, babëëman laax luxdoo xin guin. Loj hor guin gajc bayajquix.

¹⁹ Abi' gunabdiidx ree xbejn Jesús lojman lood ren, rëb reeman:

—¿Chexc zeel ad gojct nalëën xindxab guin luxdoo xin guin?

²⁰ Dxel rëb Jesús loj reeman:

—Guial ta'nzi rliladxidi. Naj rni lojdi bal naj xguialrliladxidi majsi zi'ctzi naj xhaj moxhtajs, zile' guiëbidi loj guia' guin: “Bisüd guie, bisob lood ren”, zucaagdiajgan xtiidxidi. Achetctzi gac nawëëg par lëjt.

²¹ Per par yarii lasa' ree xindxab guie ryaadx chu cwedx guiniab Dios guiba'n tëë.

Rugojn Jesús zatijb guial guiëtaman

(Mr. 9:30-32; Lc. 9:43-45)

²² La'tgaj za' Jesús niz Galilea con ree xbejnman, rëbaman loj reeman guial yayü reeman Bén guxhaal Dios loj ree bejn,

²³ abi' gugüjt reeman laaman, per ni yayon dxej yabanman. Chi biguiejn ree xbejnman zian, dád guyu naya reeman.

Ni rajx par yadoo

²⁴ Chi badxin Jesús con ree xbejnman guiedx Capernaum, bén ruquijx ree impuest par yadoo wej reeman loj Bëd bignabdiidx reeman, rëb reeman:

—¿Rguijx xmextril impuest par yadoo ya?

²⁵ Badxi' Bëdan, rëbaman:

—Riguijxcaman laan.

Dxel chi bayu Béd lēnū lod za' Jesús, yalojli Jesús gunabdiidx lojman, rēbaman:

—¿Xhie naladxil, Simón? ¿Chu rguijx impuest loj ree rey yu' loj guidxliuj guie? ¿Xi'n reeman ya o benzit ree?

²⁶ Badxi' Béd laan rēbaman:

—Benzit ree.

Dxel rēb Jesús:

—Abi' ree bēn ladx reeman ad rguijxt reeman laan.

²⁷ Per chitēē guidxe'ch reeman, wej ro' nijs, bazaal xiansuelil, dxel bējl yaloj ni guiniaazil babēēb. Ro' bējl guin guidxelil tijb cintabl, con laan bitijx dux impuest.

18

¿Chu mazri zobjloj?

(Mr. 9:33-37; Lc. 9:46-48)

¹ Lēn ree dxejzii bidxin ree xbejn Jesús lod za'man, abi' gunabdiidx reeman lojman, rēb reeman:

—¿Chu mazri zobjloj lod rniabee Dios?

² Dxel gurejdx Jesús tijb xindoo, bazujman laax galay reeman,

³ abi' rēbaman:

—Diidxliczi rnin lojdi bal id zayūjndi xgab por xtolidi, bal id zajc tēēdi zi'c tijb xindoo, ad zutidi lod rniabee Dios.

⁴ Bēn gūūn naya loj Dios, gac tēēman zi'c xindo guie, laaman gac bēn mazri zobjloj lod rniabee Dios.

⁵ Abi' bēn yaca' tijb xindoo, por naj, najn raca'man.

Bēn rūjn persi ryajb ree bejn loj dol

(Mr. 9:42-48; Lc. 17:1-2)

⁶ 'Bal chu gusajb tijb bēn qui rliadxri naj loj dol, zagdxeli guixhii reeman tijb guiajro' yējnman guzaal reeman laaman xt xan nijs.

⁷ ¡Proba bēnguidxliuj guial yu' da't ni rusajb laaman loj dol! Zianczi yu' ni mal guin loj guidxliuj, per ¡proba bēn gusajb bejn ree loj dol!

⁸ 'Zeel, bal laagajc yaal o guia'l rusajb lūj loj dol, zagdxeli gutū'n bazaalan zijt, din zagdxeli chu'l xanyabaa con tiblodzi yaal o con tiblodzi guia'l, luar chu'l con groplad yaal o groplad guia'l loj bajl ni ad yu't dxej yayū'.

⁹ Abi' bal laagajc guiaalojl rusajb lūj loj dol, gulēn bazaalan zijt, zagdxeli chu'l con tiblodzi guiaalojl xanyabaa, luar chu'l con gropladan loj bajl yu' gabijl.

Xcwent xiil gunit

(Lc. 15:3-7)

¹⁰ 'Ad guiniajgaadi loj ree bēn qui rliadxri naj. Din diidxliczi rnin lējt guial xanyabaa yu' ree anjl rniaj laa reeman zianczi za' reeman loj da Dadan Dios bēn yu' xanyabaa.

¹¹ Guiaad Bēn guxhaal Dios zēēdaman par ree bēn ad zinalt xnejz Dios din laa reeman loj dol.

¹² '¿Xhie naladxidi? Bal tijb bejn rajp tibgayuu xiil, abi' rizēēb tijbib, ¿nid zusa'nman zatajpgajlchiinbitapib dajn ya din chigdiilaman be bizēēb guin?

¹³ Abi' bal yadxejlaman laab, diidxliczi rnin mazri yabaanēman laab guial loj tajpgajlchiinbitap be ad bizēēb quint.

14 Ziangajc dux Dad ree Dios b́en yu' xanyabaa ad ŕentaman nit ni'czi tijb ree b́en qui ŕililadxri laaman.

Xhienaag yaguieen perdon du lasa' ree
(Lc. 17:3)

15 'Bal xhie tijb ni mal ǵuun lasa'l ĺuj, guneeńeman ĺujzi din gagbeeman xhie falt badxe'man. Bal guidxga'man xtiidxil, ma beenl gan yaneeńel laaman zagdxé.

16 Bal id ridxga'man ĺuj, biné zatijb o zatio'p bejn, din chigneeńedi laaman din con xtiidx tio'p o choon bejn guiguien guial ma bigneeńel laaman.

17 Dxel bal ni'qui xtiidx reeman ad ridxga'taman, bagojn ree b́en zinal xnejz Dios, abi' bal ni'qui xtiidx reeman ad ridxga'taman, dxel ma guguaadi laaman zi'c tijb b́en ad ŕililadxt Dios o zi'c tijb b́en ruquijx impuest par Rom.

18 'Diidxliczi ŕnin, gra ni ad zatiéjbtidi gac loj guidxliuj guie ad rajctan xanyabaa, guíaad ni tiébidi gac loj guidxliuj guie mal rajcan xanyabaa.

19 'Rni téen ĺejt: Bal yaya'n tio'pidi diidx loj guidxliuj guie, par guiniabidi xhienin loj da Dadan b́en yu' xanyabaa, laaman guneé laan.

20 Din lod rado'p tio'p o choon bejn por naj, laa naj za' galay reeman.

21 Dxel gubig Béd gunabdiidxaman loj Jesús, ŕebaman:

—Dad, ¿bél volt rayal ǵunan perdon lasa'n, bal ǵuunman naj xhienin? ¿Xt gajdx volt ya?

22 Badxi' Jesúsán ŕebaman:

—Ad gajdx voltizi rayal ǵuun lasa'l perdon, rayal ǵuunl perdon gajdx volt gayojnchi.

Xcwent b́en ad ŕijnt perdon lasa'

23 'Xguialrniabee Dios naj zi'c tijb rey ni been xgab guial ma gojl yaguujx ree xmojsaman lojman.

24 Chi guzulojman cayb́eeman cwent guin, bidxin tijb xmojsaman lojman b́en ral zro' da't.

25 Abi' guial achet rajp b́en guin din yaguujxaman ni ralaman, gunabee rey guin to'man loj ree bejn né lacheelaman con ree xi'nman nétéé gra ni rajpaman din chile' yaguujxaman di'n guin.

26 Dxel bazuxibaman loj rey guin, beenman naya ŕebaman: “Dad, gojp naj pacens zaguixcan graczi ni ralan lojl.”

27 Zianz baya rey guin laaman, beenman laaman perdon gra ni ralaman, abi' baslaaman laaman ziaman.

28 Per chi bari mojs guin yagaj, badxajgaman tijb b́en ŕujnńeman dxiin, ralaman ta'nzi milia lojman. Dxel gunaazaman laaman guzuloj caguiajman yéjnman, ŕebaman: “¡Baguujx ni ralil lon!”

29 Dxel bazuxib b́en guin lojman beenman naya ŕebaman: “Gojp naj pacens zaguixcan graczi ni ralan lojl.”

30 Per ad guyént b́en guin, badxe'man laaman ladxguuib xt lodzi yaguujxaman di'n guin.

31 Chi baguiaa ree los demazri ree xmojs rey guin, dád gognaa luxdoo reeman, abi' wej reeman biguiedx reeman lojman gra ni goc.

32 Dxel gurejdx rey guin mojs guin, zianz ŕebaman lojman: “¡Mojs guiidx! Benan perdon gra ni ralil lon guial beenl naya.

33 ¿Nid ńegajc ĺuj rayal naya xcompniaril ya, zi'cgajc bayan ĺuj?”

34 Abi' guial tant balen rey guin, gunabeeman badxe' reeman laaman ladxguuib xt lodzi baguujx gra ni ralaman.

35 Basnuu Jesúsán ŕebaman:

—Ziangajc güünnë da Dadan lëjt, bën yu' xanyabaa, bal id züjn perdon lasa'di con guidib luxdoodi ni rüjnnë reeman lëjt.

19

Ruliüü Jesús xcwent guial rala' lasa'

(Mr. 10:1-12; Lc. 16:18)

¹ Chi gulox gunee Jesús zian, bazaman niz Galilea, zëman niz Judea, niz stiblad ro' guiw Jordán.

² Zien ree bejn binal laaman, yagaj bayünman bënragxuu ree.

³ Abi' tio'p choon ree bënfarisew bibig loj Jesús, dxel par güün reeman laaman prueb, gunabdiidx reeman lojman rëb reeman:

—¿Zile' yala' bejn lacheelaman por xhiedxitzinin ya?

⁴ Badxi' Jesúsán rëbaman:

—¿Nid wayoolidi loj xtiidx Dios ya, guial diizd guia'xchej Dios “been xinguaaaw në béngunaa”?

⁵ Rëb tëëman: “Zeel xinguaaaw gusa'n xdad xniaax din guibannë lacheelix, dxel grop reex ma gac zi'c tijbzi bejn.”

⁶ Zianan zeel ad najtri reex tio'p, ma naj reex tijbzi. Zeel bénguidxliuj ad rayalt yala'man lasa' ni ma bachajg Dios.

⁷ Dxel rëb ree bënfarisew guin loj Jesús:

—¿Chexquiza zeel rëb Moisejs guial zile' yala' lacheel bejn, con gudëédaman gui'ch guial ma bala' lasa' reeman?

⁸ Badxi' Jesúsán, rëbaman:

—Cwëjb Moisejs gojc zian guial ad rëntidi guzoobidi diidx, per ad ziant gojc diizd guia'xchej.

⁹ Naj rni lojdi. Xin yala' lacheel, bal id za'në lacheelix xin ren, abi' tia'x ben ren dolan cayüjnx. Ziangajc xin tia' bën qui bala'ri lasa' guin dolan cayüjnx.

¹⁰ Dxel rëb ree xbejn Jesús lojman:

—Bal zian naj xcwent guial ru lacheel, zagdxeli ad zut lacheel bejn

¹¹ Badxi' Jesúsán rëbaman:

—Ad grat bejn zile' chignia' ni canin, bën ca'zi ree quiarguejn par chignia' reeman laan.

¹² Yu' bejn diizd rajlaman ad zëëdtaman loj guidxliuj par guxhliaman, yu'za reeman, bejn rüjn laa reeman zian. Abi' yu' reeman rüjn xgab guial zagdxeli guitie'ch reeman xtiidx Dios luar guxhliaa reeman. Bën rën chignia', gol bignia'.

Rüjnle' Jesús xindoo ree

(Mr. 10:13-16; Lc. 18:15-17)

¹³ Binë ree bejn xindoo ree lod za' Jesús, din guixhioob yaaman guijc reex cwedx guiniab tëëman Dios por laa reex, per ree xbejnman guzuloj cadilë reeman bën zinë ree laa reex.

¹⁴ Dxel rëb Jesús loj reeman:

—Gol baslaa gui't reex lon, ad bal rudxoondi, din lod rniabee Dios naj par ree bën naj zi'c laa reex.

¹⁵ Abi' guxhoob yaa Jesús guijc ree xindo guin, dxel ziaman.

Tijb xinrijcw

(Mr. 10:17-31; Lc. 18:18-30)

¹⁶ Bidxin tijb xin guin loj Jesús, abi' gunabdiidx lojman, rëbix:

—Mextr, ¿xhie ni zagdxë günan din ga'pan guialnaban tiblyayaa con Dios?

¹⁷ Dxel rëb Jesús lojx:

—¿Chexc zeel rniabdiidxil lon conin naj ni zagdxé? Achut naj benza'c, tijbzi Dios. Per bal rênl gapil guialnaban tiblyaaa con Dios, been zi'c rêb ree mandamiant.

¹⁸ Dxel gunabdiidxix loj Jesús rêbix:

—¿Con ree mandamiantan?

Badxi' Jesúsán, rêbaman:

—Ad gugüjtil bejn, ad sunêl lacheel ben ren, ad cwanl, ad cwêël xtiidx bejn,

¹⁹ gojp respejt xdad xniaal, guyên têë ree lasa'l zi'c rên lüj gajc.

²⁰ Dxel rêbix:

—Gra ree ni guin cayünan diidz najn xindoo, ¿xhieri ryaadx günan yan?

²¹ Badxi' Jesúsán, rêbaman:

—Bal rênl gaquil benza'c loj Dios, bigto' gra ni rajpil dxel gudêël milia guin loj ree bënprob. Zian gapil guialnaza'c xanyabaa. Zianz guidnalil naj.

²² Chi biguiejn xin guin zian, dád guyu nayax ziax, guial dád xinrijcwan.

²³ Dxel rêb Jesús loj ree xbejnman:

—Diidxiczi rnin lojdi: Dád nawêëg chu' benrijcw lod rniabee Dios.

²⁴ Naj rni lêtj. Adli nawêëgt téd tijb camell xan gagux, guial chu' tijb benrijcw lod rniabee Dios.

²⁵ Chi biguiejn ree xbejn Jesús zian, dád badxaløj reeman, abi' rêb reeman:

—¿Chuza zajc gac perdon loj Dios?

²⁶ Dxel baguiaa Jesús loj reeman, rêbaman:

—Nawêëg gac zian par bênguidxliuj, per par Dios achet ni nawêëg yu'.

²⁷ Abi' rêb Bêd lojman:

—Ma basa'nan graczi ni raya'pan, persi zudnaalan lüj. Abi' ¿xhieza yay-alan?

²⁸ Badxi' Jesúsán, rêbaman:

—Diidxiczi rnin lojdi chi guidxin dxej yacüb gra, guidxin têë dxej cwe Bën guxhaal Dios luar lod nabeeman, né lêtj, guial zidnalidi naj, cwedi loj chiptio'p ree luar lod nabeedi, din güün xguialguxtisidi loj guidxiptio'p ree xdiaa Israel.

²⁹ Abi' gra ree bën basa'n lidx, bijch, bizan, xdad, xniaa, xi'n, o guidxliuj ree por naj, zaca' reeman tibgayuu volt mazri guial loj ni basa'n reeman, zajp têë reeman guialnaban tiblyaaa con Dios.

³⁰ Per zien ree bën naj bën yaløj, gac reeman bën bigra, abi' zienza ree bën naj bën bigra, gac reeman bën yaløj.

20

Xcwent ree bën rüjn dxiin

¹ Rêb têë Jesús:

—Xguialrniabee Dios naj zi'c tijb bën rajp tijb guiniaaro', rsildoo briiman zitiilaman mojs güün dxiin loj xguiniaaman.

² Baya'nnêman laa reeman diidx plac quixaman tijb gaj reeman tibdxej, dxel guxhaalaman laa reeman loj xguiniaaman.

³ Dxel briiman stijb cost raca gaa rsil, abi' baguiaaman ben ren ree za' reeman galay luguiedx, achet xchiin reeman.

⁴ Zianz rêbaman loj reeman: “Gol biguieen dxiin loj da guiniaan, naj gaguix lêtj zi'c rayal.” Dxel zê reeman.

⁵ Cost garol dxej briiman stijb, abi' brii gajman cost raca choon wadxe ziangajc rêbaman loj ree bën riga' yagaj, bën achet xchiin.

6 Cost raca gaay wadxe wejman galay luguiedx guin stijb, abi' bidxaa-glojman ben ren ree, bèn achet ree xchiin, gunabdiidxaman loj reeman, rëbaman: “¿Chexc zeel za'di guin gudëdchej ad cayüjntidi dxiin?”

7 Badxi' reeman laan rëb reeman: “Achut wanee dxiin yaguieenan.” Dxel rëbaman loj reeman: “Në lëjt gol biguieen dxiin loj da guiniaan naj gaguix lëjt zi'c rayal.”

8 Chi ma gurej guiaal, rëb bèn naj xguiniaan loj bèn naaz dxiin guin: “Gurejdx ree mojs guin din quixil laa reeman, per yalojxgaj gudijx ree bèn bigra guyu, zianz quixil bèn guyu ree yaloj.”

9 Chi bidxin ree bèn guyu loj dxiin guin raca gaay wadxe, gojx tijbgaj reeman xieen tibdxej.

10 Dxel chi bidxin ree bèn guyu loj dxiin diizd rsil, gunaladx reeman niajx reeman mazri, per nëgajc reeman gojx xieen tibdxej.

11 Abi' chi cayajx reeman, guzuloj cadxe'ch reeman bèn naj xguiniaa laan,

12 rëb reeman lojman: “Bèn bigra guyu ree, been reeman dxiin tib horzi abi' zi'cgajc caguijxil dunujn gudijxil laa reeman, abi' dunujn badaanan baguieenan dxiin dëchej loj guialnalaa.”

13 Per rëb bèn guin loj tijb reeman: “Achet ni mal cayünan lüj. ¿Nid baya'n diidx ya plac gunen tia'l tibdxej?”

14 Cwa' ni bayalil baguiaj. Din naj rënan gaguixan bèn bigratë guyu zi'c gudixan lüj,

15 zajc günnë' da milian ni rëntzan. ¿O nadëdloj ya guial najn benza'c?”

16 Zianan zeel bèn naj ree bèn bigra gac reeman bèn yaloj, guiaad ree bèn yaloj gac reeman bèn bigra.

Bayon volt bagojn Jesús guial guiëtaman

(Mr. 10:32-34; Lc. 18:31-34)

17 Chi zë Jesús Jerusalén, gurejdx guidxiptio'p ree xbejnman tibläd, rëbaman loj reeman:

18 —Ganin lëjt, ziyö' ree Jerusalén, lod yayü reeman Bén guxhaal Dios, loj ree bixhioz rniabee ree bixhioz në loj ree mextr rajc ley, abi' laa reeman nabee guiëtaman,

19 yayü reeman laaman loj ree benzit, din guze' reeman laaman quin tëe reeman laaman, abi' gucaa reeman laaman loj crüjz, per yayon dxej yabanman.

Ni gunab xniala Jacob con Waj

(Mr. 10:35-45)

20 Gubig lacheel Zebedeo loj Jesús con grop ree xi'nman, bazuxibaman lojman din guiniabaman ni rënman.

21 Gunabdiidx Jesús lojman, rëbaman:

—¿Xhie rën!

Badxi' bèn guinan, rëbaman:

—Rënan nabeel cwe tijb da xi'nän xladbeel, stijbim xladruvejsil, chi ma canabeel.

22 Dxel rëb Jesús:

—Ad ragbeetidi ni rniabidi. ¿Wen zajc tëdidi guialzi zi'c naj ni gadëedan ya?

Badxi' reeman laan, rëb reeman:

—Zayajcan.

23 Abi' rëbaman:

—Diidxliczi rnin zajc tëdidi guialzi zi'c naj ni gadëedan, per guial cwedi da ladbeen o da ladruvejsan ya ad najt rayal ganabee, din ma najn par ree bèn bacaabee da Dadan.

²⁴ Chi biguiejn zachii ree xbejn Jesús zian dád balen reeman grop bijch reeman.

²⁵ Per gurejdx Jesús laa reeman, rëbaman:

—Lëjt ragbee, bën rniabee ree loj guidxliuj, rniabee reeman bejn ree zi'ctzi rën reeman, guiáad ree bën zobjloj rüjnnë reeman bejn ree zi'ctzi rën reeman por gualrniabee ni rajp reeman.

²⁶ Per con lëjt ad rayalt gac zian. Bal chu rën gac bën rniabee lojdi, rayal güünman sirv lojdi.

²⁷ Zi'angajc bën rën gac bën zobjloj lojdi, rayal güünman sirv lojdi zi'c bën nado'!

²⁸ Zi'c Bën guxhaal Dios ad bi'ttaman par güün reeman sirv lojman, bi'taman par güünman sirv gudëë tëë xgualnabanman din laa zien bejn loj dol.

Rayüjn Jesús tio'p ree bénlutia'p

(Mr. 10:46-52; Lc. 18:35-43)

²⁹ Chi bazaman luguiedx Jericó con ree xbejnman, dád zien ree bejn binal laaman.

³⁰ Dxel tio'p ree bénlutia'p zobj cwë' nejj chi biguiejn reeman cadëd Jesús niz yagaj, gurixdiaj reeman rëb reeman:

—¡Dad, xdiaa Davi, baya dunujn!

³¹ Abi' rdilë ree ben guin laa reeman din yacwëëz ro' reeman, per mazri ribixdiaj reeman rëb reeman:

—¡Dad, xdiaa Davi, baya dunujn!

³² Dxel guzudxe Jesús, gurejdxaman laa reeman, gunabdiidxaman loj reeman, rëbaman:

—¿Xhie rëndi günan por lëjt?

³³ Badxi' reeman laan, rëb reeman:

—Dad, rayënan yaxal du lojn.

³⁴ Dxel baya Jesús laa reeman, abi' baqu'i'man loj reeman. Loj hor zii baxal loj reeman, dxel binal reeman Jesús.

21

Ru Jesús Jerusalén

(Mr 11:1-11; Lc. 19:28-40; Jn.12 :12-19)

¹ Chi ma cadxin Jesús con ree xbejnman Jerusalén, niz guiedx la Betfagé, gajxh ruguia' Olivos, guxhaal Jesús tio'p ree xbejnman,

² rëbaman loj reeman:

—Golchej guiedx riga' lad ni, ni guidxaaglojdi tijb bur, caduunë xi'nb. Gol guxhiee reeb gol tanë reeb guie.

³ Abi' bal chu xhie na lojdi, gol güjdx guial Dad Jesús cayaadx laa reeb, gandoo yaxhaalaman laa reeb.

⁴ Zian gojc persi gojc cumplid ni gunee bën badëë xtiidx Dios loj ree bejn, chi rëbaman:

⁵ Gol güjdx loj ree bën Sión:

“Gol baguiaa laa xreydi zëed lojdi, ad zëedtaman nabë, dxiiibaman tijb bur, tijb burdoo xi'n tijb be rüü.”

⁶ Dxel wej ree xbejn Jesús abi' been reeman zi'c rëbaman loj reeman,

⁷ binë reeman bur guin con xi'nb, abi' badxiib xab reeman xijch reeb zianz gudxib Jesús burdo guin.

⁸ Abi' guial zien ree bejn, yu' reeman rguijxh xab lunejz, zien tëë reeman ritü' xidx ree yag persi rguijxh reeman laa reen lod cadëdaman.

⁹ Abi' zi'c ree bén ned zi'c ree bén zidnal laaman, rbixdiaj reeman, rëb reeman:

—jBenza'c bendxoon naj xdiaa rey Davi! jNünjle' Dios bén guxhaalaman!
jBenza'c bendxoon naj Dios bén yu' xanyabaa!

¹⁰ Chi guyu Jesús luguiedx Jerusalén, gra ree bén luguiedx guin badxaløj, abi' riniabdiidx loj lasa' reeman, rëb reeman:

—¿Chu bén guin?

¹¹ Dxel rëb ree benzien guin:

—Laaman naj Jesús, bén rudëë xtiidx Dios loj ree bejn, bén Nazaret guiedx riga' niz Galilea.

*Rabëë Jesús bén ruto' ree lën yadoo Jerusalén
(Mr. 11:15-19; Lc. 19:45-48; jn.2 :13-22)*

¹² Chi bidxin Jesús ro' yadooro' Jerusalén, guzuløj caybëëman bén cuto' ree në ree bén cazii. Barexguiataman xmex ree bén cuchaa milia në xmex ree bén cuto' palom.

¹³ Dxel rëb Jesús loj reeman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nünndan zi'c lidx ree xingubaan.

¹⁴ Dxel bénlutia'p ree con ree bencoj bibig reeman loj Jesús lën yadoo guin abi' bayünman laa reeman.

¹⁵ Per chi baguiaa ree bixhioz rniabee ree bixhioz con ree mextr rajc ley milagr cayün Jesús, biguiejn tëë reeman rëb ree xindoo lën yadoo guin: “Benza'c bendxoon naj xdiaa rey Davi”, dxel dád bidxe'ch reeman.

¹⁶ Abi' rëb reeman loj Jesús:

—¿Rguiejnl ni canee ree xindo guin ya?

Badxi' Jesúsán, rëbaman:

—Rguiejncan. Per ¿gadidi gool loj xtiidx Dios ya? Lod rëb:

Lüj badëëd ni gool ree xindoo në ree xindobëz sta rë' dud, din guilies reex xvaloril.

¹⁷ Dxel basa'n Jesús laa reeman, zëman Betania ni baya'nman guxhin guin.

*Tijb yag higo ni gubidx
(Mr. 11:12-14, 20-26)*

¹⁸ Chi bareguiaal rsil la'tgaj zë Jesús Jerusalén stijb, guzuløj gulaanman.

¹⁹ Abi' baguiaaman zøjb tijb yag higo cwë' nejz, dxel gubigaman cwë'n, per ganaxzi balag ca lojn. Zianz rëbaman loj yag higo guin:

—jAd yu'tri dxej tial higo!

Loj hor guin gajc gubidx yag guin.

²⁰ Chi baguiaa ree xbejnman zian, dád badxaløj reeman abi' gunabdiidx reeman loj Jesús, rëb reeman:

—¿Xhienaag gojc zeel laa gubidx gajc yag higo guin?

²¹ Badxi' Jesúsán, rëbaman:

—Naj rni lojdi, bal rliladxidi Dios abi' ad zunawëëgtidi, ad ni bentzan con yag higo guin zajc güündi, zajc guiëbidi loj guia' guie: “Biquied guie, bisob loj nijsdoo”, abi' zajc gajc zian.

²² Gra ni guiniabidi loj Dios, bal rliladxidi laaman, zuneeman laan.

*Xguialrniabee Jesús
(Mr. 11:27-33; Lc. 20:1-8)*

²³ Chi guyu Jesús lën yadooro' Jerusalén, la'tgaj culüüman bejn ree. Bixhioz rniabee ree bixhioz con ree guxtis Israel, gubig reeman loj Jesús, abi' gunabdiidx reeman, rëb reeman:

—¿Chu na güünl ni guin ree? ¿Chu banee gualrniabee lojl?

²⁴ Badxi' Jesúsán, rëbaman:

—Ziangajc naj yu' tijb ni ganabdiidxan lojdi, bal yadxi'dan dxel ganin lëjt chu banee gualrniabee günan ni guin ree.

²⁵ ¿Chu guxhaal Waj chigroobnijsaman bejn ree, Dios ya o bénguidxliuj?

Dxel guzuloj cayü reeman diidx, rëb reeman:

—Bal yaguie'ch ree, “Dios guxhaal laaman”, zanaman: “¿Chexza zeel ad bililadxtidi laaman?”

²⁶ Abi'za bal yaguie'ch ree: “bénguidxliuj guxhaal laaman”, radxeb ree yalen ree bejn din gra reeman riladx guial Waj naj bën badëéd xtiidx Dios loj ree bejn.

²⁷ Dxel rëb reeman loj Jesús:

—Ad rayagbeetan.

Badxi' Jesúsán, rëbaman:

—Ni'qui naj ad zanitan lojdi chu banee gualrniabee günan ni guin ree.

Tijb bën guyu tio'p xi'n

²⁸ Basnuu Jesús rëbaman loj ree bixhioz rniabee ree bixhioz në loj ree guxtis Israel.

—¿Xhie nadi ni ganin lëjt? Tijb bejn guyu tio'p xi'nman, dxel rëbaman loj tijbix: “Xi'n, wej yandxej biguieen dxiin loj guiniaa yu' uv.”

²⁹ Badxi'xan, rëbix: “Ad zatan.” Per dxelri bayüjnx xgab zianz wejx.

³⁰ Abi' rëbaman loj stijb xi'nman din chex, badxi'xan, rëbix: “Yo dad, gazacan.” Per ad wejtix.

³¹ Yan, ¿chu loj grop reex been ni rën xdad reex?

Badxi' reeman laan, rëb reeman:

—Xin rëbaman loj yaløj guin.

Dxel rëb Jesús loj reeman:

—Diidxliczi rnin, bën ruquijx ree impuest con ree béngunaa naban nadxu-udx, yaløj laa reeman chu' lod rniabee Dios guial lojdi.

³² Din bi't Waj, bën baroobnijs bejn ree par gulüüman lëjt xhienaag guiband, per ad bililadxtidi xtiidxaman. Guiáad ree bën ruquijx impuest con ree béngunaa naban nadxuudx, bililadx reeman xtiidxaman. Per lëjt majsi baguiaadi gra ree ni guin, ad bayüjntidi xgab por xtolidi din nililadxidi laaman.

Xcwent ree mojs guiidx

(Mr. 12:1-12; Lc. 20:9-19)

³³ Rëb tée Jesús loj reeman:

—Yan, gol bacaagdiajg ganin lëjt stijb ni naj zi'c cwent. Guyu tijb bejn guxübinman uv ree loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' bazoobaman tijb yu ya da't din guiya'p guidib guiniaa guin.

'Zianz badëëdaman laan garol loj ree bën güün dxiin lojn, zëtaman zijt.

³⁴ Chi bidxin dxej yaru' ree uv guin, guxhaalaman tio'p choon ree xmosamsan chigxii reeman ni rayalaman.

³⁵ Per ree bën rüjn dxiin loj guiniaa guin gunaaz reeman mojs guin ree. Tijbaman gudijn reeman, stijbaman bagüjt reeman, stijbaman bacaaguiaj reeman.

³⁶ Dxel b́en naj xguiniaan guxhaalaman mazri ree mojs guial loj ree b́en we yaloj, per ziangajc beenné ree b́en guin laa reeman.

³⁷ 'Ni bigra, guxhaal xi'nman guial gunaladxaman: "Zajpqui reeman da xi'nan respejt."

³⁸ Per chi baguiaa ree b́en guin xi'nman, rēb loj lasa' reeman: "Xin guinan naj xin tia' guidxliuj guin, yagüjt reex din gacan du xieen ree."

³⁹ Abi' gunaaz reeman laax, babēē reeman laax loj guiniaa guin dxel bagüjt reeman laax.

⁴⁰ Dxel gunabdiidx Jesús loj ree b́en caneenēman, rēbaman:

—Chi yadxin b́en naj xguidxliuj laan, çxhie naladxidi güünnēman b́en guin ree?

⁴¹ Abi' rēb reeman loj Jesús:

—Ad zayataman gugüjtaman b́en guin ree, dxel gudēēman guidxliuj guin garol loj ree ben ren, b́en yayü ni rayalaman chi guidxin dxej yaru' ree uv guin.

⁴² Dxel rēb Jesús loj reeman:

—Çld wayolczidi loj xtiidx Dios ya? Lod rēb:

Guiaj ni gulēēgo'n ree b́en rüjn yu.

Laan goc ni mazri been sirv gojcnē yu guin.

Laan naj ni been Dios,

abi' dád radxa du loj ree.

⁴³ Zeel rnin lojdi, zariicadi loj xgualrniabee Dios abi' ben ren ree yayu xluaridi, b́en wali ree güün zi'c rēnman.

⁴⁴ Abi' chutēēz b́en yab guijc guiaj guin, zarooxaman, guiáad bal yab guiaj guin guijcaman zanidlojman.

⁴⁵ Chi biguiejn ree bixhioz rniabee ree bixhioz con ree b́enfarisew guin ni cayü Jesús zi'c cwent, dxel gogbee reeman guial laa reeman cuza'taman.

⁴⁶ Abi' guyēn reeman niniaaz reeman laaman, per bidxeb reeman bejn ree guial rliladx reeman laaman naj b́en rudēēd xtiidx Dios loj ree bejn.

22

Xcwent guialruxhliaa

¹ Basnuu Jesús beman zi'c cwent loj reeman rēbaman:

² —Xgualrniabee Dios naj zi'c tijb rey b́en been lanijro' chi baxhliaa xi'nman.

³ Abi' guxhaalaman mojs ree bignee reeman biooz ree, per biooz guin ree ad guyēnt reeman niej reeman.

⁴ Dxel guxhaalaman mojs ren ree, rēbaman loj reeman: "Gol güjdx loj ree biooz guin ma naj gualraw, ma gunabeen güjt ree da go'nan nē ree beren, bero' ree. Ma najcchaaw graczi, gol güjdx loj reeman din gui't reeman loj guialruxhliaa guin."

⁵ Per biooz guin ree ad bidxga't reeman xtiidx rey guin, yu' reeman zē loj xguiniaa, yu' reeman zē xmandad,

⁶ yu' tēē reeman gunaaz mojs guin ree gudijn reeman laa reeman abi' bagüjt reeman laa reeman.

⁷ Chi gogbee rey guin zian, dád bidxe'chaman. Guxhaalaman b́en naj ree xsuldadaman persi bagüjt reeman b́en guin ree baze'c tēē reeman lidx reeman.

⁸ Dxel rēbaman loj ree xmojsaman: "Graczi ma najcchaaw par loj guialruxhliaa guin, per ree b́en gunen ad najt guial ni't reeman.

⁹ Yan, gol wej lod radxaag lasa' ree nejz, gol güjdx loj ree bén guidxaalojtzidi din gui't reeman loj gualruxhliaa guin."

¹⁰ Abi' brii ree mojs guin wej reeman lunejz guin ree, bato'p reeman gra ree bén bidxaalojtzidi reeman, zi'c ree benmal zi'c ree benza'c, zian gudxa ree biooz lidx rey guin.

¹¹ 'Per chi guyu rey guin din guguaaman biooz guin ree, baguaaman tijb bén ad najcwt xab ni rayal gacwaman loj gualruxhliaa guin.

¹² Abi' rëb rey guin lojman: "Laadx lüj, ¿xhienaag beenl guyul guie abi' ad najcwt xabil ni rayal gacwil loj gualruxhliaa?" Dxel achet badxejl niëjb bén guin.

¹³ Zianz rëb rey guin loj ree bén cagui's gualraw: "Gol guxhii guia'x në yaax, gol bazaal tēex xchu lod nacay da't lod goonx gaw tēē layix."

¹⁴ Din zien ree bejn rdxejl, per ad grataman chu'.

¿Rayal gax impuest ya?

(Mr. 12:13-17; Lc. 20:19-26)

¹⁵ Dxel baza ree bēnfarisew yagaj, abi' baya'n reeman diidx xhie guiniabdiidx reeman loj Jesús din guidoon xhie guiëbaman, zian chile' gutedia' reeman laaman.

¹⁶ Abi' guxhaal ree xbejn reeman con ree xbejn Herodes, rëb reeman lojman:

—Mextr, dunujn rayagbee gual lüj rniece diidxli, abi' walil rulüül gual xhienaag rën Dios guiban bejn, ad ridxga' tēëtli chu naj bejn. Din lojl tiblojzi naj bejn.

¹⁷ Guna du lojn: ¿Zagdxen ya yadijxan impuest loj César o ad zagdxetan ya?

¹⁸ Per gogbee gajc Jesús xgabmal ni cayün reeman, abi' rëbaman loj reeman:

—Bén rusquiee, ¿chexc zeel raguuilidi mod xhienaag gutidia'di naj?

¹⁹ Gol balüü tijb cintabl lon ni rguixnëdi impuest.

Dxel badëéd reeman tijban lojman,

²⁰ abi' gunabdiidx Jesús loj reeman, rëbaman:

—¿Chu loj ca lojn chu tēē laj ca lojn?

²¹ Badxi' reeman laan, rëb reeman:

—Laj César në lojman.

Dxel rëbaman:

—Gol badëéd loj César ni naj xieen César, guiáad loj Dios gol badëéd ni naj xieen Dios.

²² Chi biguiejn reeman zian, dád badxaloj reeman, dxel basa'n reeman laaman, zianz zia reeman.

Gunabdiidx reeman xcwent gual yaban ree bengüt

(Mr. 12:18-27; Lc. 20:27-40)

²³ Dxejzii gajc tio'p choon ree bénsadusew wej reeman bignaj reeman Jesús, bénsadusew guin ree ad rliladxt reeman gual yaban ree bengüt, zeel rëb reeman loj Jesús:

²⁴ —Mextr, Moisejs rëb gual bal guiët tijb xinguaaw abi' achut xi'n reex guyu con lacheelix, bijch xingüt guin guxhliaanë béngunaa bizëjb guin din chu' xi'n reex luar bijchix.

²⁵ Du lojn guyu tijb famil lod gojc reex gajdx bijch. Baxhliaa xin yaloj guin, per güjtix abi' gual ad guyut xi'nx, dxel bijch barojpax baxhliaanë béngunaa guin.

²⁶ Per ziangajc guzajc xin barojp guin abi' ziangajc guzajc xin bayon guin, xt bagajdx reex guzajc zian.

²⁷ Chi bara reex güjt dxel güjt béngunaa guin.

²⁸ Yan, chi yaban ree bengüt, loj guigajdx reex, ¿chu gac xbéngunaa laaman guial gra reex baxhliaanë laaman?

²⁹ Badxi' Jesúsán, rëbaman:

—¡Ragdxi' guial ad nünbeetidi xtiidx Dios ad nünbee tëtëtidi xhienaag naj xguialrniabeeman!

³⁰ Din chi yaban ree bengüt, ad zuxhliaatri reeman ad zudëed tëtëtri xi'n reeman guxhliaa, ma gac reeman zi'c ree anjl yu' xanyabaa.

³¹ Abi' xcwent ni yaban ree bengüt, ¿gadidi gool ya lod ca guial Dios gajc rëb:

³² “Naj naj xDios Abraham, xDios Isaac në xDios Jacob?” Abi' Dios ad najtaman xDios ree bengüt, najman xDios ree bën naban.

³³ Chi biguiejn ree bejn zian, dád badxaloj reeman zi'c rulüüman laa reeman.

Mandamient mazri zojbloj

(Mr. 12:28-34)

³⁴ Chi gogbee ree bënfarisew guial achet badxejl niëjb ree bénsadusew loj Jesús, dxel baya'n reeman diidx badxaag lasa' reeman.

³⁵ Abi' tijb ree bënfarisew guin, bën naj mextr rajc ley, gunabdiidxaman loj Jesús din guidoon xhie guiëbaman, rëbaman:

³⁶ —Mextr, ¿con mandamientan mazri zojbloj loj gra ree mandamient ni zëed loj ley?

³⁷ Badxi' Jesúsán rëbaman:

—“Guyën xDadil Dios guidiblagaa guidib guiyc guidib ladxil.”

³⁸ Laan naj mandamient mazri zojbloj.

³⁹ Ziangajc naj mandamient rarojp ni rëb: “Guyën ree bejn zi'c rën lüj gajc.”

⁴⁰ Con grop ree mandamient guie, ma cayüjn bejn cumplid gra ley bacaa Moisejs në ree ni bacaa ree bën badëë xtiidx Dios loj ree bejn.

Chu loj xdiaa za Cristo

(Mr. 12:35-37; Lc. 20:41-44)

⁴¹ La'tgaj nadxag lasa' ree bënfarisew guin, gunabdiidx Jesús loj reeman, rëbaman:

⁴² —¿Xhie xgab rüjndi por Cristo? ¿Chu loj xdiaa zaman?

Badxi' reeman laan rëb reeman:

—Loj xdiaa Davi.

⁴³ Dxel rëb Jesús loj reeman:

—Per, ¿chexquiza zeel por xSprijt Dios rëb Davi lojman, Dad? Din Davi rëb:

⁴⁴ Dios rëb loj bën rniabee naj:

“Gurej da ladbeen, xt gabecan xin rdxe'ch ree lüj guia'l.”

⁴⁵ Yan, bal xi'n Davi naj Cristo, ¿chexquiza zeel rëb Davi lojman Dad?

⁴⁶ Achutczi gojc nadxi' xtiidx Jesús, ni'czi tijb diidx. Abi' diizd dxejzii achutczi bayax niniabdiidx xhienin lojman.

23

Ni rüjn ree mextr rajc ley në ree bënfarisew

(Mr. 12:38-40; Lc. 11:37-54; 20:45-47)

¹ Rëb Jesús loj ree bejn në loj ree xbejnman:

2 —Mextr rajc ree ley con ree bénfarisew rulüü reeman xhie rën guiëb ni ca loj xley Moisejs.

3 Zeel gol bazoob xtiidx reeman, gol been tëë gra ni na reeman lojdi, per ad güündi zi'c rüjn reeman, din laa reeman ni ren na reeman abi' ni ren rüjn reeman.

4 Rniabee reeman güün bejn ni nawëëg da't, per rniabeezi reeman güün bejn zian, guiáad laa reeman ni'qui ta'n ad rüjnt reeman bejn yudar din güün reeman zi'c rën reeman.

5 Gra ni rüjn reeman, rüjn reeman laan din yadxaloy bejn laa reeman. Ruladx reeman guixhii lucwaj reeman në xu'c reeman tijb cint ni ca xtiidx Dios loj, ruladx tëë reeman gacw reeman lajd zagdx.

6 Ruladx reeman cwe reeman lod rayal rbej ree bén zojbloj, loj tijb guialraw, abi' ziangajc rüjn reeman lën ree yadoo.

7 Ruladx tëë reeman gugajpdioz bejn laa reeman zagdx niz lunejz guiëb tëë reeman loj reeman mextr.

8 'Per lëjt ad sëëbladxidi guinee bejn lëjt mextr, din tijbzi naj gradi, tijbzi mextr rajpidi abi' laaman naj Cristo.

9 Ni'qui tijb loj bénguidxliuj, bén ad najt xdadidi, ad guiëbidi dad, din tijbzi xdadidi yu', laaman yu' xanyabaa.

10 Ad güün tëëdi naguiejn yayagbee ree bejn lëjt zi'c bén rniabee, din tijbzi bén rniabee yu', laaman naj Cristo.

11 Bén mazri zojbloj lojdi, laaman rayal güün sirv lojdi.

12 Din bén rlies xvalor gajc achet lasajcaman. Guiáad bén rüjn naya, zajs xvaloraman.

13 'i'Probza lëjt mextr rajc ley në lëjt bénfarisew, bén rusquiee!, ad rtiëjbtidi gagbee ree bejn xhienaag din gac reeman xbejn Dios, ni'quiza lëjt ad rüjntidi naguiejn gaquidi xbejn Dios, abi' rudxoondi gac xbejn Dios bén rën ree gac xbejnman.

14 'i'Probza lëjt mextr rajc ley në lëjt bénfarisew, bén rusquiee!, din raca'di lidz ree béngunaa bizëjb, abi' din guiëb bejn guial benza'c lëjt dád xchej rbejdx rniabidi Dios. Zeel mazri castiro' yayalidi.

15 'i'Probza lëjt mextr rajc ley në lëjt bénfarisew, bén rusquiee!, zizadi guidib-doo rguilidi bén gac ree xbejndi, abi' chi ma beendi gan tijbaman al mazri xi'n xindxab rüjndi laaman guial lojdi.

16 'i'Probza lëjt, bénlutia'p!, rëbidi: “Achet güünan bal id züjn bejn ni guneeman, majsi ma baza'taman yadooro' Jerusalén, per bal guza'taman ni or yu' ree lën yadoo guin, dxel ma rüjn naguiejn güünman ni guneeman.”

17 'i'Natontidi, wed natia'p lojdi! ¿Conin mazri lasajc: Or guin ya o yadoo beenle' or guin?

18 Rëb tëëdi: “Achet güünan bal id züjn bejn ni guneeman majsi ma baza'taman xialtar yadoo guin, per bal guza'taman gon dxiib loj altar guin, rüjn naguiejn güünman ni guneeman.”

19 'i'Bénlutia'p! ¿Conin mazri lasajc par lëjt: Gon guin ya o altar beenle' gon guin?

20 Bén ruza't altar guin ad altar guintzan ruza'taman, nëgajc gra ni dxiib lojn ruza'taman.

21 Guiáad bén ruza't yadoo guin, ad yadoo guintzan ruza'taman, Diosan ruza'taman din lidxaman naj yadoo guin.

22 Abi' bén ruza't xanyabaa, Diosan ruza'taman në lod zojbaman.

²³ 'iProbza lëjt mextr rajc ley në lëjt bënfarisew, bën rusquiee!, rbëecadi bidxtil, anís nètëe comin ni rayal gudëedi loj Dios, abi' ad ruzoobtidi xley Moisejs ni mazri zojbloj, ad rüjntidi zi'c rayal, ad rayat lasa'di, ad za'dxi'ch tëtidi loj xnejz Dios. Laa reen rayal güündi, per ad cwëeladxidi gudëedi ni rayal loj Dios.

²⁴ ¡Bénlutia'p, rajpidi cudad chitëe guiëbidi tijb bizëdlajs, abi' rguiëjbidi tijb camell!

²⁵ 'iProbza lëjt mextr rajc ley në lëjt bënfarisew, bën rusquiee!, rusiadi xijch ree vajs në xijch ree pliajt naj nadxuudx, guiáad luxdoodi guidxa ni dxuudx, në guialgubaan nètëe guialrdxe'ch lasa'.

²⁶ ¡Bénfarisew lutia'p: Yalojxgaj gol basia, zian guiguien waliquidi nayadi loj Dios!

²⁷ 'iProbza lëjt mextr rajc ley në lëjt bënfarisew, bën rusquiee!, najdi zi'c baa nayë' culor naquich, guijcan rguien nix da't, per lënan guidxa ree xdxijt bengüt në graloj ree ni dxuudx.

²⁸ Zian najdi, niz loj ree bejn, rulüüdi benza'c, per luxdoodi guidxa guialrusquiee në guialnaladx.

²⁹ 'iProbza lëjt mextr rajc ley në lëjt bënfarisew, bën rusquiee!, rüjndi xbaa ree bën badëe xtiidx Dios loj ree bejn, abi' rüjnchaawidi xbaa ree bën goc benza'c, ³⁰ dxel rëbidi: “Bal nabajnan xtiamp ree dux béngulalan, ad nët dunujn nagüjt bën badëe ree xtiidx Dios loj ree bejn.”

³¹ Abi' con ni guin ree, rayünbeegajquidi guial loj xdiaa bën bagüjt ree bën badëe xtiidx Dios loj ree bejn zëedidi.

³² ¡Gol baloozza ni guzuloj been xbéngulalidi!

³³ ¡Bëndol, xi'n xindxab! ¿Xhienaag laadi loj castiro' ni yu' gabijl?

³⁴ Zeel gaxhalan lojdi bën gudëe ree xtiidx Dios, bën rajc ree në ree mextr. Per yu' reeman gugüjtidi, yu' reeman gucaadi loj crüjz, yu' tëe reeman quindi lën ree xyadoodi abi' sunalidi laa reeman guiedx por guiedx din güündi laa reeman xhienin.

³⁵ Zianan zeel guijquidi yab xtol gra ree bën bagüjt bën goc ree benza'c diizd Abel bën guban xnejz loj Dios xt Zacarias xi'n Berequías, bën bagüjt reeman lule' yadooro' Jerusalén.

³⁶ Diidxliczi rnin lëjt, xcasti gra ree ni guin yab guijc ree bën riga' loj guidxliuj yan.

Roon Jesús por Jerusalén

(Lc. 13:34-35)

³⁷ Rëb tëe Jesús:

—¡Bén Jerusalén, bën Jerusalén, rugüjtidi bën rudëe ree xtiidx Dios loj ree bejn abi' rucaaguijdi bën rxhiaal Dios lojdi! ¡Bëlczí volt guyënan nuchagan lasa'di, zi'c rüjn tijb guid ruchajg lasa' ree xi'nb lën xhilib, per ad gutiëjbtidi!

³⁸ Zianan zeel yaya'n ladxidi zi'c tijb guiedx lod achut zojb.

³⁹ Abi' rnin lëjt diizd yan ad zuguiaatridi naj, xt chi guidxin dxej guiëbidi: “¡Nüjnle' Dios bën guxhaalaman!”

24

Rëb Jesús guial yaze'n yadooro'

(Mr. 13:1-2; Lc. 21:5-6)

¹ Chi barii Jesús lën yadooro' Jerusalén, ziaman, bibig ree xbejnman lojman balüü reeman gra ree xyu yadoo guin lojman.

² Abi' rëb Jesús loj reeman:

—Diidxiczi rnin, gra ni cuguaadi yu' dxej ni'qui tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit
(Mr. 13:3-23; Lc. 21:7-24; 17:22-24)

³ La'tgaj zojb Jesús guijc guia' la Olivos, gubig ree xbejnman lojman, rëb reeman:

—Rayënan nal goc gac zian. ¿Xhie ree sen gac chi ma zidyob gui'til stijb, në chi ma zidyob nit guidxliuj?

⁴ Dxel rëb Jesús loj reeman:

—Gol gojp cudad achu gusquiee lëjt.

⁵ Din zien ree bejn gui't guiëb reeman guial por naj zëed reeman, guiëb tëë reeman: “Naj naj Cristo”, abi' zien bejn gusquiee reeman.

⁶ Per lëjt chi guiguiejndi cayajc wadijl o zëëb diidx guial gac wadijl, ad guidxebidi din zian naj gac. Per ad wadxint dxej nit guidxliuj.

⁷ Din til nacion con stijb nacion, në bën rajp guialrniabee con stijb bën rajp guialrniabee. Abi' gui't xudoxh në gubijn niz ni niz guie.

⁸ Gra ree nine ree gac chi ma suloj guialzi guin.

⁹ Dxel yayü ree bejn lëjt loj ree bën gusagzi lëjt, gugüjt reeman lëjt, abi' gra ree bënguidxliuj guidxe'ch lëjt guial najdi da bejnan.

¹⁰ Chi gac zian zien ree bejn gusa'n guialrliladx reeman naj, guidxe'ch lasa' reeman abi' yayü lasa' reeman loj ree bën ralen laa reeman.

¹¹ Gui't tëë zien ree bën gusquiee, guiëb reeman guial rudëed reeman xtiidx Dios, abi' zien bejn gusquiee reeman.

¹² Abi' guial dád zien ni mal gac, zien da't bën ad zëntri ree lasa'.

¹³ Per bën sudxi'ch loj guialrliladxaman naj, xt dxej chigra guibanman, laaman yayal xanyabaa.

¹⁴ Abi' xtiidx Dios ni canin lëjt yan guire'chan guidibczi guidxliuj din gagbee gra bejnan, dxelri nit guidxliuj.

¹⁵ Zianan zeel chi guguiaadi zojb tijb ni dxuudx, ni ad rüjnt sirv lën yadooro' Jerusalén, zi'c gunee Daniel bën badëë xtiidx Dios loj ree bejn (bën gool gui'ch guie ree, gol bignia'),

¹⁶ guial bën zojb ree Judea rayal guxüün reeman che reeman dajn.

¹⁷ Guiáad ree bën yë'p guijc yulidx dxejzii, ad yayu lënülidx reeman par tia' xhie xieen reeman.

¹⁸ Abi' ree bën za' dajn, ad yayejc reeman chigxii xab reeman.

¹⁹ j;Probza ree bëngunaa nüü xi'n o bën ca' ree xindobëz lën ree dxejzii!

²⁰ Gol gurejdx gunab Dios chitëë gac zian tiamp nayaag o dxej raziiladx ree bejn ya.

²¹ Din nadxel dád guialziro' chu', zi'c ad wayajctczi diidz guia'xchej chi gad guidxliuj gacchaaw ad yu' tëët dxej gac zian.

²² Abi' bal id Dios gucwëëz guialzi chu' lën ree dxej guin, ni'qui tijb bejn ad zalaat, per gucwëëzaman laa reen por ree bën guleman.

²³ Lën ree dxejzii bal chu na lojdi: “Gol baguiaa, laa Cristo za' guie”, o “Gol baguiaa laaman za' ni”, ad bal chililadxidi.

²⁴ Din zi't zien ree bën gusquiee na guial laa reeman naj bën guxhaal Dios o na reeman guial laa reeman naj bën rudëed xtiidx Dios. Abi' züjn reeman milagr ree në graloz ni yadxaloz bejn din gusquiee reeman laa reeman, abi' bal zile'n xt në ree bën gulej Dios gusquiee reeman.

²⁵ Ma rni xgajn lojdi ni gac.

²⁶ Zeel bal chu na lojdi: “Gol baguiaa laa Cristo za' niz loj yujbidx”, ad bal chedi o na reeman lojdi: “Laa Cristo yu' lënü ni”, ad bal chililadixidi.

²⁷ Din zi'c chi rë'p nijs, abi' rulaan bacha' niz lod rliejn gubijdx xt lod rëëzan, ziangajc gac dxej gui't Bén guxhaal Dios stijb.

²⁸ Bén riladix ree naj gui't reeman lon, zi'c chi rado'p ree golbich lod naga' tijb begüt.

Gui't Bén guxhaal Dios stijb

(Mr. 13:24-37; Lc. 21:25-33; 17:26-30, 34-36)

²⁹ 'Chi ma gudëd ree dxej ni gac ree guialzi guin, guicajy loj gubijdx, ad zusnit bëëw, guiyajb ree bajl xanyabaa abi' gra ree ni yu' xanyabaa guiniib.

³⁰ Dxel guiguien tijb sen xanyabaa guial ma gui't Bén guxhaal Dios. Abi' gra ree bénguidxliuj goon da't chi guguiaa reeman Bén guxhaal Dios, rdiinman bacha' zëëdaman loj zaj con xguialrniabeeman.

³¹ Dxel guixhiaal ree xianjlaman, abi' rejs da't gucwejdx reeman trompejt, din yadxajg lasa' ree bén guleman, bén za' ree gralad guidiblagaa guidxliuj.

³² 'Yan, gol baguiaa xhienaag rajc con tijb yag higo. Chi ma naquie'n xidxan, chi ma caydxib ree xbalagan, lëjt ragbee guial ma zëëd tiamp nalaa.

³³ Ziangajc chi guguiaadi ma cayajc ree ni guin, gagbeedi guial ma zidyob gac zi'c rnin lëjt.

³⁴ Diidxiczi rnin lëjt guial gra ree ni guin gac chi gad ree bén naban yan guiët.

³⁵ Guidxliuj në xanyabaa zanijt reen, per da diidxan ad zanijtitan.

³⁶ 'Per achut ragbee xhie dxejn në xhie horan gac zian, ni'qui ree anjl yu' xanyabaa, ni'qui Xi'n Dios ad ragbeet. Tijbzi da Dadan Dios ragbee.

³⁷ 'Zi'c goc gual chi guban Noé, zian gac chi yaguaaad Bén guxhaal Dios.

³⁸ Din chi gad Dios guixhiaal guidaoh loj guidxliuj, bejn ree, raw reeman, rë' reeman, ruxhliaa reeman, rudëë tëë xi'n reeman ruxhliaa, xt chi bidxin dxej guyu Noé lën barcwro' ni beenman.

³⁹ Abi' ad bidxgatzi reeman, dxejlczi gol guidaoh abi' zinë nijs laa reeman, ziangajc gac chi yaguaaad Bén guxhaal Dios.

⁴⁰ Dxej guin, lod za' tio'p ree xinguaaw dajn, tijbix yaza, stijbix yaya'n.

⁴¹ Guiáad lod cayojt tio'p ree béngunaa, tijbaman yaza, stijbaman yaya'n.

⁴² 'Zeel gol guzujsin din ad ragbeetidi xhie dxej yaguaaad xDadidi.

⁴³ Gol been xgab, bal tijb bejn ragbee xhie guxhin xhie tëë horan chu' xingubaan lidxaman cwanx, zabejnaaman abi' ad zatiëjbtaman chu' xingubaan guin lidxaman.

⁴⁴ Zianan zeel gol guzujsin, din ad ragbeetidi dxejlczi yaguaaad Bén guxhaal Dios.

Mojs za'c në mojs guiidx

(Lc. 12:41-48)

⁴⁵ '¿Chu lëjt naj zi'c tijb mojs rusa'n xpatronx lidxaman din gulenx gra ree mojs, gudëë tëëx ni gaw reeman chi gal hor'?

⁴⁶ Xiquilbaa mojs cayüjn dxiin zi'c rayal chi yadxin xpatronx.

⁴⁷ Din diidxiczi rnin lëjt, patron guin zusa'n gra xieenman loj mojs guin.

⁴⁸ Per bal naj mojs guin mojs dxuudx, naladxix: “Zaglaari da patronan.”

⁴⁹ Zianz suloj gusagzix los demazri ree mojs guin, suloj gawix, guië'në tëëx xingu' ree.

⁵⁰ Abi' yadxin xpatronx tijb dxej ni ad ragbeetix ad rbëz tëtix laaman.

¹ Dxel dá d castiro' gudëed patron guin laax, guixhiaal tëeman laax lod rayal ree bën rusquiee, lod goonx gaw tëe layix.

25

Xcwent chii biinxdüb

¹ Basnuu Jesús rëbaman:

—Loj xguialrniabee Dios gac zi'c guzac ree chii biinxdüb we loj tijb guialruxhliaa cwa' tijbgaj xguij reem bilëz reem xin cuhxliaa guin.

² Gaay reem been xgab xhie güün reem, per za gaay reem ad beent xgab.

³ Biin ad beent ree xgab guin binë xguij reem per ad binët reem mazri sejt ni che'cnë ree guij guin.

⁴ Guiáad ree biin been xgab guin xhie güün reem, binë reem za tib lumejtgaj sejt con xguij reem.

⁵ Abi' guial' goglaa badxin xinruxhliaa guin, bi't bacaal loj gra reem, abi' goodyëjs reem.

⁶ Cost garol guiaal, biguien cha' tijb bejn rëbaman: “iLaa xinruxhliaa guin ma ziaad, gol tagchaaglojx!”

⁷ Dxel bixche gra ree biinxdüb guin, abi' beenchaaw xguij reem.

⁸ Abi' gaay ree biin ad beent xgab guin xhie güün reem, rëb reem loj za gaay biin been xgab guin: “Gol baneesii tibda'n xsejtidi, din dux guijn ma cayü' reen.”

⁹ Per badxi' reemin rëb reem: “Yajqui, din dool ad zadaantan par lëjt ni'qui par dunujn. Zagdxeli gol wëj lod rdo'n din siidan par lëjt gajc.”

¹⁰ Abi' la'tgaj zë reem zisii reem sejt, bidxin xinruxhliaa guin, abi' za gaay ree biin been xgab guin guyunë reem laax loj guialruxhliaa guin dxel bidá'cw ro' port.

¹¹ Dxel chi badxin za gaay biin bisii ree sejt guin, rëb reem: “iDad, dad, guxhal din yadxu'n!”

¹² Per badxi'xan rëbix: “Diidxiczi rnin, ad nünbeetan lëjt.”

¹³ Dxel basnuu Jesús rëbaman:

—Zeel gol guzusin din ad ragbeetidi goc yaguaiaad Bén guxhaal Dios.

Xcwent bën badëed milia

¹⁴ Dxel rëb tëe Jesús:

—Xguialrniabee Dios naj zi'c tijb bën ma grii cheman zijt, abi' gurejdx ree xmojsaman, basa'n xmiliaman loj reeman.

¹⁵ Loj tijbaman badëeman gaay mil cintabl, loj zatijbaman badëeman zatio'p milan, guiáad loj zatijbaman badëeman za timilan. Loj tijbgaj reeman badëedaman ni naladxaman zajc güünnë reeman dxiin, dxel briitaman zëman zijt.

¹⁶ Abi' mojs cwa' gaay mil cintabl guin beennëman laan dxiin abi' beenman gan za ziant gajcan.

¹⁷ Ziangajc been mojs cwa' tio'p milan, beenman gan za tio'p mil gajcan.

¹⁸ Per mojs cwa' timil cintabl guin bitëenman luyuj persi baquie'chaman cintabl guin ni badëed xpatronman.

¹⁹ 'Gojc xchej da't dxel badxin patron guin abi' babëeman cwent con la reeman.

²⁰ Yaloj bidxin mojs cwa' gaay mil cintabl guin abi' bayüman zagaay milan, rëbaman: “Dad, lüj baneë gaay milan lon, yan, laa za gaay milan guie ni benan gan.”

21 Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.”

22 Zianz bidxin mojs cwa' zatio'p mil cintabl guin rëbaman: “Dad, lüj baneë tio'p milan lon, yan, laa zatio'p milan guie ni benan gan.”

23 Dxel rëb patron guin lojman: “Zagdxen, mojsza'c, zagdxe beenl, guial zagdxe beenl con tibda'n ni banen, yan, gunen mazri guial loj ni banen. Guyu, babaa con naj.”

24 'Per chi bidxin mojs cwa' timil cintabl guin, rëb loj xpatronman: “Dad, naj ragbee guial ad rayatil bejn, rabëël guialnaza'c lod ad rgu'til bin, rato'p téeł guialnaza'c lod ad rtie'chtıl bin.

25 Zeel bidxeban abi' biquiechan xmıial lën liuj, yan, laa xmıial guie.”

26 Badxi' patron guinan, rëbaman: “Mojs mał, mojs ploj, bal ragbeel rabën guialnaza'c lod ad rgu'tan bin, ratop tēen guialnaza'c lod ad rtiechtan bin.

27 Adil nilu' da milian lën bancw, dın chi naguialan naca'nan con xi'nan ni beenan gan.”

28 Dxel rëb patron guin loj ree bën za' yagaj: “Gol biquied timil cintabl guin lojx, gol badëedan loj xin rajp chiı milan.

29 Dın bën rajp zaca'man mazri, abi' gapaman zro' da't, per bën rajp ta'nzi, xt ni rajpaman chiquied lojman.

30 Abi' mojs ad rünjt sirv guin gol bazaalix xchuni lod nacay, lod goonx, lod gaw tēē layix.”

Xguialguxtis Jesús

31 'Chi gui't Bén guxhaal Dios, gui'taman con xguialrniabeeman, nē con gra ree xianjlanan dın cweman lod nabeeman.

32 Dxel gra ree bénguidxliuj yado'p lojman, abi' cweman laa reeman zi'c rünj tijb bën rajp xiil chi rabëecaman xiil ree loj ree dxib.

33 Abi' guzujman bën naj ree xbejnman xladbeeman, gui'ad ree bën ad najt xbejnman guzujman xladruvejsaman.

34 Dxel guiëb rey guin loj ree bën za' xladbeeman: “Gol guda bën ma nünjle' da Dadan. Gol guyu loj guialrniabee najcchaaw par lëjt, diizd chi go'tchaaw guidxliuj.

35 Dın chi gulaanan, baneedi ni gudawan, chi we'can nijs, baneedi ni gu'n, chi bizaan zi'c tijb benzit, baneedi lod baya'nan.

36 Chi byaadx da xaban, lëjt baneë ni go'tan, chi gogxuun, bidgatixlojdi naj, abi' chi guyu'n ladxguiib, bidganajdi naj.”

37 Dxel guiëb ree bën za' ladbee guin: “Dad, ¿goc baguiaan lüj rliaanl, abi' baneen ni gudawil?, ¿o goc baguiaan lüj we'quil nijs, abi' baneen nijs gu'l?”

38 ¿Goc baguiaan lüj zizal zi'c tijb benzit, abi' baneen lod baya'nł, o goc biyaadx xabil, abi' baneen ni gotil?

39 ¿Abi' goc baguiaan lüj ragxuul, o guyul ladxguiib, abi' budganajn lüj?”

40 Dxel guiëb rey guin loj reeman: “Diidxliczi rnin lojdi, gra yudar beendi da bejn reen majsi ad najt reeman bën lasajc, najn beendi yudar.”

41 'Dxel guiëbaman loj ree bën za' xladruvejsaman: “Gol biquied lon, benmal gol chej loj bajl ni ad yu't dxej yayü' ni ma naj par xindxab nē ree xbejnx.

42 Dın chi gulaanan, ad baneetidi ni niawan, chi we'can nijs, ad baneetidi ni nië'n.

⁴³ Chi bizaan zi'c benzit, ad baneetidi lod naya'n'an, chi biyaadx da xaban, ad baneetidi ni nia'cwan. Abi' chi gogxuun nē chi guyu'n ladxguiib, ad bidganajtidi naj."

⁴⁴ Dxel guiëb reeman lojman: "Dad, ¿goc baguiaan lüj rliaanl o re'quil nijs, o zizal zi'c tijb benzit, o goc baguiaan lüj ryaadx xabil, o ragxuul, o yu'l ladxguiib, abi' ad bayidxga'tan lüj?"

⁴⁵ Abi' yadxi'man laan guiëbaman: "Diidxliczi rnin lëjt, gra ni ad beentidi din nüjndi yudar da bejn reen majsi ad najt reeman bēn lasajc, najn ad beentidi yudar."

⁴⁶ Laa reeman yayal loj casti tiblyaaa, guiáad ree bēn been zi'c rayal, laa reeman rayal guialnaban tiblyaaa con Dios.

26

Baya'n reeman diidx xhienaag guiniaaz reeman Jesús

(Mr. 14:1-2; Lc. 22:1-2; Jn. 11 :45-53)

¹ Chi gulox gunee Jesús diidx guin ree, dxel rēb loj ree xbejnman:

² —Lëjt ragbee guial ryaadx zatío'p dxejzi guial guidxin lanij pascw, abi' Bēn guxhaal Dios yayü ree bejn laaman din tiaman loj crüjz.

³ Lēn ree dxejzii badxaag lasa' ree bixhioz rniabee ree bixhioz, con xguxtis ree bēn Israel, lidx Caifás quijb bixhioz zojbloj.

⁴ Ni baya'n reeman diidx xhienaag gusquiee reeman Jesús din guiniaaz reeman laaman, abi' gugüjt reeman laaman.

⁵ Per rēb reeman:

—Ad zaguieent ree zian loj lanij guin chitēē gac naquie' luguiedx guin.

Ruroob tijb bēngunaa perfum guijc Jesús

(Mr. 14:3-9; Jn. 12 :1-8)

⁶ Chi za' Jesús luguiedx Betania lidx Simón, bēn rniee reeman Leproso,

⁷ bidxin tijb bēngunaa ca'man tijb lumejt guidxan perfum ni lasajc wayējx. Abi' la'tgaj zojb Jesús xan mex, baroobaman perfum guin guijc Jesús.

⁸ Chi baguiaa ree xbejn Jesús ni been bēngunaa guin, dád bidxe'ch reeman, abi' rēb reeman:

—¿Chexc zeel bixie' perfum guin?

⁹ Zile' nido'n zro' da't din nüjnan yudar bēnprob ree.

¹⁰ Chi biguiejn Jesús ni canee reeman, rēbaman loj reeman:

—¿Chexc zeel rdxe'chidi bēngunaa guin? Zagdxe naj ni beenman naj.

¹¹ Din bēnprob guin ree zianczi za'nē reeman lëjt, sa'n naj ad ziantczi gazunē'n lëjt.

¹² Abi' ni baroobaman perfum guin guican, rēn guiëban guial ma been-chaaw xgajman naj par chi guiguie'chan.

¹³ Diidxliczi rnin, bantēz guin guire'ch xtiidxza'c Dios loj guidxliuj, zü ree bejn gra ni been bēngunaa guin por naj, din gusaaladx reeman laaman.

Rayü Judas Jesús

(Mr. 14:10-11; Lc. 22:3-6)

¹⁴ Loj guidxiptio'p ree xbejn Jesús, bēn la Judas Iscariote, bigneenēman bixhioz rniabee ree bixhioz,

¹⁵ rēbaman loj reeman:

—¿Plac guneedi din yanen Jesús lojdi?

Abi' badēēd reeman gajlbichii milia plajt lojman.

¹⁶ Diidx dxejzii guzulojman raguuilaman mod xhienaag yayüman Jesús.

*Gudawnë ree xbejn Jesús xche**(Mr. 14:12-25; Lc. 22:7-23; Jn.13 :21-30; 1Co.11 :23-26)*

17 Dxej ni guzuloj lanij ni raw ree bejn guiadxtil ni ad yu't levadur, gubig ree xbejn Jesús lojman, rëb reeman:

—¿Ban guin rënl yaguieenchaawan ni yadaaw ree guxhin lanij pascw?

18 Badxi' Jesúsán rëbaman:

—Gol chej Jerusalén lidx bën guin, gol biguiedx lojman: “Na Mextr: Ma bidxin xihoraman abi' rënman tédaman pascw lidxil con ree xbejnman.”

19 Dxel been ree xbejnman zi'c rëbaman, been tëe reeman ni gaw reeman guxhin lanij pascw.

20 Chi gure guiaal, zobj Jesús xan mex con guidxiptio'p ree xbejnman.

21 Abi' la'tgaj cayaw reeman, rëbaman loj reeman:

—Diidxliczi rnin, tijb gajc lëjt yayü naj.

22 Abi' dád guyunaya reeman, zianz guzuloj rniabdiidx tijbgaj reeman loj Jesús, rëb reeman:

—¿Najn ya, Dad?

23 Badxi' Jesúsán, rëbaman:

—Bën cayaw loj pliajt ni cayaw gajcan, laaman yayü naj.

24 Walican, Bën guxhaal Dios naj guial sacaman zi'c rëb loj xtiidx Dios. Per jproba bën yayü laaman!, zagdxeli naj par laaman ad niutaman loj guidxliuj.

25 Dxel Judas bën yayü Jesús, gunabdiidxaman rëbaman:

—Mextr, ¿wen najn ya?

Badxi' Jesúsán, rëbaman:

—Lüjn.

26 La'tgaj cayaw reeman, cwa' Jesús guiadxtil, badëédaman quixtëe loj Dios. Dxel gula'man guiadxtil guin gudi'saman laan loj ree xbejnman, rëbgajman:

—Gol gudaw guiadxtil guie, laan naj da cuerpan.

27 Dxel cwa'man tib cojp vin, chi gulox badëédaman quixtëe loj Dios, badëédaman cojp guin loj reeman, rëbgajman:

—Gol gu' gradi loj cojp guie.

28 Din laan naj da rejnan ni gaxhie'n chi guiëtan por zien ree bénguidxliuj. Din por da guialgüjtan guixal tijb nejz cüb xhienaag gap ree bejn perdon loj Dios por xtol reeman.

29 Abi' diidxliczi rnin lëjt ad yu'tri dxej guië'n vin rajcchaawnë uv, xt chi guidxin dxej guië'në'n lëjt vin cüb lod rniabee da Dadan.

*Rëb Jesús guial guiëb Bëd ad nünbeetaman laaman**(Mr. 14:26-31; Lc. 22:31-34; Jn.13 :36-38)*

30 Chi gulox biil reeman tijb cant par Dios, dxel zë reeman guijc guia' Olivos.

31 Abi' rëb Jesús loj reeman:

—Gradi zabëëladx naj yan guxhin, zi'c ca loj xtiidx Dios lod rëb: “Gugüjtan bën rajp ree xiil, dxel guire'ch ree xiil guin.”

32 Per chi yabanan, yaloy naj ganeed ga gajn Galilea dxelri gui'tidi.

33 Dxel rëb Bëd lojman:

—Majsi gra reeman cwëëladx lüj per naj ad yu't dxej gabëladxan lüj.

34 Per rëb Jesús lojman:

—Diidxliczi rnin lojl, yan guxhin gajc chi gad guïd cwdixa', mal rëbil choon volt guial ad nünbeetil naj.

35 Abi' rëb Bëd lojman:

—Majsi guiëtnë'n lüj, per ad yu't dxej guië'n guial ad nünbeetan lüj.

Abi' gra ree xbejn Jesús ziangajc rëb reeman.

Gurejdx gunab Jesús Dios lod la Getsemaní
(Mr. 14:32-42; Lc. 22:39-46)

³⁶ Chi bidxin Jesús con ree xbejnman tijb luar la Getsemaní, rëbaman loj reeman:

—Gol gurejsii guie, la'tgaj gan ni din gabledx ganaaban Dios.

³⁷ Dxel zinëman Béd con grop ree xi'n Zebedeo, zianz guzuloj cayunayaman abi' ad nixtri yu' luxdooman.

³⁸ Zianz rëbaman loj reeman:

—Dád yu'naya luxdoon, rulüü ma gugüjt gualyu'naya guin naj. Gol baya'n guie ad gaayëjsidi.

³⁹ Dxel zë Jesús mazri delant abi' gurerulojman gurejdx gunabaman Dios, rëbaman:

—Dad, bal zile' yabëel naj loj gualzi ni gadëedan, per ad gac zi'c rënan, gac zi'c rënl.

⁴⁰ Dxel baguiajman lod za' ree xbejnman, abi' baguiaaman naga'yëjs reeman, zianz rëbaman loj Béd:

—¿Wen ni'qui tib hor ad bile't natie'ch xbaaalidi ya, din sunëdi naj?

⁴¹ Gol batie'ch xbaaalidi gol gurejdx gunab tëë Dios, chitëë güün xindxab lëjt gan, din rënquidi güündi zi'c rayal, per xcuerpidi ad rtiëjbtan.

⁴² Ni barojp volt wejman gurejdx gunabaman Dios, rëbaman:

—Dad, bal id zile' téd gualzi ni naj gadëedan, bal rüjn naguiejn gadëedan gacri zi'c rënl.

⁴³ Chi badxinman lod za' ree xbejnman stijb, laa reeman naayëjs gual dád guidxa bacaal loj reeman.

⁴⁴ Dxel basa'nman laa reeman stijb, zëman, bayon volt cabejdx canabaman Dios con diidx guin gajc ree.

⁴⁵ Chi badxinman lod za' ree xbejnman, rëbaman loj reeman:

—¿Sta naga'yëjsidi ya, cayziiladx tëëdi? Guiáad Bén guxhaal Dios ma bidxin hor yayü reeman laaman loj ree bëndol.

⁴⁶ Gol bixche, yo' ree, gol baguiaa laa bén yayü naj ma zëed gajxh.

Gunaaz reeman Jesús

(Mr. 14:43-50; Lc. 22:47-53; Jn.18 :2-11)

⁴⁷ Sta caneenë Jesús bén naj ree xbejnman, chi bidxin Judas bén naj gajc tijb xbejn Jesús. Bidxinnëman zien ree bejn, ca' reeman espad në yag. Guxhaal ree bixhioz rniabee ree bixhioz con ree xguxtis ree bén Israel laa reeman.

⁴⁸ Abi' Judas bén bayü laaman mal rëbxgajman loj ree bén guin: “Bén gawan xid xhajn, laaman raguuilidi, gol gunaazaman.”

⁴⁹ Chi bidxin Judas bibigaman loj Jesús, dxel rëbaman:

—¡Xchan, Mextr!

Laa gudaw gajcaman xid xhajnman.

⁵⁰ Abi' rëb Jesús lojman:

—Judas, been ni zidguieenl.

Dxel gubig ree bén guin, gunaaz reeman Jesús persi zinë reeman laaman.

⁵¹ Per tijb ree bén za'në Jesús yagaj, gulëë xiespadaman dxel gutü'man guidiajg xmojs quijb bixhioz zojbloj.

⁵² Dxel rëb Jesús lojman:

—Bagu'chaaw xiespadil xluaran. Din bén rdil con espad, con espad rëjtaman.

⁵³ ¿Wen, id ragbeel ya guial zajc gabledx ganaab da Dadan, abi' laa guixhiaal gajcaman por mil ree xianjlaman din gagnè reeman naj?

⁵⁴ Per ¿xoxo gac cumplid zi'c ca loj xtiidx Dios ni rëb guial rüjn naguiejn gac ree ni cayajc?

⁵⁵ Loj hor guin gajc rëb Jesús loj ree benzien guin:

—¿Chexc zeel zëédidi con espad nè con yag din guiniaazidi naj zi'c tijb xingubaan? Guixie guixie guzunë'n lëjt lën yadooro' Jerusalén balün lëjt xtiidx Dios, abi' ad gunaaztidi naj.

⁵⁶ Per gra ree ni guie cayajc din gac cumplid ni bacaa ree bën badëë xtiidx Dios loj ree bejn.

Loj hor guin gajc baxüün ree xbejn Jesús, guro'nladx reeman laaman.

Za' Jesús loj ree guxtis Israel

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷ Bën gunaaz ree Jesús binë reeman laaman lidx Caifás, quijb bixhioz zobjloj, yagaj badxaag lasa' ree mextr rajc ley con ree xguxtis ree bën Israel.

⁵⁸ Abi' Bëd zijt zijt nalaman Jesús, xt lule' lidx bixhioz guin. Dxel guyuman abi' gurejnëman bën rajp ree lidx bixhioz guin, din guguaaman xhie güünnë ree bën guin Jesús.

⁵⁹ Guíaad ree bixhioz rniabee ree bixhioz con gra ree guxtis guin raguuil reeman xhie gusquiee reeman din gutedia' reeman Jesús din nabee reeman guiëtaman.

⁶⁰ Per ad radxejlt xhienaag gutedia' reeman laaman majsi zien ree bën basquiee. Dxel bibig zatío'p reeman,

⁶¹ rëb reeman:

—Bën guie rëb: “Zile' yase'nan xyadoo Dios abi' loj choon dxejzi yayünanan.”

⁶² Dxel guzuli quijb bixhioz zobjloj guin, rëbaman loj Jesús:

—¿Nid zadxi'llan ya? ¿Waliqui ni canee ree bën guin contr lüj ya?

⁶³ Per achet rëb Jesús. Dxel rëb bixhioz guin lojman:

—Por Dios bën naban, rniabeen lüj guna diidxli. Guna bal lüjn naj Cristo, Xi'n Dios.

⁶⁴ Badxi' Jesúsán rëbaman:

—Waliquil. Rni tëën lëjt, zuguaadi Bën guxhaal Dios zobjaman xladbee Dios bën rajp guialrniabee abi' zuguaa tëëdi gui'taman loj zaj xanyabaa.

⁶⁵ Chi biguiejn bixhioz guin zian, gudixya' xabaman, rëbaman:

—Diosan canee guijdx bën guin. ¿Xhie mazri rüjn naguiejn yadiil ree testiw? Lëjt gajc ma biguiejn guial rnieeguixdxaman Dios.

⁶⁶ Yan, ¿xhie nadi?

Badxi' ree bën guinan rëb reeman:

—Rayal guiëtix.

⁶⁷ Dxel bacojp xhiejn reeman lojman, gudijn reeman laaman, yu' tëë reeman wëéz ro'man,

⁶⁸ rëb reeman lojman:

—Bal lüjn naj Cristo, guneeya' chu gudin lüj.

Rëb Bëd ad nünbeetaman Jesús

(Mr. 14:66-72; Lc. 22:56-62; Jn.18 :15-18, 25-27)

⁶⁹ La'tgaj zobj Bëd lule' lidx bixhioz guin, gubig tijb biin rüjn dxiin yagaj, rëbim lojman:

—Në lüj nal Jesús, bën Galilea.

⁷⁰ Per Béd gurexuuman, rëbaman niz loj gra reeman:

—Ad ragbeetan xhienin rnieel.

⁷¹ Chi zëman niz ro' port baguiaa stijb biin rüjn dxiin yagaj laaman, abi' rëbim loj ree bën riga' yagaj:

—Në bën guin nal Jesús bën Nazaret.

⁷² Per Béd gurexuuman stijb, xt baza'taman Dios, rëbaman:

—Ad nünbeetan bën guin.

⁷³ Dxel ad gojct xchej, gubig ree bën riga' yagaj loj Béd, rëb reeman lojman:

—Laa rguien gajc në lüj naj xbejn reeman, din zi'cgajc rniee reeman rnieel.

⁷⁴ Per Béd baza'taman Dios, rëbaman loj reeman:

—Dios gudëed naj casti bal rusquieen, per ad nünbeetan bën guin.

Hor guin gajc guridxa' tijb gujd.

⁷⁵ Abi' basaaladxaman guial rëb Jesús lojman: “Chi gad gujd cwidxa', mal rëbil choon volt ad nünbeetil naj.” Dxel barii Béd yagaj abi' dád naya biinman.

27

Binë reeman Jesús loj Pilato

(*Mr. 15:1; Lc. 23:1-2; Jn.18 :28-32*)

¹ Chi bani luyuj, gra ree bixhioz rniabee ree bixhioz con ree guxtis Israel baya'n reeman diidx xhienaag güün reeman din guiët Jesús.

² Dxel guxhii reeman laaman abi' binë reeman laaman loj gobernador Pilato.

Güjt Judas

³ Dxel Judas, bën bayü Jesús, chi baguiaaman guial ma naj guiët Jesús, guyunayaman, abi' bayüman gajlbichii milia plajt guin loj ree bixhioz rniabee con loj ree guxtis Israel,

⁴ rëbaman loj reeman:

—Ma benan dol guial banen tijb bën achet dol rajp.

Badxi' reeman laan rëb reeman:

—Xhiecki yaguieenan, jlüj gunaj!

⁵ Abi' bazaal Judas milia guin lën yadooro' Jerusalén zianz bariiman wejman bigxhii yëjnman.

⁶ Dxel bato'p ree bixhioz rniabee guin milia guin, abi' rëb reeman:

—Ad rayalt yadxë' ree milia guin lën lod ru gon, din con laan bio' bën guiët.

⁷ Dxel be reeman diidx, abi' con milia guin guzii reeman xguidxliuj bën rüjn trast bajn ree, din gacan lod guiguie'ch ree benzit.

⁸ Zeel xt yan la guidxliuj guin Yuj Rejn.

⁹ Zian gojc cumplid ni guneë Jeremías, bën badëë xtiidx Dios loj ree bejn, chi rëbaman: “Cwa' reeman gajlbichii milia plajt, prejs ni rëb ree bën Israel lasajcaman,

¹⁰ abi' con milia guin guzii reeman xguidxliuj bën rüjn trast bajn ree, zi'c gunabee Dios naj.”

Rniabdiidx Pilato loj Jesús

(*Mr. 15:2-5; Lc. 23:3-5; Jn.18 :33-38*)

¹¹ Dxel badxig reeman Jesús loj gobernador Pilato, abi' gunabdiidxaman loj Jesús, rëbaman:

—¿Lüjn naj xrey ree bën Israel ya?

Badxi' Jesúsán, rëbaman:

—Najcan.

12 Abi' chi cutedia' ree bixhioz rniabee ree bixhioz con ree guxtis Israel laaman, achetzi radxi'man.

13 Dxel rëb Pilato lojman:

—¿Nid riguiejnl gra ni canee reeman contr lüj ya?

14 Per Jesús ni'qui tijb diidx ad badxi'taman, zeel dá d badxa loj gobernador guin.

Gunabee reeman guiët Jesús

(Mr. 15:6-20; Lc. 23:13-25; Jn. 18:38-19:16)

15 Lën ree dxej lanij, ruslaa gobernador Pilato tijb bén yu' ladxguiib bén guieb ree bénguedx guin laa, zi'c naj xcostumbr reeman.

16 Lën ree dxejzii yu' Barrabás ladxguiib, tijb bén nünbee ree bejn niz ni niz guie.

17 Abi' chi badxaag lasa' gra ree bejn, gunabdiidx Pilato loj reeman, rëbaman:

—¿Chu rëndi guslaan? ¿Barrabás ya, o Jesús, bén rëb ree bejn naj Cristo?

18 Rëbaman zian guial gogbeeman ganaxzi guialnadëdlojn zeel bayü reeman Jesús.

19 La'tgaj zojb Pilato lod rüjnman guialguxtis, bidxin xruson lacheelaman, rëbaman lojman: “Adxhie güünnël bén guin achet dol rajpaman, din dá d nadxuudx gune'xchalan laaman nuche.”

20 Per bixhioz rniabee ree bixhioz con ree guxtis Israel, badxe' reeman diidx gra ree bejn persi gunab reeman guslaaman Barrabás, guiáad Jesús guiëtaman.

21 Gunabdiidx Pilato loj reeman stijb, rëbaman:

—¿Chu loj grop reeman rëndi guslaan?

Badxi' reeman laan rëb reeman:

—Barrabás.

22 Abi' rëb Pilato loj reeman:

—¿Xhieza günnë'n Jesús, bén rëb ree bejn naj Cristo?

Badxi' gra reeman laan rëb reeman:

—¡Bacaaan loj crüjz!

23 Abi' rëb Pilato loj reeman:

—¿Xhieza ni mal beenman?

Per laa reeman mazri rejs rbixdiaj reeman, rëb reeman:

—¡Bacaaan loj crüjz!

24 Chi baguiaa Pilato guial achet rile' güünman, al mazri naquie' cayüjn ree bén guin, dxel cwa'man nijs abi' banaaman delant loj gra reeman, rëbaman:

—Achet dol ra'pan guial guiët bén guie, xcwentidan.

25 Badxi' gra ree bén guinan rëb reeman:

—¡Du guijcan, në guijc du xi'nán cwiban guial guiëtaman!

26 Dxel baslaa Pilato Barrabás, zianz gunabeeman gudijn reeman Jesús abi' bayüman laaman din gucaa reeman laaman loj crüjz.

27 Zianz xsuldad ree gobernador guin binë reeman Jesús lën palas lod bado'p gra ree suldad, gadëd lod za'man.

28 Dxel gulëë reeman xabaman bascajcw reeman laaman tijb lajd xnia.

29 Abi' beenchaaw reeman tijb coron guiëjch badxe' reeman laan guijcaman, zianz бага's reeman tijb yag ladxaaman ladbee. Dxel bazuxib reeman lojman, ruze' reeman laaman, rëb reeman:

—¡Guibanri xrey ree bén Israel!

30 Abi' rucojpp xhiejn reeman lojman, laagajc tëë yag ni ca'man rugaz reeman guijcaman.

31 Chi gulox baze' reeman laaman, dxel babëë reeman lajd xnia guin ladaman, bascajcw reeman xabaman, zianz zinë reeman laaman din gucaa reeman laaman loj crüzj.

Cwa Jesús loj crüzj

(Mr. 15:21-32; Lc. 23:26-43; Jn.19 :17-27)

32 Chi zinë reeman Jesús, badxaagloj reeman tijb bën Cirene, laman Simón, abi' been reeman laaman naguiejn byaaman xcrüzj Jesús.

33 Chi bidxin reeman tijb luar la Gólgota (rën guiëban Xluar Calaver),

34 ni badëed reeman vin, no'chan nijs nala da't guië' Jesús. Per chi beenman laan prueb, ad cwëjbtaman nië'man laan.

35 Chi gulox bacaa reeman laaman loj crüzj, dxel gudxijt reeman suert guijc xabaman din yala' reeman laan.

36 Dxel gurej reeman yagaj din gap reeman laaman.

37 Abi' guijc crüzj guin bacaa reeman lejtr ni rëb, chexc zeel cwaman loj crüzj. Rëb lëjtr guin: "BEN GUIE NAJ JESÚS XREY REE BEN ISRAEL."

38 Në tio'p xin gubaan bacaa reeman loj crüzj, tijbix xladbee Jesús stijbix xladruvejsaman.

39 Abi' ree bën rdëd, rnieeguijdx reeman Jesús, runij guijc reeman,

40 rëbgaj reeman:

—Lüj rëb, nuse'nl yadooro' abi' loj choon dxejzi nayüjnlan, baslaa lüj gajc. Bal walil najl Xi'n Dios baguiajt loj crüzj guin.

41 Ziangajc ree bixhioz rniabee ree bixhioz në ree mextr rajc ley con ree guxtis Israel, ruze' reeman Jesús, rëb reeman:

42 —Baslaax ben ren ree, abi' ad rajct ruslaa laagajquix. Bal wali najx xrey ree bën Israel, yaguiajtix loj crüzj guin, din yaliladx reex.

43 Rililadxix Dios. ¡Yan, guslaaza Dios laax, bal wali rënman laax, din rëbix: "Xi'n Dios najx"!

44 Abi' nëgajc ree xingubaan ca cwë'man ruze' laaman.

Güjt Jesús

(Mr. 15:33-41; Lc. 23:44-49; Jn.19 :28-30)

45 Dxel diizd garol dxej bicajy loj guidib guidxliuj, xt raca choon wadxe.

46 Loj horzii gurixdiajman rejs da't, rëbaman:

—Elí, Elí, ¿lama sabactani? —rën guiëban: Dios, Dios, ¿chexc zeel gulëladxil naj?

47 Yu' ree bën za' yagaj, chi biguiejn reeman, rëb reeman:

—Laaman cabejdx Elías, bën badëë xtiidx Dios loj ree bejn.

48 Laa baxüün gajc tijbaman bicajdxaman tijb xiil loj vinagr, abi' bacaaman laan loj tijb yag zianz badxigaman laan ro' Jesús din guië'man laan.

49 Per rëb los demazri reeman:

—Basa'nx, din yaguaaa ree don zidgaslaa Elías laax ya.

50 Zianz gurixdiaj Jesús rejs da't stijb, dxel güjtaman.

51 Loj hor zii goxya' lajd nal lën yadooro' Jerusalén gojcan tio'p lala', diizd guijc guin xt guia' guin goxya'. Abi' guxu, gula' tëë ree guiajro'.

52 Guiáad ree baa bixal reen, abi' zien ree bejn rën naj xbejn Dios, bën ma güjt ree baban.

53 Dxel chi baban Jesús, barii lën xbaa reeman, abi' guyu reeman Jerusalén, lod baguiaa zien ree bejn laa reeman.

⁵⁴ Dxel suldad rniabee ree suldad në gra ree suldad za'nëman yagaj canaj reeman Jesús, chi baguiaa reeman caxu në gra ni cayajc, dád bidxeb reeman abi' rëb reeman:

—Walican Xi'n Dios bën guin.

⁵⁵ Zien ree béngunaa guzanan Jesús diizd Galilea, bën been tée ree laaman yudar, za' reeman zijt ruguiaa reeman ni cayajc.

⁵⁶ Loj reeman no'ch María Magdalena, në Li xniaa Santiaaw con Xiëb nètëë xniaa ree xi'ngaan Zebedeo.

Biguie'ch Jesús

(Mr. 15:42-47; Lc. 23:50-56; Jn. 19 :38-42)

⁵⁷ Chi gure guiaal, bidxin tijb benrijcw laman Xiëb, bën Arimatea, në laaman binal Jesús.

⁵⁸ Wejman loj Pilato, bignabaman xcuerp Jesús. Dxel gunabee Pilato bayü reeman cuerp guin lojman.

⁵⁹ Abi' cwa'man cuerp guin batüübaman tijb lajd naya.

⁶⁰ Dxel biquie'chaman laaman lën tijb baa cüb ni gudëenman par laagajcan lën tijb guiaj. Zianz basiaawaman ro' baa guin con tijb guiajro', ziataman.

⁶¹ Abi' zojb María Magdalena con stijb bën la gajc Li, ro' baa guin.

Rajp ree suldad ro' xbaa Jesús

⁶² Chi bareguiaal, dxej raziiladx ree bejn, wej ree bixhioz rniabee ree bixhioz në ree bënfarisew, bigneenë reeman Pilato,

⁶³ rëb reeman lojman:

—Dad, rasaaduladxan, chi ziz naban bën rusquiee ni, rëbaman guial chi gac choon dxej yabanman.

⁶⁴ Zeel gunabee guiyaawdxi'ch ro' baa guin xt chi gac choon dxej, chitëë gui't ree xbejnman guxin cwan reeman xcuerpaman. Abi' guiëb reeman loj ree bejn guial ma babanman. Abi' mazri gusquiee reeman bejn guial loj ni yaloj.

⁶⁵ Dxel rëb Pilato loj reeman:

—Laa ree suldad za' yagaj. Gol chinë reeman, gol basiaawdxi'ch ro' baa guin zi'c rëndi.

⁶⁶ Abi' zë reeman, dxel basiaawdxi'ch reeman ro' baa guin. Zianz basa'n reeman suldad guin ree cayajp reeman laan.

28

Raban Jesús

(Mr. 16:1-8; Lc. 24:1-12; Jn. 20 :1-10)

¹ Chi gudëd dxej raziiladx ree bejn, bareguiaal chidumingw, María Magdalena con stijb bën la gajc Li biquiaa reeman ro' baa guin.

² Dxel bi't tijb xudoxh, guial biguiajt tijb xianjl Dios diizd xanyabaa, dxel bibig anjl guin ro' baa guin biquiedaman guiaj nayaaw ro'n, zianz gurejman guijcan.

³ Dád rliajman bacha' zi'c chi rë'p nijs, guiáad xabaman naquichbëjn.

⁴ Chi baguiaa ree suldad guin anjl guin, binij reeman guial dád bidxeb reeman xt badaj reeman abi' biyajb reeman luyuj.

⁵ Dxel rëb anjl guin loj ree béngunaa guin:

—Ad rdxebidi, ragbeen cayguilidi Jesús bën cwa loj crüjz.

⁶ Per achutri laaman guie, ma babanman zi'c naman. Gol guida nial din guguaadi lod gudixh reeman laaman.

⁷ Yan, gol baxüün gol bicojn ree xbejnman guial ma babanman, ma nedaman lojdi zëgajman Galilea, ni guguaadi laaman. Ni nezan naj ni rugojnan lëjt.

⁸ Dxel cari da't baza reeman ro' baa guin rdxeb reeman rabaa tëë reeman, ruxüün reeman zia reeman zicojn reeman xbejn Jesús.

⁹ La'tgaj zia reeman, balüüloj Jesús loj reeman, bagajpdiozaman laa reeman. Abi' bibig reeman lojman, bazuxib reeman, gudiidx reeman guia'man,

¹⁰ abi' rëbaman loj reeman:

—Ad rdxebidi. Gol chej, gol biguiedx loj ree da bejnman din che reeman Galilea, ni guguaa reeman naj.

Ni rëb ree suldad

¹¹ La'tgaj zia ree béngunaa guin, në tio'p choon ree suldad cayajp ro' baa guin zë luguiedx guin zicojn reeman bixhioz rniabee ree bixhioz gra ni goc.

¹² Dxel wej ree bixhioz rniabee guin bigneenë reeman guxtis Israel ree persi baya'n reeman diidx xhie güün reeman. Abi' dad zro' milia badëed reeman loj ree suldad guin,

¹³ rëb reeman:

—Con gol güjdx loj ree bejn: “Guxhin la'tgaj nadoodyësan, bi't ree xbejn Jesús abi' gulan reeman xcuerpaman.”

¹⁴ Abi' bal gagbee gobernador, dunujn yaneenë' laaman chitëë xhie güünnëman lëjt.

¹⁵ Dxel cwa' ree suldad guin milia guin abi' been reeman zi'c rëb reeman. Laan naj diidx ni nare'ch loj ree bën Israel xt yan.

Rxhiaal Jesús bën naj ree apóstoles

(Mr. 16:14-18; Lc. 24:36-49; Jn. 20 :19-23)

¹⁶ Guidxiptib ree xi apóstoles Jesús, wej reeman Galilea, guijc tijb guia' lod rëb Jesús che reeman.

¹⁷ Abi' chi baguiaa reeman Jesús, bazuxib reeman lojman, majsi yu' reeman ad bililadxza'ct.

¹⁸ Dxel bibig Jesús loj reeman, rëbaman:

—Dios ma baneë gra guialrniabee din ganabeen xanyabaa në loj guidxliuj.

¹⁹ Zeel, gol chej guidib guidxliuj, gol biglüü ree bejn din gac reeman da bejnman. Gol baroobnijs reeman por dux Dad ree, por Xi'nman në por xSprijtaman,

²⁰ gol balüü tëë reeman din guzoob reeman diidx gra ni ma rnin lëjt. Abi' naj gazunë' lëjt gradxejczy xt chi nit guidxliuj. Amén.

Xtiidxza'c Jesucrist ni bacaa San Marcw

Rzuloj Waj rulüüman xtiidxza'c Jesucrist

(Mt. 3:1-12; Lc. 3:1-9, 15-17; Jn.1 :19-28)

¹ Ze guzuloj xtiidxza'c Jesucrist, Xi'n Dios.

² Guyu tijb bën badëë xtiidx Dios loj ree bejn brii lajman Isaías, bacaaman xtiidx Dios, rëbaman:

Naj rxhial tijb bën ned lojl,

bën güünchaaw xnejzil.

³ Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree, gol guxhal tijb nejz nali.”

⁴ Zian bi't Waj bën baroobnijs bejn ree, guzujman niz loj yujbidx, abi' rëbaman loj ree bejn guial rayal yayüjn xgab por xtol reeman, yayejc reeman con Dios din gac reeman perdon tiobnijs tëë reeman.

⁵ Gra ree bën zobj niz Judea, në ree bën Jerusalén brii reeman zicaagdiajg reeman ni rnieë Waj, abi' rxhioobdol reeman. Zianz ruroobnijs Waj laa reeman loj guiiw Jordán.

⁶ Guidxad camell gojcnë xabaman, abi' lënman bixii tijb cinch guid. Gudawaman bi'tsu con dxijn dajn.

⁷ Chi guneenëman bejn ree, rëbaman:

—Xichan zëed tijb bën mazri zobjbloj guial lon, ni'qui xgurëchaman ad zajct gaxhiecan guial mazri zobjblojman guial lon.

⁸ Naj curoobnijs lëjt con nijs, per laaman guroobnijs lëjt con xSprijt Dios.

Rirobnijs Jesús

(Mt. 3:13-17; Lc. 3:21-22)

⁹ Lën ree dxejzii guza Jesús luguiedx Nazaret ni riga' niz Galilea, abi' baroobnijs Waj laaman loj guiiw Jordán.

¹⁰ Chi bariiman loj nijs guin, laa baguiaa gajcaman bixal xanyabaa, zidguiajt xSprijt Dios zi'c tijb palom xt guijcaman.

¹¹ Dxel biguien cha' bejn xanyabaa, rëbaman:

—Lüj naj da Xi'nan, rënan lüj rabaanë' tëën lüj.

Been xinxab Jesús prueb

(Mt. 4:1-11; Lc. 4:1-13)

¹² Dxel binë xSprijt Dios Jesús loj yujbidx.

¹³ Ni guzuman tiuu dxej tiuu guiaal, loj ree bedoxh. Abi' been xinxab laaman prueb chitëë nuzoobaman xtiidx Dios, guiáad ree xianjl Dios gunaj laaman.

Rzuloj Jesús rulüüman bejn ree niz Galilea

(Mt. 4:12-17; Lc. 4:14-15)

¹⁴ Chi mal guyu Waj ladxguuib, wej Jesús niz Galilea bigneeman xtiidxza'c Dios,

¹⁵ rëbaman:

—Ma bidxin dxej zëed xguialrniabee Dios gajxh, zeel gol bayüjn xgab por xtolidi, gol bililadx tëë xtiidxza'caman.

Rbejdx Jesús tajp ree bën gac xbejnman

(Mt. 4:18-22; Lc.5:1-11)

¹⁶ La'tgaj caza Jesús ro'nijsdoo Galilea, baguiaaman Simón nē bijchaman Andrejs, cuzaal xguijxh reeman lojnijs din guiniaaz reeman bëjl.

¹⁷ Abi' rëb Jesús loj reeman:

—Gol tanal naj din gulün lëjt xhienaag guto'pidi bejn par Dios, luar rniaazidi bëjl.

¹⁸ Loj hor guin gajc basa'n guijxh rniaaznë reeman bëjl persi zinal reeman Jesús.

¹⁹ Guzaman zatibda'n, dxel baguiaaman Jacob con Waj bën naj ree xi'n Zebedeo, yu' reeman loj barcw rayüjnchaaw xguijxh reeman.

²⁰ Dxel gurejdx Jesús laa reeman, abi' basa'n reeman Zebedeo loj barcw guin, bën naj xdad reeman con ree xmojsaman, guíaad laa reeman zinal reeman Jesús.

Rabëë Jesús xindxab luxdoo tijb bejn

(Lc. 4:31-37)

²¹ Chi bidxin Jesús luguiedx Capernaum. Abi' dxej raziiladx ree bejn guyuman lën xyadoo ree bën Israel culüüman laa reeman.

²² Dád radxa loj reeman zi'c rnieenëman laa reeman guial rulüüman laa reeman zi'c tijb bën rniabee, ad rulüütaman zi'c rulüü ree mextr rajc ley.

²³ Lën yadoo guin yu' tijb xin yu' xindxab luxdoo, dxejczy guridxa'x rëbix:

²⁴ —¿Xhie rën con dunujn, Jesús bën Nazaret? ¿Zëëdil ya zidganijtil dunujn? Nünbeen lüj, ragbeen guial naya nalil najl xi'n Dios.

²⁵ Dxel gudilë Jesús xindxab guin, rëbaman:

—¡Bacwëéz ro'l, barii luxdoo xin guin!

²⁶ Abi' been xindxab guin xin guin zi'c bën rëjtya', zianz gurixdiajx rejs, bariix luxdoo xin guin.

²⁷ Graczi ree bën riga' dád badxaloy reeman, riniabdiidx loj lasa' reeman rëb reeman:

—¿Xhie ree nicüban rulüü bën guin? ¡Con guialrniabee ni rajpaman xt ree xindxab ruzoob xtiidxaman!

²⁸ Tibrajtzi bire'ch xtiidx Jesús guidib niz Galilea.

Rayüjn Jesús xnasuegr Bëd

(Mt. 8:14-15; Lc. 4:38-39)

²⁹ Bariiz reeman lën yadoo guin, binë Jesús Jacob con Waj lidx Simón con Andrejs.

³⁰ Abi' naga' xnasuegr Simón, yu'man xliaadoxh. Dxel bagojn reeman Jesús guial ragxuuman.

³¹ Abi' gubigaman cwë'man gunaazaman yaaman, gulesaman laaman. Loj hor guin gajc bariiman xliaa guin dxel guzuloy cudëédaman ni gaw reeman.

Rayüjn Jesús zien ree bënragxuu

(Mt. 8:16-17; Lc. 4:40-41)

³² Chi ma gurej guiaal, binë reeman bënragxuu ree lod za' Jesús, në ree bën yu' xindxab luxdoo.

³³ Graczi ree bën luguiedx guin bido'p ruyu lod za' Jesús.

³⁴ Bayüjn Jesús zien ree bën rajc ree gadxagayaa guialguijdx, babëë tëëman zien ree xindxab luxdoo ree bejn. Per ad rudëëtaman mod guiniee ree xindxab guin guial nünbee reex laaman.

Rulüü Jesús xtiidx Dios niz Galilea

(Lc. 4: 42-44)

³⁵ Bixche Jesús rsildoo, chi ziiz nacay, briiman luguiedx guin wejman tijb luar lod achutczí bejn zojb, persi gurejdx gunabaman Dios.

³⁶ Abi' Simón con ree xcompniaraman bigdiil reeman laaman.

³⁷ Chi badxejl reeman laaman, rëb reeman lojman:

—Gra ree bejn cayguuil lüj.

³⁸ Per rëbaman loj reeman:

—Yo' ree guiedx ni riga' ree gajxh din gulün xtiidzxa'c Dios, din par zian zialan.

³⁹ Abi' balüü Jesús xtiidx Dios lën ree xyadoo ree bén Israel guidib niz Galilea babëë tëëman xindxab luxdoo ree bejn.

Rayün Jesús tijb bén rajc gualguijdx la lepra

(Mt. 8:1-4; Lc. 5:12-16)

⁴⁰ Tijb bén rajc gualguijdx la lepra, gubigaman lod za' Jesús, bazuxibaman lojman rëbaman

—Bal guiën, zajc yayüjnl naj.

⁴¹ Baya Jesús laaman, baqui'man laaman, rëbgajman:

—Rënan, bayajc.

⁴² Chi gunee Jesús zian, hor guin gajc bayajc bén guin abi' baya xcuerpaman.

⁴³ Dxel bagu'nejz Jesús laaman, rëbaman lojman:

⁴⁴ —Bacaagdiajg ni ganin lüj. Achu loj guiëbil guial ma bayajquil. Lojzi bixhioz wej din guguaaman lüj, binë gon ni rayal chinël loj Dios zi'c gunabee Moisejs, din gagbee gra ree bejn guial ma bayajquil.

⁴⁵ Per bén guin chi ziaman guzuloj catie'chaman diidx loj gra bejn xhien-aag bayajcaman. Zeel ad bile't contzi niu Jesús luguiedx ree, ganax dajn ree raya'nman lod achut bejn zojb. Per gra lad rza ree bejn rej reeman lod za'man.

2

Rayün Jesús xin nëjt xcuerp

(Mt. 9:1-8; Lc. 5:17-26)

¹ Chi goc tio'p choon dxej, badxin Jesús luguiedx Capernaum, abi' chi gogbee ree bejn, guial za'man yagaj,

² tibrajtzi bido'p zien da't reeman lod za'man, xt ni'quid rdaant ro' port chu' reeman, guiäad laaman culüüman laa reeman xtiidx Dios.

³ Dxel bidxin tajp ree bejn yagaj lejn reeman tijb xin nëjt xcuerp.

⁴ Per ad gojct niunë reeman laax lod za' Jesús guial bén guixiuj guidxa. Abi' guxhal reeman guijc yu lod za'man persi gulet reeman xinragxuu guin guidib ni naga'x loj xt lod za' Jesús.

⁵ Chi baguiaa Jesús guial rliladx reeman laaman, rëbaman loj xinragxuu guin:

—Xi'n, ma benan xtolil perdon.

⁶ Per yagaj zojb tio'p choon ree mextr rajc ley, been reeman xgab naladx reeman:

⁷ “¿Chexc zeel rniece xin guin zian? ¿Chexc zeel rüjnx mazri xin zojbloj guial loj Dios? Achutczí rajc rüjn perdon dol tijbzi Dios.”

⁸ Per gogbee gajc Jesús xgab cayün reeman, dxel rëbaman:

—¿Chexc zeel rüjndi xgab zian?

⁹ ¿Conin ad nawëëgt gac, guial guiën loj bénragxuu guin ya: “Ma benan xtolil perdon”, o guiën ya: “Bixche, gules ni go'til loj, baguij?”

10 Per yan gulün lëjt guial Bén guxhaal Dios rajpaman gualrniabee loj guidxliuj guie din güünman dol ree perdon. Dxel rëbaman loj xinragxuu guin:

11 —Lüj rnin, bixche, baca' ni go'til loj baguiaj lidxil.

12 Loj hor guin gajc bayajc xin guin, bixchex baca' ni go'tix loj, bariix lënü guin guidib loj gra ree bén riga' yagaj. Abi' gra reeman badxaloj, ruza't reeman Dios zagdx, rëb reeman:

—Ni'qui tijb ad waguiaat ree zi'c naj ni cayguiaa ree yan.

Rbejdx Jesús Leví

(Mt. 9:9-13; Lc. 5:27-32)

13 Dxel wej Jesús ro'nijsdoo Galilea zatiyb. Dád zien ree bejn rdxin lod za'man persi rulüüman laa reeman xtiidx Dios.

14 Chi cadëdaman, baguiaaman Leví xi'ngaan Alfeo, zojbaman lod ruquixaman impuest. Dxel rëb Jesús lojman:

—Tanal naj.

Laa bisu gajc Leví binalaman laaman.

15 Dxel chi cayaw Jesús lidx Leví con zien ree bén ruquix impuest në ree bén ad nabant zi'c rën Dios, gra reeman zojbnë Jesús xan mex con ree xbejnman, guial zinal zien ree bejn laaman.

16 Chi baguiaa ree bénfarisew con ree mextr rajc ley guial cayawnë Jesús bén guin ree, rëb reeman loj ree xbejnman:

—¿Chexc zeel rawnë xmextridi bén ruquix ree impuest në ree béndol?

17 Chi biguiejn Jesús ni rëb reeman, zeel rëbaman:

—Bénnadaan ree ad riaadxt reeman doctor, bénraxuu ree, laa reeman riaadx doctor. Ad zialtan par ree benza'c, zialan par ree béndol din yayüjn reeman xgab por xtol reeman.

Rniabdiidx reeman loj Jesús xcwent gualrba'n

(Mt. 9:14-17; Lc. 5:33-39)

18 Lën ree dxej zii guba'n ree xbejn Waj bén ruroobnijs bejn ree, në ree bénfarisew. Abi' yu' ree bén gunabdiidx loj Jesús, rëb reeman:

—¿Chexc zeel ad rba'nt ree xbejnl zi'c rba'n ree xbejn Waj con ree bénfarisew?

19 Badxi' Jesús laan rëbaman:

—Wen, ¿zajc guiba'n ree biooz za' loj gualruxhliaa ya la'tgaj za'në xin cuxhliaa guin laa reeman? La'tgaj za'nëx laa reeman ad zajct guiba'n reeman.

20 Per guidxin dxej chiquiedix loj reeman, abi' chi guidxin dxej guin dxel guiba'n reeman.

21 'Achut bén rata' lajd cüb loj lajd yojx, din zaxü'n lajd cüb guin abi' mazri quixya'n lajd yojx guin.

22 Ad rgu' tëët bejn vin cüb lën anfr yojx, din zaguixya' vin cüb guin anfr guin, abi' zi'c anfr guin zi'c vin guin zaxin reen. Zeel vin cüb rayal chu'n lën anfr cüb.

Rgui'ch ree xbejn Jesús trigo dxej raziiladx ree bén Israel

(Mt. 12:1-8; Lc. 6:1-5)

23 Tijb dxej raziiladx ree bén Israel, cadëd Jesús con ree xbejnman loj guiniaa lod yu' trigo, abi' ree xbejnman guzuloj cagui'ch reeman trigo guin chi cadëd reeman.

24 Dxel rëb ree bénfarisew loj Jesús:

—¿Chexc zeel rüjn ree xbejnl ni ad rayalt gac dxej raziiladx ree bejn?

25 Per rëb Jesús loj reeman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

²⁶ Tiamp ni goc Abiatar bixhioz rniabee gra ree bixhioz, guyu Davi lën xyadooro¹ Dios, gudawnë ree xcompniaraman guiadxtil ma nagle' abi' bixhiosi ree rayal gaw laa reen.

²⁷ Rëb tëë Jesús:

—Dios badxe' dxej raziiladx bejn, per ad badxe'taman dxej guin par sagdiaj bejn.

²⁸ Abi' naj, guial najn Bén guxhaal Dios, ra'pan guialrniabee dxej raziiladx ree bejn.

3

Rayajc tijb xin naxü'n tibladyaa

(Mt. 12:9-14; Lc. 6:6-11)

¹ Tijb dxej guyu Jesús lën tijb yadoo. Lën yadoo guin za' tijb xin naxü'n tibladyaa.

² Abi' ree bén yu' lën yadoo guin rula'ch reeman Jesús din guidoon zayünman laax dxej raziiladx reeman ya, din gac gutedia' reeman Jesús.

³ Dxel rëb Jesús loj xin naxü'n yaa guin:

—Bisu, guzuj galay guin.

⁴ Abi' rëbaman loj ree bén guin:

—¿Xhie rayal güün bejn dxej raziiladx reeman? ¿Ni zagdxe ya o ni mal? ¿Guslaaman xguialnaban bejn ya o gugüjtaman laaman?

Per ad badxi't reeman xtiidxaman.

⁵ Dxel rdxe'ch Jesús ruguiaaman loj gra reeman, dád guyunaya luxdooman guial ad guyënt reeman naya lasa' reeman. Zianz rëbaman loj xin guin:

—Basli yaal.

Abi' basli yaax, loj hor guin gajc bayajcan.

⁶ Chi baza ree bënfarisew guin, zianz baya'n reeman diidx con ree xbejn Herodes din gugüjt reeman Jesús.

Zien ree bejn riga' ro'nijdsdo

⁷ Per Jesús zë gajcaman ro'nijdsdo Galilea con ree xbejnman. Zien da't ree bén Galilea con ree bén Judea binal laaman,

⁸ në ree bén Jerusalén con ree bén Idumea, në ree bén zojb zatiblad ro' guiwro' Jordán, në ree bén Tiro con ree bén zojb niz Sidón. Dád zien ree bejn wej lod za' Jesús guial gogbee reeman ni rünman.

⁹ Zeel rëbaman loj ree xbejnman din guzujsin reeman tijb barcw par laaman chitëë gutëë ree bén guin laaman.

¹⁰ Guial ma bayünman zien ree bejn, zeel rbig gra ree bënragxuu lojman din guqui' reeman laaman.

¹¹ Guiáad ree bén yu' xindxab luxdoo chi ruguiaa reeman Jesús, ruzuxib reeman lojman, rbidxa' reeman rëb reeman:

—iLüj naj Xi'n Dios!

¹² Per gunabeeman xindxab guin ree chitëë guiëb reex chu laaman.

Rbe Jesús chiptio'p ree apóstoles

(Mt. 10:1-4; Lc. 6:12-16)

¹³ Dxel wë'p Jesús tijb ruguia', abi' gurejdxaman gra ree bén guleman. Zianz wej reeman,

¹⁴ loj gra reeman gulejman chiptio'p reeman din su reeman con laaman zianczi guixhiaal tëëman laa reeman chigtie'ch reeman xtiidx Dios.

¹⁵ Abi' badëëman guialrniabee din yayüjn reeman bénragxuu ree yabëë tëë reeman xindxab luxdoo ree bejn.

¹⁶ Bén guie ree naj guidxiptio'p ree bén gule Jesús: Simón bén gulëëljaman Bëd,

¹⁷ Jacob con Waj, bén naj ree xi'n Zebedeo, gunee Jesús laa reeman Boanerges (rën guiëban, xi'n guziaaw);

¹⁸ në Andrejs, Felip, Tol, Matew, Tumajs con Jacob xi'n Alfeo, në Tadeo, nëtëë Simón bén bi'ch loj ree bén Cananistas,

¹⁹ con Judas Iscariote bén bayü Jesús.

Rëb ree bejn ca' Jesús xguialrniabee Beelzebú

(Mt. 12:22-32; Lc. 11:14-23; 12:10)

Chi gulox bacaabeeman laa reeman dxel badxinnëman laa reeman lod zojbaman.

²⁰ Dád zien ree bejn bido'p yagaj stijb, xt ni'quid bile't niajw Jesús con ree xbejnman.

²¹ Chi gogbee ree xfamil Jesús, dxel bidxin reeman din yaca' reeman laaman guial rëb reeman guijcaman rajc.

²² Abi' ree mextr rajc ley bén zëëd ree Jerusalén rëb reeman:

—Bén guin rabëë xindxab luxdoo ree bejn por xguialrniabee Beelzebú, xin rniabee ree xindxab.

²³ Dxel gurejdx Jesús laa reeman, rëbaman:

—¿Xhienaag yabëë satanás lasa' xindxab gajquix?

²⁴ Bal tijb nacion, ad nadxagt riga' ree gobiarn, zadijl reeman abi' ad zanuut xguialrniabee reeman,

²⁵ ziangajc tijb famil, bal rdilné lasa' reeman, nayob la' lasa' reeman.

²⁶ Yan, ziangajc bal satanás su contr lasa' xindxabgajquix, zala' lasa' reex abi' wed yagaj lox xguialrniabee reex.

²⁷ 'Abi' achut zajc chu' lidx tijb béngojl da't din cwanman gra xieenman bal id zaxhii xgajman laaman. Zian zile' cwanman ni rajpaman.

²⁸ 'Naj rni lojdi guial yu' perdon par gra dol ni rüjn bejn, yu' tëë perdon par gra diidxguijdx ni rniee bejn chutëëz.

²⁹ Per bén guinieeguijdx xSprijt Dios, ad yu't dxej gacaman perdon, ma banijtaman loj Dios.

³⁰ Rëb Jesús zian guial rëb reeman yu' xsprijt xindxab luxdooan.

Xniaa Jesús con ree bijchaman

(Mt. 12:46-50; Lc. 8:19-21)

³¹ Hor guin bidxin xniaa Jesús con ree bijchaman yu lod za'man, per ad bile't niu reeman zeel guxhaal reeman bén chignee laaman.

³² Dxel ree bén zojbnë laaman yagaj bagojn reeman laaman, rëb reeman:

—Laa xniaal con ree bijchil za' lule' guin cayguuil reeman lüj.

³³ Badxi' Jesús xtiidx reeman rëbaman:

—¿Chunin naj da nan con ree da bichan?

³⁴ Dxel baguiaaman bén zojb ree gadëd lod zojbaman, rëbaman:

—Bén guie ree naj da nan con ree da bichan,

³⁵ din graczi ree bén rüjn ni rën Dios, laa reeman naj da bichan, da zanan në da nan.

4

Xcwent bén rtie'ch bin

(Mt. 13:1-9; Lc. 8:4-8)

¹ Zatiġb dxej culüü Jesús xtiidx Dios ro'nijsdoo Galilea. Abi' ġual dád benzien bido'p lod za'man zeel wë'paman loj tiġb barcw yu' lojnijs ġuin, abi' ġurejman lojn ġuiáad ree bën ġuin riga' reeman ro' nijs ġuin.

² Zien ree ni balüüman laa reeman, rüman laan loj reeman zi'c cwent, loj ree ni culüüman laa reeman rëbaman:

³ —Gol bacaagdiaġ ni ġanin lojdi: Tiġb bejn briiman bigtie'chaman bin loj ġuiniamaan.

⁴ Chi catie'chaman laan, ta'n nan biaġb luneġz abi' bidxin ree biguijn ġudaw reeb laan.

⁵ Zata'n nan biaġb loj ree ġuiġ lod ad riga't zien yuj, abi' cari ġulejnan ġual ad zient yuj riga'.

⁶ Per chi ġunan ġubijdx, bigoolan abi' ġual ad zro't liujn yu', ġubidxan.

⁷ Zata'n nan biaġb loj ree yaġuiëġch. Abi' chi ġuni'san, banidloj yaġuiëġch ġuin laan, abi' ad cwat ladan.

⁸ Per zata'n nan biaġb loj yuj za'c, abi' dád ġojcan, yu' ni cwa ġajlbichii, yu' ni cwa ġayoġn yu' tēē ni cwa tiġgayuu.

⁹ Rëb tēē Jesús loj reeman:

—Bën rën ġucaagdiaġ, ġol bacaagdiaġ.

Chexc zeel rulüü Jesús con cwent ree

(Mt. 13:10-17; Lc. 8:9-10)

¹⁰ Chi ma baya'nnē Jesús zata'nz ree bejn con ġuidxiptio'p ree xbejnman, dxel ġunabdiidx reeman xhie rën ġuiëb cwent ġuin.

¹¹ Badxi'man laan rëbaman:

—Dios ma basa'n lëġt din chignia'di xhienaag naj xġualrniabeeman ni ġoc naguië'ch par lëġt, sa'n ree bën ad riladxt xġualrniabeeman, con ġanaxzi ree cwent naj ġual ġulün laa reeman.

¹² Din majsi rani loj reeman, per ad zuguiaat reeman, majsi riguiëjn reeman, per ad zignia't reeman chitëē yayeġc reeman loj Dios abi' ġüünman perdon xtol reeman.

Rusignia' Jesús xcwent bën rtie'ch bin

(Mt. 13:18-23; Lc. 8:11-15)

¹³ Abi' rëb Jesús loj reeman:

—¿Nid rignia'di ya xhie rën ġuiëb cwent ġuin? ¿Xhieza naag chignia'di ġra ni ġanin lojdi?

¹⁴ Bën ġutie'ch bin ġuin, laaman naj zi'c bën rtie'ch xtiidx Dios.

¹⁵ Bin biaġb luneġz, naj zi'c ree bën riguiëjn xtiidx Dios, per rdxin ġajc xindxab rġuiedix laan luxdoo reeman.

¹⁶ Yu' ree bën naj zi'c bin biaġb loj ree ġuiġ. Riguiëjn reeman xtiidx Dios abi' dád nix ru luxdoo reeman riguiëjn reeman laan.

¹⁷ Per ġual naj reeman zi'c tiġb cwaan ni ad yu't zro' liuj, chi rzagdiaġ reeman o chi rzunal ree bejn laa reeman din ġüün reeman laa reeman ni mal por xtiidx Dios, laa rusa'n ġajc reeman ni riladix reeman.

¹⁸ Yu' tēē ree bën naj zi'c bin ni biaġb loj yaġuiëġch. Riguiëjn reeman xtiidx Dios,

¹⁹ per ru reeman xġab por ree ni riga' loj ġuidxliuj ġuië. Rusquieë ġualnaza'c laa reeman rën reeman ġap reeman ġraloj. Abi' ġual yu' xġab ġuin ġuiġ reeman, zianz rucwëēz rucaagdiaġ reeman xtiidx Dios, abi' aġet sirv rüjn ni rucaagdiaġ reeman.

²⁰ Per yu' ree bën naj zi'c bin biaġb loj yuj zagdxë, ridxġa' reeman laan con ġuidib luxdoo reeman. Rüjn reeman zi'c rën Dios, laa reeman naj zi'c ni cwa ġajlbichii o ni cwa ġayoġn o ni cwa tiġgayuu.

Achet ni naguei'ch yu'
(Lc. 8:16-18)

²¹ Abi' rëb Jesús loj reeman:

—Acht bén ruze'c tijb guij par guta'cwaman laan con tijb caj, o gudxe'man laan xan loon, ruzujman laan ya din gusnin guidib.

²² Din achet ni naguei'ch yu' ni ad zaguiet ad yu' tëet ni ralan ni ad zagbeet bejn.

²³ Bén rën gucaagdiajg, gol bacaagdiajg.

²⁴ Rëb tëe Jesús:

—Gol been xgab por ree diidx ni caguiejndi. Bal ridxga'di xtiidx Dios, mazri gustëdguienman lëjt.

²⁵ Din bén ma rignia' xtiidx Dios, chignia'man mazri. Per bén ad rignia't, xt ta'n ni rignia'man ad zignia'traman.

Xcwent guial rni's bin

²⁶ Rëb tëe Jesús loj reeman:

—Xguialrniabee Dios naj zi'c rzajc bén rxübin loj xguiniaaman.

²⁷ Din majsi naga'yëjsaman o naga'naaman, majsi radxe o guiaal ya, rliejn bin guin abi' rni'san, ni'quid ragbeetaman xhienaag rajcan.

²⁸ Din yuj guin gajc rusni's laan, yaløj rliejnman najn tijb gui'xhdo, dxel ririin dojn, zianz rtia ladan.

²⁹ Chi ma gojc reen dxel raru' reen guial ma bidxin tiamp yado'p reen.

Xcwent xhaj moxtajs

(Mt. 13:31-32; Lc. 13:18-19)

³⁰ Rëb tëe Jesús:

—¿Xhienaag ganin naj xguialrniabee Dios, o xhienaag gün diidx lojdi din chignia'di xhienaag naj xguialrniabeeman?

³¹ Rnin lojdi guial xguialrniabee Dios naj zi'c naj xhaj moxtajs. Chi rxübin reeman laan. Laan naj ni mazri ni dobëz loj gra ree bin yu' loj guidxliuj.

³² Per chi ma guxübin reeman laan, rni'san rajcan mazri naroo loj gra ree cwaan, xt rajc rüjn xguixbitia's ree biguijn xidxan.

Balüü Jesús con ganax cwent

(Mt. 13:34-35)

³³ Balüü Jesús laa reeman xtiidx Dios con ganaxczi cwent zi'c naj ree ni ma beman, xt lodzi bignia' reeman.

³⁴ Ad rulüütaman laa reeman zezi, bal id zulüüman con cwent. Per chi ma za'man con ree xbejnman dxel rusignia'man laa reeman zagdxe xhie rën guiëb ree ni rëbaman.

Racwëëz Jesús bidoxh

(Mt. 8:23-27; Lc. 8:22-25)

³⁵ Dxej zi, chi gure guiaal, rëb Jesús loj ree xbejnman:

—Yo' ree zatiblad ro' nijs guin.

³⁶ Dxel basa'n reeman bén riga' ree yagaj, wë'p reeman loj barcw ni yu' Jesús zinë reeman laaman con ree barcw ren.

³⁷ Dxel brii bidoxh loj nijs guin, xt guzuløj cadxa nijs loj barcw guin.

³⁸ Per Jesús naga'yëjsaman loj barcw guin tijb luar naj xijchan, nucuuga-man tijb almoad. Dxel bacwëen reeman laaman rëb reeman:

—¡Mextr! ¿Nid yu'l xgab ya? ¡Ma cayzëeb ree xan nijs!

³⁹ Abi' bixche Jesús, bacwëëzaman bidoxh guin rëb tëëman loj nijs guin:

—¡Bacwëëz, bayajcdxe!

Dxel bayajcdxe bi guin con nijs guin.

40 Zianz rëb Jesús loj reeman:

—¿Chexc zeel rdxebidi? ¿Gadzidi chililadx naj ya?

41 Per laa reeman dád bidxeb reeman abi' rniabdiidx loj lasa' reeman:

—¿Chu bën guin zeel xt bi con nijs ruzoob xtiidxaman?

5

Rayüjn Jesús tijb xin yu' xindxab luxdoo

(Mt. 8:28-34; Lc. 8:26-39)

1 Chi badxin Jesús con ree xbejnman zatiblad ro' nijsdoo guin, xdajn ree bën Gadara,

2 baguiajtzí Jesús loj barcw guin, tijb xin yu' xindxab luxdoo bigchaaglojx Jesús. Bariix ro' ree baa,

3 guial nabanx ni. Achutczí rajc rixhii laax ni'qui con caden.

4 Zien volt ma guxhii reeman yaax në guia'x con caden, per rüjngajquix gan rurooxix laan. Achut rüjn laax gan.

5 Dxejz guiaal rizax niz dajn con lad ree baa, rbixdiajx rguilguijdx laaga-jquix con guiaj.

6 Zijtri baguiaax Jesús, baxüünx bigchaaglojx laaman abi' bazuxibix lojman.

7 Zianz guneex rejs rëbix:

—¿Xhie rënl con naj Jesús, Xi'n Dios yu' xanyabaa? Rniaaban lojl ad gusagzil naj.

8 Rëbix zian, guial cayëb Jesús lojx:

—¡Xindxab, barii luxdoo xin guin!

9 Dxel gunabdiidx Jesús lojx rëbaman:

—¿Chu lal?

Badxi'xan rëbix:

—Legión lan din zien nayajcan.

10 Abi' rëbix lojman chitéë guixhiaalaman xindxab guin ree lood ren.

11 Abi' gajxh yagaj riga' zien ree cüch cayaw reeb.

12 Zianz rëb ree xindxab guin loj Jesús:

—Guxhaal dunujn lod za' ree cüch guin din yadxu'n lën reeb.

13 Dxel cwëjb Jesús barii ree xindxab guin luxdoo xin guin persi bayu reex lën ree cüch guin. Cost tio'p mil naj reeb. Dxel guzuloj cuxüün reeb, zianz bitidya' reeb ro' bala' xt lojnijs, lod gu' reeb nijs zianz güjt reeb.

14 Guiaád ree bën cayajp laa reeb, baxüün reeman bicojn reeman luguiedx në ree dajn abi' zien ree bejn wej biquiaa ni goc.

15 Chi bidxin reeman lod za' Jesús, baguiaa reeman xin barii xindxab guin ree luxdoo, zojbix najcw xabix, ma badëdguienx. Abi' bidxeb reeman.

16 Guiaád ree bën baguiaa gra ni goc con xin guin, në con ree cüch guin, be reeman diidx loj ree bën bidxin.

17 Dxel guzuloj rëb reeman loj Jesús din yazaman niz ladx reeman.

18 Chi bayu Jesús loj barcw guin, naguiejn rüjn xin barii xindxab guin ree luxdoo din chinalix laaman.

19 Per ad cwëjbt Jesús, rëbaman:

—Baguiaj lidxil, bignaj xfamilil, biguie diidx loj reeman gra ni ma been Dios por lüj, xhie tëë naag bayaman lüj.

20 Dxel ziax, guzuloj rëbix loj ree bën zojb niz Decápolis gra ni been Dios por laax, abi' graczi reeman badxaloj.

*Rayajc xi'n Jairo në béngunaa bagaal xab Jesús**(Mt. 9:18-26; Lc. 8:40-56)*

²¹ Chi badxin Jesús loj barcw stiblad ro' nijs guin, dád zien ree bejn bido'p, persi ro'zi nijs guin baya'nman.

²² Dxel bidxin tijb bén rniabee lén tijb xyadoo ree bén Israel, laman Jairo. Chi baguiaaman Jesús, bazuxibaman lojman,

²³ abi' guzajcaman laaman liaadx, rëbaman:

—Ma cayëjt da xi'nan. Yo'sii din gudxiib yaal guijquim din yayajquim din guibanm.

²⁴ Zinët Jesús bén guin, dád zien bejn zinal laaman xt rixa't reeman laaman.

²⁵ Loj graczi reeman no'ch tijb béngunaa, ma gojc chiptio'p ijz ragxuuman ryajbaman rejn.

²⁶ Dád ma guzagdiajman, ma banijt graczi ni rajpaman guial wejman loj ree doctor, per ad bayajctaman, aal mazri zro' rajcaman.

²⁷ Chi biguiejnman gra ni rüjn Jesús, gudëdaman lad ree bén guin, gubigaman niz xijchaman dxel bagaalaman xabaman.

²⁸ Guial gunaladxaman: “Gugalzan xabaman, ma bayajc gajcan.”

²⁹ Loj hor zii gajc gulëjz biajbaman rejn, abi' gogbeeman ma bayajcaman.

³⁰ Laa gogbee gajc Jesús guial yu' chu ma bayajc por xguialrniabeeman, abi' badxi' lojman loj ree bén guin dxel gunabdiidxaman, rëbaman:

—¿Chu baqui' da xaban?

³¹ Abi' rëb ree xbejnman lojman:

—Awa ruguiaal xt rixa't reeman lüj guiáad lüj rniabdiidxil chu baqui' xabil.

³² Per Jesús ruguiaaman gra lad din guguiaaman chu baqui' laaman.

³³ Abi' guidib rnij béngunaa guin guial rdxebaman, guial gogbeeman ma bayajcaman, bigzuxibaman loj Jesús, beman diidxli ni beenman.

³⁴ Dxel rëb Jesús lojman:

—Xi'n, guial bililadxil naj zeel ma bayajquil. Baguiaj zagdx. Ma bayajquil guialguijdx ni goquil.

³⁵ Sta canee Jesús zian, chi bidxin ree bén guza lidx Jairo, rëb reeman loj Jairo:

—Ma güjt xi'nl. Ad ruslenril mextr guin mazri.

³⁶ Per chi biguiejn Jesús ni rëb reeman, rëbaman loj Jairo:

—Ad rdxebil, bililadxzi naj.

³⁷ Ad cwëjbt Jesús ninal gra ree bén riga' laaman, Bëdzi, con Jacob, con Waj bijch Jacob.

³⁸ Chi bidxin reeman lidxaman, baguiaa Jesús cayajc naquie' guial roon rbixdiaj reeman.

³⁹ Dxel guyuman lënü abi' rëbaman loj reeman:

—¿Chexc zeel roon rbixdiajdi? Ad güjttim, naga'yëjsim.

⁴⁰ Per baze' reeman laaman. Dxel gunabeeman barii gra reeman, zianz binëman xdadim con xniaam con ree bén zinëman, lod naga' bindo guin.

⁴¹ Dxel gunaazaman yaam rëbaman:

—Talita, cumi —Rën guiëban: Lüj rnin, bindoo, bixche.

⁴² Loj hor ziigajc bixchem guzuloj cazam. Yu'm chiptio'p ijz. Abi' dád badxa loj ree bén riga'.

⁴³ Per gunabee Jesús laa reeman chitëë chu loj guiëb reeman ni goc, gunabee tëëman gudëëd reeman ni gawim.

6

Radxin Jesús Nazaret
(Mt. 13:53-58; Lc. 4:16-30)

¹ Baza Jesús yagaj, badxin ladxaman con ree xbejnman.

² Chi bidxin dxej raziiladx ree bejn, guzuloj culüüman bejn ree lën yadoo. Abi' gra ree bën cucaagdiajg dád badxa loj reeman ni rnieeman, abi' rëb reeman:

—¿Ban basiid bën guin gra ni rnieeman? ¿Ban gulëëman gualrignia' guin abi' chu badëë gualrniabee zeel rünjman milagr guin ree?

³ ¿Nid laaman naj bën carpinter ya, xi'n Li abi' ree bijchaman naj Jacob, Xiëb, Judas, në Simón? Guiáad ree bizanman zojb luguiedx guie.

Abi' ad bidxga't reeman Jesús.

⁴ Per rëbaman loj reeman:

—Guidibczi rajp reeman respejt tijb bën rudëë xtiidx Dios loj ree bejn. Per ladxaman achut rajp laaman respejt, ni'qui lidxaman, ni'qui ree xfamilaman ad rajpt laaman respejt.

⁵ Ad bile't nün Jesús zien ree milagr yagaj. Bëlzi ree bënragxuu bayünman, badxiib yaaman guiç reeman.

⁶ Dád badxalojman gual ad bililadxt reeman laaman. Dxel zëman guiedx naj ree gajxh, ziglüüman bejn ree.

Rxhiaal Jesús guidxiptio'p ree xbejnman chiglüü reeman xtiidx Dios
(Mt. 10:5-15; Lc. 9:1-6)

⁷ Dxel gurejdx Jesús guidxiptio'p ree xbejnman, abi' guxhaalaman tio'p gaj reeman. Badëëman gualrniabee loj reeman din yabëë reeman xindxab ree luxdoo ree bejn.

⁸ Dxel gunabeeman din achetczi chinë reeman par runejz, ni'qui guiixh, ni'qui gualraw, ni'qui milia, tijbzi yagriiadx reeman,

⁹ con xgurëch reeman, con tijbzi lajd najcw reeman.

¹⁰ Dxel rëbaman loj reeman:

—Yu lod guidxindi, tijbzi yagaj yaya'ndi xt guidxin dxej yazadi luguiedx guin.

¹¹ Bal yu' guiedx lod ad rënt reeman lëjt o ad rënt reeman gucaagdiajg reeman ni rnieedi, gol barii yagaj, gol gudxiyp guxyuj guia'di zi'c sen gual ad rënt reeman guzooß reeman diidx. Din naj rni lojdi, gual dxej ni yadëëd ree bejn cwent loj Dios mazri casti naroob yayal reeman gual loj ree bën Sodoma në Gomorra.

¹² Zianz brii reeman ziguedx reeman loj ree bejn gual rayal yayün reeman xgab por xtol reeman.

¹³ Abi' rabëë reeman zien ree xindxab luxdoo ree bejn, zien tëë ree bënragxuu gudëëb reeman sejt, abi' bayün reeman laa reeman.

Güjt Waj bën baroobnijs bejn ree
(Mt. 14:1-12; Lc. 9:7-9)

¹⁴ Chi biguiejn rey Herodes ni rün Jesús gual ruza't ree bejn laaman guidibczi, rëb reeman:

—Waj, bën baroobnijs bejn ree ma baban, zeel rajpaman gualrniabee rünman milagr ree.

¹⁵ Per yu' reeman rëb:

—Elíasan, bën rudëë xtiidx Dios loj ree bejn.

Yu'za reeman rëb:

—Tijb bën rudëë xtiidx Dios loj ree bejnan lasa' ree bën gocli.

16 Chi biguiejn Herodes rëb reeman zian, rëbaman:

—Wajn, xin gunabeen biru' yëjn, laaxan ma baban yan.

17 Rëb Herodes guin zian din laagajcaman gunabee gunaaz reeman Waj, abi' badxe'man laaman ladxguiib por Herodías. Herodías naj xbéngunaa Felip bijch Herodes. Per Herodes cwa'man Herodías.

18 Abi' guial rëb Waj loj Herodes:

—Ad laat tia' xbéngunaa bijchil.

19 Zeel bidxe'ch Herodías Waj, guyënman nugÿjtaman laaman. Per ad riletan,

20 din rdxeb Herodes guial ragbeeman rÿjn Waj ni rën Dios, rÿjn tëëman zi'c rayal, zeel ad cwëjbtaman xhie nÿjnnë Herodías Waj. Majsì ad ragbeet Herodes xhie gÿnman por ni rëb Waj lojman, per ruladxaman gucaagdiagaman ni rnieeman.

21 Per bidxin dxej been Herodías ni rënman. Chi baza' Herodes ijz, abi' beenman lanij, badxe'man tijb guialraw par bën rniabee ree në par ree bën rniabee ree suldad nëtëë ree bën zojbloj niz Galilea.

22 Dxel guyu xi'n Herodías lod cayajc lanij guin zianz baya'm. Abi' Herodes con ree xbioozaman dád bayuladx reeman zi'c baya'm. Zeel rëb rey guin lojm:

—Gunab ni rëntzil, naj gune laan.

23 Xt badëë xtiidxaman gudëëman ni guiniabtzm, majsì garol ni rajpaman.

24 Dxel bariim bignabdiidx loj xniam, rëbim:

—¿Xhie ganaaban?

Badxi'man laan rëbaman:

—Gunab guijc Waj bën ruroobnijs bejn ree.

25 Laa bayugajquim lod za' rey Herodes, rëbim lojman:

—Yan gajc rënan guneel guijc Waj, bën ruroobnijs bejn ree, guneelan loj tijb pliajt.

26 Dád guyu naya Herodes, per mal badëëd xtiidxaman guidib loj ree bën riga', zeel ad bile't nibexuuman nudëëman ni gunabim.

27 Dxel gunabee Herodes tijb suldad din chica'x guijc Waj.

28 Zianz wej suldad guin lën ladxguiib guin, gutü'x guijc Waj badxe'xan loj pliajt binëxan lojm. Dxel bayü loj xniamin.

29 Chi gogbee ree xbejn Waj guial ma gÿjtaman, baca' reeman xcuerpaman persi biquie'ch reeman laaman.

*Ruyaana Jesús gaay mil bejn
(Mt. 14:13-21; Lc. 9:10-17; Jn. 6:1-14)*

30 Chi bayejc ree xi apóstoles Jesús, be reeman diidx lojman gra ni been reeman në ni balüü reeman.

31 Dxel rëb Jesús loj reeman:

—Gol guda, yo' dunujz ree niz lod achut bejn zojb din yaziiladx ree ta'n.

Rëbaman zian guial dád zien ree bën zia zien tëë ree bën zëëd, xt ni'qui guial gaw reeman ad riletan.

32 Dxel Jesús con ree bën naj ree apóstoles zë reeman loj barcw tijb luar lod achut zojb.

33 Per dád zien ree bejn baguiaa guial zë reeman, abi' bayünbee reeman laa reeman zeel zien ree bejn brii luguiedx guin ree ruxüün reeman, abi' yalojl laa reeman bidxin lod zë Jesús con ree xbejnman.

³⁴ Chi baguiajt Jesús loj barcw guin, baguiaaman bén guixiuj riga' yagaj, abi' bayaman laa reeman guial za' reeman zi'c xiil achut rajp. Dxel guzuloj balüüman laa reeman, zien ree ni balüüman laa reeman.

³⁵ Chi ma gudxe, gubig ree xbejnman, rëb reeman lojman:

—Ma gudxe yan, abi' achut bejn zojb niz guie.

³⁶ Gūjdx loj ree bén guin din che reeman ranch ree në ree guiedx ni riga' gajxh chisii xhienin gaw reeman.

³⁷ Per rëb Jesús loj reeman:

—Lëjt gol badëed ni gaw reeman.

Dxel rëb reeman lojman:

—Per zro' da't milia ryaadx din yo' ni gaw ree bén guin, zi'ct ni rüjn bejn gan loj tio'p gayuu dxej.

³⁸ Abi' rëb Jesús loj reeman:

—¿Bël guiadxtil ca'di? Gol baguiaa don.

Chi baguiaa reeman, dxel rëb reeman:

—Gaay guiadxtil con zatio'p bëjl.

³⁹ Dxel gunabeeman din cwe tibcwaaw gaj reeman loj guixya'.

⁴⁰ Zianz gurej reeman zian, yu' lod gure tibgayuu reeman, yu' lod gure tü'pchii reeman.

⁴¹ Abi' cwa' Jesús guigaay guiadxtil guin con grop bëjl guin. Dxel gules lojman xanyabaa, badëeman quixtëe loj Dios, gula'man guiadxtil guin badëeman loj ree xbejnman persi gudi's reeman laan loj ree bén riga', gudi's tëeman grop bëjl guin loj gra reeman.

⁴² Graczi reeman gudaw xt bigdxinladx reeman,

⁴³ abi' staczi bacha reeman chiptio'p dxüm guiadxtil laay con bëjl ni baya'n.

⁴⁴ Loj ree bén gudaw no'ch cost gaay mil xinguaaw.

Rza Jesús loj nijs

(Mt. 14:22-27; Jn. 6:16-21)

⁴⁵ Dxel gunabee Jesús guyu ree xbejnman loj barcw din tëdgaj reeman stiblad ro' nijs par guidxin reeman Betsaida, la'tgaj cuzaadiidxnëman benzien guin ree.

⁴⁶ Chi gulox bazaadiidxnëman laa reeman, wejman guijc tijb guia', persi gurejdx gunabaman Dios.

⁴⁷ Chi ma cabej guiaal, ma yu' barcw guin galay nijs guíaad Jesús baya'n xtijbzaman guijc guia' guin.

⁴⁸ Dxel baguiaaman dád cazagdiaj ree xbejnman cusa reeman barcw guin guial rliaj bi niz loj barcw guin. Abi' chi ma cayreguiaal zibig Jesús loj reeman cazaman loj nijs guin, beenman zi'c bén tëdnejz.

⁴⁹ Chi baguiaa reeman cazaman loj nijs guin gunaladx reeman sprijt malan, abi' gurixdiaj reeman.

⁵⁰ Dád cadxeb reeman por ni cugiaa reeman. Per guneenë Jesús laa reeman rëbaman:

—¡Gol bagu' luxdoodi, ad bal rdxebidi, najn!

⁵¹ Dxel guyuman loj barcw guin, zianz gulëjz bi guin. Guíaad laa reeman dád badxa loj reeman,

⁵² din nayaaw xquiarguejn reeman, abi' ad bignia't reeman milagr ni beenman con guiadxtil guin ree.

Rayüjn Jesús bénragxuu ree Genesaret

(Mt. 14:34-36)

⁵³ Chi ma gudëd reeman lojnijs guin bidxin reeman xdajn ree bën Gene-saret, yagaj guxhii reeman barcw guin ro' nijs.

⁵⁴ Naabzi baguiajt reeman loj barcw guin, laa bayünbee gajc ree bejn Jesús.

⁵⁵ Abi' gutie'ch reeman diidx guidib niz yagaj. Dxel guzuloj zinë ree bejn bérnragxuu ree lod riguiejntzi reeman za' Jesús.

⁵⁶ Bantëëz zëman, majsi guiedx narooob o guiedx dobëz o ranch ree, rguijxh reeman bérnragxuu guin ree niz lod tëdaman. Dxel rzajc reeman laaman liaadx din tiëbaman gugaal reeman majsi guia'z xabaman. Abi' graczi ree bën bagaal xabaman bayajc.

7

Ni rüjn persi rüjn bejn dol

(Mt. 15:1-20)

¹ Tijb dxej, tio'p choon ree bënfarisew con ree mextr rajc ley, bën guza ree Jerusalén, bibig reeman loj Jesús.

² Abi' chi baguiaa reeman guial yu' ree xbejn Jesús cayaw, ad banaat reeman zi'c naj costumbr. Dxel caneeguijdx reeman laa reeman.

³ (Din bënfarisew në gra ree bën Israel zinaldxi'ch reeman xcostumbr xbéngulal reeman guial ad zajct gaw reeman bal id reeman gunaa zi'c naj costumbr guin.

⁴ Në chi raza reeman luguia', ad rawt reeman bal id zunaa reeman zi'c naj costumbr guin. Dád zien ni zinal reeman güün reeman zi'c xhienaag quib reeman re, con vajs, con ree trast guib, në xloon reeman riguib reeman.)

⁵ Zeel bënfarisew ree con ree mextr guin, gunabdiidx reeman loj Jesús, rëb reeman:

—¿Chexc zeel ad runaat ree xbejn zi'c naj xcostumbr dux béngulal ree? ¿Chexc zeel raw reeman zianzi?

⁶ Dxel rëb Jesús loj reeman:

—¡Bën rusquiee!, waliqui ni guneë Isaías por lëjt, bën badëë xtiidx Dios loj ree bejn, chi bacaaan:

Bën guie ree, rëbzi reeman guial rën da't reeman naj, per ad rënt reeman naj con guidib luxdoo reeman.

⁷ Xli'a'czi rën da't reeman naj,

abi' rulüü reeman bejn ree ganaxzi ni rbëëguicj ree bénguidxliuj.

⁸ Yan, rusa'ndi xtiidx Dios tiblax persi zinalidi xcostumbr ree bénguidxliuj.

⁹ Rëb tëë Jesús loj reeman:

—Par chitëë nit xcostumbridi zeel rusa'ndi xtiidx Dios tiblax.

¹⁰ Rëb Moisejs: “Gojp respejt xdadil con xnial”, abi’ “Bën guzaal diidxmal guicj xdad o xnial, rayal guietaman.”

¹¹ Per lëjt rëbidi guial zile' guieb bejn loj xDadaman o xnialaman: “Ad zajct günan lüj yudar, din gra ni ra'pan naj Corbán” (Corbán rën guieb gran naj par Dios).

¹² Rëbidi, bën guieb zian, ad zile'tri güün xdad xnialaman yudar.

¹³ Abi' rbëëladxidi xtiidx Dios persi zinal xcostumbridi ni rulüü lasa'di, në zien ree ni ren rüjndi lasa' ree ni guin.

¹⁴ Dxel gurejdx Jesús bën zien guin ree, rëbaman:

—Gol bacaagdiajg gradi gol bignia' tëë ni ganin:

¹⁵ Ad ni rawt bejn rüjn persi rüjnman dol. Ni ririi ro'man në ni rüjnman, laan rüjn persi rüjnman dol.

¹⁶ ¡Bën rën gucaagdiajg, gol bacaagdiajg!

17 Chi baza Jesús lod za' ree bèn guin bayuman lènü, dxel gunabdiidx ree xbejnman xhie rën guiëb ni rëbaman.

18 Dxel rëbaman loj reeman:

—¿Në lëjt ad rignia't ni canin ya? ¿Nid ragbeedi ya guial ad ni rawt bejn rüjn persi rüjnman dol,

19 ðin ni raw bejn ad rejtan luxdooman, rejn lënman, abi' rariin?

Zian basignia'man guial ad rüjnt bejn dol por ni rawzaman.

20 Rëbaman:

—Ni ririi ro' bejn në ni rüjnman, laan rüjn persi rüjnman dol.

21 Din guijc bejn zëëd graloj xgab mal, guial rüjn ni dxuudx, guialgubaan, guialrugÿjt lasa',

22 guial rzunë béngunaa ren o xinguaaaw ren, guialrzëëbladx xieen ben ren, guial rüjn ni mal, guialrusquiee, guialrajp vijs, guialnadëdloj, guialrbëë xtiidx bejn, guialrÿjn benro', në guial rüjn ni ad rayalt.

23 Graczi ree ni guin zëëd guijc bejn, abi' laan rüjn persi rüjnman dol.

Rayajc xi'n tijb bèn Sirofenicia

(Mt. 15:21-28)

24 Chi baza Jesús niz yagaj, zëman niz Tiro në Sidón. Dxel guyuman tijb lènü guial ad guyëntaman niagbee ree bejn, per ad gojct nuquie'ch lojman.

25 Din gogbee gajc xniaa tijb bindoo yu' xindxab luxdoo. Abi' wej xniaam lod za' Jesús zianz bazuxibaman lojman.

26 Ad najtaman bèn Israel, najman bèn Sirofenicia. Dxel guzajcaman liaadx loj Jesús ðin yabëëman xindxab guin luxdoo bindoo guin.

27 Per rëb Jesús lojman:

—Badëëdxgaj mod gaw yaloj ree xindoo, ðin ad rayalt chiquied bejn guiadxtil loj xi'nman ðin gudëëman laan gaw ree bë'cw.

28 Badxi' bèn guinan rëbaman:

—Waliquil, Dad, per në ree bë'cw raw xguiadxtil laay reem ni ryajb xan mex.

29 Dxel rëb Jesús:

—Laaqui guneel. Ma zajc yaguaajl, ma barii xindxab guin luxdoo xi'nl.

30 Chi badxin lidx bèn guin, baguaaman laa bindo guin naga' loj loon, ma barii xindxab guin luxdoo.

Bayajc tijb bèn nacwa't ad rniece tëëtaman zagdxë

31 Baza Jesús niz Tiro, gudëdaman niz Sidón, në loj ree guiedx riga' Decápolis abi' bidxinman ro'nijsdoo Galilea.

32 Ni bidxinnë reeman tijb xinguaaaw nacwa'tix ad rajc tëët rnieex zagdxë. Abi' rëb reeman loj Jesús ðin gudxiib yaaman guijquix.

33 Zianz binë Jesús laax tiblax, badxe' xbacwënman lën guidaiajguix, abi' con xhiejnman bagaalamana lüdxix.

34 Dxel gules lojman xanyabaa, banajladxaman, rëbaman:

—¡Efata! —rën guiëban: ¡Baxal!

35 Loj hor zii gajc baxal ree guidaiajg xin guin, baban lüdxix dxel guzuloj caneex zagdxë.

36 Dxel gunabee Jesús laa reeman chitëë chu loj guiëb reeman ni goc. Per guial rëbaman zian, mazri rü reeman laan loj ree bejn.

37 Dád badxa loj reeman rëb reeman:

—Xi zagdxë naj gra ree ni rüjnman, xt rüjnman persi rigueijn ree bèn nacwa't, abi' ree bengop rniee reeman.

8

*Ruyaan Jesús tajp mil bejn
(Mt. 15:32-39)*

¹ Tjib dxej bido'p zien ree bejn abi' achet ni gaw reeman. Dxel gurejdx ree xbejn Jesús rëbaman loj reeman:

² —Rayan bën guin ree din ma gojc choon dxej nadxu'në' reeman guie, abi' ad ca't ni gaw reeman.

³ Abi' bal yaxhalan laa reeman lidx reeman sin guialraw, dool yadaj reeman lunejz, din yu' reeman zëed zijt.

⁴ Dxel rëb ree xbejnman:

—Per, ¿ban guin yuca'n ni gaw ree bën guin, achutczi bejn zojb niz guie?

⁵ Dxel gunabdiidxaman loj reeman rëbaman:

—¿Bël guiadxtil ca'di?

Abi' rëb reeman:

—Gajdxan.

⁶ Dxel gunabeeman gurej ree bën guin luyuj. Zianz cwa'man guigajdx guiadxtil guin, badëëman quixtëë loj Dios, abi' gula'man laa reen badëëd loj ree xbejnman persi gudi's reeman laa reen loj gaw ree bën guin.

⁷ Nëgajc tio'p choon ree bëjldoo ca' reeman, abi' badëëman quixtëë loj Dios dxel gunabeeman gudi's reeman në laa reeb loj ree bën guin.

⁸ Graczi reeman gudaw xt bigdxinladx reeman, abi' staczi bacha reeman gajdx dxüm guiadxtil laay në bëjl ni baya'n.

⁹ Bën gudaw ree naj reeman cost tajp mil. Chi gulox gudaw reeman, dxel bazaadiidxnë Jesús laa reeman.

¹⁰ Zianz guyuman loj barcw con ree xbejnman zë reeman niz Dalmanuta.

*Rniab ree bënfarisew tijb milagr loj Jesús
(Mt. 16:1-4; Lc. 12:54-56)*

¹¹ Dxel bidxin ree bënfarisew, guzuloj cadildiidxnë reeman Jesús, abi' par güün reeman laaman prueb, gunab reeman güünman tijb milagr zi'c tijb sen guial por Dios zëëdaman.

¹² Dxel banajldx Jesús, rëbaman:

—¿Chexc zeel rëndi günan tijb milagr? Diidxli ganin, achetczi milagr günan guguaadi.

¹³ Dxel basa'nman laa reeman, bayuman loj barcw zatijb, zignë ree xbejnman stiblad ro' nijs guin.

*Xlevadur ree bënfarisew
(Mt. 16: 5-12)*

¹⁴ Bayanladx ree xbejn Jesús ninë reeman guialraw, tijbzi guiadxtil ca' reeman loj barcw guin.

¹⁵ Abi' chi rëbaman loj reeman:

—Gol gojp cudad con xlevadur ree bënfarisew në xlevadur Herodes.

¹⁶ Dxel guzuloj rëb loj lasa' reeman:

—Naman duloj ree zian guial ad naca't ree guiadxtil.

¹⁷ Abi' gogbee Jesús ni canee reeman, zianz rëbaman:

—¿Chexc zeel rëbidi guial ad ca'tidi guiadxtil? ¿Staczi ad rignia'tidi ya? ¿Sta nayaaw xquiarguejndi ya?

¹⁸ Yu' guiaalojdi per rulüü ad ruguiaatidi, yu' guidiajguidi per rulüü ad riguejntidi. ¿Nid rusaaladxidi ya?

¹⁹ Chi gudi'san gaay guiadxtil loj gaay mil bejn, ¿bël dxüm ni laay bato'pidi? Badxi' reeman laan rëb reeman:

—Chiptio'pan.

²⁰ Dxel rëbaman:

—Laadx chi gudi'san gajdx guiadxtil loj tajp mil bejn, ĉbël dxüm guida
baca'di?

Badxi' reeman laan rëb reeman:

—Gajdxan.

²¹ Dxel rëbaman:

—ĉStaczi ad waygnia'tidi ya?

Rayün Jesús tijb bén ad ranit loj

²² Chi bidxin Jesús guiedx Betsaida con ree xbejnman. Binë ree bejn tijb
bén ad ranit loj, rëb reeman loj Jesús din gugaalaman guiaalojman.

²³ Dxel gunaaz Jesús yaaman gulëëman laaman luguiedx guin, abi' gudëëb
xhiejnman guiaalojman, baqui'man guiaalojman. Zianz gunabdiidxaman
rëbaman:

—ĉRajc ruguiaal ta'n ya?

²⁴ Dxel guzuloj cuguaaman, abi' rëbaman:

—Ruguan bejn ree, per ruluü naj reeman zi'c yag ni caza.

²⁵ Dxel багаал Jesús guiaalojman stijb, abi' rëbaman lojman din guguiaadx-
ijchaman, dxel guzuloj cuguaaman zagdx, naynidxuj ma ruguiaaman gra.

²⁶ Abi' baxhaal Jesús laaman lidxaman, rëbaman:

—Ad yayul luguiedx guin achu tëë loj guiëbil xhienaag bayajc lojl.

Rëb Bëd guial Jesús naj Cristo

(Mt. 16:13-20; Lc. 9:18-21)

²⁷ Bazanë ree xbejn Jesús niz Galilea, wej reeman guiedx riga' ree Cesarea
de Filipino. Chi zë reeman lunejz gunabdiidx Jesús loj ree xbejnman, rëbaman:

—ĉChu rëb ree bejn najn?

²⁸ Badxi' reeman laan rëb reeman:

—Yu' reeman rëb lüj naj Waj bén baroobnijs bejn ree, yu'za reeman rëb lüj
naj Elías, yu' tëë reeman rëb lüj naj tijb ree bén badëëd xtiidx Dios loj ree bejn
gocli.

²⁹ Dxel gunabdiidxaman rëbaman:

—Laadx lëjt, ĉxhie nadi chu najn?

Badxi' Bëdan rëbaman:

—Lüj naj Cristo.

³⁰ Per rëb Jesús loj reeman achu loj guiëb reeman zian.

Rugojn Jesús guiëtaman

(Mt. 16:21-28; Lc. 9:22-27)

³¹ Guzuloj Jesús rëb loj ree xbejnman:

—Rayal sagdiaj da't Bén guxhaal Dios. Ad zënt ree guxtis Israel laaman,
ni'qui ree bixhioz rniabee ree bixhioz, ni'qui ree mextr rajc ley. Gugüjt
reeman laaman, per ni yayon dxej yabanman.

³² Zagdx basignia'man laa reeman. Dxel gulëëcaan Bëd laaman, rëbaman
lojman chitëë rëbraman zian.

³³ Per badxi' lojman baguiaa ree xbejnman, dxel gudilëman Bëd rëbaman:

—iBisüd lon, Satanás!, din ad por Diost zëëd ree xgab ni rüjnl, rüjnl zi'c naj
xixgab bénguidxliuj.

³⁴ Dxel gurejdx ree xbejn Jesús con ree bén riga' yagaj, abi' rëbaman loj
reeman:

—Bal chu rën gac da bejnman, ad rayalt güünman zi'c naj xixgabaman.
Siibnejzaman guialzi ni tëdzaman abi' guidnalaman naj.

³⁵ Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj në por da diidxan, zajpaman guialnaban tiblayaa con Dios.

³⁶ ¿Xhie gan güün bejn gapaman gra ni yu' loj guidxliuj bal canijtaman loj Dios?

³⁷ Din ad zile't sii bejn xguialnabanman xanyabaa.

³⁸ Din bén yatunë naj në da diidxan niz loj ree bëndol bén ad zinalt ree xnejz Dios, bén riga' ree yan, ziangajc naj, najn Bén guxhaal Dios, yatunë'n laaman chi guialan con xguialrniabee da Dadan con ree xianjlaman.

9

¹ Rëb tëë Jesús loj reeman:

—Diidxliczi ganin, yu' ree bén za' guie, ad zëjt xt guguaa reeman gui't xguialrniabee Dios.

Bidxaa Jesús loj choon ree xbejnman

(Mt. 17:1-13; Lc. 9:28-36)

² Chi goc xho'p dxej, wej Jesús tijb ruguia'ya, binëman Bëd, Jacob con Waj. Yagaj bidxaa Jesús niz loj reeman.

³ Balaa xabaman bacha', gojcan naquichbëj, achutdzi rguuib lajd zian loj guidxliuj guie.

⁴ Dxel baguiaa reeman Elías në Moisejs cayünë reeman Jesús diidx.

⁵ Abi' rëb Bëd lojman:

—Mextr, jzagdxen nadxu'n guie! Yaguieenan choon ranch, tijban par lüj, tijban par Moisejs, zatijban par Elías.

⁶ Per ad ragbeet Bëd xhienin caneeman guial dád bidxeb reeman.

⁷ Loj hor guin biguiajt tijb zäj beenan bala guijc reeman, abi' loj zäj guin biguien cha' bejn rëbaman:

—Bén guie naj da Xi'nan, bén rën da'tan, gol bazoob xtiidxaman.

⁸ Abi' chi baguiaa reeman gadëd lod za' reeman achutri za'në Jesús, tijbzi laaman za' yagaj.

⁹ La'tgaj cayguiajt reeman ruguia' guin, rëb Jesús loj reeman chitëë chu loj guiëb reeman ni baguiaa reeman, xt yaban Bén guxhaal Dios.

¹⁰ Abi' laaz reeman ragbee ni baguiaa reeman, rniabdiidx tëë loj lasa' reeman xhie rën guiëb guial yabanman loj ree bengüt.

¹¹ Dxel gunabdiidx reeman loj Jesús, rëb reeman:

—¿Chexc zeel rëb ree mextr rajc ley guial yaløj Elías gui't?

¹² Badxi'man laan rëbaman:

—Walican yaløj Elías gui't, laaman guzuxnejz gra. Per, ¿chexc zeel ca loj xtiidx Dios guial Bén guxhaal Dios sagdiaj da'taman ad zën tëët reeman laaman?

¹³ Naj rni lojdi guial mal bi't Elías, abi' beennë reeman laaman ni guyëntzi reeman zi'c ca loj xtiidx Dios ni rayal sacaman.

Rayüjn Jesús tijb xin yu' xinxab luxdoo

(Mt. 17:14-21; Lc. 9:37-43)

¹⁴ Chi badxin Jesús lod za' sta'n ree xbejnman, baguiaaman dád zien bejn riga', në ree mextr rajc ley za' yagaj cadildiidx reeman con ree xbejnman.

¹⁵ Chi baguiaa reeman zëëd Jesús, dád badxa loj reeman abi' baxüün reeman bicajpdioz reeman laaman.

¹⁶ Dxel gunabdiidxaman loj reeman rëbaman:

—¿Chexc zeel cadildiidxidi?

17 Abi' rëb tijb bën za' yagaj:

—Mextr, zidnë' da xi'nan lojl guial yu' xindxab luxdoox abi' nusa'nx laax gop.

18 Bantëez guin za'x, chi ru xindxab guin luxdoox rureeyujx laax, abi' rbëex bichijn ro'x, raw tée ree layix, dxel ratiaguix. Ma gunaaban loj ree xbejn din nabëe reeman xindxab guin, per ad gojct reeman.

19 Zeel rëb Jesús:

—iBën ad riladxt! ¿Xt goc gazunë'n lëjt gadaan tëen lëjt? Gol tanë xinzii guie.

20 Dxel binë reeman laax lojman. Per chi baguiaa xindxab guin laaman, laa bagüjtya'gajquix xin guin, bareeyujx laax abi' rbixtÿjpix ririi tée bichijn ro'x.

21 Dxel gunabdiidx Jesús loj xdadix rëbaman:

—¿Goc guzuloj rajquix zian?

Badxi'man laan rëbaman:

—Diizd xindobëzix.

22 Dád zien volt ruzaalix laax loj guij në loj nijs din guiëtix. Zeel bal zajc güünl xhienin por dunujn, gognë dunujn, baya dunujn.

23 Dxel rëb Jesús lojman:

—¿Chexc zeel nal, “bal zajcan”? Graczan zajc bal chu riladx naj.

24 Dxel gurixdiaj xdadix rëbaman:

—iRiladxan lÿj, gognë naj din chililadxan mazri!

25 Chi baguiaa Jesús cado'p zien bejn dxel gudilëman xindxab yu' luxdoo xin guin, rëbaman:

—Xindxab gop nacwa't tée, rniabeen lÿj din yariil luxdoo xin guin. Ad bal yayejcril luxdoox zatijb.

26 Dxel gurixdiaj xindxab guin, abi' bagüjtya'x laax zatijb abi' bariix luxdoox, basa'nx laax zi'c xingüt zeel rëb ree bejn guial ma güjtix.

27 Per gunaaz Jesús yaax gulesaman laax, dxel guzulix.

28 Dxel bayu Jesús lënü con ree xbejnman, abi' gunabdiidx reeman lojman, rëb reeman:

—¿Chexc zeel ad gojct nalëen xindxab guin luxdoo xin guin?

29 Badxi' Jesúsán rëbaman:

—Par yarii lasa' ree xindxab guin, rayal cwedx guiniabidi Dios guiba'n tëedi.

Rugojn Jesús zatijb guial guiëtaman

(Mt. 17:22-23; Lc. 9:43-45)

30 Chi baza reeman yagaj, gudëd reeman niz Galilea, per ad guyënt Jesús chu niagbee guial cadëdaman niz yagaj,

31 guial culüü ree xbejnman, rëbaman:

—Yayü reeman Bën guxhaal Dios loj ree bën gugÿjt laaman, per ni gac choon dxej yabanman.

32 Per laa reeman ad bignia't reeman ni rëbaman, abi' bidxeb reeman niniabdiidx reeman lojman.

¿Chu mazri zobjloj?

(Mt. 18:1-5; Lc. 9:46-48)

33 Dxel badxin Jesús Capernaum con ree xbejnman, abi' badxin reeman yu lod zobj reeman. Dxel gunabdiidxaman loj reeman rëbaman:

—¿Xhie diidxan rüdi lunejz chi zio'p ree?

34 Per achet rëb reeman guial cadildiidx reeman lunejz chu reeman mazri zobjloj.

³⁵ Dxel gurej Jesús, gurejdxaman guidxiptio'p reeman, rëbaman:

—Bal chu Bén rën gac mazri Bén zobjbloj lojdi, rayal güün laagajcaman zi'c tijb Bén ad zobjblojt güün tēēman sirv loj gradi.

³⁶ Dxel cwa'man tijb xindoo, bazujman laax galay reeman, zianz gudiidxaman laax, rëbaman:

³⁷ —Bén ridxga' tijb xindoo por naj, najn ridxga'man, guiáad Bén ridxga' naj, Bén guxhaal najn ridxga'man.

Bén ad za't contr dunuj ree za'man con dunuj ree

(Lc. 9:49-50; Mt. 10 :42)

³⁸ Rëb Waj loj Jesús:

—Mextr, baguiaan tijb bejn rabëēman xindxab luxdoo ree bejn por xgualrniabeel. Per badxoonan guial ad najtaman dux bejn ree.

³⁹ Badxi' Jesúsán rëbaman:

—Ad rudxoondi, din Bén rüjn milagr por da gualrniabeen, ad zile't guinieeguijdxaman naj.

⁴⁰ Bén ad za't contr dunuj ree, za'man con dunuj ree.

⁴¹ Chutëéz Bén gunee majsi tibxijgzi nijs lojdi guial najdi xbejn Cristo, diidxli rnin guial ziangajc yu' ni gudëéd Dios lojman.

Bén ruzaalguiiw bejn din güünman dol

(Mt. 18:6-9; Lc. 17:1-2)

⁴² 'Chutëéz Bén guzaalguiiw tijb Bén qui rliladxri naj din güünman dol, par laaman zagdxeli naj guixhii reeman tijb guiaj mulin yëjnman guzaal reeman laaman loj nijsdoo.

⁴³ Bal laagajc yaal rusajb lüj loj dol, zagdxeli gutü'n. Mazri zagdxé chu' con tiblodzi yaal xanyabaa, guial che con grop yaal gabijl loj bajl ni ad yu't dxej yayü',

⁴⁴ lod ad rëjtt ree bizog lod ad rayü' tēēt bajl.

⁴⁵ Abi' bal laagajc guia'l rusajb lüj loj dol, zagdxeli gutü'n. Mazri zagdxé chu' con tiblodzi guia'l xanyabaa guial che con groplad guia'l gabijl lod yu' bajl ni ad yu't dxej yayü',

⁴⁶ lod ad rëjtt ree bizog lod ad rayü' tēēt bajl.

⁴⁷ Bal laagajc guiaalojl rusajb lüj loj dol, zagdxeli gulëēn. Mazri zagdxé chu' con tiblodzi guiaalojl xanyabaa guial che con groplad guiaalojl gabijl lod yu' bajl ni ad yu't dxej yayü',

⁴⁸ lod ad rëjtt ree bizog lod ad rayü' tēēt bajl.

⁴⁹ 'Zi'c ru zëd guijc gualraw, ziangajc ree Bén rliladx naj sagdiaj reeman din gac reeman naya.

⁵⁰ 'Ni zagdxé naj zëd, per bal id zajcran naxij, ¿xhieza naag yayajcan naxij zatijb? Gol been zi'c rayal chitëé saquidi zi'c zëd ni ad rüjnt sirv, gol gubajnnë tēē lasa'di zagdxé.

10

Rulüü Jesús xcwent guial rala' lasa'

(Mt. 19:1-12; Lc. 16:18)

¹ Chi baza Jesús Capernaum, dxel wejman niz Judea në stiblad ro' guiiw Jordán. Abi' lod za'man bido'p ree bejn zatijb, dxel guzuloj culüüman laa reeman zi'c goc xcostumbraman.

² Yu' ree Bénfarisew gubig lod za'man. Abi' par güün reeman laaman prueb, gunabdiidx reeman lojman rëb reeman:

—¿Zajc yala' xinguaaw lacheelix ya?

³ Badxi'man laan rëbaman:

—¿Xhie gunabee Moisejs güündi?

⁴ Abi' rëb reeman:

—Cwëjb Moisejs yala' xinguaaw lacheelix, per gudëëdix gui'ch tia'man guial ma bala' reex.

⁵ Dxel rëb Jesús:

—Rëb Moisejs gac zian guial nadidi.

⁶ Per guia'xchej chi gule'cchaaw Dios guidxliuj, “beenman xinguaaw con béngunaa”.

⁷ “Zeel xinguaaw gusa'n xdad xniaax din guibannë lacheelix,

⁸ dxel grop reex ma gac zi'c tijbzi bejn.” Zianan zeel ad najtri reex tio'p, ma naj reex tijbzi.

⁹ Zeel, bénguidxliuj ad rayalt yala'man lasa' ni ma bachajg Dios.

¹⁰ Chi bayu reeman lënü, gunabdiidx ree xbejnman lojman zatijb, xcwent ni guneeman.

¹¹ Abi' rëbaman loj reeman:

—Xin rala' lacheel, abi' rtia'x ben ren dolan cayünjx,

¹² ziangajc bal tijb béngunaa yala' lacheelaman abi' tia' xin ren laaman, dolan cayünjman.

Rüjnle' Jesús xindoo ree

(Mt. 19:13-15; Lc. 18:15-17)

¹³ Binë ree bejn xindoo ree lod za' Jesús din gudxiib yaaman guijc reex. Per ree xbejnman guzuloj cadilë reeman bén binë ree laa reex.

¹⁴ Chi baguiaa Jesús zian, balenman zeel rëbaman:

—Gol badëëd mod gui't reex lon, ad bal rudxoondi. Din lod rniabee Dios naj par ree bén naj zi'c laa reex.

¹⁵ Diidxliczi rnin, bén ad rliladxt xguialrniabee Dios zi'c tijb xindoo, ad zile't chu'man lod rniabee Dios.

¹⁶ Dxel gudiidx Jesús laa reex, badxiib yaaman guijc reex, beenle'man laa reex.

Xcwent tijb xinrijcw

(Mt. 19:16-30; Lc. 18:18-30)

¹⁷ Chi ma gusnuu xnejz Jesús, ruxüün tijb xinguaaw bidxinx abi' bazux-ibix lojman, dxel gunabdiidxix rëbix:

—Mextr za'c, ¿xhie rayal gūnan din ga'pan guialnaban tiblayaa con Dios?

¹⁸ Badxi' Jesús laan rëbaman:

—¿Chexc zeel nal lon benza'c? Achut naj benza'c, tijbzi Dios.

¹⁹ Lūj rajc ree mandamient, “Ad gugūjtil bejn, ad sunël béngunaa ren, ad cwanl, ad cwëël xtiidx bejn ad gusquiee tëël, gojp respejt xdad xniaal.”

²⁰ Dxel rëbix loj Jesús:

—Mextr, gra ree ni guin cayūnan diizd xindoon.

²¹ Baguiaa Jesús lojx, bayaman laax, rëbaman:

—Per yu' zatijb ni riaadx güünl: bigto' gra ni rajpil, badëëd milia guin loj ree bénprob, zian gapil guialnaza'c xanyabaa dxel guidnalil naj majsi xhietëez saquil.

²² Chi biguiejn xin guin zian, ad nixt guyu luxdoox abi' dád yu'nayax ziax guial dád xinrijcwan.

²³ Dxel baguiaa Jesús loj gra reeman, abi' rëbaman loj ree xbejnman:

—¡Dád nawëëg naj chu' benrijcw loj xguialrniabee Dios!

²⁴ Dád badxa loj ree xbejnman ni rëbaman. Per rëbaman loj reeman zatijb:

—Xi'n, jben yu'guijc mazri ni rajpaman, dad naweeg naj chu'man loj xgualrniabee Dios!

²⁵ Adli naweegt ted tijb camell xan gagux guial chu' tijb benrijcw loj xgualrniabee Dios.

²⁶ Chi biguien reeman diidx guin ree, mazri badxa loj reeman, dxel rniabddiidx loj lasa' reeman, reb reeman:

—¿Chu zajc laa loj xcasti Dios?

²⁷ Baguiaa Jesus loj reeman, abi' rebaman:

—Par bejn naweegan, per par Dios ad naweegtan din par Dios graczan zile' gac.

²⁸ Dxel guzuloj reb Bed loj Jesus:

—Dunujn basa'nan graczi ni raya'pan persi zudnaalan luj.

²⁹ Badxi' Jesusan rebaman:

—Diidxliczi ganin lejt, chuteez ben rusa'n lidx, o bijch, o bizan, o xdad xniaa, o lacheel o xi'n, o guidxliuj ree por naj ne por xtiidxza'c Dios,

³⁰ loj guidxliuj guie tia'man tibgayuu volt mazri guial loj ni basa'nman, bal najn lidxaman, bijchaman, bizanman, xniaaman, xi'nman, ne xguidxliujman, majsi guidib wazagdiaj, abi' guidxin dxej gapaman guialnaban tiblayaa con Dios.

³¹ Per dad zien ree ben naj ben yaloj yan, gac reeman ben bigra, guiaad ree ben naj ben bigra yan, gac reeman ben yaloj.

Rugojn Jesus zatijb guial guiétaman

(Mt. 20:17-19; Lc. 18:31-34)

³² Chi ze reeman Jerusalen, ned Jesus loj ree xbejnman, abi' dad radxaloj reeman guial zeman Jerusalen, guiaad ree ben nal laaman rdxeb reeman. Dxel gurejdx guidxiptio'p ree xbejnman lood ren, zianz guzuloj rebaman ni sacaman:

³³ —Rebaman loj reeman: Lejt ragbee guial ziyo' ree Jerusalen, abi' naj najn Ben guxhaal Dios, yayu reeman naj loj ree bixhioz rniabee ree bixhioz, ne loj ree mextr rajc ley. Abi' nabee reeman guiétan, yayu tee reeman naj loj ree ben ad najt ben Israel.

³⁴ Guze' reeman naj, gucojpxhiejn reeman lon, quin reeman gugujt tee reeman naj, per yajon dxej yabanan.

Ni gunab ree Jacob con Waj

(Mt. 20:20-28)

³⁵ Dxel Jacob con Waj xi'n Zebedeo, gubig reeman loj Jesus reb reeman:

—Mextr, rayenan guunl tijb favor ni yanaaban lojl.

³⁶ Abi' gunabdiidxaman rebaman:

—¿Xhie rendi gunan?

³⁷ Badxi' reeman laan reb reeman:

—Rayenan guial chi ma canabeel, yadxu'n cwel, tijb dunujn yadxu' xladbeel, zatijb dunujn yadxu' xladruvejsil.

³⁸ Badxi'man laan rebaman:

—Ni'quid ragbeetidi xhie ni guin rniabidi. ¿Wen zajc sagdiajdi zi'c gazaagdiajn ya? ¿Zajc guiétidi zi'c guiétan ya?

³⁹ Badxi' reeman laan reb reeman:

—Zayajcan.

Dxel reb Jesus:

—Waliquidi sagdiajdi zi'c naj guiét teedi zi'c naj,

⁴⁰ per guial cwedi da ladbeen o da ladruvejsan, ad najt rayal gune laan, din ma najn par ree bèn rayal laan.

⁴¹ Chi biguien zachii xbejn Jesús ni rëb reeman, dád balen reeman Jacob con Waj,

⁴² per gurejdx Jesús laa reeman rëbaman:

—Lëjt ragbee guial ree bèn rniabee loj guidxliuj guie, rniabee reeman bejn ree zi'ctzi rën reeman, guiáad ree bèn zojbloy rüjnnë reeman bejn ree zi'ctzi rën reeman por gualrniabee ni rajp reeman.

⁴³ Per con lëjt ad rayalt gac zian. Din bal chu rën gac bèn rniabee lojdi, rayal güünman sirv lojdi,

⁴⁴ guiáad bèn rën gac bèn zojbloy, rayal güünman sirv loj gradi zi'c bèn nado'.

⁴⁵ Din ni'qui naj najn Bén guxhaal Dios, ad zialtan loj guidxliuj par güün ree bejn sirv lon, zialan din günan laa reeman sirv, abi' con da guialnabanán gaguixan por xtol zien ree bénguidxliuj.

Rayajc guiaaloj tijb xin ad ranit loj la Bartimeo

(Mt. 20:29-34; Lc. 18:35-43)

⁴⁶ Bidxin reeman guiedx Jericó, abi' chi ma cayrii Jesús luguiedx guin, con ree xbejnman në ree benzien. Tijb xin ad ranit loj lax Bartimeo, xi'n bèn la Timeo, zojbix cwé' nejt rniabix carda.

⁴⁷ Chi biguejnx cadëd Jesús bèn Nazaret niz yagaj, guzuloy cabidxa'x rëbix:

—jJesús, xdiaa Davi, baya naj!

⁴⁸ Dád zien ree bejn ridilë laax din yacwëëz ro'x. Per mazri rejs rbidxa'x rëbix:

—jXdiaa Davi, baya naj!

⁴⁹ Dxel guzudxe Jesús rëbaman:

—Gol gurejdxix.

Dxel gurejdx reeman laax, rëb reeman:

—Bagu' luxdool, bisu, lüj caneeman.

⁵⁰ Dxel laa badxe'bi gajc xin guin lajd najcwix luya, xt gutiajsix guzulix bibiguix loj Jesús.

⁵¹ Gunabdiidx Jesús lojx rëbaman:

—¿Xhie rën l gūnan por lüj?

Badxi'xan rëbix:

—Mextr, rënan yani lon.

⁵² Dxel rëb Jesús:

—Ma zajc yaguiajl, ma bayajquil guial bililadxlil naj.

Loj hor zii gajc bani lojx dxel zinalix Jesús niz yagaj.

11

Ru Jesús Jerusalén

(Mt. 21:1-11; Lc. 19:28-40; Jn. 12 :12-19)

¹ Chi ma zë reeman gajxh Jerusalén, niz lod riga' guiedx Betfagé con Betania, gajxh guia' la Olivos, dxel guxhaal Jesús tio'p ree xbejnman,

² rëbaman:

—Gol chej guiedxdo riga' delant guin. Chi guidxindi guidxaaglojdi tijb burquie'n, caduub achut wabib laab. Gol guxhiequib gol tanëb.

³ Abi' bal chu guiniabdiidx lojdi: “Chexc zeel caxhiequidi laab”, gol güjdx: “Dad Jesús cayaadx laab, doo yaxhaal gajcaman laab.”

⁴ Dxel wej reeman, bidxaagloj gajc reeman burdo guin, caduub runejz ro' tijb port, abi' guxhiec reeman laab.

⁵ Bén baguiaa ree zian gunabdiidx reeman loj reeman, rëb reeman:

—¿Xhie rüjndi? ¿Chexc zeel caxhiequidi burdo guin?

⁶ Badxi' reeman laan zi'c rëb Jesús, abi' cwëjb ree bén guin zinë reeman laab.

⁷ Bidxinë reeman laab lojman, badxiib xab reeman xijchib, persi gudx-ibaman laab.

⁸ Zien ree bejn riguijxh xab niz lod rdëdaman, yu' tëë reeman rutüüg zijn persi rguijxh reeman laan niz lod rdëdaman.

⁹ Abi' zi'c ree bén ned, në ree bén nal rbixdiaj reeman, rëb reeman:

—¿Gagnëman dunuj ree yan! ¡Nagle' bén zëëd por Dios!

¹⁰ ¡Nagle' bén zëëd nabee zi'c dux béngulal ree rey Davi! ¡Quixtëë dux Dad ree Dios Bén yu' xanyabaa!

¹¹ Zian guyu Jesús Jerusalén abi' guyuman lën yadooro' Jerusalén. Chi gulox baguiaaman graczi, dxel zinë guidxiptio'p ree xbejnman Betania guial ma gudxe.

Bazaal Jesús diidx guijc yag higo

(Mt. 21:18-19)

¹² Chi bareguiaal, barii reeman Betania. Dxel guzuloj calaan Jesús.

¹³ Zijtri baguiaaman tijb yag higo ca ree balag lojn. Abi' wejman biquiaa-man bal ca higo lojn. Per achet bidxaaglojman, balagzi ree ca lojn din ad xtiampantan.

¹⁴ Dxel rëbaman loj yag higo guin:

—¡Ad yu'tri dxej gaw bejn ninejxh tia lojl!

Abi' biguiejn ree xbejnman ni rëbaman.

Rabëë Jesús bén ruto' ree ro' yadooro' Jerusalén

(Mt. 21:12-17; Lc. 19:45-48; Jn. 2:13-22)

¹⁵ Chi bidxin reeman Jerusalén. Dxel guyu Jesús ro' yadooro' Jerusalén guin, abi' guzuloj caybëëman bén cuto' ree në ree bén cazii. Barexguiataman mxex ree bén ruchaa milia con xyagxhil ree bén ruto' ree palom,

¹⁶ ad rtiëjtaman xhie chu'në ree bejn ro' yadoo guin.

¹⁷ Abi' guzuloj culüüman laa reeman, rëbaman:

—Loj xtiidx Dios rëb: “Lidxan grii laj yu lod rbejdx rniab bejn Dios.” Per lëjt nüjndan zi'c lidx ree xingubaan.

¹⁸ Bixhioz rniabee ree bixhioz con ree mextr rajc ley, chi biguiejn reeman ni rëb Jesús, guzuloj raguuil reeman mod xhienaag gugüjt reeman Jesús, guial rdxeb reeman laaman din gra bejn radxaloj ni rulüüman.

¹⁹ Chi ma caxhin, bazanë ree xbejn Jesús Jerusalén.

Tijb yag higo ni gubidx

(Mt. 21:20-22)

²⁰ Chi bareguiaal rsiloo, badëd reeman niz lod zojb yag higo guin, abi' baguiaa reeman ma gubidx diidx liujn.

²¹ Dxel basaaladx Bëd ni rëb Jesús, abi' rëbaman lojman:

—Mextr, ¡baguiaa yag higo ni bazaalil diidx guijc ma gubidxan!

²² Badxi' Jesús an rëbaman:

—Gol bililadx Dios.

²³ Din diidxliczi ganin, bal chu guiëb loj guia' guin: “Bisüd guie biajb loj nijsdoo”, bal id yu' nawëëg luxdooan, bal rililadxaman, gac ni guneeman. Zian gacan.

²⁴ Zeel rnin lojdi, gra ni rniabidi loj Dios, gol bililadx guial ma cwa'di laan, abi' zaca'dan.

²⁵ Guiaad chi ribejdx rniabidi Dios, bal yu' bén rdxe'chidi, gol beenman perdon din ziangajc xDadidi bén yu' xanyabaa güünman perdon xtolidi.

²⁶ Din bal id züjndi perdon, ziangajc xDadidi Bén yu' xanyabaa ad züjntaman perdon xtolidi.

Xgualrniabee Jesús

(Mt. 21:23-27; Lc. 20:1-8)

²⁷ Chi badxin reeman Jerusalén. Chi caza Jesús niz lén yadooro' Jerusalén guin, dxel gubig bixhioz rniabee ree bixhioz con ree mextr rajc ley con ree xguxtis ree bén Israel,

²⁸ gunabdiidx reeman loj Jesús, rëb reeman:

—¿Xhie gualrniabee rajpil zeel rüjnl ni guin ree? ¿Chu banee gualrniabee lojl güünl zian?

²⁹ Badxi' Jesúsán rëbaman:

—Ziangajc naj yu' ni ganabdiidxan lojdi, bal yadxi'dan dxel ganin chu banee gualrniabee günan ni guin ree.

³⁰ ¿Chu guxhaal Waj bidgaroobnijsaman bejn ree? ¿Dios ya o bénguidxliuj? Gol badxi'n.

³¹ Dxel guzuloj rëb loj lasa' reeman:

—Bal yaguie'ch ree, Dios guxhaal laaman, zanaman: “¿Chexquiza zeel ad bililadxtidi laaman?”

³² Ad zajc tëët yaguie'ch ree, bénguidxliuj guxhaal laaman.

Rëb reeman zian guial rdxeb reeman bejn ree, din graczi reeman rliladx guial gojc Waj tijb bén badëë xtiidx Dios loj ree bejn, bén wali gunee xtiidx Dios.

³³ Abi' badxi' reeman laan rëb reeman:

—Ad rayagbeetan.

Zeel rëb Jesús loj reeman:

—Ni'qui naj ad zanitan lojdi chu banee gualrniabee günan ni guin ree.

12

Xcwent ree mojs guijdx

(Mt. 21:33-46; Lc. 20:9-19)

¹ Dxel guzuloj caneenë Jesús laa reeman con ganax ree cwent, rëbaman:

—Tijb bejn guxübinman uv loj xguiniaaman, dxel beenman gurajl gadëd ro'n, beenchaaw tëëman tijb luar lod grii xnijs uv guin, abi' beenman tijb yu ya da't lod guiya'p guiniaa guin.

‘Zianz badëëman laan garol loj ree bén güün laan dxiin, briitaman zëman zijt.

² Chi bidxin dxex yala' reeman uv guin, guxhaal tijb xmojsaman din chigxiiman ni rayalaman.

³ Per ree bén rüjn dxiin loj guiniaa guin gunaaz reeman laaman, gudijn reeman laaman abi' badxi' reeman laaman zezi.

⁴ Dxel guxhaal bén naj xguidxliuj laan zatijb xmojsaman, per ziangajc, ba-caaguaiaj reeman laaman, gula' reeman guijcaman abi' gunee guijdx reeman laaman.

⁵ Guxhaalaman ben ren, per bagüjt reeman laaman. Zien ree ben guxhaalaman, yu' reeman gudijn reeman yu' tëë reeman bagüjt reeman.

⁶ Dxel bén naj xguidxliuj laan stijbzi xi'ngaanman ryaadx guixhiaalaman, xin rën da'taman. Dxel guxhaalaman laax guial gunaladxaman: “Zajp reeman da xi'nan respejt.”

7 Per ree b́en guin, rēb loj lasa' reeman: “Xin guin naj xin yaya'n'nē guidxliuj guin, yagūjt reex din gacan du xieen ree.”

8 Dxel gunaaz reeman laax, bagūjt reeman laax abi' babēē reeman laax loj guidxliuj guin.

9 Dxel gunabdiidx Jesús loj ree b́en caneenēman, rēbaman:

—Yan, ¿xhie naladxidi gūūn b́en naj xguidxliuj laan? Zi'taman din gugūjtaman b́en guin ree, dxel gudēēman guidxliuj guin loj ree ben ren.

10 ¿Nid wayoolidi loj xtiidx Dios ya?, lod rēb:

Guiaj ni gulēēgo'n ree b́en rūjn yu, laan goc ni mazri been sirv gojcnē yu guin.

11 Zian been dux Dad ree Dios, zeel radxaduloj ree.

12 Chi biguiejn ree b́en rniabee guin ni gunee Jesús, guyēn reeman niniaaz reeman laaman guial gogbee reeman laa reeman cuza'taman, per guial rdxeb reeman bejn ree, basa'n reeman laaman, ziat reeman.

Xcwent Impuest

(Mt. 22:15-22; Lc. 20:20-26)

13 Guxhaal reeman tio'p choon ree b́enfarisew nē tio'p choon ree xbejn Herodes lod za' Jesús, din yaguuil reeman mod guiniee Jesús diidx ni gudxiib reeman guijc din gac cwe'c reeman xguialquiaman.

14 Abi' rēb reeman:

—Mextr, dunujn rayagbee guial lūj rniece diidxli ad ridxga' tēētil chu naj bejn. Din par lūj tiblojzi naj bejn, abi' walil rulūl guial xhienaag rēn Dios guiban bejn. Zeel ranabdiidxan lojl: ¿Zagdxen ya radijxan impuest loj César o ad zagdxtan? ¿Zadijxanan ya o ad zadijxtanan?

15 Per gogbee gajc Jesús guial wed rūjnz reeman, zeel rēbaman:

—¿Chexc zeel rūjndi naj prueb? Gol tanē cintabl din guguiaman.

16 Dxel badēēd reeman cintabl guin lojman, abi' rēbaman:

—¿Chu loj ca lojn, chu tēē laj ca lojn?

Badxi' reeman laan rēb reeman:

—Loj César ca lojn nē lajman.

17 Dxel rēb Jesús loj reeman:

—Gol badēēcliza loj César ni naj xieen César, guiáad loj Dios gol badēēd ni naj xieen Dios.

Dád badxa loj reeman ni rēbaman.

Xcwent guial yaban ree bengüt

(Mt. 22:23-33; Lc. 20:27-40)

18 Tio'p choon ree b́ensaducew bignaj Jesús, laa reeman ad riladxt guial yaban ree bengüt. Zeel gunabdiidx reeman loj Jesús rēb reeman:

19 —Mextr, loj xley Moisejs rēb guial bal guiēt tijb xinguaaw abi' achut xi'nx guyu con lacheelix, bijch xin güt guin guxhliaanē b́engunaa bizējb guin din chu' xi'n reex zi'c gulūū xi'n xingüt guinan.

20 Guyu tijb famil lod goc reex gajdx bijch. Baxhliaa xin yaløj guin, per gūjtix abi' ad guyut xi'n reex con lacheelix.

21 Dxel bijch barojpax baxhliaanē b́engunaa guin, per gūjt gajquix, ad guyu gajct xi'n reex. Abi' ziangajc guzajc xin bayon guin,

22 abi' zianz baxhliaanēman guigajdx reex, zianz bara reex gūjt achut xi'n reex guyu con laaman. Ni bigra tēē nē b́engunaa guin gūjt.

23 Yan, chi yaban ree bengüt, loj guigajdx reex, ¿chu loj gra reex gac xb́engunaa laaman guial gra reex baxhliaanē laaman?

²⁴ Badxi' Jesúsán rëbaman:

—Ad laat naj xgab rüjndi guial ad nünbeetidi xtiidx Dios ad ragbee tēetidi xhienaag naj xguialrniabeeman.

²⁵ Din chi yaban ree bengüt, ad zuxhliaatri reeman, ad zudëë tēetri xi'n reeman guxhliaa, ma gac reeman zi'c ree anjl yu' xanyabaa.

²⁶ Abi' xcwent ni yaban ree bengüt, çnid wayoolidi loj xlibr Moisejs ya, lod rëb guial baguiaaman yag ni cayë'c? Yagaj biguien cha' Dios, rëbaman lojman: “Naj naj xDios Abraham, xDios Isaac në xDios Jacob.”

²⁷ Din Dios ad najtaman xDios ree bengüt, najman xDios ree bën naban. Zeel ad laat naj xgab rüjndi.

Mandamient mazri zobjloj

(Mt. 22:34-40)

²⁸ Chi bigueijn tijb mextr rajc ley badxi' Jesús xtiidx reeman zagdxë guial bacaagdiajgaman diidx ni cayü reeman, gubigaman lojman, abi' gunabdiidxaman rëbaman:

—çCon mandamiantan mazri zobjloj loj gra ree mandamient?

²⁹ Badxi'man laan rëbaman:

—Mandamient mazri zobjloj rëban: “Gol bacaagdiajg, bën Israel, dux Dad ree Dios, tijbzi laaman naj Dios.

³⁰ Guyën xDadil Dios guidiblagaa guidib guiç guidib ladxil.” Laan naj mandamient mazri zobjloj.

³¹ Mandamient rarojp, rëban: “Guyën ree ben ren zi'c rën lüj gajc.” Achet mandamient mazri zobjloj guial loj grop ree mandamient guie.

³² Dxel rëb mextr guin loj Jesús:

—Zagdxëqui guneel, Mextr. Waliqul tijbzi Dios yu', achutri ben ren yu'.

³³ Abi' guidib guiç guidib ladx bejn guiënman laaman guidiblagaa, guiën tēëman ben ren ree zi'c rën laagajcaman. Laan naj ni mazri zobjloj guial loj gra gon ni rudëëd bejn loj Dios.

³⁴ Chi biguien Jesús badxi' mextr guinan zagdxë, rëbaman:

—Ad zijtt za'l par chu'l loj xguialrniabee Dios.

Dxel achutri bayax xhie niniabdiidx lojman.

Chu loj xdiaa za Cristo

(Mt. 22:41-46; Lc. 20:41-44)

³⁵ Chi culüü Jesús bejn ree lën yadooro! Jerusalén, gunabdiidxaman loj reeman rëbaman:

—çChexc zeel rëb ree mextr rajc ley guial za Cristo loj xdiaa rey Davi?

³⁶ Awa Davi guin gajc guneë por xSprijt Dios, rëbaman:

Dios rëb loj da Dadan:

“Gurej da ladbeen,

xt gabecan xin rdxe'ch ree lüj guia'l.”

³⁷ Yan bal xi'n Davi naj Cristo, çchexquiza zeel rëb Davi guin lojman Dad?

Graczi ree bën riga' lën yadoo guin dád nix yu' luxdoo reeman rucaagdiajg reeman xtiidxaman.

Ni rüjn ree mextr rajc ley

(Mt. 23:1-36; Lc. 11:37-54; 20: 45-47)

³⁸ Chi culüü Jesús bejn ree, rëbaman loj reeman:

—Gol gojp cudad con ree mextr rajc ley, din ruladx reeman sa reeman gacw reeman lajd zagdxë, ruladx tēë reeman gugajpdioz ree bejn laa reeman con respejt niz lunejz.

³⁹ Abi' lën ree yadoo ruladx reeman cwe reeman lod rbej ree bën zobjloj, ziangajc rüjn reeman lod ritaw reeman.

⁴⁰ Raca' tée reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti narooob yayal reeman.

Gon badëéd tijb béngunaa bizëjb
(Lc. 21:1-4)

⁴¹ Tijb dxej zojb Jesús lén yadooro' Jerusalén niz lod za' alcancia ni ru gon, abi' ruguaaman rgu' ree bejn milia lén alcancia guin, në zien ree benrijcw rgu' zro' milia.

⁴² Dxel bidxin tijb béngunaa bizëjb prob, badxe'man tio'p zintabldoo ni lasajc ta'nzi.

⁴³ Abi' gurejdx Jesús bën naj ree xbejnman, rëbaman:

—Diidxli rnin lojdi guial bën bizëjb prob guin mazri lasajc gon badxe'man guial loj gon badxe' gra ree bën guin.

⁴⁴ Din graczi reeman rudxe' ni rüjn laa reeman sobr, per laaman majsi najman bënprob, badxe'man graczi ni rajpaman par guibannëman.

13

Rëb Jesús guial yaze'n yadooro' Jerusalén
(Mt. 24:1-2; Lc. 21:5-6)

¹ Chi barii Jesús lén yadooro' Jerusalén, rëb tijb ree xbejnman lojman:

—Mextr, jbaguiaa xi nix naj ree guiaj guin nix tée naj ree yu guin!

² Badxi' Jesús an rëbaman:

—Zi'c ruguiaal yu narooob guin ree, zadxin dxej, ni'czi tijb guiaj guin ad zaya'nt guijc stijban, gran yaze'n.

Ni gac chi gad guidxliuj nit
(Mt. 24:3-28; Lc. 21:7-24; 17:22-24)

³ Chi zojb Jesús ruguia' la Olivos, ni naj niz lod nudxi' loj yadooro' Jerusalén. Dxel gubig Béd lojman con Jacob, Waj con Andrejs, laaz reeman za'në laaman yagaj, abi' gunabdiidx reeman lojman, rëb reeman:

⁴ —Guna, ¿goc gac zian? ¿Xhie sen gac chi ma zidyob gac zian?

⁵ Badxi' Jesús laan rëbaman:

—Gol gojp cudad chitëé chu gusquiee lëjt.

⁶ Din zien ree bën gui't guiëb reeman guial por naj zëéd reeman, guiëb tée reeman: “Naj naj Cristo”, abi' gusquiee reeman zien bejn.

⁷ Per lëjt chi guiguiejndi cayajc wadijl o zëéb diidx gac wadijl, ad guidxebidi; din najczi gac zian, per ad por laatan ma bidxin dxej nit guidxliuj.

⁸ Din til nacion con stijb nacion, til tée bën rajp gualrniabee con stijb bën rajp gualrniabee, gui't tée ree xudoxh në gubijn niz ni niz guie. Zian gac chi ma suloj ree gualzi ni naj gac.

⁹ Gol gojp cudad, din zadxin dxej yayü ree bejn lëjt loj ree guxtis, abi' quin reeman lëjt lén ree yadoo. Chinë reeman lëjt loj ree gobernador në loj ree rey guial najdi da bejnan, zian gac din chile' güdi da diidxan loj reeman.

¹⁰ Per yalojxgaj rüjn naguiejn guire'ch xtiidzxa'c Dios loj gra ree nacion, dxelri nit guidxliuj.

¹¹ Chi chinë reeman lëjt loj ree guxtis, ad bal chu'di xgab, ad bal güün tëédi xgab xhie guiëbidi loj reeman. Gol gunee diidx gunee Dios lëjt loj hor guin. Din ad lëjttaan guinee, xSprijt Diosan guinee.

¹² Abi' guidxin dxej yayü bejn laagajc bijchaman din guiëtix, ziangajc ree bën naj dad yayü laagajc xi'n reeman, abi' ree bejn yayü xdad xniaa reeman par guiët reeman.

¹³ Gra bénguidxliuj guidxe'ch lëjt guial najdi da bejnan, per bën sudxi'ch loj ni rililadxaman naj xt dxej chigra guibanman, laaman yayal xanyabaa.

¹⁴ 'Chi guguaadi zojb tijb ni dxuudx lën yadooro' Jerusalén, zi'c bacaa Daniel, bën badëë xtiidx Dios loj ree bejn diidz gulal (bën gool ree gui'ch guie, gol bignia'n), guial bën zojb ree niz Judea chigxüün reeman niz dajn.

¹⁵ Guiáad bën yë'p guijc yu lidx dxejzii, ad yayu lëñü lidxaman tia' xhie xieenman.

¹⁶ Guiáad bën za' dajn, ad yajejc lidxaman chigxii xabaman.

¹⁷ ¡Probza ree béngunaa nüü xi'n o bën ca' ree xindobëz lën ree dxej zii!

¹⁸ Gol gurejdx gunab Dios chitëë yayal gac zian tiamp nayaag,

¹⁹ din dád gualziro' chu' dxejzii ree, zi'c ad wayajctczi diidz chi beenchaaw Dios guidxliuj, ad yu' tëëtri dxej gac zian.

²⁰ Bal id zasdop Dios dxej zii ree, ni'czi tijb bejn ad zalaat, per gusdopaman laa reen, por ree bën rënman, bën gulejman par laaman.

²¹ 'Bal chu na lojdi: "Gol baguiaa, laa Cristo za' guie", o "laaman za' ni", ad bal chililadxidi.

²² Din gui't zien ree bejn, na reeman guial laa reeman naj Cristo o na reeman laa reeman naj bën rudëë xtiidx Dios loj ree bejn, abi' güün reeman milagr ree në ree graloj ni yadxaloj ree bejn, din gusquiee reeman laa reeman, abi' bal zile'n xt zajc në ree bën gulej Dios gusquiee reeman.

²³ Zeel gol gojpcudad, ma bagojnxgajñ lëjt gra ni gac.

*Gui't Bén guxhaal Dios zatijb
(Mt. 24:29-35, 42-44; Lc. 21:25-36)*

²⁴ 'Per lën ree dxej ni ma gudëd gra ree gualzi guin, zacajy loj gubijdx abi' ad zusnitri bëëw,

²⁵ zayajb ree bajl yu' xanyabaa guiáad gra ree ni yu' xanyabaa guiniib reen.

²⁶ Dxel guguaa ree bejn Bén guxhaal Dios rdiinman bacha' zëëdaman loj zaj con xgualrniabee narooaman.

²⁷ Abi' guixhiaal ree xianjlaman guidiblagaa guidxliuj din guchajg reeman lasa' ree bën ma naj par Dios.

²⁸ 'Gol badxe'guijc ni ganin lëjt: Chi ma naquie'n xidx yag higo abi' ma caydixb ree xbalagan, lëjt ragbee guial ma zidyob tiamp nalaa.

²⁹ Ziangajc chi guguaadi ma cayajc ree ni guin, gol gogbee guial ma zidyob dxej gac zi'c ma rnin.

³⁰ Diidxli rnin lëjt guial gra ree ni guin gac chi gad ree bën naban lën ree dxej guie guiët.

³¹ Guidxliuj në xanyabaa zanijt reen, per da diidxan ad zadëdt gacan cumplid.

³² 'Per achut ragbee xhie dxejn xhie tëë horan gac ree ni guin, ni'qui ree anjl yu' xanyabaa, ni'qui Xi'n Dios ad ragbeet, tijbzi dux Dad ree Dios ragbee.

³³ 'Zeel gol gojpcudad, gol guzujsin tëë, gol gurejdx gunab Dios din ad ragbeetidi goc gac zian.

³⁴ Ni guin ree naj zi'c chi ririi tijb bejn rejman zijt. Abi' chi gadaman grii rudëëman dxiin loj tijbgaj ree xmojsaman, rniabee tëëman susin bën rajp ro' port.

³⁵ Yan ziangajc lëjt gol guzujsin, din ad ragbeetidi goc o xhie horan guialan bal chi ma ribej guiaal ya, o garol guiaal, o chi ma rbidxa' gujd, o rsiloo.

³⁶ Zeel gol guzusin din bal dxejczy guialan ad guidxaaglojn lëjt ad cayüjntidi zi'c rayal.

³⁷ Abi' ni canin lojdi, loj gradi caninan: Gol guzujsin.

14

Baya'n reeman diidx xhienaag guiniaaz Jesús
(Mt. 26:1-5; Lc. 22:1-2; Jn.11 :45-53)

¹ Zatio'p dxej riaadx gal lanij pascw, lanij raw ree bejn guidxtil ni ad yu't levadur. Abi' ree bixhioz rniabee ree bixhioz con ree mext rajc ley, raguuil reeman mod xhienaag gusquiee reeman Jesús, din guiniaaz reeman laaman gugüjt reeman laaman.

² Per rëb reeman:

—Ad zaguieent ree zian loj ree dxej lanij guin, chitëe gac naquie'!

Baroob tijb béngunaa perfum guijc Jesús
(Mt. 26:6-13; Jn.12 :1-8)

³ Dxel chi za' Jesús luguiedx Betania lidx Simón, bën gunee reeman leproso, abi' chi zojbaman xan mex cayawaman, bidxin tijb béngunaa ca'man lumejt yu'n perfum ni lasajc wayëjx guial gojchaawnën ganax nardo, zianz guxhalaman ro' lumejt guin persi baroobaman perfum guin guijc Jesús.

⁴ Abi' yu' ree bën za' yagaj bidxe'ch, rëb loj lasa' reeman:

—¿Chexc zeel guxhie'man perfum guin?

⁵ Awa zajc nido'n choon gayuu denario din nünjan yudar bënprob ree.

Abi' caneeguidx reeman béngunaa guin.

⁶ Per rëb Jesús loj reeman:

—Gol basa'nman. ¿Chexc zeel ruslendi laaman? Zagdxé naj ni beenman con naj.

⁷ Zianczi sunëdi bënprob ree, abi' zajc güüнди laa reeman yudar chi guiëndi, sa'n naj ad ziantczi sunëdi naj.

⁸ Béngunaa guie beenman ni golguzujman, ma beenchaawxgajman da cuerpan par chi guidxin dxej guiguie'chan.

⁹ Diidxliczi rnin lëjt, guial guidib loj guidxliuj bantëez guin guiniee reeman xtiidza'c Dios, zü ree bejn diidx ni been béngunaa guin con naj din gusaaladx reeman laaman.

Baguüil Judas mod xhienaag yayüman Jesús
(Mt. 26:14-16; Lc. 22:3-6)

¹⁰ Judas Iscariote, tijb ree xbejn Jesús, wejman bigneenëman bixhioz rniabee ree bixhioz din yayüman Jesús loj reeman.

¹¹ Chi biguiejn ree bixhioz guin zian, dád babaa reeman. Abi' rëb reeman gudëd reeman milia lojman. Dxel guzuloj raguuilaman mod xhienaag yayüman Jesús.

Gudawnë ree xbejn Jesús xche
(Mt. 26:17-29; Lc. 22:7-23; Jn.13 :21-30; 1Co.11 :23-26)

¹² Dxej ni guzuloj lanij raw ree bën Israel guidxtil ni ad yu't levadur, chi rugüjt reeman tijb xiildoo par lanij pascw, gunabdiidx ree xbejn Jesús lojman, rëb reeman:

—¿Ban guin rënl yuguieenan ni yadaaw ree guxhin pascw?

¹³ Dxel guxhaal Jesús tio'p ree xbejnman, rëbaman:

—Gol chej Jerusalén. Ni guguaadi tijb xinguaaaw ca' re yu' nijs. Gol chinalix.

14 Abi' lod yayux, gol güjdx loj bén naj lidxan: “Na mextr: ¿Ban lönü gawnë ree xbejnman yan guxhin pascw?”

15 Dxel gulüüman lëjt tijb lönü narooob ni rarojp cwaa, ma najcchaaw lönü guin. Yagaj gol been ni yadaaw ree xche.

16 Dxel brii ree xbejnman wej reeman luguiedx guin, abi' bidxaagloj gajc reeman zi'cgajczi rëbaman, zianz been reeman ni gaw reeman guxhin pascw.

17 Chi gure guiaal, bidxin Jesús con guidxiptio'p ree xbejnman.

18 Dxel chi zojb reeman xan mex cayaw reeman, rëb Jesús loj reeman:

—Diidxliczi rnin lojdi guial tijb lëjt, bén cayawnë naj, laaman yayü naj.

19 Dád guyunaya reeman, abi' guzuloj canabdiidx tijb gaj reeman, rëb reeman lojman:

—¿Najn ya?

Abi' rëb stijbaman:

—¿Wa najn ya?

20 Badxi'man laan rëbaman:

—Loj guidxiptio'pιδι, tijb lëjtan, bén cugajdx xguiadxtil loj gajc pliajt lod cugajdx da guiadxtilan, laaman.

21 Walican guial Bén guxhaal Dios naj sacraman zi'c ca loj xtiidx Dios. Per, iprob bén yayü laaman! Zagdxeli naj par laaman ad niutaman loj guidxliuj

22 La'tgaj cayaw reeman, cwa' Jesús guiadxtil abi' badëëman quixtëë loj Dios, dxel gula'man laan badëëman loj reeman, rëbaman:

—Gol gudaw guiadxtil guie, laan naj da cuerpan.

23 Dxel cwa'man tijb cojp yu' vin, chi gulox badëëman quixtëë loj Dios, badëëman cojp guin loj reeman, abi' gra reeman gu' vin yu' lojn.

24 Zianz rëbaman loj reeman:

—Vin guie naj da rejnan ni gaxhie'n chi guiëtan por zien ree bénguidxliuj, ðin guixal tijb nejz cüb xhienaag gap ree bejn perdon loj Dios.

25 Naj rni lëjt, ad yu'tri dxej guië'n vin rajcchaawnë uv, xt dxej ni guië'n vin cüb lod rniabee Dios.

*Rëb Jesús guial guiëb Bëd ad nünbeetaman laaman
(Mt. 26:30-35; Lc. 22:31-34; Jn. 13 :36-38)*

26 Chi gulox biil reeman tijb cant par Dios. Dxel zë reeman ruguia' Olivos.

27 Dxel rëb Jesús loj reeman:

—Graczi tío'nladx naj yan guxhin, zi'c ca loj xtiidx Dios lod rëb: “Gugüjtan bén rajp ree xiil, abi' guire'ch reeb.”

28 Per chi yabanan, yaløj naj ganeed lojdi gan Galilea.

29 Dxel rëb Bëd lojman:

—Majsi gra reeman tío'nladx lüj, per naj ad zaro'nladxtan lüj.

30 Badxi' Jesús san rëbaman:

—Najn rni lüj Bëd, yan guxhin gajc chi gad guid cwidxa' tío'p volt, choon volt mal rëbil guial ad nünbeetil naj.

31 Per naguejn rüjn Bëd rëbaman:

—Majsi guiëtnë'n lüj, per ad zëtan guial ad nünbeetan lüj.

Abi' graczi reeman rëb zian.

*Rbejdx rniab Jesús Dios lod la Getsemaní
(Mt. 26:36-46; Lc. 22:39-46)*

32 Chi bidxin reeman tijb luar la Getsemaní, dxel rëb Jesús loj ree xbejnman:

—Gol gurejsii guie, la'tgaj gabedx ganaaban Dios.

³³ Abi' binëman Bëd, Jacob con Waj, dxel guzuloj geyunayaman abi' ad nixtri yu' luxdooman.

³⁴ Zianz rëbaman loj reeman:

—Yu' naya da't luxdon, rulüü ma gugüjtan naj. Gol baya'n guie ad gaayëjsidi.

³⁵ Abi' guzaman zata'n, zianz gurerulojman, gunabaman loj Dios, bal zile' téd ni naj sagdiajman.

³⁶ Chi cabejdx canabaman Dios, rëbaman:

—Dad, graczi zajc güünl. Babëë naj loj ni gazaagdiajn. Per ad gac zi'c rënan, rayal gac zi'c rënl.

³⁷ Dxel ziaman lod baya'n ree xbejnman, chi badxinman cwë' reeman laa reeman naga'yëjs, zianz rëbaman loj Bëd:

—Simón, ¿naga'yëjsil ya? ¿Ni'qui tib hor ad gojct nibejnaal ya?

³⁸ Gol gurenaa, gol gurejdx gunab Dios chitéë güün xindxab lëjt gan. Din rëndi güündi zi'c rayal, per xcuerpidi ad rtiëjbtan.

³⁹ Dxel zëman zatijb persi gurejdx gunabaman Dios con diidx guin gajc ree.

⁴⁰ Chi badxinman lod riga' reeman, laagajc reeman naga'yëjs zatijb, guial yu' da't bacaal loj reeman, abi' ni'quid radxejlt xhie guiëb reeman lojman.

⁴¹ Ni bayon volt badxinman, rëbaman:

—¿Sta naga'yëjsidi ya? ¿Sta cayziiladxidi ya? Gol batie'ch xbacaalidi din naj, najn Bén guxhaal Dios ma bidxin hor yayü reeman naj loj ree béndol.

⁴² Gol bixche, yo' ree, laa bén yayü naj ma zëëd gajxlh.

Gunaaz reeman Jesús

(Mt. 26:47-56; Lc. 22:47-53; Jn.18 :2-11)

⁴³ Sta caneenë Jesús laa reeman chi bidxin Judas, bén goc tijb ree xbejnman. Bidxinnëman zien ree bejn ca' reeman espad con yag, guxhaal ree bixhioz rniabee ree bixhioz laa reeman con ree mextr rajc ley con ree guxtis Israel.

⁴⁴ Abi' Judas bén bayü laaman ma bagojnxgajman bén guin ree rëbaman:

—Bén gawan xid, laaman naj Bén raguüilidi, gol gunaazaman gol chinëman, gol gojpaman ad guslaadi laaman.

⁴⁵ Chi bidxin Judas dxel gubigaman loj Jesús, rëbaman:

—Mextr, Mextr.

Dxel gudawaman laaman xid.

⁴⁶ Zianz gunaaz ree Bén guin laaman din chinë reeman laaman.

⁴⁷ Per tijb Bén za' yagaj gulëë xiespadaman, gutü'man guidiajg xmojs bixhioz rniabee gra ree bixhioz.

⁴⁸ Dxel rëb Jesús loj ree Bén guin:

—¿Chexc zeel zëëdidi con espad con yag din chinëdi naj zi'c tijb xingubaan?

⁴⁹ Zianczi guzunë'n lëjt lën yadooro' Jerusalén rulün lëjt xtiidx Dios, abi' ad gunaaztidi naj. Per gra ree ni guie cayajc din gac cumplid ni ca loj xtiidx Dios.

⁵⁰ Dxel graczi ree xbejn Jesús baxüün, guro'nladx reeman laaman.

Tijb xin binal Jesús

⁵¹ Per guyu tijb xinguiag binalix Jesús, nadüübix tijbzi lajd. Abi' chi gunaaz ree Bén guin laax,

⁵² baslaagajquix lajd guin, zigxüünt ziladix.

Za' Jesús loj ree guxtis

(Mt. 26:57-68; Lc. 22:54-55, 63-71; Jn.18 :12-14, 19-24)

⁵³ Dxel binë reeman Jesús loj bixhioz rniabee gra ree bixhioz, abi' badxaag lasa' ree bixhioz rniabee ree bixhioz con ree guxtis Israel con ree mextr rajc ley.

⁵⁴ Abi' zijt zijt binal Béd Jesús xt rule' lidx bixhioz guin, dxel gurejman ruděj con ree bën rajp rulidx bixhioz guin,

⁵⁵ Abi' ree bixhioz rniabee ree bixhioz con gra ree guxtis, baguuil reeman mod xhienaag gutedia' reeman Jesús din chile' gugÿjt reeman laaman, per ad badxejlt xhienaag nutedia' reeman laaman,

⁵⁶ majsì zien reeman rudxiib diidx rusquiee guijcaman, per garent garen rëb tijb gaj reeman.

⁵⁷ Dxel guzuli tio'p choon reeman gunee reeman diidx rusquiee ree contr laaman, rëb reeman:

⁵⁸ —Dunuñ baguiejn rëbix: “Naj guse'n yadooro' Jerusalén ni been ree bejn, abi' choon dxejzi yayünanan sin xyudar ree bejn.”

⁵⁹ Per ni'qui zian ad gunee reeman tibloj, garent garen gunee reeman.

⁶⁰ Dxel bixhioz rniabee gra ree bixhioz guzuliman galay ree bën riga' yagaj, abi' gunabdiidxaman loj Jesús, rëbaman:

—¿Nid xhie diidx yadxi'l ya? ¿Wali ni canee reeman contr lÿj ya?

⁶¹ Per achetzi rëb Jesús, ad badxi'taman diidx, dxel gunabdiidx bixhioz rniabee guin lojman zatijb, rëbaman:

—¿Lÿj naj Cristo ya, Xi'n Dios Bén nagle'?

⁶² Badxi' Jesús san rëbaman:

—Walican, najcan. Abi' lëjt zuguaadi naj najn Bén guxhaal Dios zooban xladbee Dios Bén ca' gra gualrniabee guguaa tëedi naj gualan loj zäj xanyabaa.

⁶³ Chi biguiejn bixhioz guin zian, gudixya' xabaman, dxel rëbaman:

—Ad rÿjntri naguiejn yadiil ree testiw.

⁶⁴ Lëjt ma biguiejn canee guijdxix Dios. Yan, ¿xhie nadi?

Abi' graczi reeman rëb, guietaman.

⁶⁵ Yu' reeman rucojpxhiejn lojman, ruta'cw tëe reeman lojman, dxel riguin reeman laaman, rëb reeman:

—¡Guneeya' chu gudin lÿj!

Guiáad ree bën rajp yagaj wëez reeman lojman.

Rëb Béd ad nünbeetaman Jesús

(Mt. 26:69-75; Lc. 22:56-62; Jn. 18 :15-18, 25-29)

⁶⁶ Chi za' Béd rule' guin, dxel bidxin tijb béngunaa rÿjn dxiin lidx bixhioz rniabee guin.

⁶⁷ Chi baguaaaman zojb Béd ruděj guin cucha'man, baguaaaman lojman, dxel rëbaman:

—Në lÿj za'në Jesús bën Nazaret.

⁶⁸ Per gurexuu Béd rëbaman:

—Ad nünbeetan laaman, ad ragbeetan xhienin rnieel.

Chi bariiman ro' port guin, dxel guridxa' gujd.

⁶⁹ Dxel baguaa béngunaa guin Béd zatijb, zianz guzuloj rëbaman loj ree bën riga' yagaj:

—Në bën guin naj xbejn Jesús.

⁷⁰ Per gurexuu Béd zatijb. Gojc xchejdoo rëb ree bën riga' yagaj loj Béd:

—Walican në lÿj naj xbejnx din xin Galilea lÿj, abi' zi'cgajc rniee reeman rnieel.

⁷¹ Per guzudxi'ch Béd con ni rëbaman, zianz rëbaman:

—Gudëed Dios naj casti bal rusquieen, ad nünbeetan bën nadi.

⁷² Loj hor zii gajc barojp volt guridxa' guïd. Dxel basaaladx Bëd guial rëb Jesús lojman: “Chi gad guïd cwidxa' tio'p volt, mal gojc choon volt rëbil ad nünbeetil naj.” Chi basaaladxaman zian, dxel guzuloj cayoonman.

15

Binë reeman Jesús loj Pilato

(Mt. 27:1-2, 11-14; Lc. 23:1-5; Jn. 18 :28-38)

¹ Chi bareguiaa rsildoo, badxajg lasa' ree bixhioz rniabee ree bixhioz con ree guxtis Israel nè ree mextr rajc ley con gra ree guxtis, abi' baya'n reeman diidx xhienaag güün reeman. Dxel guxhii reeman Jesús binë reeman laaman loj Pilato.

² Abi' gunabdiidx Pilato loj Jesús rëbaman:

—¿Lüjn naj xrey ree bën Israel ya?

Badxi' Jesús laan rëbaman:

—Najcan.

³ Abi' ree bixhioz rniabee ree bixhioz zien ni rudxiib reeman guijcaman,

⁴ zeel gunabdiidx Pilato lojman zatijb, rëbaman:

—¿Nid xhie diidx yadxi'l ya? Baguiaa dád zien ni rudxiib reeman guijquil.

⁵ Per achetctzi badxi' Jesús, zeel dád badxa loj Pilato

Gunabee reeman guiët Jesús

(Mt. 27:15-31; Lc. 23:13-25; Jn. 18 :38-19:16)

⁶ Loj ree dxej lanij pascw, ruslaa Pilato tijb bën yu' ladxguuib, bën rëb ree bën guiedx guin guslaaman.

⁷ Lën ree dxej zii yu' bën la Barrabás ladxguuib con ree ben ren, bën bagüjt ree bejn loj tijb wadijl ni been reeman contr gobiarn.

⁸ Dxel chi bido'p ree bejn, rëb reeman loj Pilato din güünman zi'c naj costumbr,

⁹ Abi' rëb Pilato loj reeman:

—¿Rëndi ya guslaan xreydi?

¹⁰ Rëbaman zian guial ragbeeman bayü ree bixhioz guin laaman por guial rdëdlojzi reeman laaman.

¹¹ Per ree bixhioz rniabee guin badxe' reeman bejn ree diidx din guiëb reeman loj Pilato guslaaman Barrabás.

¹² Abi' gunabdiidx Pilato loj reeman rëbaman:

—¿Xhie rëndi günnë'n bën nadi naj xreydi?

¹³ Dxel gurixdiaj reeman rëb reeman:

—¡Bacaax loj crüjz!

¹⁴ Zianz rëb Pilato loj reeman:

—Per ¿xhieza ni mal beenx?

Guiáad laa reeman mazri rbixdiaj reeman, rëb reeman:

—¡Bacaax loj crüjz!

¹⁵ Abi' guial rën Pilato yaya'nman zagdxe loj reeman, zeel baslaaman Barrabás, gunabeeman a Jesús, dxel bayüman laaman loj reeman din tiaman loj crüjz.

¹⁶ Abi' binë ree xin suldad guin Jesús xlule' palas, yagaj badxaag lasa' gra reex.

¹⁷ Abi' bascajcw reex laaman tijb lajd murad, dxel been reex tijb coron guiëjch badxe' reex guijcaman.

¹⁸ Dxel guzuloj rbixdiaj reex rëb reex:

—iGuibanri xrey ree bén Israel!

19 Zianz rugaz reex var guijcaman, rulaa xhiejn reex lojman, abi' ruzuxib reex lojman.

20 Chi gulox baze' reex laaman, babëë reex lajd murad guin ladaman, bascajcw reex xabczaman, dxel zinë reex laaman din gucaa reex laaman loj crüjz.

Bacaa reëman Jesús loj crüjz

(Mt. 27:32-44; Lc. 23:26-43; Jn.19 :17-27)

21 Chi zinë reex Jesús, badxaagloj reëman tijb bén Cirene, laman Simón, xdad Lejandr con Rufo, ziaadaman bazaman dajm. Abi' been ree suldad guin nagueiejn biaaman xcrüjz Jesús.

22 Abi' binë reex Jesús luar la Gólgota, rën guiëban Calaver.

23 Yagaj badëëd reex vin no'ch ni la mirra lojman din guië'man laan, per ad gu'taman laan.

24 Chi ma bacaa reex laaman loj crüjz, dxel gudxijt reex suert guijc xabaman din guidoon xhie yayal tijbgaj reex

25 Raca gaa rsil bacaa reex laaman loj crüjz.

26 Guijc crüjz guin bacaa reex lejtr ni rëb chexc zeel bacaa reex laaman loj crüjz, rëban: “Xrey ree bén Israel.”

27 Chi bacaa reex laaman loj crüjz, në zatio'p ree xin gubaan bacaa reex loj crüjz, tijbix cwa xladbeëman, zatijbix cwa xladruvejsaman.

28 Zian gojc cumplid ni ca loj xtiidx Dios, lod rëb: “Nayabaman loj ree benmal.”

29 Abi' ree bén ridëd yagaj ruze' reëman laaman runij guijc reëman, rëb reëman:

—Conza ni rnieel guial rëbil, yase'nl yadooro' Jerusalén abi' loj choon dxejzi ma bayüjnlan zatijb,

30 yan baslaa lüj gajc baguiajt tëë loj crüjz zii.

31 Ziangajc ruze' ree bixhioz rniabee laaman con ree mextr rajc ley, rëb reëman:

—Gognëx ben ren ree, guiáad laax ad rajct ruslaa laagajquix.

32 Yaguiajtx loj crüjz guin, bal laax naj Cristo, xrey ree bén Israel, din yaguiaa ree, dxel yaliduladx ree.

Xt në ree xingubaan canëman loj crüjz guneeguijdx laaman.

Güjt Jesús

(Mt. 27:45-56; Lc. 23:44-49; Jn.19 :28-30)

33 Chi gol garol dxej, bicajy guidib guidxliuj xt raca choon wadxe.

34 Dxel raca choon guin gurixdiaj Jesús rejs, rëbaman:

—Eloi, Eloi, ¿lama sabactani? —rën guiëban: Diosan, Diosan, ¿chexc zeel gulëëladxil naj?

35 Yu' ree bén za' yagaj biguiejn, abi' rëb reëman:

—Gol bacaagdiaj niad. Laax cabejdx Elías bén badëë xtiidx Dios loj ree bejn.

36 Dxel ruxüün tijbaman, bicajdxaman tijb xiil loj vinagr, bacaaman laan loj tijb yag, abi' bacaaman laan ro' Jesús din guië'man laan, rëbaman:

—Gol basa'nx, yaguiaa ree don zi't Elías yalet laax loj crüjz guin ya.

37 Per Jesús dád rejs gurixdiajman, dxel güjtaman.

38 Loj hor zii goxya' lajd nal lën yadooro' Jerusalén, gojcan tio'p lala', diizd guijc guin xt guia' guin goxya'.

³⁹ Dxel suldad rniabee ree suldad guial za'x niz loj Jesús. Chi baguiaax xhienaag güjtaman, rëbix:

—Walican, Xi'n Dios bén guin.

⁴⁰ Nē tio'p choon ree béngunaa za' ziji ruguiaa ni cayajc. Loj ree béngunaa guin no'ch María Magdalena, nē Salomé nē Li xniaa Xiëb con Jacob bén naj benguiag loj Xiëb.

⁴¹ Béngunaa guin ree binal Jesús, been tēë reeman laaman yudar chi guzuman Galilea, nē zien ree béngunaa ren binal laaman diizd Galilea xt Jerusalén.

Biguie'ch Jesús

(Mt. 27:57-61; Lc. 23:50-56; Jn.19 :38-42)

⁴² Chi bidxin dxej rüjn ree bén Israel gra, chi guixiezi naj dxej raziiladx reeman, ma cabej guiaal,

⁴³ bidxin Xiëb bén za guiedx Arimatea. Gojcaman tijb xguxtis ree bén Israel, abi' gojp ree bejn laaman respejt, nē laaman rbëz xguiarlriabee Dios, abi' guyuman valor wejman loj Pilato, persi banabaman xcuerp Jesús.

⁴⁴ Dád badxa loj Pilato guial ma güjt Jesús, dxej gurejdxaman xin suldad rniabee ree suldad persi gunabdiidxaman bal walin.

⁴⁵ Abi' rëb suldad guin guial walican ma güjtaman, dxej cwëjb Pilato baca' Xiëb cuerp guin.

⁴⁶ Guzii Xiëb tijb lajd, abi' chi baletaman xcuerp Jesús loj crüjz guin dxej batüübaman laaman lajd guin, biquie'chaman laaman lën tijb baa ni bidëen lën tijb guiaj, dxej basiaawaman ro' baa guin con tijb guiajro'.

⁴⁷ María Magdalena con Li xniaa Xiëb, baguiaa reeman lod baquie'ch reeman Jesús.

16

Raban Jesús

(Mt. 28:1-10; Lc. 24:1-12; Jn.20 :1-10)

¹ Chi gudëd dxej raziiladx ree bejn, María Magdalena, nē Salomé, nē Li xniaa Jacob, bisii reeman perfum din chitëeb reeman laan xcuerp Jesús.

² Bareguiaal chidumingw, rsildoo brii reeman wej reeman ro' xbaa Jesús, naabzi rliejn gubijdx.

³ Chi zë reeman lunejz, rëb loj lasa' reeman:

—¿Chuzha chisüd guiaj nayaaw ro' baa guin?

⁴ Per chi bidxin reeman baguiaa reeman ma biniib guiaj za' ro' baa guin ad za'tri loj xluaran.

⁵ Chi guyu reeman lën baa guin, baguiaa reeman tijb xinguiag zojbix ladbee, najcwix lajd naquich yool, abi' bidxeb reeman.

⁶ Per rëbix loj reeman:

—Ad rdxebidi, raguuilidi Jesús bén Nazaret bén cwa loj crüjz. Per ma babanman, achutri laaman guie, gol baguiaa lod gudixh reeman laaman.

⁷ Yan, gol chej gol chiguiedx loj Bëd nē loj los demazri ree xbejnman guial yaloj Jesús ned cheman Galilea dxej chedi, ni guguiaadi laaman zi'c ma naman lojdi.

⁸ Dxel cari da't barii ree béngunaa guin lën baa guin, dád canij reeman cadxeb reeman, abi' achut loj rëb reeman guial rdxeb reeman.

Baliüloj Jesús loj María Magdalena

(Jn. 20:11-18)

⁹ Chi ma baban Jesús, chidumingw rsildoo, yaloj loj María Magdalena balüülojman, bën babëëman gajdx xindxab luxdoo.

¹⁰ María Magdalena guin bicojn ree xbejn Jesús, bën yu'naya ree roon tëë reeman por laaman.

¹¹ Chi biguejn reeman guial naban Jesús baguiaa tëë María Magdalena laaman, ad bililadxt reeman.

Baliüloj Jesús loj tio'p ree xbejnman

(Lc. 24:13-35)

¹² Chi gudëd gojc zian, garen balüüloj Jesús loj tio'p ree xbejnman lunejz chi zë reeman niz dajn.

¹³ Dxel bën guin ree bicojn lasa' reeman, per ni'qui laa reeman ad bililadxt reeman.

Rucaabee Jesús bën naj ree apóstoles

(Mt. 28:16-20; Lc. 24:36-49; Jn.20 :19-23)

¹⁴ Ni bigratë balüüloj Jesús loj za chiptib ree xbejnman, chi zojb reeman xan mex cayaw reeman, gudilëman laa reeman guial nad reeman, ad rililadxt reeman bën baguiaa ree laaman guial ma babanman.

¹⁵ Dxel rëbaman loj reeman:

—Gol chej guidib guidxliuj, gol chigtie'ch xtiidxza'c Dios loj gra ree bejn.

¹⁶ Bën chililadx tiobnijs tëë zajcaman perdon loj Dios. Per bën ad zaliladxt xtiidxza'c Dios, laaman yayal casti.

¹⁷ Sen guie ree gap ree bën chililadx naj: Por da guialrniabeen zabëë reeman xindxab luxdoo ree bejn, zanee tëë reeman diidx ren ree,

¹⁸ zanaaz reeman bëël ree, abi' majsi guië' reeman ni yu' venen guijc achet gac reeman, chi gudxiib yaa reeman guijc ree bënragxuu, zayajc reeman.

Bayë'p Jesús xanyabaa

(Lc. 24:50-53)

¹⁹ Chi gulox guneenë Dad Jesús laa reeman, dxel bayë'paman xanyabaa, gurejman xladbee Dios.

²⁰ Guiáad laa reeman brii reeman zigtie'ch reeman xtiidxza'c Dios guidibczi. Abi' Dad Jesús gognë laa reeman, been reeman milagr ree, persi gogbee ree bejn guial xtiidxqui Dios naj ni rniee reeman. Amén.

Xtiidxza'c Jesucrist ni bacaa San Lujc

Rxhiaal Lujc gui'ch loj Teófilo

- 1 Zien ree b́en ma been naguiejn gucaa ni goc con dunuj ree,
 2 zi'cgajczi balüü ree bejn dunuj ree, b́en baguiaa ree diizd guia'xchej ni been Jesús nē ni guzacaman, gutie'ch tēē reeman xtiidxaman.
 3 Naj baguikxnejzchaaw diizd guia'xchejn, dad Teófilo, zeel naladxan zagdxen gucanan xnejz par lüj,
 4 dín chignia'l zagdxē diidxli balüü reeman lüj.

Rugojn tijb anjl gal Waj

- 5 Tiamp gunabee rey Herodes guidib niz Judea, guyu tijb bixhioz brii laj Zacarías, bachajgaman tib cwaa ree bixhioz brii laj xbejn Abías. Xbéngunaa Zacarías brii laj Elisabet, zaman loj xdiaa bixhioz brii laj Aarón.
 6 Grop reeman gubajn xnejz loj Dios bazoob tēē reeman diidx graczi ni rniabee Dios, abi' achut rile' guiēb guial rajp reeman dol.
 7 Per achut xi'n reeman guyu guial ad gojct niu xi'n Elisabet, grop reeman ma naj bengol.
 8 Tijb dxej ni bayal ree bixhioz no'ch Zacarías loj, been reeman sirv loj Dios,
 9 zi'c naj xcostumbr ree bixhioz guin, gudxijt reeman suert dín guidoon chu yayal gudxe' goxyaal lēn yadooro' Jerusalén, abi' bayal Zacarías cu'man goxyaal guin.
 10 La'tgaj cagu'man goxyaal guin, gra ree bejn riga' lule' cabejdx canab reeman Dios.
 11 Dxel balüüloj tijb xianjl Dios loj Zacarías, za'liman xladbee altar lod cayu goxyaal guin.
 12 Chi baguiaa Zacarías anjl guin, ad badxejlt xhie nüjnman, dád bidxebaman.
 13 Per rēb anjl guin:
 —Zacarías, ad rdxebil ma bacaagdiajg Dios ni gunabil. Chu' xi'n xbéngunaaal Elisabet, gaquix xinguaaaw abi' yagu'l lajx Waj.
 14 Yabaa da'til, nē zien ree bejn yabaa chi galix,
 15 guial gaquix xin lasajc loj Dios. Ad zē'tix vin ni'qui ni gusüdx laax. Abi' diizd chi gadix gal mal za'nē xSprijt Dios laax.
 16 Por laax zien ree b́en Israel yayejc loj xDad reeman Dios.
 17 Laax ned lojman, chu' xSprijt Dios luxdoox gap tēēx guialrniabee zi'c Elías, b́en badēē xtiidx Dios loj ree bejn, yabe'cdxex b́en naj ree dad con xi'n reeman, gülüü tēēx b́en ad ruzoobt ree diidx dín guzuxnejzix bejn ree guidxga' reeman laaman chi gui'taman.
 18 Dxel rēb Zacarías loj anjl guin:
 —¿Xhienaag gagbeen guial gac cumplid ni nal? Dín naj con da béngunaan ma nayajcan bengol.
 19 Badxi' anjl guinan rēbaman:
 —Naj naj Gabriel, rünan sirv loj Dios, laaman guxhaal naj zidnē'n diidxza'c guie lojl.
 20 Per yan guial ad bililadxtil da diidxan, yaya'nl gop ad zajct guinieel xt guidxin dxej gal xindo guin.

²¹ Guíaad ree ben riga' lule' guin cabëz reeman Zacarías yu' nawëëg reeman guial cayaglaaman lën yadoo guin.

²² Chi bariiman ad rajctri rnieeman, gaz sen rüjnman guial ma baya'nman gop. Dxel gogbee reeman guial yu' xhie baguiaaman lën yadoo guin.

²³ Zianz baza' ree dxej ni been Zacarías sirv lën yadoo guin, dxel zia lidxaman.

²⁴ Chi gudëd ree dxej guin, guyu xi'n xbéngunaaman Elisabet. Gaay bëëw tib guyuzaman lënü, rëbaman:

²⁵ “Ze naj ni beennë Dios naj lën ree dxej guie chitëë guze'ri ree bejn naj.”

Rugojn tijb anjl Li gal Jesús

²⁶ Ni goc xho'p bëëw, guxhaal Dios anjl la Gabriel luguiedx Nazaret ni riga' niz Galílea,

²⁷ din chignajman tijb biinxdüb lam Li. Ma naj tia' tijb xin la Xiëb laam, xin zëëd loj xdiaa rey Davi.

²⁸ Guyu anjl guin lod yu' Li abi' rëbaman:

—¡Xchan Li, Dios ma gulej lüj! Dios za'në lüj, ma beenle' tëëman lüj loj gra ree béngunaa.

²⁹ Chi baguiaa Li anjl guin dád badxa lojm guial rëbaman zian, abi' gunabdiidxim xhie rën guiëb ree diidx guin.

³⁰ Dxel rëb anjl guin:

—Li, ad rdxebil din lüj gule Dios beenle' tëëman lüj.

³¹ Chu' xi'nl, abi' chi galaman yagu'l lajman JESÚS.

³² Laaman gac bën zojbloj, guinee ree bejn laaman Xi'n Dios bën yu' xanyabaa. Güün dux Dad ree Dios laaman rey zi'c goc xdiaagulalaman Davi,

³³ din nabeeman bën Israel ree xt goctëëz, abi' xguialrniabeeman ad yu't dxej loxan.

³⁴ Dxel rëb Li loj anjl guin:

—¿Xhienaag chu' da xi'n nan awa achut bénguiaaw nabannë'n?

³⁵ Badxi' anjl guinan rëbaman:

—Por xSprijt Dios chu' xi'nl, abi' xguialrniabee Dios bën yu' xanyabaa gusiaawan guijquil con xbalan. Zeel xi'nl bën gal, gacaman naya nali abi' guinee ree bejn laaman Xi'n Dios.

³⁶ Ziangajc lasa'l Elisabet ma yu' xi'nman, majsi ma najman bengol, bën rëb ree bejn ad zajct chu' xi'nl, per yan ma gojc xho'p bëëw yu' xi'nman.

³⁷ Din Dios graczi zajc güünman.

³⁸ Dxel rëb Li loj anjl guin:

—Dios naj bën rniabee naj, gacza zi'c rënman.

Ziat anjl guin.

Rignaj Li Elisabet

³⁹ Lën ree dxej guin wej Li cari da't tijb guiedx ni riga' lad ree guia' niz Judea,

⁴⁰ dxel guyum lënü lidx Zacarías, bagajpdiozim Elisabet.

⁴¹ Chi biguiejn Elisabet cha'm cugajpdiozim laaman, laa baniib gajc xindobëz yu' lënman, dxel guyu xSprijt Dios luxdooman guidiblagaa.

⁴² Abi' gunee Elisabet rejs, rëbaman:

—¡Dios ma beenle' lüj loj gra ree béngunaa, beenle' tëëman bejndobëz yu' lën!

⁴³ ¿Chuzaj najn zeel zidganaj xniaa da Diosan naj, bën rniabee?

44 Din biguiejnzan cha'l bagajpdiozil naj, laa baniib gajc da bindoon lēnan guial babaam.

45 Xiquilbaal guial bililadxil, din gac zi'c bagojn Dios lūj.

46 Dxel rēb Li:

Ruzatan Dios zagdxe,

47 rabaanē' tēen laaman, guial ragnēman naj.

48 Guial baguiaaman naj, majsi biin rūjnzi sirv lojman naj.

Abi' diidz yan xt goctēez guza't ree bejn naj, guiēb reeman xiquilbaam.

49 Din Dios, bēn rniabee, dād zro' naj ni ma beennēman naj.

Naya naliman.

50 Ad rbēzt rayaman graczi ree bēn ruzoob xtiidxaman.

51 Zro' naj ni ma beenman con xguialrniabeeman.

Base'nman xixgab ree bēn rūjn benro',

52 biquiedaman guialrniabee loj ree bēn rniabee, guíad loj ree bēn ad zojblojt badēēman guialrniabee loj reeman.

53 Badēēman guialnaza'c loj ree bēn biaadx guialraw, guíad ree benrijcw basa'nman laa reeman zezi.

54 Gognēman bēn Israel ree, xbejnman, abi' ad bayanladxtaman nayaman laa reeman,

55 zi'c rēbaman loj dux bēngulal ree,

Abraham nē loj ree xdiaaman.

56 Abi' baya'nnē Li Elisabet cost choon bēēw, dxel baguij lidxim.

Rajl Waj

57 Chi bidxin dxej gojl xi'n Elisabet najx xinguaaw.

58 Abi' gogbee ree lasa'man nē ree bēn zojb gajxh guial baya Dios laaman, dād babaa reeman bignaj reeman laaman.

59 Chi ma gojc xindobēz guin toxman, dxel binē reeman laax guyux sen ni ru ree bēn Israel. Abi' guyēn reeman nagu' reeman lajdoox Zacarías zi'c la xdadix,

60 per gunee xniaax, rēbaman:

—Ad zayutan zian. Rayal gaquim Waj.

61 Dxel rēb reeman lojman:

—¿Chexquiza zeel gaquix Waj? Achut ree lasa'l la zian.

62 Abi' con sen gunabdiidx reeman loj xdad xindobēz guin chu rēnman grii lajx.

63 Zianz gunabaman tibia' tabl abi' bacaaman lojn: “Waj grii lajx.” Dád badxaloj gra ree bēn guin.

64 Loj hor ziigajc gojc banee Zacarías, abi' guzuloj cuza'taman Dios zagdxe.

65 Gra ree bēn zojbnēman gajxh dád badxa loj reeman, xt gra ree guiedx riga' lađ ree guía' niz Judea gogbee reeman graczi ni goc.

66 Guíad graczi ree bēn gogbee zian, rniabdiidx loj lasa' reeman, rēb reeman:

—¿Chu gac xindo guin ya'n chi ni'six?

Rēb reeman zian guial laa rguien gajc ma beenle' Dios laax.

Ni gunee Zacarías

67 Zacarías, bēn naj xdad xindo guin guyu xSprijt Dios luxdooman guidi-blagaa, zianz guzuloj caneeman, rēbaman:

68 Benza'c bendxoon naj Dios, dux Dad ree nayajc ree bēn Israel,

guial bi'taman bidganajman dunuj ree nayajc ree xbejnman, bidgalëë tēeman dunuj ree loj ni cayza'c ree.

⁶⁹ Guxhaalaman tijb bēn rajp guialrniabee din yabēeman dunuj ree loj ni cayza'c ree,

zēedaman loj xdiaa rey Davi, bēn naj xbejn Dios.

⁷⁰ Zi'c been Dios promejs diizd gocli, zian gunee ree bēn badēē xtiidxaman loj ree bejn, bēn guban ree zi'c rēnman:

⁷¹ guial yabēeman dunuj ree loj ree bēn ralen dunuj ree, nē loj gra ree bēn yu'xyajn dunuj ree,

⁷² yaya tēeman dux bēngulal ree,

abi' ad zayanladxtaman promejs ni beenman.

⁷³ Ni ne naj promejs ni beenman loj dux bēngulal ree Abraham:

⁷⁴ guial yabēeman dunuj ree loj ree bēn ralen dunuj ree,

din chile' yaguieen ree sirv lojman sin guialrdxeb,

⁷⁵ yabajn ree yaguieen tēē ree zi'c rēnman, guidib tiamp ni yabajn ree.

⁷⁶ Guiáad lūj xi'n, guiniee ree bejn lūj bēn rudēē xtiidx Dios loj ree bejn, Dios yu' xanyabaa.

Din nedil chiguieenchaawil xnejz bēn naj Dad,

⁷⁷ gulūū tēēl xbejnman din gagbee reeman xhienaag gac xtol reeman perdon,

laa tēē reeman loj casti.

⁷⁸ Guial raya da't dux Dad ree dunuj ree,

zeel guxhaal xi'nman, bēn naj zi'c xbacha' gubijdx din gusniman du loj ree,

⁷⁹ guixhial tēeman xquiargueijn ree bēn zē loj nejzmal, bēn ad nabant ree xnejz zi'c rēn Dios,

gulūū tēeman dunuj ree yadxoo ree loj xnejzaman din yabajn ree zagdx sin wadijl.

⁸⁰ Guiáad xindo guin guni'six guyu tēē xquiarguejnx mazri por Dios. Guzujx loj yujbidx, xt bidxin dxej guneex xtiidx Dios loj ree bēn Israel.

2

Rajl Jesús

(Mt. 1:18-25)

¹ Lēn ree dxejzii gunabee rey César Augusto guiyab gra ree bejn guidib lod rniabeeman.

² Laan naj ni yalaj biyab ree bejn chi goc Cirenio gobernador Siria.

³ Graczi ree bejn naj yaguiaj ladx ladx din guiyab reeman.

⁴ Zianan zeel brii Xiēb luguiedx Nazaret ni riga' niz Galilea, wejman Belén, ni riga' niz Judea, lod gol rey Davi din loj xdiaa rey Davi zēēd Xiēb.

⁵ Wejman binēman Li, lacheelaman din guiyab reeman. Ma yu' xi'n Li.

⁶ Abi' la'tgaj za' reeman Belén, bidxin dxej gojl bejndobēz guin.

⁷ Yagaj gol xi'n yalaj Li, dxel batüübaman bejndobēz guin lajd, gudijxhaman laaman lod ru ni raw ree be, guial ad bidxejlt lēnū naya'n reeman.

Bidxin ree xianjl Dios lod za' ree bēn rajp xiil

⁸ Gajxh Belén guin za' ree bēn rajp xiil, abi' dajn guin gajc rdēd reeman guiaal rajp reeman laa reeb.

⁹ Dxejczy balüüloj tijb xianjl Dios loj reeman, naynidxuj basni xbiani Dios lod riga' reeman abi' dād bidxeb reeman.

¹⁰ Per rēb anjl guin loj reeman:

—Ad rdxebidi din zidnē'n diidzxa'c lojdi, por laan yabaa gra ree bejn.

11 Yan, ladx rey Davi ma gojl Bén yabëë lëjt loj ni cazajquidi, laaman naj Cristo, laaman naj Dad.

12 Abi' din yayünbeedi laaman; nadüübaman lajd, naga'man lod ru ni raw ree be.

13 Dxejczy balüüloj zien da't ree anjl cwë' anjl yaloj guin, ruza't reeman Dios zagdxe, rëb reeman:

14 jBenza'c bendxoon naj Dios Bén yu' xanyabaa, abi' loj guidxliuj yabe'cdxeman luxdoo Bén rüjn ree zi'c rënman!

15 Chi ma zia ree anjl guin xanyabaa, dxel rëb loj lasa' ree Bén rajp ree xiil guin:

—Yo' ree Belén yuquiaa ree ni goc ni, zi'c ma bagojn dux Dad ree Dios dunuj ree.

16 Dxel cari da't zë reeman, abi' bidxaagloj reeman Li në Xiëb, nëtëë bejndobëz guin naga'man lod ru ni raw ree be.

17 Chi baguiaa reeman laaman, be reeman diidx ni rëb anjl guin loj reeman xcwent bejndobëz guin,

18 abi' graczi ree Bén biguiejn dád badxa loj reeman ni rëb ree Bén rajp ree xiil guin.

19 Per Li, rgu'chaaw luxdoo man gra ni rucaagdiajgaman, rüjn tëëman laan xgab.

20 Dxel zia ree Bén rajp ree xiil guin, rabaa reeman rudëë tëë reeman quixtëë loj Dios por gra ni baguiaa reeman biguiejn tëë reeman, guial gojc zi'c rëb anjl guin loj reeman.

Binë reeman Jesús lën yadooro' Jerusalén

21 Chi ma gojc toxman gojl bejndobëz guin, badxe' reeman laaman sen ni ru ree Bén Israel, bagu' tëë reeman lajman Jesús zi'c rëb anjl guin loj Li chi gad Jesús gacxhie j lënman.

22 Chi bayaaloj ree dxej ni been Li zi'c rüjn ree béngunaa rajl xi'n, dxel binë reeman bejndobëz guin loj Dios lën yadooro' Jerusalén.

23 Been reeman zian din loj ley guin ca: “Gra ree xindoniguiaaw rajl yaloj ma naj reex par Dios.”

24 Abi' binë reeman gon par Dios zi'c rniabee ley: rayal chinë reeman tio'p gudoo o tio'p palomdoo.

25 Tiamp zii zojb Bén la Simeón Jerusalén. Najman benza'c rën tëëman Dios, rbëzaman Bén gagnë Bén Israel ree za'në tëë xSprijt Dios laaman.

26 Abi' por Sprijt guin gogbeeman guial ad zëjtaman xt guguiaaman Cristo, Bén guixhiaalaman.

27 Dxel por xSprijt Dios wejman lën yadooro' Jerusalén. La'tgaj yu'man lën yadoo guin, Xiëb con Li bidxinnë reeman Jesús din güün reeman zi'c rniabee ley,

28 zianz gudiidx Simeón bejndobëz guin baza'taman Dios zagdxe, rëbaman:

29 Dad, yanri ma babedxe luxdon.

Ma zajc guslaal naj guiëtan najn xmojsil, ma gojc zi'c nal.

30 Din con quijb guiaalón ma baguian Bén gagnë dunujn.

31 Guial ma bazujl laaman loj gra ree bénguidxliuj.

32 Laaman naj biani par ree Bén ad najt Bén Israel, naj tëëman bacha' par ree xbén Israelil.

33 Guiaad Xiëb con xniaa Jesús dád badxa loj reeman ni biguiejn reeman rëb Simeón xcwent bejndobëz guin.

³⁴ Dxel beenle'man laa reeman, zianz rëbaman loj Li xniaa Jesús:

—Li, Dios bacaabee bejndobëz guie din por laaman zien da't ree bën Israel laa loj dol, per zien reeman yaya'n loj xtol. Zidgalüüman bejn ree conin naj ni ruladx Dios, per zien reeman ad zënt laaman.

³⁵ Abi' zian gagbeeman xhienaag naj xixgab tijbgaj bejn, guiáad lüj zi'c tijb espad chëëz luxdool chi gac ree ni guin.

³⁶ Yagaj gajc za' tijb béngunaa yo'xh laman Ana, rudëëman xtiidx Dios loj ree bejn, xdadaman brii laj Fanuel, xdiaagulalaman gojc Aser. Benguiagan chi cwa' xinguaaw laaman, abi' gajdx ijsi gubajnnë lacheelaman.

³⁷ Ma gojc tajpgajlbitap ijz baya'nman bizëjb. Zianczi yu'man lën yadooro', rba'nman rbejdx rniab tëëman Dios.

³⁸ Loj hor zigajc bibigëman lod za'në Xiëb Li con Jesús, guzuloj cudëëdaman quixtëë loj Dios cuza't tëëman bejndobëz guin loj gra ree bën cabëz guixhiaal Dios bën gagnë bën Jerusalén ree.

Zia reeman Nazaret

³⁹ Chi ma been reeman graczi ni rniabee xley Dios, dxel zia ladx reeman Nazaret ni riga' niz Galilea.

⁴⁰ Cani's bejndobëz guin, cayuman gojl, cayajcaman nasin, cayüjnle' tëë Dios laaman.

Yu' Jesús lën yadooro' Jerusalén

⁴¹ Gazob ijz rej ree xdad Jesús Jerusalén lanij pascw.

⁴² Chi baza' Jesús chiptio'p ijz, binë ree xdadaman laaman lanij zii zi'c naj xcostumbr reeman.

⁴³ Chi ma gudëd lanij guin, baza ree xdad Jesús ma zia ladx reeman. Ad gogbeet reeman baya'n Jesús Jerusalén.

⁴⁴ Gunaladx reeman ma no'chaman loj ree bën zia. Zian guza reeman tibdxej. Per chi baguiil reeman laaman loj lasa' reeman në loj ree bën nünbee reeman,

⁴⁵ achut laaman naguiee. Dxel bayejc reeman zia reeman Jerusalén zatijb zigdiil reeman laaman.

⁴⁶ Xt ni gocri choon dxej badxejl reeman laaman lën yadooro' Jerusalén, zojbaman galay ree mextr rajc ley, cucaagdiajgaman canabdiidx tëëman laa reeman.

⁴⁷ Gra ree bën caguiejn ni rnieeman caydxaløj reeman guial rajcaman në ree diidx radxi'man.

⁴⁸ Chi baguiaa ree xdadaman laaman, dád badxaløj reeman, dxel rëb xniaaman:

—Xi'n, ¿chexc zeel basajquil dunujn zian? Xdadil con naj dád nadxu'n xgab caydiilan lüj.

⁴⁹ Badxi' Jesús laan rëbaman:

—¿Chexc zeel raguiilidi naj? ¿Nid ragbeedi ya rayal günan xchiin da Dadan?

⁵⁰ Per ad bignia't reeman xhie rën guiëb ni rëbaman.

⁵¹ Dxel bayejcnëman laa reeman zia reeman Nazaret, graczi xtiidx ree xdadaman ruzoobaman, guiáad xniaaman graczan rgu'chaaw luxdooan.

⁵² Zi'cri cani's Jesús cayu tëë mazri xquiarguiejnman. Rabaanë Dios laaman rabaanë tëë ree bejn laaman.

3

*Rzuløj Waj ruliüüman xtiidx Dios
(Mt. 3:1-12; Mr. 1:1-8; Jn. 1:19-28)*

¹ Chi goc chiin ijz rniabee rey Tiberio, abi' Poncio Pilato najman gubernador Judea, Herodes najman gubernador Galilea, bijchaman Felip najman gubernador Iturea nê Traconite, guiáad Lisantias najman gubernador Abilinia.

² Anás nê Caifás naj reeman bixhioz rniabee gra ree bixhioz. Lën ree dxej zii gunee Dios Waj, xi'n Zacarías lod naj yujbidx.

³ Dxel gudêd Waj graczi ree guiedx riga' ro' guiiw Jordán, rëbaman loj ree bejn din yayüjn reeman xgab por xtol reeman tiobnijs tée reeman, din güün Dios xtol reeman perdon.

⁴ Zian gojc cumplid ni bacaa Isaías bën badëe xtiidx Dios loj ree bejn, lod rëbaman:

Rguien cha' tijb bën rbidxa' loj yujbidx, rëbaman:

“Gol beenchaaw xnejz dux Dad ree Dios,
gol guxhal tijb nejz nali.

⁵ Gra ree la'ch yadxa reen guiáad ree guia' con ree lom yayajc reen tibloj,

nê ree nejz volt yayaali
yadxa tée ree lunejz ni ad najt tibloj.

⁶ Gra ree bénguidxliuj guguaa bën guixhiaal Dios gagnë dunuj ree.”

⁷ Chi brii zien ree bejn din guroobnijs Waj laa reeman, rëbaman loj reeman: —xi'n xindxab lëjt! ¿Chu bagojn lëjt guial laadi loj castiro' ni zëed?

⁸ Gol gubajn zagdxe din guiguien guial waliqui ma bayüjndi xgab por xtolidi, ad guiëb tée loj lasa'di: “Dunujn zio'p loj xdiaa Abraham”, din naj rni lëjt xt guiaj guie ree zajc yayüjn Dios xdiaa Abraham.

⁹ Abi' ree bën ad zinalt xnejz Dios zi'c rayal, ma zidyob dxej ni güünnë Dios laa reeman zi'c rüjnnë bejn tijb yag chi ad rtiatan, rütüügaman laan din che'can.

¹⁰ Dxel gunabdiidx reeman, rëb reeman:

—¿Xhie rayal yaguieenan?

¹¹ Badxi' Wajn rëbaman:

—Bën yu' tio'p xab, rayal gudëëman tijban loj bën achet rajp. Guiáad bën yu' ni raw, rayal gudëëman ta'nan loj bën ryaadxan.

¹² Nê tio'p choon ree bën ruquijx impuest bidxin din tiobnijs reeman. Abi' gunabdiidx reeman loj Waj, rëb reeman:

—Mextr, laadx dunujn, ¿xhie rayal yaguieenan?

¹³ Badxi' Wajn, rëbaman:

—Ad guquijxidi mazri guial loj ni rayal guquijxidi.

¹⁴ Yu' tée ree suldad gunabdiidx lojman rëb reex:

—Laadxza dunujn, ¿xhie rayal yaguieenan?

Badxi'man laan rëbaman:

—Ad cwëëxuudi xhie xieen bejn, guial guchejbidi laa reeman o gudxiibidi guijc reeman ni ad beent reeman, gol guziibnejz tée ni rajxidi.

¹⁵ Guiáad ree bejn gagbeenezdoo reeman bal Wajn naj Cristo,

¹⁶ per rëbaman loj gra reeman:

—Naj curobnijs lëjt con nijs. Per zëed tijb bën guroobnijs lëjt con xSprijt Dios nê bajl. Laaman rajp mazri guialrniabee guial lon, ni'qui xgurëchaman ad zajct gaxhiecan.

¹⁷ Abi' zi'c raya trigo zian güünnëman bejn. Din bën zinalt ree xnejz Dios yayal reeman lod rniabeeman, guiáad ree bën ad zinalt xnejz Dios guixhiaalaman laa reeman loj bajl ni ad yu't dxej yayü'.

¹⁸ Zian guneenë Waj laa reeman, në ree con diidx ren guneenëman laa reeman rulüüman laa reeman xtiidxa'c Dios.

¹⁹ Gudilë tēēman rey Herodes guial cwa'man Herodías xbéngunaa bi-chaman Felip, në por gracia ni mal ni ma beenman.

²⁰ Per luar nidxga' Herodes xtiidx Waj aal beenman zatijb ni mal: badxe'man Waj ladxguuib.

Rirobnijs Jesús

(Mt. 3:13-17; Mr. 1:9-11)

²¹ Chi curoobnijs Waj bejn ree nēgajc Jesús gurobnijs. Abi' la'tgaj cabejdx canabaman Dios, bixal xanyabaa

²² zianz biguiajt xSpriit Dios zi'c tijb palom xt guijcaman. Dxel biguien cha' tijb bejn xanyabaa, rēbaman:

—Lüj naj da xi'n'an, rēnan lüj rabaanë' tēēn lüj.

Bén goc ree xdiaagual Jesús

(Mt. 1:1-17)

²³ Cost gajlbichii ijz yu' Jesús chi guzuloj beenman xchiin Dios. Naladx ree bejn xi'n Xiëb najman, Xiëb guin gojc xi'n Elí.

²⁴ Elí gojc xi'n Matat, Matat gojc xi'n Leví, Leví gojc xi'n Melqui, Melqui gojc xi'n Jana, Jana gojc xi'n Xiëb,

²⁵ Xiëb gojc xi'n Matatías, Matatías gojc xi'n Amós, Amós gojc xi'n Nahum, Nahum gojc xi'n Esli, Esli gojc xi'n Nagai,

²⁶ Nagai gojc xi'n Maat, Maat gojc xi'n Matatías, Matatías gojc xi'n Semei, Semei gojc xi'n Xiëb, Xiëb gojc xi'n Judá,

²⁷ Judá gojc xi'n Joana, Joana gojc xi'n Resa, Resa gojc xi'n Zorobabel, Zorobabel gojc xi'n Salatiel, Salatiel gojc xi'n Neri,

²⁸ Neri gojc xi'n Melqui, Melqui gojc xi'n Adi, Adi gojc xi'n Cosam, Cosam gojc xi'n Elmodam, Elmodam gojc xi'n Er,

²⁹ Er gojc xi'n Josué, Josué gojc xi'n Eliezer, Eliezer gojc xi'n Jorim, Jorim gojc xi'n Matat,

³⁰ Matat gojc xi'n Leví, Leví gojc xi'n Simeón, Simeón gojc xi'n Judá, Judá gojc xi'n Xiëb, Xiëb gojc xi'n Jonán, Jonán gojc xi'n Eliaquim,

³¹ Eliaquim gojc xi'n Melea, Melea gojc xi'n Mainán, Mainán gojc xi'n Matata, Matata gojc xi'n Natán,

³² Natán gojc xi'n Davi, Davi gojc xi'n Isai, Isai gojc xi'n Obed, Obed gojc xi'n Booz, Booz gojc xi'n Salmón, Salmón gojc xi'n Naasón,

³³ Naasón gojc xi'n Aminadab, Aminadab gojc xi'n Aram, Aram gojc xi'n Esrom, Esrom gojc xi'n Fares, Fares gojc xi'n Judá,

³⁴ Judá gojc xi'n Jacob, Jacob gojc xi'n Isaac, Isaac gojc xi'n Abraham, Abraham gojc xi'n Taré, Taré gojc xi'n Nacor,

³⁵ Nacor gojc xi'n Serug, Serug gojc xi'n Ragau, Ragau gojc xi'n Peleg, Peleg gojc xi'n Heber, Heber gojc xi'n Sala,

³⁶ Sala gojc xi'n Cainán, Cainán gojc xi'n Arfaxad, Arfaxad gojc xi'n Sem, Sem gojc xi'n Noé, Noé gojc xi'n Lamec,

³⁷ Lamec gojc xi'n Matusalén, Matusalén gojc xi'n Enoc, Enoc gojc xi'n Jared, Jared gojc xi'n Mahalaleel, Mahalaleel gojc xi'n Cainán,

³⁸ Cainán gojc xi'n Enós, Enós gojc xi'n Set, Set gojc xi'n Adán, guiáad Adán gojc xi'n Dios.

4

*Been xindxab Jesús prueb**(Mt. 4:1-11; Mr. 1:12-13)*

¹ Yu' xSprijt Dios luxdoo Jesús guidiblagaa. Chi bazaman guiiwro' Jordán dxel binë xSprijt Dios laaman lod naj yujbidx.

² Ni guzuman tiuu dxej tiuu guiaal, abi' been xindxab laaman prueb. Achetdzi gudawaman dxej zii ree, zianz gulaanman.

³ Dxel rëb xindxab guin lojman:

—Bal wali najl Xi'n Dios, gunabee yayajc guiaj guie guidaxtil.

⁴ Badxi' Jesús laan rëbaman:

—Loj xtiidx Dios rëb: “Ad ganaxtizi guidaxtil guiban bejn, nëgajc gra diidx rniee Dios.”

⁵ Dxel binë xindxab guin laaman tijb guijc guia' ya da't, lod balüüx laaman gra ree nacion riga' loj guidxliuj.

⁶ Abi' rëb xindxab guin lojman:

—Gunen graczi guialrniabee në guialnaza'c ni yu' loj ree nacion guie. Din naj ca' laa reen, zajc gudëdan laa reen loj chutëez bën rënan.

⁷ Bal guzuxibil lon abi' guiën da'til naj, graczan gac xieenl.

⁸ Badxi' Jesús laan, rëbaman:

—Loj xtiidx Dios rëb: “Tijbzi loj xDadil Dios guzuxibil guiën tëel laaman, abi' tijbzi laaman been sirv.”

⁹ Dxel binë xindxab guin laaman Jerusalén, abi' gulë'pix laaman guijc yadooro' zojb luguiedx guin. Zianz rëbix lojman:

—Bal wali najl Xi'n Dios, gudidya' diizd guie xt luyuj,

¹⁰ din loj xtiidx Dios rëb:

Dios guixhiaal ree xianjlaman din guinia reeman lüj.

¹¹ Yales reeman lüj con yaa reeman,

chitëe quiilguijdx guiaj guia'l.

¹² Badxi' Jesús laan rëbaman:

—Rëb tëe loj xtiidx Dios: “Ad güünl prueb xDadil Dios.”

¹³ Chi ad badxejltri xhienaag güün xindxab guin Jesús prueb, dxel biquiedix tiblädëd.

*Rzuloj Jesús rülüüman bejn ree niz Galilea**(Mt. 4:12-17; Mr. 1:14-15)*

¹⁴ Badxin Jesús niz Galilea, yu' xSprijt Dios luxdooan guidiblagaa, abi' guidibczi niz yagaj bire'ch xtiidxaman.

¹⁵ Rülüüman bejn ree lën ree yadoo guidib niz yagaj, abi' graczi reeman ruza't laaman zagdxe.

*Radxin Jesús Nazaret**(Mt. 13:53-58; Mr. 6:1-6)*

¹⁶ Badxin Jesús Nazaret luguiedx lod guni'saman. Abi' dxej raziiladx ree bejn guyuman lën yadoo zi'c naj xcostumbraman. Dxel guzuliman persi biilaman xtiidx Dios.

¹⁷ Badëd reeman gui'ch ni bacaa Isaías bën badëe xtiidx Dios loj ree bejn. Chi bachijlaman loj gui'ch guin, badxejlaman lod rëb:

¹⁸ XSprijt dux Dad ree Dios za'në naj,

din laaman ma beenle' naj din ganen xtiidxza'caman loj ree bënprob.

Guxhaalaman naj din gugoynan bejn ree xhienaag laa reeman loj ni rzajc reeman,

yaxhal tëen loj ree bën lutia'p.

Gün tëen yudar bën rusagzi reeman,

19 din gugoynan guial ma bidxin dxej za'cdxoon ni gūünle' Dios bejn ree.

20 Dxel batüüb Jesús gui'ch guin bayüman laan loj bén rüjn yudar lén yadoo guin, zianz gurejman. Graczi ree bén riga' yagaj ruguiaadxijch laaman.

21 Dxel guzuloj caneenëman laa reeman, rëbaman:

—Yan dxej gajc ma gojc cumplid zi'c ca loj xtiidx Dios ni ma biguiejndi.

22 Graczi reeman cuza't laaman zagdxe caydxa tée loj reeman didxa'cdxoon ni caneeaman. Dxel canabdiidx loj lasa' reeman rëb reeman:

—¿Nid laaman naj xi'n Xiëb ya?

23 Dxel rëb Jesús loj reeman:

—Ma ragbeen guial nadi tijb diidx ni rëb: “Doctor, bayüjn lüj gajc”, na téeedi: “Ni ma baguiejnan beenl Capernaum nëgajc guie beenan najn ladxil.”

24 Rëb tée Jesús:

—Diidxliczi rnin, ni'czi tijb bén rudëe xtiidx Dios loj ree bejn, ad rënt reeman laaman ladx gajcaman.

25 Gol basaaladx dád zien ree béngunaa bizëjb zojb Israel lén ree dxej guban Elías bén badëe xtiidx Dios loj ree bejn, chi ad golt guia choon ijz garol, abi' guyu gubijn guidibczi.

26 Per ad guxhaalt Dios Elías guin loj tijb ree bén bizëjb zojb Israel, guxhaalaman laaman loj tijb bén bizëjb zojb guiedx la Sarepta, gajxh Sidón.

27 Në lén ree dxej guban Eliseo bén badëe xtiidx Dios loj ree bejn, dád zien ree bejn rajc guialgujdx la lepra, per ni'czi tijb reeman ad bayüjntaman, tijbzi bén Siria bayüjnman laman Naamán.

28 Chi biguiejn gra ree bén yu' lén yadoo guin ni rëb Jesús, dád balen reeman.

29 Bisu reeman babëe reeman Jesús luguiedx guin, dxel binë reeman laaman ro' tijb bala' ya guial naj guiedx guin guijc tijb guia', din gutedia' reeman laaman.

30 Per gudëd Jesús galay reeman, ziataman.

*Rabëe Jesús xinxab luxdoo tijb bejn
(Mr. 1:21-28)*

31 Wej Jesús guiedx Capernaum ni riga' niz Galilea, yagaj rulüüman bejn ree dxej ni raziiladx reeman.

32 Abi' dád badxaloj reeman ni rulüüman guial rnieenëman laa reeman con guialrniabee.

33 Lén yadoo guin yu' tijb xin yu' xinxab luxdoo, abi' guridxa' xinxab guin rëbix:

34 —Basa'n dunujn, ¿xhie rënl con dunujn, Jesús bén Nazaret? ¿Zëedil ya zidganijtil dunujn? Nünbeen lüj, naya nalil najl xi'n Dios.

35 Dxel gudilë Jesús xinxab guin, rëbaman lojx:

—¡Bacwëez ro'l, barii luxdoo xin guin!

Zianz badxe'bi xinxab guin xin guin luyuj guidib niz loj reeman, bariitix luxdoo achetdzi goquix.

36 Graczi reeman badxaloj, rëb loj lasa' reeman:

—¿Xhie ree diidx guin rnieeman? ¡Con guialrniabee ni rajpaman, rniabee-man rarii ree xinxab luxdoo ree bejn!

37 Abi' guidibczi niz yagaj bire'ch xtiidxaman.

*Rayüjn Jesús xnasuegr Bëd
(Mt. 8:14-15; Mr. 1:29-31)*

³⁸ Dxel barii Jesús lèn yadoo guin, abi' wejman lidx Simón. Ragxuu xnasuegr Simón guin yu'man xliaadoxh zeel guzajc reeman Jesús liaadx din yayüjnman laaman.

³⁹ Zianz basajb loj Jesús lod naga'man gunabeeman yarii xliaa guin, abi' bariin. Loj hor ziigajc bixcheman guzuloj cudëëman ni gaw reeman.

Rayüjn Jesús zien ree bénragxuu

(Mt. 8:16-17; Mr. 1:32-34)

⁴⁰ Chi ma wëëz gubijdx, graczi ree bén rajp bénragxuu bén rajc ree gadxagayaa guialguijdx biné reeman laa reeman loj Jesús, persi badxiib yaaman guijc tijb gaj reeman, bayüjnman laa reeman.

⁴¹ Nè zien ree bénragxuu guin rarii xindxab luxdoo, rbidxa' reex rëb reex: —jLüj naj Xi'n Dios!

Per gudilëman xindxab guin ree, ad cwëjbtaman niniee reex, guial ragbee reex laaman naj Cristo.

Ruliüü Jesús xtiidx Dios niz Galilea

(Mr. 1:35-39)

⁴² Chi bareguiaal, barii Jesús luguiedx guin zëman lod achut bejn zojb. Per raguuil ree bénguiedx guin laaman, bidxin reeman lod za'man abi' rëb reeman lojman din yaya'nnëman laa reeman.

⁴³ Per rëbaman loj reeman:

—Nè ree luguiedx ren rayal chinë'n xtiidxza'c Dios guial xhienaag naj xguialrniabeeman, din par zian guxhaalaman naj.

⁴⁴ Zian basnuu guneeman xtiidx Dios lèn ree yadoo niz Galilea.

5

Rniaaz reeman zien bëjl

(Mt. 4:18-22; Mr. 1:16-20)

¹ Tijb dxej chi za' Jesús ro' nijs Genesaret, bidxin ree benzien. Xt rxa't reeman laaman guial rën reeman gucaagdiajg reeman xtiidx Dios.

² Dxel baguiaa Jesús tio'p barcw ro' nijs guin; ni basa'n ree bén rniaaz bëjl la'tgaj caguüib xguijxh reeman ni rniaazné reeman bëjl.

³ Zianz wë'paman loj tijb barcw ni naj xbarcw Simón, abi' rëbaman lojman din gudxigaman laan niz galay nijs guin. Dxel gurejman, guzuloj culüüman bejn ree.

⁴ Chi gulox guneenëman laa reeman, dxel rëbaman loj Simón:

—Biné barcw guin lod mazri naxhit, gol bazaal xguijxhidi din guiniaazidi bëjl.

⁵ Badxi' Simón laan rëbaman:

—Mextr, gudëd guiaalczi baguieenan dxiin, achutczü bëjl wanaazan. Per bal lüj na, yazaalan guijxh guin ree.

⁶ Chi bazaal reeman guijxh guin ree loj nijs guin, bëjl zien da't gunaaz reeman xt guzuloj cayaxya' ree guijxh guin.

⁷ Abi' been reeman sen loj ree xcompniar reeman bén yu' ree loj stijb barcw guin, din chiguieen reeman laa reeman yudar. Dxel wej reeman, abi' bacha reeman bëjl guin ree loj grop barcw guin xt ma nizëëb reen xan nijs.

⁸ Chi baguiaa Simón Bëd ni goc, bazuxibaman loj Jesús rëbaman:

—Biquied lod za'n, Dad, din bëndol naj.

⁹ Guial Simón con ree bén za'nëman badxa loj reeman guial dád zien bëjl gunaaz reeman.

10 Ziangajc badxaloj ree Jacob con Waj, b́en naj ree xi'n Zebedeo, naj t́e reeman xcompniar Simón. Per ŕeb Jesús loj Simón:

—Ad ŕexebil, din diizd yan guto'pil bejn ree par Dios luar guiniaazil b́ejl.

11 Dxel bab́e reeman barcw guin ree loj nijs guin, basa'n reeman laa reen, zinalt reeman Jesús.

Rayün Jesús t́ijb b́en rajc guialguijdx la lepra

(Mt. 8:1-4; Mr. 1:40-45)

12 Chi za' Jesús t́ijb luguiedx, bidxin t́ijb b́en rajc guialguijdx la lepra, guidibczaman ma yu' guialguijdx guin. Chi baguiaaman Jesús laa bazuxib gajcaman, basajb lojman luyuj, ŕebaman:

—Dad, bal ŕenl, zajc yayüjnl naj.

13 Zianz basli yaa Jesús baqui'man laaman, ŕebaman:

—Ŕenan. Bayajc.

Loj hor ziigajc bayajc b́en guin.

14 Dxel ŕeb Jesús lojman:

—Achuczli loj guiébil guial ma bayajquil. Lojzi bixhioz wej din guguaaaman ĺj. Biné gon ni rayal chinél zi'c gunabee Moisejs din gagbee gra bejn guial ma bayajquil.

15 Per guixie guixie mazri bire'ch xtiidx Jesús por gra ree ni zagdex ŕjnman. Abi' dád benzien rdo'p din gucaagdiajg reeman ni rnieeman yayüjn t́eman laa reeman guialguijdx ni rajc reeman.

16 Guiáad laaman rejman niz lod achut bejn zojb, persi rbejdx rniabaman Dios.

Rayün Jesús b́en ńejt xcuerp

(Mt. 9:1-8; Mr. 2:1-12)

17 T́ijb dxej culüü Jesús bejn ree, abi' zojb tio'p choon ree b́enfarisew ńe ree mextr rajc ley, źeéd reeman guiedxdo ni riga' ree niz Galilea ńe niz Judea, ńe Jerusalén. Za'né xguialrniabee Dios laaman persi rayünman b́enragxuu ree.

18 Dxel bidxin tio'p choon ree bejn, bidxinné reeman t́ijb xin ńejt xcuerp, naga'x loj da. Abi' guyèn reeman niuné reeman laax lénü guin din niguijxh reeman laax lod za' Jesús.

19 Per ad badxejlt ban niz niuné reeman laax guial b́en guixiuj riga' yagaj. Dxel wé'p reeman guijc yu guin, abi' biquied reeman tex dxiib guijcan, zianz gulet reeman xinragxuu guin guidib naga'x loj da guin, gudijxh reeman laax galay ree b́en guin lod za' Jesús.

20 Chi baguiaa Jesús guial rliladx reeman laaman; ŕebaman loj xinragxuu guin:

—Xi'n, ma benan xtolil perdon.

21 Per ree mextr rajc ley con ree b́enfarisew guzuloj cayün reeman xgab: “¿Chu xin guin zeel ŕjnx mazri xin zojbloj guial loj Dios? Achutczli rajc ŕjn perdon dol, t́ijbzi Dios.”

22 Per gogbee gajc Jesús xgab cayün reeman, dxel ŕebaman:

—¿Chexc zeel ŕjndi xgab zian?

23 ¿Conin ad nawéég gac, guial guièn ya: “Ma naj xtolil perdon”, o guièn: “Bixche guza t́eé”?

24 Per yan, gulún ĺejt guial B́en guxhaal Dios rajpaman guialrniabee loj guidxliuj guie din güünman perdon dol ree.

Dxel ŕeb Jesús loj xinragxuu guin:

—¡Bixche, baca' ni go'til loj! Baguij lidxil.

²⁵ Loj hor guin gajc bixchex guidibloj gra ree b́en riga' yagaj balesix ni go'tix loj, zianz zia lidix ruza'tix Dios zagdx.

²⁶ Graczi reeman badxaloj ruza't t́eē reeman Dios zagdx abi' d́ad bidxeb reeman, ŕeb reeman:

—iNi'qui tijb ad waguiaat ree zi'ct naj ni cayguiaa ree yan!

Rbejdx Jeśus Lev́i

(Mt. 9:9-13; Mr. 2:13-17)

²⁷ Chi gud́ed gojc zian, baguiaa Jeśus tijb b́en ruquijx impuest, laman Lev́i, zojbaman lod ruquijxaman. Abi' ŕebaman lojman:

—Tanal naj.

²⁸ Dxel bisu Lev́i, guro'nladxaman gran zinaltaman Jeśus.

²⁹ Abi' been Lev́i lanijro' lidxaman par Jeśus, ńe zien ree b́en ruquijx impuest zojb ńet́eē ree ben ren zojbńe reeman xan mex.

³⁰ Per ree b́enfarisew ree ńe ree mextr rajc ley, b́en nuchajg gajc ree b́enfarisew guin, guzuloj caneeguidx reeman xbejn ree Jeśus, ŕeb reeman:

—¿Chexc zeel ŕe' rawńedi b́en ruquijx ree impuest ńe ree b́endol?

³¹ Badxi' Jeśus laan ŕebaman:

—B́ennadaan ree ad riaadxt reeman doctor, b́enragxuu ree laa reeman riaadx Doctor.

³² Ad zialtan par ree benza'c, zialan par ree b́endol din yaýujn reeman xgab por xtol reeman.

Rniabdídx reeman loj Jeśus xcwent guialrba'n

(Mt. 9:14-17; Mr. 2:18-22)

³³ B́enfarisew ree ńe ree mextr rajc ley, ŕeb reeman loj Jeśus:

—Xbejn Waj, ńe ree xbejn ree b́enfarisew d́ad zien volt rba'n reeman rbejdx rniab t́eē reeman Dios, guiaad ree xbejnl ganax ŕe' raw reeman.

³⁴ Badxi' Jeśus laan ŕebaman:

—¿Wen zajc ǵuúndi naguiejn ya guiba'n ree biooz za' loj guialruxhliaa, la'tgaj za'ńe xin cuxhliaa guin laa reeman?

³⁵ Per guidxin dxej chiquiedix, dxel guiba'n reeman.

³⁶ Ŕeb t́eēman loj reeman:

—Achut b́en rutúüg ta'n lajd cúb din yata'man laan loj lajd yojx. Bal ǵuúnman zian, zaguixya' lajd cúb guin lajdyojx guin, ńet́eē yan ad zuguaatan zagdx loj lajdyojx guin.

³⁷ Ad rgu' t́eēt bejn vin cúb ĺen anfr yojx, din bal ǵuúnman zian, zaguixya' vin cúb guin anfr guin, abi' zi'c anfr guin zi'c vin guin zaxin reen.

³⁸ Zeel vin cúb rayal chu'n ĺen anfr cúb din ni'qui tijb reen ad zaxint.

³⁹ Abi' tijb b́en ma gu' vin yu' gocli ad ŕe'taman vin cúb, din ŕebaman: “Vin yu' gocli mazri ni zagdxen.”

6

Rgui'ch ree xbejn Jeśus trigo dxej raziiladx ree b́en Israel

(Mt. 12:1-8; Mr. 2:23-28)

¹ Tijb dxej raziiladx ree b́en Israel, la'tgaj cadéd Jeśus con ree xbejnman loj tijb guiniaa lod yu' trigo. Guzuloj cagu'i'ch reeman trigo guin, dxel cuxho'p reeman laan cayaw reeman.

² Abi' yu' ree b́enfarisew ŕeb loj reeman:

—¿Chexc zeel ŕujndi ni ad rayalt ǵuúndi dxej raziiladx ree bejn?

³ Badxi' Jeśus laan, ŕebaman:

—¿Gadidi gool loj xtiidx Dios ya ni been Davi chi gulaanman con ree xcompniaraman?

⁴ Guyuman lèn xyadoo Dios, cwa'man guiadxtil ma nagle' ree gudawaman con ree xcompniaraman, ni ad rayalt niajw reeman bixhiosi ree rayal gaw laa reen.

⁵ Rëb tëë Jesús loj reeman:

—Bén guxhaal Dios rajpaman gualrniabee dxej raziiladx ree bejn.

Rayajc tijb xin naxü'n tibladyaa

(Mt. 12:9-14; Mr. 3:1-6)

⁶ Zatiyb dxej raziiladx reeman, guyu Jesús lèn tijb yadoo abi' guzuloj culüüman bejn ree. Yagaj za' tijb xin naxü'n yaa ladbee.

⁷ Abi' ree mextr rajc ley në ree bënfarisew rzunal reeman din guidoon zayüjn Jesús laax dxej raziiladx reeman ya, din gac gutedia' reeman Jesús.

⁸ Per laaman ragbee gajcaman xhie xgab cayüjn reeman, zeel rëbaman loj xin naxü'n yaa guin:

—Bisu, guzuli galay guin.

Dxel guzulix, guzujx galay guin.

⁹ Dxel rëb Jesús loj reeman:

—Ganabdiidxan lëjt: ¿Xhie rayal güün bejn dxej raziiladx reeman, ni zagdx ya o ni mal? ¿Guslaaman xgualnaban bejn ya o gugüjtaman laaman?

¹⁰ Dxel baguiaa Jesús gra ree bën riga' yagaj, abi' rëbaman loj xin guin:

—Basli yaal.

Dxel beenx zi'c rëbaman, abi' bayajc yaax.

¹¹ Per laa reeman dád bidxe'ch reeman, guzuloj rëb loj lasa' reeman xhienaag güünnë reeman Jesús.

Rbe Jesús chiptio'p ree apóstoles

(Mt. 10:1-4; Mr. 3:13-19)

¹² Lèn ree dxej zii wej Jesús tijb ruguia' persi gurejdx gunabaman Dios, abi' gudëd guiaalczí gurejdx gunabaman Dios yagaj.

¹³ Chi bareguiaal, gurejdxaman bën nal ree laaman, dxel gulejman chip-tio'p reeman loj reeman, abi' guneeman laa reeman apóstoles.

¹⁴ La reeman: Simón, bën gulëälajman Bëd, Andrejs bijch Simón, Jacob, Waj, Felip, Tol,

¹⁵ Matew, Tumajs, Jacob xi'n Alfeo, Simón, bën bi'ch loj ree bën cananistas,

¹⁶ Judas xi'n Jacob, në Judas Iscariote bën bayü Jesús.

Rülüü Jesús zien ree bejn

(Mt. 4:23-25)

¹⁷ Baguiajt Jesús ruguia' guin con guidxiptio'p ree xbejnman, badxin reeman lod naj tijb la'ch. Yagaj bado'p zien ree xbejnman në ree ben ren, bën zëed ree niz Judea në Jerusalén në ree bën zëed Tiro con Sidón, guiedx riga' ree gajxh ro' nijsdoo. Bidxin reeman din gucaagdiajg reeman xtiidx Jesús din yayüjn tëëman laa reeman gualguijdx ni rajc reeman.

¹⁸ Në ree bën yu' xindxab luxdoo bayajc.

¹⁹ Zeel graczi ree bejn rën guqui' laaman, gual rayüjnman laa reeman con xgualrniabeeman.

Xiquilbaa ree bejn

(Mt. 5:1-12)

²⁰ Dxel baguiaa Jesús loj ree xbejnman, abi' rëbaman:

—Xiquilbaadi bënprob, din lëjt rayal loj xgualrniabee Dios.

21 'Xiquilbaadi b́en rliaan ree yan, din Dios gunee ni gawidi xt chigdxin-ladxidi.

'Xiquilbaadi b́en roon ree yan, din zadxin dxej guxijdxidi.

22 'Xiquilbaadi chi rdxe'ch bejn ĺejt, chi rabéeca reeman ĺejt, rnieeguijdx t́eé reeman ĺejt, naladx reeman najdi bendxuudx guial riladxidi B́en guxhaal Dios.

23 Gol babaa gol badxe' t́eé luxdoodi zagdxe chi güünné reeman ĺejt zian, din zro' ni tia'di yu' xanyabaa, din ziangajc beenné xbéngulal reeman b́en badéé ree xtiidx Dios loj ree bejn.

24 'Per probza ĺejt benrijcw, din ma guyuxgaj luxdoodi nix.

25 'Probza ĺejt b́en raw xt rigdxinladx yan, din zadxin dxej guiliaandi.

'Probza ĺejt b́en ruxijdx yan, din zadxin dxej goondi guial chu'nayadi.

26 'Probza ĺejt, b́en ruladx ree guillies bejn xvalor, din zian beenné ree xbéngulal reeman b́en goc ree b́en rusquiee, ŕeb reeman rudéé reeman xtiidx Dios loj ree bejn.

Guyén b́en rdxe'ch ĺij

(Mt. 5:38-48; 7:12)

27 'Per ganin ĺejt b́en rucaagdiajg ree da diidxan: Gol guyén b́en ralen ĺejt, gol gojc benza'c con ree b́en yu'xyajn ĺejt,

28 gol bazaal diidxza'c guijc ree b́en ruzaal diidxmal guijquidi, gol gurejdx gunab Dios por ree b́en rnieeguijdx ĺejt.

29 Bal chu chééz tiblax hajguil, badééd zatibladan, bal chu cwééxuu xchamarril, ad cwexuul chinéman né xmanguil.

30 Chutééz b́en rniab xhienin lojl, badéédan. Bal chu rquied xhie xieenl, ad bal yanabilan.

31 Gol beenné ree bejn zi'c ŕendi güünné reeman ĺejt.

32 'Bal ŕendi ganaxzi b́en ŕen ĺejt, ¿xhieza ni zagdxen cayüjndi? Din xt b́endol ree ŕijn zian, ŕen reeman b́en ŕen laa reeman.

33 Abi' bal ŕujndi wen ganaxzi b́en ŕujn ĺejt wen, ¿xhieza ni zagdxen cayüjndi? Din xt b́endol ree ŕujn zian.

34 Ziangajc bal rudéédidi ni rgui'n ganaxzi b́en naladxidi zajc yaguijx lojdi, ¿xhieza ni zagdxen cayüjndi? Din xt né ree b́endol rudééd rgui'n ree b́en naladx reeman zajc yaguijx loj reeman.

35 Per ĺejt gol guyén b́en ralen ĺejt, gol been reeman wen. Gol badééd qui'n reeman, ad cwéézidi xhie tia'di gujcan. Zian tia'di zro' guialnaza'c ni gunee Dios b́en yu' xanyabaa, gac t́eédi xi'nman, din laaman naj benza'c con ree b́en ad rudéét quixtéé lojman né con ree benmal.

36 Gol baya bejn zi'c raya dux Dad ree Dios bejn.

Xcwent guialrula'ch

(Mt. 7:1-5)

37 'Ad gula'chidi, ad gudxiib t́eédi ni mal guijc ree bejn chit́eé saquidi zian, gol been perdon din gaquidi perdon.

38 Gol badééd ni riaadx ree bejn, Dios mazri zro' naj ni guneeman zi'c tijb bols guidxadi. Din zi'c rudéédidi loj ree bejn, ziant gajc naj ni gunee Dios lojdi.

39 Ŕeb Jesús loj reeman zatijb diidx:

—¿Wen zajc chiné b́enlutia'p zatijb b́enlutia'p ya? ¿Nid zayajb grop reeman ro' bala' ya?

40 Tijb b́en cusiid, ad mazt rajcaman guial loj xmextraman. Guiáad chi ma gulox basiidaman rajcaman zi'ctgajc rajc xmextraman.

41 'Ad gula'chil ben ren por faltdobëz ni rajpaman, zagdxeli guyu xgab por falt narooob ni rajpil.

42 Abi' bal mazri falt narooob rajpil, ¿xoxa guiëbil loj zatijb bejn: "Ad laat naj ni rüjn"? ¡Bén rusquiee! yalojxgaj been zi'c rayal, chi ma beenl zian dxel ma zile' guiëbil loj zatijb bejn: "Ad laat naj ni rüjn!".

Por ni rtia loj yag rayünbee bejn xhie yagan
(Mt. 7:17-20; 12:33-35)

43 'Ad yu't yag zagdxë rtia ni guijdx loj, ad yu' tëët yag guijdx rtia ni zagdxë loj.

44 Din tijbgaj yag rayünbee bejn xhie yagan por ni rtia lojn. Ad raru't higo loj yaquiëjch, ad raru' tëët uv loj gui'xh.

45 Benza'c rnieeman diidxza'c din laan yu' luxdoooman, guiáad benmal rnieeman diidxmal din laan yu' luxdoooman. Din ni yu' luxdoo bejn laan rnieeman.

Tio'ploj cimiant
(Mt. 7:24-27)

46 '¿Chexc zeel rnieedi naj, "Dad, Dad", abi' adza rüjntidi ni rnin?

47 Ganin lojdi chu naj zi'c bén ri't lon, rigueijnman ni rën, abi' rüjnman laan:

48 laaman naj zi'c tijb Bén been yu, yaloj xgaj gudëenman naxhit xt chi bila loj guiaj, dxel gulesaman xcimiantan guijc guiaj guin. Abi' chi bi't nijsro' majsí gulajn lad yu guin, per ni'quid baniibtan laan guial naj cimiant guin guijc guiaj.

49 Per Bén rigueijn da diidxan abi' ad rüjntaman laan, najman zi'c tijb Bén been yu ni ad yu't xcimiant. Abi' chi bi't nijsro' gulajn lad yu guin, balenxanan laan, tiblyaazi base'nan laan.

7

Rayaic xmojs tijb suldad rom xin rniabee ree suldad
(Mt. 8:5-13)

1 Chi gulox guneenë Jesús bejn ree, dxel zëman Capernaum.

2 Yagaj zojb tijb suldad Rom xin rniabee ree suldad. Yu' tijb xmojsix xin rën da'tix, ragxu mojs guin ma rulüücüzi guiëtix.

3 Chi bigueijn suldad rniabee guin ruza't ree bejn Jesús, guxhaalix tio'p choon ree Bén rniabee Israel lojman din chisajc reeman liaadx yayünman xmojsix.

4 Abi' bidxin reeman loj Jesús guzajc reeman liaadx, rëb reeman:

—Gagnësiil suldad rniabee guin,

5 din rën x Bén duladx ree, në yan por laax gojc dux yadoo ree.

6 Dxel binë Jesús laa reeman. Per chi ma cadxin reeman gajxh lidxix, guxhaal tio'p choon ree xmiwix loj Jesús biguiedx reex lojman:

—Dad, ad chu'l xgab, din ad rayaltan chu'l lënü lidxan,

7 zeel ad bayaxtan nial quijb naj nidgadilan lüj. Per con guneë diidz lod za'l din yayajc da mojsan.

8 Din zi'c naj yu' ree Bén rniabee naj, ziangajc naj yu' ree da suldadan xin rniabeen. Chi rën loj tijb reex: "Wej", rejx. Chi rën loj zatijbix: "Guda", ri'tix. Abi' chi rën loj da mojsan: Been ni guin, rüjngajquixan.

9 Chi bigueijn Jesús zian, dád badxa lojman ni rëb suldad guin, abi' badxi' lojman loj gra ree Bén zinal laaman, rëbaman:

—Diidxliczi rnin, ni'qui Israel ad wadxaaglojtan tijb Bén rliladx da't Dios zi'c rliladx xin guin Dios.

10 Chi badxin ree xin guxhaal suldad rniabee guin lidxix, baguiaa reex ma bayajc mojs guin.

Rasban Jesús xi'n tijb béngunaa bizéjb

11 Chi gudéd gojc zian, wej Jesús tijb luguiedx la Naín biné ree xbejnman, në zien ree ben ren.

12 Chi bidxinman gajxh ro' guiedx guin, baguiaaman ziquie'ch reeman tijb xingüt, tijbzi laax naj xi'n xniaax, najman bén bizéjb. Zien da't ree bénluguiedx guin zinal laaman.

13 Chi baguiaa Dad Jesús laaman, bayaman laaman, dxel rëbaman lojman:
—Ad roonl.

14 Abi' bibig Jesús baqui'man xcaj xingüt guin, dxel guzudxe ree bén ziné laax. Zianz rëbaman lojx:

—Xi'n, naj rni lojl: ¡Bixche!

15 Dxel gureli xin guin, guzuloj caneex, zianz bayü Jesús laax loj xniaax.

16 Chi baguiaa reeman zian, graczi reeman bidxeb guzuloj cuza't reeman Dios zagdxe, rëb reeman:

—Du loj ree ma gules Dios tijb bén zojbloj, bén rudëë xtiidx Dios loj ree bejn.

Rëb tëë reeman:

—Ma bi't Dios din gagné ree xbejnman.

17 Abi' guidib niz Judea në ree guiedx riga' niz yagaj gogbee ree bejn ni been Jesús.

Bigneenë ree xbejn Waj Jesús

(Mt. 11:2-19)

18 Gogbee Waj gra ree ni cayüjn Jesús, guial bagojn ree xbejnman laaman. Abi' guneeman tio'p reeman,

19 dxel guxhaalaman laa reeman loj Jesús din chignabdiidx reeman bal laacaman naj Cristo bén naj diidx gui't, bén cabëz reeman, o cwëz reeman ben ren ya.

20 Abi' bibig reeman, guneenë reeman laaman, rëb reeman lojman:

—Waj bén ruurobnijis bejn ree guxhaal dunujn lojl zudganabdiidxan bal lüjcan naj Cristo bén naj diidx gui't, bén caylëjzan o yalëjzan ben ren ya.

21 Hor ziigajc bayüjn Jesús zien da't ree bénragxuu, në ree bén rdoob, nëtëë ree bén yu' xindxab luxdoo, baxhal tëëman loj ree bénlutia'p.

22 Dxel badxi' Jesús xtiidx ree bén guxhaal Waj, rëbaman:

—Gol chej, gol chiguiidx loj Waj ni cuguiaadi në ni cagueiejndi. Gol güjdx lojman guial ma ruguiaa ree bénlutia'p, ma rajc rza ree bencoj, ma rayajc tëë ree bén goc guialguijdx la lepra, ma riguiejn ree bén nacwa't, guíaad ree bengüt ma baban reeman, abi' ree bénprob ma cagueiejn reeman xtiidxza'c Dios.

23 ¡Xiquilbaa ree bén ad zucwëëzt chililadx naj!

24 Chi baza ree bén guxhaal Waj, guzuloj Jesús caneeman xcwent Waj loj ree bejn, rëbaman:

—¿Chu naladxidi naj bén biquiaadi loj yujbidx? ¿Naladxidi ya najman zi'c tijb biqui runiib bi?

25 ¿O chu biquiaadi? ¿Tijb bén najcw lajd zagdxe ya? Lëjt ragbee guial bén rajcw ree lajd zagdxe, në ree bén naban zagdxe, lën palas zojbloj reeman.

26 ¿Chu biquiaadi? ¿Tijb bén rudëë xtiidx Dios loj ree bejn ya? Per diidxliczi rnin lojdi, biquiaadi tijb bén mazri zojbloj guial loj tijb bén rudëë xtiidx Dios loj ree bejn.

²⁷ Wajn naj bén ruza't xtiidx Dios, lod rëb:

Naj rxhial tijb bén ned lojl,
bén güünchaaw xnejzil.

²⁸ Rnin lëjt, loj graczi ree bénguidxliuj ad wayut bén rudëë xtiidx Dios loj ree bejn, bén mazri zojbloj guial loj Waj. Per majsi zian, bén ad zojblojt loj xgualrniabee Dios, laaman mazri zojbloj guial loj Waj.

²⁹ Gra ree bejn, në ree bén ruquijx impuest bén baroobnijs Waj, chi biguiejn reeman ni rëb Jesús bignia' reeman guial rijn Dios zi'c rayal.

³⁰ Per ree bénfarisew con ree mextr rajc ley ad cwëjbt reeman nuroobnijs Waj laa reeman, zian ad guyënt reeman ni rën Dios par laa reeman.

³¹ Rëb tëë Jesús:

—¿Xhienaag ganin lëjt naj ree bén riga' loj guidxliuj guie yan? ¿Chu naj zi'c laa reeman?

³² Laa reeman naj zi'c ree xindoo rguijt niz galay luguiedx, abi' rbixdiaj reex rëb loj lasa' reex: “Bacwejdaxan par nuya'di, per ad baya'tidi, badoolan ni naya ree, per ad biintidi.”

³³ Din bi't Waj bén baroobnijs bejn ree, ad rawtaman ad rë' tëëtaman vin, abi' rëbidi xinxab yu' luxdooman.

³⁴ Yan bi't Bén guxhaal Dios, rawaman rë' tëëman vin, abi' rëbidi guial dád nalaman ruladxaman guié'man, ruchajg tëëman bëndol ree con ree bén ruquijx impuest.

³⁵ Per xgualrignia' Dios, rguienan por ree xbejnman.

Rej Jesús lidx tijb bénfarisew la Simón

³⁶ Tijb bénfarisew rëb loj Jesús din chitaw Jesús guin lidxaman. Abi' bidxinman lidxaman gurejman xan mex.

³⁷ Dxel tijb béngunaa dxuudx zojb gajc luguiedx guin. Chi gogbeeman cayaw Jesús lidx bénfarisew guin, bidxinnëman tijb lumejt yu' perfum.

³⁸ Dxel roonman gurejman lod nuzuj guia' Jesús, guzuloj caxhie' nijs carii lojman guia' Jesús. Abi' cucwiidxnë guidxgujcaman laan, cayawaman xid gúga'man curoob tëëman laan perfum guin.

³⁹ Chi baguiaa bénfarisew guin zian, beenman xgab: “Balgui zian wali bén guin najman bén rudëë xtiidx Dios loj ree bejn, zagbeeman chunin cuqui' laaman xhie tëë naag naban béngunaa guin, najman bendxuudx.”

⁴⁰ Dxel rëb Jesús loj bénfarisew guin:

—Simón, yu' tijb ni ganin lüj.

Badxi' bénfarisew guinan rëbaman:

—Gunan, mextr.

⁴¹ Abi' rëb Jesús lojman:

—Tijb bén rudëëd milia rgui'n ree bejn, ral tio'p ree bejn lojman. Tijbaman nuzëëb gaaygayuu denario, zatijbaman nuzëëb tü'pchiin.

⁴² Grop reeman ad beent gan naguijx lojman, per bén badëëd milia guin rëbaman loj reeman guial ad zaguijxt reeman ni nuzëëb reeman. Yan guna, ¿chu loj grop reeman mazt guiën laaman?

⁴³ Badxi' Simón laan, rëbaman:

—Par naj, bén bazëëb mazri zro' guin.

Dxel rëb Jesús:

—Waliquil.

⁴⁴ Zianz baguiaa Jesús loj béngunaa guin, abi' rëbaman loj Simón:

—¿Ruguaal béngunaa guie ya? Chi guyu'n lidxil ad baneetil nijs niéd guia'n. Guiáad laaman gudiibaman guia'n con nijs brii lojman, abi' bacwiidxaman laan con guidxguijcaman.

⁴⁵ Ad gudawtil naj xid, guiáad laaman diizd chi guyu'n ad rbëzt rawaman xid guia'n.

⁴⁶ Achet sejt badxe'l guican, per laaman ma badxe'man perfum guia'n.

⁴⁷ Zeel rnin lüj, gra ree xtolaman ma gojc perdon guial rën da'taman naj. Per bén yu' ta'nz xtol abi' rajcaman perdon, ta'nz rënman naj.

⁴⁸ Dxel rëb Jesús loj béngunaa guin:

—Ma naj gra xtolil perdon.

⁴⁹ Guiáad ree bén zojbnëman yagaj guzuloj canabdiidx loj lasa' reeman, rëb reeman:

—¿Chu bén guin zeel xt në ree dol rüjnman perdon?

⁵⁰ Per rëb Jesús loj béngunaa guin:

—Ma najl perdon guial rliladxil naj, baguiaj zagdx ad ruril xgab.

8

Béngunaa been ree Jesús yudar

¹ Chi gudëd gojc zian, wej Jesús gra ree guiedx narooob në ree guiedx dobëz bicojnman biglúü tëëman xhienaag naj xguialrniabee Dios. Në guidxiptio'p ree apóstoles binëman,

² nëtëë tio'p choon ree béngunaa, bén babëëman xindxab luxdoo, në ree bén bayünman guialguijdx ni rajc reeman. Loj reeman no'ch María Magdalena, bén babëë Jesús gajdx indxab luxdoo.

³ Në Xuan, lacheel Cuza, Cuza guin goc bén nulen xchiin Herodes. Në Susan nëtëë zien ree béngunaa ren, been reeman yudar Jesús con ni rajp reeman.

Xcwent bén rtie'ch bin

(Mt. 13:1-9; Mr. 4:1-9)

⁴ Zien ree bejn brii loj ree guiedx ziquiaa reeman Jesús. Chi bido'p ree benzien, beman tijb cwent loj reeman rëbaman:

⁵ —Tijb bejn zëman zigtie'chaman bin. Chi catie'chaman laan, ta'n nan biajb lunejz abi' balëë ree bejn gujcan gudaw tëë ree biguijn laan.

⁶ Zata'n nan biajb loj ree guiaj, chi gulejn reen gubidx reen guial ad yu' xcojpt loj ree guiaj guin.

⁷ Zata'n nan biajb loj ree yaquiëjch. Abi' chi guni's reen tijbzi, banidloj yaquiëjch guin laa reen.

⁸ Zata'n nan biajb loj yujza'c abi' dád gojcan, cwa xt tibgayuu bin loj tijbgajn. Chi gulox guneë Jesús zian, dxel guneeman rejs rëbaman:

—Bén rën gucaagdiajg, gol bacaagdiajg.

Chexc zeel rulüü Jesús con cwent ree

(Mt. 13:10-17; Mr. 4:10-12)

⁹ Dxel gunabdiidx ree xbejn Jesús lojman, rëb reeman:

—¿Xhie rën guiëb cwent guin?

¹⁰ Badxi' Jesús laan rëbaman:

—Lëjt, Dios ma basa'n lëjt din chignia'di xhienaag naj xguialrniabeeman. Per loj gra reeman rünan zi'c cwent din majsi rani loj reeman, per ad zuguaat reeman, majsi riguiëjn reeman, per ad zignia't reeman.

Rusignia' Jesús xcwent bén rtie'ch bin

(Mt. 13:18-23; Mr. 4:13-20)

11 'Ni ne rën guiëb xcwent bén rtie'ch bin: Bin guin naj zi'c xtiidx Dios,

12 guiáad bin biajb runejz naj zi'c ree bén rigueijn xtiidx Dios; per rdxin gajc xindxab rquiedix laan luxdoo reeman chitéë chililadx reeman laan abi' gac reeman perdon.

13 Guiáad bin biajb loj ree guiaj, naj zi'c ree bén rigueijn xtiidx Dios, abi' dád nix ru luxdoo reeman rigueijn reeman laan, per guial naj reeman zi'c cwaan ni ad yu't liuj, riladx reeman laan tibladed' abi' chi rzagdiaj reeman laa rusa'n gajc reeman ni riladx reeman.

14 Guiáadza bin biajb loj ree yaquiëjch, naj zi'c ree bén rigueijn xtiidx Dios; per ru reeman xgab por gra ree guialnaza'c riga' loj guidxliuj guie rüjn tée reeman ni rëntzi reeman, abi' zianz rucwëez rucaagdiajg reeman xtiidx Dios ad rüjn tée't reeman ni rënman.

15 Guiáad bin biajb loj yujza'c, laan naj zi'c ree bén rucaagdiajg xtiidx Dios, rucaagdiajg reeman laan con guidib luxdoo reeman za'dxi'ch tée reeman loj xnejzaman, zianczi rüjn reeman ni rënman.

Achet ni naguie'ch yu'

(Mr 4:21-25)

16 'Achut bén ruze'c tijb guij dxel ruta'cwaman laan, ad rudxe' tée'taman laan xan lon, ruzujman laan ya din gusnin loj ree bén chu' lënü.

17 Achet ni naguie'ch yu' ni ad zaguiant ad yu' tée't ni ralan ni ad zagbeet bejn, zadxin dxej gagbee bejn laan.

18 'Zeel gol bacaagdiajg zagdxe, bén ma rignia' gusnuu chignia'man mazri, per bén ad rignia't, xt ta'n ni naladxaman rignia'man ad zignia'traman.

Xniaa Jesús con ree bijchaman

(Mt 12:46-50; Mr 3:31-35)

19 Xniaa Jesús con ree bijchaman bidxin reeman lod za'man, per ad gojct nibig reeman lojman guial dád zien bejn riga'.

20 Abi' yu' bén bagojn Jesús rëbaman:

—Laa xniaal con ree bijchil za' lule' guin rën reeman guinieenë reeman lüj.

21 Badxi' Jesús laan rëbaman:

—Bén rucaagdiajg ree xtiidx Dios rüjn tée reeman zi'c rënman, laa reeman naj da nan laa tée reeman naj da bichan.

Racwëez Jesús bidoxh

(Mt 8:23-27; Mr 4:35-41)

22 Tijb dxej guyu Jesús loj barcw con ree xbejnman, abi' rëbaman loj reeman:

—Yo' ree zatiblad ro' nijs guin.

Zianz zë reeman.

23 La'tgaj cadéd reeman loj nijs guin, goodyëjs Jesús. Dxel guzuloj cabi' bidoxh loj nijs guin, abi' cadxa nijs loj barcw guin, ma cazëëbci barcw guin xan nijs.

24 Dxel bacwëen reeman Jesús, rëb reeman:

—¡Mextr! ¡Mextr! ¡Ma cayzëëb ree xan nijs!

Abi' bixche Jesús gunabeeman bacwëez bidoxh guin në xtüjp nijs guin, zianz gulëjz reen dxel bayajcdxe.

25 Abi' rëbaman loj reeman:

—¿Conza xguialrliladxidi?

Per laa reeman dád bidxeb reeman badxa tée loj reeman, abi' canabdiidx loj lasa' reeman rëb reeman:

—¿Chu b́en guin zeel rniabeeman bi nē nijs, abi' ruzoob reen xtiidxaman?

Rayūjn Jesús tijb xin yu' xindxab luxdoo

(Mt. 8:28-34; Mr. 5:1-20)

²⁶ Dxel badxin Jesús con ree xbejnman xdajn ree b́en Gadara, ni riga' zatiblad ro' nijs Galilea.

²⁷ Chi barii Jesús loj barcw guin, bibig tijb xin luguiedx guin lojman. Ma gojc xchej da't yu' xindxab luxdoox. Ad rajcwt xabix, ad nabantix lēnū, ganaxzi ro' ree baa nabanx.

²⁸ Chi baguiaax Jesús bazuxibix lojman, guneex rejs rēbix:

—¿Xhie rēnl con naj, Jesús, Xi'n Dios yu' xanyabaa? Rniaaban lojl ad gusagzil naj.

²⁹ Rēbix zian guial ma canabee Jesús din yarii xindxab guin luxdoox. Ma gojc xchej naaz xindxab guin laax. Abi' ma guxhii ree bejn yaax nē guia'x con caden chitēē ban chex, per rutūguia'gajquix caden guin abi' rulaagdxa xindxab guin laax niz lod achut bejn zobj.

³⁰ Gunabdiidx Jesús lojx rēbaman:

—¿Chu la!

Badxi'xan rēbix:

—Legión lan.

Rēbix zian guial zien da't ree xindxab yu' luxdoox.

³¹ Rēb ree xindxab guin loj Jesús chitēē guixhiaalaman laa reex gabijl.

³² Dajn guin riga' zien ree cūch cayaw reeb. Zeel rēb ree xindxab guin lojman din gudēēman mod chu' reex lēn ree cūch guin, dxel cwējbaman.

³³ Zianz barii reex luxdoox bayu reex lēn ree cūch guin, abi' guzuloj cuxūūn reeb zianz bitidia' reeb ro' bala' xt loj nijs, lod gu' reeb nijs abi' gūjt reeb.

³⁴ Chi baguiaa ree b́en cayajp ree cūch guin ni goc, baxūūn reeman bicojn reeman bejn ree luguiedx nē ree dajn.

³⁵ Dxel wej reeman biquiaa reeman ni goc. Chi bidxin reeman lod za' Jesús, baguiaa reeman xin barii xindxab guin ree luxdoo, zobjix guia'man ma najcw xabix, ma badēdguienx abi' bidxeb reeman.

³⁶ Guiaad ree b́en baguiaa ni goc, be reeman diidx loj reeman xhienaag bayajquix.

³⁷ Graczi ree b́en zobj Gadara gunab loj Jesús din yazaman yagaj guial dád rdxeb reeman. Dxel bayē'paman loj tijb barcw, ziataman.

³⁸ Guiaad xin barii xindxab guin ree luxdoo rēbix lojman din chinalix laaman, per ad cwējbtaman, rēbaman lojx:

³⁹ —Baguiaj lidxil, biguiedx graczi ni been Dios por lūj.

Dxel ziax luguiedx guin abi' bex diidx loj gra ree bejn ni been Jesús por laax.

Rayajc xi'n Jairo nē b́engunaa bagaal xab Jesús

(Mt. 9:18-26; Mr. 5:21-43)

⁴⁰ Chi badxin Jesús zatiblad ro' nijs guin, dád rabaa gra ree b́en za' yagaj guial badxinman din mal cabēz reeman laaman.

⁴¹ Dxel bidxin b́en la Jairo, laaman rniabee lēn tijb xyadoo ree b́en Israel. Bazuxibaman loj Jesús, rēbaman lojman din cheman lidxaman,

⁴² guial yu' tijb xi'nman biin chiptio'p ijz, ma guiētczim. Chi zē Jesús dád zien ree bejn zinal laaman xt rixa't reeman laaman.

⁴³ Abi' tijb b́engunaa no'ch loj reeman, ma gojc chiptio'p ijz ragxuuman ryajbaman rejn. Ma banijtaman graczi ni rajpaman guial wejman loj ree doctor, per ni'qui tijbaman ad gojct nayūjn laaman.

⁴⁴ Bibigaman niz xijch Jesús abi' bagaalaman guia' xabaman. Loj hor ziigajc bayajcaman.

⁴⁵ Dxel gunabdiidx Jesús rëbaman:

—¿Chu baqui' naj?

Abi' graczi reeman rëb guial ad laat reeman baqui' laaman. Zianz rëb Bëd loj Jesús:

—Mextr, graczi ree bejn xt rixa't reeman lüj cucadxaa tëë reeman lüj, abi' rniabdiidxil chu baqui' lüj.

⁴⁶ Per rëb Jesús zatijb:

—Yu' chu baqui' naj din gogbeen yu' tijb bén ma bayajc con da gualrniabeen.

⁴⁷ Chi gogbee béngunaa guin guial ma gogbee gajc Jesús ni beenman, guidib rnijman bigzuxibaman loj Jesús. Dxel rëbaman lojman guidibloj ree bén guin chexc zeel baqui'man xabaman abi' loj hor guin gajc bayajcaman.

⁴⁸ Dxel rëb Jesús lojman:

—Xi'n, ma bayajquil guial bililadxil naj, baguiaj zagdx.

⁴⁹ Sta caneenë Jesús béngunaa guin, chi bidxin tijb bén guza lidx Jairo, bén rniabee lën xyadoo ree bén Israel, rëbaman loj Jairo:

—Mal güjt xi'nl, ad ruslenril Mextr guin.

⁵⁰ Per chi biguiejn Jesús zian, rëbaman loj Jairo:

—Ad rdxebil, bililadxzi, zayajcqui xi'nl.

⁵¹ Chi bidxin reeman lidxaman, ad cwëjbt Jesús niu ree ben ren, Bëdzi con Waj, con Jacob, con ree xdad xniaa bindo guin.

⁵² Graczi ree bén riga' yagaj cayoon, yu'naya tëë reeman por laam. Per rëb Jesús loj reeman:

—Ad roondi, ad güjttim, naga'yëjszim.

⁵³ Graczi reeman baze' laaman guial ma ragbee reeman güjtim.

⁵⁴ Dxel gunaaz Jesús yaam, guneeman rejs, rëbaman:

—Bindoo, bixche.

⁵⁵ Loj hor ziigajc babanm, bixchem. Dxel gunabee Jesús badëëd reeman ni gudawim.

⁵⁶ Dád badxa loj ree xdadim, per rëb Jesús loj reeman achu loj guiëb reeman ni goc.

9

Rxhiaal Jesús guidxiptio'p ree xbejnman chiglüü reeman xtiidx Dios (Mt. 10:5-15; Mr. 6:7-13)

¹ Gurejdx Jesús guidxiptio'p ree xbejnman, abi' badëëman gualrniabee loj reeman din yabëë reeman graloj xindxab luxdoo ree bejn yayüjn tëë reeman béragxuu ree.

² Guxhaalaman laa reeman chiglüü reeman xhienaag naj xgualrniabee Dios, yayüjn tëë reeman béragxuu ree.

³ Rëbaman:

—Ad chinëdi xhienin par runejz: ni'qui yagriadxidi, ni'qui guijxh, ni'qui gualraw, ni'qui milia, ni'qui stibnejz xabidi.

⁴ Chutëëz lidx guidxindi, tib gol baya'nzi xt chi yazadi luguiedx guin.

⁵ Bal yu' guiedx lod ad rënt reeman lëjt, gol baza yagaj, gol gudxiijp guxyuj guia'di zi'c tijb sen guial ad rënt reeman guzoob reeman xtiidx Dios.

⁶ Dxel brii reeman zë reeman tijbgaj guiedx zigtie'ch reeman xtiidxza'c Dios, rayüjn tëë reeman béragxuu ree.

*Riguiejn Herodes ni cayüjn Jesús**(Mt. 14:1-12; Mr. 6:14-29)*

⁷ Chi gogbee rey Herodes graczi ni cayüjn Jesús. Guyunawëëgaman guial yu' ree bejn rëb, Waj bën baroobnijs bejn ree ma baban,

⁸ yu' tää reeman rëb Eliásan bën badëë xtiidx Dios loj ree bejn ma balüüloj, yu'za reeman rëb, tijb ree bën badëë xtiidx Dios loj ree bejn gocli ma baban.

⁹ Per rëb Herodes:

—Naj gajc gunabee biru' yëjn Waj. ¿Chuzá bënan riguiejnan ruza't ree bejn xcwent ni cayüjnman?

Zianan zeel rüjn Herodes naguiejn guguaaman Jesús.

*Ruyaán Jesús gaay mil bejn**(Mt. 14:13-21; Mr. 6:30-44; Jn. 6 :1-14)*

¹⁰ Chi badxin ree xi apóstoles Jesús, be reeman graczi ni biguieen reeman. Dxel binëman laa reeman lod achutczí bejn zobj, gajxh guiedx Betsaida.

¹¹ Per chi gogbee ree bejn, dxel zinal reeman laaman lod zëman. Abi' balüüman laa reeman xcwent xguialrniabee Dios bayüjn tääman bënragxuu ree.

¹² Chi ma cadxe, bibig guidxiptio'p ree apóstoles lojman rëb reeman:

—Güjdx loj gra ree bën guin ñin yaguiaj reeman chitiil lod yaya'n reeman luguedx doo ree në ree ranch, chitiil tää ni gaw reeman ñin lod nadxu' ree achetczí yu'.

¹³ Dxel rëbaman loj reeman:

—Lëjt gajc gol badëëd ni gaw reeman.

Abi' rëb reeman:

—Per gaayzi guiadxtil naca'n con zatio'p bëjl, bajtëë bal yo'n yusiin ni gaw gra reeman.

¹⁴ Abi' cost gaay mil ree xinguaaw riga' yagaj. Per rëb Jesús loj ree xbejnman:

—Gol güjdx loj reeman ñin cwe tü'pchii gaj reeman.

¹⁵ Abi' bagojn reeman laa reeman persi gurej gra reeman zian.

¹⁶ Dxel cwa'man guigaay guiadxtil guin con zatio'p bëjl guin. Gules lojman xanyabaa, badëëman quixtëë loj Dios, zianz gula'man laa reen badëëman loj ree xbejnman ñin qui's reeman laan loj ree bën guin.

¹⁷ Graczi reeman gudaw xt bigdxinladx reeman. Abi' bato'p reeman chiptio'p dxüm nilaay baya'n.

*Rëb Bëd guial Jesús naj Cristo**(Mt. 16:13-19; Mr. 8:27-29)*

¹⁸ Tijb dxej cabejdx canab Jesús Dios, za'në ganaxzi ree xbejnman. Gunabdiidxaman loj reeman, rëbaman:

—¿Chu rëb ree bejn najn?

¹⁹ Badxi' reeman laan rëb reeman:

—Yu' reeman rëb lüj naj Waj bën baroobnijs bejn ree, yu'za reeman rëb lüj naj Eliás bën badëë xtiidx Dios loj ree bejn, yu' tää reeman rëb lüj naj tijb ree bën badëë xtiidx Dios loj ree bejn gocli, bën ma baban.

²⁰ Dxel gunabdiidx Jesús zatijb, rëbaman:

—Laadx lëjt, ¿xhie nadi chu najn?

Badxi' Bëdan rëbaman:

—Lüj naj Cristo. Lüj naj Xi'n Dios.

*Rugojn Jesús guiëtaman**(Mt. 16:20-28; Mr. 8:30-9:1)*

21 Rëb Jesús loj reeman achuczzi loj guiëb reeman zian,

22 rëb tëëman:

—Rayal sagdiaj Bén guxhaal Dios: ad zënt ree guxtis Israel laaman, ni'qui ree bixhioz rniabee ree bixhioz, ni'qui ree mextr rajc ley. Gugüjt reeman laaman, per ni yayon dxej yabanman.

23 Dxel rëbaman loj gra reeman:

—Bal chu rën gac da bejnan ad rayalt güünman zi'c naj xixgabaman, siibnejzaman guialzi ni tëdzaman guixie guixie abi' guidnalaman naj.

24 Din bén mazri rën guialnaban ni rajpaman loj guidxliuj guie, zadxin dxej gusëëbaman laan, per bén guiët por naj, zajpaman guialnaban tiblyaa con Dios.

25 ¿Xhie gan güün bejn gapaman gra ni yu' loj guidxliuj abi' nitaman loj Dios?

26 Bal chu ratu guza't naj në da diidxan, ziangajc naj najn Bén guxhaal Dios, yatun'ë'n laaman chi guialan con da guialrniabeen loj xbiani da Dadan nètëë loj xbiani ree xianjlaman.

27 Per diidxciczi rnin lojdi, yu' ree bén za' guie ad zëjtt xt guguaa reeman xguialrniabee Dios.

Bidxaa Jesús loj choon ree xbejman

(Mt. 17:1-8; Mr. 9:2-8)

28 Chi gudëd cost xhujn dxej ni gunee Jesús diidx guin ree, wejman persi gurejdx gunabaman Dios tijb guijc guia', binëman Bëd con Waj con Jacob.

29 La'tgaj cabejdx canabaman Dios, bidxaa lojman guiáad xabaman gojcan naquichbéj bidiin tëën bacha'.

30 Dxejczy gulentie tio'p ree bejn, caneenë reeman laaman. Tijbaman naj Moisejs zatijbaman naj Elías.

31 Yu' reeman galay biani cayü reeman diidx guial guiët Jesús Jerusalén.

32 Majsi yu' bacaal loj Bëd në loj ree xcompniaraman, batie'ch xbaacaal reeman persi baguaa reeman xbiani Jesús con zatío'p ree bén za'nëman.

33 Chi ma baza ree bén caneenë Jesús, rëb Bëd lojman:

—Mextr, jzagdxen nadxu' ree guie! Zajc yaguieenan choon ranch, tijban par lüj, tijban par Moisejs zatijban par Elías.

Per ad ragbeet Bëd xhienin caneeman.

34 La'tgaj caneeman zian, biguiajt tijb zaj xt guijc reeman, chi ma yu' reeman lën zaj guin dád bidxeb reeman.

35 Dxel loj zaj guin biguien cha' bejn, rëbaman:

—Bén guie naj da Xi'nan bén rën da'tan. Gol bacaagdiajg xtiidxaman.

36 Chi gulox biguien cha'man loj zaj guin, baguaa reeman xtijbzi Jesús za'man. Abi' ad gutie'cht reeman diidx. Lën ree dxej zii achutczzi loj rëb reeman ni baguaa reeman.

Rayüjn Jesús tijb xin yu' xindxab luxdoo

(Mt. 17:14-21; Mr. 9:14-29)

37 Bareguiaal, chi baguiajt reeman guijc guia' guin, dád benzien brii bigchaagloj Jesús.

38 Abi' tijb bén no'ch loj reeman guridxa', rëbaman lojman:

—jMextr!, been wen baguaa da xi'nan din tijbzi laax ra'pan.

39 Tijb xindxab ru luxdoox abi' rucwixdiajx laax, rugüjtya'x laax rbëë tëëx bichijn ro'x. Dád rusagdiajx laax ad rëntix guslaax laax.

40 Ma gunaaban loj ree xbejnl din nabëë reeman xindxab guin, per ad gojct reeman.

41 Badxi' Jesús laan rëbaman:

—Jenguijdx, bën ad rliladxt! ¿Xt goc gazunë'n lëjt gadaan tëën lëjt? Tanë xi'nl guie.

42 Chi cabig xin guin basajb xindxab guin laax luyuj, bagüjtya'x laax zatijb. Per gunabee Jesús barii xindxab guin, bayünman laax dxel bayüman laax loj dxadix.

43 Graczi reeman badxaloj guialrniabee ni rajp Dios.

Rugojn Jesús zatijb guial guiëtaman
(Mt. 17:22-23; Mr. 9:30-32)

La'tgaj caydxa loj reeman ni cayün Jesús, rëbaman loj ree xbejnman:

44—Gol bacaagdiajgchaaw ni ganin lëjt: yayü reeman Bén guxhaal Dios loj ree bejn.

45 Per laa reeman ad bignia't reeman ni rnieeman guial ad badëëtaman mod nignia' reeman, abi' bidxeb reeman niniabdiidx reeman lojman xhie rën guieëb ni rëbaman.

¿Chu mazri zobjloj?
(Mt. 18:1-5; Mr. 9:33-37)

46 Dxel guzuloj ree xbejnman rëb loj lasa' reeman chu loj gra reeman mazri zobjloj.

47 Per gogbee Jesús xgab ni cayün reeman abi' cwa'man tijb xindoo, bazujman laax cwë'man,

48 dxel rëbaman loj reeman:

—Bén ridxga' tijb xindoo por naj, najn ridxga'man, guiáad Bén ridxga' naj, Bén guxhaal najn ridxga'man. Din Bén rünj sirv lojdi, laaman mazri zobjloj lojdi.

Bén ad za't contr dunuj ree za'man con dunuj ree
(Mr. 9:38-40)

49 Rëb Waj loj Jesús:

—Mextr, baguiaan tijb bejn rabëëman xindxab luxdoo ree bejn por xguialrniabeel. Per badxoonan guial ad najtaman dux bejn ree.

50 Per rëb Jesús lojman:

—Ad rudxoondi, din Bén ad za't contr dunuj ree, za'man con dunuj ree.

Gudilë Jesús Jacob con Waj

51 Chi ma cadxin dxej yayë'p Jesús xanyabaa, dxel beenman xgab guial rünj naguejn cheman Jerusalén.

52 Guxhaalaman Bén guned ree, wej reeman tijb guiedxdo nulen Samaria bitiil reeman lod yaya'n reeman.

53 Per ad cwëjbt ree Bén Samaria guin nudëëd reeman lod naya'nman guial gogbee reeman cheman Jerusalén.

54 Chi baguiaa Waj con Jacob zian, rëb reeman lojman:

—Dad, ¿rënl ya yanabeen guiat bajl xanyabaa din gunijtan Bén guin ree zi'c been Elías Bén badëë xtiidx Dios loj ree bejn?

55 Dxel badxi' loj Jesús loj reeman, abi' gudilëman laa reeman rëbaman:

—¿Nid ragbeedi ya guial loj xindxab zëëd ni rnieedi?

56 Naj, Bén guxhaal Dios, ad zialtan din gunijtan xguialnaban bejn loj Dios, zialan din yabën laa reeman loj dol.

Dxel zë reeman zatijb guiedx.

Bén rën chinal Jesús
(Mt. 8:19-22)

⁵⁷ Chi zë reeman lunejz, tijb bejn rëb loj Jesús:

—Dad, rënan guidaalan lüj bantëez guin chel.

⁵⁸ Badxi' Jesús laan rëbaman:

—Cuyojt ree yu' xguiajbiliaa reeb guíaad ree biguijn yu' xguixbitia's reeb. Per Bén guxhaal Dios ni'qui lod quixh guijcaman ad yu't.

⁵⁹ Rëb Jesús loj ben ren:

—Tanal naj.

Per badxi'man laan rëbaman:

—Dad, banee mod gabenè' da Dadan xt chi guiëtaman.

⁶⁰ Abi' rëb Jesús lojman:

—Basa'n xdadil con ree bén ad rënt guidnal naj, laa reeman guquie'ch laaman. Sa'n lüj bigtie'ch diidx xhienaag naj xguialrniabee Dios.

⁶¹ Dxel rëb zatijb bén guin:

—Dad, rënan guidaalan lüj, per yalojxgaj banee mod chigzadiidxnè' ree da familan.

⁶² Per rëb Jesús:

—Bén guiniaaz guia' garad abi' gudxi' lojman niz xijchaman, ad zile't guilia'man yuj zagdx. Ziangajc bén rën guidnal naj, bal id zusa'nman graczi tiblad ad zile't chu'man loj xguialrniabee Dios.

10

Rxhial Jesús gayojnchii bejn

¹ Chi gudéd gojc ree ni guin, gulej Dad Jesús gayojnchii bejn, abi' guxhaalaman tio'p gaj reeman luguiedx ree në ree ranch din ned reeman che gaj reeman lod naj cheman.

² Rëbaman loj reeman:

—Diidxliczi, zien bejn rën gucaagdiajg xtiidx Dios, per ad zient bén gulüü laa reeman yu'. Zeel gol gurejdx gunab Dios din guixhiaalaman mazri zien bén gulüü laa reeman.

³ Gol chej, naj rxhial lëjt zi'c rej ree xiil galay ree cuyojt.

⁴ Ad chinédi guijxh, ni'qui milia, ni'qui zatib nejz xgurëchidi, ad sudxedi guinieenédi bejn ree runejz.

⁵ Bantëez lënü chu'di, yalojxgaj gol güjdx: “Dios yabe'cdxe luxdoodi.”

⁶ Abi' bal lënüzii yu' ree bén rayal guialnaza'c guin, zaya'nan yagaj. Guiáad bal id rayal reeman laan zayejcan con lëjt.

⁷ Yagaj gol baya'n, gol gudaw, gol gu' ni gunee reeman. Din bén rüjn dxiin rayal gaxaman. Yagajzi gol baya'n ad bal yaya'ndi lood ren.

⁸ Chi guidxindi tijb guiedx lod yaca' reeman lëjt, gol gudaw ni gunee reeman.

⁹ Gol bayüjn ree bénragxuu yu' ree luguiedx guin, gol güjdx tëë loj reeman: “Ma zëëd xguialrniabee Dios gajxh par lëjt.”

¹⁰ Per bal guidxindi tijb guiedx lod ad rënt reeman yaca' reeman lëjt, gol brii lunejz, gol güjdx loj reeman:

¹¹ “Xt xgoxyuj ladxidi ni cwa du guia'n, radxijpan zi'c tijb sen guial ad bidxga'tidi dux tiidxan. Per gol gogbee, guial ma zëëd xguialrniabee Dios gajxh par lëjt.”

¹² Naj rni lëjt guial dxej yadëëd ree bejn cwent loj Dios, mazri casti narooob yalay reeman guial loj ree bén gure guiedx Sodoma.

*Bén ad bazoobt ree xtiidx Dios
(Mt. 11:20-24)*

13 Rëb tëë Jesús:

—¡Probza lëjt bën Corazín! ¡Probza lëjt bën Betsaida! Din bal guiedx Tiro në guiedx Sidón niajc gra ree milagr ni goc ladxidi, diizd gocli nayüjn reeman xgab por xtol reeman, niajcw reeman lajd ya's nuroob tëë cobdëj guijc reeman zi'c tijb sen guial ma bayüjn reeman xgab por xtol reeman.

14 Per rnin lojdi guial dxej yadëed ree bejn cwent loj Dios, mazri casti narooob yayalidi guial loj ree bën Tiro në ree bën Sidón.

15 Guiáad lëjt, bën Capernaum, ad naladxidi yayalidi xanyabaa, lëjt yayal gabijl.

16 Dxel rëb Jesús loj ree xbejnman:

—Bën ridxga' lëjt, najn ridxga'man, per bën ad ridxga't lëjt, najn ad ridxga'taman. Guiáad bën ad ridxga't naj, bën guxhaal najn ad ridxga'taman.

Badxin ree bën gayojnchii guxhaal Jesús

17 Chi badxin ree bën gayojnchii guxhaal Jesús, dád rabaá reeman rëb reeman lojman:

—Dad, xt ree xindxab ruzoob dux tiidxan chi raza'tan lajl.

18 Abi' rëb Jesús loj reeman:

—Waliquidí, naj baguia, zi'czi rë'p nijs basëeb xguialrniabee xindxab.

19 Naj banee lëjt guialrniabee din gulëedi guijc ree bëel në guijc ree nixüb, në par güündi gan loj xguialrniabee xindxab sin guial güünx lëjt xhienin.

20 Per ad rabaadi guial ruzoob ree xindxab guin xtiidxidi, gol babaa guial ca lajdi loj libr yu' xanyabaa.

Rabaa Jesús

(Mt. 11:25-27; 13:16-17)

21 Loj hor ziigajc babaa da't Jesús por xSprijt Dios, abi' rëbaman:

—Ruzatan lüj zagdxé, Dad, lüj rniabee xanyabaa në loj guidxliuj, din ni baquie'chil loj ree bën rajc në loj ree bën rignia', laan ma balüül loj ree bën ad rajcza't. Zian gojcan Dad, din zian guyën.

22 'Da Dadan banee gra lon. Abi' achut nünbee Jesucrist Xi'n Dios, tijbzi Dios, achu tëët nünbee Dios, tijbzi Jesucrist xi'nman con ree bën rënman güünbee Dios.

23 Dxel baguiaaman loj ree xbejnman, abi' rëbaman lojzi reeman:

—Xiquilbaa ree bën guguaa ni cuguaadi.

24 Din naj rni lojdi, zien ree bën badëë xtiidx Dios loj ree bejn në ree rey guyën nuguaa ni cuguaadi, per ad baguiaat reeman laan. Guyën reeman nucaagdiajg reeman ni cucaagdiajguidi, per ad bacaagdiajgt reeman laan.

Xcwent tijb bën Samaria

25 Tijb mextr rajc ley guzuliman guneenëman Jesús. Abi' din güünman laaman prueb, gunabdiidxaman lojman rëbaman:

—Mextr, ¿xhie rayal günan din ga'pan guialnaban tiblyaa con Dios?

26 Badxi' Jesús laan rëbaman:

—¿Xhie ca loj ley badëë Dios loj Moisejs? ¿Xhienaag rignia'lan?

27 Abi' rëb mextr guin:

—“Guyën xDadil Dios guidib guijc guidib ladxil guyën tëë ben ren zi'c rën lüj gajc.”

28 Badxi' Jesús laan, rëbaman:

—Zagdxequi badxi'lan. Bal güünl zian zajpil guialnaban tiblyaa con Dios.

29 Per guyën mextr guin naya'nman zagdxé, gunabdiidxaman loj Jesús, rëbaman:

—¿Chu bénan guiënan zi'c rën naj gajc?

³⁰ Dxel be Jesús tijb cwent lojman, rëbaman:

—Tijb bén Israel briiman Jerusalén zëman guiedx Jericó. Abi' gunaaz ree xingubaan laaman, gudijn reex laaman gulan tëë reex gra ni ca'man xt në xabaman, basa'n reex laaman ma güjtczaman.

³¹ Dxel gudëd tijb bixhioz niz yagaj, per chi baguiaaman bén guin, zijt bicaaman volt, zëtaman.

³² Në tijb bén Levita bén rüjn yudar bixhioz ree, gudëd niz yagaj, chi baguiaaman bén guin, zijt bicaaman volt, zëtaman.

³³ Per tijb bén Samaria gudëd niz yagaj, chi baguiaaman bén guin, bayaman laaman,

³⁴ dxel gubigaman lod naga'man, badxe'man sejt con vin lod nadxeel-guijdxaman dxel guxhiiman laan con lajd. Zianz badxiibaman laaman xburaman binëman laaman lënü lod raya'n ree bejn. Yagaj gunajman laaman.

³⁵ Chi bareguiaal, chi ma yaguiaj bén Samaria guin, gulëëman milia xieen tio'p dxej dxiin badëëman laan loj bén naj lidxan, rëbaman lojman: “Gunaj bén guie, bal gunijtil mazri, naj yaguix laan chi yaye'can.”

³⁶ Dxel rëb Jesús loj mextr guin:

—Yan, loj guiyon ree bén guin, ¿chu bénan guyën bén gudin ree xingubaan guin?

³⁷ Badxi' mextr guinan rëbaman:

—Bén baya laaman.

Dxel rëb Jesús lojman:

—Baguiaj, been ziangajc con ben ren.

Rignaj Jesús Mart në Li

³⁸ Basnuu Jesús zëman abi' bidxinman tijb guiedxdoo, yagaj wejman lidx tijb biin la Mart.

³⁹ Yu' tijb xbëlim lam Li. Gurej Li guin guia' Jesús cucaagdiajguim ni caneeman.

⁴⁰ Per Mart guin mazri ruquiejnne gra xmandadim, abi' bibiguim loj Jesús rëbim:

—Dad, ¿nid rul xgab ya guial rusa'n da bëlan naj con gra mandad guin? Güjdx lojm din güünm naj yudar.

⁴¹ Badxi' Jesús laan rëbaman:

—Mart, Mart, dád rul xgab guial yu' da't xmandadil.

⁴² Per tijbzi ni mazri zojbloj yu'. Li gulejm ni mazri zojbloj, abi' achut zajc chiquiedan lojm.

11

Ruliüü Jesús xhienaaq cwedx guiniab bejn Dios

(Mt. 6:9-15; 7:7-11)

¹ Tijb dxej cabejdx canab Jesús Dios. Abi' chi gulox gurejdx gunabaman Dios, rëb tijb xbejnman lojman:

—Dad, balüü dunujn yarejdx yanaaban Dios, zi'c balüü ree xbejn Waj bén baroobnijs bejn ree.

² Abi' rëb Jesús loj reeman:

—Chi cwedx guiniabidi Dios, gol güjdx:

Dad, lüj yu' xanyabaa,

rayal yaya'p da'tan lajl respejt.

Gac zi'c rniabeel.

Gac zi'c rēnl loj guidxliuj, zi'c rajc xanyabaa.

³ Bazaladx ni yadaawan guixie guixie.

⁴ Been dunujn perdon gra ree ni mal ma baguieenan, zi'c raguieenan perdon bēn rūjn ree dunujn ni mal.

Ad tiēbil gūn xindxab dunujn gan yaguieenan dol, babēē dunujn loj gra ni mal.

⁵ Abi' rēb Jesús loj reeman:

—Yaguie'ch ree, tijb lējt yu' xmiw abi' garol guiaal chedi lidix, guiēbidi: “Miw, baneesii choon guiadxtil gagui'nan,

⁶ din bi't tijb da miwan abi' achet ra'pan gudēdan lojx.”

⁷ Dxel nax diizd lēnū guin: “Ad ruslenl naj. Ma nayaaw ro' da portan. Ma naga'yē'snē' ree da xi'nan. Ad zile't chixchex gunen laa reen.”

⁸ Per rnin lējt, majsi bal id zixchex din guneex ni ryaadxidi guial rajc xmiwidi laax. Per zūjnx nagueijn chixchex din guneex ni ryaadxidi chitēē guslenridi laax.

⁹ Zeel rnin lējt: Gol gunab loj Dios, laaman guneex ni rniabidi. Gol baguuilaman, zadxejlidi laaman. Gol gurejdx gunabaman, zidxga'man lējt.

¹⁰ Din bēn rniab, zaca'man. Abi' bēn rguuil, zadxejlaman guiāad bēn rbejdx rniab laaman zidxga'man laaman.

¹¹ 'Lējt najdi dad, wen zudēēdi tijb guiaj loj xi'ndi ya chi guiniabix guiadxtil?, ζo zudēēdi tijb bēēl ya chi guiniabix bējl?

¹² ζo zudēēdi nixūb ya chi guiniabix dxijt?

¹³ Nacli lējt najdi bēndol rajc rudēēdi ni zagdxe loj xi'ndi. ¡Diidxgui xDadidi bēn yu' xanyabaa, nid zudēē xSprijtaman loj ree bēn rniab laaman ya!

*Rēb ree bejn ca' Jesús xguialrniabee Beelzebú
(Mt. 12:22-30; Mr. 3:19-27)*

¹⁴ Caybēē Jesús tijb xindxab basa'n tijb bejn gop. Abi' chi barii xindxab guin guzuloj canee bēn guin. Dxel dád badxaloj ree bejn.

¹⁵ Per yu' reeman rēb:

—Bēn guin rabēē xindxab luxdoo ree bejn por xguialrniabee Beelzebú, xin rniabee ree xindxab.

¹⁶ Yu'za reeman par gūn reeman laaman prueb, rēb reeman lojman din gūnman milagr zēēd xanyabaa.

¹⁷ Per Jesús ragbee gajcaman xgab cayūjn reeman, abi' rēbaman:

—Gra nacion bal id nadxag riga' bejn por wadijl, rlia' lasa' reeman, ziangajc tijb famil bal id nadxag riga' reeman por wadijl, rlia' lasa' reeman.

¹⁸ Ziangajc bal Satanás xin rniabee ree xindxab su contr lasa' xindxab gajquix, nayob nit xguialrniabeex. Canin zian guial rēbidi por xguialrniabee Beelzebú rabēn xindxab luxdoo ree bejn.

¹⁹ Per bal rabēn xindxab luxdoo ree bejn por xguialrniabee Beelzebú, ζchuzar rudēēd guialrniabee loj ree xbejnidi din yabēē reeman xindxab? Zeel laagajc reeman rulūu guial ad laat rnieedi.

²⁰ Per por xguialrniabee Dios rabēn xindxab luxdoo ree bejn, laan rēn guiēb guial ma za'nē xguialrniabee Dios lējt.

²¹ 'Bal tijb bēngojl da't ca' xguuibaman, rajp lidxaman. Ad zajct cwan bejn ni rajpaman.

²² Per bal guidxin bēn mazri gojl guial lojman gūnman laaman gan abi' chisūdaman guib ni ca'man tia' tēēman gra ni rajpaman.

²³ 'Bēn ad za't con naj, za'man contr naj, guiāad bēn ad ruto'pt bejn par naj rtie'chaman laa reeman.

*Xinxab rayejc**(Mt. 12:43-45)*

²⁴ 'Chi rarii tijb xinxab luxdoo tijb bejn, abi' rza xinxab guin niz loj ujbixd rguiilix lod yaziiladxix. Chi ad rdxejlt lod yaziiladxix, dxel rüjnx xgab naladxix: "Zagdxeli yaye'can lod bariin."

²⁵ Abi' chi rayejquix ruguiaax luxdoo bén guin, najn zi'c tijb lénü lod biliob lod najcchaaw tée.

²⁶ Dxel rica'x zagajdx ree xinxab naj mazri xinmal guial lojx. Abi' ru gra reex luxdoo bén guin. Dxel piorli raya'nman guial zi'c gocaman yaloj.

Xiquilbaa ree bén ruzoob xtiidx Dios

²⁷ La'tgaj canee Jesús diidx guin ree, gurixdiaj tijb béngunaa no'ch loj ree benzien guin, rëbaman:

—iXiquilbaa béngunaa bazuj lüj loj guidxliuj, bén baslaa tée lüj!

²⁸ Per badxi' Jesús laan rëbaman:

—iMazri xiquilbaa ree bén rucaagdiajg xtiidx Dios ruzoob tée reeman xtiidxaman!

*Rniab ree bejn güün Jesús tijb milagr**(Mt. 12:38-42; Mr. 8:12)*

²⁹ Zi'cri cado'p ree bejn lod za' Jesús, abi' guzuloj rëbaman loj reeman:

—Bén riga' ree loj guidxliuj yan, naj reeman benmal. Abi' rniab reeman tijb milagr, per achet guguaa reeman, tijbzi zi'c guzax Jonás bén badëë xtiidx Dios loj ree bejn.

³⁰ Zi'c goc Jonás tijb sen par ree bén gure guiedx Nínive, ziangajc Bén guxhaal Dios najman tijb sen par ree bén naban yan.

³¹ Abi' bén goc reina guiedx Sabá, zabanman chi yadëed ree bejn cwent loj Dios dxel guiëbaman guial ree bén riga' yan, yayal reeman xcasti Dios. Din laaman dád zijt guzaman bicaagdiajgaman xguialrajc rey Salomón. Abi' yan, naj za'në'n lëjt, mazri lasajcan guial loj rey Salomón.

³² Ziangajc ree bén guban guiedx Nínive, zaban reeman chi yadëed ree bejn cwent loj Dios abi' guiëb reeman guial ree bén riga' yan, yayal reeman xcasti Dios. Din bén Nínive ree bayejc reeman loj Dios chi bacaagdiajg reeman xtiidxaman ni gunee Jonás. Abi' yan, naj za'në'n lëjt mazri lasajcan guial loj Jonás.

*Guiaaloy bejn naj zi'c biani**(Mt. 5:15; 6:22-23)*

³³ 'Achut rucaaguij tijb guij par sun lod naguie'ch, achu tée ruta'cw laan lën tijb yagalm. Rayal sun lod guiguienan din gusnin loj bén chu' lénü.

³⁴ Guiaaloy bejn naj zi'c tijb biani par xcuerpaman. Bal por ni ruguiaal rüjnl ni zagdx, guidib xcuerpil naj biani. Per bal por ni ruguiaal rüjnl ni mal, guidib xcuerpil naj zi'c lod nacay.

³⁵ Gojp cudad chitëë chinë guiaalojl lüj loj nejz mal luar loj nejz zagdx.

³⁶ Abi' bal ni'qui tibda'n xcuerpil ad rüjnt ni mal, guidibczan gac nayni zi'c chi rusni guij con xbacha'n.

*Ni rüjn ree mextr rajc ley në ree bénfarisew**(Mt. 23:1-36; Mr. 12:38-40; Lc. 20:45-47)*

³⁷ Chi gulox guneenë Jesús laa reeman, tijb bénfarisew rëb loj Jesús din chitaw Jesús lidxaman. Chi guyuman, zianz gurejman xan mex.

³⁸ Abi' bénfarisew guin badxalojman chi baguiaaman ad banaat Jesús chi ma gawaman zi'c naj xcostumbr reeman.

³⁹ Per rëbaman loj reeman:

—Najdi zi'c tijb vajs con pliajt ni naya xijch, rguiendi benza'c, per luxdoodi yu' da't guialgubaan në ni mal.

⁴⁰ ¡Bennad! ¿Nid bën been gajc xcuerpidi been luxdoodi ya?

⁴¹ Zeel gol been yudar bën achet rajp din guiguien guial najquidi benza'c.

⁴² ¡Probza lëjt bënfarisew! Rbëëcadi ni naj por Dios, rjündi chi lala' ni rajpidi zi'c bidxtil në rud në graloj ni rxübindi abi' rudëedi tijban loj Dios. Per ad rjüntidi zi'c rayal ad rën tëëtidi Dios. Gol bidxga' Dios ad gucweéz tëë gudëedi ni rudëedi lojman.

⁴³ ¡Probza lëjt, bënfarisew! guial ruladxidi cwedi lod rbej ree bën zojbloj lën ree yadoo, ruladx tëedi gugajpdioz ree bejn lëjt zagdxë niz lunejz.

⁴⁴ ¡Probza lëjt, mextr rajc ley në lëjt bënfarisew, bën rusquiee!, din najdi zi'c baa ni ad rguient, abi' ad ragbeet ree bejn rë'p reeman guijcan.

⁴⁵ Dxel gunee tijb mextr rajc ley, rëbaman loj Jesús:

—Mextr, në dunujn caneeguijdxil guial rëbil zian.

⁴⁶ Badxi' Jesús laan rëbaman:

—¡Ziangajc lëjt mextr rajc ley, probza lëjt!, guial rniabeedi bejn ree güün reeman ni nawëëgda't abi' rniabeezidi güün bejn zian guiáad lëjt ni'qui ta'n ad rjüntidi laa reeman yudar din güün reeman zi'c rëndi.

⁴⁷ ¡Probza lëjt!, guial rjünchaawidi xbaa ree bën badëë xtiidx Dios loj ree bejn, bën bagüjt gajc ree xbéngulalidi.

⁴⁸ Zian ragbee ree bejn guial ruladxidi ni been ree xbéngulalidi. Laa reeman bagüjt ree bën badëë ree xtiidx Dios loj ree bejn, guiáad lëjt rayüjnchaawidi xbaa reeman.

⁴⁹ Zeel Dios guial ragbeeman gra ni gac, rëbaman: “Gaxhalan bën rudëë ree xtiidx Dios loj ree bejn, në ree apóstoles, yu' reeman gugüjtidi yu' tëë reeman sunalidi din güündi laa reeman xhienin.”

⁵⁰ Abi' bën naban ree yan, laa reeman yadëed cwent loj Dios por rejn ni guxhie' ree bën badëë xtiidx Dios loj ree bejn, bën güt ree diizd chi go'tchaaw guidxliuj,

⁵¹ diizd xrejn Abel xt xrejn Zacarías bën bagüjt reeman ro' yadooro' Jerusalén. Zeel rnin lëjt guial ree bën naban yan, laa reeman quix por gra reeman.

⁵² ¡Probza lëjt, mextr rajc ley!, guial ad rtiëjbtidi chu' ree bejn loj xnejz Dios, ni'quiza lëjt ad rjünt nagueijn chu'di loj xnejz Dios abi' rudxoondi chu' ree bejn loj xnejzaman.

⁵³ Chi gunee Jesús zian, dád bidxe'ch ree bënfarisew guin në ree mextr rajc ley. Abi' guzuloj zien ree ni rniabdiidx reeman lojman,

⁵⁴ din guidoon xhie guiëbaman din chile' gutedia' reeman laaman.

12

Xlevadur ree bënfarisew

¹ La'tgaj canee Jesús zian, guzuloj cado'p por mil bejn, abi' guial zien da't reeman xt rxa't lasa' reeman. Dxel guzuloj Jesús rëbaman yaloj loj ree xbejnman:

—Gol gojp cudad con xlevadur ree bënfarisew, rën guiëban gapidi cudad con ni rusquiee reeman.

² Din achet ni naguei'ch yu' ni ad zaguiënt, ad yu' tëët ni ralan ni ad zagbeet bejn.

³ Zeel gra diidx ni ma guneedi lod nacay, zaguiejn ree bejn laan lod nayni. Guiáad ree diidx ni ma guneedi ralan lénü, yu' chi cwidxa' reeman guiniee reeman diidx guin ree diidx guijc ree yu.

Chu rayal guidxeb bejn

(Mt. 10:28-31)

⁴ 'Rnin lëjt, ad ridxebidi bën rën ree gugüjt lëjt din zile' gugüjt reeman xcuerpidi, sa'n xsprijtidi ad zile't gugaal reeman laan.

⁵ Ganin lëjt chu rayal guidxebidi: gol bidxeb Dios bën rajp guialrniabee guial chi ma biquiedaman xguialnabandi zajc guzaalaman lëjt gabijl. Zeel gol bidxebaman.

⁶ 'Lëjt ragbee guial biguijndoo ree ad lasajc reeb wayëjx, per Dios ad rayanladxtaman ni'qui tijb reeb.

⁷ Guiáad lëjt xt guidxguijquidi, graczan nayab loj Dios. Zeel ad rdxebidi din mazri lasajquidi guial loj zien da't ree biguijndoo.

Bën rëb loj ree bejn guial najman xbejn Jesucrist

(Mt. 10:32-33; 12:32; 10:19-20)

⁸ 'Rnin lëjt, chutëez bën guiëb loj ree bejn guial najman da bejnan, ziangajc naj najn Bën guxhaal Dios guiën loj ree xianjl Dios guial da bejnan najman.

⁹ Per bën guiëb loj ree bejn guial ad najtaman da bejnan, ziangajc guiën loj ree xianjl Dios guial ad najtaman da bejnan.

¹⁰ 'Chutëez bën guinieeguijdx Bën guxhaal Dios zajcaman perdon, sa'n bën guinieeguijdx xSprijt Dios, ad zajctaman perdon.

¹¹ 'Chi chinë reeman lëjt lën ree yadoo o loj ree juejs në loj ree guxtis, ad aal chu'di xgab xhienaag yadxi'di xtiidx reeman.

¹² Din chi guidxin hor ni guinieedi, xSprijt Dios guneë diidx guinieedi.

Xcwent tijb xinrijcw

¹³ Tijb bën no'ch loj ree benzien guin rëb loj Jesús:

—Mextr; güjdx loj da bichan din guneex ni rayalan.

¹⁴ Per rëb Jesús lojx:

—¿Chu bazuj naj günan guialguxtis o gagui'san ni tia'di?

¹⁵ Rëb tëëman loj reeman:

—Gol gojp cudad; ad sëëbladixidi gapidi ni rajp ree ben ren, din ad ni rajpt bejn runee guialnaban.

¹⁶ Dxel beman tijb cwent loj reeman, rëbaman:

—Guyu tijb xinrijcw, dád gojc xguiniaax.

¹⁷ Dxel beenx xgab naladxix: “¿Xhienaag günan? Ad ra'ptan lod gagu'chaawan guialnaza'c guin ree.”

¹⁸ Abi' gunaladxix: “Ma ragbeen xhienaag günan. Guse'nan yu lod rgu'chaawan da guialnaza'can din günan mazri yu naroob ree lod gagu'chaawan laa reen, në graczi ni ra'pan.

¹⁹ Dxel guiën, dád zien guialnaza'c ra'pan par zien ijz, yaziiladxan, gawan, guië'n yabaa tëën.”

²⁰ Per rëb Dios lojx: “Xin tont, yanguxhin gajc guiëtil, laadx ni nagu'chaawil, ¿chu yaya'nnë laan?”

²¹ Zian rzajc bën rgu'chaaw ni za'c par laagajcaman, per loj Dios achet rajpaman.

Achetdzi rayal chu' bejn xgab

(Mt. 6:25-34)

²² Dxel rëb Jesús loj ree xbejnman:

—Naj rni lëjt: Ad chu'di xgab por ni gawidi par guibandi ni'qui por lajd ni gacwidi.

²³ Guialnaban mazri lasajcan guial loj guialraw, guiáad xcuerp bejn mazri lasajcan guial loj xabaman.

²⁴ ¡Gol baguiaa balo ree! Ad rxübint reeb ad rato'p tēēt reeb guialnaza'c, ad rajp tēēt reeb lod yagu'chaaw reeb guialnaza'c guin, per Dios rudēēd ni raw reeb. ¡Abi' mazri lasajquidi guial loj reeb!

²⁵ ¿Wen guial ru da'tidi xgab ma güün lëjt gajc mazri ziool ya?

²⁶ Abi' bal ni'qui zian ad zile't güündi, ¿xhieczi gan rudi xgab por ni ren ree?

²⁷ ¡Gol baguiaa xhienaag rini's ree guiaa dajn! Ad rüjnt reen dxiin ad rguib tēēt reen. Per ni'qui rey Salomón ad guzujchaawt zi'c za'chaaw ree guiaa guin, majsi mast guzujchaawaman.

²⁸ Abi' bal gui'xh dajn ruzujchaaw Dios yan, majsi guixiezi che'can. ¡Dixgui lëjt, bēn ad riladxza'ct ree laaman nid zuneeman ni gacwidi ya!

²⁹ Zeel ad rudi xgab xhie gawidi o xhie gui'ē'di, ad bal tib yu'zidi laan xgab.

³⁰ Din bēn ad nünbeet ree Dios rüjn zian. Laa reeman ru xgab por gra ree ni guin. Per lëjt yu' xDadidi, laaman ragbeechaaw xhienin riaadxidi.

³¹ Per yalojxgaj gol baguiil güündi zi'c rniabee Dios, laaman gunee gra ni ryaadxidi.

Guialnaza'c yu' xanyabaa (Mt. 6:19-21)

³² Lëjt najdi da bejnan, ad rdxebidi. Ta'nzi najdi, per xDadidi Dios ma beenman xgab nabeenēdi laaman.

³³ Gol bato' ni rajpidi din gudēēdan loj ree bēnprob. Gol been naguiejn güündi gan guialnaza'c ni ad rarat ni yu' xanyabaa, lod ad zut xingubaan cwan laa reen lod ad zacabe tēēt reen.

³⁴ Din lod rajpidi guialnaza'c guin, yagaj za' xquiarguejndi.

Gol guzujsin

³⁵ Gol guzujsin zi'c bēn ma najcw xab ca' tēē xguijman par griiman.

³⁶ Gol been zi'c ree mojs cabēz yadxin xpatron reex, bēn zē loj guialruxh-liaa, din diob guixhial reex ro' port yayuman chi gucaaman.

³⁷ ¡Xiquilbaa ree mojs naga'naa cabēz xpatron reex! Naj rni lëjt, laagajc patron guin cwe'c laa reex xan mex, dxel chicchaa xabaman din gudēēman ni gaw reex.

³⁸ Xiquilbaa reex bal guidaagloj xpatron reex laa reex naga'naa reex, majsi yadxinman garol guiaal o chi ma cayreguiaal ya.

³⁹ Gol been xgab, bal tijb bejn ragbeeman xhie hor chu' xingubaan lidxaman cwanx, ad zatiējbtaman chu'x lidxaman.

⁴⁰ Zianan zeel gol guzujsin din ad ragbeetidi dxejci gui't Bēn guxhaal Dios.

Mojs za'c nē mojs guidx (Mt. 24:45-51)

⁴¹ Dxel gunabdiidx Bēd loj Jesús, rēbaman:

—Dad, ¿par dunuzan bel cwent guin ya o par gra ree bejn?

⁴² Badxi' Jesús laan, rēbaman:

—¿Chu lëjt naj zi'c tijb mojs za'c, nazobdiidx, rusa'n xpatronx laax lidxaman persi rulenx gra ree mojs rudēē tēēx ni raw reex chi rajl hor?

⁴³ Xiquilbaa mojs cayüjn dxiin zagdx chi yadxin xpatronx.

⁴⁴ Din diidxliczi rnin lëjt, zusa'n gra xieen patron guin loj mojs guin.

⁴⁵ Per bal naladx mojs guin: “Zaglaari yaguaaad da patronan”, zianz sulojx gusagzix gra ree bèn rüjn dxiin yagaj, zi'c béngunaa zi'c xinguaaaw, dxel sulojx gawix, guiè'x südx tëèx,

⁴⁶ abi' yadxin xpatronx tijb dxej ni ad rbëztix në tijb hor ni ad ragbeetix. Dxel dád casti narooob gudëéd patron guin laax, guixhiaalaman laax lod rayal ree bèn ad ruzoobt diidx.

⁴⁷ 'Din tijb mojs ragbee ni rën xpatronx güünx, abi' ad za'tix porvinid ad ruzoob tëëtix diidx, dád casti narooob tëdix.

⁴⁸ Per mojs ad ragbeet ni rën xpatronx güünx abi' güünx ni rayal casti, ta'nz tëdix casti. Din bèn badëéd Dios quiarguejn, mazri zien ni rayal güünman por quiarguejn ni badëéd Dios lojman. Ziangajc bèn badëéd Dios gualrniabee, mazri zien ni rayal güünman por gualrniabee ni badëéd Dios lojman.

Por Jesús rlia' lasa' ree bejn

(Mt. 10:34-36)

⁴⁹ 'Zialan loj guidxliuj zi'c tijb bèn zidgacaaguij xhienin, abi' jma rën nejzdoon tiaguijn!

⁵⁰ Gazaagdiajn guiët tëèn, abi' j dád yu'nayan diizd yan xt chi gacan cumplid!

⁵¹ Ad naladxidi zialan loj guidxliuj par yabecdxen luxdoo bejn, zialan din gual guililadx reeman naj chu' wadijl.

⁵² Din diizd yan, lod naj reeman gaay loj tijb famil, til choonman contr tio'paman, tio'paman contr choonaman.

⁵³ Dad su contr xi'nman guiáad xi'nman su contr laaman; na su contr xi'ndxa'paman guiáad laam su contr laaman; abi' nasuegr su contr xwalidxaman guiáad laam su contr laaman.

Sen rguien xanyabaa

(Mt. 16:1-4; Mr. 8:11-13)

⁵⁴ Rëb tëè Jesús loj ree benzien guin:

—Chi ruguaadi ririi zaj niz lod rëéz gubijdx, rëbidi: zal guia, abi' rajc gajc zian.

⁵⁵ Abi' chi ririi bi niz sur, rëbidi: gac nalaa, abi' rajc gajc zian.

⁵⁶ jBèn rusquiee! Ragbeedi xhie rën guièb sen rguien xanyabaa në loj guidxliuj, ¿chexquiza zeel ad ragbeetidi xhie rën guièb ni cayajc loj guidxliuj yan?

Babej zagdx con bèn rdxe'ch lüj

(Mt. 5:25-26)

⁵⁷ ¿Chexc ad rüjnt lëjt gajc xgab conin naj ni zagdx?

⁵⁸ Bal chu bèn rudëéd lüj loj guxtis, been naguiejn baya'nnëman diidx zagdx la'tgaj yu' tiamp, chitëè yayüman lüj loj guxtis, abi' guxtis guin yayü lüj loj ree bèn cu' lüj ladxguuib.

⁵⁹ Naj rni lüj, ad zariitil ladxguuib guin xtczi quixil gra ni na guxtis guin.

13

Gol bayüjn xgab por xtolidi

¹ Lën gajc ree dxejzii wej tio'p choon ree bejn biguie reeman diidx loj Jesús gual bagüjt Pilato tio'p choon ree bèn Galilea, abi' bago'chaman xrejn reeman con xrejn ree be bagüjt reeman par gudëéd reeman loj Dios zi'c gon.

² Dxel rëb Jesús:

—Ad bal naladxidi guzajc ree b́en Galilea guin zian guial naj reeman mazri b́endol guial loj gra ree b́en Galilea.

³ Din naj rni ĺejt guial ad ziantan. Abi' bal id zayüjndi xgab por xtolidi ziangajc saquidi.

⁴ Ad bal naladxidi b́en chiinbichoon güt ree chi guxa't torre ni la Siloé laa reeman, naj reeman mazri b́endol guial loj gra ree b́en zojb Jerusalén.

⁵ Naj rni ĺejt guial ad ziantan. Abi' bal id zayüjndi xgab por xtolidi ziangajc saquidi.

Xcwent yag higo ni ad rtiat

⁶ Dxel be Jesús tijb cwent loj reeman, rëbaman:

—Tijb bejn gojpaman yag higo lod nagu'man uv, abi' biquiaaman bal ca higo lojn, per achetcki bidxaaglojman.

⁷ Dxel rëbaman loj b́en rajp guidxliuj guin: “Baguiaa, ma gojc choon ijz rialan rguilan higo loj yag guin, abi' achetcki rdxaglojn. Batüügan din nawëëgzi rüjnan loj guidxliuj guie.”

⁸ Per rëb b́en rajp guidxliuj guin: “Dad, basa'nsiin zatib ijz, yabeciaan yuj xanan gagu' tēēnan abon.

⁹ Rupent zian tian, per bal id zacan dxel tügan.”

Bayüjn Jesús tijb b́engunaa ca b́ew xijch

¹⁰ Tijb dxej raziiladx ree bejn, culüü Jesús bejn ree lën tijb yadoo,

¹¹ yagaj za' tijb b́engunaa ma gojc chiinbichoon ijz ragxuuman, tijb xindxab basa'n laaman con tijb b́ew xijchaman, ad rile'tczi yaliman.

¹² Chi baguiaa Jesús laaman, gurejdxaman laaman, rëbaman:

—Na, ma bayajquil guialguijdx ni goquil.

¹³ Dxel badxiib yaaman guijcaman; abi' loj hor guin gajc baliman, zianz guzuloj cuza'taman Dios zagdxe.

¹⁴ Per b́en rniabee lën yadoo guin dád bidxe'chaman guial bayüjn Jesús b́en guin dxej raziiladx ree bejn, dxel rëbaman loj ree bejn:

—Xho'p dxej yu' guial güün bejn dxiin, loj ree dxej guin gol guida din yayajquidi, per ad dxej raziiladx bejn.

¹⁵ Badxi' Dad Jesús laan rëbaman:

—B́en rusquiee, ¿nid rxhiee xgo'ndi o xburidi dxej raziiladx ree bejn ya par chiquië'di laa reeb nijs?

¹⁶ B́engunaa guie zëedaman loj xdiaa Abraham, ma gojc chiinbichoon ijz naxhii xindxab laaman con guialguijdx guie. ¿Wen id zajc yayajcaman dxej raziiladx ree bejn ya?

¹⁷ Chi rëb Jesús zian, gra ree b́en rdxe'ch laaman baya'n xtu; per graczi ree bejn rabaa guial ruguiaa reeman gra ree ni zagdxe ni rüjman.

Xcwent xhaj moxtajs

(Mt. 13:31-32; Mr. 4:30-32)

¹⁸ Rëb tēē Jesús:

—¿Xhienaag ganin naj xguialrniabee Dios o xhie gulün lojdi din chignia'di xhienaag naj xguialrniabeeman?

¹⁹ Laan naj zi'c xhaj moxtajs ni rxübin bejn loj xguiniaaman, rni'san xt rajcan yag naroo. Abi' guial naroo da't rajcan xt rüjn xguixbitia's ree biguijn xidxan.

Xcwent levadur

(Mt. 13:33)

²⁰ Rëb Jesús zatijb:

—Ƿhienaag ganin naj xguialrniabee Dios?

²¹ Laan naj zi'c levadur ni rugo'ch tijb béngunaa choon midid harin persi rusaaguijn gra cob guin.

Port nadëë

(Mt. 7:13-14, 21-23)

²² Chi zë Jesús Jerusalén, rulüüman bejn ree luguiedx narooob ree në ree luguiedx dobëz niz lod rdëdaman.

²³ Abi' tijb bejn gunabdiidx lojman rëbaman:

—Dad, Ƿta'nz ree bën gac perdon ya?

Badxi' Jesús laan rëbaman:

²⁴ —Gol been naguiejn din chu'di niz ro' port nadëë, din naj rni lëjt, zien ree bën rën chu', per ad zile't chu' reeman.

²⁵ Din chi chisu bën naj lidxan gusiaawaman ro' port guin, lëjt guial yaya'ndi xchu, gucaadi ro' port guin guiëbidi: “Dad, guxhal.” Per yadxi'man xtiidxidi naman: “Ad ragbeetan ban zadi.”

²⁶ Dxel suloj guiëbidi: “Tijbzi badaaw ree, tijbzi badü' ree, niz lad dux nejzan balüül dunujn.”

²⁷ Per naman lojdi: “Ma rnin, ad ragbeetan ban guzadi. Gol biquied lon bëndol.”

²⁸ Ni goondi gaw tëë layidi chi guguaadi Abraham, Isaac, Jacob, në gra ree bën badëë xtiidx Dios loj ree bejn, za' reeman lod rniabee Dios, guiáad lëjt yariicadi.

²⁹ Din gui't ree bën sa gra lad guidiblagaa guidxliuj din cwe reeman gaw reeman lod rniabee Dios.

³⁰ Abi' zien ree bën bigra yan, laa reeman gac bën yaløj nadxel. Guiáad ree bën naj bën yaløj yan, laa reeman gac bën bigra.

Roon Jesús por Jerusalén

(Mt. 23:37-39)

³¹ Hor guin gajc bidxin tio'p choon ree bënfarisew, abi' rëb reeman loj Jesús: —Baguiaj, baza niz guie, din rën rey Herodes gugüjtaman lüj.

³² Badxi' Jesús laan rëbaman:

—Gol chej gol chiguiedx loj bën rusquiee zii: “Yan, në guixie yabën xindxab yayün tëën bënragxuu ree, abi' widx gulooxan.”

³³ Per naj rayal gusnuu da nejzan yan në guixie në widx, din ad najt guial guiët tijb bën rudëë xtiidx Dios loj ree bejn luguiedx ren bal id najn Jerusalén.

³⁴ ¡Bén Jerusalén, bën Jerusalén, rugüjtidi bën rudëë ree xtiidx Dios loj ree bejn rucaaguaiaj tëedi gra ree bën rxhiaal Dios lojdi! ¡Bëlczí volt guyënan nuchagan lasa'di zi'c rüjn tijb guid ruchajg lasa' ree xi'nb lën xhiilib, per ad cwëjbtidi!

³⁵ Zianan zeel yaya'n ladxidi zi'c tijb guiedx lod achut zojb. Abi' rnin lëjt, diizd yan ad zuguaatrídi naj xt chi guidxin dxej guiëbidi: “¡Nüjnle' Dios bën zëed por laaman!”

14

Rayüjn Jesús tijb bën rzaaguij

¹ Tijb dxej raziiladx ree bejn wej Jesús bitawaman lidx tijb bënfarisew rniabee. Yu' ree bënfarisew guin cula'ch laaman xhie güünman,

² guial za' tijb xinragxuu lojman rzaaguijx.

³ Dxel gunabdiidx Jesús loj ree mextr rajc ley në loj ree bénfarisew guin, rëbaman:

—¿Zajc yayüjn bejn bénragxuu dxej raziiladx ree bejn ya o ad zajctan?

⁴ Per laa reeman achetcki rëb reeman. Dxel gunaaz Jesús xinragxuu guin bayüjnman laax, abi' rëbaman lojx din yaguijx.

⁵ Dxel rëbaman loj ree bénfarisew guin:

—¿Bal tijb xburidi o tijb xgo'ndi yab lën tijb bizë, nid zabëedi laab ya, majsi naj dxej raziiladx bejn?

⁶ Abi' achet gojc nadxi' reeman.

Bén rej ree loj guialruxhliaa

⁷ Chi baguiaa Jesús rbe ree biooz luar lod rbej ree bén mazri zojbloj, rëbaman loj reeman:

⁸ —Bal chu guiniee lüj chel loj tijb guialruxhliaa, ad cwel luar rbej ree bén mazri zojbloj. Din zajc guidxin zatijb biooz mazri zojbloj guial lojl,

⁹ abi' gui't bén gunee gropidi naman lojl: “Badëed lod zojbil cwe bén guie.” Dxel rayal chel guidib ratul chisobil loj yagxhil bigra.

¹⁰ Zeel chi guiniee reeman lüj, zagdxeli bisob loj yagxhil bigra, din chi gui't bén gunee lüj naman lojl: “Miw, badëd loj tijb luar mazri zojbloj.” Zian, gra ree bén zojbnël xan mex guza't lüj zagdxë.

¹¹ Din bén rlies xvalor gajc, yaya'nxتمان. Guiáad bén rüjn naya zajs xvaloraman.

¹² Dxel rëb Jesús loj bén gunee laaman:

—Bal goc cu'l guialraw, ad guiniee xmiwil, ni'qui lasa'l, ni'qui bijchil, ni'qui benrijcw zojbnël gajxh. Din laa reeman yu' dxej guiniee reeman lüj, abi' zian yanee reeman ni gudaw reeman lidxil.

¹³ Zagdxeli naj, chi güünl tijb lanij, gunee bénprob ree, në ree bén ad nadaant yaa, në ree bencoj con ree bénlutia'p.

¹⁴ Xiquilbaal bal güünl zian, din laa reeman ad zajct yanee ni badëedil. Per chi guidxin dxej yaban ree bén bazoob xtiidx Dios, Dios yaguijx laan lojl.

Xcwent bén been tijb lanij

¹⁵ Chi biguiejn tijb bén zojbnë Jesús xan mex ni rëbaman, rëbaman loj Jesús:

—¿Xiquilbaa ree bén yayal gaw lod rniabee Dios!

¹⁶ Dxel rëb Jesús lojman:

—Tijb bejn badxe' guialraw par xche, abi' guneeaman zien da't ree bejn.

¹⁷ Chi ma gojl hor gaw reeman xche, guxhaal xmojsaman din chex chiguedix loj ree biooz guin: “Gol guda din graczi ma najcchaaw.”

¹⁸ Per graczi reeman guzuloj caynab perdon. Bén yaloj guin, rëbaman: “Yan gajczi guzin tijb guidxliuj, rayal chiquianan; been wen güjdx lojman din güünman naj perdon.”

¹⁹ Zatijbaman rëb: “Guzin gaay nejz go'n, yan chiguienan laa reeb prueb guidoondon rajc rüjn reeb dxiin ya; been wen güjdx lojman din güünman naj perdon.”

²⁰ Zatijbaman rëb: “Yan gajczi baxhlian zeel ad zile't guialan.”

²¹ Chi badxin mojs guin bagojn xpatronx gra ni rëb ree bén guin, dád balenman, dxel rëbaman lojx: “Baquiejn wej niz galay ni, në niz lad ree nejz, tanë gra ree bénprob në ree bén ad nadaant yaa, në ree bencoj con ree bénlutia'p.”

²² Chi ma been mojs guin zian, dxel rëbix lojman: “Dad, ma benan ni nal, per sta yu' gajc luar lidxil.”

²³ Dxel rëbaman lojx: “Wej niz loj carreter në niz loj ree nejz la's, been naguiejn ben ren ree din gui't reeman din cha lënü lidxan.

²⁴ Din naj rni lojdi, ni'czi tijb ree bën gunen yaloj ad zajwt gualraw benchaawan par xche.”

Ni rayal güün ree bën rën gac xbejn Jesús

²⁵ Dád zien ree bejn zinal Jesús; abi' badxi' lojman loj reeman rëbaman:

²⁶ —Bal chudi rën guidnal naj, rayal guiëndi naj mazri gual loj xdadidi, gual loj xniaadi, gual loj lacheelidi, në gual loj xi'ndi, o bijchidi o bizandi, rayal tēē guiëndi naj mazri gual loj xguialnabandi, din bal id züjndi zian ad zajct gaquidi da bejnan.

²⁷ Bën ad rënt sagdiaj guidnal tēēman naj, ad zajct gacaman da bejnan.

²⁸ “Bal chu rën güün tijb yu narooob, çnid yalojxgaj cweman ya din cwēēman cwent zadaan xmiliaman ya din gulooxaman laan?”

²⁹ Din bal sulojman xcimiantan abi' ad zulooxtaman laan, graczi ree bën guguaa laan guze' laaman,

³⁰ guiëb reeman: “Guzuloj cayüjn bën guin yu abi' ad gojct nulooxaman laan.”

³¹ “O bal tijb rey güün wadijl contr zatijb rey, çnid yalojxgaj cweman ya güünman xgab züjn chii mil xsuldadaman gan loj stüjb rey zidnë gajl mil sulda ya?”

³² Per bal naladxaman ad züjntaman gan loj rey guin, la'tgaj sta za' rey guin zijt, guixhiaalaman bën chinë ree xrusonman din yaya'n reeman diidx ad zut wadijl.

³³ Yan, ziangajc rnin lojdi, chutëez lëjt bal id zusa'n gra ni rajpidi din guidnalidi naj, ad zajct gaquidi da bejnan.

Bal id zajcri zëd naxij

(Mt. 5:13; Mr. 9:50)

³⁴ Dxel rëb Jesús:

—Ni zagdxe naj zëd. Per bal id zajcran naxij, çxhieza naag yayajcan naxij zatijb?

³⁵ Ad rüjntan sirv par luyuj ni'qui par loj abon, rzëëbzan. ¡Bën rën ree gucaagdiajg, gol bacaagdiajg!

15

Xcwent xiil gunit

(Mt. 18:10-14)

¹ Gra ree bën ruquijx impuest në gra ree bëndol, bibig reeman lod za' Jesús din gucaagdiajg reeman ni rnieeman.

² Guiáad ree bënfarisew con ree mextr rajc ley rnieeguijdx reeman laaman, rëb reeman:

—Ruchajg bën guin bëndol ree rawnë tēēman laa reeman.

³ Dxel rëb Jesús loj reeman:

⁴ —Bal tijb bejn rajp tibgayuu xiil abi' rniyt tijbib, çnid rusa'nman zatajpga-jlchiinbitapib dajn ya abi' rigdiilaman xiil gunit guin xt lodzi radxejlaman laab?

⁵ Abi' chi radxejlaman laab rabaaman, rudxiibaman laab dxidyëjnman.

⁶ Dxel chi radxin lidxaman, ruto'p ree xmiwaman në ree bën zojbnëman gajxh abi' rëbaman loj reeman: “Gol babaa zi'c rabaan, din ma badxejlan da xiilan be gunit.”

⁷ Yan, rmin lëjt, ziangajc rabaanë Dios tijb bën rayüjn xgab por xtol guial loj tajpgajlchiinbitap benza'c ad ryaadxt yayüjn xgab por xtol.

Xcwent milia ni bizëëb

⁸ 'O bal tijb bëngunaa rajpaman chii milia plajt abi' rusëëbaman tijban, çnid ruze'caman guij ya ruloob tëëman lënü abi' raguuilaman laan zagdxe da't xt lodzi radxejlan?

⁹ Abi' chi radxejlaman laan, ruto'p ree xmiwaman në ree bën zojbnëman gajxh, abi' rëbaman loj reeman: “Gol babaa zi'c rabaan din ma badxejlan milia basëban.”

¹⁰ Yan, naj rni lojdi, ziangajc rabaa ree xianjl Dios por tijb bëndol rayüjn xgab por xtol.

Xcwent bën rüjn pardon xi'n

¹¹ Rëb tëë Jesús loj reeman:

—Tijb bejn yu' tio'p xi'nman.

¹² Abi' xin naj mazri xinguiag, rëb loj xdadix: “Dad, banee ni rayal gaca'n.” Dxel badëëman ni rayal tijbgaj reex.

¹³ Ad gojct xchej ni cwa' reex ni rayal reex, xin naj xinguiag guin bato'gajquix graczi ni badëëd xdadix lojx, abi' con milia guin wejx zijt bignijt xlia'x graczi xmilix guial beenx ni rëntzix.

¹⁴ Per chi ma banijtx gran, dxel guyu gubijn niz lod za'x abi' guzuloj biaadx ni gawix.

¹⁵ Dxel wejx bignabix dxiin loj tijb bën zojib yagaj, abi' guxhaalaman laax chigajpix cüch ree dajn.

¹⁶ Guial tant rliaanx xt guyënx niajwix ni raw ree cüch guin, per achut rudëë laan.

¹⁷ Dxel beenx xgab naladxix: “iZien ree xin rüjn dxiin lidx da Dadan xt sobr rüjn ni raw reex, guiáad naj guie ma guiëtan bëjz!

¹⁸ Yan, yazaan yaya' lidx da dadan din guiën lojman: Dad, ma benan dol loj Dios në lojl.

¹⁹ Ad rayaltri guinieel naj xi'n; been naj cwent zi'c tijb ree xmojsil.”

²⁰ Dxel bayunejzix zia lidx xdadix.

'Per zijtri ziaadix chi baguiaa xdadix laax dxel bayaman laax, zianz ruxüünman bigchaaglojman laax, abi' gudiidxaman laax gudaw tëëman laax xid.

²¹ Dxel rëbix lojman: “Dad, ma benan dol loj Dios në lojl, ad rayaltri guinieel naj xi'n.”

²² Per rëb xdadix loj ree xmojsaman: “Gol baquiejn gol tanë lajd zagdxe, gol bascajcwixan, gol badxe' tijb guiibnil yaax gol baslëë tëëx gurëch,

²³ Gol chica' go'n mazri nadaan, gol bagüjtib din yadaaw ree yaguieen ree lanij.

²⁴ Din par naj ma güjt da xi'nman abi' yan ma babanx, gunijtx abi' ma badxejlax.” Dxel guzuloj cayüjn reeman lanij.

²⁵ La'tgaj xi'nman xingol guin cayüjnx dxiin dajn. Chi badxinx gajxh lidx xdadix, biguiejnx cucwejdx reeman cuya' tëë reeman.

²⁶ Dxel gurejdxix tijb xmojs xdadix, gunabdiidix xhienin cayajc lidxix.

²⁷ Badxi' mojs guinan rëbix: “Guial baguiaad bijchil zeel gunabee xdadil güjt tijb go'n mazri nadaan guial nadaanx baguiaadix.”

²⁸ Per dád bidxe'ch xingol guin, abi' ad guyëntix nayux. Zeel wej xdadix biguiedxaman lojx din yayux.

²⁹ Dxel rëb loj xdadix: “Lüj ragbee ma gojc xchej cayünan xchiinl, zianczi ruzoban xtiidxil; per ni'czi tijb ad waneetil tijb dxibdobëz din günnë' ree da miwan lanij.

³⁰ Guiáad yan baguiaad xi'n'l, xin ma bignijt xlia' xmilial con ree béngunaa dxuudx, abi' gunabeel güjt go'n mazri nadaan par laax.”

³¹ 'Dxel badxi' xdadix laan rëbaman: “Xi'n, zianczi za'l con naj, graczi ni ra'pan naj xieenl.

³² Per yan rayal yaguieen ree lanij yabaa tëë ree, din bijchil xin ma güjt par naj, ma babanx, gunijtx abi' ma badxeljix.”

16

Xcwent tijb mojs rniabee ree mojs

¹ Rëb tëë Jesús loj ree xbejnman:

—Guyu tijb benrijcw, nuzujman tijb mojs guinia graczi ni rajpaman. Abi' biguiedx ree ben ren lojman guial cunijt xlia' mojs guin ni naj xieenman.

² Dxel gurejdxaman laax rëbaman lojx: “¿Xhie rën guiëb ni riguejnan cayüjn? Banee cwent lon xcwent xchiinl, din achetri dxiin gunen lojl.”

³ Dxel guzuloj beenx xgab gunaladxix: “¿Xhienaag günan yan ma gusa'n da patronan naj sin dxiin? Ad yu'tan gojl günan dxiin dajn, ratu tëën ganaaban carda.

⁴ Ma ragbeen xhienaag günan din guiën ree bejn naj chi ad züntran dxiin.”

⁵ Dxel gurejdxix tijb gaj ree bën ral loj xpatronx, rëbix loj bën bidxin yaloj: “¿Plac rälil loj da patronan?”

⁶ Abi' rëbaman: “Ralan tibgayuu barril sejt lojman.” Dxel rëbix: “Cwa' gui'ch guie lod ca ni ralil lojman, been zatijban bacaa lojn rälil tü'pchiizan.”

⁷ Dxel gunabdiidxix loj zatijbaman rëbix: “Laadx lüj, ¿plac rälil?” Abi' rëbaman: “Tib gayuu ingujch trigo.” Zianz rëbix: “Cwa' gui'ch guie lod ca ni ralil lojman, been zatijban bacaa lojn rälil tajpgajlzan.”

⁸ Dád badxaloj patron guin guial nasin mojs mal guin por ni beenx. Din mazri nasin ree bën ad zinalt xnejz Dios con lasa' reeman guial loj ree bën zinal xnejz Dios.

⁹ 'Rnin lojdi, gol beennë dxiin ni rajpidi loj guidxliuj guie par gagnëdi bejn din chu' xmiwidi, din chi yaran ma yu' bën yaca' lëjt lod gapidi guialnaban tiblayaa.

¹⁰ 'Bal chu rüjn zi'c rayal con ta'n ni rudëed bejn lojman, züjnman zi'c rayal con zro'n. Ziangajc bën ad rüjnt zi'c rayal con ta'n ni rudëed bejn lojman, ad züjn gajctaman zi'c rayal con zro'n.

¹¹ Yan, ziangajc bal id züjndi zi'c rayal con ni za'c yu' loj guidxliuj guie, ¿chu gap lëjt confianz con guialnaza'c yu' xanyabaa?

¹² Bal id züjndi zi'c rayal con ni ad najt xieendi, ¿chu gunee lëjt ni rayalidi?

¹³ 'Ni'qui tijb mojs ad zajct güünx sirv loj tio'p patron; din zadxe'chix tijbaman abi' zënx zatijbaman; o zajquix xinza'c con tijbaman abi' züjnx tibläd zatijbaman. Zeel ad zajct güündi sirv loj Dios, në loj milia.

¹⁴ Abi' ree bënfarisew guial mazri rën reeman milia, chi biguejxn reeman ni rëb Jesús guzuloj cuze' reeman laaman.

¹⁵ Dxel rëb Jesús loj reeman:

—Rüjndi benza'c niz loj ree bejn, per Dios nünbee luxdoodi; abi' majsi loj bejn lasajc da'tidi, per loj Dios achet lasajquidi.

Xley Moisejs con xguialrniabee Dios

¹⁶ 'Xley Moisejs në ni bacaa ree bën badëë xtiidx Dios loj ree bejn, naga' loj been reen dxiin xt chi bi't Waj bën baroobnijs bejn ree. Abi' diïzd nadxel guzuloj rire'ch xtiidxza'c Dios xhienaag naj xgualrniabeeman, abi' zien ree bejn rÿjn nagueijn chu' loj xgualrniabeeman.

¹⁷ 'Adli nawëëgt nit xanyabaa në guidxliuj, guial yaya'n tijb diidx zëëd loj ley guin guial ad zajctan cumplid.

Ruliüü Jesús xcwent guial rala' lasa'

(Mt. 19:1-12; Mr. 10:1-12)

¹⁸ 'Bal tijb xinguaaw rala' lacheelix abi' rtia'x ben ren, dolan cayÿjnx. Ziangajc xin rtia' tijb béngunaa bala' lacheel, dolan cayÿjnx.

Xinrijcw con Lazr

¹⁹ Basnuu Jesús, rëbaman:

—Guyu tijb xinrijcw, guzujchaawix con ganaxczi lajd zagdx, abi' guixie guixiecz i rÿjnx lanijro'.

²⁰ Guyu tëë tijb xinprob brii lajx Lazr, rbejx ro' xport xinrijcw guin abi' guidblagaax ca guiadx.

²¹ Rën nejzdo Lazr guin gawix ni riajb xan xmex xinrijcw guin. Abi' xt ree bë'cw rbig rlie' reeb loj ree guiadx ni cax.

²² 'Chi bidxin dxej güjt Lazr dxel bigné ree xianjl Dios laax lod naj nix da't, lod za' Abraham. Në xin rijcw guin güjt, abi' biguie'chix.

²³ Chi ma cazagdiaj xin rijcw guin gabijl, gules lojx abi' zijtri baguiaax za' Lazr cwë' Abraham.

²⁴ Dxel gurixdiajx rëbix: “Dad Abraham, baya naj, guxhaal Lazr din gugajdx lupunt xbacwënx din gui'tix yasiaalyujx lÿdxan, din dád cazaagdiajn loj bajl guie.”

²⁵ Per badxi' Abraham xtiidxix rëbaman: “Xi'n, basaaladx guial dád nix guyu luxdool chi guban loj guidxliuj, guiáad Lazr dád naya gubajnx. Yan, rayaix lod yabaax guiáad lÿj rayalil lod sagdiajl.

²⁶ Nëtëë yan bën za' ree guie ad zajct téd reeman yagaj, ni'qui ree bën za' yagaj ad zajct téd reeman guie, din za' bala'ro' du galay ree.”

²⁷ 'Dxel rëb xinrijcw guin lojman: “Rniaaban lojl dad, been wen guxhaal Lazr lidx da dadan,

²⁸ lod zojb gaay ree da bichan din chicojnx laa reex chitëë në laa reex gui't luar guie, lod yu' zro' casti.”

²⁹ Per rëb Abraham lojx: “Ma rajp reex gui'ch ni bacaa Moisejs con ree bën badëë xtiidx Dios loj ree bejn, laan rayal guidxga' reex.”

³⁰ Abi' rëb xinrijcw guin: “Walil, dad Abraham, per ad zaliladxt reex, sa'n bal yaban tijb bën ma güjt chigneenëman laa reex, zayÿjn reex xgab por xtol reex.”

³¹ Per rëb Abraham lojx: “Bal id ridxga' reex xtiidx Moisejs në xtiidx ree bën badëë xtiidx Dios loj ree bejn, ad zaliladxt reex majsi yaban tijb bën ma güjt.”

17

Bën ruzaalguiiw bejn din güünman dol

(Mt. 18:6-7, 21-22; Mr. 9:42)

¹ Rëb Jesús loj ree xbejnman:

—Zianczi yu' ree ni ruzaalguiiw bejn din güünman dol, per i'probza naj bën ruzaalguiiw zatijb bejn guial güünman dol!

² Par laaman zagdxeli naj guixhii reeman tijb guiaj mulin yējnman din guzaal reeman laaman loj nijsdoo, luar guzaalguiiwaman tijb bēn qui rliladxri naj din güünman dol.

³ ¡Gol gojp cudad!

'Bal xhie tijb ni mal güün tijb lasa'l, guneenēman. Abi' bal bayūjnman xgab por ni beenman, beenman perdon.

⁴ Majsı gajdx volt loj tibdxej güünman xhienin contr lüj, abi' bal gui'taman lojl gajdx volt naman: "Been naj perdon ad züntran zian", rayal güünl laaman perdon.

Guialrniabee ně guialrliladx

⁵ Dxel rēb ree xi apóstoles Jesús lojman:

—Banee dunujn mazri guialrliladx.

⁶ Abi' rēb Jesús loj reeman:

—Bal naj xguialrliladxidi majsı zi'czi naj xhaj moxtajs, zile' guiēbidi loj yagro' guin: "Bia'xh guie, bisob loj nijsdoo", zuzooban xtuidxidi.

Ni rayal güün tijb mojs

⁷ 'Bal tijb lējt rajp tijb mojs, abi' chi yaguaaad mojs guin bigla'x yuj o bigajpıx begui'xh ree ya, ζwen zējbidi lojx ya: "Guyu, gurej din gawil"?

⁸ Ad zējbtidi zian, guiēblidi: "Bachaa xabil, been ni gawan, guda'n. Chi lox gawan guie' tēen dxel ma zajc gawil guie' tēēl."

⁹ Abi' wed ni'qui quixtēē ad zudēētidi lojx din cayūjnzi x ni rayal güünx.

¹⁰ Ziangajc lējt chi loox güündi gra ni gunabee Dios dxel guiēbidi: "Nayajcan mojs ni ad rüjnt sirv, din baguieenzan ni rayal yaguieenan."

Rayūjn Jesús chii ree bēn rajc guialguijdx la lepra

¹¹ Chi ma cadxin Jesús Jerusalén, gudēdaman guiedx riga' ree niz Samaria ně niz Galilea.

¹² Abi' chi cayuman tijb luguiedx dobēz, bigchaagloj chii ree bēn rajc guialguijdx la lepra laaman. Per zijt guzuj reeman,

¹³ rbixdiaj reeman, rēb reeman:

—¡Jesús, Mextr, baya dunujn!

¹⁴ Chi baguiaa Jesús laa reeman, rēbaman loj reeman:

—Gol chej loj ree bixhioz din guguaa reeman lējt.

Abi' la'tgaj zē reeman, baya xcuerp reeman guialguijdx ni rajc reeman.

¹⁵ Dxel tijbaman chi gogbeeman ma bayajcaman, bayejcaman, rbixdiaj-man rudēēman quixtēē loj Dios.

¹⁶ Abi' bazuxibaman loj Jesús, basajb lojman xt luyuj persi badēēman quixtēē lojman. Abi' najman bēn Samaria.

¹⁷ Dxel rēb Jesús:

—¿Nid chii naj ree bēn bayajc ya? ¿Con zagaa reeman?

¹⁸ ¿Tijbzi benzit guie bayejc ya rudēēman quixtēē loj Dios?

¹⁹ Dxel rēbaman loj bēn guin:

—Bisu. Baguiaj, ma bayajquil guial bililadxil naj.

Xhienaag gui't xguialrniabee Dios

(Mt. 24:23-28, 36-41)

²⁰ Gunabdiidx ree bēnfarisew loj Jesús goc gui't xguialrniabee Dios, abi' rēbaman:

—Xguialrniabee Dios ad najtan ni guguaa bejn.

²¹ Abi' achut guiēb: "Laan za' guie", o "Laan za' ni" ya, din xguialrniabee Dios mal za'n galaydi.

²² Dxel rëbaman loj ree xbejnman:

—Zadxin dxej guiëndi guguaaadi Bén guxhaal Dios majsi tibdxexzi, per ad zuguaatidi laaman.

²³ Abi' yu' reeman na lëjt: “Laaman za' guie”, o “Laaman za' ni” ya, ad bal chinalidi laa reeman.

²⁴ Din zi'c chi rë'p nijs rulaan bacha' guidib xanyabaa, zian gac chi gui't Bén guxhaal Dios loj guidxliuj.

²⁵ Per yalojxgaj sagdiajman abi' ad zënt ree bén riga' yan laaman.

²⁶ Zi'c goc gulal chi guban Noé, zian gac chi gui't Bén guxhaal Dios.

²⁷ Din nadxel gudaw ree bejn, gu' reeman, baxhliaa reeman badëë tëë xi'n reeman baxhliaa xt chi bidxin dxej guyu Noé lën barcwro' ni beenman, abi' guzuloj guiadoxh ni bagüjt gra reeman.

²⁸ Ziangajc gojc chi guban bén brii laj Lot, gudaw ree bejn, gu' reeman, bato' reeman, guzii reeman, guxübin reeman been tëë reeman yu ree.

²⁹ Per chi brii Lot luguiedx Sodoma, guzuloj biyajb gui' xanyabaa në azufre, abi' güjt gra reeman.

³⁰ Ziangajc gac dxej ni gui't Bén guxhaal Dios.

³¹ 'Dxej ni gac zian, bén yë'p gui'c yu ad zaguiajtaman chiglëë ni nagu'man lënu. Abi' bén za' dajn, ad zayejct lidxaman.

³² Gol basaaladx ni guzac lacheel bén brii laj Lot.

³³ Bén mazri rën guialnaban rajpaman loj guidxliuj guie, zadxin dxej gunijtaman laan, per bén guiët por naj, zajpaman guialnaban tiblayaa con Dios.

³⁴ 'Naj rni lëjt, guxhinzii lod naga' tio'p bejn tijbzi loj loon, tijbaman sa zatijbaman yaya'n.

³⁵ Guiáad lod cayojt tio'p ree béngunaa, tijbaman sa zatijbaman yaya'n.

³⁶ Abi' lod za' tio'p ree xinguaaaw dajn, tijbix sa zatijbix yaya'n.

³⁷ Chi biguejn ree xbejnman zian, rëb reeman:

—¿Ban guin, Dad?

Badxi'man laan rëbaman:

—Laa guiguien gajc ban guinan, zi'c chi rado'p ree golbich laa rguien gajc naga' tijb begüt.

18

Xcwent tijb béngunaa bizëjb në tijb juejs

¹ Be Jesús tijb cwent loj ree xbejnman, persi balüüman laa reeman guial zianczi rayal cwedx guiniab reeman Dios ad zadxagtczi reeman.

² Abi' rëbaman loj reeman:

—Guyu tijb guiedx lod guyu tijb juejs, ad rdxebtaman Dios ad ridxga' tëétaman bejn ree.

³ Luguiedx zügajc zojb tijb béngunaa bizëjb, rniabaman loj juejs guin din güünman guialguxtis gagnëman laaman loj bén rdxe'ch laaman.

⁴ Xchej ad bidxga't juejs guin béngunaa bizëjb guin, per zianz laagajcaman been xgab naladxaman: “Majsi ad rdxebtan Dios ad ridxga' tëétan bejn ree,

⁵ per béngunaa guie ad rucwëëzt ruslenman naj. Zagdxeli naj günan laaman yudar chitëë ri'traman naga gad da pacensan chigra.”

⁶ Dxel rëb Jesús loj reeman:

—Zian gunee juejs mal guin.

⁷ Diidxgui Dios, ¿nid zagnëman bén guleman ya bén rbejdx rniab ree laaman dxej guiaal? ¿Wen zaglaa gagnëman laa reeman ya?

8 Naj rni lëjt guial ad zaglaat gagnëman laa reeman. Per chi gui't Bén guxhaal Dios, ¿chuj ni zadxaaglojraman bén rlladx Dios loj guidxliuj ya?

Xcwent bénfarisew con bén ruquijx impuest

9 Be Jesús zatijb cwent par ree bén naladx tijbzi laa reeman naj benza'c guial loj ree ben ren, rëbaman:

10 —Tio'p ree xinguaaw wej lën yadooro' Jerusalén persi gurejdx gunab reex Dios, tijbix naj xinfarisew, zatijbix naj xin ruquijx impuest.

11 Xin farisew guin, za'lix cabejdx canabix Dios, rëbix: “Quixtëë runen lojl, Dad, guial ad najtan zi'c ree ben ren, naj reeman béngubaan, benmal, bén za'në béngunaa ren, ni'qui zi'c naj bén ruquijx impuest guin.

12 Rba'nan tio'p volt lën xuman, abi' gra ni rünan gan rünanan chii lala' persi runen tijban lojl.”

13 Per xin ruquijx impuest guin, zijt za'x abi' ni'quid rayaxtix guilies lojx, rga'p luxdoox rëbgajx: “¡Dios, baya naj najn tijb xindol!”

14 Naj rni lëjt guial xin ruquijx impuest guin ma been Dios laax perdon chi bayejc lidix, per xin farisew guin ad beentaman laax perdon. Din bén rlies xvalor gajc achet lasajcaman loj Dios, guiáad bén rüjn naya laaman mazri lasajc loj Dios.

Rüjnle' Jesús xindoo ree

(Mt. 19:13-15; Mr. 10:13-16)

15 Binë ree bejn xindoo ree lod za' Jesús din gudxiib yaaman guijc reex, per chi baguiaa ree xbejnman guzuloj cadilë reeman bén zinë ree laa reex.

16 Per gurejdx Jesús laa reeman, rëbaman loj reeman:

—Gol badëë mod gui't reex lon, ad bal rudxoondi, din lod rniabee Dios naj par ree bén naj zi'c laa reex.

17 Din naj rni lëjt, bén ad rlladxt xguialrniabee Dios zi'c tijb xindoo, ad zile't chu'man loj xguialrniabee Dios.

Xcwent tijb xin rijcw

(Mt. 19:16-30; Mr. 10:17-31)

18 Tijb xin rniabee, gunabdiidx loj Jesús rëbix:

—Mextrza'c, ¿xhie rayal günan din ga'pan guialnaban tiblayaa con Dios?

19 Badxi' Jesús laan, rëbaman:

—¿Chexc zeel nal lon benza'c? Achut naj benza'c, tijbzi Dios.

20 Lüj rajc ree mandamit: “Ad sunël béngunaa ren, ad gugüjtil bejn, ad cwanal, ad cwëël xtiidx bejn, gojp respejt xdad xniala.”

21 Dxel rëbix loj Jesús:

—Gra ree ni guin cayünan diizd xindoon.

22 Chi biguiejn Jesús zian, rëbaman:

—Yu' zatijb ni ryaadx güün: bigto' gra ni rajpil dxel gudëël milia guin loj ree bënprob. Zian gapil guialnaza'c xanyabaa, dxel gui'til guidnalil naj.

23 Chi biguiejn xin guin zian, dád gyunayax guial dád xinrijcwan.

24 Chi baguiaa Jesús guial dád yu'nayax, rëbaman:

—¡Dád nawëëg naj chu' benrijcw loj xguialrniabee Dios!

25 Adli nawëëgt téd tijb camell xan gagux, guial chu' tijb bén rijcw loj xguialrniabee Dios.

26 Abi' ree bén biguiejn ni rëb Jesús, rëb reeman:

—¿Chu za zajc laa loj xcasti Dios?

27 Dxel rëbaman loj reeman:

—Yu' ni ad zajct güün bénguidxliuj, per Dios graczan zajc güünman.

²⁸ Dxel rëb Bëd lojman:

—Dad, ma basa'nan graczi ni raya'pan persi zudnaalan lüj.

²⁹ Zianz rëb Jesús:

—Diidxiczi rnin lojdi, chutëez bën rusa'n lidx, lacheel, bijch, o xdad, o xniaa, o xi'n guial rünjman zi'c rniabee Dios,

³⁰ mazri zien ni tia'man loj guidxliuj guie. Abi' zajpaman guialnaban tiblyaa con Dios.

Rugojn Jesús zatijb guial guiëtaman

(Mt. 20:17-19; Mr. 10:32-34)

³¹ Gurejdx Jesús guidxiptio'p ree xbejnman tibladd, abi' rëbaman loj reeman:

—Yan, ziyo' ree Jerusalén lod gac zi'c bacaa ree bën badëë xtiidx Dios loj ree bejn xcwent Bën guxhaal Dios.

³² Yayü reeman laaman loj ree benzit, guze' reeman laaman, guinee reeman laaman ni rëntzi reeman, abi' gucoj'p xhiejn reeman lojman.

³³ Quin reeman laaman dxel gugüjt reeman laaman, per ni yayon dxej yabanman.

³⁴ Per laa reeman ad bignia'tczi reeman ni rëbaman, ad ragbee tët reeman checx zeel rëbaman zian din ad bile't nignia' reeman xhie rën guiëb ni guneeaman.

Rayajc guialoj tijb bénlutia'p

(Mt. 20:29-34; Mr. 10:46-52)

³⁵ Chi ma cadxin Jesús gajxh guiedx Jericó, tijb bénlutia'p, zojbaman cwë' nejz rniabaman carda.

³⁶ Chi gogbeeman cadëd zien ree bejn, gunabdiidxaman xhie cayajc.

³⁷ Abi' rëb reeman lojman guial Jesús bën Nazaret cadëd niz yagaj.

³⁸ Dxel gurixdiajman rëbaman:

—jJesús, xdiaa Davi, baya naj!

³⁹ Bën ned ree rdilë reeman laaman din gucwëez ro'man, per mazri rbixdiajman, rëbaman:

—jXdiaa Davi, baya naj!

⁴⁰ Dxel guzudxe Jesús abi' gunabeeman bica' reeman laaman. Chi bidxinman gajxh lojman, gunabdiidxaman lojman, rëbaman:

⁴¹ —jXhie rën'l günan por lüj?

Badxi'man laan rëbaman:

—Dad, rënan yani lon.

⁴² Dxel rëb Jesús lojman:

—jMa zile' guguaa! Ma bayajquil guial bililadxil naj.

⁴³ Hor guin gajc bani loj bën guin, abi' binalaman Jesús rudëëman quixtëë loj Dios. Në gra ree bën baguaa ni goc rudëë quixtëë loj Dios.

19

Wej Jesús lidx Zaqueo

¹ Guyu Jesús luguiedx Jericó abi' guzuloj cadëdaman luguiedx guin.

² Yagaj zojb tijb benrijcw laman Zaqueo. Laaman rniabee ree bën ruquijx impust.

³ Rën Zaqueo guin güünbeeman Jesús, per ad rille't guguaaman laaman guial dád zien ree bejn abi' laaman najman bendop.

⁴ Zeel ruxüünman gunedaman, abi' din chile' guguaaman Jesús, wë'paman loj tijb yagro' zojb gajxh lod tëd Jesús.

⁵ Chi gudëd Jesús yagaj, gules lojman abi' rëbaman lojman:

—Zaqueo, cari baguiajt, din yandxej naj yaya'nan lidxil.

⁶ Dxel cari da't baguiajt Zaqueo, abi' dád rabaaman zignëman Jesús.

⁷ Chi baguiaa ree bejn zian, gra reeman guzuloj caneeguijdx Jesús rëb reeman zigya'nman lidx tijb bëndol.

⁸ Dxel guzuli Zaqueo, abi' rëbaman loj Jesús:

—Dad, gagui's garol ni ra'pan loj ree bënprob. Abi' bal yu' bën baquijxan mazri guial loj ni naj quixaman, yayünan tajp volt mazri guial loj ni gulaanan.

⁹ Dxel rëb Jesús lojman:

—Yandxej ma been Dios perdon gra ree bën zojb lidx Zaqueo guial rililadxaman Dios zi'cgajc Abraham.

¹⁰ Din Bén guxhaal Dios zëédaman zidgadiilaman bën ad zët ree loj xnejz Dios din laa reeman loj xcasti Dios.

Xcwent milia

¹¹ Bén cucaagdiajg ree ni canee Jesús, beman tijb cwent loj reeman guial ma zë reeman gajxh Jerusalén abi' laa reeman naladx reeman guial hor guin guidxin xguialrniabee Dios.

¹² Dxel rëbaman loj reeman:

—Guyu tijb bejn, zëédaman loj tijb famil zojbloj. Zëman zijt lod tia'man guialrniabee din gacaman rey dxel yayejcaman nabee ladxaman.

¹³ Chi gadaman grii gurejdxaman chii xmojsaman abi' loj tijbgaj reex badëëman zro' milia, zianz rëbaman loj reex: “Gol beennë milia guin dxiin xt chi guidxin dxej yagualan.”

¹⁴ Per ree bën ladxaman guial rdxe'ch reeman laaman, guxhaal reeman tibcwaa ree bën zinal laaman persi biguiedx reeman guial ad rënt reeman gac bën guin xrey reeman.

¹⁵ Per laaman bazuj reeman gacaman rey, abi' bayejc ladxaman. Chi badxinman dxel gunabeeman bignee reeman mojs badëëman milia guin din gagbeeman plac ma been tijbgaj reex gan.

¹⁶ Mojs bidxin yaloj rëbix: “Dad, milia ni baneel ma beenan gan chii volt mazri.”

¹⁷ Dxel rëb rey guin lojx: “Zagdxen mojsza'c, ma beenl zi'c rayal. Abi' guial beenl zi'c rayal con ta'nzi ni banen, yan guzun lüj nabeel chii guiedx.”

¹⁸ Chi bidxin mojs barojp guin, rëbix: “Dad, milia ni baneel lon ma beenan gan gaay volt mazri.”

¹⁹ Ziangajc rëb rey guin loj mojs guin: “Lüj nabee gaay guiedx.”

²⁰ Dxel bidxin zatijb mojs guin abi' rëbix: “Dad, laa xmilial guie, badxe'chaawanan lën tijb baydoo,

²¹ din bidxeban lüj guial ad rayatil bejn. Raca'l ni ad najt xieenl abi' rato'pil guialnaza'c lod ad guxübintil.”

²² Dxel rëb rey guin: “Mojs guijdx por xtiidxgajquil rayalil casti. Bal ragbeel guial ad rayatan bejn, abi' raca'n ni ad najt da xieenan ratop tëen guialnaza'c lod ad guxübintan.

²³ ¿Chexc ad badëëtil da milian nigui'n bejn din chi nagualan naca'nan con guidib xi'nan?”

²⁴ Dxel rëb rey guin loj ree bën za' yagaj: “Gol baca' milia zii lojx, gol badëëdan loj xin ca' mazran.”

²⁵ Abi' rëb reeman loj rey guin: “Dad, per ma ca'x zro'n.”

²⁶ Badxi'man laan rëbaman: “Bën rajp zro', zaca'man mazri, per bën rajp ta'nzi, xt ta'n ni rajpaman chiquied lojman.

27 Abi' ree b n rdxe'ch naj b n ad guy nt ree niajcan rey, gol tan  reeman guie, gol bag jt reeman lon.”

Ru Jes s Jerusal n
(Mt. 21:1-11; Mr. 11:1-11; Jn.12 :12-19)

28 Chi gulox r b Jes s zian, dxel basnuu z man Jerusal n.

29 Chi bidxinman gajxh guiedx Beftag  con Betania, n  gajxh guia' la Olivos, dxel guxhaal tio'p ree xbejnman,

30 r baman loj reeman:

—Gol chej guiedxdo riga' guin, chi guidxindi guidxaaglojdi tijb burquie'n, caduub, achut wabib laab. Gol guxhiequib gol tan b.

31 Abi' bal chu guiniabdiidx lojdi chexc zeel rxhiequidi laab, gol g jdx Dad Jes s cayaadx laab.

32 Wej ree b n guxhaalaman bidxaagloj gajc reeman zi'cgajczi r b Jes s loj reeman.

33 Abi' chi caxhiec reeman bur guin, gunabdiidx ree b n naj xbur laab, r b reeman:

— Chexc zeel caxhiequidi bur guin?

34 Badxi' reeman laan, r b reeman:

—Din Dad Jes s cayaadx laab.

35 Dxel bin  reeman bur guin lod za' Jes s, zianz badxiib xab reeman xijchib abi' been reeman laaman yudar persi gudxibaman laab.

36 Abi' ree bejn rguijxh xab reeman lunejz lod z  Jes s.

37 Chi ma z  reeman gajxh laguiajt ni naj guia' la Olivos, gra ree b n zinal Jes s guzuloj rbixdiaj reeman guial d d rabaa reeman abi' ruza't reeman Dios zagdxe por gra ree milagr ni ma baguiaa reeman.

38 R b reeman:

—iN jnle' Dios b n z  d por laaman! iYu' guialrabaa xanyabaa! iBenza'c bendxoon naj Dios b n yu' xanyabaa!

39 Dxel ree b nfarisew no'ch loj ree b n zinal laaman, r b reeman lojman:

—Mextr, gudil  ree b n guin chit   rniee reeman zian.

40 Per badxi'man laan r baman:

—Naj rni l jt, bal yacw  z ro' reeman, guiaj ree cwixdiaj zian.

41 Chi bidxinman gajxh Jerusal n, dxel baguiaaman guiedx guin, zianz biinman por laan.

42 R baman:

—iB n Jerusal n, xi nix majsi yandxejzi yayagbeedi chu yabe'cdxe luxdoodi! Per yan naguie'ch najn par l jt, ad zile't chignia'di laan.

43 Din guidxin dxej ni g  n ree b n rdxe'ch l jt tijb ze' gad d ladxidi, abi' gra lad gusiaaw reeman l jt,

44 gug jt reeman l jt. Dxel gunijt reeman ladxidi, ni'qui tijb guiaj ad zaya'nt guijc stijb guiaj, din ad bidxga'tidi hor ni bidganaj Dios l jt.

Rab   Jes s b n ruto' ree ro' yadooro' Jerusal n
(Mt. 21:12-17; Mr. 11:15-19; Jn.2 :13-22)

45 Chi bidxin Jes s ro' yadooro' Jerusal n, guzuloj cayb  man b n cuto' ree n  ree b n cazii,

46 r baman loj reeman:

—Loj xtiidx Dios r b: “Lidxan naj yu lod rbejdx rniab bejn Dios.” Per l jt n jndan zi'c lidx ree xingubaan.

⁴⁷ Guixie guixie rulüü Jesús bejn ree lën yadooro' Jerusalén, per ree bixhioz rniabee ree bixhioz con ree mextr rajc ley, nê ree guxtis luguiedx guin raguil reeman mod din gugÿjt reeman laaman.

⁴⁸ Per ad radxejlt xhienaag güün reeman, din graczi ree bejn rucaagdiajg chaaw ni rulüüman laa reeman.

20

Xgualrniabee Jesús

(Mt. 21:23-27; Mr. 11:27-33)

¹ Lën ree dxej ni za' Jesús lën yadooro' Jerusalén, culüüman bejn ree xtiidx Dios, bidxin ree bixhioz rniabee ree bixhioz, con ree mextr rajc ley, nê ree guxtis Israel,

² abi' rëb reeman lojman:

—Guna, ¿chu na güünl ni guin ree? ¿Chu banee guialrniabee lojl?

³ Badxi' Jesús laan, rëbaman:

—Ziangajc naj yu' tijb ni ganabdiidxan lojdi. Gol badxi'n:

⁴ ¿chu guxhaal Waj bidgaroobnijsaman bejn ree, Dios ya o bénguidxliuj?

⁵ Dxel guzuloj rëb loj lasa' reeman:

—Bal yaguie'ch ree Dios guxhaal laaman, zanaman. “¿Chexquiza zeel ad billadxtidi laaman?”

⁶ Abi'za bal yaguie'ch ree bénguidxliuj guxhaal laaman, zugÿjt ree bejn dunuj ree con guiaj din gra reeman riladx guial Waj gojc bën badëë xtiidx Dios loj ree bejn.

⁷ Abi' badxi' reeman laan rëb reeman guial ad ragbeet reeman chu guxhaal Waj bidgaroobnijsaman bejn ree.

⁸ Dxel rëb Jesús loj reeman:

—Ni'qui naj ad zanitan lojdi chu banee guialrniabee günan ni guin ree.

Xcwent ree mojs guijdx

(Mt. 21:33-44; Mr. 12:1-11)

⁹ Dxel guzuloj cayü Jesús tijb cwent loj ree bejn, rëbaman:

—Guyu tijb bejn guxübinman uv ree loj xguiniaaman, dxel badëëman laan garol loj ree bën güün dxiin lojn, zëtaman zijt.

¹⁰ Chi bidxin dxej yala' reeman uv guin, guxhaalaman tijb xmojsaman chigxiix ni rayalaman, per ree bën rÿjn dxiin loj guiniaa guin gudijn reeman mojs guin abi' badxi' reeman laax zezi.

¹¹ Dxel guxhaalaman mojs ren, per nêgajc mojs guin gunee reeman ni rëntzi reeman, gudijn reeman laax abi' badxi' reeman laax zezi.

¹² Zianz guxhaalaman zatijbix, per gudiilguijdx reeman laax abi' babëë reeman laax loj guiniaa guin.

¹³ Dxel rëb bën naj xguidxliuj laan: “¿Xhienaag günan yan? Gaxhal da xi'nan xin rën da'tan, wed zajp reeman laax respejt.”

¹⁴ Per chi baguiaa ree bën guin laax, rëb loj lasa' reeman: “Xin guinan naj xin yaya'nnë guidxliuj guin. Yagÿjt reex din gacan du xien ree.”

¹⁵ Dxel babëë reeman laax loj guidxliuj guin, bagÿjt reeman laax.

Zianz gunabdiidx Jesús loj ree bën caneenëman, rëbaman:

—Yan, ¿xhie naladxidi güünnë bën naj xguidxliuj laan bën guin ree?

¹⁶ Naj rni lojdi guial zi'taman din gugÿjtaman bën guin ree dxel gudëëman guidxliuj guin loj ree ben ren.

Chi biguiejn reeman zian dxel rëb reeman:

—¡Gagnë Dios ad zajct zian!

¹⁷ Per Jesús baguiaaman loj reeman, abi' rëbaman:

—Bal id zajc zian çxhieza rën guiëb ni ca loj xtiidx Dios? Lod rëb:
 Guiaj ni gulëëgo'n ree bën rüjn yu,
 laan naj ni mazri been sirv gojcnë yu guin.

¹⁸ Chutëëz bën yab guiyc guiaj guin, gacaman zi'c tijb ni riroox, guiáad bal yab guiaj guin guijcaman, gacaman zi'c tijb ni ryüüdëj.

Xcwent impuest

(Mt. 21:45-46; 22:15-22; Mr. 12:12-17)

¹⁹ Bixhioz rniabee ree bixhioz con ree mextr rajc ley, hor guin gajc guyën reeman niniaaz reeman Jesús guial gogbee reeman cuza'taman laa reeman, per bidxeb reeman bejn ree.

²⁰ Abi' guxhaal reeman bën zigla'ch ree laaman din güünzi reeman guial guluü naj reeman benza'c, din yaguil reeman mod guinee Jesús diidx ni gudxiib reeman guijc, din chile' yayü reeman laaman loj gobernador Rom.

²¹ Dxel gunabdiidx reeman lojman, rëb reeman:

—Mextr, dunujn rayagbee guial rnieel rulüü tëël zi'c rayal, din par lüj tiblojzi naj bejn, abi' walil rulüül guial xhienaag rën Dios guiban bejn.

²² ÇZagdxen ya radijxan impuest loj rey César, o ad zagdxetan?

²³ Per gogbee gajc Jesús xgab mal ni cayüjn reeman abi' rëbaman loj reeman:

²⁴ —Gol balüü tijb cintabl lon. ÇChu loj ca lojn chu tëë laj ca lojn?

Badxi' reeman laan, rëb reeman:

—Loj rey César ca lojn në lajman.

²⁵ Dxel rëbaman loj reeman:

—Gol badëëcliza loj rey César ni naj xieen César, guiáad loj Dios gol badëë ni naj xieen Dios.

²⁶ Abi' gra ni guneeman niz loj ree bejn, achetri badxejl nudxiib reeman guijc din niniaaz reeman laaman. Badxali loj reeman ni guneeman abi' achetri rëb reeman.

Xcwent guial yaban ree bengüt

(Mt. 22:23-33; Mr. 12:18-27)

²⁷ Tio'p choon ree bénsaducew bignaj Jesús, bénsadusew guin ree ad rlladxt reeman guial yaban ree bengüt, zeel rëb reeman loj Jesús:

²⁸ —Mextr, loj xley Moisejs rëb guial bal guiët tijb xinguaaw abi' achut xi'nx guyu con lacheelix, bijch xingüt guin guxhliaanë béngunaa bizëjb guin din chu' xi'n reex zi'c guluü xi'n xin güt guinan.

²⁹ Guyu tijb famil lod goc reex gajdx bijch. Baxhliaa xin yaloj guin, per güjtix abi' ad guyut xi'n reex con lacheelix.

³⁰ Dxel bijch barojpix baxhliaanë béngunaa guin, per güjtgajquix ad guyu gajct xi'n reex.

³¹ Zianz baxhliaanë xin bayon guin béngunaa bizëjb guin, zianz baxhliaanëman guigajdx reex abi' gra reex güjt achut xi'n reex guyu con laaman.

³² Ni bigratë në béngunaa guin güjt.

³³ Yan, chi yaban ree bengüt, çchu loj guigajdx reex gac xbéngunaa laaman guial gra reex baxhliaanë laaman?

³⁴ Dxel rëb Jesús loj reeman:

—Loj guidxliuj guie ruxhliaa ree bejn abi' rudëed xi'n reeman ruxhliaa.

³⁵ Per ree bën yaban zatijb, bën rayal ree gap guialnaban tiblyaa con Dios, ad zuxhliaatri reeman ad zudëë tëetri xi'n reeman guxhliaa,

³⁶ din ad zëjttri reeman, gac reeman zi'c ree xianjl Dios. Gac tëë reeman xi'n Dios guial ma baban reeman.

³⁷ Abi' xcwent ni yaban ree bengüt, xt Moisejs rëb zian tiblajt loj xtiidx Dios lod rëbaman guial baguiaaman yag ni caye'c. Yagaj rëb Dios lojman guial Dios naj xDios Abraham, xDios Isaac, nè xDios Jacob.

³⁸ Din Dios ad najtaman xDios ree bengüt, najman xDios ree bén naban, din par laaman gra ree bejn naban.

³⁹ Dxel yu' ree mextr rajc ley, rëb lojman:
—Mextr, zagdxequi guneel.

⁴⁰ Abi' achetri bayax reeman niniabdiidx reeman lojman.

Chu loj xdiaa zëed Cristo
(Mt. 22:41-46; Mr. 12:35-37)

⁴¹ Rëb Jesús loj ree bejn:

—¿Chexc zeel rëb ree bejn guial zëed Cristo loj xdiaa rey Davi?

⁴² Awa Davi guin gajc guneel loj libr Salmos, rëbaman:

Dios rëb loj dux Dad ree:

“Gurej da ladbeen,

⁴³ xt gabecan xin rdxe'ch ree lüj guia'l.”

⁴⁴ Yan, bal xi'n Davi naj Cristo. ¿Chexquiza zeel rëb Davi guin lojman Dad?

Ni rüjn ree mextr rajc ley
(Mt. 23:1-36; Mr. 12:38-40; Lc. 11:37-54)

⁴⁵ La'tgaj cucaagdiajg gra ree bejn ni rëb Jesús, rëb loj ree xbejnman:

⁴⁶ —Gol gojp cudad con ree mextr rajc ley. Din ruladx reeman sa reeman gacw reeman lajd zagdxe ruladx tëe reeman gugajpdioz ree bejn laa reeman con respejt niz lunejz, abi' lën ree yadoo ruladx reeman cwe reeman lod rbej ree bén zobjloj, ziangajc rüjn reeman lod ritaw reeman.

⁴⁷ Raca' tëe reeman lidx ree béngunaa bizëjb, abi' din guiëb ree bejn guial benza'c naj reeman, dád xchej rbejdx rniab reeman Dios. Per laa reeman mazri casti naroob yalay reeman.

21

Gon badëed tijb béngunaa bizëjb
(Mr. 12:41-44)

¹ Chi culüü Jesús bejn ree lën yadooro' Jerusalén, dxel gules lojman baguiaaman cagu' ree benrijcw gon lën alcancia.

² Baguiaa tëeman tijb béngunaa bizëjb prob, cagu'man tio'p cintabldoo lën alcancia guin.

³ Dxel rëb Jesús loj ree xbejnman:

—Diidxli rnin lojdi guial bén bizëjb prob guin mazri lasajc gon badxe'man guial loj gon badxe' gra ree bén guin.

⁴ Din graczi reeman rudxe' ni rüjn laa reeman sobr, per laaman majsi najman bénprob, badxe'man graczi ni rajpaman par guibannëman.

Rëb Jesús guial yaze'n yadooro' Jerusalén
(Mt. 24:1-2; Mr. 13:1-2)

⁵ Tio'p choon ree xbejn Jesús cayü reeman diidx xcwent ree guiaj zagdxe najchaawnë yadooro' Jerusalén, nè ree ni lasajc ni rudëed ree bejn par sучааw yadoo guin. Dxel rëb Jesús loj reeman:

⁶ —Gra ni cuguaadi yan, zadxin dxej ni'qui tijb guiaj ad zaya'nt guijc stijban, gran yaze'n.

Ni gac chi gad guidxliuj nit
(Mt. 24:3-28; Mr. 13:3-23)

⁷ Dxel gunabdiidx reeman lojman rëb reeman:

—Mextr, ¿goc gac zian? ¿Xhie ree sen gac chi ma zidyob gac zian?

⁸ Zianz rëb Jesús loj reeman:

—Gol gojp cudad achu gusquiee lëjt. Din zien ree bén gui't guiëb reeman guial por naj zëed reeman guiëb tëë reeman: “Naj naj Cristo”; o “Ma zidyob dxej gui'taman.” Per ad chililadxidi laa reeman.

⁹ Abi' chi guiguiejndi cayajc wadijl o chas ree bejn contr xguxtis reeman, ad guidxebidi din yaloj gac zian. Per ad por laatan ma bidxin dxej nit nuidxliuj.

¹⁰ Rëb tëë Jesús loj reeman:

—Til nacion con stijb nacion, til tëë bén rajp guialrniabee con stijb bén rajp guialrniabee,

¹¹ gui't tëë xudoxh, në gubijn, në guialguijdxdoxh niz ni niz guie abi' xanyabaa guiguien ree ni nadxeb.

¹² Per chi gad gra ree ni guin gac, guiniaaz ree bejn lëjt din gusagzi reeman lëjt, chinë reeman lëjt lën ree yadoo din gudëed reeman lëjt casti, cu' reeman lëjt ladxguib chinë tëë reeman lëjt loj ree rey në loj ree gobernador guial najdi da bejnan.

¹³ Zian gac din chile' güdi da diidxan loj reeman.

¹⁴ Ad aal chu'di xgab xhie guiëbidi loj reeman.

¹⁵ Din naj gune diidx ni guinieedi gune tëën quiargueijn. Abi' ni'qui tijb bén rdxe'ch lëjt ad züjnt gan loj xtiidxidi ad zanee tëët reeman contr lëjt.

¹⁶ Per lëjt xt xdadidi o xniaadi, o bijchidi o xfamilidi o xmiwidi yayü reeman lëjt, abi' yu'di gugüjt reeman.

¹⁷ Gra bénguidxliuj guidxe'ch lëjt guial najdi da bejnan.

¹⁸ Per ni'qui tijb guidxguijquidi ad zanijtt por zian.

¹⁹ Abi' bal sudxi'chidi loj xnejz Dios, zajpidi guialnaban tiblyaa con Dios.

²⁰ Chi guguaadi nayaw ree suldad Jerusalén, ma qui nit guiedx guin.

²¹ Dxejzii ree, bén za' ree niz Judea, gol bigxüün niz dajn ree, abi' ree bén za' guiedx Jerusalén gol brii luguiedx guin, guiaád ree bén za' dajn ad bal yayudi luguiedx guin.

²² Din dxej guin ree gudëed Dios bejn ree casti din gac cumplid zi'c ca loj xtiidxaman.

²³ ¡Proba ree béngunaa nüü xi'n o béngunaa ca' ree xindobëz lën ree dxejzii! Din dád sagdiaj ree bejn abi' dád casti narooob yayal ree bénluguiedx guin.

²⁴ Yu' ree bén guiët loj wadijl yu' tëë reeman guiniaaz reeman chinë naguiejn reeman laa reeman nacion rent nacion ren ree. Abi' ree benzit zanabee reeman Jerusalén xt yayaaloj dxej ni tiëb Dios nabee reeman yagaj.

Gui't Bén guxhaal Dios zatijb

(Mt. 24:29-35, 42-44; Mr. 13:24-37)

²⁵ Dxel gac sen loj gubijdx, con loj bëëw, con loj ree bajl xanyabaa. Abi' loj guidxliuj gagdxa ree bejn guidxeb tëë reeman guial gac naquie' loj nijsdoo gac tëë naquie' por xtüjp nijs.

²⁶ Abi' ree bejn xt yadaj reeman guial guidxeb reeman chi güün reeman xgab ni gac loj guidxliuj, guiaád ree ni rguien xanyabaa guiniib reen.

²⁷ Abi' guguaaa reeman Bén guxhaal Dios, rdiinman bacha' zëëdaman loj zaj con xguialrniabeeman.

²⁸ Chi suloj gac ree ni guin, gol bagu' luxdoodi zagdxe gol gules tëë lojdi din ma zidyob dxej ni laadi loj casti.

²⁹ Rëb tëë Jesús loj reeman:

—Gol baguiaa yag higo o xhietëez zatijb yagan.

³⁰ Chi ma caydxib ree xbalagan, lëjt ragbee guial ma zëed tiamp nalaa.

³¹ Ziangajc chi guguaaadi ma cayajc ree ni guin, zagbeedi guial ma zëed xgualrniabee Dios gajxh.

³² Diidxli rnin lojdi guial gra ree ni guin gac chi gad gra ree bén naban yan guiët.

³³ Guidxliuj në xanyabaa zanijt reen, per da diidxan ad zadëdt gacan cumplid.

³⁴ Gol gojp cudad ad güün graloj ni riga' loj guidxliuj guie lëjt gan, zi'c guial rzüdx, në guial ru xgab por ni ryaadxidi par guibandi din chi gualan zatijb, ad gac dxej guin par lëjt

³⁵ zi'c tijb tramp. Din zian gac dxej guin par gra ree bénguidxliuj.

³⁶ Gol guzujsin, guixie guixie gol gurejdx gunab Dios din gac laadi loj gra ree ni gac loj guidxliuj din chile' tëë sudi loj Bén guxhaal Dios.

³⁷ Radxe rulüü Jesús bejn ree lën yadooro' Jerusalén guiáad guxhin raya'nman ruguia' la Olivos.

³⁸ Abi' rsildoo rej gra ree bejn lën yadoo guin ricaagdiajg reeman ni rnieeman.

22

Baya'n reeman diidx xhienaag guiniaaz reeman Jesús
(Mt. 26:1-5, 14-16; Mr. 14:1-2, 10-11; Jn.11 :45-53)

¹ Chi ma zidyob lanij pascw, chi raw reeman guiadxtil ni ad yu't levadur.

² Bixhioz rniabee ree bixhioz con ree mextr rajc ley, raguiil reeman mod xhienaag gugüjt reeman Jesús guial rdxeb reeman bejn ree.

³ Dxel guyu xindxab luxdoo tijb ree xi apóstoles Jesús, bén la Judas Iscariote.

⁴ Judas guin bigneenë bixhioz rniabee ree bixhioz con ree bén rniabee bén rajp ree yadooro' Jerusalén, abi' benëman laa reeman diidx xhienaag yayüman Jesús loj reeman.

⁵ Dád babaa reeman abi' rëb reeman guial gudëed reeman milia lojman.

⁶ Zianz cwëjbaman, dxel guzuloj raguiilaman mod xhienaag yayüman Jesús, guial ad zagbeet ree bejn.

Gudawnë ree xbejn Jesús xche

(Mt. 26:17-29; Mr. 14:12-25; Jn.13 :21-30; 1Co.11 :23-26)

⁷ Chi bidxin lanij pascw, tijbgaj yu raw ree bejn guiadxtil ni ad yu't levadur rugüjt tëë reeman tijb xiil,

⁸ dxel guxhaal Jesús Bëd con Waj, rëbaman loj reeman:

—Gol biguieen ni yadaaw ree guxhin pascw.

⁹ Abi' gunabdiidx reeman lojman rëb reeman:

—¿Ban guin rën'l yuguieenan laan?

¹⁰ Zianz rëb Jesús loj reeman:

—Chi chu'di luguiedx guin, guguaaadi tijb xinguaaaw ca'x tijb re yu' nijs. Gol chinalix xt lod yayux,

¹¹ gol güjdx loj bén naj lidxan: “Na mextr: ¿Con lënü gawnë ree xbejnman guxhin pascw?”

¹² Dxel gulüüman lëjt tijb lënü ni rarojp pijs, ma najcchaaw lënü guin. Yagaj gol been ni yadaaw ree xche.

¹³ Zianz wej reeman abi' bidxaagloj reeman gra zi'cgajczi rëb Jesús loj reeman. Dxel been reeman guialraw guin ni gaw reeman guxhin pascw.

¹⁴ Chi bidxin hor, Jesús con ree bén naj apóstoles gurej reeman xan mex.

15 Dxel rëbaman loj reeman:

—İDiizd gocli rënan gawnë'n lëjt pascw guie, chi gad dxej guidxin gazaagdi-
ajn abi' guiëtan!

16 Din naj rni lëjt guial ad yu'tri dxej gawnë'n lëjt, xt chi ma canabee Dios
guidblagaa.

17 Dxel cwa'man tijb cojp yu' vin, chi gulox badëëman quixtëë loj Dios,
rëbaman loj reeman:

—Gol cwa' vin guie, gol gudi'san loj gradi.

18 Din diidxli rnin lëjt, ad yu'tri dxej guië'n vin xt chi ma canabee Dios
guidblagaa.

19 Dxel cwa'man guiadxtil badëëman quixtëë loj Dios, zianz gula'man laan,
gudi'saman laan loj reeman, rëbgajman:

—Guiadxtil guie naj da cuerpan ni ma bayün din guiëtan por lëjt. Chi
güündi zian, gol been zian guial rusaaladxidi naj.

20 Abi' ziangajc beenman con cojp ni yu' vin guin, chi gulox gudawaman
xche, rëbaman:

—Vin guie naj da rejnan ni gaxhie'n chi guiëtan din guixal tijb nejz cüb
xhienaag gap ree bejn perdon loj Dios.

21 Per yan bën yayü naj, laa yaaman xoob loj mex lod xoob gajc yan.

22 Per Bén guxhaal Dios, naj sagdiajman abi' guiëtan. Per įprobza bën
yayü laaman!

23 Dxel guzuloj rniabdiidx loj lasa' reeman chu reeman yayü laaman.

Chu mazri zojbloj

24 Dxel guzuloj reeman cadildiidx reeman chu loj gra reeman naj mazri
bën zojbloj.

25 Per rëb Jesús loj reeman:

—Bën naj ree rey loj guidxliuj guie rniabee reeman bën ladx reeman zi'ctzi
rën reeman, abi' ree bën rniabee, rëb reeman guial rünj reeman ni zagdxë.

26 Per lëjt ad rayalt güündi zian, bën mazri zojbloj lojdi rayal güün laa-
gajcaman zi'c tijb bën ad zojblojt. Guiáad bën rniabee lojdi rayal güün
laagajcaman zi'c tijb mojs.

27 ¿Chu naj mazri bën zojbloj loj guidxliuj guie? ¿Bën rbej xan mex par gaw
ya o bën rbe'c guialraw? ¿Nid bën rbej xan mex guin naj mazri bën zojbloj
ya? Guiáad naj za'n lojdi zi'c tijb bën rbe'c guialraw.

28 Lëjtctzi za'në naj loj ree dxej cazaagdiajn.

29 Zeel gunen guialrniabee lojdi zi'c banee da Dadanan lon,

30 abi' gawidi loj da mexan lod ganabeen cwe tëedi loj ree yagxhil lod
güündi guialguxtis loj gra ree bën za loj guidxiptio'p xdiaa Israel.

Rëb Jesús guial guiëb Bëd ad nünbeetaman laaman

(Mt. 26:31-35; Mr. 14:27-31; Jn.13 :36-38)

31 Rëb tëë Jesús:

—Simón, Simón, ma gunab xindxab lëjt din güünx lëjt prueb zi'c rbijb bejn
trigo.

32 Per naj ma guredx gunaaban Dios por lüj chitëë cwëz chililadxil naj.
Guiáad lüj chi yazudxi'chil loj ni rliladxil naj zatijb, gognë ree lasa'l din
sudxi'ch reeman loj ni rliladx reeman naj.

33 Dxel rëb Bëd lojman:

—Dad, ad zaro'nladxtan lüj majsi gayu'në'n lüj ladxguuib o xt guiëtnë'n lüj.

34 Abi' rëb Jesús:

—Naj rni lüj Béd, yan guxhin gajc chi gad guïd cwidxa', choon volt mal rëbil ad nünbeetil naj.

Zidyob dxej sagdiaj Jesús

³⁵ Dxel gunabdiidx Jesús loj ree xbejnman rëbaman:

—Chi guxhalan lëjt sin bols, sin milia, nè sin gurèch, ¿yu' ni biaadxidi ya?

Badxi' reeman laan rëb reeman:

—Achet.

³⁶ Dxel rëbaman loj reeman:

—Sa'n yan bën rajp milia nè bols, gol cwa'n. Guiáad bën ad rajpt espad, gol bato' xabidi din siidi tijban.

³⁷ Din naj rni guial rüjn naguiejn gac zi'c rëb loj xtiidx Dios por naj, lod rëb: “Abi' nayabaman loj ree benmal.” Gra ni ca loj xtiidx Dios por naj, naj gacan cumplid.

³⁸ Dxel rëb reeman lojman:

—Dad, guie naca'n tio'p espad.

Badxi'man laan rëbaman:

—Zajquican.

Rbejdx rniab Jesús Dios lod la Getsemaní

(Mt. 26:36-46; Mr. 14:32-42)

³⁹ Dxel brier Jesús zi'c naj xcostumbraman zëman ruguia' Olivos, abi' binal ree xbejnman laaman.

⁴⁰ Chi bidxin reeman yagaj, rëbaman loj reeman:

—Gol gurejdx gunab Dios, chitëë güün xindxab lëjt gan.

⁴¹ Abi' wejman zijt zi'ct lod rucaa bejn tijb guiaj, zianz bazuxibaman gurejdx gunabaman Dios,

⁴² rëbaman:

—Dad, bal tiëbil, babëë naj loj ni gazaagdiajn per ad gac zi'c rënan, rayal gac zi'c rën.

⁴³ Dxel balüüloj tijb anjl guza xanyabaa lojman persi badëëman laaman gojl.

⁴⁴ Abi' chi cazagdiaj da'taman, mazri con gan cabejdx canabaman Dios ryajb tëë ree xnijs ragneeyaman luyuj zi'c rejn.

⁴⁵ Chi bisuman lod cabejdx canabaman Dios, bignaj ree xbejnman abi' chi badxinman cwë' reeman laa reeman naga'yëjs, guial yu'naya reeman.

⁴⁶ Zianz rëbaman loj reeman:

—¿Chexc zeel naga'yëjsidi? Gol bixche, gol gurejdx gunab Dios chitëë güün xindxab lëjt gan.

Gunaaz reeman Jesús

(Mt. 26:47-56; Mr. 14:43-50; Jn.18 :2-11)

⁴⁷ Sta caneenë Jesús bën naj ree xbejnman chi bidxin ree benzien. Në bën brier laj Judas, bën goc tijb ree xbejn Jesús, nedaman loj ree bën guin abi' bibigaman loj Jesús gudawaman laaman xid.

⁴⁸ Dxel rëb Jesús lojman:

—Judas, ¿wen con tijb xid rayül Bén guxhaal Dios ya?

⁴⁹ Chi baguiaa ree bën za'në Jesús ni cayajc, rëb reeman lojman:

—Dad, ¿zalëë dux espadan ya?

⁵⁰ Abi' tijb xbejnman gudiilguijdxaman xmojs bixhioz rniabee gra ree bixhioz, gutü'man guidaigj ladbeeman.

⁵¹ Per rëb Jesús loj reeman:

—Guzujr ree bënan. Ma gojczí.

Dxel baqui' Jesús guidiajg mojs guin abi' bayünman laan.

⁵² Zianz rëb Jesús loj ree bixhioz rniabee ree bixhioz, con ree bén rniabee ree bén rajp yadooro' Jerusalén con xguxtis ree bén Israel, bén bidxin ree par chinë laaman:

—¿Chexc zeel zëédidi con espad con yag din chinëdi naj zi'c tijb xingubaan?

⁵³ Guixie guixie guzunë'n lëjt lën yadooro' Jerusalén abi' ad gunaaztidi naj. Per yan ma bidxin xihoridi, hor ni nabee xindxab.

Rëb Bëd ad nünbeetaman Jesús

(Mt. 26:57-58, 69-75; Mr. 14:53-54, 66-72; Jn. 18 :12-18, 25-27)

⁵⁴ Dxel gunaaz reeman Jesús zinë reeman laaman lidx bixhioz rniabee gra ree bixhioz, binal Bëd laaman zijt zijt.

⁵⁵ Yagaj gule'c ree bén guin guij galay lule', abi' gurej reeman rudëj guin. Në Bëd gurejnë laa reeman.

⁵⁶ Per tijb bëngunaa rüjn dxiin yagaj, chi baguiaaman Bëd zobjaman rudëj guin, baguiaaman lojman, abi' rëbaman:

—Në bén guin za'në Jesús.

⁵⁷ Per gurexuu Bëd, abi' rëbaman loj bén guin:

—Ad nünbeetan laax.

⁵⁸ Ad gojct xchej chi baguiaa zatijb bejn laaman, rëbaman lojman:

—Në lüj naj xbejn Jesús.

Badxi' Bëdan rëbaman:

—Yajqui dad, ad xbejntix naj.

⁵⁹ Gudëd cost tib hor, dxel rëb zatijb bejn:

—Nëczi bén guie za'në laaman din nëman naj bén Galilea.

⁶⁰ Zianz rëb Bëd:

—Ad ragbeetan xhienin rnieel.

Hor ni canee gajc Bëd zian guridxa' tijb guid.

⁶¹ Dxel badxi' loj Jesús baguiaaman loj Bëd, abi' basaaladx Bëd guial rëb Jesús lojman: “Yan guxhin gajc chi gad guid cwidxa', choon volt mal rëbil ad nünbeetil naj.”

⁶² Dxel barii Bëd yagaj, abi' dád naya biinman.

Baze' reeman Jesús gudijn tëë reeman laaman

(Mt. 26:67-68; Mr. 14:65)

⁶³ Bén cayajp ree Jesús, baze' reeman laaman gudijn tëë reeman laaman.

⁶⁴ Guxhii reeman lojman abi' gudijn reeman laaman, dxel rëb reeman lojman:

—jGuneeya' chu gudin lüj!

⁶⁵ Abi' zien ree diidxguijdx rëb reeman lojman.

Za' Jesús loj ree guxtis Israel

(Mt. 26:59-66; Mr. 14:55-64; Jn. 18 :19-24)

⁶⁶ Chi bareguiaal, badxajg lasa' ree guxtis Israel, në ree bixhioz rniabee ree bixhioz con ree mextr rajc ley, abi' binë reeman Jesús lod radxaag lasa' gra ree xguxtis reeman, dxel rëb reeman lojman:

⁶⁷ —Guna du lojn, ¿lüj naj Cristo ya?

Badxi'man laan rëbaman:

—Bal ganinan ad zaliladxtidi.

⁶⁸ Abi' bal xhie ganabdiidxan lojdi, ad zadxi'tidan.

⁶⁹ Per diidz yan, Bén guxhaal Dios cweman xladbee Dios, bén ca' gra guialrniabee.

⁷⁰ Dxel rëb gra reeman lojman:

—¿Lüjn naj Xi'n Dios ya?

Badxi'man laan, rëbaman:

—Waliquidi najcan.

⁷¹ Zianz rëb reeman:

—¿Xhie mazri rüjn naguiejn yadiil ree testiw? Dunuj gajc ree ma baguiejn ni nax con quijb xtiidxix.

23

Binë reeman Jesús loj Pilato

(Mt. 27:1-2, 11-14; Mr. 15:1-5; Jn.18 :28-38)

¹ Dxel wajs gra reeman binë reeman Jesús loj Pilato.

² Yagaj guzuloj cutedia' reeman Jesús lojman, rëb reeman:

—Badxaaglojn xin guie cusquieex bën du ladx ree, rëbix guial ad rayalt yadijx ree impuest loj rey César, rëb tëex guial laax naj Cristo, naj tëex rey.

³ Dxel gunabdiidx Pilato lojman rëbaman:

—¿Lüjn naj xrey ree bën Israel ya?

Badxi' Jesús laan, rëbaman:

—Waliquil, najcan.

⁴ Dxel rëb Pilato loj ree bixhioz rniabee ree bixhioz në loj gra ree bën riga' yagaj:

—Achet xfalt xin guie radxejlan.

⁵ Per laa reeman naguiejnczi rüjn reeman, rëb reeman:

—Cusquieex bejn ree guidib niz Judea con ree ni rulüx laa reeman. Guzulojx niz Galilea abi' yan cayüjnx zian niz guie.

Binë reeman Jesús loj Herodes

⁶ Chi biguiejn Pilato baza't reeman Galilea, gunabdiidxaman loj reeman bal niz Galilea naj ladx Jesús.

⁷ Abi' chi rëb reeman guial najman bën Galilea, guxhaalaman laaman loj Herodes bën rniabee Galilea, guial lën ree dxej guin në Herodes za' Jerusalén.

⁸ Chi baguiaa Herodes Jesús dád babaaman guial diizd gocli rënman guguaaman laaman guial bacaagdiajgaman ruza't ree bejn laaman, abi' rbëzaman guguaaman güünman tijb milagr.

⁹ Zien ree ni gunabdiidxaman lojman, per Jesús achetzi badxi'man.

¹⁰ Në ree bixhioz rniabee ree bixhioz za' yagaj con ree mextr rajc ley, ad rucwëzt rutedia' reeman laaman.

¹¹ Dxel Herodes con ree xsuldadaman xhiernarajc beennë reeman laaman, baze' reeman laaman, bascajcw reeman laaman lajd zagdxé lasa' ni rajcw ree rey. Zianz baxhaal Herodes guin laaman loj Pilato zatijb.

¹² Abi' dxejzii bazuloj baneenë Herodes Pilato zagdxé, din gocli rdxe'ch lasa' reeman.

Gunabee reeman guiët Jesús

(Mt. 27:15-26; Mr. 15:6-15; Jn.18 :39-19 :16)

¹³ Dxel bachajg Pilato lasa' ree bixhioz rniabee ree bixhioz con ree guxtis, con ree bën luguiedx guin,

¹⁴ abi' rëbaman loj reeman:

—Bidnëdi xin guie nadi cusquieex bejn ree. Per niz lojdi ma gunabdiidxan lojx abi' achet xfaltix radxejlan zi'c nadi.

¹⁵ Ni'qui Herodes ad badxejlt xfaltix, zeel baxhaalaman laax lon zatijb. Ma baguiaalojdi achet ni mal beenx din guiëtix.

16 Yan, gudēdan laax casti dxel guslaan laax.

17 Lēn ree dxej lanij guin ruslaa Pilato tijb bēn yu' ladxguuib zi'c goc xcostumbr reeman.

18 Per graczi reeman guzuloj rbixdiaj, rēb reeman:

—jBagūjt xin guin! jBaslaa Barrabás!

19 Badxe' reeman Barrabás guin ladxguuib guial beenman tijb wadijl Jerusalén, guial guzujman contr ree suldad rom, nē guial bagūjtaman bejn.

20 Guneenē Pilato laa reeman zatijb guial guyēnman nuslaaman Jesús,

21 per laa reeman gurixdiaj reeman mazri rejs, rēb reeman:

—jBacaax loj crūjz! jBacaax loj crūjz!

22 Ni bayon volt rēb Pilato loj reeman:

—jXhieza ni mal been xin guin? Achet xfaltje lan radxejlan din guiētix. Gudēdan laax casti dxel guslaan laax.

23 Per laa reeman mazri rbixdiaj reeman, rēb reeman loj Pilato din gucaaman laaman loj crūjz. Abi' guial tant rbixdiaj reeman con ree bixhioz rniabee ree bixhioz, been reeman gan gojc zi'c rēn reeman.

24 Dxel cwējb Pilato beenman zi'c rēn reeman.

25 Abi' baslaaman Barrabás bēn guyu ladxguuib por wadijl nē guial bagūjtaman bejn, guiáad Jesús bayūman laaman loj reeman persi beennē reeman laaman zi'ctzi rēn reeman.

Baca reeman Jesús loj crūjz

(Mt. 27:32-44; Mr. 15:21-32; Jn. 19 :17-27)

26 Chi zinē reeman Jesús din gucaa reeman laaman loj crūjz, gunaaz reeman tijb bēn za Cirene laaman Simón. Ziaadaman bazaman dajn, gunabee reeman laaman güüman xcrūjz Jesús din chinalaman laaman.

27 Zien da't bejn zinal laaman, abi' zien ree béngunaa roon rbixdiaj guial raya reeman laaman.

28 Per baguiaa Jesús loj reeman abi' rēbaman:

—Béngunaa Jerusalén ad roondi por naj, gol biin por lējt gajc nē por xi'ndi.

29 Din zadxin dxej guiēbidi: “Xiquilbaa ree béngunaa ad rajct ru xi'n, nē ree béngunaa ad gojlt xi'n con ree béngunaa ad ca't bindobēz.”

30 Dxel suloj guiēb ree bejn loj ree guia': “Gol guxa't du guiican”, guiáad loj ree lom guiēb reeman: “Gol baquie'ch dunujn.”

31 Yan, nacli naj rüjnnē reeman zian, diidxgui lējt, wed xhieczinin güünnē reeman lējt.

32 Abi' nē tio'p ree xingubaan zinē reeman din tia reex loj crūjz con Jesús.

33 Chi bidxin reeman lod la Calaver, baca reeman Jesús loj crūjz, con grop ree xingubaan guin: tijbix cwa ladbee zatijbix cwa ladruvejs.

34 Abi' chi cucaa reeman Jesús loj crūjz, rēbaman:

—Dad, been reeman perdon, din ad ragbeet reeman xhienin rüjn reeman. Dxel gudxiyt ree suldad suert guiyc xabaman din yala' reex laan.

35 Zien ree bejn riga' yagaj cuguiaa reeman, abi' xt ree guxtis ruze' laaman, rēb reeman:

—Baslaax ben ren ree, yan guslaa laagajquix bal walix laax naj Cristo.

36 Nē ree xin suldad ruze' laaman, rbig reex rudēd reex vinagr guiē'man,

37 rēb reex lojman:

—Bal lüj naj xrey ree bēn Israel, baslaa lüj gajc.

38 Abi' guiyc crūjz guin baca reex lējtr con diidx grieg, diidx latin, nē diidx hebreo, rēban: “Bēn guie naj xrey ree bēn Israel.”

³⁹ Tijb xingubaan ni ca loj crüzj guin guneex diidxguijdx loj Jesús, rëbix:

—Bal lüj naj Cristo, baslaa lüj gajc, baslaa tée dunujn.

⁴⁰ Per zatijbix gudilë xcompniarix, rëbix lojx:

—¿Staczi ad rdxehtil Dios ya majsi lasa'gajc casti guin cadëdil?

⁴¹ Dunuj rayalczi cayzaagdiaj din zian caydijx ni baguieen. Per bën guie achetctzi ni mal wayüjnman.

⁴² Dxel rëbix loj Jesús:

—Basaaladx naj chi ma canabeel.

⁴³ Abi' rëb Jesús lojx:

—Diidxli rnin lojl guial yandxej gajc sunël naj lod naj nix, lod gan.

Güjt Jesús

(Mt. 27:45-56; Mr. 15:33-41; Jn.19 :28-30)

⁴⁴ Chi gol garol dxej, bicajy guidibczi guidxliuj xt raca choon wadxe.

⁴⁵ Bicajy logbijdx guiáad lajd nal lën yadooro' Jerusalén goxya'n, gojcan tio'p lala'.

⁴⁶ Dxel gurixdiaj Jesús, rëbaman:

—Dad, lojl rusa'n da sprijtan.

Chi gulox guneeman zian, dxel güjtaman.

⁴⁷ Chi baguiaa suldad rniabee ree suldad ni goc, baza'tix Dios zagdxe, rëbix:

—Walican achet xtol bën guin yu'.

⁴⁸ Chi baguiaa gra ree bën za' yagaj ni goc, dád gyunaya reeman zia reeman riga'pgaj luxdoo reeman.

⁴⁹ Per gra ree bën nünbee Jesús, con ree béngunaa nal laaman diizd Galilea, zijt guzuj reeman baguiaa reeman gra ree ni goc.

Biguie'ch Jesús

(Mt. 27:57-61; Mr. 15:42-47; Jn.19 :38-42)

⁵⁰ Guyu tijb bejn, brii lajman Xiëb, gojcaman benza'c, beenman zi'c rayal. Gojc ladxaman guiedx Arimatea tijb guiedx naaz Judea. Gojc téeëman tijb gxuxtis ree bën Israel.

⁵¹ Nëman rbëz nabee Dios, abi' ad nëtaman bachajg xixgab ree bën bagüjt Jesús.

⁵² Wejman loj Pilato bignabaman xcuerp Jesús.

⁵³ Chi gulox baletaman xcuerp Jesús loj crüzj guin, cwa'man laaman batüübaman tijb lajd, dxel biquie'chaman laaman lën tijb baa ni bidëen lën guiaj lod achutctzi waguie'ch.

⁵⁴ Dxej guin rüjn reeman porvinid gra par dxej raziiladx ree bejn. Zamer suloj dxej guin chi biquie'ch reeman Jesús.

⁵⁵ Abi' ree béngunaa zidnë Jesús diizd Galilea, në reeman binal abi' baguiaa reeman xbaa Jesús baguiaa tée reeman xhienaag gudijxh reeman xcuerpaman.

⁵⁶ Chi bayejc reeman, zianz beenchaaw reeman perfum në zaj ni rliaa nejxh ni guidëebaman. Dxel baziiladx reeman dxej raziiladx ree bejn zi'c rniabee ley.

24

Raban Jesús

(Mt. 28:1-10; Mr. 16:1-8; Jn.20 :1-10)

¹ Chi dumingw rsildoo, wej ree béngunaa guin ro' xbaa Jesús binë reeman perfum ni beenchaaw reeman.

² Chi bidxin reeman yagaj, baguiaa reeman guiaj ni bida'cw ro' baa guin ad naga'tri xluaran.

³ Abi' guyu reeman, per ad bidxaaglojtri reeman xcuerp Dad Jesús.

⁴ La'tzi cadxeb reeman ni'quid radxejlt xhie güün reeman, dxejczy baguiaa reeman tio'p ree bejn za'li reeman gajxh lod za' reeman, najcw reeman lajd bacha'.

⁵ Abi' guial tant bidxeb reeman, basajb loj reeman xt luyuj, dxel rëb ree bën guin loj reeman;

—¿Chexc zeel raguuilidi tijb bën naban loj ree bengüt?

⁶ Achutri laaman guie din ma babanman. Gol basaaladx ni naman lojdi chi guzuman niz Galilea.

⁷ Naman lojdi guial yayü reeman Bén guxhaal Dios loj ree bëndol din gucaa reeman laaman loj crüjz, abi' ni yayon dxej yabanman.

⁸ Dxel basaaladx reeman diidx ni rëb Jesús loj reeman,

⁹ abi' chi baza reeman ro' baa guin, bicojn reeman guidxiptib ree xi apóstoles Jesús në los demazri ree xcompniar reeman gra ni baguiaa reeman.

¹⁰ María Magdalena, con Xuan, con Li xniaa Jacob con ree béngunaa ren, laa reeman bigné ruson guin loj ree xi apóstoles Jesús.

¹¹ Per laa reeman ad bililadxt reeman ni rëb ree béngunaa guin, gunaladx reeman wed rëbzi reeman.

¹² Per Bëd baxüünman biquiaaman lën baa guin, abi' chi baguiaaman lën baa guin, lajd ni bidüübzi Jesús baguiaaman, zianz ziaman dád radxalojman por ni goc.

*Baliüloj Jesús loj tio'p ree xbejnman
(Mr. 16:12-13)*

¹³ Dxej guin gajc, tio'p ree xbejn Jesús zë tijb guiedx la Emaús, raya'nan zi'ct chiptib kilometro par Jerusalén.

¹⁴ Chi zë reeman lunejz cayü reeman diidx xcwent gra ree ni goc.

¹⁵ La'tgaj cayü reeman diidx, gubig Jesús cwë' reeman abi' guzuloj cazanëman laa reeman.

¹⁶ Per majsi cuguaa reeman laaman, yu' ni badxoon nayünbee reeman laaman.

¹⁷ Dxel gunabdiidx Jesús loj reeman, rëbaman:

—¿Xhie diidxan rüdi la'tgaj cazadi? ¿Chexc zeel yu'nayadi?

¹⁸ Badxi' tijb bën la Cleofas laan, rëbaman:

—Gra ree bejn ragbee ni goc Jerusalén lën ree dxej guie. ¿Wen tijbzi lüj naj bën guzu Jerusalén ad gogbeetil ni goc ya?

¹⁹ Dxel rëbaman loj reeman:

—¿Xhie goc?

Abi' rëb reeman:

—Ni beennë reeman Jesús bën Nazaret, laaman goc tijb bën badëë xtiidx Dios loj ree bejn, bën gop gualrniabee zi'c ni beenman në ree diidx ni guneeman niz loj Dios në niz loj ree bejn.

²⁰ Në guial bayü ree bixhioz rniabee ree bixhioz laaman në ree dux guxtis ree din guiëtaman, abi' bacaa reeman laaman loj crüjz.

²¹ Par dunujn laaman naj bën yabëë ree bën Israel loj ree bën rom, per yan gojc choon dxej ni goc ree ni guin.

²² Majsi tio'p choon ree béngunaa no'ch du lojn bachejb reeman dunujn, guial rsildoo wej reeman ro' baa guin,

²³ abi' guial ad baguiaat reeman xcuerpaman, bayejc reeman rü reeman diidx guial balüüloj ree anjl loj reeman, rëb ree anjl guin loj reeman guial naban Jesús.

²⁴ Laa biquiaa gajc ree tio'p choon ree dux compnieran ro' baa guin abi' baguiaa reeman zi'cgajczi rëb ree béngunaa guin, per ad baguiaat reeman Jesús.

²⁵ Dxel rëb Jesús loj reeman:

—iXi nawëëg naj chignia'di abi' xi raglaa par chililadxidi gra ni guneë ree bën badëë xtiidx Dios loj ree bejn!

²⁶ ¿Wen id naj ya guial sagdiaj Cristo, dxelri yayë'paman xanyabaa?

²⁷ Dxel guzuloj cusignia'man laa reeman ni rën guiëb ni ca loj xtiidx Dios xcwentaman. Guzulojman con ree xlibr Moisejs abi' basnuuman con gra ree libr ni bacaa ree bën badëë xtiidx Dios loj ree bejn.

²⁸ Chi bidxin reeman guiedx lod zë reeman, been Jesús zi'c bën che mazri zijt.

²⁹ Per laa reeman been reeman naguiejn din yaya'nnëman laa reeman, rëb reeman lojman:

—Baya'n con dunujn, din ma gudxe yan abi' ma cabej guiaal.

Dxel guyu Jesús persi baya'nnëman laa reeman.

³⁰ Abi' chi zojbnëman laa reeman xan mex, cwa'man guiadxtil abi' chi gulox badëëman quixtëë loj Dios, gula'man laan persi badëëman laan loj reeman.

³¹ Hor guin gajc guzajc reeman zi'c bën baxal guiaaløj, abi' bayünbee reeman laaman. Per laa gunidloj gajcaman,

³² zianz rëb loj lasa' reeman:

—iZe'cliza dád nix yu' du luxdoo chi zudnë'man lunejz, chi cusignia'man dunuj ni rëb loj xtiidx Dios!

³³ Abi' ni'quid gulëjzt reeman, laa bayunejz gajc reeman zia reeman Jerusalén lod riga' guidxiptib ree xi apóstoles Jesús con ree xcompniar reeman.

³⁴ Rëb reeman loj grop ree bën guin:

—Walican ma baban Dad Jesús, ma balüülojman loj Simón.

³⁵ Zianz be reeman diidx ni guzac reeman chi zë reeman lunejz xhie tëë naag bayünbee reeman Jesús chi gula'man guiadxtil.

Balüüloj Jesús loj ree xbejnman

(Mt. 28:16-20; Mr. 16:14-18; Jn. 20 :19-23)

³⁶ Sta cayü reeman diidx xcwent ree ni guin, chi balüüloj Jesús galay reeman, rëbaman:

—Yabe'cdxe Dios luxdoodi.

³⁷ Dád badxaløj reeman abi' bidxeb reeman guial gunaladx reeman anman cuguiaa reeman.

³⁸ Per rëb Jesús loj reeman:

—¿Chexc zeel rdxebidi? ¿Chexc zeel yu'nawëëg luxdoodi?

³⁹ Gol baguiaa yan në guia'n. Naj gajcan, gol baqui' naj gol baguiaa tëë naj, din tijb anm ad yu'taman dxijt ad ca tëëtaman bëël zi'c ruguiaadi naj.

⁴⁰ Chi rëbaman zian, balüü yaaman në guia'man.

⁴¹ Per laa reeman staczi ad riladxt reeman guial tant rabaa reeman radxa tëë loj reeman, abi' rëbaman loj reeman:

—¿Rajpidi ta'n gualraw ya?

⁴² Dxel badëë reeman tiblia' bëjl biguie',

⁴³ abi' cwa'man laab gudawaman niz loj reeman.

⁴⁴ Zianz rëbaman loj reeman:

—Ni ma guza'can naj ni rnin lojdi chi sta za'n con lëjt: Guial naj gac gra ree ni ca loj xlibr Moisejs ni gaza'can, në xlibr ree bën badëë xtiidx Dios loj ree bejn, në loj libr salmos.

⁴⁵ Dxel guxhalaman xquiarguejn reeman persi bignia' reeman ni ca loj xtiidx Dios,

⁴⁶ abi' rëbaman loj reeman:

—Loj xtiidx Dios rëb guial Cristo, naj guial guiëtaman, abi' ni yayon dxej yabanman.

⁴⁷ Abi' diizd Jerusalén suloj guire'ch xtiidxaman xt guidib loj guidxliuj guial yu' perdon par gra ree bën yayüjn xgab por xtol guililadx tëë reeman naj.

⁴⁸ Lëjt naj testiw xcwent gra ree ni guin.

⁴⁹ Naj gaxhal par lëjt ni ma na da Dadan. Per gol guzujsii luguiedx Jerusalén xt tia'di guialrniabee ni gui't diizd xanyabaa.

Bayë'p Jesús xanyabaa

(Mr. 16:19-20)

⁵⁰ Dxel briinë Jesús laa reeman luguiedx Jerusalén binëman laa reeman gajxh Betania, zianz gules yaaman beenle'man laa reeman.

⁵¹ Abi' la'tgaj cayüjnle'man laa reeman, wajsaman ziaman xanyabaa.

⁵² Chi gulox bazuxib reeman badëë reeman quixtëë lojman, dxel zia reeman Jerusalén, dád rabaa reeman.

⁵³ Abi' guixie guixie yu' reeman lën yadooro' Jerusalén ruza't reeman Dios zagdxë rudëëd tëë reeman quixtëë lojman.

Xtiidxza'c Jesucrist ni bacaa San Juan

Bi't Xi'n Dios loj guidxliuj

¹ Diidz guia'xchej chi gad guidxliuj gacchaaw, mal yu' b́en naj xtiidx Dios. Laaman za'ně Dios abi' laagajcaman naj Dios.

² Laaman mal za'ně Dios diidz guia'xchej.

³ Laaman been graczi ni yu'. Achetczi ni yu' niajc bal id laaman.

⁴ Laaman rajp guialnaban, guiáad guialnaban guin naj bajl par gra bénguidxliuj.

⁵ Bajl guin rusni b́en nacay xquiarguejn, abi' ad rajct rutěe guialnacay guin loj bajl guin.

⁶ Guyu tijb b́en brii laj Waj, Dios guxhaal laaman,

⁷ bidgaguieman diidx xcwent b́en naj xbajl Dios, din gac chililadx gra ree bejn laaman.

⁸ Per ad Wajt goc bajl guin, bi'tzaman bidgaguieman diidx xcwent bajl guin.

⁹ Din b́en naj quijb bajl guin, laaman rusni xquiarguejn gra bénguidxliuj, abi' ma bi'taman loj guidxliuj.

¹⁰ Laaman guzu loj guidxliuj, abi' majsi laaman been guidxliuj, per ree bénguidxliuj ad bayagbeet reeman laaman.

¹¹ Bi'taman loj ree b́en Israel, abi' majsi gojcaman b́en Israel, per ad bidxga't reeman laaman.

¹² Per, gra ree b́en bidxga' laaman bililadx t́ee reeman laaman, beenman laa reeman xi'n Dios.

¹³ Abi' naj reeman xi'n Dios, ad zi'c rut xi'n bejn loj guidxliuj por xixgab bejn o guial ŕen bejn chu' xi'nman, por guial rliladx reeman ma naj reeman xi'n Dios.

¹⁴ Jesús, b́en naj xtiidx Dios, laaman goc bejn abi' gubajnman loj guidxliuj con dunuj ree, abi' dád guyěnman bejn ree gunee t́ee man ganax diidxli. Dunujn baguiaa xguialrniabeeman, guialrniabee ni ca'man guial tijbzi laaman naj Xi'n Dios.

¹⁵ Chi be Waj xtiidxaman loj ree bejn, gunee man rejs, ŕebaman:

—Jesús guie naj b́en ruzatan, chi rnin guial b́en źeed xichan mazri lasajcaman guial lon, din diidz gocli mal yu'man guial lon.

¹⁶ Dád ŕenman dunuj ree, gra dxejczy raca' dugra ree xguialnaza'caman.

¹⁷ Por Moisejs banee Dios xleyaman duloj ree, per por Jesucrist bayagbee ree xhienaag ŕen Dios dunuj ree xhie t́ee naag naj xtiidxli man.

¹⁸ Ad yu't dxej waguaiaa bejn Dios. B́en naj tijbzi xi'nman. B́en nabanně laaman balüü duloj ree xhienaag naj Dios.

Waj b́en baroobnijs ŕebaman chu naj Jesús (Mt. 3:11-12; Mr. 1:7-8; Lc. 3:15-17)

¹⁹ Diidz Jerusalén guxhaal ree xguxtis ree b́en Israel bixhioz ree con ree b́en naj ree levitas persi bignabdiidx reeman loj Waj chu najman.

²⁰ Dxel be Waj diidxli loj reeman, ŕebaman:

—Ad najtan naj Cristo.

²¹ Abi' gunabdiidx reeman lojman stijb ŕeb reeman:

—¿Chuza najl? ¿Lüjn naj Elías ya, b́en baděe xtiidx Dios loj ree bejn?

Badxi' Wajn ŕebaman:

—Ad najtan.

Dxel gunabdiidx reeman stijb rëb reeman:

—O, ¿lūjn naj bën naj diidx gui't ya, bën gudëe xtiidx Dios loj ree bejn?

Badxi'man laan rëbaman:

—Ad najtan.

²² Abi' rëb reeman:

—¿Chuza najl? Din rayal yugnë'n ruson loj ree bën guxhaal dunujn. Guna chu najl.

²³ Dxel rëb Waj loj reeman:

—Naj naj tijb bën rbidxa' loj yujbidx: “Gol guxhal tijb nejz nali par bën ca' gualrniabee” —zi'c rëb Isaías bën badëe xtiidx Dios loj ree bejn.

²⁴ Abi' ree bën guxhaal ree bënfarisew din guinieenë reeman Waj,

²⁵ gunabdiidx reeman lojman, rëb reeman:

—Bal id lūjn naj Cristo, ni'qui Elías, ni'qui bën naj diidx gui't, bën gudëe xtiidx Dios loj ree bejn, ¿chexquiza zeel ru-roobnijsil bejn?

²⁶ Badxi' Waj laan rëbaman:

—Naj ru-roobnijs con nijs, per lojdi no'ch tijb bën ad wayünbeetidi.

²⁷ Laaman naj bën zëed xichan, ni'qui xgurëchaman ad rayalt gaxhiecan gual najman bën mazri lasajc gual lon.

²⁸ Gra niguie gojc lod la Betábara, ni naj stiblad ro' guuiw Jordán, lod baroobnijs Waj bejn ree.

Jesús naj Xi'n Dios

²⁹ Chi bareguiaal, baguiaa Waj zibig Jesús lod za'man, dxel rëbaman:

—Gol baguiaa, bën guin naj bën bacaabee Dios din guiëtaman zi'c xiildoo por xtol ree bënguidxliuj.

³⁰ Laaman bazatan lojdi chi rnin: “Xichan zidnal bën mazri lasajc gual lon, din laaman mal yu' diizd gocli gual lon.”

³¹ Ni'qui naj ad gogbeetan gual laaman naj bën gui't, per naj zialan din gu-roobnijsan bejn ree con nijs din chile' güünbee ree bën Israel laaman.

³² Rëb tëe Waj loj reeman:

—Naj baguia biguiajt xSprijt Dios diizd xanyabaa zi'c tijb palom xt guijcaman.

³³ Majsi ad nünbeetan laaman, per bën guxhaal naj baroobnijsan con nijs, laaman na lon: “Chi guguiaal guiat xSprijt Dios xt guijc tijb bejn, laaman naj bën runee xSprijt Dios.”

³⁴ Naj ma baguia laaman, abi' ragbeechaawan gual laaman naj Xi'n Dios.

Bën binal ree Jesús yaloj

³⁵ Chi bareguiaal, za' Waj yagaj stijb, za'në tio'p ree xbejnman.

³⁶ Abi' chi baguiaaman cadëd Jesús, dxel rëbaman loj reeman:

—Gol baguiaa, bën guinan naj zi'c xi xiildoo Dios din guiëtaman por xtol bënguidxliuj.

³⁷ Chi biguiejn reeman rëb Waj zian, dxel binal reeman Jesús.

³⁸ Chi badxi' lojman, baguiaaman zinal reeman laaman, abi' rëbaman loj reeman:

—¿Xhie rguilidi?

Badxi' reeman laan rëb reeman:

—Mextr, ¿ban zojbil?

³⁹ Dxel rëb Jesús loj reeman:

—Gol guda din guguiaadi.

Dxel wej reeman biquiaa reeman lod zojbaman, abi' baya'nne reeman laaman dxej guin, guial ma gojl cost raca tajp wadxé.

⁴⁰ Tijb ree xbejn Waj bèn binal Jesús, bèn bacaagdiajg ni rëb Waj, laaman brii laj Andrejs, bijch Simón Béd.

⁴¹ Andrejs guin, yalojxgaj bijchaman Simón bigdiilaman, abi' rëbaman lojman:

—Ma badxaaglojn bèn naj Mesías —rën guiëban Cristo.

⁴² Dxel binë Andrejs Simón lod za' Jesús, chi baguiaa Jesús laaman, rëbaman: —Lüj naj Simón, xi'n Jonás, per yan grii lajl Cefas —rën guiëban Béd.

Gurejdx Jesús Felip në Natanael

⁴³ Chi bareguiaal been Jesús xgab cheman niz Galilea, abi' badxaagaman Felip, zianz rëbaman:

—Tanal naj.

⁴⁴ Ladx Felip guin naj guiedx Betsaida, ni gajc naj ladx Andrejs con Béd.

⁴⁵ Dxel bigdiil Felip Natanael, abi' rëbaman lojman:

—Ma badxaaglojn bèn ruza't Moisejs loj xlibr xleyaman, bèn ruza't ree bèn badëë xtiidx Dios loj ree bejn loj ni bacaa reeman. Laaman naj Jesús, xi'n Xiëb, bèn Nazaret.

⁴⁶ Dxel rëb Natanael lojman:

—¿Wen yu' benza'c Nazaret ya?

Badxi' Felipan rëbaman:

—Yo' din guguaal.

⁴⁷ Chi baguiaa Jesús zëed Natanael, rëbaman:

—Guie zëed tijb bèn naj quijb bèn Israel, abi' ad rusquieetaman.

⁴⁸ Dxel gunabdiidx Natanael lojman, rëbaman:

—¿Xoza nünbeel naj?

Badxi' Jesúsán rëbaman:

—Chi gad Felip cwedx lüj, chi za'l xan yag higo, dxel baguian lüj.

⁴⁹ Zianz rëb Natanael lojman:

—Mextr, lüj naj Xi'n Dios, lüj naj rey Israel.

⁵⁰ Badxi' Jesús laan rëbaman:

—¿Rliladxil naj ya guialzi rnin baguian lüj xan yag higo? Per mazri naj ree ni guguaal guial loj ni ma baguiaal.

⁵¹ Rëb tëëman:

—Naj ragbeechaaw, zuguaadi zojbyal xanyabaa, abi' zuguaadi xianjl ree Dios yayë'p reeman xanyabaa yaguaajt tëë reeman xt guiic Bén guxhaal Dios loj guidxliuj.

2

Wej Jesús loj tijb guialruxhliaa

¹ Ni goc choon dxej guyu tijb guialruxhliaa luguiedx Caná, ni riga' niz Galilea. Dxel në xniaa Jesús za' yagaj,

² abi' në Jesús con ree xbejnman gunee reeman persi wej reeman loj lanij guin.

³ Chi babidx vin, dxel rëb xniaa Jesús lojman:

—Achetri vin rajp reeman.

⁴ Badxi' Jesúsán rëbaman:

—Na, ¿chexquiza zeel nal lon zian? Ad wadxint da horan gūnan ni rayal gūnan.

⁵ Per xniaaman rëb gajcaman loj ree bèn cayūjn mandad yagaj:

—Gol been gra ni naman.

⁶ Yagaj za' xho'p ree guiajs guiaj, ni ru nijs ni rüjnnë ree bën Israel dxiin chi rusia laa reeman zi'c naj xcostumbr reeman. Abi' lën tijbgaj reen ru cost tibgayuu lijtr.

⁷ Abi' rëb Jesús loj ree bën rüjn mandad guin:

—Gol bacha ree guiajs guie nijs.

Dxel bachadi reeman laa reen,

⁸ abi' rëbaman loj reeman:

—Yan gol gulëë ta'n'an, gol bigdëën loj bën canabee loj lanij guie.

Dxel bigdëë reeman laan lojman,

⁹ abi' bën canabee loj lanij guin beenman prueb nijs bayajc vin guin, sin guial niagbeeman ban guzan, bën cayüjnz ree mandad guin ragbee, din laa reeman bica' nijs guin. Dxel gurejdxaman xin cuxhliaa guin,

¹⁰ rëbaman lojx:

—Graczi bejn rgui's yaløj vin zagdxë, abi' chi ma gu' reeman zilan, dxel rgui'saman vin corrient. Per lüj badxe'chaawil vin zagdxë guin persi cagui'silan yan.

¹¹ Ni guin naj milagr yaløj been Jesús, beenman milagr guin Caná, guiedx riga' niz Galilea. Zian balüü guialrniabee ni rajpaman abi' bililadx ree xbejnman laaman.

¹² Chi gulox gojc zian dxel zë reeman guiedx Capernaum, con xniaaman, con ree bijchaman con në ree xbejnman. Ni guzu reeman tio'p choon dxëj.

Babëë Jesús bën ruto' ree ro' yadooro'

(Mt. 21:12-13; Mr. 11:15-18; Lc. 19:45-46)

¹³ Chi ma zidyob pascw xlanij ree bën Israel, wej Jesús Jerusalén.

¹⁴ Abi' ro' yadooro' bidxaaglojman bën cuto' ree go'n, con ree xiil con ree palom, në ree bën zojb xan mex ruchaa reeman xmilia ree bën ziaad lood ren.

¹⁵ Chi baguiaa Jesús zian, dxel beenchaawaman tijb duu persi babëëman gra reeman, con gra ree xgo'n reeman në ree xiil. Gutie'chaman xmilia ree bën ruchaa milia guin barexguiat tëëman xmex reeman.

¹⁶ Dxel rëbaman loj ree bën cuto' palom:

—¡Gol babëë reeb guie! ¡Ad rüjnnëdi lidx da Dadan zi'c lugua'!

¹⁷ Dxel basaaladx ree xbejnman ni ca loj xtiidx Dios lod rëb: “Dád ralenan ruguian ni rüjn reeman lidxil.”

¹⁸ Zianz rëb ree bën Israel lojman:

—¿Xhie milagr gulüül du lojn din yayagbeen guial rajpil guialrniabee güünl zian?

¹⁹ Badxi' Jesús laan rëbaman:

—Gol base'n yadoo guie, naj yayün laan loj choon dxëjzi.

²⁰ Dxel rëb ree bën Israel guin lojman:

—Tiuubixho'p ijz goglaa reeman been reeman yadoo guie, ¿guiáad lüj ya yayüjnlan choon dxëjzi?

²¹ Per Jesús xcuerp gajcaman ruza'taman chi ruza'taman yadoo guin.

²² Zeel chi babanman loj ree bengüt, basaaladx ree xbejnman ni rëbaman, abi' bililadx reeman xtiidxaman bililadx tëë reeman ni ca loj xtiidx Dios.

Jesús nünbee xixgab gra bejn

²³ Chi guzu Jesús Jerusalén pascw, zien ree bejn bililadx laaman, chi baguiaa reeman milagr ree ni beenman.

²⁴ Per laaman ad rëbtaman loj reeman chu najman, din laaman nünbeeçaaw xhienaag naj xixgab reeman.

²⁵ Ad biaadxtaman chu niëjb lojman xhienaag naj bejn, din laaman rag-beeçaaw xhienaag naj xixgab tijbgaj bejn.

3

Bigneenë Nicodemo Jesús

¹ Guyu tijb bënfarisew brieri lajman Nicodemo, gojcaman tijb guxtis loj ree bën Israel.

² Abi' wejman bignajman Jesús tijb guxhin, dxel rëbaman lojman:

—Mextr, rayagbeen guial Dios guxhaal lüj din gulüül dunujn, din achutdzi zajc giün lasa' ree milagr ni rüjnl bal id za'në Dios laaman.

³ Dxel rëb Jesús:

—Diidxiczi rnin lüj, bën ad zajlt stijb, ad zajct guguaaaman xguialrniabee Dios.

⁴ Abi' rëb Nicodemo lojman:

—Per, ¿xhienaag gal bejn stijb chi ma najman bengol? ¿Wen zajc yayu lën xniaaman ya abi' galaman stijb?

⁵ Badxi' Jesús laan rëbaman:

—Diidxiczi rnin, bën ad rirobnijst ad nabannë tëëtaman xSprijt Dios ad zile't yayuman loj xguialrniabee Dios.

⁶ Bën naban zi'c naj xixgabaman, lojzi guidxliuj guie rajpaman guialnaban, per bën nabannë xSprijt Dios, por Sprijt guin rajpaman stijb guialnaban.

⁷ Ad bal radxa lojl guial rnin: “Rüjn naguiejn gal bejn stijb.”

⁸ Din zi'c rbi' bi gralad abi' majsi rigujejnl chi rbi'n, per ni'quid ragbeetil ban zëedan o ban zën. Ziangajc naj xSprijt Dios con gra ree bën nabannë laaman.

⁹ Dxel rëb Nicodemo lojman:

—¿Xhienaag rajc zian?

¹⁰ Badxi' Jesús an rëbaman:

—¿Lüj, naj mextr loj ree bën Israel, ad rignia'til gra ree ni guin ya?

¹¹ Diidxiczi rnin lojl, raneen ni rayagbeen ni baguaiaa tëen, per lëjt ad rliladxtidi ni ranan.

¹² Bal id rliladxidi chi rnin xcwent ree ni loj guidxliuj guie, ¿xhienaag chililadxidi bal ganin xcwent ree ni xanyabaa?

¹³ 'Achut wayej xanyabaa, tijbzi bën biguiat diidz xanyabaa, Bën guxhaal Dios loj guidxliuj.

¹⁴ Abi' zi'c bacaa Moisejs bëel guiib loj yag niz loj yujbidx, ziangajc Bën guxhaal Dios loj guidxliuj, gucaa reeman laaman loj crüjz,

¹⁵ din gra bën chililadx laaman ad zanijt reeman loj Dios, gap reeman guialnaban tiblyaa con laaman.

Rën Dios bejn

¹⁶ 'Guial tant rën Dios bénguidxliuj, majsi tijbzi xi'nman, per guxhaalaman laaman loj guidxliuj, din graczi bën chililadx laaman ad zanijt reeman loj Dios, gap reeman guialnaban tiblyaa con laaman.

¹⁷ Din Dios ad guxhaal xi'nman loj guidxliuj din gudëedaman bejn casti, guxhaalaman laaman din gap ree bejn perdon loj Dios.

¹⁸ 'Bën rliladx Xi'n Dios ad rayaltaman xcasti Dios. Per bën ad rliladxt, laaman ma rayal casti guial ad rliladxtaman Xi'n Dios, bën naj tijbzi xi'nman.

¹⁹ Bén ad riladxt ree rayal reeman casti, din yan ni bi't bén naj x bajl Dios, mazri bayuladx reeman nejz mal, guial rüjn reeman ganax ni mal.

²⁰ Graczi ree bén rüjn ni mal ad ruladxtczi reeman bajl guin, ad rbigt reeman lojn, chitëë guiguien ni mal cayüjn reeman.

²¹ Per ree bén naban zi'c rayal loj Dios, laa reeman rbig loj x bajlaman din guiguien guial graczi ni cayüjn reeman naj ni rën Dios.

Waj bén baroobnijs ruza'taman Jesús stijb

²² Chi gudëd gojc zian, Jesús con ree xbejnman wej reeman niz Judea, lod guzunëman laa reeman tio'p choon dxej, ni baroobnijs reeman bejn ree.

²³ Nëgajc Waj curoobnijs bejn ree luguiedx la Enón, ni riga' gajxh guiedx Salim, guial yu' zil nijs ni. Abi' rej ree bejn persi riobnijs reeman.

²⁴ Laan goc chi gad Waj chu' ladxguuib.

²⁵ Per bëlzi ree xbejn Waj, con za tio'p choon gajc ree bén Israel guzuloj cadildiidx reeman por xcostumbr reeman guial xhienaag gac reeman naya.

²⁶ Dxel biguiedx reeman loj Waj:

—Mextr, bén guzunël stiblad ro' guiw Jordán, bén bel xtiidx du lojn, në laaman curoobnijs bejn ree abi' gra reeman zinal laaman.

²⁷ Badxi' Waj laan rëbaman:

—Achut zajc gap guialrniabee bal id Dios gudëë laan.

²⁸ Lëjt ragbee guial biguejndi rën guial ad najtan naj Cristo, naj guneed lojman zidgagojnan por laaman.

²⁹ Dunuj ree rayagbee guial loj guialruxhliaa, xin za'në biingunaa guin, laaxan cuxhliaa, guiáad xmiwix xin za' con laax rabaanë da'tix laax chi riguejnx rnieex. Ziangajc naj dád rabaanë'n laaman.

³⁰ Abi' laaman gusnuu gacaman mazri bén zobjloy, guiáad naj gusnuu gacan bén ad lasajct guial lojman.

Bén zëëd xanyabaa

³¹ 'Din bén zëëd diizd xanyabaa, laaman naj bén rniabee loj gra. Per bénguidxliuj, bénguidxliujzi najman abi' ganax ni yu' loj guidxliuj ruza'taman. Per Bén zëëd diizd xanyabaa laaman rniabee gra,

³² abi' rüman ni ma baguiaaman ni ma biguejnj tëëman, per achut riladx ni rnieeman.

³³ Bal yu' bén riladx xtiidxaman, zian rguien guial ni diidxli naj xtiidx Dios.

³⁴ Abi' bén zëëd por Dios, laaman rü xtiidx Dios guial guidiblagaa badëëd Dios xSprijtaman lojman.

³⁵ Dios rën Xi'nman abi' basa'nman gra lojman.

³⁶ Abi' chutëëz bén riladx Xi'nman, laaman rajp guialnaban tiblayaa loj Dios. Per bén ad rtiëjbt chililadx, ad rajptaman guialnaban guin, laaman rayal xcasti Dios.

4

Jesús con béngunaa Samaria

¹ Gogbee ree bénfarisew guial mazri zien bejn ma zinal Dad Jesús mazri zien tëë bejn ruroobnijsaman guial loj Waj,

² majsi diidxliczi ad Jesústan ruroobnijs bejn ree, bén naj ree xbejnman ruroobnijs.

³ Chi gogbeeman zian dxel briiman niz Judea zëëman niz Galilea stijb.

⁴ Per chi zëëman niz Galilea been naguiejn gudëëdaman niz Samaria.

⁵ Abi' bidxinman tijb guiedx la Sicar, ni nulen Samaria, gajxh lod naga' yuj ni badëë Jacob loj xi'nman Xiëb.

⁶ Yagaj naj tijb bizëduu rniee reeman laan xbizë Jacob. Abi' guial ma badxag Jesús cazaman, dxel gurejman ro' bizë guin. Ma zidyob garol dxej.

⁷⁻⁸ Guiáad ree xbejnman zë reeman luguiedx guin zisii ni gaw reeman. Hor guin bidxin tijb béngunaa Samaria ro' bizë guin din tia'man nijs, dxel rëb Jesús lojman:

—Bazaladx ta'n xnijsil guië'n.

⁹ Per guial ad rnieenët lasa' ree bén Israel zagdx con ree bén Samaria, badxi' béngunaa guinan rëbaman:

—¿Chexquiza zeel rniabil nijs lon najl bén Israel awa bén Samaria naj?
(Din bén Israel ree ad rnieenët reeman bén Samaria ree zagdx.)

¹⁰ Badxi' Jesús laan rëbaman:

—Bal zian ragbeel ni rën Dios guneeman lüj, chutëë bénan canab nijs lojl, zanabil nijs lon abi' naj zunen nijs runee guialnaban.

¹¹ Dxel rëb béngunaa guin loj Jesús:

—Dad, ni'quid ca'til ni cwëñël nijs, abi' bizë guin dád naxhitan. ¿Ban chica'l nijs runee guialnaban?

¹² Dux béngulalan Jacob basa'nnë dunujn bizë guie, lod gu'man nijs con ree xi'nman con ree xbegui'xhaman. ¿Wen mazri najl guial lojman ya?

¹³ Badxi' Jesús laan rëbaman:

—Graczi ree bén rë' nijs guie re'c reeman nijs stijb.

¹⁴ Per bén guië' nijs gudëdan, ad yu'tri dxej che'caman nijs. Din nijs gudëdan gacan luxdooan zi'c lod ad rbëzt rajch nijs, abi' nijs guin gudëë guialnaban tiblayaa.

¹⁵ Dxel rëb béngunaa guin lojman:

—Dad, banee nijs guin lon, chitëë che'cran nijs ad zial tëëtran guidca'n nijs guie.

¹⁶ Rëb Jesús lojman:

—Bignee lacheelil, dxel yaguaadil guie.

¹⁷ Badxi' béngunaa guinan rëbaman:

—Achut da bénguaawan yu'.

Dxel rëb Jesús:

—Waliquil achut lacheelil yu',

¹⁸ din ma gojc gaay xinguaaw rtia' lüj, abi' yan xin zojbnël ad lacheeltlan. Zeel waliqui ni nal.

¹⁹ Chi bigueijnman ni rëb Jesús, dxel rëbaman:

—Dad, ma ragbeen guial lüj naj bén rudëë xtiidx Dios loj ree bejn.

²⁰ Dux béngulalan gunajchi' reeman Dios ruguia' guie, per lëjt najdi bén Israel rëbidi guial Jerusalén naj lod guiniajchi' bejn laaman.

²¹ Badxi' Jesúsán rëbaman:

—Na, zagdx rniin guial guidxin dxej guiniajchi'di dux Dad ree Dios, ad zi'ttridi ruguia' guie ad zej tëëtridi Jerusalén.

²² Lëjt ni'quid ragbeetidi chunin rniajchi'di, per dunujn rayagbeen chunin ranajchi'n, din loj ree bén Israel grii bén güün bejn ree perdon.

²³ Abi' ma bidxin dxej ni gra ree bén diidxli rniajchi' Dios, guiniajchi' reeman laaman zi'c rayal por xSprijtaman. Din zian rën dux Dad ree Dios güün ree bén rniajchi' laaman.

²⁴ Dios naj Sprijt, abi' bén rniajchi' ree laaman rayal guiniajchi' reeman laaman con guidib luxdoo reeman por xSprijtaman.

²⁵ Dxel rëb béngunaa guin lojman:

—Naj ragbee gui't Bén naj Mesías, Bén la gajc, Cristo. Abi' chi gui'taman, laaman gusignia' dunuj ree gran.

²⁶ Abi' rëb Jesús:

—Najn naj Bén zii, laaman caneenë lüj.

²⁷ Loj hor guin badxin ree xbejn Jesús, abi' dád badxaløj reeman guial cayinëman tijb béngunaa diidx. Per ni'qui tijb reeman ad gunabdiidx lojman xhie rënman o xhie diidxan cayü reeman.

²⁸ Guiáad béngunaa guin basa'n xreman ro' bizë guin, dxel ziaman luguiedx guin, abi' rëbaman loj ree bejn:

²⁹ —Gol taquiaa tijb Bén ma na graczi ni ma benan. ¿Nid laaman naj Cristo ya?

³⁰ Dxel brii reeman luguiedx guin zë reeman lod za' Jesús.

³¹ Per la'tgaj zia béngunaa guin luguiedx guin, rëb ree xbejn Jesús lojman:

—Mextr, gudaw.

³² Per rëbaman loj reeman:

—Laa da guialrawan yu', ni ad nünbeetidi.

³³ Dxel guzuloj canabdiidx loj lasa' reeman rëb reeman:

—¿Ni yu' chu bidnë ni gudawaman ya'n?

³⁴ Dxel rëb Jesús loj reeman:

—Da guialrawan naj gūnan zi'c rën Dios, Bén guxhaal naj abi' guloox gūnan ni naman.

³⁵ Lëjt rëb: “Ryaadx zatajp bëew din gac ni yu' loj guiniaa.” Per naj rni lëjt: Gol gules lojdi, gol baguiaa loj ree guiniaa, ma naj reen din yado'p reen.

³⁶ Abi' Bén rato'p loj guiniaa guin, rtia'man ni rayalaman por dxiin ni rūjnman. Guiáad ni rato'paman naj par lod yu' guialnaban tiblyaa. Dxel zi'c Bén rxūbin zi'c Bén rato'p, rabaa reeman tiblojzi.

³⁷ Waliqi ni rëb ree bejn: “Ben ren rxūbin, ben ren rato'p guialnaza'c.”

³⁸ Naj guxhal lëjt din chigto'pidi guialnaza'c lod ad beentidi dxiin. Ben ren ree been dxiin, guiáad lëjt gaz bigto'pidi guialnaza'c lod ad beentidi dxiin.

³⁹ Zien ree Bén Samaria bililadx Jesús guial bé béngunaa guin diidx loj reeman rëbaman: “Ma gunaman graczi ni benan.”

⁴⁰ Zeel chi bidxin reeman lod za' Jesús, guzajc reeman laaman liaadx din yaya'nnëman laa reeman. Dxel baya'nnëman laa reeman tio'p dxej.

⁴¹ Abi' mazri zien reeman bililadx laaman chi biguiejn reeman ni rnieeman,

⁴² dxel rëb reeman loj béngunaa guin:

—Bajy yan ad por ni natzil raliduladxan laaman, nëgajc dunujn ma baguiejn ni rnieeman, abi' rayagbeen walican laaman naj Cristo, Bén yabëë bénguidxliuj loj dol.

Bayün Jesús xi'n xbejn tijb rey

⁴³ Chi goc tio'p dxej guin, baza Jesús niz Samaria abi' zëman niz Galilea,

⁴⁴ majsí laagajcaman rëb guial ni'qui tijb Bén rudëë xtiidx Dios loj ree bejn ad rajpt reeman laaman respejt ladx gajcaman.

⁴⁵ Per chi badxinman niz Galilea, Bén niz ni ree baca' reeman laaman zagdx. Din në laa reeman wej lanij pascw Jerusalén, abi' baguiaa reeman gra ni beenman ni.

⁴⁶ Chi za'man niz ni wejman Caná stijb, lod bayünman nijs vin. Abi' luguiedx Capernaum guyu tijb xbejn rey ragxuu xi'nman.

⁴⁷ Chi gogbee b́en guin baza Jesús niz Judea badxinman niz Galilea, wejman lod za' Jesús bisajcaman laaman liaadx din cheman yayüjnman xi'nman guial zamer guiëtix.

⁴⁸ Abi' rëb Jesús lojman:

—Lëjt, bal id zuguaadi xhie ree sen o milagr ree, ad zaliladxtidi.

⁴⁹ Per rëb b́en guin:

—Dad, yo' yan gajc, naga gad da xi'nan guiët.

⁵⁰ Dxel rëb Jesús lojman:

—Baguiaj lidxil, ma bayajc xi'nl.

Bililadx b́en guin ni rëb Jesús, abi' zia lidxaman.

⁵¹ La'tgaj ziaman, bigchaagloj ree xmojsaman laaman, abi' rëb reeman:

—Ma bayajc xi'nl.

⁵² Dxel gunabdiidxaman loj reeman, rëbaman:

—¿Xhie hor guzuloj banaa da xi'nan?

Abi' rëb reeman lojman:

—Nieey cost raca tijb wadxë bariix xliaa.

⁵³ Dxel basaaladx b́en guin guial hor ziin rëb Jesús lojman: “Ma bayajc xi'nl.” Abi' laaman në gra b́en zojb lidxaman bililadx reeman Jesús.

⁵⁴ Ni ne naj milagr barojp ni been Jesús niz Galilea chi bazaman niz Judea.

5

Bayüjn Jesús tijb b́en ad rajct rza

¹ Chi gudëd gojc zian, guyu tijb xlanij ree b́en Israel, abi' wej Jesús Jerusalén.

² Jerusalén guin, gajxh ro' port la xport ree Xiil, naj tijb tanc ro', diidx hebreo lan Betesda, yu' gaay xcurduran.

³ Yagaj riga' zien ree b́enragxuu, zi'c ree b́enlutia'p, në ree bencoj con ree b́en ad rajctczi rza, cabëz reeman guiniib nijs yu' lën tanc guin.

⁴ Din gocli goc rguiajt tijb xianjl Dios runiibaman nijs guin, abi' b́en ru lojnijs guin yaløj chi caniiban, rayajcaman xhietëez guialguijdxan rajcaman.

⁵ Dxel loj ree b́en guin no'ch tijb bejn, ma gojc zi'ctiubichoon ijz ragxuman.

⁶ Chi baguiaa Jesús laaman naga'man yagaj, abi' gogbeeman guial gocli ragxuman dxel gunabdiidxaman lojman rëbaman:

—¿Rën! ya yaya'quill?

⁷ Badxi' b́enragxuu guinan rëbaman:

—Dad, achut ra'pan gudxe' naj loj nijs guin chi riniiban. Beegaj chi rënan gayu'n, yaløj ben ren ru.

⁸ Dxel rëb Jesús lojman:

—Bixche, baca' ni naal loj, baguiaj.

⁹ Loj hor guin gajc bayajc b́en guin, baca' ni naaman loj abi' guzuloj cazaman. Per guial dxej zii naj dxej raziiladx ree b́en Israel,

¹⁰ zianz b́en Israel zinal ree ley rëb reeman loj b́en bayajc guin:

—Yandxej naj dxej raziiladx bejn, ad zajct yaca' ni go'til loj.

¹¹ Badxi' b́en guinan rëbaman:

—Bën bayüjn naj naman: “Baca' ni naal loj, baguiaj.”

¹² Dxel gunabdiidx reeman lojman rëb reeman:

—¿Chu na lojl: “Baca' ni naal loj, baguiaj”?

¹³ Per b́en guin ad ragbeetaman chunin bayüjn laaman guial bi'ch Jesús loj ree benzien riga' yagaj.

¹⁴ Chi badxaag Jesús laaman lën yadooro' Jerusalén, abi' rëbaman lojman:

—Baguiaa ma bayajquil, ad güünril dol chitëë gaquil mazri guial loj ni goquil.

¹⁵ Dxel zia bén guin abi' biguiedxaman loj ree bén Israel guial Jesús naj bén bayüjn laaman.

¹⁶ Zeel guzunal reeman Jesús din gugüjt reeman laaman, guial rüjnman milagr guin ree dxej raziiladx bejn.

¹⁷ Per rëb Jesús loj reeman:

—Da Dadan Dios ad rbëzt rüjnman ni rayal güünman, zeel nëgajc naj rün zi'c rüjnman.

¹⁸ Zianan zeel mazri rejs guzuj reeman din gugüjt reeman laaman, ad guialzi rüjntaman ni ad najt gac dxej raziiladx bejn, në guial rüjn laagajcaman zi'c Dios chi rnieeman guial quijb xDadaman naj Dios.

Xguialrniabee Xi'n Dios

¹⁹ Rëb Jesús loj reeman:

—Diidxliczi rnin, achet zajc güün Xi'n Dios por xixgabzaman, rüjnman ni ruguiaaman rüjn xDadaman. Din graczi ni rüjnman rüjn gajc xi'nman.

²⁰ Din Dios rën xi'nman abi' rulüüman laaman gra ree ni rüjnman. Abi' mazri naj ni gulüü loj xi'nman ni yadxa da't lojdi.

²¹ Din zi'c rasban Dios bengüt ree rudëë tëëman guialnaban loj reeman, ziangajc rudëë xi'nman guialnaban loj ree bén nüjnman xgab.

²² Abi' ad Diost rüjn gualguxtis, bazuj xi'nman din güünman gualguxtis,

²³ din gap gra ree bejn xi'nman respejt zi'cgajc rajp reeman laaman respejt. Bén ad rajpt Xi'n Dios respejt, ad rajp gajctaman respejt xDadaman Dios, bén guxhaal laaman.

²⁴ Diidxliczi rnin: Bén ruzoob da diidxan rililadx tëëman Dios, bén guxhaal naj, laaman ma rajp guialnaban tiblyaaa lojman. Abi' ad rayaltraman casti din ad najtraman zi'c bengüt par Dios, rajpaman guialnaban lojman.

²⁵ Diidxliczi rnin ma bidxin hor, abi' yandxej gajcan, bén naj ree zi'c bengüt loj Dios gucaagdiajg reeman cha' xi'nman. Abi' ree bén guzoob xtiidxaman zajp reeman guialnaban tiblyaaa con Dios.

²⁶ Din zi'c rajp Dios guialnaban, lasa'gajc guialnaban guin ma badëë loj xi'nman,

²⁷ abi' badëëman guialrniabee lojman din güünman gualguxtis, din laaman naj Bén guxhaal Dios loj guidxliuj.

²⁸ Ad bal radxa lojdi ni rnin, din zadxin dxej guien gra ree bengüt cha' Xi'n Dios,

²⁹ abi' yarii reeman lën baa. Dxel bén been ree ni ruladx Dios, yaban reeman, din gap reeman guialnaban tiblyaaa con laaman. Guiáad ree bén been ni mal, yaban reeman din yayal reeman casti ni rayal reeman.

Ni rultüü guialrniabee rajp Jesús

³⁰ 'Achet zajc günan por da xgabzan, rünan gualguxtis zi'c rniabee da Dadan. Abi' rünan gualguxtis zi'c rayal, din ad rüntanan zi'c naj da xgaban, rünanan zi'c rën da Dadan bén guxhaal naj.

³¹ Bal gü da diidx gajcan, achet lasajcan.

³² Per yu' ben ren rü da diidxan, abi' ragbeechaawan guial diidxlin.

³³ Lëjt guxhaal bén bignabdiidx ree loj Waj, abi' laaman ganax ni diidxli gunaman.

³⁴ Majsí ad ryaadxt yadxi'n ni gunee ree bejn por naj, per canin lojdi ni guna Waj din chililadxidi gap tëëdi perdon.

³⁵ Waj goc zi'cgajczi tijb bajl ni re'c abi' rusnin, guiáad lèjt dád babaadi bidxga'di tijb tiamp ni balüüman lèjt.

³⁶ Per naj mazri naj ni gulün lèjt guial loj ni balüü Waj lèjt por naj. Din ni na da Dadan Dios günan, laanan cayünan yan din guiguien guial diidxli laaman guxhaal naj.

³⁷ Nè da Dadan bén guxhaal naj, laagajcaman be da diidxan, majsi ad waguiejntidi cha'man ad waguiaa tēētidi laaman.

³⁸ Ad yu'guijc tēētidi xtiidxaman zeel ad rliladxtidi bén guxhaalaman.

³⁹ Lèjt con cudad da't roolidi loj xtiidx Dios, guial ragbeedi con laan gapidi gualnaban tiblayaa con Dios. Abi' majsi loj xtiidx gajcaman ruza't naj, ⁴⁰ per ad rēntidi chililadxidi naj din gapidi gualnaban guin.

⁴¹ Naj ad raguiltan guilies ree bejn da valoran.

⁴² Abi' ragbeechaawan guial ad walit rēndi Dios.

⁴³ Naj zial por da Dadan abi' ad ridxga'tidi naj. Per bal stijb bejn gui't por laagajcaman, laaman guidxga'di.

⁴⁴ ¿Xoza chililadxidi naj? Awa mazri naguiejn rüjndi guilies ree bejn xvaloridi luar yaya'ndi zagdx loj bén naj tijbzi Dios.

⁴⁵ Ad bal naladxidi naj gabec xgualquiadi loj Dios, din bén cwe'c xgualquiadi naj Moisejs, bén rbēzidi güün lèjt yudar.

⁴⁶ Bal bililadxidi ni rēb Moisejs, nè naj zaliladxidi, din Moisejs bacaa loj xtiidx Dios lod ruza't naj.

⁴⁷ Per bal id rliladxidi ni bacaaman, ¿xoza chililadxidi ni rnin lèjt?

6

Bayaan Jesús gaay mil bejn

(Mt. 14:13-21; Mr. 6:30-44; Lc. 9:10-17)

¹ Chi gudēd gojc zian, dxel zē Jesús stiblad ro'nijsdoo riga' niz Galilea, nijsdoo la gajc Tiberias.

² Bénguixiuj binal laaman, guial ruguiaa reeman milagr ree ni rüjnman rayünman bénragxuu ree.

³ Dxel wē'paman tijb ruguia' abi' gurenē ree xbejnman.

⁴ Dxejzii ree ma zidyob pascw, xlanij ree bén Israel.

⁵ Chi gules loj Jesús, abi' baguiaaman zēed ree bénguixiuj lod za'man, dxel rēbaman loj Felip:

—¿Ban yusii ree ni gaw gra ree bén guin?

⁶ Per rēbzaman zian din guidoon xhie guiēb Felip, din Jesús mal ragbeeman xhie güünman.

⁷ Dxel badxi' Felipan rēbaman:

—Ni'qui ni rüjn bejn gan loj xhujn bēew ad zadaant yo' guiadxtil din gaw tijbgaj reeman majsi tiblia'dogajzan.

⁸ Dxel gunee stijb xbejn Jesús, bén la Andrejs bijch Simón Bēd, rēbaman:

⁹—Laa tijb xindo ca' gaay guiadxtil con zatio'p bējl za' guie. Per, ¿tē'czi taan ni guin par gra bén guin?

¹⁰ Dxel rēb Jesús:

—Gol güjdx loj gra reeman din cwe reeman.

Abi' guial yu' da't guixya' yagaj, dxel gurej reeman. Naj reeman cost gaay mil xinguaaw.

¹¹ Dxel cwa' Jesús guiadxtil guin ree. Chi gulox badēeman quixtēē loj Dios, badēeman laa reen loj ree xbejnman persi gudi's reeman laa reen loj gra ree

bén zojb yagaj. Zianganj beenman con ree bëjl guin, badëëman laa reen zi'ctzi guyën reeman.

¹² Chi ma bixienladx reeman, dxel rëbaman loj ree xbejnman:

—Gol bato'p gra ree ni laay baya'n, chitëë xhie guizëëb.

¹³ Zianz bato'p reeman laa reen, abi' bacha reeman chiptio'p dxüm nilaay baya'n ree loj gaay guiadxtil guin.

¹⁴ Chi baguiaa ree bejn milagr narooob ni been Jesús, rëb reeman:

—Walican bén guin naj bén rudëë xtiidx Dios loj ree bejn, bén naj gui't loj guidxliuj.

¹⁵ Per gogbee Jesús guial rën reeman chinë naguiejn reeman laaman din güün reeman laaman rey, dxel bazaman yagaj, wë'paman mazri ladya guijc guia' guin, lod su xtijbaman.

Rza Jesús lonijsdoo

(Mt. 14:22-27; Mr. 6:45-52)

¹⁶ Chi ma cabej guiaal, biguiajt ree xbejn Jesús ro'nijsdoo,

¹⁷ guyu reeman loj tijb barcw, abi' cadëd reeman loj nijs guin din guidxin reeman Capernaum. Ma bicajy, guiáad Jesús gadaman yadxin.

¹⁸ Dxel guzuloj cabi' bidoxh abi' wajs xtüjp nijs guin.

¹⁹ Chi ma gojc zi'c gaay o xho'p kilometro zë reeman, baguiaa reeman caza Jesús lojnijs guin cabigaman lod zë barcw guin, dád bidxeb reeman.

²⁰ Per rëbaman loj reeman:

—¡Najn, ad rdxebidi!

²¹ Dxel guyën reeman niuman loj barcw guin, per hor guin gajc bidxin reeman lod zë reeman.

Bigdiil ree bén bayaan Jesús laaman

²² Chi bareguiaal, bén riga' ree stiblad ro' nijs guin, ragbee reeman guial tijbzi barcw guzu yagaj, abi' gogbee reeman, lojn zë ree xbejn Jesús per ad nët laaman.

²³ Loj hor zii bidxin ree barcw ren za guiedx Tiberias, gajxh lod gudaw reeman guiadxtil chi gulox badëëd Jesús quixtëë loj Dios.

²⁴ Chi baguiaa reeman achutri Jesús za' yagaj ni'qui ree xbejnman, dxel wë'p reeman loj ree barcw guin, zë reeman Capernaum zigdiil reeman laaman.

Jesús naj bén rudëëd guialnaban

²⁵ Chi bidxin reeman Capernaum, badxejl reeman Jesús, abi' gunabdiidx reeman lojman, rëb reeman:

—Mextr, ¿goc bi'til guie?

²⁶ Badxi' Jesúsán rëbaman:

—Ragbeechaawan, raguillidi naj guial gudawidi xt bigdxinladxidi, ad guial baguiaatidi milagr ree ni rünan.

²⁷ Ad chu'di xgab guialraw rara, gol guyu xgab guialraw runee guialnaban tiblayaa con Dios. Din laan naj ni runee Bén guxhaal Dios loj guidxliuj guial ma bacaabee Dios laaman.

²⁸ Dxel gunabdiidx reeman lojman rëb reeman:

—¿Xhie rayal yaguieenan din chile' yaguieenan ni rën Dios?

²⁹ Badxi' Jesús laan rëbaman:

—Ni rën Dios güündi naj guial chililadxidi bén guxhaalaman loj guidxliuj.

³⁰ Dxel rëb reeman lojman:

—¿Xhie gulüül dunujn din yaliduladxan lüj? ¿Xhietëë ree milagr rüjn!

³¹ Dux béngulal ree gudaw reeman mana chi guzu reeman niz loj yujbidx, zi'c rëb loj xtiidx Dios: “Badëëman guiadxtil biajb xanyabaa loj reeman gudaw reeman.”

³² Badxi' Jesús laan rëbaman:

—Naj rni lojdi: Ad Moisejst badëëd guiadxtil guin, da Dadan naj Bén runee quijb guiadxtil za xanyabaa.

³³ Guiadxtil runee Dios, laan bi't diizd xanyabaa abi' runeen guialnaban loj bénguidxliuj.

³⁴ Abi' rëb reeman lojman:

—Dad, baneë guiadxtil guin du lojn zianczi.

³⁵ Rëb Jesús loj reeman:

—Naj naj guiadxtil runee guialnaban guin. Bén gui't lon, ad yu't dxej guiliaanman, ziangajc Bén chililadx naj, ad yu't dxej che'caman nijs.

³⁶ Per zi'c rnin lojdi, majsi ma baguiaadi naj, ad rliadxtidi naj.

³⁷ Gra ree Bén ma baneë da Dadan lon, gui't reeman lon, abi' Bén gui't lon, ad zasiejctan laaman.

³⁸ Din naj zial diizd xanyabaa, zidgaguienan zi'c rën da Dadan Bén guxhaal naj, ad par güntan zi'c rënan.

³⁹ Da Dadan Bén guxhaal naj, ni rënman naj guial gra ree Bén baneeman lon ni'qui tijb reeman ad zunijttan, rënman yasbanan laa reeman chi nit guidxliuj.

⁴⁰ Din rënman guial gra ree Bén yayagbee Xi'nman chililadx tëë reeman laaman, gap reeman guialnaban tiblyaaa con laaman, guiáad naj yasban laa reeman chi nit guidxliuj.

⁴¹ Dxel guzuloj ree Bén Israel caneguijdx reeman Jesús, guial rëbaman: “Naj naj guiadxtil ni biguiajt diizd xanyabaa.”

⁴² Abi' rëb reeman:

—¿Nid laaxan naj Jesús ya, xi'n Xiëb? Dunuj ree naguieenbee xdadix con xniaax. Yan, ¿chexc zeel nax xanyabaa biguiajtix?

⁴³ Dxel rëb Jesús:

—Gol bacwëëz rnieeguijdxidi naj loj lasa'di.

⁴⁴ Dios naj Bén guxhaal naj. Achut zile' gui't lon bal id zëëdaman por da Dadan, abi' naj yasban laaman chi nit guidxliuj.

⁴⁵ Loj ree libr ni bacaa ree Bén badëë xtiidx Dios loj ree bejn, rëb: “Dios gulüü gra ree bejn.” Zeel gra ree Bén rucaagdiajg xtiidxaman, rusiid tëë reeman ni ruluüman laa reeman, laa reeman zëëd lon.

⁴⁶ Achutczi waguiaa da Dadan Dios, tijbzi Bén guxhaalaman loj guidxliuj ma baguiaa laaman.

⁴⁷ Diidxiczi rnin, Bén rliadx naj rajpaman guialnaban tiblyaaa con Dios.

⁴⁸ Naj naj guiadxtil ni runee guialnaban.

⁴⁹ Xbéngulalidi gudaw mana loj yujbidx, per ni'czi zian güjt gajc reeman.

⁵⁰ Per naj canin lojdi xcwent guiadxtil za xanyabaa, Bén gaw laan gapaman guialnaban tiblyaaa con Dios.

⁵¹ Naj naj guiadxtil naban ni biyajb diizd xanyabaa. Bén gaw guiadxtil guie zajpaman guialnaban tiblyaaa con Dios. Guiadxtil ni rudëdan, laan naj quijb da cuerpan, gudëdanan din gap ree bénguidxliuj guialnaban.

⁵² Dxel guzuloj ree Bén Israel guin cadildiidx reeman, rëb reeman:

—¿Xhienaag gunee xin guin xcuerpix yadaaw ree?

⁵³ Abi' rëb Jesús loj reeman:

—Naj rni lëjt, bal id zajwidi xcuerp Bén guxhaal Dios, bal id zë' tëëdi xrejnman, ad zajptidi guialnaban.

⁵⁴ Per b́en gaw da cuerpan guié' t́eeman da rejnán, zajpaman guialnaban tiblyaa con Dios, abi' naj yasban laaman chi nít guidxlíuj.

⁵⁵ Din da cuerpan naj quíjb guialraw, guíaad da rejnán naj quíjb ni guié' bejn.

⁵⁶ Abi' b́en raw da cuerpan ŕe' t́eeman da rejnán, laaman nabanné naj, guíaad naj nabanné' laaman.

⁵⁷ Da Dadan b́en guxhaal naj, rajpaman guialnaban, abi' naj nabanán por laaman. Ziangajc b́en gaw da cuerpan, zajpaman guialnaban tiblyaa con Dios por naj.

⁵⁸ Naj caní xcwent guiadxtíl ni biguíajt xanyabaa. Abi' guiadxtíl guie ad najtán z'i'c naj mana ni gudaw xb́engulalidi, din laa reeman majsi gudaw reeman mana guín, per gújt gajc reeman. Guíaad b́en gaw guiadxtíl guie zajpaman guialnaban tiblyaa con Dios.

⁵⁹ Zian balüü Jesús bejn ree lén yadoo Capernaum.

Diidx runee guialnaban tiblyaa

⁶⁰ Chi gulox bacaagdiáj reeman ni balüü Jesús laa reeman, zien ree b́en zinal laaman ŕeb:

—Nawéeg da't naj yayignia' ree ni naman. ¿Chu zajc guidxga' laaman?

⁶¹ Chi gogbee Jesús ni canee reeman, gunabdiidxaman loj reeman, ŕebaman:

—¿Rüjnnaa ni rnín léjt ya?

⁶² ¿Xhieza güüندی bal gugúiaadi B́en guxhaal Dios yayé'paman lod guzuman goclí?

⁶³ Tijbzi por xSprijt Dios rajp bejn guialnaban tiblyaa, bejn ad zile't güün laazaman xhienín. Abi' naj por xSprijt Dios źeéd ree diidx ni gunen lojdi, por ree diidx guín rajp bejn guialnaban.

⁶⁴ Per léjt yu'dí ad waliladxt.

Ŕeb Jesús zian guial ragbeechaawaman diízd yaloj chu ree ad ríliladxt laaman chu t́eé yayü laaman.

⁶⁵ Ŕeb t́eeman loj reeman:

—Zeel ma rnín lojdi guial achut zile' gui't lon bal id źeédaman por da Dadan Dios.

⁶⁶ Diízd nadxel, zien ree b́en zinal Jesús guro'nldax laaman, abi' ad guzanétri reeman laaman.

⁶⁷ Dxel ŕeb Jesús loj guidxiptio'p ree xbejnman:

—¿Né léjt ŕén yagúiaj ya?

⁶⁸ Per badxi' Simón Béd laan, ŕebaman:

—Dad, ¿chu loj yo'n? Awa xtiúdxil zidné guialnaban tiblyaa con Dios.

⁶⁹ Dunujn ma baliduladx rayagbee t́eén guial lüj naj Cristo, Xi'n Dios naban.

⁷⁰ Dxel ŕeb Jesús loj reeman:

—¿Nid naj gule guidxiptio'pídi ya? Abi' yan tijb gajqui léjt naj z'i'c xindxab.

⁷¹ Ŕeb Jesús zian por Judas Iscariote, xi'n Simón, din Judas guín naj b́en bayü laaman, majsi tijb gajc xbejnman najman.

7

Ad ríliladxt ree bijch Jesús laaman

¹ Chí gudéd gojc zian, wej Jesús loj ree guiedx riga' niz Galilea. Ad guyéntaman niejman niz Judea, guial cayguíil ree b́en Judea guín laaman din gúgújt reeman laaman.

² Per guial ma zidyob lanij ni rüjn ree bén Israel, chi rbej reeman lën ranch,

³ rëb ree bijch Jesús lojman:

—Brii, wej niz Judea, din në ree xbejn ben riga' ree niz ni guguaa milagr rüjn.

⁴ Din chi chu rën gagbee bejn ni rüjnman, ad rayalt güünman laan ralan. Yan zi'c rüjn milagr ree, beenan loj gra ree bejn.

⁵ Gunee ree bijch Jesús zian, guial ni'qui laa reeman ad riladxt laaman.

⁶ Dxel rëb Jesús loj reeman:

—Ad wadixint da horan, per par lëjt xhietëz horan naj zagdx.

⁷ Ad zajct guidxe'ch bénguidxliuj lëjt, sa'n naj rdxe'ch reeman naj guial rën loj reeman ad laat naj ni rüjn reeman.

⁸ Gol wej lanij guin, sa'n naj ad zazaagajtan, din ad wadixint hor ni gazaan.

⁹ Chi gulox rëbaman loj reeman zian, baya'nman Galilea.

Wej Jesús xlanij ree bén Israel

¹⁰ Chi ma zë ree bijch Jesús, dxel nëman zë lanij guin, per ralanzi zëman chitëe chu gagbee.

¹¹ Per yu' ree bén Israel raguiil laaman loj lanij guin, rëb reeman:

—¿Con bén guin ya'n?

¹² Loj gra ree benzien we lanij guin, zienloj ni rniee reeman Jesús. Yu' reeman rëb: “Benza'can”, yu'za reeman rëb: “Ad benza'ctan, rusquieeman bejn ree.”

¹³ Per achutczu ruza't laaman loj gra bejn, guial rdxeb reeman guxtis Israel ree.

¹⁴ Chi gurol xuman ni cayajc lanij guin, guyu Jesús lën yadooro' Jerusalén, abi' guzuloj culüüman bejn ree.

¹⁵ Guiaad ree bén Israel badxaloy reeman, rëb reeman:

—¿Chex ya'n contzi gra ragbeex, awa ni'quid basiiditix?

¹⁶⁻¹⁷ Dxel rëb Jesús loj reeman:

—Ad guictan carii ni culün lëjt, zëedan por Dios, bén guxhaal naj. Bal chu rën güün zi'c rënman, zignia'man bal ni carii guicanan culün lëjt o zëedan por Dios ya.

¹⁸ Bén rulüü ganaxzi ni rbëeguijcaman, rüjnman laan din guilies ree bejn xvaloraman. Per bén rüjn mazri din guilies bejn xvalor Dios, bén guxhaal laaman, laaman rniee ni diidxli, ad rusquieetaman bejn.

¹⁹ Yan, majsi basa'nnë Moisejs lëjt ley, per ni'qui tijbidi ad rüjnt zi'c rëb ley guin. ¿Chexquiza zeel rëndi gugüjtidi naj?

²⁰ Badxi' ree bén guinan, rëb reeman:

—Xindxab yu' luxdool. ¿Chucz rën gugüjt lüj?

²¹ Abi' rëb Jesús loj reeman:

—Por tijbzi milagr ni benan radxalojdi.

²² Abi' lëjt gunabee Moisejs lëjt guial gra ree xinguaaw chu' sen, (majsi ad por Moisejst ru bejn sen guin, mal rüjn ree dux bengol gulal ree zian), abi' lëjt rgu'di bejn ree sen, majsi dxej raziiladx bejn.

²³ Yan, bal chitëe gusaglojdi ley ni basa'nnë Moisejs lëjt, rgu'di sen bejn ree majsi dxej raziiladx bejn. ¿Chexquiza zeel ralendi guial bayünan tijb bénraxxu dxej raziiladx bejn?

²⁴ Ad rüjndi xgabmal por ni ruguaazidi rüjn bejn, yaloy xgaj gol gogbee zagdx xhie cayünman.

Rëb Jesús ban zaman

25 Yu' ree b́en Jerusalén guzuloj rniabdiidx loj lasa' reeman, rēb reeman:

—¿Nid b́en guinan cayguuil reeman ya din gugüjt reeman laaman?

26 Abi' yan laaman canee niz loj ree bejn, abi' ni'qui chut xhie rēb lojman. ¿Ni ma bililadx ree guxtis ya'n guial laaman naj Cristo?

27 Per dunuj ree rayagbeechaaw ban zaman, guiáad chi gui't Cristo, achut gagbee ban saman.

28 Chi biguiejn Jesús zian, la'tgaj culüüman bejn ree lēn yadooro' Jerusalén, dxel guneeman rejs rēbaman:

—¡Lējt rēb nünbeedi naj abi' ragbeedi ban guzaan! Per ad zialtan por naj gajc, zialan por quijb b́en rniabee b́en ad nünbeetidi.

29 Per naj nünbee laaman guial zialan diizd lod za'man, laa tēeman guxhaal naj.

30 Chi biguiejn reeman zian, guyēn reeman niniaaz reeman laaman, per achut gunaaz laaman, guial gad hor gal guiniaazaman.

31 Loj ree bénguixiuj za' yagaj zien reeman bililadx laaman, abi' rēb reeman:

—Chi gui't Cristo, ¿wen mazri zien ree milagr güünman guial loj b́en guin ya?

Guyēn reeman niniaaz reeman Jesús

32 Biguiejn ree b́enfarisew ni rniee ree bejn Jesús. Abi' laa reeman con ree bixhioz rniabee, guxhaal reeman b́en rajp ree ro' yadooro' Jerusalén din guiniaaz reeman Jesús.

33 Dxel rēb Jesús:

—Ad xchejtri gazunē'n lējt, dxel yaya'n lod za' b́en guxhaal naj.

34 Yaguilidi naj, per ad zadxejltidi naj, din ad zile't gui'tidi lod gazun.

35 Abi' ree b́en Israel guin guzuloj rniabdiidx loj lasa' reeman, rēb reeman:

—¿Banczi zajc che b́en guin din ad zadxejltaman? ¿Ni zejman lod zojb ree b́en Israel loj ree benzit ya, chiglüüman laa reeman nē ree b́en ad najt b́en Israel?

36 ¿Xhie rēn guiēb guial naman: “Yaguilidi naj per ad zadxejltan, din ad zile't gui'tidi lod gazun”?

Nijs runeeg guialnaban

37 Dxej rliox lanij guin naj mazri dxej zojbloj, dxejzii guzuli Jesús guneeman rejs, rēbaman:

—Bal chu lējt re'c nijs, gol guda lon din guiē'dan.

38 Din b́en rililadx naj zi'c ca loj xtiidx Dios, lēn luxdooman gach nijs runeeg guialnaban.

39 Chi guneeg Jesús zian, rēn guiēb xtiidxaman guial gra ree b́en chililadx laaman zabajnnē reeman xSprijt Dios. Din nadxel ad wayi'tt xSprijt Dios guial ad waguiajt Jesús lod canabeeman.

Gula' lasa' ree bejn

40 Yu' ree b́en no'ch loj ree benzien guin, chi bacaagdiajg reeman ni guneeg Jesús, rēb reeman:

—Walican, b́en guin naj gui't guidgadēē xtiidx Dios loj ree bejn.

41 Yu'za reeman rēb:

—B́en guin naj b́en bacaabee Dios.

Per yu' reeman rēb:

—Ad laataman naj Cristo, din ad niz Galileat naj griiman.

42 Loj xtiidx Dios ca guial loj xdiaa rey Davi grii Cristo, abi' Belén galaman ladx gajc rey Davi.

43 Zian gojc dxel gula' lasa' reeman por Jesús.

44 Zien reeman guyën niniaaz laaman, per achut bayax niniaaz laaman.

Ad bililadxt ree guxtis Jesús

45 Chi bayejc ree bën rajp ro' yadoo guin lod za' ree bënfarisew guin con ree bixhioz rniabee guin. Rëb reeman loj reeman:

—¿Chexc zeel ad bidnëtidì laax?

46 Dxel rëb ree bën rajp ro' yadoo guin:

—¡Ad goct wayu bën guinee zi'c rnieex!

47 Abi' rëb ree bënfarisew guin:

—¿Në lëjt ma cwëjb basquieex lëjt ya?

48 ¿Wen yu' ree dux guxtis ree, o bënfarisew ree ma bililadx laax ya?

49 ¿Nid ragbeedi ya guial zien ree bën guin banijt loj Dios guial ad nünbeet reeman ley?

50 Per bënfarisew la Nicodemo bën bignaj Jesús tijb guxhin, rëbaman loj reeman:

51 —Loj dux ley ree ca guial ad zile't yaguie'ch ree xhie casti rayal tijb bejn, chi gad dunuj ree yacaagdiajg xtiidxaman, din chile' yayagbee ree xhie beenman.

52 Badxi' reeman laan rëb reeman:

—¿Wen në lüj za'në ree bën Galilea ya? Basiid zagdxe loj xtiidx Dios din gagbeel ad goct warii bën rudëë xtiidx Dios loj ree bejn niz Galilea.

53 Dxel bare'ch reeman zia lidx lidx reeman.

8

Béngunaa banaaznë xinguaaw ren

1 Per Jesús zëman ruguia' Olivos.

2 Chi bareguiaal, rsil badxinman lën yadooro' Jerusalén stijb. Zien ree bejn bido'p lod za'man, dxel gurejman guzuloj culüüman laa reeman.

3 Abi' mextr ruluü ree ley con ree bënfarisew bidxinnë tijb béngunaa banaaznë tijb xinguaaw, dxel bazuj reeman laaman galay ree bën guin,

4 zianz rëb reeman loj Jesús:

—Mextr, banaaz béngunaa guie loj mer hor ni yu'nëman xinguaaw ren.

5 Abi' loj ley basa'nnë Moisejs dunuj ree ca guial lasa' béngunaa guie rayal guiëtaman con guiaj. ¿Laadx lüj xhie nal?

6 Gunabdiidx reeman zian din guidoon xhie guiëbaman din gac gutedia' reeman laaman. Per con basajb lojman abi' guzulojman cucaaman luyuj con xbacwënman.

7 Per guial laa reeman canabdiidxzi canabdiidx reeman lojman, abi' babejliman, rëbaman loj reeman:

—Chutëéz bën ad wayüjnt dol, yaløj laaman gucaaguaiaj béngunaa guie.

8 Dxel basajb lojman stijb, basnuu bacaaman luyuj guin.

9 Chi biguiejn reeman ni guneeman, guzuloj cayza tijbgaj reeman, diizd mazri bengol xt bara reeman baza. Tijbzi béngunaa guin baya'n con Jesús loj ree bën riga' yagaj.

10 Dxel babejliman, rëbaman loj béngunaa guin:

—¿Con ree bën bidnë lüj? ¿Ni'qui tijb reeman achut xhie been lüj ya?

11 Dxel rëb béngunaa guin:

—Dad, ni'qui tijbaman.

Abi' rëb Jesús:

—Ni'qui naj achet günan lüj. Baguiaj yan, ad güünril dol.

Jesús naj bajl par bénguidxliuj

¹² Dxel gunee Jesús stijb, rëbaman loj ree bén riga' yagaj:

—Naj naj bajl rusni bénguidxliuj. Abi' bén guzoob da diidxan, zani xquiar-guiejnman xhienaag gapaman guialnaban tiblayaa con Dios, ad yu' tëet dxej guicajy xquiar-guiejnman.

¹³ Abi' ree bénfarisew rëb reeman lojman:

—Lüj gajc ruza't lüj, abi' achet lasajc xtiidxil.

¹⁴ Dxel rëb Jesús loj reeman:

—Lasajc da diidxan, majsi naj gajc cane por naj, din naj ragbee ban zialan ban tëe gan, sa'n lëjt ad ragbeetidi ban zialan ban tëe gan.

¹⁵ Lëjt rnieedi bejn zi'ctizi naj xixgabidi, sa'n naj achut ruzatan.

¹⁶ Abi' bal guzatan bejn, ganen diidxil, din ad zanetan zi'c naj da xgaban, në da Dadan bén guxhaal naj ragbee guial diidxil naj ni ganen.

¹⁷ Abi' loj xleydi ca guial chi yu' tio'p bén rniee tiblojzi, diidxliqui naj ni rniee reeman.

¹⁸ Yan, naj gajc naj tijb bén rniee por naj, abi' da Dadan bén guxhaal naj, naj stijb bén rniee por naj.

¹⁹ Gunabdiidx reeman lojman rëb reeman:

—¿Con xdadil?

Badxi'man laan rëbaman:

—Lëjt ad nünbeetidi naj, ad nünbee tëetidi da Dadan, din bal nünbeedi naj, ziangajc nünbeedi da Dadan.

²⁰ Zian gunee Jesús la'tgaj rulüüman bejn ree lën yadooro' Jerusalén, niz lod za' ree ni ngu' reeman gon. Per achut gunaaz laaman, din ad wadxint hor guiniaazaman.

Lod gan ad zile't gui'tidi

²¹ Gunee Jesús stijb, rëbaman:

—Chi ma gan, zaguiilidi naj, per zëjtnë xtolidi, din lod gan ad zile't gui'tidi.

²² Dxel rëb ree bén Israel guin:

—¿Wen ni laagajcaman gugüjt laaman ya, zeel naman guial ad zajct yo' ree lod cheman?

²³ Abi' rëb Jesús loj reeman:

—Lëjt naj bén ladguiajt guie, sa'n naj ladya ni zialan. Lëjt naj bénguidxliuj, sa'n naj ad bénguidxliujt naj.

²⁴ Zeel rnin, zëjtnë xtolidi. Din bal id zaliladxidi guial naj naj bén najn, zëjtnë xtolidi.

²⁵ Dxel gunabdiidx reeman lojman, rëb reeman:

—¿Chuja lüj?

Badxi'man laan rëbaman:

—Ma rnin lojdi diizd yaløj.

²⁶ Zien ni ra'pan gulün lëjt ni ganenë' tëen lëjt. Per naj, ni canen loj bénguidxliuj naj ni rucagdiagan rniee bén guxhaal naj, abi' ni rnieeman naj diidxil.

²⁷ Per laa reeman ad gogbeet guial Diosan ruza'taman.

²⁸ Zeel rëbaman loj reeman:

—Chi ma beendi zi'ctizi rëndi con Bén guxhaal Dios, dxel gagbeedi najcan, gagbee tëedi guial achetczi rünan por da xgabzan, naj rnie ni ma balüü da Dadan naj.

²⁹ Din laaman guxhaal naj, laaman za' con naj, abi' ad yu't dxej cwëeladxaman naj, guial zianczi rünan ni rayuladxaman.

30 Chi rëb Jesús zian, zien ree bejn bililadx laaman.

Bén wali naj xbejn Dios

31 Rëb Jesús loj ree bén Israel bililadx laaman:

—Bal gusnuu guzoobidi da diidxan, waliqui najdi da bejnan,

32 abi' zÿjnbeedi conin naj diidxli, abi' por diidxli guin zalaadi.

33 Badxi' reeman laan rëb reeman:

—Dunuyn zio'p loj xdiaa Abraham, abi' ad yu't dxej wayajcan zi'c bén nado'. ¿Chexquiza zeel nal du lojn, guial por diidxli zalaan?

34 Dxel rëbaman loj reeman:

—Diidxli rnin lojdi, guial graczi bén rÿjn ganaxzi dol, laa reeman naj zi'c bén nado' loj dol.

35 Abi' tijb bén nado' loj bejn, ad zile't guiëbaman xfamilaman naj xpatronman, sa'n xi'n patron guin zile' guiëbix xfamilixan.

36 Zeel bal Xi'nman guslaa lëjt, ad najtridi zi'c bén nado'.

37 Ma qui ragbeen guial loj xdiaa Abraham zëedidi, per lëjt rën gugÿjt naj guial ad rayuladxtidi da diidxan.

38 Naj rni ni ma balüü da Dadan naj, sa'n lëjt rÿjndi zi'c na xDadidi güündi.

39 Badxi' reeman rëb reeman:

—Dux Dadan naj Abraham.

Dxel rëb Jesús loj reeman:

—Bal niajquidi xi'n Abraham, zÿjndi zi'c beenman.

40 Per yan, majsi ma rnin lëjt diidxli zi'c balüü Dios naj, lëjt rëndi gugÿjtidi naj. ¡Abi' Abraham ad yu't dxej nÿjnman zian!

41 Sa'n lëjt rÿjndi zi'cgajc rÿjn xDadidi.

Abi' rëb reeman loj Jesús:

—Dunuyn achut mazri xi'n nayajcan. Tijbzi Dios naj dux Dadan.

42 Dxel rëb Jesús loj reeman:

—Bal walidi Dios naj xDadidi, guiëndi naj, din por laaman zialan loj guidxliuj. Ad zialtan por naj gajc, zialan por Dios bén guxhaal naj.

43 Abi' ad rignia'tidi ni rnin, guial ad rëntidi gucaagdiajguidi da diidxan.

44 XDadidi naj xindxab, abi' rÿjndi zi'c rënx güündi, din diidz yaloj ruladx xindxab guin gugÿjtix bejn. Ad yu't dxej chinalix ni naj diidxli, din ad rnieetix diidxli. Chi rnieex diidx rusquiee, achet naladxix, din laax naj xin rusquiee naj tëëx xdad gualrusquiee.

45 Per guial naj rni lëjt ganax diidxli, ad rliiladxtidi naj.

46 ¿Chu lëjt zajc na guial yu' xhie dol ma benan? Abi' bal diidxli naj ni canen, ¿chexquiza zeel ad rliiladxtidi naj?

47 Bén naj xbejn Dios rucaagdiajgaman xtiidxaman, per lëjt ad xbejntaman najdi, zeel ad rucaagdiajgtidi xtiidxaman.

Mal yu' Jesús chi gad Abraham gal

48 Dxel rëb ree bén Israel guin loj Jesús:

—Waliqui ni ranan guial xindxab yu' luxdool naj tëël bén Samaria.

49 Badxi'man laan rëbaman:

—Achut xindxab yu' luxdon, naj cuzob xtiidx da Dadan, per lëjt ganax diidxguijdx rnieedi naj.

50 Naj ad ranguiltan guilies ree bejn da valoran, majsi yu' bén rën güün bejn zian, abi' laaman rÿjn xguialguxtis.

51 Diidxli rnin lëjt, bén guzoob da diidxan, ad yu't dxej guiëtaman.

52 Dxel rëb ree bén Israel guin lojman:

—Yanri ma rayagbeechaawan guial xindxabqui yu' luxdool. Abraham në gra ree bën badëe xtiidx Dios loj ree bejn, gÿjt reeman, guiáad lÿj nal: “Bën guzoob da diidxan, ad yu't dxej guiétaman.”

⁵³ ¿Wen mazri lasajquil ya guial loj dux béngulal ree Abraham? Gÿjtaman, gÿjt tée ree bën badëe xtiidx Dios loj ree bejn. ¿Laadx lÿj chu naladxil najl?

⁵⁴ Abi' rëb Jesús loj reeman:

—Bal naj gajc gales da valoran, achet lasajc ni ganen por naj. Per bën rlies da valoran naj da Dadan, bën nagajquidi naj xDiosidi.

⁵⁵ Lëjt ad nünbeetidi laaman, sa'n naj nünbeen laaman. Abi' bal ganin ad nünbeetan laaman, nëgajc naj ma naj bën rusquiee zi'cgajc lëjt. Per nünbeen laaman abi' ruzoban xtiidxaman.

⁵⁶ Xbéngulalidi Abraham, babaaman guial guguaaaman dxej ni guialan. Abi' chi baguaaaman dxej guin, mazri babaaman.

⁵⁷ Dxel rëb ree bën Israel guin lojman:

—Ni'qui gadil chu' tÿ'pchii ijz, ¿guiáad lÿj ya nal baguaaal Abraham?

⁵⁸ Abi' gunee Jesús rëbaman:

—Diidxli rnin lojdi, mal nabanen chi gad Abraham chu'.

⁵⁹ Dxel gules reeman guiaj din nucaa reeman laan Jesús. Per laa guzëeb gajcaman galay ree bejn, abi' gudëdaman galay reeman bariiman lën yadoo guin, laa zia gajcaman.

9

Rayÿjn Jesús tijb xin ad ranit loj

¹ Chi cadëd Jesús tiblajt, baguaaaman tijb xin ad ranit loj diizd chi golix.

² Dxel gunabdiidx ree xbejnman lojman, rëb reeman:

—Mextr, ¿chexc zeel ad ranit loj bën guin diizd chi golaman? ¿Por xtol ree xDadaman ya, o por xtol gajcaman?

³ Badxi' Jesúsán, rëbaman:

—Najman zian ad por xtoltaman ad por xtol tëët ree xDadaman. Gojlaman zian din chi yayajcaman, guguaaa ree bejn xguialrniabee narooob Dios.

⁴ Yan, la'tgaj yu' tiamp, rÿjn naguiejn yaguieen ree ni na bën guxhaal naj, din ma yayaaløj tiamp ni achetri zajc gac.

⁵ Abi' la'tgaj za'n loj guidxliuj guie, naj naj bajl rusni bénguidxliuj.

⁶ Chi gulox guneeman zian, guxhie' xhiejnman luyuj, abi' beennëman laan bajn, persi gudëëbaman laan guiaaløj xin guin.

⁷ Abi' rëbaman lojx:

—Bitiib lojl ro' tanc Siloé —Siloé rën guiëb ni guxhaalaman.

Dxel bitiib lojx, abi' chi bayejquix, ma rani lojx.

⁸ Dxel bën zojz ree gajxh lod zojbix con ree bën ragbee guial laax rniab carda, rëb reeman:

—¿Nid xin guinan rbej rniab carda ya?

⁹ Yu' reeman rëb:

—Laaquixan.

Yu'za reeman rëb:

—Ad laatixan, rguienzix zian.

Per laax rëb:

—Najcan.

¹⁰ Dxel gunabdiidx reeman lojx, rëb reeman:

—¿Xhieza naag gojc bani lojl?

¹¹ Badxi'xan, rëbix:

—Bén la Jesús been bajn, gudëëbaman guiaalon abi' naman: “Wej bitiib lojl ro' tanc Siloé.” Dxel wan, chi gulox gudiib lon, max bani lon.

¹² Abi' rëb reeman lojx:

—¿Conzaman yan?

Zeel rëbix:

—Ad ragbeetan.

Gunabdiidx ree bénfarisew loj xin guin xhienaag guzuloj rani lojx

¹³ Loj hor zii binë reeman xin bayajc guiaaloj guin loj ree bénfarisew,

¹⁴ din dxej been Jesús bajn persi bayüjnman guiaaloj xin guin, dxej guin raziiladx ree bejn.

¹⁵ Dxel gunabdiidx ree bénfarisew guin lojx xhienaag guzuloj rani lojx. Abi' rëbix loj reeman:

—Jesús gudëëb bajn guiaalon, dxel bitiib lon, yan ma ranin.

¹⁶ Yu' ree bénfarisew guin rëb:

—Bén bayüjn guiaalojl ad xbejnt Diosan, din ad rajptaman respejt dxej raziiladx bejn.

Per yu'za reeman rëb:

—¿Xhienaag güinman milagr guie ree, bal najman bëndol?

Garent garen rëb reeman.

¹⁷ Abi' gunabdiidx reeman loj xin bayajc guin zatijb, rëb reeman:

—¿Laadx lüj xhie nal chu naj bén bayüjn guiaalojl?

Badxi'xan rëbix:

—Naj rni guial laaman naj bén rudëë xtiidx Dios loj ree bejn.

¹⁸ Per bén Israel guin ree ad riladxt reeman, din ad banit lojx abi' yan ma ranin, dxel gurejdx reeman xdadix con xniaax,

¹⁹ abi' gunabdiidx reeman loj reeman, rëb reeman:

—¿Xin guien naj xi'ndi ya, xin rëbidi ad ranit loj diizd gojlíx? Yan, ¿xhienaag gojc zeel ma ruguiaax?

²⁰ Badxi' reeman laan rëb reeman:

—Dunujn rayagbee guial du xi'nanan, rayagbee tëen guial diizd chi golix ad ranit lojx.

²¹ Per ad rayagbeetan xhienaag gojc zeel rani lojx, ad rayagbee tëetan chu bayüjn guiaalojx. Gol gunabdiidx lojx, ma najx xingol, ma zajc na laagajquix lojdi xhienaag gojc.

²² Rëb ree xdadix zian guial rdxeb reeman xguxtis ree bén Israel, din ma baya'n reeman diidx, chutëéz bén guiëb guial Jesús naj Cristo, ad zatiëjbtri reeman chu'man lën yadoo.

²³ Zianan zeel rëb reeman: “Gol gunabdiidx lojx, ma najx xingol.”

²⁴ Dxel gurejdx reeman laax zatijb, abi' rëb reeman:

—Laa Dios ruguiaa, guna diidxli, din dunujn rayagbee guial bëndol naj bén bayüjn lüj.

²⁵ Badxi'xan rëbix:

—Ad ragbeetan bal bëndolan o ad bëndoltan ya. Tijbzi ni ragbeen naj guial ad banit lon, abi' yan ma ruguian.

²⁶ Dxel gunabdiidx reeman lojx stijb, rëb reeman:

—¿Xhienaag beennëman lüj? ¿Xhienaag beenman persi rani lojl?

²⁷ Badxi'xan rëbix:

—Ma rnin lojdi, abi' lëjt ad riladxtidi naj. ¿Chexc zeel rëndi ganin zatijb xhienaag beenman? ¿Wen në lëjt rën gac xbejnman ya?

²⁸ Dxel gudilë reeman laax rëb reeman:

—Lüj bal najl xbejnman, sa'n dunujn xbejn Moisejs nayajcan.

²⁹ Din dunujn rayagbee Dios guneë Moisejs, per bén guin ni'quid rayagbeetan ban zaman.

³⁰ Badxi'xan rëbix:

—ǰXhiehahnin zeel ad ragbeetidi ban zaman! Guiáad naj por laaman ma rani lon.

³¹ Dunuj ree rayagbeechaaw guial ad ridxga't Dios xtiidx ree bëndol, ridxga'man xtiidx ree bén ruzoob xtiidxaman rüjn tää reeman zi'c rënman.

³² Ad goct wacaagdiajg ree guial chu' bén yayüjn loj bén ad ranit loj diizd gojlaman.

³³ Yan, bal id por Dios zëed bén guin, achetczi nile' nüjnman.

³⁴ Dxel rëb reeman lojx:

—Lüj gojl con dol, ǰwed lüj gulüü dunujn?

Abi' babëë reeman laax yagaj.

Bililadx xin bayajc guin Jesús

³⁵ Gogbee Jesús ni guzac xin bayüjnman, dxel chi badxaagaman laax, rëbaman lojx:

—ǰRliladxil bén guxhaal Dios loj guidxliuj ya?

³⁶ Badxi'xan rëbix:

—Dad, guna chunin, din chililadxan laaman.

³⁷ Dxel rëbaman lojx:

—Ma baguiaal laaman, laaman naj bén caneenël.

³⁸ Abi' bazuxib xin guin lojman, rëbix:

—Rliladxan lüj, Dad.

³⁹ Zianz rëb Jesús:

—Bialan loj guidxliuj guie din günan gualguxtis, din por naj yani loj ree bén ad ranit loj, guiáad ree bén rani loj, ad zanit loj reeman.

⁴⁰ Yu' ree bënfarisew za'në laaman. Chi biguiejn reeman rëbaman zian, rëb reeman:

—ǰWen në dunujn ad ranit duloj ya?

⁴¹ Dxel rëb Jesús loj reeman:

—Bal id rani lojdi, achet dol rajpidi. Per guial nadi rani lojdi, rajpidi dol por ree xtolidi.

10

Bén rniaj xiil

¹ Rëb tää Jesús:

—Diidxliczi rnin lojdi, bén ad rut niz ro' xgurajl ree xiil, bén ru niz lood ren, laaman naj bëngubaan.

² Per bén ru niz ro' xgurajl reeb, laaman naj bén rniaj laa reeb.

³ Abi' rxhial bén rajp ro' xgurajl reeb persi ru bén rniaj laa reeb, abi' chi rbejdxaman tijbgaj reeb, rayünbee reeb cha'man. Zianz rbeëman laa reeb lën gurajl guin.

⁴ Abi' chi ma brier gra reeb, dxel rnedaman loj reeb, guiáad laa reeb rnal laaman, guial nünbee reeb cha'man.

⁵ Per ad rnalt reeb tijb bén ad nünbeet reeb, ruxüünl reeb lojman, guial ad nünbeet reeb cha'man.

⁶ Chi gulox guneë Jesús zian, ad bignia't ree bén riga' yagaj xhie rën guiëb ni guneeman.

Jesús naj zi'c bén rniaj xiil ree zagdex

⁷ Rëb Jesús loj reeman zatijb:

—Diidxiczi rnin, naj naj zi'c ro' xgurajl ree xiil, lod ru reeb.

⁸ Gra ree bën bi't chi gad naj guial naj reeman zi'c béngubaaan, rban reeman rusagzi tëë reeman. Per ree bën naj da bejnan ad bidxga't reeman laa reeman.

⁹ Naj naj ro' port, abi' bën ru ro' port guie zajpaman perdon, dxel ma zile' chu'man yarii tëëman zi'cgajczi tijb xiil abi' zian rdxejl ni rawib.

¹⁰ 'Béngubaaan ri'tzaman din cwanman, gugüjtaman gunijt tëëman, sa'n naj zialan din gapidi guialnaban, gap tëëdi zro' da'tan.

¹¹ Naj naj zi'c tijb bën rnijaj xiil ree zagdxe. Abi' bën rnijaj xiil ree zagdxe xt xguialnabanman rudëëman por laa reeb.

¹² Per bën rnijaj laa reeb por milia, chi ruguiaaman zëed cuyojt, laa ruxüün gajcaman, rbëëladxaman xiil guin ree guial ad najt reeb xi xiilaman në guial ad najtaman bën rnijaj ree xiil, dxel rniaaz cuyojt guin laa reeb abi' rtie'chib laa reeb.

¹³ Laaman rbëëladx laa reeb, din por miliazi rnijajman laa reeb abi' achet naladxaman por laa reeb.

¹⁴⁻¹⁵ 'Naj naj zi'c bën rnijaj xiil ree zagdxe. Abi' zi'c nünbee da Dadan naj, zian nünbeen laaman, ziangajc nünbee ree da xiilan, guiáad laa reeb nünbee naj. Abi' xt da guialnabanman gudëdan por laa reeb.

¹⁶ Ra'p tëën stibcwaa ree xiil ad yu't lën gurajl guie. Në laa reeb ryaadx chigxin, laa reeb guzoob da diidxan, yadxaag grop cwaa reeb gac reeb tijbzi, abi' tijbzi bejn gap laa reeb.

¹⁷ 'Da Dadan Dios rënman naj guial naj gajc rudë naj guiëtan par yabanan stijb.

¹⁸ Achut zajc gugüjt naj bal id naj gatiëëb. Naj ra'p guialrniabee par gatiëëban guiëtan në par yabanan stijb, din laan naj guialrniabee ni banee da Dadan lon.

¹⁹ Chi biguiejn ree bën Israel guin ni rëbaman, gojc reeman tio'p lala' stijb.

²⁰ Zien reeman rëb:

—¿Chexc zeel ridxga'di laaman? Awa xindxab yu' luxdooman rajc tëë guijcaman.

²¹ Per yu' reeman rëb:

—Ni'qui tijb bën yu' xindxab luxdoo ad rnieet zian. ¿Wen zajc yaxhal xindxab guiaaloj ree bën ad ranit loj ya?

Jesús con xDadaman Dios naj reeman tijbzi

²² Tiamp nayaag, chi cayüjn ree bën Israel lanij ni rüjn reeman gazobijz par yadooro' Jerusalén.

²³ Wej Jesús lën yadoo guin. Chi cazaman niz ro' curdur ni rniee reeman xcurdur Salomón.

²⁴ Dxel biyaw ree bën Israel laaman, rëb reeman lojman:

—¿Xt goc naga'loj cu'nawëëguil dunujn? Guna du lojn bal lüj naj Cristo.

²⁵ Badxi' Jesúsán rëbaman:

—Ma rnin lojdi, per lëjt ad rliladxtidi naj. Abi' ree ni rünan con xguialrniabee da Dadan Dios, laa reen ruluü chu najn.

²⁶ Per ad rliladxtidi, guial ad najtidi da bejnan.

²⁷ Bën naj ree da bejnan, nünbee reeman cha'n, guiáad naj nünbeen laa reeman, abi' laa reeman rzanal naj.

²⁸ Naj rudë guialnaban tiblyaa loj reeman, ad yu't dxej nit reeman. Abi' achut zajc chiquied laa reeman lon.

²⁹ Din da Dadan, b́en banee laa reeman lon, rajpaman mazri guialrniabee guial loj gra. Achut zajc chiquied laa reeman lojman.

³⁰ Da Dadan con naj, nayajcan tijbzi.

³¹ Dxel cwa' ree b́en Israel guin guiaj din gucaaguaiaj reeman Jesús.

³² Per rēbaman loj reeman:

—Por xguialrniabee da Dadan, zien ni zagdxe ma benan niz lojdi. ¿Con pornin gucaaguaiajdi naj?

³³ Badxi' reeman laan rēb reeman:

—Ad por ree ni zagdxe ni beentilan yacaaguaiajn lūj, yacaaguaiajn lūj guial ad rajptil Dios respejt, din b́enguidxliujzi lūj, abi' rūjn lūj gajc zi'c Dios.

³⁴ Dxel rēb Jesús:

—Loj xleydi rēb: “Naj rni guial lējt naj dios.”

³⁵ Dunuj ree rayagbee guial ad ni rusquieet naj ni ca loj xtiidx Dios. Abi' laaman gulēlaj dios b́en basa'nnē ree xtiidxaman, b́en gojp ree guialrniabee loj ree b́en Israel.

³⁶ Yan, bal da Dadan Dios gulēeca naj persi guxhaalaman naj loj guidxliuj, ¿chexquiza zeel nadi ad ra'ptan laaman respejt guial rnin, xi'nman naj?

³⁷ Bal id cayūnan zi'c na da Dadan, ad chililadxidi naj.

³⁸ Per bal cayūnan zi'c naman, majsi ad zaliladxtidi naj, per gol bililadx guial por laaman zēed ni rūnan din gagbeedi guial da Dadan za'nē naj, guiaad naj za'nē'n laaman.

³⁹ Dxel guyēn reeman niniaaz reeman Jesús, per gulaaman loj reeman.

⁴⁰ Abi' zēman zatiblad ro' guiiw Jordán, lod baroobnijs Waj bejn ree yaloj, yagaj baya'nman.

⁴¹ Abi' zien ree b́en bidxin yagaj rēb:

—Walin, majsi achet milagr been Waj, per gra ni guneeman xcwent b́en guie naj diidxli.

⁴² Dád zien reeman bililadx Jesús yagaj.

11

Gūjt Lazr

¹ Guyu tijb b́enragxuu, b́rii lajman Lazr. Laaman con re bizanman Li con Mart, naj ladx reeman Betania.

² Abi' Li bizan Lazr, laam baroob perfum guia' Jesús abi' bacwiidximin con guidxguijquim.

³ Dxel grop b́el reem guxhaal ruson loj Jesús, rēb reem:

—Dad, ragxuu xmiwil Lazr.

⁴ Chi biguiejn Jesús zian, rēbaman:

—Guialguijdx guin ad zēēdan par gugūjtan, zēēdan din gac guguiaa bejn xguialrniabee Dios nē par guguiaa reeman xguialrniabee Xi'n Dios.

⁵ Majsi rēn da't Jesús Mart con Li nē Lazr,

⁶ per chi cwa'man ruson ragxuu Lazr, sta goglaaman zatio'p dxej lod za'man.

⁷ Dxel rēbaman loj ree xbejnman:

—Yo' ree niz Judea zatijb.

⁸ Abi' rēb reeman lojman:

—Mextr, ad wayajct xchej guyēn ree b́en zojb niz ni nucaaguaiaj reeman lūj. ¿Abi' chel ni zatijb ya?

⁹ Dxel rēb Jesús:

—Lëjt ragbee guial chiptio'p hor yu' tibdxej. Abi' bën rza radxe, achet rirejl guia'man, din yu' bajl rusni loj guidxliuj guie.

¹⁰ Per bën rza guxhin, yu' ni rirejl guia'man, din achet bajl guin rajpaman.

¹¹ Rëb tëë Jesús loj reeman:

—Ma naga'yëjs dux miw ree Lazr, per chicwëënan laax.

¹² Dxel rëb ree xbejnman:

—Dad, bal naayëjsix, rën guiëban yayajquix.

¹³ Per ni rëb Jesús rën guiëban guial ma güjt Lazr, guiáad ree xbejnman gunaladx reeman rëbaman naga'yëjsizix.

¹⁴ Dxel bagojn Jesús laa reeman, rëbaman:

—Ma güjt Lazr.

¹⁵ Rabaan por lëjt guial ad guzutan ni din chililadxidi naj. Yan, yo' ree yugnaj reex.

¹⁶ Dxel Tumajs, bën rníee reeman cwajch, rëbaman loj los demazri xbejn Jesús:

—Yo' ree yunë' reeman, din lod guiëtaman, yayëjtnë' reeman.

Jesús naj bën rusban bejn runee tëëman guialnaban

¹⁷ Chi bidxin Jesús Betania, ma gojc tajp dxej biguie'ch Lazr.

¹⁸ Betania guin raya'n nan gajxh Jerusalén, zi'ct choon kilometro.

¹⁹ Abi' zien ree bën Israel bignaj Mart con Li din yagu' reeman luxdoo reem guial güjt bizan reem.

²⁰ Chi gogbee Mart ma zëed Jesús gajxh, briim bigchaaglojm laaman, guiáad Li baya'nm lëñü.

²¹ Dxel rëb Mart loj Jesús:

—Dad, bal nizujl guie, ad ziant niëjt da zanan.

²² Per naj ragbee guial ni'qui yan zunee Dios ni guiniabil lojman.

²³ Dxel rëb Jesús:

—Naj rni yaban bizanl.

²⁴ Badxi'min rëbim:

—Ma qui ragbeen, yabanm dxej yaban gra ree bengüt. Chi guidxin dxej güün xguialguxtis Dios.

²⁵ Abi' rëb Jesús:

—Naj naj bën rusban ree bengüt rudë tëën guialnaban loj ree bejn. Bën chililadx naj, majsi guiëtaman, per zajpaman guialnaban loj Dios.

²⁶ Guiáad gra bën naban rliladx tëë naj, zajpaman guialnaban loj Dios. ¿Rliladxil ni canin lüj ya?

²⁷ Dxel rëbim lojman:

—Rliladxanan Dad. Rliladxan lüj naj Cristo, Xi'n Dios, bën naj gui't loj guidxliuj.

Biin Jesús ro' xbaa Lazr

²⁸ Chi gulox rëb Mart zian, dxel bignee xbëlim Li, rëbim ralan:

—Ma bi't Jesús, abi' caneeman lüj.

²⁹ Biguiejnzi Li zian, laa bisugajquim bigchaaglojm Jesús.

³⁰ Abi' Jesús gadzaman chu' luguiedx guin, sta za'man lod bigchaagloj Mart laaman.

³¹ Guiáad ree bën Israel zojbnë Li ragu' reeman luxdoo, chi baguiaa reeman cari da't bisum zëm, binal reeman laam. Gunaladx reeman ro' xbaa Lazr ziguiaanm.

³² Chi bidxinm lod za' Jesús, bazuxibim lojman rëbim:

—Dad, bal nizujl guie, ad ziant niëjt da zanan.

³³ Chi baguiaaman roon Li con ree bén Israel nal laam, dád gognaa luxdooan guyu naya tēeman.

³⁴ Dxel gunabdiidxaman rēbaman:

—¿Ban biquie'chidi laax?

Abi' rēb reeman:

—Dad, guda nial din guguaial.

³⁵ Dxel biinman.

³⁶ Abi' rēb ree bén Israel guin:

—Gol baguiaa nial dád guyēnman laax.

³⁷ Per yu' reeman rēb:

—Bén guinan baxhal guiaaloj tijb bén ad ranit loj. Yan, ¿niche niajc nūjnman ya'n chitēē niëjt Lazr?

Basban Jesús Lazr

³⁸ Dád guyu naya luxdoo Jesús stijb, chi gubigaman ro' xbaa Lazr. Najn tijb guiajbiliaa, nada'cw tijb guiaj ro'n.

³⁹ Dxel rēbaman:

—Gol biquied guiaj guin.

Per Mart, bizan xingüt guin, rēbim:

—Dad, ma rliaam nadxuudx, din ma gojc tajp dxej ni gütim.

⁴⁰ Badxi' Jesúsán rēbaman:

—¿Nid rnin ya, bal rliladxil, guguaial xguialrniabee Dios?

⁴¹ Dxel bisüd reeman guiaj guin. Zianz gules loj Jesús xanyabaa rēbaman:

—Dad, quixtēē lūj guial ma bacaagdiajguil ni rnin.

⁴² Naj ragbeechaaw guial zianczi rucaagdiajguil ni rnin. Per rnin zian por ree bén riga' guie, din chililadx reeman guial lūj guxhaal naj.

⁴³ Chi gulox rēbaman zian, dxel guridxa'man rēbaman:

—¡Lazr, barii yagaj!

⁴⁴ Dxel barii Lazr lēn baa guin nalüüb vend yaax con guia'x, guiaad lojx nayaaw lajd. Dxel rēb Jesús loj reeman:

—Gol baxhiequix, gol baslaax yaguaiajx.

Baya'n reeman diidx xhienaag guiniaaz Jesús

(Mt. 26:1-5; Mr. 14:1-2; Lc. 22:1-2)

⁴⁵ Dád zien ree bén binal Li bililadx Jesús, guial baguiaa reeman milagr beenman.

⁴⁶ Per yu' reeman bicojn bēnfarisew ree ni been Jesús.

⁴⁷ Dxel bēnfarisew ree nē ree bixhioz rniabee, bachajg lasa' reeman con los demazri ree guxtis, rēb reeman:

—¿Xhienaag yaguien ree ya'n, din dád zien milagr cayūjn xin guin?

⁴⁸ Bal yadēēd ree mod, graczi bejn guililadx laax, dxel guxtis Rom ree guidganijt reeman dux yadoo ree nē dux nacion ree.

⁴⁹ Per loj reeman yu' bén la Caifás, bixhioz zobjloj rniabee loj ijszii, rēbaman loj reeman:

—¿Nid ragbeedi ya,

⁵⁰ nid rignia' tēēdi ya, zagdxe naj guiēt tijbzi bejn por gra bén Israel, luar nit dux nacion ree?

⁵¹ Per Caifás guin ad ni naladxtzaman rēbaman. Guial najman bixhioz zobjloj rniabee loj ijszii, zeel badēēd Dios ni guneeman, guial guiēt Jesús por gra ree bén Israel.

⁵² Abi' ad por laatzi reeman, par gac reeman tijbzi con gra ree xbejn Dios, b́en riga' ree guidib guidxliuj.

⁵³ Zeel diidz dxejzii baya'n reeman diidx gugýjt reeman Jesús.

⁵⁴ Zianan zeel ad contzi rulüülojtraman loj ree b́en Israel, bazaman yagaj ziaman guiedx la Efraín, najn gajxh yujbidx, yagaj guzuné ree xbejnman.

⁵⁵ Dxejzii ree ma zidyob pascw, lanij rýjn ree b́en Israel, dád zien ree b́en guiedx ree zé Jerusalén din güün reeman zi'c naj xcostumbr reeman par gac reeman naya loj Dios chi gad pascw gal.

⁵⁶ Dxel raguuil reeman Jesús, abi' rniabdiidx loj lasa' reeman lén yadooro' Jerusalén, rēb reeman:

—¿Xhie nadi? ¿Zi'taman lanij ya o ad zi'ttaman?

⁵⁷ B́enfarisew ree con ree bixhioz rniabee, gunabee reeman bal chutēēz b́en ragbee ban za' Jesús, gugojnman din chile' guiniaaz reeman laaman.

12

Baroob Li perfum guia' Jesús

(Mt. 26:6-13; Mr. 14:3-9)

¹ Za xho'p dxej riaadx gal pascw, chi we Jesús Betania, lod zojb Lazr, xin basbanman.

² Ni been reeman tijb guialraw par xche ni gudawné reeman Jesús. Mart gule'c guialraw guin, guiaad Lazr naj tijb b́en gurené laa reeman xan mex.

³ Dxel cwa' Li cost garol lijtr perfum ni lasajc wayējx, najcchaawnēn ganax nardo, baroobimin guia' Jesús abi' bacwiidxné guidxguijquimin. Guidibczi lēnū guin baree nejxh.

⁴ Dxel Judas Iscariote, xin naj tijb ree xbejn Jesús, xin bayü laaman, rēbix:

⁵ —¿Chexc ad gudo't perfum guin? Zagdxeli nido'n zi'ct rýjn tijb bejn gan tib ijz, din nýjnan yudar b́enprob ree.

⁶ Ad guial yu'tix xgab b́enprob guin ree zeel rēbix zian, rēbix zian guial najx xin gubaan. Abi' guial laax naaz bols yu' milia, rbanx ni rudēē reeman rgu'chaawix.

⁷ Dxel rēb Jesús lojx:

—Guzujr biinan. Ma badxe'xgajm naj perfum guin par chi guidxin dxej guiguie'chan.

⁸ Din b́enprob guin ree zianczi za'né reeman lējt, per naj ad ziantczi gazuné'n lējt.

Baya'n reeman diidx gugýjt reeman Lazr

⁹ B́en guixiuj b́en Israel gogbee za' Jesús Betania, abi' wej reeman yagaj, ad par guguaatzi reeman Jesús, nē par guguaa reeman Lazr, xin basbanman.

¹⁰ Zeel baya'n ree bixhioz rniabee diidx guial nē Lazr gugýjt reeman.

¹¹ Din por laax dád zien ree bejn cayrii loj reeman, abi' caliladx reeman Jesús.

Bagajpdioz ree bejn Jesús zi'c rey

(Mt. 21:1-11; Mr. 11:1-11; Lc. 19:28-40)

¹² Chi bareguiaal, zien da't ree b́en zé lanij pascw Jerusalén gogbee guidxin Jesús yagaj,

¹³ dxel cwa' reeman zijn, brii reeman bigchaagloj reeman laaman, rbidxa' reeman rēb reeman:

—¡Benza'c bendxoon naj Dios! ¡Nýjnle'man B́en guxhaalaman! ¡Nýjnle'man b́en naj rey Israel!

¹⁴ Bidxaagloj Jesús tijb burdoo, abi' gudxibaman laab, persi gojc zi'c ca loj xtiidx Dios lod rëb:

¹⁵ Bén Sión, ad rdxebidi.

Gol baguiaa, laa xreydi zëed,
dxiibaman tijb burdoo.

¹⁶ Yaløj ad bignia't ree xbejn Jesús ni cayajc. Per chi ma bayë'paman xanyabaa, dxel bignia' reeman guial zian ca loj xtiidx Dios xcwentaman, zeel gojc zian.

¹⁷ Bén guzu ree con Jesús chi guredxaman Lazr din yariix lën baa, basban tèëman laax loj ree bengüt, rusnuu rü reeman diidx loj ree bejn ni baguiaa reeman.

¹⁸ Zeel zien ree bejn brii bigchaagloj laaman, guial gogbee reeman milagr beenman.

¹⁹ Dxel rëb loj lasa' ree bénfarisew:

—Gol baguiaa nial graczi bejn zinal laax, achetri zajc yaguieen ree.

Yu' ree bén grieg raguüil Jesús

²⁰ Loj gra ree bén we lanij bignajchi' reeman Dios Jerusalén, no'ch bëlzi ree bén grieg,

²¹ gubig reeman loj Felip, bén za guiedx Betsaida, ni riga' niz Galilea, guzajc reeman liaadx rëb reeman:

—Dad, rayënan yaneenë'n Jesús.

²² Abi' wej Felip biguiedxaman loj Andrejs, dxel wej grop reeman bicojn reeman Jesús.

²³ Badxi' Jesúsán rëbaman:

—Ma bidxin hor par Bén guxhaal Dios, guiëtaman abi' yabanman.

²⁴ Diidxliczi rnin, zi'c tijb xob bal idan chu' luyuj najz najn tijbzi, per bal chu'n luyuj zajcxhiejn.

²⁵ Bén ru mazri xgab naabzi por guialnaban yu' loj guidxliuj guie, yu' dxej gunijtaman laan, per bén ru mazri xgab güünman zi'c rën Dios, xhietëez sacaman, zajpaman guialnaban tiblyayaa con laaman.

²⁶ Bal chu rën güün ni rënan guidnalaman naj, lod gazun, nëgajcaman su. Bén güün ni rënan, guiën da Dadan laaman.

Rugojn Jesús guial guiëtaman

²⁷ Rëb tèë Jesús:

—Dád yu'n xgab. ¿Xhie guiën? ¿Zën ya: “Dad, babëë naj loj ni gazaagdiajn”? Per ad zëtan zian, din par zian zialan.

²⁸ Dad, balüü xguialrniabeel.

Dxel biguien cha' bejn xanyabaa rëbaman:

—iMa balü da guialrniabeen, per gulünan stijb!

²⁹ Riguiëjn ree bén riga' yagaj, zeel rëb reeman:

—Guziaawan guridxa'.

Per yu' reeman rëb:

—Tijb anjlan gunee laaman.

³⁰ Dxel rëb Jesús:

—Ad por najtan biguien cha' bejn, por lëjtan.

³¹ Ma bidxin dxej gac guialguxtis loj guidxliuj, yan yarii bén rniabee lojn.

³² Per chi guilies reeman naj ya loj guidxliuj guie, dxel gui't graløj bejn lon.

³³ Zian basignia'man xhienaag guiëtaman.

³⁴ Badxi' ree bén guinan rëb reeman:

—Dunujn rayagbee rëb loj ley, Cristo guiban tiblyaa. ¿Chexc zeel nal, rayal guilies reeman Bén zëed xanyabaa? ¿Chunin naj Bén zëed xanyabaa?

³⁵ Rëb Jesús loj reeman:

—Ad zien dxejtri sunë bajl guie lëjt. Gol guza la'tgaj za'nëdi bajl guie, chitëë guiniaaz guiaal lëjt. Din bén rza loj xcaj, ad ragbeetaman ban cheman.

³⁶ Gol bililadx bajl guie, la'tgaj za'nëdan, din gaquidi xbejnman.

Chi gulox gunee Jesús zian, dxel baquie'chlojman loj reeman.

Ad bililadx ree bejn Jesús

³⁷ Majsi been Jesús zien da't milagr baguiaa reeman, ad bililadx reeman.

³⁸ Zian gojc cumplid ni bacaa Isaías bén badëë xtiidx Dios loj ree bejn, rëban: Dad, ¿chu ma bililadx ruson radëëdan?

¿Chu loj ma balüü Dios xguialrniabeeman?

³⁹ Zianan zeel ad gojct nililadx reeman, din në ze bacaa Isaías:

⁴⁰ Dios basiaaw guiaal loj reeman, bascajy tëëman xquiarguejn reeman, chitëë guguaa reeman chignia' tëë reeman, chitëë yadxi' loj reeman lon, abi' ad zayüntan laa reeman.

⁴¹ Rëb Isaías zian guial baguiaaman xbiani Jesús, zeel baza'taman laaman.

⁴² Per ni'czi zian, dád zien ree bén zojbloj bililadx Jesús. Per ad rëbt reeman loj ree bejn zian, guial rdxeb reeman yabëë ree bénfarisew laa reeman lod ricaagdiajg reeman xtiidx Dios,

⁴³ din mazri rën reeman guiën ree bejn laa reeman, guial guiën Dios laa reeman.

Rniee Jesús zi'c rniabee xDadaman

⁴⁴ Gunee Jesús rejs rëbaman:

—Bén rililadx naj, ad najtzan rililadxaman, në da Dadan bén guxhaal naj.

⁴⁵ Bén ruguaa naj, në bén guxhaal naj ruguaaman.

⁴⁶ Naj naj bajl, bialan loj guidxliuj guie, chitëë yaya'n ree bén rililadx naj loj xcaj.

⁴⁷ Bal chu guien da diidxan abi' ad zuzoobtaman laan, ad najt gudëd laaman casti, din ad bialtan din gudëdan casti, bialan din yabën laa reeman loj dol.

⁴⁸ Bén ad rënt naj ad rucaagdiajg tëëtaman da diidxan, mal yu' ni gudëëd laaman casti: diidx ni rën, laan gudëëd laaman casti chi guidxin dxej.

⁴⁹ Din ad ni rbëguictan rnien. Da Dadan, Bén guxhaal naj rniabee ni ganen ni gulü tëën,

⁵⁰ zeel ragbeen, ni rniabee da Dadan runee guialnaban tiblyaa. Zianan zeel ni rnin rulünan zi'c rniabeeman.

13

Gudiib Jesús guia' ree xbejnman

¹ Guixiezi gal lanij pascw. Ma ragbee Jesús guial ma bidxin hor gusa'nman guidxliuj guie din yaguij loj xDadaman. Zianczi guyën ree xbejnman, bén riga' ree loj guidxliuj, rënman laa reeman goctëëz.

²⁻⁴ Chi gad reeman gaw xche, mal badxe' xindxab ni mal luxdoo Judas, xi'n Simón Iscariote, ma rüjnx xgab yayüx Jesús loj ree bén gugüjt laaman. Ragbee Jesús guial badëëd xDadaman gra guialrniabee lojman, laa tëëman guxhaal laaman, zeel yaguijman lod za'man. La'tgaj cayaw reeman, bisuman xan mex, gulëëman tijb lajd najcwaman luya, dxel cwa'man tijb tuay guxhii xizaman.

⁵ Abi' badxe'man nijs loj tijb xijg, guzulojman caguiibaman guia' ree xbejnman, cucwiidx tēeman laan con tuay naxii xizaman.

⁶ Chi bayal quiibaman guia' Simón, bēn rniee reeman Bēd, rēbaman loj Jesús:

—Dad, ¿lūj quiib guia'n ya?

⁷ Badxi'man laan rēbaman:

—Ad rignia'til ni cayūnan yan, per qui chignia'rilan.

⁸ Zeel rēb Bēd lojman:

—Ad zatiēēbtan quiibil guia'n.

Abi' rēb Jesús:

—Bal id zaguiiban guia'l, ad zile'tri gaquil da bejnān.

⁹ Zeel rēb Bēd lojman:

—Dad, ad bal guia'zan quiibil, gudiib nē yan con guican.

¹⁰ Badxi'man laan rēbaman:

Bēn goznejz guia'zaman riaadx chēd, din guidibaman naya. Abi' lējt ma nayadi, majsi ad gratidi.

¹¹ Ma ragbeeman chu yayü laaman, zeel rēbaman: “Ad gratidi naya.”

¹² Chi gulox gudiibaman guia' reeman, bayajcw xabaman, gurejman xan mex guin zatijb, dxel rēbaman:

—¿Bignia'di ni benan ya?

¹³ Rnieedi naj Mextr nē Dad, waliquidi najn.

¹⁴ Bal najn Mextr nē Dad, gudiiban guia'di, ziangajc quiib guia' lasa'di.

¹⁵ Ma balūn lējt, din güüñdi zi'c benan.

¹⁶ Diidxliczi ganin, achut mojs naj mazri guial loj bēn rniabee laaman, achut bēn ri't naj mazri guial loj bēn rxhiaal laaman.

¹⁷ Bal rignia'di nine güün tēēdan, yabaanē Dios lējt.

¹⁸ 'Ad gratidi ruzatan ragbeen chu reenin gulen. Per rayal gac cumplid ni ca loj xtiidx Dios, rēban: “Bēn rawnē'n tijbzi, bayejcaman contr naj.”

¹⁹ Ma rugojnan lējt din gagbeedi chi gac zian, din chililadxidi chu najn.

²⁰ Diidxliczi ganin, bēn rucaagdiajg ni rēb bēn rxhialan, najn rucaagdiajgaman, guiáad bēn rucaagdiajg da diidxan, xtiidx bēn guxhaal najn rucaagdiajgaman.

Bagojn Jesús chu yayü laaman

(Mt. 26:20-25; Mr. 14:17-21; Lc. 22:21-23)

²¹ Chi gulox guneē Jesús zian, dād guyunayaman, dxel rēbaman loj reeman zagdxe:

—Diidxliczi ganin, tijb lējt yayü naj loj ree bēn gügüjt naj.

²² Dxel guzuloj ree xbejnman ruguiaa loj lasa' reeman, ni'quid ragbeet reeman chunin ruza'taman.

²³ Tijb bēn guyēn da'taman zojb cwē'man, hor zii chi cayaw reeman xche,

²⁴ dxel been Bēd sen lojman din guiniabdiidxaman chunin ruza't Jesús.

²⁵ Zeel mazri gubigaman cwē' Jesús gunabdiidxaman, rēbaman:

—Dad, ¿chunin?

²⁶ Badxi' Jesúsān rēbaman:

—Gugajdxan ta'n guiadxtil, din loj xin gudēdanan, laaxan yayü naj.

Dxel bagajdxaman ta'n guiadxtil badēēman laan loj Judas, xi'n Simón Iscariote.

²⁷ Chi gudawixan, laa guyu gajc xindxab luxdoox. Zeel rēb Jesús lojx:

—Ni güüñl, cari beenan.

²⁸ Per achutczi ree bēn zojb xan mex guin bignia' chexc zeel rēbaman zian.

²⁹ Guial ca' Judas bols ni yu' milia, zeel naladx garol reeman rëb Jesús lojx din chisiix ni gaw reeman lanij guin o gudëëdix ta'n'an loj ree bën rzagdiaj ya.

³⁰ Chi ma gudawix guiadxtil guin, dxel briix, ma guxhin.

Gunabee Jesús tijb nicüb

³¹ Chi ma brii Judas, rëb Jesús loj ree xbejnman:

—Yan guien xguiarlriabee Bén guxhaal Dios din gagbee ree bejn xhienaag naj gualrriabee gudëë Dios lojman.

³² Din bal gulüü Bén guxhaal Dios xguiarlriabee Dios, ziangajc gulüü Dios xguiarlriabeeman, zeel ma gudëëdaman laan.

³³ Xi'n, ad zien dxejtri gazunë'n lëjt, yaguilidi naj, per zi'cgajc rën loj ree bejn, ziangajc ganin lojdi yan: Ad zajct chedi lod gan.

³⁴ Ganin tijb nicüb ganabeen: Gol guyën lasa'di zi'c rënan lëjt.

³⁵ Bal guiën lasa'di, zian gagbee gra bejn guial najdi da bejnan.

Guiëb Bëd ad nünbeetaman Jesús

(Mt. 26:31-35; Mr. 14:27-31; Lc. 22:31-34)

³⁶ Gunabdiidx Bëd loj Jesús rëbaman:

—Dad, ¿ban chel?

Zeel rëb Jesús:

—Ad zajct guidnalil naj lod gan yan, per zadxin dxej guidnalil naj.

³⁷ Zeel rëb Bëd:

—Dad, ¿chexc zeel ad zajct guidnaalan lüj yan? Xt zajc guiëtan por lüj.

³⁸ Badxi' Jesúsán rëbaman:

—¿Walil ya rënl guiëtäl por naj? Diidxliczi ganin, chi gad gujd cwidxa', mal rëbil choon volt, ad nünbeetil naj.

14

Jesús naj nejz guidxinnë bejn loj Dios

¹ Rëb tëë Jesús:

—Ad rudi xgab. Gol bililadx Dios, gol bililadx tëë naj.

² Lidx da Dadan dád zien luar lod guiban bejn yu'. Bal iche yu', ad ziant ganin lojdi, chiguienchaawan xluaridi.

³ Chi ma benchaawan luar guin, dxel yaguialan guidgaxin lëjt din sudi lod gazun.

⁴ Ma nünbeedi nejz zë lod gan.

⁵ Zeel rëb Tumajs lojman:

—Dad, ad rayagbeetan ban chel, ¿xhienaag yaguieenbeen nejz guin?

⁶ Badxi'man laan rëbaman:

—Naj naj nejz, najn diidxli, naj tëën gualnaban. Tijbzi naj zajc chinë' bejn ree loj da Dadan.

⁷ Bal nünbeedi naj, në da Dadan güünbeedi. Per ma nünbeedi laaman diizd yan, din ma baguiaadi laaman.

⁸ Dxel rëb Felip:

—Dad, banee mod majsi yaguiaazan bën naj xDadil.

⁹ Badxi'man laan rëbaman:

—Felip, ma gojc xchej za'në'n lëjt. ¿Nid wayünbeel naj ya? Din bën ruguiaa naj, da Dadanan ruguiaaman. ¿Chexc zeel nal gunen mod guguiaal da Dadan?

¹⁰ ¿Nid rililadxil ya, naj za'në' da Dadan, guiáad laaman za'në naj? Ni rnin lojdi, ad rbëguictanan. Da Dadan, bën nabannë'n, laaman rüjn dxiin guin.

¹¹ Gol bililadx naj za'në' da Dadan, guiáad laaman za'në naj. Balgui majsi ni rünzan gol bililadx.

¹² Diidxliczi ganin: Bén rlliladx naj, nējgajcaman güün ni rünan, güünman ni mazri narooob, din naj yaya' lod za' da Dadan.

¹³ Graczi ni guiniabidi lojman por naj, günanan din gulün xguialrniabee-man.

¹⁴ Günan xhietëez ni guiniabidi.

Guixhiaal Jesús xSprijtaman

¹⁵ 'Bal rëndi naj, gucaagdiajguidi ni balün.

¹⁶ Din guië loj da Dadan guixhiaalaman Sprijt sunë lëjt,

¹⁷ Sprijt gulüü diidxli, din zianczi sunëman lëjt. Bén ad rlliladx ree Dios ad zajt tia' reeman Sprijt guin, din ad ruguiaat reeman ad nünbee tëtë reeman laaman. Per lëjt nünbee laaman, din sunëman lëjt yaya'n tëëman luxdoodi tiblaxaa.

¹⁸ Ad zusa'ntan xtijbidi, yaguialan stijb guidganan lëjt.

¹⁹ Sta'nz riaadx ad zuguaatri ree bénguidxliuj naj, per lëjt guguaadi naj, guibandi din nabanan.

²⁰ Dxej zii ree, gagbeedi za'në' da Dadan, lëjt za'në naj, guiáad naj za'në'n lëjt zianczi.

²¹ Bén rucaagdiajg ni rniabeen rüjn tëëman laan, walicaman rënman naj. Guiën da Dadan Bén rën naj, në naj guiën laaman din güünbeeman naj.

²² Gunabdiidx Judas (ad Bén bayüt Jesús) rëbaman:

—Dad, ¿chexc zeel dunujzan yayagbee chu lüj, guiáad ree bénguidxliuj ad zagbeet reeman?

²³ Badxi' Jesúsán rëbaman:

—Bén guiën naj guzooberman da diidxan, guiën da Dadan laaman, guiáad naj guidnë' da Dadan din yabajnnë'n laaman.

²⁴ Bén ad zënt naj ad zuzoobtaman da diidxan, din diidx cucaagdiajguidi yan ad da diidxtanan, xtiidx da Dadanan Bén guxhaal naj.

²⁵ 'Canin lojdi gra nine, la'tgaj za'në'n lëjt.

²⁶ Per xSprijt Dios, Bén sunë lëjt zianczi, Bén guixhiaal da Dadan por naj, graczi gulüüman lëjt din gusaaladxidi ni canin.

²⁷ 'Chi yaya'n, yabecdxen luxdoodi, gunen guialnaza'c lojdi, ad zi'c runeet ree bénguidxliuj, ad bal ru nayadi ad rdxeb tëëdi.

²⁸ Ma rnin lojdi, yaya'n, dxel yaguialan zatijb. Bal walidi rëndi naj, chu' luxdoodi zagdxe, guial gagbeedi yaya' loj da Dadan, din mazri zojblojman guial lon.

²⁹ Ma rugojnan lëjt, din chi gac zian, chililadxidi.

³⁰ 'Ad zro'tri ganenë'n lëjt, din ma zëed xin rniabee guidxliuj, majsi ad nët naj rniabeex.

³¹ Per zian gac din gagbee ree bénguidxliuj, rënan da Dadan, zeel rünan ni rniabeeman. Gol bisu, yo' ree yan.

15

Rën Jesús yadxu'në' reeman zianczi

¹ Basnuu rëb Jesús:

—Naj naj zi'c yag rtia ni nejxh zagdxe, guiáad da Dadan naj zi'c Bén rxübin laan.

² Da bejn reen naj zi'c ree xidx yag guin. Bal id rtia reen gutüüg da Dadan laa reen. Per bal rtia reen, gusiaman laa reen din tia reen mazri.

³ Lëjt ma nayadi, guial basia diidx rnin lëjt.

⁴ Gol gubajnnë naj zi'c nabannë'n lëjt. Ad zajct tia xidx yag, bal id najnën yag guin tijbzi. Ziangajc lëjt ad zajct güüdi ni rën Dios bal id za'nëdi naj.

⁵ 'Naj naj zi'c yag rtia ni nejxh, guiáad lëjt naj zi'c xidxan. Bén sunë naj zianczi nuchagaman naj, guiáad naj nuchagan laaman, zeel rüjnman ni rën Dios. Din bal ichu naj, achet zajc güüdi.

⁶ Bén ad zazujnët naj guizëëbaman zi'c yagbidx ruto'p reeman, din che'can.

Rëb tëë Jesús:

⁷ —Bal za'nëdi naj tijbzi ruzoob tëëdi da diidxan, gol gunab ni rëntzidi, din tia'dan.

⁸ Bal güüdi ni rën da Dadan, gaquidi quijb da bejnan, din guza't ree bejn laaman zagdx.

⁹ Rënan lëjt zi'c rën da Dadan naj, gol basaaladx rënan lëjt.

¹⁰ Bal guzoobidi da diidxan, gusaaladxidi rënan lëjt, zi'cgajc ruzoban xtiidx da Dadan, ragbeen rënman naj.

¹¹ 'Rnin lojdi zian din chu' luxdoodi zagdx ze'c yu' luxdon zagdx, zagdx da't chu' luxdoodi.

¹² Gol guyën lasa'di zi'c rënan lëjt, laan rniabeen güüdi.

¹³ Achut rën xmiw mazri guial loj bën rëjt por laa reeman.

¹⁴ Lëjt naj da miwan bal güüdi ni rënan.

¹⁵ Ad zanetran lëjt mojs, din mojs ad ragbeetaman xhie rüjn bën rniabee laaman. Ganen lëjt miw, din balün lëjt graczi ni na da Dadan lon.

¹⁶ Ad lëjtt gule naj, naj gule lëjt. Zeel rnin lojdi, chedi chiglüüdi bejn ree ni rën da Dadan, din gusnuu güün reeman ni rënman, din guneeman graczi ni guiniabidi por naj.

¹⁷ Rniabeen: Guiën lasa'di.

Ralen ree bejn Jesús con ree xbejnman

¹⁸ Rëb tëë Jesús:

—Bal ralen ree bénguidxliuj lëjt, gol basaaladx, yaloj naj balen reeman.

¹⁹ Bal najajquidi bénguidxliuj, niën reeman lëjt zi'c rën lasa' reeman. Per naj gule lëjt loj reeman, zeel ralen reeman guial ad najtidi bénguidxliuj.

²⁰ Gol basaaladx ni rnin: “Achut mojs naj mazri guial loj bën rniabee laaman.” Bal basagzi reeman naj, ziangajc gusagzi reeman lëjt, bal bazoob reeman da diidxan, ziangajc guzoob reeman xtiidxidi.

²¹ Graczi nine güünnë reeman lëjt por naj, din ad nünbeet reeman bën guxhaal naj.

²² 'Achet xtol reeman niu, bal idan nial ninienë'n laa reeman, per yan yu' xtol reeman.

²³ Bén ralen naj, nëgajc da Dadan ralenman.

²⁴ Achet xtol reeman niu, bal idan nün ree ni benan loj reeman ni achutctzi wayüjn, per ma baguiaa reeman laa reen, majsi zian ralen gajc reeman naj në da Dadan.

²⁵ Per rajc zian din gac cumplid ni ca loj xley reeman, rëban: “Achet rünan ralen reeman naj.”

²⁶ 'Per chi gui't Sprijt gaxhalan din sunëman lëjt gulüü tëëman diidxli, Sprijt zëed loj da Dadan, laaman gü da diidxan.

²⁷ Nëgajc lëjt gü laan, din diidx yaloj za'nëdi naj.

16

¹ 'Rnin zian, din ad zabějzt chililadxidi naj.

² Yaběë reeman lějt lod ricaagdiajg reeman xtiidx Dios, zadxin dxej, chutěz bėn gugjyt lějt naladx reeman Dios cayjyn reeman wen.

³ Gűn reeman zian din ad nűnbeet reeman naj ni'qui da Dadan.

⁴ Per ma rnin lějt, din chi guidxin dxej guin gusaaladxidi guial ma bagojnan lějt.

Ni rűjn xSprijt Dios

'Ad rnitan lojdi zian diizd yaloj, din naj guzunė lějt.

⁵ Per yan yaya'n loj bėn guxhaal naj. Achutzidi rniabdiidx ban gan,

⁶ aal yu'nayadi guial canin zian.

⁷ Per diidxliczi rnin: zagdxe najn yaya'n. Din bal idan yaya', ad zi'tt xSprijt Dios sunė lějt, per bal yaya'n, naj gaxhal laaman.

⁸ Chi gui'taman, laaman gulű ree bėnguidxliuj ni naj dol, ni naj ni zagdxe, nė xguialguxtis Dios.

⁹ Gagbee reeman yu' xtol reeman, guial ad rliladxt reeman naj.

¹⁰ Ni zagdxe guin naj guial yaya' loj da Dadan din ad zuguaatrđi naj.

¹¹ Guiáad Dios ma been xguialguxtisaman con xinxab rniabee guidxliuj.

¹² 'Yu'ri ni rėnan ganin, per dád zien gacan par lějt.

¹³ Chi gui't Sprijt gulű lějt diidxli, din ad zűt xtiidx gajcaman, guinieeman graczi ni guienman, laaman gulű lějt ni gac.

¹⁴ Guza'taman naj zagdxe, din naj gudėd ni gulűman lějt.

¹⁵ Graczi ni rajp da Dadan naj par naj, zeel rnin, Sprijt guin tia' ni gudėdan din gulűman laan lějt.

Guguaiaa ree xbejn Jesús laaman zatijb

¹⁶ 'Ma guidxin dxej ad zuguaatrđi naj, per ad zajct xchej, guguaadi naj stijb.

¹⁷ Chi rėb Jesús zian, dxel guzuloj ree xbejnman canabdiidx loj lasa' reeman, rėb reeman:

—ǵChexc zeel naman, ma guidxin dxej ad zaguiaatri reeman, per ad zajct xchej, yaguaiaa reeman stijb, din yaguiaj loj xDadaman?

¹⁸ ǵChexc zeel naman: “Ad zajct xchej”? Ad rayignia't ree ni caneeman.

¹⁹ Gogbee Jesús guial rėn reeman guiniabdiidx reeman, zeel rėbaman:

—Ma rnin lojdi, ma guidxin dxej ad zuguaatrđi naj, per ad zajct xchej, guguaadi naj stijb. ǵNi nen canabdiidxidi ya?

²⁰ Diidxli ganin, goondi chu' tėe luxdoodi naya, guiáad ree bėnguidxliuj yabaa reeman. Per majsi chu' luxdoodi naya, guidxin dxej yabaadi.

²¹ Chi gal xi'n bėngunaa, rdėdaman tarbajw, din ma bidxin hor guin. Per chi ma gojl xi'nman, dxel rayanladxaman tarbajw guin, ru luxdoodan zagdxe, guial ma gojl xi'nman.

²² Ziangajc lějt cadėdidi tarbajw yan, per chi guguan lějt zatijb, chu' luxdoodi zagdxe, achutzzi zajc yabėe laan luxdoodi.

²³ 'Dxel achetri guiniabdiidxidi lon. Diidxliczi ganin, graczi ni guiniabidi loj da Dadan por naj, guneeman.

²⁴ Guiáad yan achet wanabidi por naj, gol gunaban din tia'dan, din chu' luxdoodi zagdxe tiblayaa.

Yaguiaj Jesús lod guzaman

²⁵ Rėb tėe Jesús:

—Rnin nine ree zi'c cwent, per zadxin dxej ad zulütran zian, gusignia'n lëjt zagdxe xcwent da Dadan.

²⁶ Dxej zii ree guiniabidi loj da Dadan por naj, ad rüjnt naguiejn ganaaban por lëjt lojman,

²⁷ din rënman lëjt, rënman lëjt guial rëndi nor rliladx tēedi guial laaman guxhaal naj.

²⁸ Brin lod za' da Dadan persi bialan loj guidxliuj guie, yan gusa'n nan laan din yaya'n lojman.

²⁹ Dxel rëb ree xbejnman:

—Yanri ma cusignia'l zagdxe.

³⁰ Rayagbeen rajquil graczi, ad rüjnt naguiejn chu guiniabdiidx lojl. Zianan zeel ralduladxan guxhaal Dios lüj.

³¹ Badxi' Jesús laan rëbaman:

—¿Ma rliladxidi yan ya?

³² Gol gogbee, ma bidxin hor yare'chidi, tijb gajdi yaguaiaj lidx, gusa'ndi da xtijban. Per ad za't da xtijban, da Dadan za'në naj.

³³ Rnin gra nine din cwedi zagdxe guial nuchajguidi naj. Loj guidxliuj sagdiajdi, per ad guidxebidi, din ma benan gan loj guidxliuj.

17

Gurejdx gunab Jesús xDadaman por ree xbejnman

¹ Chi gulox rëb Jesús zian loj ree xbejnman, dxel baguiaaman xanyabaa rëbaman:

—Dad, ma bidxin hor, balüü da guialrniabeen din gulün xguialrniabeel.

² Baneel guialrniabee lon din ganabeen gra bejn gudëd tēen guialnaban tiblayaa loj gra bën baneel.

³ Guiban reeman tiblayaa bal güünbee reeman lüj, tijbzi lüj naj quijb Dios, güünbee tēe reeman najn guxhaalil.

⁴ 'Naj bazat lüj zagdxe loj guidxliuj; yan ma gulox benan ni nal.

⁵ Yan, Dad, yaguaialan lojl, din yaneel guialrniabee ca'n gocli, diizd chi gad guidxliuj gacchaaw.

⁶ Rëb tēe Jesús:

—Bën gulel loj guidxliuj baneel lon, ma balün laa reeman chu lüj. Gojc reeman xbejnl, per baneel laa reeman lon, ma bazoob reeman xtiidxil.

⁷ Yan ma gogbee reeman guial gra ni benan gra tēe ni balün naj xieenl.

⁸ Gunen xtiidxil ni baneel, zeel bacaagdiajg reeman laan, gogbee reeman, walican lojl guzaan, bililadx tēe reeman lüj guxhaal naj.

⁹ 'Rbedx rniaaban lüj por laa reeman, guial naj reeman xbejnl baneel tēel laa reeman lon, ad rbedx rniaabtan por ree bénguidxliuj.

¹⁰ Gra ni ca'n naj xieenl, guiáad gra ni ca'l naj da xieenan, ma rguien da guialrniabeen por ree bën baneel.

¹¹ 'Ad zazutran loj guidxliuj, per laa reeman suri reeman guie, guiáad naj yazaan din yaguaialan lod za'l. Dad, lüj naj bën naya nali, gunaj reeman con gra guialrniabee ca'l ni baneel tēel lon, din gac reeman tijbzi zi'c nayajc.

¹² Chi guzunë'n laa reeman loj guidxliuj, gunan laa reeman con xguialrniabeel ni baneel. Achut reeman bizëeb, tijbzi xin ma naj diidx bizëeb, din gac cumplid ni ca loj xtiidxil.

¹³ 'Yan yaguaialan lod za'l, per canen zian la'tgaj za'n loj guidxliuj guie, din chu' luxdoo reeman zagdxe, zi'c yu' luxdon zagdxe.

¹⁴ Ma balün laa reeman xtiidxil, zeel ralen ree bénguidxliuj laa reeman guial ad najt reeman bénguidxliuj, zi'cgajc ad najtan bénguidxliuj.

¹⁵ Ad rniaabtan yabëël laa reeman loj guidxliuj, rënan guinial laa reeman, chitëë güün reeman ni mal.

¹⁶ Ad najt reeman bénguidxliuj, zi'cgajc naj.

¹⁷ Basia reeman con xtiidxil, din laan naj ni diidxli.

¹⁸ Zi'c guxhaalil naj loj ree bénguidxliuj, ziangajc rixhial ree da bejnan loj reeman.

¹⁹ Por laa reeman rudëd da guialnabanan din gac reeman xbejnl diidxliczi.

²⁰ Basnuu Jesús, rëbaman:

—Ad por laatzí reeman rbedx rniaaban lüj, në por ree bën chililadx chi gucaagdiajg reeman ni guiniee reeman.

²¹ Rniaaban lojl din guchajg lasa' reeman din yayajcnë' reeman tijbzi, Dad, zi'c za'nël naj ziangajc za'në'n lüj, ziangajc sunë lasa' reeman. Din chililadx ree bejn lüj guxhaal naj.

²² Badëdan guialrniabee baneel loj reeman, din gac reeman tijbzi zi'c nayajc,

²³ naj za'në' laa reeman, guiáad lüj za'nël naj. Zeel gac reeman tijbzi din gagbee ree bejn, lüj guxhaal naj rën tëël laa reeman zi'c rënl naj.

²⁴ 'Dad, lüj banee laa reeman lon, zeel rënan su reeman lod gazun din guguaa reeman biani baneel lon, din guyënl naj diidz chi gad guidxliuj gacchaaw.

²⁵ Dad, lüj rüjn guialguxtis zagdxë. Ad nünbeet ree bénguidxliuj lüj, sa'n naj nünbeen lüj, në ree da bejnan ragbee lüj guxhaal naj.

²⁶ Balün laa reeman chu najl, gulüran laa reeman mazri, din gagbee reeman rënl laa reeman zi'c rënl naj, gazunë' tëën laa reeman.

18

Bayü Judas Jesús

(Mt. 26:47-56; Mr. 14:43-50; Lc. 22:47-53)

¹ Chi gulox gunee Jesús zian, dxel briinë ree xbejnman, zë reeman stiblad ro' guiiw la Cedrón, bidxin reeman lod yu' ree yag.

² Në Judas, xin yayü laaman, nünbee yagaj, guial zien volt binëman laa reeman ni.

³ Zeel bidxinnëx tibcwaa ree suldad në ree bën rajp ro' yadoo, guxhaal quijb ree bixhioz laa reeman në ree bënfarisew, ca' reeman bajl rusni ree, në ree espad con ree lans.

⁴ Per ma ragbee Jesús gra ni gac, briiman gunabdiidxaman loj reeman, rëbaman:

—¿Chu raguiilidi?

⁵ Badxi' reeman laan rëb reeman:

—Jesús bën Nazaret.

Abi' rëbaman loj reeman:

—Najn.

Judas xin bayü laaman bidxinnë laa reeman.

⁶ Chi rëbaman loj reeman: “Najn”, dxel baguiadruxan reeman biajb reeman luyuj.

⁷ Gunabdiidxaman zatijb rëbaman:

—¿Chu raguiilidi?

Rëb reeman:

—Jesús bën Nazaret.

⁸ Zeel rëbaman:

—Ma rnin, najn. Bal naj raguilidi, gol baslaa ree bën guie yaguaiaj reeman.

⁹ Zian gojc cumplid ni rëb loj xDadaman: “Achut ree bën baneel lon bizëëb.”

¹⁰ Dxel gulëë Bëd espad, gutü'man guidiajg ladbee xin la Malco, najx xmojs quijb bixhioz zojbloj.

¹¹ Dxel rëb Jesús loj Bëd:

—Bagu'chaaw espad zii. Bal rën da Dadan gazaagdiajn zian, gaza'canan.

Biniaaz Jesús

(Mt. 26:57-58; Mr. 14:53-54; Lc. 22:54)

¹² Suldad guin ree con xin rniabee laa reex con ree bën rajp ro' yadoo gunaaz reeman Jesús, guxhii reeman laaman.

¹³ Dxel binë reeman laaman yaloj lidx bën la Anás, din laaman naj xdadsuegr Caifás quijb bixhioz zojbloj loj ijz zii.

¹⁴ Laagajcaman rëb loj gabilt, mazri zagdxë guiët tijbzi bejn por gra ree bën Israel.

Rëb Bëd ad najtaman xbejn Jesús

(Mt. 26:69-70; Mr. 14:66-68; Lc. 22:55-57)

¹⁵ Tio'p ree xbejn Jesús binal laaman. Tijbaman la Simón, bën rniece reeman Bëd, stijbaman naj bën nünbee quijb bixhioz zojbloj, zeel guyunëman Jesús lënü guin,

¹⁶ guiáad Bëd baya'nman lule!. Zeel barii bën nünbee bën rniabee ree bixhioz, guneenëman biin rajp ro' port guin, persi guyu Bëd lënü.

¹⁷ Gunabdiidxim lojman rëbim:

—¿Nid lüjn naj tijb xbejn bën guin ya?

Badxi'man laan rëbaman:

—Ad najtan.

¹⁸ Per guial dád nayaag, zeel bën naj ree mojs con ree bën rajp ro' yadoo nabe'c reeman guij rucha' reeman. Nëgajc Bëd cucha'në reeman rudëj guin.

Gunabdiidx Anás loj Jesús

(Mt. 26:59-66; Mr. 14:55-64; Lc. 22:66-71)

¹⁹ Guzuloj bën la Anás canabdiidxaman loj Jesús xcwent ree xbejnman në xcwent ni rulüüman.

²⁰ Zeel rëb Jesús:

—Gunen loj gra ree bejn. Zianczi balün lod rucaagdiajg ree xtiidx Dios në lën dux yadooro' ree, lod rado'p dugra ree. Achet ni gunen ralan.

²¹ ¿Chexc zeel rniabdiidxil lon? Gunabdiidx loj ree bën bacaagdiajg ni rën, laa reeman na xhie gunen, laa reeman ragbee.

²² Chi rëbaman zian, tijb bën rajp ro' yadoo guin wëëz ro'man, rëbaman:

—¿Zian yadxi'l xtiidx bën rniabee guin ya?

²³ Badxi' Jesús laan rëbaman:

—Bal xhie ni mal rën, guna xhienin. Per bal gunen zagdxë, ¿chexc zeel rguinl naj?

²⁴ Dxel guidib naxiiman guxhaal Anás laaman loj Caifás, bën naj quijb bixhioz zojbloj.

Rëb Bëd stijb ad nünbeetaman Jesús

(Mt. 26:71-75; Mr. 14:69-72; Lc. 22:58-62)

²⁵ Per Bëd sta za'man cucha'man rudëj guin. Abi' gunabdiidx reeman lojman, rëb reeman:

—¿Nid në lüj naj tijb ree xbejn bën guin ya?

Badxi' Bëd laan rëbaman:

—A'n, ad xbejntaman naj.

²⁶ Dxel tijb xmojs bixhioz zojbloj guin, bén naj lasa' bén gutü' Béd guidiajg, rëbaman loj Béd:

—¿Nid lüjn baguian ya za'nël laaman guia' ree yag olivos?

²⁷ Rëb Béd stijb guial ad nünbeetaman Jesús, loj hor zii gajc guridxa' tijb guid.

Binë reeman Jesús loj Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Chi bani luyuj, bazanë reeman Jesús lidx Caifás, zinë reeman laaman lën xpalas gobernador Pilato. Per ree bén Israel guin ad guyut reeman lën palas guin, din par laa reeman bal niu reeman, ad nayatri reeman loj Dios, abi' ad nile't niajw reeman xche guialraw ni raw reeman pascw.

²⁹ Zeel brii Pilato persi guneenëman laa reeman, rëbaman:

—¿Xhie been xin guie zeel zidnëdi laax guie?

³⁰ Badxi' reeman laan rëb reeman:

—Bal najman benza'c, ad ziant nudnë'n laaman lojl.

³¹ Dxel rëb Pilato:

—Gol bignëx, gol been guialguxtis zi'c naj xleydi.

Abi' rëb reeman:

—Per ad naca'tan guialrniabee yanabeen guiët bejn.

³² Zian gojc cumplid xtiidx Jesús chi bagojnman xhienaag guiëtaman.

³³ Bayu Pilato lën palas guin, dxel gurejdxaman Jesús, gunabdiidxaman lojman rëbaman:

—¿Lüj naj xrey ree bén Israel ya?

³⁴ Badxi' Jesúsán rëbaman:

—¿Lüjczri rniabdiidx lon ya o yu' ree ben ren na lojl zian?

³⁵ Badxi' Pilato laan, rëbaman:

—¿Wen bén Israel naj ya? Bén ladx gajc reel con ree bixhioz rniabee bidnë lüj lon. ¿Xhie been?

³⁶ Badxi' Jesúsán rëbaman:

—Guialrniabee ni ra'pan ad lojt guidxliuj zan, din bal loj guidxliuj zan, nia'pan bén nidijl ree chitëë niniaaz ree ben Israel naj. Per yan ad lojt guidxliuj guie za da guialrniabeen.

³⁷ Dxel rëb Pilato lojman:

—¿Zë loj diidxan ya rey najl?

Badxi' Jesús laan rëbaman:

—Reyqui naj, zi'c nal. Par zian goolan par zian tëë zialan loj guidxliuj guie zidgaguien ni naj diidxli, graczi ree bén zinal ni diidxli rucaagdiajg reeman ni rnien.

³⁸ Dxel rëb Pilato:

—¿Xhiezanan naj diidxli?

Gunabee reeman guiët Jesús

(Mt. 27:15-31; Mr. 15:6-20; Lc. 23:13-25)

Chi gulox rëb Pilato zian, dxel briiman bigneenëman bén Israel ree stijb, rëbaman:

—Achet xguialquia xin guin radxejlan.

³⁹ Per lëjt, xcostumbridi naj guial loj lanij pascw laa tijb bén yu' ladxguuib. Yan, zrëndi ya guslaan xreydi?

⁴⁰ Dxel gurixdiaj ree bén Israel guin, rëb reeman:

—¡Ad laataman guslaal! ¡Zagdxeli baslaa Barrabás!

Abi'za Barrabás guin béngubaanan.

19

¹ Dxel gunabee Pilato gudijn ree suldad Jesús.

² Abi' beenchaaw reeman coron guiějch, badxe' reeman laan guijcaman, bascajcw reeman laaman tijb lajd xniaya's.

³ Dxel gubig reeman lojman, rëbgaj reeman:

—¡Guibanri Xrey ree bën Israel!

Dxel rëëzgaj reeman lojman.

⁴ Brii Pilato stijb, abi' rëbaman loj ree bën Israel guin:

—Gol baguiaa, gabën laax din gagbeedi, achet xguialquiaux radxejlan.

⁵ Dxel brii Jesús, yu' coron guiějch guin guijcaman, najcw tëëman lajd xnia guin. Abi' rëb Pilato:

—Laax guie.

⁶ Dxel bixhioz rniabee ree në ree bën rajp ro' yadooro' Jerusalén, chi baguiaa reeman laaman, guzuloj rbixdiaj reeman, rëb reeman:

—¡Bacaax loj crüjz! ¡Bacaax loj crüjz!

Rëb Pilato loj reeman:

—Gol chinëx, lëjt gol bacaax loj crüjz, achet xtolix radxejlan.

⁷ Badxi' reeman laan rëb reeman:

—Laa tijb dux leyan yu', rëb lojn rayal guiëtix, guial nax najx Xi'n Dios.

⁸ Chi biguienman ni rëb reeman, mazri bidxebaman.

⁹ Bayuman lën palas guin zatijb, gunabdiidxaman loj Jesús rëbaman:

—¿Ban xin lüj?

Per ad badxi't Jesús laan.

¹⁰ Zeel rëb Pilato:

—¿Nid zadxi'l ni rnin ya? ¿Nid ragbeel ya ca'n guialrniabee din gucan lüj loj crüjz o guslaan lüj ya?

¹¹ Dxel rëb Jesús:

—Achetczi guialrniabee nitia'l bal id Dios nunee laan. Zianan zeel mazri zien xtol bën bidnë naj guie yu' guial lojl.

¹² Diizd hor zii gajc raguuil Pilato mod, xhienaag guslaaman Jesús, per rbidxa' ree bën riga' yagaj, rëb reeman:

—¡Bal guslaal laax, ad najtil xmiw bën naj César! ¡Din chutëëz bën rajc rey rzuj contr César!

¹³ Chi biguien Pilato rëb reeman zian, gunabeeman babëë reeman Jesús, dxel gurej lod rniabeeman, lod la Gabata con diidx hebreo, rën guiëban Lod yu' ree guiaj.

¹⁴ Chi guixiez gal lanij pascw, cost garol dxej rëb Pilato loj ree bën Israel:

—¡Laa xreydi guie!

¹⁵ Per rbidxa' reeman rëb reeman:

—¡Guiëtix! ¡Guiëtix! ¡Bacaax loj crüjz!

Gunabdiidx Pilato loj reeman, rëbaman:

—¿Wen gucan xreydi loj crüjz ya?

Badxi' ree bixhioz rniabee laan, rëb reeman:

—Achut dux reyan yu', tijbzi César.

¹⁶ Dxel bayü Pilato Jesús loj ree suldad din gucaa reex laaman loj crüjz, dxel zinë reex laaman.

Cwa Jesús loj crüjz

(Mt. 27:32-44; Mr. 15:21-32; Lc. 23:26-43)

¹⁷ Briinë reex Jesús, nüüman crüjz, binë reex laaman lod la Calaver, diidx hebreo lan Gólgota.

18 Ni bacaa reex laaman loj crüzj con zatio'p ree bejn, tijb gaj reeman ca cwë'man.

19 Gunabee Pilato cwa lejtr guijc crüzj guin, rëban: "Jesús bén Nazaret, xrey ree bén Israel."

20 Dád zien ree bén Israel biil lejtr guin, guial naj luar zii gajxh loj ciuda, guiáad lejtr guin can con diidx hebreo, diidx latin në diidx grieg.

21 Rëb ree bixhioz rniabee ree bixhioz loj Pilato:

—Ad rucaal: "Xrey ree bén Israel", bacaa: "Bén rëb naj xrey ree bén Israel."

22 Badxi' Pilato laan rëbaman:

—Ni ma bacan yaya'nan zian.

23 Chi gulox bacaa ree suldad guin Jesús loj crüzj, baca' reex xabaman, gudixya' reexan tajp la', dxel cwa' reex tib la' gajn. Në stijb xabaman cwa' reex, ad nadiibtan, najcchaaw diizd yëjnan xt guia'n, najn tijbzi lajd.

24 Zeel rëb loj lasa' reex:

—Ad zarooxt reen, yadxi't ree suert din guidoon chu yayal laan.

Zian gojc cumplid ni ca loj xtiidx Dios, rëban: "Bala' reeman da xaban, gudxijt tée reeman suert guijcan." Zeel been ree xinsuldad guin zian.

25 Gajxh cwë' crüzj ca Jesús za' xniaaman con xbël xniaaman con Li xbégunaa Cleofas con Li bén gunee reeman Magdalena.

26 Chi baguiaa Jesús xniaaman, za' tijb ree xbejnman cwë'man, bén rën da'taman, rëb loj xniaaman:

—Na, laa xi'nl yagaj.

27 Dxel rëb loj xbejnman:

—Laa xniaal yagaj.

Diizd dxej zii bignëman xniaa Jesús lidxaman.

Güjt Jesús

(Mt. 27:45-56; Mr. 15:33-41; Lc. 23:44-49)

28 Chi gulox rëb Jesús zian, gogbeeman ma gojc gran cumplid. Per din gac cumplid ni ca loj xtiidx Dios, rëbaman:

—Re'can nijs.

29 Yagaj za' tijb re yu'n vin no'chan vinagr, zeel bagajdx reex tijb xiil loj vin guin, bacaa reexan loj tijb yag, dxel badxig reexan ro'man.

30 Chi ma gu'man laan, dxel rëbaman:

—Ma gojc gran cumplid.

Dxel basajb lojman luyuj, güjtaman.

Guliiz tijb suldad guiib cwë'lën Jesús

31 Ma cayüjn ree bén Israel porvinid din guixiez gal lanij pascw. Zeel ad guyënt reeman naya'n ree cuerp guin loj crüzj dxej razilladx reeman, din dád rajp reeman dxej guin respejt. Zeel biguiedx reeman loj Pilato din nabeeman qui'ch ree suldad guin xdxijt ree bén ca loj crüzj din guiët reeman yalet tée reex laa reeman.

32 Zeel wej reex. Yaloj gudi'ch reex xdxijt bén ca cwë' Jesús, dxel gudi'ch reex xdxijt bén ca stiblad cwë'man.

33 Chi gubig reex lod ca Jesús, baguiaa reex ma güjtaman, zeel ad gudi'cht reex xdxijtaman.

34 Per tijb suldad guin guxhal ladaman con guiib ca'x, dxel briin rejn con nijs.

35 Bén rü diidx guie baguiaaman, zeel ragbeeman najn diidxli, rüman laan din në lëjt chililadx.

³⁶ Gra nine gojc din gac cumplid ni ca loj xtiidx Dios, rëban: “Ad rayalt gach xdxijt xiildoo.”

³⁷ Stibljajt rëb: “Guguiaa reeman bën guxhálnë reeman guuib lad.”

Biguie'ch Jesús

(Mt. 27:57-61; Mr. 15:42-47; Lc. 23:50-56)

³⁸ Chi gulox gojc zian, wej Xiëb, bën zëed guiedx la Arimatea, bignabaman diidxbee loj Pilato din yaletaman xcuerp Jesús din chiquie'chaman laaman. Në bën la Xiëb bililadx Jesús, per ralanzi, guial bidxebaman bejn ree. Badëed Pilato diidxbee, zeel wej Xiëb bigxiiman xcuerp Jesús.

³⁹ Në Nicodemo wej, bën bigneenë Jesús tijb guxhin, bidxinnëman cost gajlbichii quil ni la mirra, no'chan aloe, rureen nejxh.

⁴⁰ Bagajdxnë reeman laan lajd batüüb reeman laaman, zi'c rüjn ree bën Israel chi ruquie'ch reeman bengüt.

⁴¹ Lod cwa Jesús loj crüjz naga' tijb guidxliuj lod yu' ree yag. Yagaj naj tijb baa cüb lod achutczu waguie'ch.

⁴² Yagaj gudixh reeman xcuerpaman, guial najn gajxh, guial ma suloj tëe dxej raziladx reeman.

20

Achetri xcuerp Jesús badxejl

(Mt. 28:1-10; Mr. 16:1-8; Lc. 24:1-12)

¹ Chidumingw chi sta nacayri, wej María Magdalena ro' xbaa Jesús, abi' baguiaaman ma bisüd guiaj nayaaw ro' baa guin.

² Dxel ruxüünman wejman lod za' Simón Bëd con zatijb xbejn Jesús, bën rën da'taman, abi' rëbaman loj reeman:

—Ma zinë reeman xcuerp Dad Jesús, banczi bigsa'n reeman laaman, achutri laaman yu' lën baa guin.

³ Abi' brii Bëd con bën guin, zë reeman ro' baa guin.

⁴ Grop reeman ruxüün zë reeman. Per bën guin mazri ruxüünman guial loj Bëd, abi' yaloj laaman bidxin ro' baa guin.

⁵ Dxel gudixlojman baguiaaman vend bidüüb Jesús, per ad guyutaman.

⁶ Dxelri bidxin Simón Bëd, abi' guyuman lën baa guin. Nëgajcaman baguiaa vend guin

⁷ Baguiaa tëeman lajd bidüüb guijc Jesús, nadüüban naga'n lood ren, ad naga'tan tijbzi con vend guin.

⁸ Dxel guyu bën bidxin ro' baa guin yaloj, baguiaaman ni goc, zianz bililadxaman,

⁹ guial gocli ad bignia't reeman ni ca loj xtiidx Dios guial yaban Jesús loj ree bengüt.

¹⁰ Dxel zia ree xbejn Jesús lidx reeman.

Balüüloj Jesús loj María Magdalena

(Mr. 16:9-11)

¹¹ Per Li baya'nman ro' baa guin cayoonman. La'tgaj cayoonman gudixlojman lën baa guin,

¹² abi' baguiaaman tio'p ree anjl, najcw reeman lajd naquich, zojb reeman lod go't xcuerp Jesús, tijbaman lod go't guijcaman, zatijbaman lod go't guia'man.

¹³ Dxel gunabdiidx ree anjl guin lojman, rëb reeman:

—Na, ¿chexc zeel roonl?

Badxi'man laan rëbaman:

—Guial zinë reeman xcuerp Dad Jesús, abi' banczi guin bigsa'n reeman laaman.

¹⁴ Guloxzi rëbaman zian, badxi' lojman baguiaaman za' Jesús yagaj, per ad bayünbeetaman laaman.

¹⁵ Dxel gunabdiidx Jesús lojman, rëbaman:

—Na, ¿chexc zeel roonl? ¿Chu raguüilil?

Gunaladx Li, bën rajp lod yu' ree yagnejxh guinan, abi' rëbaman:

—Dad, bal lüj binë xcuerpaman, guna ban bigsa'nl laaman din chigxin laaman.

¹⁶ Zianz rëb Jesús lojman:

—¡Li!

Dxel badxi' loj Li, rëbaman lojman con diidx hebreo:

¡Rabuni! —rën guiëban Mextr.

¹⁷ Rëb Jesús lojman:

—Ad guqui'l naj, din gadan yaya' loj da Dadan. Per baguiaj biguiedx loj ree da bejnan guial yaya' loj da Dadan bën naj gajc xDadidi, loj da Diosan bën naj gajc xDiosidi.

¹⁸ Dxel wej María Magdalena bicojnman xbejn ree Dad Jesús guial baguiaa-
man laaman, bagojn tèeman laa reeman gra ni rëbaman lojman.

Balüüloj Jesús loj ree xbejnman

(Mt. 28:16-20; Mr. 16:14-18; Lc. 24:36-49)

¹⁹ Chidumingw zii gajc chi ma caxhin, bado'p ree xbejn Jesús, nayaaw ro' port yu' reeman guial rdxeb reeman guxtis Israel ree. Dxel balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁰ Chi ma gulox rëbaman zian, balüü yaaman loj reeman në cwë'lënman, abi' laa reeman dád babaa reeman baguiaa reeman Dad Jesús.

²¹ Dxel rëbaman loj reeman zatijb:

—Yabe'cdxe Dios luxdoodi. Zi'c guxhaalaman naj, ziangajc rxhialan lëjt.

²² Dxel balüjbaman guijc reeman, rëbaman:

—Gol gubajnnë xSprijt Dios.

²³ Bën güüdi perdon xtol, chiquied xtol reeman, guiáad bën ad züjntidi perdon xtol, yaya'nnë xtol reeman.

Baguiaa Tumajs Jesús

²⁴ Tumajs, bën ree reeman Cwajch, achut laaman za' chi balüüloj Jesús loj ree xbejnman.

²⁵ Chi rëb reeman loj Tumajs:

—Ma baguiaa Dad Jesús.

Dxel rëbaman:

—Bal id zuguijan yaaman lod wëëz clav, abi' bal id zagu' da bacwënan lod wëëz clav guin, bal id zagu' tèë yan cwë'lënman lod bidxeelguijdx, ad zaliladxtan.

²⁶ Chi goc xhujn dxej, badxajg lasa' ree xbejn Jesús zatijb, per dxel në Tumajs za'në laa reeman, nayaaw ruyü yu' reeman. Per balüüloj Jesús galay reeman, rëbaman loj reeman:

—Yabe'cdxe Dios luxdoodi.

²⁷ Dxel rëbaman loj Tumajs:

—Badxe' xbacwënl guie, baguiaa ree yan, banee yaal guie badxe'n cwë' lënan. Ad runawëëgril, bililadx.

²⁸ Dxel rëb Tumajs lojman:

—¡Da Dadan, da Diosan!

²⁹ Abi' rëb Jesús lojman:

—Rliladxil guial ma baguiaal naj. Xiquilbaa ree bén rliladx, majs ad waguiaat reeman naj.

Chexc zeel cwa gui'ch guie

³⁰ Zienri ree milagr been Jesús loj ree xbejnman, ni ad cwat ree loj gui'ch guie.

³¹ Sa'n nine ree cwa reen din chililadxidi guial Jesús naj Cristo, Xi'n Dios, abi' guial chililadxidi laaman guibandi tiblayaa con Dios.

21

Baliüloj Jesús loj ree xbejnman ro' nijs

¹ Chi gudëd gojc zian, balüloj Jesús loj ree xbejnman zatijb, ro' nijs naj gajxh guiedx Tiberias. Ze balülojman:

² Chi nadxag lasa' ree Simón Bëd con Tumajs bén rniee reeman Cwajch, në Natanael bén za Caná guiedx riga' niz Galilea, con ree xi'n Zebedeo, nëtëë zatio'p xbejn Jesús,

³ dxel rëb Bëd loj reeman:

—Gan chignaazan bëjl.

Badxi' reeman laan rëb reeman:

—Në dunujn yadxoo.

Abi' wë'p reeman loj barcw zë reeman, per guxhin zii achutczii bëjl gunaaz reeman.

⁴ Chi ma cayreguiaal, bidxin Jesús ro' nijs guin, per ad bayünbeet reeman laaman.

⁵ Dxel gunabdiidxaman loj reeman rëbaman:

—Xi'n, ¿nid chu bëjl wanaazidi ya?

Badxi' reeman laan rëb reeman:

—Achutczii.

⁶ Abi' rëb Jesús loj reeman:

—Gol bazaal xguijxhidi xladbee barcw guin din guiniaazidi bëjl.

Zian been reeman, abi' ad rajctri rabëë reeman guijxh guin, guial dád zien bëjl yu' lojn.

⁷ Dxel xbejn Jesús, bén rën da'taman, rëbaman loj Bëd:

—¡Dad Jesúsán!

Biguiejnzi Simón Bëd zian, laa got gajc xabaman ni gulëëman, abi' gutiajsaman lojnjs guin.

⁸ Guiáad zaxho'p xbejn Jesús loj barcw guin badxin reeman ro' nijs guin, coobyuj reeman guijxh guin, guidxan bëjl, guial zi'ctzi tibgayuu mejtr ryaadx yadxin reeman ro' nijs guin.

⁹ Chi baguiajt reeman, baguiaa reeman laa guij ma riga', dxiib tijb bëjl lojn, në guidaxtil riga' yagaj.

¹⁰ Dxel rëb Jesús loj reeman:

—Gol tanë tio'p choon bëjl gunaaz nejzidi.

¹¹ Dxel wë'p Bëd loj barcw guin, guxoobyujman guijxh guin guidxan bëjl narooob ree, xt ro' nijs guin. Tibgayuu tü'pchiibichoon bëjl yu' lojn. Abi' majsi zienb, per ad goxya'tan.

¹² Zianz rëb Jesús loj reeman:

—Gol guda din gawidi rsiil.

Abi' ni'qui tijb reeman ad rayaxt guiniabdiidx chu bénan, guial ragbee reeman Dad Jesúsán.

13 Dxel gubigaman cwa'man guiadxtil badëëman loj reeman, ziangajc beenman con bëjl guin.

14 Ni ne bayon volt balüüloj Jesús loj ree xbejnman chi babanman loj ree bengüt.

Guneenë Jesús Bëd

15 Chi gulox gudaw Jesús con ree xbejnman, gunabdiidxaman loj Simón Bëd, rëbaman:

—Simón, xi'n Waj, ¿walil ya rënl naj mazri guial loj ree bén guie?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiiloon.

16 Abi' rëb Jesús zatijb:

—Simón, xi'n Waj, ¿walil ya rënl naj?

Badxi' Bëdan rëbaman:

—Dad, ragbeequil rënan lüj.

Zeel rëb Jesús:

—Gunaj ree da xiilan.

17 Bayon volt gunabdiidx Jesús rëbaman:

—Simón, xi'n Waj, ¿rënl naj ya?

Dád guyunaya Bëd, guial ma gojc choon volt gunabdiidx Jesús bal rënan laaman. Zianz rëb Bëd:

—Dad, lüj ragbee graczi, ragbeel rënan lüj.

Zeel rëb Jesús:

—Gunaj ree da xiilan.

18 Diidxliczi ganin, chi goquil xinguiag, rajcw xabil persi rej l od rënl. Per chi ma naj bengol, gusli xu'quil din gusajcw ben ren xabil din chinë reeman lüj lod ad rëntil chel.

19 Rëb Jesús zian guial basignia'man xhienaag guiët Bëd, din güünbee ree bejn Dios. Dxel rëb Jesús:

—Tanal naj.

Ni ne bacaa xbejn Jesús bén guyën da'taman

20 Chi badxi' loj Bëd, baguiaaman laa bén rën da't Jesús zinal laa reeman. Laaman gure cwë' Jesús chi gudaw reeman xche, gunabdiidx tëëman loj Jesús rëbaman: “Dad, ¿chu yayü lüj?”

21 Chi baguiaa Bëd laaman, gunabdiidxaman loj Jesús rëbaman:

—Dad, laadxza xin guin, ¿xhie saquix?

22 Badxi' Jesúsán rëbaman:

—Bal rënan guibanx xt yaguialan, ¿xhie güünl? Lüj tanal naj.

23 Zianan zeel bire'ch diidx loj ree xbejnman guial ad zëjtt Bén guin. Per ad ziantan rëb Jesús, rëbaman: “Bal rënan guibanx xt yaguialan, ¿xhie güünl?”

24 Bén guin gajcan rü diidx xcwent ree nine, laa tëëman bacaa laan, rayagbee tëë ree rüman diidxli.

25 Dád zien ree ni been Jesús, bal nitia tijb gajn, wed ad zadaant loj guidxliuj niu ree libr ni najc.

Ni been ree xi Apóstoles Jesucrist

¹ Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman

² xt chi ziaman xanyabaa. Chi gadaman yaguaiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman.

³ Chi mal guzagdiaj da'taman loj xguialgütaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabancaman. Dxej zii ree guneenēman laa reeman xcwent xguialrniabee Dios.

⁴ Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulēz gac cumplid ni na da Dadan zi'c ma rnin lojdi.

⁵ Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c guialrirobnijs par lējt.

Zia Jesús xanyabaa

⁶ Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül guialrniabee loj ree bēn Israel ya?

⁷ Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan din laaman ca' guialrniabee.

⁸ Per chi ma nabannēdi xSprijt Dios, tia'di guialrniabee. Dxel griidi chiguedi diidx loj ree bēn Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zijt da't.

⁹ Gulox guneeman, ruguiaa reeman laaman dxejlczi wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman.

¹⁰ La'tgaj ruguiaa reeman ziaman xanyabaa, gulentie tio'p ree bēn najcw lajd naquich lod za' reeman,

¹¹ abi' rēb reeman loj ree apóstoles guin:

—Bēn Galilea, ¿chexc zeel sta ruguiaadi xanyabaa? Jesús, bēn baguiaadi zia xanyabaa, laagajcaman yaguaiaad stijb, zi'cgajc baguiaadi ziaman.

¹² Chi baza ree xi apóstoles Jesús ruguia' la Olivos, guza reeman zi'ct rza reeman dxej raziiladx reeman, persi badxin reeman Jerusalén.

¹³ Chi badxin reeman, wē'p reeman lēnü ladya lod zojb reeman. Brii laj reeman Bēd, Waj, Jacob, Andrejs, Felip, Tumajs, Tol, Matew, Jacob xi'n Alfeo, Simón (bēn guzunē ree bēn cananistas), nē Judas xi'n Jacob.

¹⁴ Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree bēngunaa ren.

Gulej reeman bēn baya'n xluar Judas

¹⁵ Lēn ree dxej zii bado'p ree bēn rililadx Jesús, naj reeman cost tibgayuu gajj bejn, dxel guzuli Bēd galay reeman, rēbaman loj reeman:

¹⁶ —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús loj ree bēn gunaaz laaman,

¹⁷ gojqquix tijb dux compniaran, nē laax been lasa' dxiin raguieenan.

¹⁸ Per con milia ni gudix reeman laax por ni mal beenx, bio' guidxliuj lod gudidya'x, bazuj guiqxiq, goxya'x abi' brii gra xziix.

¹⁹ Chi gogbee gra ree bén Jerusalén ni goc, guneer reeman guidxliuj zii Acéldama, rēn guiēban guidxliuj rejn.

²⁰ Din rēb loj libr la Salmos:

Yaya'n dējch lidxix,
achutcziri cwe lēnan.

Rēb tēē lojn:

Yayu ben ren guia'x.

²¹ 'Zeel loj gra ree bén za'nē dunuj ree guidib tiamp ni guzunē Jesús dunuj ree,

²² diidz chi baroobnijs Waj laaman xt chi ziaman xanyabaa. Loj gra reeman rayal grii tijbaman dín güünman dunuj ree yudar yaguie'ch ree loj ree bejn guial walican babanman loj ree bengüt.

²³ Dxel gulej reeman tio'p reeman: tijb bén la Xiēb (rnieer reeman laaman Barsabás, rnieer tēē reeman laaman Justo), gulej tēē reeman bén la Matías.

²⁴ Dxel gurejdx gunab reeman Dios, rēb reeman:

—Dad, lūj nūnbee luxdoo gra ree bejn. Balüü chu loj grop reeman gulejl

²⁵ dín gacaman apóstol luar Judas, dín banijtx delant lojl por dol ni beenx abi' ziax luar ni rayalix.

²⁶ Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

2

Biguiajt xSprijt Dios diidz xanyabaa

¹ Chi bidxin dxej gojl lanij la Pentecostés, gra ree bén rliladx Jesucrist bado'p tijbzi luar.

² Dxejlczi gojc naquie' xanyabaa zi'c bidoxh xt bayu bi lēnū lod riga' reeman,

³ abi' gulentie zi'c bajl dobēz ree, biguiajt reen guijc tijb gaj reeman.

⁴ Zianz guyu xSprijt Dios luxdoo graczi reeman, dxel guzuloj canee reeman diidz ren ree zi'c cusnee Sprijt guin laa reeman.

⁵ Lēn ree dxej zii za' zien ree bén Israel Jerusalén, baza reeman gra ladzi dín cwedx guiniab reeman Dios.

⁶ Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rnieer gra ree bén rliladx Jesús xtiidz tijb gaj reeman, ad badxejlt xgab nūjn reeman.

⁷ Dád badxa loj reeman xt ni'quid badxejlt xhie nūjn reeman, abi' gunab-diidz loj lasa' reeman rēb reeman:

—¿Nid bén Galilea gra ree bén canee guin ya?

⁸ ¿Chexc zeel raguiejn ree rnieer reeman dux tiidz ree?

⁹ Du loj ree no'ch ree bén zēēd guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor;

¹⁰ bén zēēd tēē ree guiedx riga' ree niz Frigia, Panfilia, Egipto, nē ree guiedx nulen Libia ni riga' ree gajxh Cirene, nē ree bén zēēd Rom, yu' reeman gojl Israel per naban reeman Rom, yu' tēē reeman naj quijb ben Rom per rliladx reeman ni rliladx ree bén Israel.

¹¹ Nē ree bén zēēd niz Creta nētēē ree bén zēēd guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidz ree niza'cdxoon rūjn Dios!

12 Graczi reeman badxa da't loj xt ni'quid badxejlt xgab nüjn reeman, abi' guzuloj canabdiidx loj lasa' reeman rëb reeman:

—¿Xhie rën guiëb gra ni guie?

13 Per garol reeman baze' laa reeman, rëb reeman:

—Rë' reeman.

Ni rëb Bëd loj ree bejn

14 Dxel guzuli Bëd con zachibtib ree apóstoles guin, guneeman rejs rëbaman:
—Lëjt bën Judea në graczi ree bën zojb Jerusalén, gol bacaagdiajg gol bignia' tëë ni ganin.

15 Ad rë't ree bën guin zi'c naladxidi, din qui gojlri raca gaa rsil.

16 Guie cayajc cumplid ni gunee bën brii laj Joel, bën badëë xtiidx Dios loj ree bejn, chi rëbaman:

17 Na Dios,

guidxin dxej gaxhal da Sprijtan luxdoo gra ree bejn, abi' xi'ndi xinguaaw con biingunaa gudëed reex da diidxan, zien ree ni gulüüloj loj ree xinguiag, guiáad ree bengol zien ree ni guinie'xhaal reeman.

18 Dxej zii ree gaxhal da Sprijtan luxdoo ree bën rüjn da dxiinan, xinguaaw ree në ree béngunaa, abi' gudëed reeman da diidxan.

19 Gulün sen ree xanyabaa ni yadxa lojdi, guiáad loj guidxliuj gulün sen ree zi'c rejn në bajl nëtëë go'xh.

20 Guicajy loj gubijdx, guiáad bëëw yayajcan zi'c rejn. Chi ma gojc zian, dxel guidxin quijb dxej guin, dxej za'cdxoon gui't Dios bën rniabee, dxej guiguien guidib xbianiman.

21 Abi' graczi ree bën cwedx guiniab laaman güünman laa reeman perdon.

22 Rëb tëë Bëd loj reeman:

—Yan, gol bacaagdiajg ni ganin lëjt bën Israel: Lëjt ragbee gual Jesús bën Nazaret najman bën guxhaal Dios, been tëëman milagr ree në ree ni radxa loj ree bejn zi'c sen din gagbeedi gual Dios guxhaal laaman.

23 Diizd gocli mal nüjn Dios xgab gual zian güünnëdi Jesús, gunaazidi laaman bayüdi laaman loj ree benmal, din gugüjt reeman laaman loj crüzj.

24 Per basban Dios laaman stijb, babëëman laaman loj gualgüjt, din ad gojct nutëë gualgüjt guin laaman.

25 Chi gunee rey Davi xcwent Jesús, rëbaman: Zianczi baguian dux Dad ree Dios za'nëman naj. Za'man da ladbeen, achetczi zajc guchejb naj.

26 Zeel yu' luxdon nix, ruzat tëën Dios zagdxé. majsí guiëtan ad rdxebtan,

27 din ad zusa'n'til naj lën baa, ad zatiëjbtil xhin xcuerp xi'n'l bën naya nali.

28 Balüül naj nejj runee gualnaban, chu' tëë luxdon zagdxé gual guibannël naj.

29 Basnuu gunee Bëd, rëbaman:

—Ganin loj gradi compniar, diidxliczi dux béngulal ree Davi güjtaman biguie'ch tëëman, abi' laa xbaaman sta raguiiaa ree yan.

30 Per gojcaman b́en badëe xtiidx Dios loj ree bejn, abi' gogbeeman been Dios promejs guial loj xdiaaman grii Cristo b́en nabee.

31 Rulüü ma cuguiaaman gra ni gac, rëbaman guial yaban Cristo loj ree bengüt, ad zaya'ntaman lën baa ad zaxin tëët xcuerpaman.

32 Yan ma basban Dios Jesús, dugran nayajc testiw guial walican babanman.

33 Zia tëëman xanyabaa zisobaman xladbee Dios, persi badëe xSprijt Dios lojman zi'c ma rëbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tëëdi.

34 Ad Davitan zia xanyabaa, din laagajcaman rëb:

Rëb dux Dad ree Dios loj b́en rniabee naj:

“Gurej da ladbeen,

35 xt gabecan xin rdxe'ch ree lüj guia'l.”

36 'Gradi b́en Israel gol gogbee guial Jesús b́en bacaadi loj crüzj, Dios bacaabee laaman din gacaman Dad, b́en nabee dunuj ree.

Bachajz zien ree bejn b́en rliladx ree Jesús

37 Chi biguiejn ree b́en riga' yagaj ni rëb Bëd, dád guyu naya luxdoo reeman. Abi' gunabdiidx reeman lojman në loj los demazri ree apóstoles guin, rëb reeman:

—Dad, gol guna, ¿xhie rayal yaguieenan?

38 Dxel rëb Bëd loj reeman:

—Gol bayagbee xtolidi, gol badxi' tëë lojdi loj Dios, gol gurobnijs por xguialrniabee Jesucrist din gac xtolidi perdon, zian chu' xSprijtaman luxdoodi.

39 Din promejs guin naj par lëjt në par ree xi'ndi në par gra ree b́en riga' zijt, par gra ree b́en cwe Dios par laaman.

40 Con ree diidx guie në mazri ree diidx ren guneenë Bëd laa reeman, rëbaman:

—¡Gol bariica loj ree b́en rüjn ni mal!

41 Zian gojc, graczi b́en bazoob diidx ni rëbaman gurobnijs. Dxej zii gajc bachajz cost choon mil bejn b́en rliladx ree Jesús.

42 Graczi reeman binal ni balüü ree xi apóstoles Jesús laa reeman, gubajnnë lasa' reeman zagdxe, gurejdx gunab reeman Dios abi' rado'p reeman persi raw reeman guiadxtil tijbzi zi'c gunabee Jesucrist güün reeman.

Ze gubajn ree b́en bililadx Jesús yaloj

43 Graczi ree bejn radxa da't loj milagr në los demazri ree ni been ree apóstoles guin.

44 Graczi ree b́en bililadx Jesucrist gubajnnë lasa' zagdxe, rgui's tëë ni rajp reeman loj lasa' reeman.

45 Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman.

46 Guixie guixie rado'p reeman lën yadooro' Jerusalén, dxel raguij reeman lidx xcompniar reeman rtaw reeman, dád nix yu' luxdoo reeman rën tëë lasa' reeman,

47 ruza't reeman Dios zagdxe, guiáad gra bejn guyën laa reeman. Guixie guixie ragnë Dios din gacxhiey mazri b́en rliladx Jesucrist, persi gojc xtol reeman perdon.

3

Bayajc tijb b́en ad rajct rza

¹ Tijb dxej zè ree Bèd con Waj lèn yadooro' Jerusalén raca choon wadxe, hor zii naj hor ni rbejdx rniab reeman Dios.

² Ro' xport yadoo guin zojb tijb bèn ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bèn ru lèn yadoo guin.

³ Chi baguiaaman Bèd con Waj ma chu' reeman lèn yadoo guin, gunabaman carda loj reeman.

⁴ Baguiaa reeman lojman, dxel rëb Bèd lojman:

—Baguiaa du lojn.

⁵ Chi bigujejnman rëb Bèd zian, dxel baguiaaman loj reeman, naladxaman milia nudeëd reeman lojman.

⁶ Per rëb Bèd:

—Ad ra'ptan plajt ni'qui or par gunen lojl, per ni zajc gūnan por lūj gūnanan: Por xgualrniabee Jesucrist bèn Nazaret, guzuli, guza.

⁷ Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl,

⁸ abi' gutiajsaman, guzuliman guzuloj cazaman. Dxel guyunëman laa reeman lèn yadoo guin, cazaman, catiajsaman cuza't tèëman Dios zagdxe.

⁹ Graczi ree bèn cuguaa laaman cazaman cuza't tèëman Dios zagdxe,

¹⁰ dád badxa loj reeman bidxeb tèë reeman guial gojc zian guial nūnbee reeman bèn guin, ragbee tèë reeman laaman rbej ro' xport yadoo guin ni la Port Za'cdxoon, rniabaman carda.

Gunee Bèd loj ree bejn lod la xcurdur Salomón

¹¹ Ad riro'nladxt bèn bayajc guin Bèd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Bèd con Waj.

¹² Chi baguiaa Bèd zian, rëbaman loj reeman:

—Bèn Israel, ¿chexc zeel radxa lojdi ni goc? Ad naladxidi por dunujn rza bèn guie guial naca'n gualrniabee o guial nayajcan naya delant loj Dios ya.

¹³ XDios dux béngulal ree Abraham, Isaac nē Jacob, laaman badëë gualrniabee loj Jesús, bèn bayüdi loj guxtis. Abi' chi guyën Pilato nuslaaman laaman, ad cwëjbtidi.

¹⁴ Luar niniabidi nuslaa Pilato bèn naya nali, bèn rüjn zi'c rayal, gunabidi baslaaman tijb xin bagüjt bejn.

¹⁵ Zian bagüjtidi bèn runee gualnaban. Per basban Dios laaman stijb, abi' dunujn nayajc testiw guial babanman.

¹⁶ Bèn guie, bèn ruguiaadi nūnbee tèëdi, guyu gojl guia'man por xgualrniabee Jesucrist, bayajcaman guial baliduladxan, zi'c ruguiaa graczidi.

¹⁷ Ganin lëjt compniar, ragbeen guial lëjt con ree bèn rniabee lëjt ni'quid gogbeetidi xhienin beendi chi bagüjtidi Jesús.

¹⁸ Per zian been Dios persi gojc cumplid ni rëbaman loj ree bèn badëë xtiidxaman loj ree bejn diizd gocli guial sagdiaj Cristo.

¹⁹ Zeel gol bayagbee xtolidi gol badxi' tèë lojdi loj Dios din gūnman xtolidi perdon. Dxel yayaalyuj luxdoodi,

²⁰ guixhiaal tèëman Jesús stijb, bèn naj Cristo diizd gocli par lëjt,

²¹ majsi yan rayalri suman xanyabaa, xt ma bazuxnejz Dios gra, zi'c rëbaman loj ree bèn badëë xtiidxaman loj ree bejn diizd gocli, bèn gubajn ree naya delant lojman.

²² Abi' rëb Moisejs loj ree dux béngulal ree: “Loj xdiaadi cwëë Dios tijb bèn gudëë xtiidxaman loj ree bejn zi'c naj, gol bazoob xtiidxaman graczi ni naman lojdi,

²³ din graczi ree b́en ad zuzoobt xtiidxaman nit reeman, ad zajc t́eetri reeman cwent zi'c xbejn Dios.”

²⁴ Gra ree b́en bad́eéd xtiidx Dios loj ree bejn, diidz Samuel con los demazri ree b́en bad́eé xtiidx Dios diidz gulal, mal bagojn reeman ni cayajc ree ĺen ree dxej guie.

²⁵ Ĺejt naj xdiaa reeman, lojdi gac cumplid ni cwéb Dios loj ree dux b́engulal ree chi ŕebaman loj Abraham: “Por xdiaal gúnle'n gra ree b́enguidxliuj.”

²⁶ Abi' chi basban Dios xi'nman Jesucrist, yaløj lojdi guxhaalaman laaman din gúnle'man ĺejt din yab́eécaman gradi loj ni mal ŕjndi.

4

Bazuj reeman Béd con Waj loj ree guxtis

¹ Sta canee ree Béd con Waj loj ree bejn, chi bidxin ree xbixhioz ree b́en Israel ńe suldad rniabee suldad rniaj ree ro' yadooro' Jerusalén, ńet́eé ree b́ensaduцев.

² Dád ralen reeman guial culúu ree Béd con Waj bejn ree, ŕeb reeman guial yaban ree bejn loj ree bengüt, din laan ma baguiaa reeman chi baban Jesucrist.

³ Zeel gunaaz reeman laa reeman, per guial ma gudxe, zeel badxe' reeman laa reeman ladxguib la'tgaj rareguiaa.

⁴ Per dád zien ree b́en bacaagdiajg ni ŕeb ree Béd con Waj bililadx xtiidx Dios, gojc reeman cost gaay mil xinguaaw xcwentqui ree b́engunaa.

⁵ Chi bareguiaa, guxtis Jerusalén ńe ree bengol ńe ree mextr ruluü ley, bado'p reeman loj ciuda guin.

⁶ Ńe Anás bidxin yagaj, b́en naj bixhioz mazri zøjbloj rniabee graczi ree bixhioz, bidxin t́eé bixhioz la Caifás ńe Waj ńe Lejandr, ńet́eé gra ree b́en naj lasa' ree bixhioz rniabee guin.

⁷ Gunabee reeman bica' reeman Béd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, ŕeb reeman:

—¿Chu banee diidxbee o chu por ŕjndi ni guin?

⁸ Per guial yu' xSprijt Dios luxdoo Béd dád gogńeman laaman, zeel ŕebaman:

—Gol bacaagdiajg ni ganin ĺejt bengol ńe ĺejt guxtis,

⁹ rniabdiidxidi dunujn xhienaag baguieenan b́engogxuu guin yudar, xhie t́eé naag gojc zeel bayajcaman.

¹⁰ Yanan lojdi din gagbeedi gagbee t́eé gra b́en Israel xhienaag bayajc b́en za' lojdi. Bayajcaman por xguialrniabee Jesucrist b́en Nazaret, b́en bacaadi loj crúz abi' basban Dios laaman stijb.

¹¹ Beennédi laaman zi'c ŕjñ ree b́en ŕjñ yu chi rb́eégo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacńe yu guin.

¹² Achut ben ren ŕjñ dux tol ree perdon, tijbzi Jesús, din achut mazri guxhaal Dios loj guidxliuj din gúnman dunuj ree perdon.

¹³ Chi baguiaa ree guxtis guin ad rdxeht ree Béd con Waj guial rniee reeman, abi' gogbee reeman ad b́en basiidt ree mazran achu t́eét naj reeman, badxa loj reeman bayúnbee t́eé reeman laa reeman guial b́en binal ree Jesúsán.

¹⁴ Abi' yagaj gajc za' b́en bayajc guin, zeel ad bile'tri xhie niéjb reeman contr laa reeman.

15 Dxel gunabee ree guxtis guin barii ree Béd con Waj din yaya'n laaz reeman din gü reeman diidx.

16 Rëb reeman:

—¿Xhienaag yaguieennë' ree xin guin ree? Graczi ree bën Jerusalén ma ragbee milagr been reex. Abi' ad zajct yarexuu ree.

17 Per chitéë guire'ch xtiidx Jesús, yachejb reex din diidx yan achutcziri loj guza't reex laax.

18 Dxel gurejdx reeman laa reeman gunabee reeman chitéë churi loj guza't reeman Jesús, ad gulüü tëeri reeman xtiidxaman.

19 Per badxi' Béd con Waj laan, rëb reeman:

—Lëjt gajc gol been xgab: ¿Zagdxe naj yazooban xtiidxidi luar yazooban xtiidx Dios ya?

20 Per ad zajct yacwëöz yaguie'chan gra ni baguiaan yaguiejn tëën.

21 Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëéd reeman laa reeman casti, din graczi ree bejn ruza't Dios zagdxe por ni goc.

22 Nadéd tiuu ijz yu' bën bayajc guin.

Rbejdx ree bën rliladx Jesús Dios

23 Chi baslaa ree guxtis guin Béd con Waj, baguiaj reeman lod riga' xcompniar reeman bën rliladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee.

24 Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëë nijsdoo con gra ni yu' loj reen.

25 Por xSprijt tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

26 Bado'p ree rey në gra ree guxtis

din su reeman contr dux Dad ree Dios në contr Cristo.

27 'Abi' zian ma gojc, Herodes con Poncio Pilato con ree bën Israel nëtëë ree bën ad najt bën Israel, badxajg lasa' reeman luguiedx guie persi guzuj reeman contr xi'nl Jesús, bën naya nali, bën bacaabee.

28 Zian gojc, been reeman zi'c ma beenl xgab diidx gocli.

29 Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin guialrdxeb,

30 në con xguialrniabee yasiajcan bénraxuu ree, yaguieen tëën milagr ree por xguialrniabee xi'nl Jesús, bën naya nali.

31 Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

Ragnë lasa' ree bën rliladx Jesús

32 Graczi ree bën rliladx Jesucrist bidxajg gubajn reeman, rüjn reeman tijbzi xgab, ni'qui tijb reeman ad rëbt guial xieenzi reeman naj ni rajp reeman, din najn par gra reeman.

33 Gognë Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman.

34 Ni'czi tijb reeman ad biaadxt xhienin, din graczi ree bën rajp guidxliuj o bën rajp yu ya ruto' reeman laan, abi' milia guin

³⁵ rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman.

³⁶ Loj reeman no'ch tijb bèn brii laj Xiëb, najman xdiaa bèn brii laj Leví, zëedaman yuj la Chipre ni riga' loj nijsdoo. Gunee ree apóstoles guin laaman Bernabé, rën guiëban Bén ragu' luxdoo ree bejn zagdxé.

³⁷ Gojpaman tijb guidxliuj, abi' bato'man laan persi badëëman milia guin loj ree apóstoles guin din qui's reeman laan.

5

Dol ni been ree Ananías con Safira

¹ Per guyu stijb bèn brii laj Ananías, xbéngunaaman brii laj Safira. Bato' tijb xguidxliuj reeman,

² per baya'nnë xbéngunaaman diidx persi baya'nnëman ta'n milia guin. Sta'n nan badëëman loj ree apóstoles guin, rëbaman laan naj gran.

³ Abi' rëb Bëd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnël ta'n milia ni bato' xguidxliujl?

⁴ ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balabladxil beenl zian? Loj Diosan nuyënl nusquieel, ad lojt bejnan.

⁵ Chi bigueijn Ananías ni rëbaman, biajbaman abi' güjtaman. Graczi ree bën gogbee ni guzacaman dád bidxeb reeman.

⁶ Dxel bibig bëlzi ree xinguiag, batüüb reex laaman lajd persi biquie'ch reex laaman.

⁷ Chi gudëd cost choon hor, dxel bidxin xbéngunaa Ananías, ad ragbeetaman ni goc.

⁸ Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nan.

⁹ Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

¹⁰ Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman.

¹¹ Graczi ree bën rliladx Jesucrist në gra ree bën gogbee ni goc, dád bidxeb reeman.

Zien ree milagr been ree apóstoles

¹² Zien ree milagr naroob been ree apóstoles guin loj ree bejn. Graczi ree bën rliladx Jesucrist radxajg lasa' ro' curdur lod rníee reeman xcurdur Salomón.

¹³ Zagdxé ruza't ree bën luguiedx guin laa reeman, per ad rayaxt reeman guchajg reeman laa reeman.

¹⁴ Abi' guixie guixie cayajxhieje ree bën rliladx Dad Jesús, zi'c xinguiaw zi'c béngunaa.

¹⁵ Xt rbëë reeman bënragxuu ree lunejz, rguijxh reeman laa reeman loj ree loon në loj ree da, din chi téd Bëd, majsi xbalazaman téd guijc reeman.

16 Nē ree bēn zojb guiedx riga' ree gajxh Jerusalén, zien reeman bidxin Jerusalén, bidxinnē reeman bēnragxuu ree nē ree bēn yu' xindxab luxdoo, abi' graczi reeman bayajc.

Gunaaz ree guxtis Bēd con Waj

17 Bixhioz mazri zojbloj rniabee graczi ree bixhioz nē ree bēnsaducew za'nē laaman, guyu guialnadēdloj luxdoo reeman,

18 abi' gunabee reeman biniaaz ree apóstoles guin persi badxe' reeman laa reeman ladxguuib.

19 Per guxhin zii tijb xi anjl Dios guxhal ro' ree xport ladxguuib guin, abi' babēēman laa reeman, rēbaman:

20 —Gol chej lēn yadooro', gol biguiedx loj ree bejn xhie naag gap reeman guialnaban tiblayaa con Dios.

21 Chi biguiejn reeman ni rēb anjl guin, bareguiaal rsildoo wej reeman lēn yadoo guin, guzuloj culūū reeman bejn ree xtiidx Dios.

Guiáad bixhioz zojbloj guin con ree bēn za'nē laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lēn ladxguuib guin.

22 Per chi bidxin reex ro' ladxguuib guin, achutri ree apóstoles guin ree yu'. Dxel bicojn reex guxtis guin ree,

23 rēb reex:

—Chi badxinan, baguiaan nayaaw ro' ladxguuib guin zagdxē, laa ree suldad rajp ro' ladxguuib guin za', per chi baxhalan, achutczī yu' lēnan.

24 Dxel bixhioz zojbloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rēb loj lasa' reeman, ¿ban xt guin chigdiblagaa ree ni guie?

25 Loj hor zii gajc bidxin tijb xin rēb loj reeman:

—Laa ree bēn badxe'di ladxguuib yu' lēn yadoo culūū reeman bejn ree.

26 Dxel wej suldad rniabee guin con ree xsuldadix bica' reex apóstoles guin ree, per ad beennaat reex laa reeman guial rdxeb reex gucaaguiaj ree bejn laa reex.

27 Chi badxinnē reex laa reeman, bayū reex laa reeman loj guxtis. Dxel rēb bixhioz zojbloj guin loj reeman:

28 —¿Nid ranan ya guial ad zajctri gulūūdi bejn ree xtiidx Jesús? Abi' yan graczi loj ree bēn Jerusalén ma gutie'chidi xtiidxix, nētēē yan rēndi gudxiibidi du guijcan guial dunujn bagūjt laax.

29 Abi' badxi' Bēdan nē gra ree apóstoles guin, rēb reeman:

—Rayal yazooban xtiidx Dios luar yazooban xtiidx ree bēnguidxliuj.

30 XDios dux bēngulal ree basban Jesús, bēn bacaadi loj crūjz.

31 Abi' nūjn Dios laaman bēn zojbloj, nabe'caman laaman xladbeeman, laaman naj bēn rniabee rabēē tēēman bejn ree loj xtol reeman, abi' zian guxhalaman nejz par ree bēn Israel din cwēēladx xtol reeman yadxi' tēē loj reeman loj Dios din guūnman laa reeman perdon.

32 Dunujn nē xSprijt Dios bēn rudēēman loj ree bēn ruzoob xtiidxaman, rayagbeen guial gra ree ni guin naj diidxli.

33 Chi biguiejn ree guxtis guin ni rēb reeman, dād balen reeman abi' guyēn reeman nugūjt reeman laa reeman.

34 Per loj ree guxtis guin no'ch tijb bēnfarisew laman Gamaliel, najman mextr ruluū ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt.

35 Dxel rēbaman loj ree guxtis guin:

—Bén Israel, gol been xgab xhienin güünnëdi bén guin ree.

³⁶ Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx.

³⁷ Abi' tée lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén binal laax bire'ch.

³⁸ Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rüjn reeman, zadxin dxej loxan.

³⁹ Per bal por Dios cayüjn reeman ni guin ree, ad zajct gutëedi loj ni cayüjn reeman. Gol gojp cudad ad niad chi gagbeedi contr Diosan za'di.

⁴⁰ Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad gutie'chri reeman xtiidx Jesús, dxel baslaa reeman laa reeman zia reeman.

⁴¹ Per laa reeman dád nix yu' luxdoo reeman barii reeman lod za' ree guxtis guin guial baslaa Dios guzagdiaj reeman por Jesús.

⁴² Abi' ad rucwëzt rulüü reeman rníee tée reeman xtiidx Jesús, gra dxejczy rulüü reeman lën yadooro' Jerusalén nëtëë lidx lidx ree bejn.

6

Bibee gajdx ree bén güün yudar

¹ Lën ree dxej zii chi canuu cayajcxhiey ree bén rliladx Jesús, guzuloj cabe'c ree bén rníee diidx grieg xguialquia ree bén rníee diidx hebreo, rëb reeman guial gra dxejczy chi rië's ni raw ree béngunaa bizëjb, ta'ndoon rtia' ree bén rníee diidx grieg guial loj ree bén rníee diidx hebreo.

² Dxel guidxibtio'p ree apóstoles guin bato'p reeman graczi ree bén rliladx Jesucrist, abi' rëb reeman:

—Ad zagdxet naj guial yacwëöz yalüün xtiidx Dios par yadi'san ni gaw ree bejn.

³ Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tée ree xquiargulejn, din yazuj reeman güün reeman dxiin guin.

⁴ Guiáad dunujn yasnuu yarejdx yanaaban Dios, yalüü téeñ xtiidxaman.

⁵ Graczi reeman cwëjb ni rëb reeman, abi' gulej reeman bén la Esteban, laaman rliladx Jesucrist guidib luxdooman, rniabee tée xSprijt Dios luxdooman guidiblagaa. Gulej tée reeman Felip, Prócoro, Nicanor, Timón, Parmenas në Nicolás bén zëed Antioquia, nëman bililadx ni rliladx ree bén Israel chi gadaman chililadx Jesucrist.

⁶ Dxel binë reeman laa reeman loj ree apóstoles guin, persi gurejdx gunab reeman Dios por laa reeman badxiib tée yaa reeman guijc reeman.

⁷ Canuu care'ch xtiidx Dios, abi' Jerusalén cayajcxhiey ree bén rliladx Jesucrist, në zien ree bixhioz Israel bililadx laaman.

Biniaaz Esteban

⁸ Dád gognë Dios Esteban badëë téeñman guialrniabee persi rüjnman zien loj milagr delant loj ree bejn.

⁹ Abi' bëlzi ree bén yadoo ni la Libertados në ree bén Cirene con ree bén Alejandría con ree bén niz Cilicia nëtëë ree bén zëed niz Asia, guzuloj cadildiidxnë reeman Esteban,

¹⁰ per ad gojct nadxi' reeman xtiidxaman guial cayagnë xSprijt Dios laaman.

¹¹ Dxel gudijx reeman bëlzi ree bejn din guiëb reeman, bacaagdiajg ree-man rniee Esteban contr Dios në contr Moisejs.

¹² Zian been reeman persi bidxe'ch ree bën luguiedx guin, në ree bengol në ree mextr rulüü ley. Dxel gunaaz reeman Esteban, binë reeman laaman loj guxtis.

¹³ Gudiil tëë reeman bën basquiee ree persi rëb reeman loj ree guxtis guin: —Ad rucwëëzt rnieeguijdx xin guie xley Moisejs në xyadoo Dios.

¹⁴ Dunujn ma bacaagdiajg rëbix guial Jesús xin Nazaret guse'nx dux yadooro' ree, guchaa tëëx costumbr basa'n Moisejs du loj ree.

¹⁵ Abi' guxtis guin ree në gra ree bën riga' yagaj, chi baguiaa reeman loj Esteban, baguiaa reeman najn zi'c tijb loj anjl.

7

Ni rëb Esteban loj ree guxtis

¹ Dxel bixhioz mazri zojbloj rniabee graczi ree bixhioz, gunabdiidxaman loj Esteban, rëbaman:

—¿Walin ya rëbil zian?

² Badxi' Esteban laan, rëbaman:

—Dad guxtis, në lëjt compniar, gol bacaagdiajg ni ganin. Dios bën yu' xanyabaa balüüloj loj dux bégungal ree Abraham, chi gureman niz Mesopotamia chi gadaman chisob guiedx Harán.

³ Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.”

⁴ Dxel brii Abraham ladx ree bën Caldea bisobaman Harán. Chi güt xDadaman, dxel bidné Dios Abraham loj guidxliuj guie lod nadxu' ree yan.

⁵ Per chi bi't Abraham guie, achetctzi guidxliuj badëd Dios lojman, ni'czi tibda'nan ad badëëtaman. Per beenman promejs loj Abraham guial gudëëman guidxliuj guie lojman, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham.

⁶ Rëb tëë Dios lojman guial xdiaaman chisob zi'c ree benzit nacion ren, lod gugünj da't reeman laa reeman dxiin gusagzi tëë reeman laa reeman loj tajp gayuu ijz.

⁷ Per rëb tëë Dios lojman: “Gudëdan gra ree bën gusagzi laa reeman casti, gac xchej yarii reeman yagaj abi' guie güün reeman sirv lon zi'c royal.”

⁸ Chi guneenë Dios Abraham, baya'n reeman diidx guial royal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidxiptio'p ree xi'nman, bën goc ree dux bégungal ree.

⁹ Bën goc ree dux bégungal ree gudëdloj reeman Xiëb bën naj bijch reeman, abi' bato' reeman laaman loj ree bën zë Egipto, per ad guro'nldxst Dios laaman,

¹⁰ gognëman laaman loj ni guzagdiajman badëë tëëman xquiarguiejnman, gognë tëëman laaman persi biajb rey guin laaman zagdxë, abi' beenman laaman gobernador Egipto, bazuj tëëman laaman din nabeeman gra ni rajp rey guin.

¹¹ Chi guyu gubijn guidibczi Egipto në niz Canaán, dxel guzagdiaj da't ree dux bégungal ree guial achet ni gaw reeman.

¹² Per chi gogbee Jacob guial yu' trigo Egipto, guxhaal ree xi'nman bën naj dux bégungal ree, dxel wej reeman Egipto.

13 Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëédaman.

14 Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn.

15 Zianan zeel bisob Jacob Egipto, ni gütaman ni gajc güt ree xi'nman, dux béngulal ree.

16 Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

17 'Chi ma zidyob tiamp gac ni rëb Dios loj Abraham, zien ree bën Israel ma gojcxhie Egipto.

18 Abi' guzuloj gunabee rey ren Egipto, bën ad beenbeet Xiëb.

19 Rey zii basagzi bën du ladx ree, gunabeeman chigsëeb reeman xindo niguaaw golnejz ree din guiët reex.

20 Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëw.

21 Chi bidxin dxej bigsa'n reeman laax lod bigsëeb reeman laax, xi'n gajc rey guin baca' laax, persi baslaaman laax zi'c xi'nman.

22 Basiid Moisejs gra ni rajc ree bën Egipto, abi' lasajc ni guneex ni been tëëx.

23 'Chi guyu Moisejs tiuu ijz, bidyajb guijcaman bignaj lasa' bën Israelman.

24 Abi' chi baguiaaman caguin tijb bën Egipto tijb bën Israel, balajman laaman, bagüjtaman bën Egipto guin.

25 Naladx Moisejs niagbee ree bën Israel guial por laaman yabëe Dios laa reeman loj ree bën Egipto, per ad gogbeet reeman.

26 Chi bareguiaal, bidxaagloj Moisejs tio'p ree bën Israel caga'p reeman, abi' guyënman nabe'cdxeman laa reeman, rëbaman: "¿Chexc zeel rdilidi? Awa bën Israel naj gropidi."

27 Abi' bën caguin bën zatijb guin bacadxaaman Moisejs, rëbaman: "¿Chu bazuj lüj din nabeel dunujn, din na tëël ni rayal yaguieenan?"

28 ¿Wen rën'l ya gugüjtil naj zi'c bagüjtil bën Egipto ni nieey?"

29 Chi biguiejn Moisejs ni rëb bën guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

30 'Chi gudëd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí.

31 Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxe, biguiejnman cha' Dios rëbaman lojman:

32 "Naj naj xDios xbéngulal reel, Abraham, Isaac në Jacob." Dxel guzuloj canij Moisejs guial bidxebaman, ad bayaxtaman nuguaaman bajl guin.

33 Dxel rëb Dios lojman: "Gulëe xgurëchil, din nagle' lod za'l.

34 Naj cuguia xhienaag cazagdiaj ree da bejnan Egipto, rigujenjan roon reeman zeel biguia'tan din yabën laa reeman. Yan, guda din gaxhalan lüj Egipto."

35 'Abi' majsi ad guyënt ree bën Israel nuzoob reeman xtiidx Moisejs yaløj, rëb reeman lojman: "¿Chu bazuj lüj din nabeel dunujn na tëël ni yaguieenan?" Per por anjl balüüloj loj bajl guin, badëed Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c.

³⁶ Moisejs guin naj bén babëe dux béngulal ree Egipto, been tēeman milagr ree niz Egipto, nē niz ro' nijsdoo ni la Nijs Xnia, nē loj yujbidx lod guzu reeman tiuu ijz.

³⁷ Laagajc tēeman rēb loj ree bén Israel: “Loj gajquidi cwe Dios tijb bén gudëed xtiidxaman loj ree bejn zi'c guleman naj. Go! bazoob xtiidxaman.”

³⁸ Dxel chi guzunē Moisejs dux béngulal ree niz loj yujbidx, laaman naj bén guneenē xi anjl Dios ruguia' la Sinaí, persi badëeman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ 'Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyugujczi reeman nayejc reeman Egipto.

⁴⁰ Dxel rēb reeman loj Aarón: “Been dios ree, din ned reeman du loj ree, din ad rayagbeet ree gonczi Moisejs bén babëe dunuj ree Egipto.”

⁴¹ Dxel been reeman tijb go'ndobëz din gaquib xdios reeman. Bagüjt reeman be ree persi badëed reeman laa reeb zi'c gon loj ni been reeman, been reeman lanij guial babaanē reeman ni been gajc reeman.

⁴² Dxel guro'nladx Dios laa reeman, baslaaman guyën reeman gubijdx con bëew con bajl yu' ree xanyabaa. Din zian ca loj xtiidx Dios ni bacaa ree bén badëed xtiidxaman loj ree bejn, lod rēb:

Bén Israel, loj tiuu ijz ni guzudi loj yujbidx,
¿wen bagüjtidi be ree ya din guneedi laa reeb lon zi'c gon?

⁴³ Per mazri guyëndi xdxandi Moloc biao tēedi lidxan,
nē xbajl dxan Refán, dxan been gajquidi din guzuxibidi loj reen.
Zeel gaxhalan lëjt mazri zijt guial Babilonia.

⁴⁴ 'Abi' chi guzu ree dux béngulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rëbaman lojman guial güünman laan zi'c ma baguiaaman.

⁴⁵ Chi güt Moisejs, baya'nnē ree dux béngulal ree yadoo guin. Chi baya'n Josué xluar Moisejs, dxel bidnē reeman yadoo guin chi gudil reeman guijc guidxliuj con ree bén ren, abi' gognē Dios laa reeman persi been reeman gan baya'nnē reeman guidxliuj guin ree. Zian guzunē reeman yadoo guin xt bidxin dxej guzuloj gunabee rey Davi.

⁴⁶ Guyën Dios rey Davi, abi' laaman guyënman nüjman tijb yadoo par Dios, bén naj dux Dios ree nayajc ree bén Israel.

⁴⁷ Per rey Salomón naj bén been laan,

⁴⁸ majsí Dios bén yu' xanyabaa ad rbejtaman lën yadoo ni rüjn ree bejn, zi'c rēb bén badëed xtiidx Dios loj ree bejn diizd gocli, chi rëbaman:

⁴⁹⁻⁵⁰ Xanyabaa naj lod zooban par ganabeen,

guiáad loj guidxliuj naj lod ruzu guia'n.

¿Xhienaag gac yu güündi par naj?

¿O xhienaag naj lod yaziiladxan?

¿Id naj ben graczi ree ni guie ya?, rēb Dios.

⁵¹ 'Per lëjt —rēb Esteban —dád nadidi, ad rëntidi guzoobidi xtiidx Dios, ad rën tēetidi chignia'di, zianczi za'di contr xSprijt Dios, zi'cgajc been ree xbéngulalidi.

⁵² ¿Chu bén badëed xtiidx Dios loj ree bejn ad beennaat ree xbéngulalidi? Xt bagüjt reeman bén badëed ree xtiidx Dios bén rēb ree guial gui't tijb bén naya nali. Abi' yan ma bi'taman, bayüdi laaman loj ree bén rniabee, gunabee tēedi güjtaman.

⁵³ Majsí cwa'di xley Dios loj ree xi anjlaman, per ad rüjntidi zi'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman.

⁵⁵ Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëëman Jesús za'man xladbee Dios.

⁵⁶ Dxel rëb Esteban:

—¡Gol baguiaa! Ruguian naxal xanyabaa, ruguia tëën Bén guxhaal Dios za'man xladbee Dios.

⁵⁷ Per chi biguiejn reeman zian, bata'cw guidiajg reeman, dxel gurixdiaj reeman zignaaz reeman Esteban,

⁵⁸ babëë reeman laaman loj ciuda guin, bicüjt reeman laaman con guiaj, guiáad xab reeman basa'nsii reeman loj xinguiag la Saulo persi canajxan.

⁵⁹ La'tgaj cucaaguaiaj reeman Esteban, rëbaman:

—Dad Jesús, baca' da sprijtan.

⁶⁰ Dxel bazuxibaman guridxa'man rejs, rëbaman:

—Dad Jesús, ad güüncwenti dol cayüjn ree bén guin yan.

Naabczi gulox rëbaman zian, laa güt gajcaman.

8

Guzunal Saulo bén rliiladx ree Jesucrist

¹ Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bén Jerusalén ree bén rliiladx ree Jesucrist, dxel bire'ch reeman guidib niz Judea në niz Samaria, bén najzi ree apóstoles baya'n.

² Guyu bëlzi ree xinza'c, laa reex biquie'ch Esteban, abi' dád biin reex guijcaman.

³ Guiáad Saulo rzunalaman bén rliiladx ree Jesucrist, ruman yu yu din cwëë naguiejnman laa reeman, zi'c xinguiaw zi'c béngunaa, persi rgu'man laa reeman ladxguuib.

Bacaagdiajg ree bén Samaria xtiidx Dios

⁴ Per bén brii ree Jerusalén, lod zëtzi reeman rtie'ch reeman xtiidx Dios.

⁵ Zi'c been Felip, wejman guiedx Samaria, guzuloj caneeman xtiidx Jesucrist loj ree bejn.

⁶ Dád zien ree bejn rdo'p, graczi reeman rucaagdiajg chaaw ni rëb Felip, ruguiaa tëë reeman milagr ree ni rüjnman.

⁷ Zien ree bén nëjt tib lajt xcuerp bayüjn Felip, në ree bén ad rzat zagdxe, bayüjn tëëman bén yu' ree xindxab luxdoo abi' rbixdiaj reex rarii reex.

⁸ Zianan zeel babaa da't ree bén luguiedx zii.

⁹ Per luguiedx zii guyu tijb bén brii laj Simón, diizd gocli rüjnman guialbidxaa persi rusquieeman bén Samaria ree, rüjnman bén lasajc.

¹⁰ Graczi reeman rucaagdiajg chaaw ni rëbaman, diizd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp bén guie.

¹¹ Bidxga' reeman laaman guial ma gojc xchej cusquieeman laa reeman con guialbidxaa ni rüjnman.

¹² Per chi bililadx reeman ni rëb Felip xcwent xguialrniabee Dios në xcwent Jesucrist, zi'c ree xinguiaw zi'c ree béngunaa gurobnijs reeman.

13 Xt në Simón bililadx guobnijs tēēman, abi' ad riro'nladxtaman Felip radxa tēē lojman graloj ree milagr ruguiaaman rūjn Felip.

14 Chi gogbee ree apóstoles riga' Jerusalén guial ma bililadx ree bēn Samaria xtiidx Dios, dxel guxhaal reeman Bēd con Waj ni.

15 Chi bidxin reeman, gurejdx gunab reeman Dios por ree bēn Samaria bēn ma rililadx ree xtiidx Dios din chu' xSprijt Dios luxdoo reeman,

16 din ni'qui tijb reeman ad wayut Sprijt guin luxdoo, guobnijsi reeman por Dad Jesūs.

17 Dxel guxhoob yaa ree Bēd con Waj guijc reeman, abi' guyu xSprijt Dios luxdoo reeman.

18 Chi baguiaa Simón cayu xSprijt Dios luxdoo ree bēn guin guial caxhoob yaa ree apóstoles guin guijc reeman, dxel guyēnman nudēēman milia loj reeman,

19 rēbaman:

—Nē lon gol banee guialrniabee guin din chi gaxhob yan chutēēz guijc bēnan, nē luxdoo chu' xSprijt Dios.

20 Dxel badxi' Bēd xtiidxaman rēbaman:

—Nītil con guidib xmīlial, din rūjnl xgab guial zajc siil guialrniabee razaladx Dios.

21 Ad rayalt ad zajc tēēt gūūnl zi'c raguieenan, din ni'quid zinātil xnejz Dios.

22 Bayūjn xgab por ni mal beenl, gurejdx gunab tēē Dios, rupent gūūnman lūj perdon por ree xixgabmalil,

23 din ragbeen ganax guialralen yu' luxdool, abi' dol guin naj ni rniabee lūj.

24 Dxel badxi' Simón xtiidxaman, rēbaman:

—Gol gurejdx gunab Dios por naj, chitēē gaza'can ni'qui tijb ni ma nadi.

25 Chi gulox gunee ree apóstoles guin xtiidx Dios loj ree bēn guin, dxel badxin reeman Jerusalén, abi' graczi ree guiedx riga' nīz Samaria lod gudēd reeman gutie'ch reeman xtiidxza'c Jesucrist.

Felip con bēn Etiopía

26 Chi ma gudēd gojc zian, gunee tijb xi anjl Dios Felip rēbaman:

—Wej niz sur nejz ni zē Jerusalén xt lod la Gaza, niz lod naj ganax yujbidx.

27 Dxel brii Felip zēman. Runejz guin banaazaman tijb bēn Etiopía, najman bēn zojbloj guial laaman rgu'chaaw xmīlia Candace, bēn naj reina Etiopía. Wejman Jerusalén bignajchi'man Dios,

28 abi' ma bayunejzaman zia ladxaman, zojb lēn xcarrejt zagdxeman, roolaman loj gui'ch ni bacaa Isaías, bēn badēd xtiidx Dios loj ree bejn.

29 Dxel rēb xSprijt Dios loj Felip:

—Bibig gajxh cwē' carrejt guin.

30 Chi bibigaman, biguejnman cayool bēn guin loj gui'ch bacaa Isaías. Dxel gunabdiidxaman lojman rēbaman:

—Dad, ¿rignia'l ni cayoolil ya?

31 Badxi' bēn guinan rēbaman:

—¿Xoza chignia'nān? Awa achut gusignia' naj.

Dxel rēbaman loj Felip din chē'paman loj carrejt guin, cweman cwē'man.

32 Loj xtiidx Dios lod cayool bēn guin rēban:

Zi'c rinē reeman tijb xiil,

binē reeman laaman lod gugūjt reeman laaman.

Abi' achet rēbaman,

zi'c tijb xiil ma za' loj ree bēn gugaj guidxladib.

³³ Chi beennë reeman laaman zi'ctzi rën reeman, achut been guialguxtis por laaman. Yan achut guza't xdiaaman, din ma bisüd reeman laaman loj guidxliuj.

³⁴ Rëb bën guin loj Felip:

—Guna sii, ¿chu xcwent rniee bën bacaa diidx guie ree? ¿Xcwent gajcaman ya o xcwent ben renan?

³⁵ Dxel guzuloj Felip cusignia'man laaman xtiidx Dios ni cayoolaman, zian beman xtiidxza'c Jesucrist lojman.

³⁶ Abi' chi gudë reeman lod yu' nijs, dxel rëb bën guin loj Felip:

—Guie yu' nijs. ¿Nid zajc garobnijsan guie ya?

³⁷ Zeel rëb Felip lojman:

—Bal rliadxil guidib luxdool, zajcan.

Badxi' bën guinan rëbaman:

—Rliadxan guial Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman.

³⁹ Chi barii reeman lojnijs guin, loj hor zii gajc gunidloj Felip binë xSprijt Dios laaman, abi' ad baguiaatri bën guin laaman, per dád rabaaman zinal xnejzaman.

⁴⁰ Chi gogbee Felip, ma za'man xt guiedx Azoto, dxel zëman guiedx guiedx zigtie'chaman xtiidxza'c Jesucrist xt bidxinman Cesarea.

9

Bililadx Saulo Dad Jesucrist

(Hch. 22:6-16; 26:12-18)

¹ Guiáad Saulo ad rucwëët rdxe'chaman bën rliadx ree Jesucrist, rëbaman gugüjtaman laa reeman. Zeel wejman bigneenëman bixhioz mazri zojbloj rniabee graczi ree bixhioz,

² din gac tijb gui'ch din gac cheman lën ree yadoo Damasco chigdiilaman bën rliadx ree Jesucrist, zi'c ree xinguaaaw zi'c ree bëgunaa, din chignëman laa reeman ladxguuib Jerusalén.

³ Per chi ma cadxinman gajxh guiedx Damasco, dxejlczii brii tijb guij xanyabaa balaan bacha' lod zëman.

⁴ Abi' bireeyujman, chi naga'man luyuj guin biguiejnman cha' bën rëb:

—Saulo, Saulo, ¿chexc zeel rzunalil naj?

⁵ Abi' gunabdiidxaman rëbaman:

—¿Chu lüj, Dad?

Badxi'man laan rëbaman:

—Naj naj Jesús bën rzunalil. Per ganin lüj, lüj gajc rguuil xguialnaal zi'c rüjn tijb go'n rudxeguaia' loj yag ni rulaagnë reeman laab.

⁶ Rnij Saulo guial tant bidxebaman, abi' rëbaman:

—Dad, ¿xhie rën l gūnan?

Dxel rëb Dad Jesucrist lojman:

—Bixche, wej guiedx Damasco, ni na reeman ni rayal güünl.

⁷ Abi' ree bën në Saulo dád bidxeb reeman guial biguiejn reeman cha' bejn, per achutczii baguiaa reeman.

⁸ Chi bixcheman luyuj guin, baxhal lojman, ad rajctri ruguiaaman. Dxel gunaaaz reeman yaaman bignë reeman laaman Damasco.

⁹ Ni guzuman choon dxej, ad rajct ruguiaaman, achetczii rawaman ache tëëtczii rë'man.

¹⁰ Damasco gure tijb b́en rliadx Dad Jesucrist, brii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

¹¹ Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj,

¹² abi' zi'c rulüü cane'xhchaalix, baguiaax guyu tijb b́en la Ananías guxhoob yaaman guijquix persi baguiaax stijb.

¹³ Chi biguien Ananías zian, dxel rëbaman:

—Dad, zien da't ree bejn ruza't xin zii, nê ree ni mal rüjnnëx b́en rliadx ree lüj Jerusalén.

¹⁴ Yan zëedix guie con xguialrniabee ree bixhioz rniabee ree bixhioz, din guiniaazix gra ree b́en rliadx lüj.

¹⁵ Dxel rëb Jesucrist lojman:

—Wej, din naj gule laax din chiguiex da diidxan loj ree b́en ad najt b́en Israel, nê loj ree rey, con nëgajc loj ree b́en Israel.

¹⁶ Guiën lojx guial sagdiaj da'tix guial najx da bejnan.

¹⁷ Dxel zë Ananías lënú lod za' Saulo. Chi guyuman, guxhoob yaaman guijcaman, rëbaman:

—Bijch Saulo, Dad Jesús b́en balüüloj lojl runejz lod zëedil, laaman guxhaal naj din yaguaial, chu' tëë xSprijt Dios luxdool.

¹⁸ Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnijsaman,

¹⁹ gudaw tëeman persi bayuman gojl. Dxel guzujman Damasco tio'p choon dxej con ree b́en rliadx Jesucrist.

Gunee Saulo xtiidx Dios Damasco

²⁰ Dxel guzuloj gunee Saulo xtiidx Dios lën ree yadoo, rëbaman guial Jesucrist naj Xi'n Dios.

²¹ Graczi ree b́en biguien ni rëbaman badxa loj reeman abi' rëb reeman:

—¿Nid b́en guien rzunal b́en rliadx ree Jesucrist Jerusalén ya? ¿Nid laagajcaman zëed guie ya, din guiniaazaman b́en rliadx ree Jesucrist chignë tëeman laa reeman loj ree bixhioz rniabee ree bixhioz?

²² Per Saulo guixie guixie mazri cariiman gualrdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree b́en Israel zojb ree Damasco chi rucaagdiajg reeman ni rëbaman.

Baxiün Saulo guiedx Damasco

²³ Ad xchejt gojc, baya'n ree b́en Israel diidx din nugüjt reeman Saulo,

²⁴ per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman.

²⁵ Per ree b́en rliadx Jesucrist, guxhin badxe' reeman laaman lën dxüm naroo, abi' gulet reeman laaman niz xijch ze' nusiaaw ciuda guin, zian baxiünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchajgaman b́en rliadx ree Jesucrist, per graczi reeman bidxeb laaman guial ad rliadx reeman nëman ma rliadx Jesucrist.

²⁷ Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenë tēēman laaman chi zēman Damasco, bagojn tēēman guial Damasco guneē Saulo xtiidx Jesucrist sin guialrdxeb.

²⁸ Zian baya'n Saulo Jerusalén abi' nayuman laa reeman.

²⁹ Ad rdxebtaman ruza'taman Dad Jesús, abi' xt gudijldiidxnēman bēn Israel nīee ree diidx grieg, per guyēn reeman nugūjt reeman laaman.

³⁰ Chi gogbee ree bēn rliladx Jesucrist zian, binē reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel babeledx lخدoo ree bēn rliladx Jesucrist, bēn zojb ree niz Judea nē niz Galilea nētēē niz Samaria, chigagaj beenbee reeman mazri xhienaag naj xnejz Dios, bazoob tēē reeman xtiidxaman, abi' cayagnē xSprijt Dios cayajcxhiey reeman.

Bayajc Eneas

³² Chi biza Bēd bitixlojman bēn rliladx ree Jesucrist, dxel wej gajcaman bitixlojman bēn rliladx ree Jesucrist guiedx Lida.

³³ Ni bidxaaglojman tijb xinguaaw la Eneas. Ma gojc xhujn ijz naga'x, ragxuux, ad rajct rzax.

³⁴ Abi' rēb Bēd lojx:

—Eneas, ma bayūjn Jesucrist lūj. Bixche, bales ni go'til loj.

Loj hor zii gajc bixchex.

³⁵ Chi baguiaa gra ree bēn zojb guiedx Lida nē ree bēn zojb niz Sarón guial ma bayajc Eneas, dxel nē reeman bililadx Jesucrist.

Baban Dorcas

³⁶ Loj tiamp zii guyu tijb bēngunaa rliladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tēēman yudar bēnprob ree.

³⁷ Lēn ree dxej zii gogxuu Dorcas abi' gūjtaman. Chi gulox bagajz reeman laaman, dxel bitixh reeman laaman lēnū ladya.

³⁸ Abi' gajxh guiedx Jope raya'n guiedx Lida lod za' Bēd. Chi gogbee ree bēn rliladx Jesucrist guial za'man ni, guxhaal reeman tio'p ree xinguaaw bisajc reex Bēd liaadx, rēb reex:

—Been wen yo' ree Jope yan gajczi.

³⁹ Laa zinē gajcaman laa reex. Chi bidxinman, binē reeman laaman lēnū lod naga' xcuerp Dorcas. Ni riga' zien ree bēngunaa bizējb roon reeman, abi' bibig reeman loj Bēd culūū reeman gra lajd ni been Dorcas chi sta nabanman.

⁴⁰ Dxel gunabee Bēd barii gra reeman, abi' bazuxibaman gurejdx gunabaman Dios. Dxel baguiaaman bengūt guin, rēbaman:

—;Tabita, bixche!

Laa guxhal gajc lojman. Chi baguiaaman Bēd, gureliman,

⁴¹ dxel gunaaz Bēd yaaman persi guzuliman. Abi' gurejdxaman bēn rliladx ree Jesucrist con ree bēn bizējb guin, persi baguiaa reeman guial ma baban Dorcas.

⁴² Guidibczi guiedx Jope gogbee reeman ni goc, abi' zien da't reeman bililadx Jesucrist por zian.

⁴³ Guíaad Bēd baya'nman mazri dxej luguiedx guin, lidx Simón bēn rūjnchaaw guid.

10

Wej Béd lidx Cornel

¹ Luguiedx Cesarea gurej tijb bèn brii laj Cornel. Laaman goc suldad gunabee tibcwaa ree suldad brii laj Italiano.

² Gojcaman benza'c, laaman nè gra ree bèn zojb lidxaman guyèn reeman Dios, abi' dád beenman yudar bèn Israel ree, bèn naj ree bènprob, nè zianczi rbejdx rniabaman Dios.

³ Tijb dxej cost raca choon wadxe, guzajcaman zi'c rulüü cane'xhchaalaman. Zagdexci baguiaaman guyu tijb xi anjl Dios lènü lod za'man, abi' rëb anjl guin lojman:

—jCornel!

⁴ Baguiaaman loj anjl guin, abi' dád bidxebaman, rëbaman:

—¿Xhienin, Dad?

Abi' rëb anjl guin:

—Ma biguiejn Dios xtiidxil ma baguiaa tëëman xhienaag rüjnl yudar bènprob ree.

⁵ Guxhaal ree bèn che luguiedx Jope din chica' reeman Simón, bèn la gajc Béd.

⁶ Zojbaman lidx tijb bèn la gajc Simón, bèn rüjnchaaw guid, bèn zojb gajxh ro' nijsdoo. Béd guin na ni rayal güünl.

⁷ Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rliladx tëëman Dios.

⁸ Gulox beman diidx loj reeman ni guzacaman, dxel guxhaalaman laa reeman Jope.

⁹ Chi bareguiaal, la'tgaj cadxin reeman gajxh Jope, cost garol dxej wè'p Béd guijc yu lod zojbaman dín cwedx guiniabaman Dios.

¹⁰ Dád gulaanman, guyènman niajwaman, per la'tgaj cayüjn reeman ni gawaman guzajcaman zi'c rulüü cane'xhchaalaman.

¹¹ Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan.

¹² Loj lajd guin yu' gra loj ree be yu' tajp guia', nè ree bëël, nètëë ree be rzuj.

¹³ Dxel biguiejnman cha' bèn rëb:

—Béd, bisu, bagüjt be gawil.

¹⁴ Per badxi' Béd laan rëbaman:

—Yajqui, Dad. Ad wayawtczan nidxuudx ni ad rayalt gaw bejn.

¹⁵ Abi' rëb cha' bèn guin zatijb:

—Ni ma basia Dios ad rnieelan nidxuudx.

¹⁶ Choon volt gojc zian, dxel bayé'p lajd guin xanyabaa stijb.

¹⁷ La'tgaj cayüjn Béd xgab xhie rën guiëb ni baguiaaman, loj hor zii gajc bidxin ree bèn guxhaal Cornel rulidx Simón, guial ma gunabdiidx reeman banguin naj lidxaman.

¹⁸ Chi bidxin reeman, gunabdiidx reeman bal ni zojb Simón bèn la gajc Béd.

¹⁹ Guiáad Béd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaw raguiil lüj.

²⁰ Bisu, biguiajt binë reex, ad chu' luxdool tio'p, din naj guxhal laa reex.

²¹ Dxel baguiajt Béd lod za' ree bèn guxhaal Cornel, abi' rëbaman loj reeman:

—Naj naj bèn raguiilidi, ¿chexquiza zeel raguiilidi naj?

²² Dxel badxi' reeman laan rëb reeman:

—Guxhaal bén la Cornel dunujn, bén rniabee tibcwaa ree suldad, najman benza'c, rdxebaman Dios, abi' graczi ree bén Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

²³ Dxel badxe' Bëd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bén zojb Jope bén rliadx ree Jesucrist binë laaman.

²⁴ Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man në ree xmiwaman, din cwëz reeman guidxin reeman.

²⁵ Chi bidxin Bëd lidx Cornel, laa brii gajc Cornel bigchaaglojman laaman, dxel bazuxibaman loj Bëd persi gojpaman laaman respejt.

²⁶ Per bazuli Bëd laaman, rëbaman:

—Guzuli, din lasa' bejn gajcan lüj.

²⁷ La'tgaj cadxin reeman ruyu guin cayü reeman diidx. Abi' chi guyu reeman, baguiaa Bëd zien da't ree bejn riga' ni.

²⁸ Dxel rëb Bëd loj reeman:

—Ma qui ragbeedi xhienaag naj xley ree bén Israel, guial ad zajct go'ch reeman loj ree bén ad najt bén Israel o chu' reeman lidx reeman. Per ma balüü Dios naj guial achutczzi rayal ganen bendxuudx, bén nabixhladx.

²⁹ Zeel chi bidca' reeman naj, laa bial gajcan achet guijc badxiban. Yan rënan gagbeen, ¿chexquiza zeel gurejdxidi naj?

³⁰ Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadxe, cabedix canaaban Dios, loj hor zii balüüloj tijb bejn lon najcwaman lajd nayni.

³¹ Abi' naman lon: “Cornel, ma biguiejn Dios xtiidxil, yu'guijc tëëman xhienaag rüjnl yudar bénprob ree.

³² Zeel guxhaal ree xin che luguiedx la Jope din chica' reex Simón, bén la gajc Bëd. Zojbaman lidx tijb bén la gajc Simón, bén rüjnchaaw guid, bén zojb gajxh ro'nijdsdo. Bëd gujn na ni rayal güünl.”

³³ Zianan zeel laa guxhal gajcan xin bidgadiil ree lüj. Zagdxe beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

Ni gunee Bëd lidx Cornel

³⁴ Dxel guzuloj canee Bëd, rëbaman:

—Ma ragbeen yan guial tiblojzi ruguiaa Dios bejn.

³⁵ Din Dios, chutëëz bënguidxliuj ridxga' laaman rüjn tëëman zi'c rayal, nëgajc Dios ridxga' laaman.

³⁶ Dios ma gunee bén Israel ree, ma bagojnman guial por Jesucrist rabeledxe luxdoo bejn, bén naj Dad par gra ree bënguidxliuj.

³⁷ Lëjt ragbee xhienaag baza't reeman Jesús diidz niz Galilea xt guidib niz Judea, chi gulox bagojn Waj bejn ree xcwent gualrirobnij.

³⁸ Ragbee tëëdi guial ma badëë Dios xSprijtaman con xguialrniabeeman loj Jesús bén Nazaret, abi' bizaman biguieenman ni zagdxe, bayünman gra ree bén cazagdiaj por xindxab. Gojc beenman zian guial za'në Dios laaman.

³⁹ Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj crüjz.

⁴⁰ Per Dios basban laaman ni bayon dxej, abi' cwëjb Dios bidgalüülojman du lojn.

⁴¹ Ad balüülojtaman loj gra ree bejn, tijbzi du lojn nayajcan bën gule Dios diizd yaloj din yaguaian graczi ni beenman. Abi' dunujn badaawnë' laaman badü'në' tēen laaman chi babanman stijb.

⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman guialguxtis chi guidxin dxej yadëäd gra ree bejn cwent loj Dios, zi'c ree bën naban zi'c ree bën ma güjt.

⁴³ Nētēē diizd gocli graczi ree bën badëäd xtiidx Dios loj ree bejn, gunee reeman xcwent Jesús, rēb reeman guial graczi ree bën chililadx laaman, gac xtol reeman perdon.

Guyu xSprijt Dios luxdoo ree bën ad najt bën Israel

⁴⁴ Sta canee Bëd, chi guyu xSprijt Dios luxdoo gra ree bën cucaagdiajg ni cayëbaman.

⁴⁵ Dxel bën Israel rililadx ree Jesucrist, bën binë ree Bëd, dád badxa loj reeman guial nē ree bën ad najt ree bën Israel guyu xSprijt Dios luxdoo,

⁴⁶ guial rigueijn reeman ma rniee ree bën guin graloj ree diidx, abi' ruza't reeman Dios zagdxe.

⁴⁷ Dxel rēb Bëd loj reeman:

—¿Chu zajc gudxoon tiobnijs ree bën guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Bëd din sunëman laa reeman za tio'p choon dxej mazri.

11

Guyu xSprijt Dios luxdoo ree bën ad najt bën Israel

¹ Bën naj ree xi apóstoles Jesús con ree bën Judea, bën rililadx ree laaman, gogbee reeman guial nē ree bën ad najt bën Israel bililadx xtiidx Dios.

² Abi' chi badxin Bëd Jerusalén, bën Israel ma rililadx ree Jesucrist, bën sta zinal ree ley, gudilë reeman Bëd.

³ Rēb reeman lojman:

—¿Chexc zeel bichu'l lidx ree bën ad najt bën Israel abi' gudawnël laa reeman?

⁴ Dxel guzuloj cayü Bëd diidx diizd guia'xchej xhienaag gojc zeel wejman lidx ree bën guin abi' rëbaman loj reeman:

⁵ —Chi za'n luguiedx Jope, la'tgaj cabedx canaaban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan caguajtan diizd xanyabaa xt lod za'n.

⁶ Chi baguian zagdxe xhie yu' loj lajd guin, baguian bedoxh ree nē ree be yu' tajp guia' nē ree bëël con ree be rzuj.

⁷ Dxel bigueijnan cha' bejn, naman: “Bëd, guzuli, bagüjt be gawil.”

⁸ Per badxi'nan rën: “Yajqui, Dad, din ad goctczi wayawan nidxuudx, ni ad rayalt gaw bejn.”

⁹ Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.”

¹⁰ Choon volt gojc zian, dxel bayë'p gra ni guin xanyabaa.

¹¹ Loj hor zii gajc bi't choon ree xinguaaw lod guren, zëäd reex diizd Cesarea, cayguuil reex naj.

¹² Abi' na xSprijt Dios lon guial chinë'n laa reex, ad chu' luxdon tio'p. Nē guixo'p ree bën guie bën naj dux compniar ree binë'n. Abi' dugraczan badxu' lidx bën guin.

13 Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Bëd,

14 laaman na xhienaag gac ree xtolil perdon, con gra ree bën zojb lidxil.”

15 Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj.

16 Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.”

17 Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

18 Chi bigueijn ree bën guin ni rëb Bëd, dxel achetri rëb reeman lojman abi' baza't reeman Dios zagdx, rëb reeman:

—¡Ma rayagbee ree yan guial në ree bën ad najt bën Israel ma balüü Dios guial rayal yayüjn xgab por xtol reeman yadxi' tëë loj reeman lojman din gap reeman guialnaban tiblayaa delant lojman!

Bililadx ree bën Antioquía Jesucrist

19 Chi mal bagüjt ree bejn Esteban, dxel guzuloj rzunal reeman bën rliladx ree Jesucrist persi bire'ch gra ree bën rliladx guin niz Fenicia, niz Chipre në Antioquía. Abi' gutie'ch reeman xtiidxza'c Jesucrist, per ganaxzi loj ree bën Israel.

20 Per loj reeman no'ch bëlzi ree bën Chipre në ree bën Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bën ad najt bën Israel.

21 Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

22 Chi gogbee ree bën Jerusalén rliladx Jesucrist ni goc, guxhaal reeman Bernabé xt guiedx Antioquía.

23 Chi bidxinman ni, dád babaaman chi baguiaaman xhienaag cayagnë Dios bën guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist.

24 Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdoo. Zeel dád zien ree bejn bililadx Jesucrist.

25 Dxelri wej Bernabé guiedx Tarso bigdiilaman Saulo.

26 Chi badxejlaman laaman, dxel binëman laaman xt Antioquía. Ni guzunë reeman bën rliladx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëëljaj reeman bën rliladx ree Jesucrist, cristian.

27 Lën ree dxej zii bëlzi ree bën badëë xtiidx Dios loj ree bejn, guza Jerusalén wej reeman Antioquía.

28 Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio.

29 Abi' ree bën rliladx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëëd tijb gaj reeman, din gagnë lasa' reeman, bën rliladx ree Jesucrist, bën zojb ree niz Judea.

30 Abi' zian been reeman. Dxel guxhaalnë reeman laan Saulo con Bernabé din gudëëd reeman laan loj ree bën rniabee ree bën rliladx Jesucrist niz Judea.

12

Guyu Béd ladxguib

¹ Lën ree dxej zii guzuloj rey Herodes cusagziman bëlzi ree bën rliladx Jesucrist.

² Abi' gunabeeman bagüjt reeman Jacob bijch Waj, con espad.

³ Chi baguiaaman bayuladx ree bën Israel ni beenman, dxel gunabeeman gunaa reeman Béd. Ni ne goc lën ree dxej lanij pascw chi raw reeman guiadxtil ad yu't levadur.

⁴ Chi gunaa reeman Béd, badxe' reeman laaman ladxguib abi' gunabee rey Herodes tajp cwaa ree suldad din guinia reeman ro' ladxguib guin, tib cwaa gaj reeman naj tajp suldad. Din beenman xgab nuzujman Béd loj ree bën guiedx guin chi nidëd pascw.

⁵ Zian guyu Béd ladxguib, gojp da't reeman laaman. Per gra ree bën rliladx Jesucrist ad rucwëëzt rbejdx rniab reeman Dios por laaman.

Babëe Dios Béd ladxguib

⁶ Guxhin zii gajc chi yareguiaal cwëë Herodes Béd loj ree bën guiedx guin, naga'yëjs Béd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguib guin.

⁷ Dxejczí bidxin tijb xi anjl Dios abi' basni tijb guij lën ladxguib guin, dxel baqui' anjl guin cwé'lën Béd persi bacwëënman laaman, rëbaman lojman:

—¡Cari bixche!

Loj hor zii gajc biajb ree caden naxii yaa Béd,

⁸ abi' rëb anjl guin lojman:

—Guxhiidxi'ch lënl balëë tëë xgurëchil.

Chi ma been Béd zian dxel rëb anjl guin:

—¡Gojt xcajpil, tanal naj!

⁹ Laa barii gajc Béd nalaman anjl guin, per ad ragbeetaman bal diidxli naj ni cayüjn anjl guin, gunaladxaman cane'xhchaalzaman.

¹⁰ Abi' gudëd reeman loj tibcwaa ree suldad guin, dxel gudëd reeman loj stibcwaa reeman. Chi bidxin reeman ro' portguib ni rarii runejz guin, dxel xtijbzán bixal abi' barii reeman. Abi' chi bidxin reeman tijb xquin, yagaj basa'n anjl guin Béd.

¹¹ Dxel gogbee Béd guial ni diidxliqui naj ni cazajcaman, abi' rëbaman:

—Yanri ma ragbeen guial guxhaal xi anjl Dios persi babëëman naj loj Herodes, con loj gra ni nüjnnë ree bën Israel naj.

¹² Chi bayagbee Béd ni guzacaman, dxel baguiajman lidx Li, xniaa Waj, bën la gajc Marcw, lod riga' zien ree bejn cabejdx canab reeman Dios.

¹³ Chi gulajw Béd ro' port, dxel brii tijb biin la Rode ziquiaam chunin.

¹⁴ Per chi bayünbeem cha' Béd, dád babaam, dxel luar nixhialim ro' port guin, baxüünm bicojnm guial za' Béd ro' port guin.

¹⁵ Abi' rëb reeman lojm:

—¡Rajc guijquíl!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

¹⁶ Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman.

¹⁷ Abi' been Béd sen loj reeman din yacwëëz ro' reeman, dxel beman diidx xhienaag babëe Dios laaman ladxguib. Abi' rëbaman loj reeman:

—Gol be ni guie loj Jacob në loj gra ree bën rliladx Jesucrist.

Dxelri briiman yagaj zëman lood ren.

¹⁸ Chi bareguiaal, ad radxejlt xhie güün ree suldad guin guial ad ragbeet reeman xhienaag barii Béd ladxguuib guin.

¹⁹ Dxel gunabee Herodes chigdiil reeman Béd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

Güjt rey Herodes

²⁰ Balen Herodes bèn Tiro nē ree bèn Sidón, per baya'n ree bèn guin diidx din chigdeenē reeman laaman. Chi been reeman gan guneenē reeman bèn brii laj Blasto zagdxe, tijb bèn naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zēēd ni raw reeman.

²¹ Bazuj Herodes xhie dxej guinieenēman laa reeman abi' dxej zii gojt xab zagdxeman, gurej loj xyagxhilaman lod rniabeeman, zianz guzuloj guneenēman laa reeman.

²² Dxel guzuloj gurixdiaj ree bèn guin, rēb reeman:

—iAd bejntan canee, tijb diosan!

²³ Loj hor zii gajc badēē tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxe luar nuza't reeman Dios zagdxe.

²⁴ Per xtiidx Dios care'chzi care'chan gra ladczi abi' gra ladczi cayajcxhieje ree bèn rliladx laaman.

²⁵ Chi ma badēēd ree Bernabé con Saulo ni guxhaal ree bèn Antioquía, dxel baza reeman Jerusalén, binē reeman Waj, bèn la gajc Marcw.

13

Guzuloj Bernabé con Saulo bigtie'ch reeman xtiidx Dios

¹ Loj ree bèn rliladx Jesucrist, bèn zojb ree Antioquía, no'ch ree bèn rudēēd xtiidx Dios loj ree bejn nē ree bèn rulüü xtiidxaman. La reeman Bernabé, Simón bèn rniee reeman Benya's, Lucio bèn Cirene, Saulo con Manaén bèn guni'snē Herodes tijbzi, bèn gunabee Galilea.

² Tijb dxej chi naba'n reeman, la'tgaj cabejdx canab reeman cuza't tēē reeman Dios zagdxe, rēb xSprijt Dios loj reeman:

—Gol bacaabee Bernabé nē Saulo din güün reeman dxiin rēnan güün reeman.

³ Chi gulox guba'n reeman gurejdx tēē reeman Dios, dxel guxhoob yaa reeman guijc Bernabé con Saulo din gagnē Dios laa reeman abi' bazaadiidxnē reeman laa reeman.

Bernabé con Saulo wej reeman Chipre

⁴ XSprijt Dios naj bèn guxhaal Bernabé con Saulo, zē reeman Seleucia, ni guyu reeman loj barcw, zē reeman yuj la Chipre, ni riga' loj nijsdoo.

⁵ Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lēn ree xyadoo ree bèn Israel. Nē Waj binē reeman din güünman laa reeman yudar.

⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bèn Israel laman Barjesús, rajcaman guialbidxaa, rusquieeman bejn ree, rēbaman guial laaman naj bèn rudēēd xtiidx Dios loj ree bejn.

7 Barjesús guin rnieenëman Sergio Paulo zagdx, bën naj gobernador Chipre, rignia' da'taman. Gurejdx gobernador guin Bernabé con Saulo guial rënman gucaagdiajgaman xtiidx Dios.

8 Per bënbidxaa guin (con diidx grieg laman Elimas) guyënman nudxoonman guial nililadx Sergio Paulo xtiidx Dios.

9 Abi' Saulo, bën la gajc Pab, rniabee xSprijt Dios luxdooman guidiblagaa, baguiaadixjchaman loj bënbidxaa guin,

10 rëbaman:

—ixi'n xindxab lüj, ganax rusquieel, ganax niguijdx rüjnl, ad rëntczil ni zagdx! ¿Xt goc gudëel mod chinal ree bejn xnejz nali Dios?

11 Yan gudëed Dios lüj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcayj Elimas abi' ad gojctri nuguaaaman, dxel raguiilaman chu guiniaaz yaaman guial ad rajctri ruguaaaman.

12 Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

Bidxin Pab con Bernabé niz Pisidia

13 Chi ma gudëd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panfilia. Ni basa'n Waj laa reeman bayejcaman Jerusalén.

14 Dxel barii reeman guiedx Perge, zë reeman luguiedx Antioquia ni riga' niz Pisidia. Abi' dxej raziiladx ree bën Israel, guyu reeman lën xyadoo ree bën Israel zianz gurej reeman.

15 Dxel chi gulox biil bën biil tib lajt loj libr bacaa Moisejs në loj libr bacaa ree bën badëe xtiidx Dios loj ree bejn, gunee ree bën rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bën riga' guie din gudëedi consejw loj reeman, zajc guiëbidan yan.

16 Dxel guzuli Pab, beenman sen loj reeman din yacwëez ro' reeman, dxel rëbaman:

—Bën Israel, në gra ree bën rdxeb Dios, gol bacaagdiajg:

17 Dux Dios ree, nayajc ree bën Israel, gulejman dux bëngulal ree abi' laaman been persi gojcxhieje reeman, chi sta zojb reeman zi'c benzit niz Egipto. Dxel con xgualrniabeeman babëëman laa reeman Egipto.

18 Abi' baslejnguijcaman laa reeman loj tiuu ijz ni guzu reeman niz lod naj ganax yujbidx,

19 banijt tëëman gajdx ree nacion ni gure Canaán persi badëëman guidxliuj guin ree loj dux bëngulal ree.

20 Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bën badëed xtiidx Dios loj ree bejn gojc xjuejs bigra reeman.

21 Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bën zëed loj xdiaa Benjamín persi gunabeeman laa reeman tiuu ijz.

22 Chi bisüd Dios rey Saúl, dxel bazujman rey Davi. Abi' rëbaman: “Ma baguian guial Davi xi'n Isaí, nabanx zi'c rënan, güün tëëx cumplid da diidxan guial güünx gra zi'c rënan.”

23 Abi' yan zi'c gajczi rëb Dios, loj gajc xdiaa rey Davi, brie Jesús bën guxhaalaman din yabëëman bën Israel ree loj dol.

24 Chi gad Jesús gui't, Waj bèn baroobnijs bejn ree, bagojnman gra ree bèn Israel guial rayal yayüjn reeman xgab por xtol reeman tiobnijs tée reeman.

25 Chi ma zidyob yadiblagaa xguialnaban Waj, dxel rëbaman: “Ad najtan bèn naladxidi, qui gui'traman, laaman mazri lasajc guial lon, ni'quid rayalt gaxhiecna xgurechaman.”

26 'Yan, dugra ree nayajc ree xdiaa Abraham nè gra los demazri ree bèn rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol.

27 Per ree bèn Jerusalén con ree xguxtis reeman ad bayagbeet reeman Jesús. Ad gogbee téeet reeman xhie rën guiëb xtiidx Dios ni bacaa ree bèn badëë ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios.

28 Abi' majsi achetczi xtol Jesús guyu, per ni'czi zian rëb gajc reeman loj Pilato guial nabeeman guiëtaman.

29 Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman.

30 Per Dios basban laaman,

31 dxel loj zien dxej balüülojman loj ree bèn binë laaman chi briiman niz Galilea zëman Jerusalén, abi' yan laa reeman naj bèn rniee por laaman loj ree bejn.

32 'Zeel caygojnna lëjt diidxza'c guin ree, guial promejs been Dios loj ree dux béngulal ree,

33 ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nana abi' diizd yan ma rajpil guialrniabee zi'cgajc naj.”

34 Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj günle' lëjt zi'c benan promejs loj Davi.”

35 Abi' rëb tée stib lajt loj xtiidxaman: “Ad zatiëjbtli xhin xcuerp xi'nl, bèn naya nali.”

36 Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman.

37 Per xcuerp Jesús bèn basban Dios, ad guxintan.

38 Zeel caygojnna lëjt compniar din gagbeedi guial por laaman ma yu' perdon par dux tol ree.

39 Graczi bèn riladx Jesucrist ma gojc perdon gra xtol reeman ni ad gojct njajc perdon por ley badëë Dios loj Moisejs.

40 Zeel gol gojp cudad chitëë saquidi zi'c bacaa ree bèn badëë xtiidx Dios loj ree bejn, lod rëb:

41 Gol bacaagdiajg, lëjt bèn ruze' ree da diidxan,

gol badxalojdi gol gunidloj tée.

Din loj ree dxej nabandi gün reen ni xt ni'quid zaliladxtidi, majsi chu na laa reen lojdi.

42 Chi barii Pab con Bernabé lën xyadoo ree bèn Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zij.

43 Chi barii ree bèn guin lën yado guin, zien da't reeman binal Pab con Bernabé, zi'c ree bèn Israel zi'c ree bèn ad najt bèn Israel, bèn rën ree Dios

zi'cgajc ree b́en Israel. Abi' r̀eb Pab con Bernab́e loj reeman din sudxi'ch reeman loj nejz zagdx e guredx Dios laa reeman guial r̀enman laa reeman.

44 Chi bidxin dxej ni raziiladx ree bejn, gra b́en luguiedx guin bado'p din gucaagdiaj reeman xtiidx Dios.

45 Per chi baguiaa ree b́en Israel zien da't ree bejn riga' yagaj, dxe l guyu guialnadẽdloj luxdoo reeman abi' guzuloj canee guijdx reeman canee tẽẽ reeman diidx guijdx loj Pab.

46 Dxe l sin guialrdxeb badxi' Paban con Bernab́e loj reeman, r̀eb reeman:

—Yaloj l̀ejt rayal yagojnan xtiidxza'c Dios, l̀ejt najdi b́en Israel, per yan ad r̀entidi gucaagdiajguidi laan, dxe l l̀ejt gajc culiũũ guial ad zajct yayalidi guialnaban tiblyaa con Dios. Yan ma yugtie'chan diidxza'c guin ree loj ree b́en ad najt b́en Israel.

47 Din zian gunabee dux Dad ree Dios dunujn, chi r̀ebaman tib lajt loj xtiidxaman:

Nuzun l̀uj zi'c guij par gra ree nacion, din chel guidibchicniaa loj guidxliuj chicojnl xhienaag gac ree bejn perdon.

48 Chi biguiejn ree b́en ad najt b́en Israel zian, dxe l babaa reeman, guzuloj r̀eb reeman guial zagdx e naj xtiidx Dios, abi' graczi b́en ma naj yayal guialnaban tiblyaa con Dios, bililadx reeman xtiidxaman.

49 Zianan zeel hire'ch xtiidxza'c Dios guidib niz ni.

50 Per ree b́en Israel batiaalguiiw reeman b́engunaa rej ree laydoo zianczi naj tẽẽ reeman b́en zobjloj luguiedx zii, nẽ ree xinguaaw naj gajc xin zobjloj, din sunal reeman Pab con Bernab́e xt yabẽẽ reeman laa reeman ni.

51 Dxe l Pab con Bernab́e gudxijp guxyuj guia' reeman zi'c tijb sen guial ad bazoobt ree b́en guin diidx, dxe l zẽ reeman Iconio.

52 Per ree b́en bililadx Jesũs niz ni, ma rniabee xSprijt Dios luxdoo reeman guidiblagaa abi' dád rabaa reeman.

14

Bidxin Pab con Bernab́e Iconio

1 Luguiedx Iconio, Pab con Bernab́e guyu reeman l̀en xyadoo ree b́en Israel. Abi' zi'c balũũ reeman xtiidxza'c Jesucrist, zien da't reeman bililadx, zi'c ree b́en Israel zi'c ree b́en ad najt b́en Israel.

2 Per ree b́en Israel ad bililadxt batiaalguiiw reeman b́en ad najt ree b́en Israel persi guzuloj been reeman xgab mal por ree b́en rililadx Jesucrist.

3 Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rililadx reeman Jesucrist, laaman badẽẽd guialrniabee loj reeman persi been reeman zien da't ree milagr nẽ mazri ree ni ren, persi balũũ Jesucrist guial diidxli naj ni r̀eb reeman xcwent Dios.

4 Per ree b́en luguiedx zii gojc reeman tio'p lala', garol reeman guzunẽ ree b́en Israel zagarol reeman guzunẽ apóstoles guin ree.

5 Dxe l zi'c ree b́en Israel zi'c ree b́en ad najt b́en Israel, baya'n reeman diidx con ree guxtis din tilẽ reeman Pab con Bernab́e gucaaguij tẽẽ reeman laa reeman.

6 Abi' chi gogbee Pab con Bernab́e zian, laa zia gajc reeman Listra con Derbe, guiedx riga' ree niz Licaonia, nẽ gra ree guiedx riga' niz ni,

7 gunee reeman xtiidxza'c Jesucrist.

Bacaaguij reeman Pab Listra

⁸ Luguiedx Lистра guyu tijb xinguaaw ad rajct rza, ad guzatzcix guial naxin guia'x diisd chi golix abi' zobjix

⁹ cucaagdiajguix ni rëb Pab. Chi baguiaa Pab laax, gogbeeman guial rliiladxix par yayajquix.

¹⁰ Abi' guneeman rejs, rëbaman:

—¡Bisu, guzuli zagdxe!

Loj hor zii gajc gutiajs xin guin, guzulix abi' guzuloj cazax.

¹¹ Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

¹² Abi' rëb reeman guial Bernabé naj dios Júpiter, guiáad Pab naj dios Mercurio guial laaman naj bën rniee loj reeman.

¹³ Abi' ro' guiedx guin niz lod ru bejn naj xyadoo Júpiter, dxel bixhioz yu' lën yadoo guin binëman go'n ree con ree guiaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman.

¹⁴ Per chi gogbee Pab con Bernabé zian, gudixya' xab reeman, guzëeb reeman lað ree bën guin, rbixdiaj reeman rëb reeman:

¹⁵ —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zianclan zio'pan din yanan lojdi din yasa'ndi ni rüjndi, din achetctzi lasajc reen. Mejorli gol binal xnejz Dios naban, bën been xanyabaa në guidxliuj nëtëe nijsdoo con gra ni yu' loj reen.

¹⁶ Tiamp gual Dios baslaa been ree bejn ni guyëntzi reeman.

¹⁷ Per ni'czi zian, zianczi balüüman chu najman por ree ni zagdxe ni rüjnman. Din laaman naj bën razaladx guia con guialnaza'c abi' razaladxaman ni radaaw ree din chu' du luxdoo ree zagdxe.

¹⁸ Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

¹⁹ Per bëlzi ree bën Israel zobj Antioquía në Iconio, chi bidxin reeman luguiedx Lистра been reeman gan batiaalguiiw reeman bën luguiedx guin ree. Dxel bacaaguiaj reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin.

²⁰ Per chi bido'p ree bën rliiladx Jesucrist gadëd lod naga'man, dxel bixcheman, bayuman luguiedx guin stjib. Chi bareguiaal briinëman Bernabé zë reeman luguiedx Derbe.

²¹ Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Lистра në Iconio nëtëe Antioquía.

²² Luguiedx zii ree badxe' reeman luxdoo ree bën rliiladx Jesucrist. Rëb reeman loj reeman din sudxi'ch reeman loj ni rliiladx reeman laaman, din dáð sagdiaj reeman din yayu reeman lod rniabee Dios.

²³ Abi' tëe loj tijb gaj ree guiedx guin bacaabee reeman bengol nabee ree loj ree bën rliiladx Jesucrist. Zianz chi gulox guba'n reeman gurejdx tëe reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴ Chi baza ree Pab con Bernabé niz Pisidia, bidxin reeman niz Panfilia.

²⁵ Abi' gunee reeman xtiidx Dios luguiedx Perge, dxel zë reeman guiedx Atalia.

²⁶ Ni guyu reeman loj barcw zë reeman Antioquía, luguiedx lod basa'n ree los demazri ree bën rliiladx Jesucrist laa reeman con Dios din gagnëman Pab con Bernabé din guitie'ch reeman xtiidxaman. Abi' dxiin guin naj ni ma baloox reeman.

²⁷ Dxel chi bidxin reeman Antioquía, bato'p reeman bën rliiladx ree Jesucrist, persi be reeman diidx loj reeman gra ni been Dios con laa reeman, xhie tēë naag guxhalaman nejz din chililadx ree bën ad najt bën Israel Jesucrist.

²⁸ Ni guzu Pab con Bernabé xchej, guzunë reeman bën Antioquía rliiladx ree Jesucrist.

15

Guyu gabilt Jerusalén

¹ Lën ree dxej zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliiladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon.

² Dxel Pab con Bernabé dád zro' gudijldiidx reeman con ree bën guin. Dxel bacaabee ree bën rliiladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bën rliiladx Jesucrist din guguaa reeman xhienaag güün reeman xcwent sen guin.

³ Abi' badxe'nejz ree bën Antioquía rliiladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bën rliiladx ree Jesucrist, bën zojb ree niz ni guial ma rliiladx ree bën ad najt ree bën Israel xtiidx Dios. Abi' graczi bën ma rliiladx Jesucrist niz ni, dád babaa reeman chi biguiejn reeman zian.

⁴ Chi bidxin Pab con Bernabé Jerusalén, dxel baca' ree bën rliiladx Jesucrist laa reeman, con ree apóstoles, con ree bengol rniabee loj ree bën rliiladx Jesucrist. Abi' be ree Pab diidx con Bernabé gra ni been Dios con laa reeman.

⁵ Per yu' ree bënfarisew ma rliiladx Jesucrist, guzuli reeman abi' rëb reeman: —Bën ad najt ree bën Israel abi' ma rliiladx reeman Jesucrist, rüjn naguiejn chu' reeman sen ru ree bën Israel, gagbee tēë reeman guial rayal chinal reeman xley Moisejs.

⁶ Dxel bado'p ree xi apóstoles Jesús con ree bengol rniabee loj ree bën rliiladx Jesucrist din guidoon xhienaag güün reeman.

⁷ Guial tant canee reeman por zian, dxel guzuli Bëd, rëbaman loj reeman: —Gradi compniar raliduladx ree Jesucrist, lëjt ragbee guial diidx gocli gulej Dios naj lojdi din chigenen xtiidxza'c Jesucrist loj ree bën ad najt bën Israel din chililadx reeman laaman.

⁸ Abi' Dios bën nünbee luxdoo graczi ree bejn, balüüman guial naj reeman xbejnman guial ma badëëd xSprijtaman loj reeman zi'cgajc baneeman du loj ree.

⁹ Zi'c ruguaa Dios dunuj ree ziangajc ruguaaman laa reeman, din zi'c basiaman du luxdoo ree ziangajc basiaman luxdoo reeman guial ma rliiladx reeman Jesucrist.

¹⁰ Yan, ¿chexc zeel ad ridxga'tidi ni ma been Dios abi'za rniabeedi chinal ree bën rliiladx Jesucrist ley ni ni'qui dunuj ree ni'qui dux bëngulal ree ad gojct naguieen ree zi'c rniabee ley guin?

¹¹ Dunuj ree rayagbee guial por ni zagdxe ni been Dad Jesucrist, been Dios dux tol ree perdon zi'cgajc laa reeman.

12 Dxel bacwëez ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree bën ad najt bën Israel.

13 Chi gulox gunee reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg:

14 Simón Bëd be diidx duloj ree xhienaag guzuloj gulej Dios bën ad najt ree bën Israel din gac reeman xbejnman.

15 Gra ni ma gojc naj zi'c ni bacaa ree bën badëë xtiidx Dios loj ree bejn loj xtiidxaman lod rëb:

16 Chi ma gojc zian,

yayünxhiey ree da bejnan mazri zi'c goc chi naban Davi,

gacxhiey reeman por ree bën sta naban,

zi'c guban ree bejn xtiamp Davi

abi' por laa reeman yayajcxhiey ree da bejnan.

17 Din yaguiil ree los demazri ree bejn guial guiën reeman naj,

gra ree bën nacion ren, yaguiil guial guiën reeman naj,

bën ma gule reen din gac reeman da bejnan,

bën guiguiejn ree guza't ree bejn naj.

18 Zian na Dios, bën cugojn bejn ree gra ree nine diizd tiamp gulal.

19 'Zeel naladxan ad rayalt chu güün naguiejn bën ad najt ree bën Israel par chinal reeman ley, laa reeman guial ma basa'n xcostumbr reeman par chinal reeman xnejz Dios.

20 Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët sunë reeman ben ren bën ad najt lacheel reeman, ad rayalt gaw reeman bëël rberejn ni'qui rejn.

21 Zian yaguie'ch ree loj reeman, din diizd tiamp gulal tijb gaj guiedx yu' bën rulüü laa reeman xhie rën guiëb xley Moisejs ni rool reeman lën ree yadoo dxej raziiladx ree bejn.

22 Dxel apóstoles guin ree con ree bengol rniabee loj ree bën rliladx Jesucrist, con los demazri ree bën rliladx Jesucrist, rëb reeman gucaabee reeman bën guixhiaalnë reeman Pab con Bernabé din che reeman Antioquía. Abi' bacaabee reeman Judas, bën la gajc Barsabás, në Silas, laa reeman rajp guialrniabee loj ree bën rliladx Jesucrist.

23 Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree bën rliladx laaman, në los demazri ree bën rliladx laaman. Ragajpdiozan lëjt bën ad najt ree bën Israel, per nayajc ree compniar raliduladx ree Jesucrist, lëjt zobjidi Antioquía, në los demazri ree bën zobj ree niz Siria nëtëë niz Cilicia.

24 Ma bayagbeen guial yu' ree bën duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güüdi guial na reeman lojdi rayal chu'di sen ni ru ree bën Israel güün tëëdi zi'c rniabee xley Moisejs, per ad dunujtan baxhaal laa reeman.

25 Zeel bado'pan abi' raguie'chan guial zagdxë naj yacaabee bëlzi dux compniaran din guidganaj reeman lëjt, guidnë tëë reeman tio'p dux compniaran, Bernabé con Pab, bën rayën da'tan.

26 Zien ree ni guijdx cuchaagloj reeman guial cayüjn reeman sirv loj Dad Jesucrist.

27 Dxel cayxhaalnë'n laa reeman Judas con Silas, laa reeman na lojdi gra con quijb xtiidx reeman.

²⁸ Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güündi, ni rayalzí cu'guijquidí naj guial,

²⁹ ad gawidi xbëël ree be ni rbe'c ree bejn loj ni naj xdios reeman, ad gaw tëedi bëël rberejn, ni'qui rejn, ad sunëdi ben ren bën ad najt lacheelidi. Bal gapidi cudad ad züjntidi gra ree nine, zagdxequi güündi. Gagnë Dios lëjt.”

³⁰ Zian gojcan, gui'ch guin naj ni guxhaalnë reeman guidap ree bën guin par luguiedx Antioquía. Ni bato'p reeman bën rliladx ree Jesucrist abi' bayü reeman gui'ch guin loj reeman.

³¹ Chi biil reeman laan, dád nix guyu luxdoo reeman por ree diidx zagdx ni zëed lojn.

³² Abi' Judas con Silas guial nëgajc reeman rajp quiarguiejn par gudëed reeman xtiidx Dios, dxel zien naj ni guneenë reeman bën rliladx ree Jesucrist, bagu' reeman luxdoo reeman con xtiidx reeman.

³³ Chi ma gudëd zien dxej za' ree Judas con Silas ni, bazaadiidxnë ree bën rliladx Jesucrist laa reeman din yaguiaj reeman lod za' ree bën guxhaal laa reeman, rëb reeman loj reeman: “Chignë Dios lëjt zagdx.”

³⁴ Per Silas beenman xgab baya'nman ni mazri.

³⁵ Abi' Pab con Bernabë baya'n reeman Antioquía mazri, laa reeman con ree ben ren basnuu balüü reeman gutie'ch tëe reeman xtiidxza'c Jesucrist loj ree bejn ni.

Ni barojp volt brii Pab biglüüman xtiidx Dios guiedx ren ree

³⁶ Chi gudëd tio'p choon dxej, dxel rëb Pab loj Bernabë:

—Yo' stijb yugnaj dux compniar ree bën rliladx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

³⁷ Bernabë guyën ninë reeman Waj, bën la gajc Marcw.

³⁸ Per Pab ad cwëjbt ninë reeman laaman, din chi we reeman niz Panfilia guro'nladxaman laa reeman, ad binëtraman laa reeman.

³⁹ Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binë Bernabë Marcw, guyu reeman loj barcw zë reeman yuj la Chipre ni riga' loj nijsdoo,

⁴⁰ dxel gulej Pab Silas din chinëman laaman abi' rëb los demazri ree bën rliladx Jesucrist loj reeman guial chinë Dios laa reeman zagdx.

⁴¹ Zianz gudëd reeman niz Siria në niz Cilicia, ragu' reeman luxdoo ree bën rliladx Jesucrist niz ni.

16

Bine ree Pab con Silas Timoteo

¹ Chi bidxin Pab con Silas guiedx Derbe në guiedx Lистра abi' Lистра bidxaagloj reeman tijb bën rliladx Jesucrist, laman Timoteo, xniaaman naj bën Israel, nëman rliladx Jesucrist guiáad xdadaman naj bën grieg.

² Graczi ree bën rliladx Jesucrist, bën zojb ree guiedx Lистра në Iconio ruza't laaman zagdx.

³ Dxel rëb Pab chinëman Timoteo, per yaloj badxe'man laaman sen ni ru ree bën Israel, chitëe xhie guiëe ree bën Israel riga' niz ni, din gra reeman ragbe guial naj xDadaman bën grieg.

⁴ Graczi ree guiedx ni gudëd reeman bagojn reeman bën rliladx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree bën rliladx laaman Jerusalén.

5 Zianan zeel guzudxi'ch ree b́en niz ni loj guialrliladx reeman Jesucrist, abi' guixie guixie gojcxhiey mazri ree b́en rliladx laaman.

Baliüloj tijb b́en Macedonia loj Pab

6 Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudédzinejz reeman niz Frigia në niz Galacia

7 abi' bidxin reeman niz Misia. Ni been reeman xgab niej reeman niz Bitinia, per ad cwéjb gajct xSprijt Dios niej reeman niz ni.

8 Dxelri gudédzinejz reeman niz Misia, bidxin reeman guiedx Troas.

9 Yagaj, guxhinzii guzajc Pab zi'c ruluü cane'xhchaalaman. Baguiaaman tijb xinguaaw zééd niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

10 Gulozzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj b́en cabejdx dunujn niz ni par yatie'chan xtiidxza'c Jesucrist.

Bidxin ree Pab con Silas Filipos

11 Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis.

12 Yagaj badxoon bio'n Filipos, guiedx mazri zojbloj niz Macedonia, per Rom rniabee guiedx zii, ni badxu'n b́elzi ree dxej.

13 Abi' tijb dxej raziiladx ree bejn, bariin luguiedx guin bio'n tijb ruguiwro', lod rayagbeen rado'p ree b́en Israel par cwedx reeman Dios. Abi' badxu'n baneen xtiidxza'c Jesucrist loj ree b́engunaa bado'p yagaj.

14 Tijb ree b́engunaa guin la Lidia, najman b́en Tiatira, ruto'man lajd zagdxe ni culor murad. Diidxli rdxebaman Dios abi' cucaagdiajgaman. Dios guxhal xquiargueijnman din gucaagdiajgaman zagdxe gra ni rëb Pab.

15 Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliladxidi guial ma rliladxan Jesucrist, gol baya'n lidxan.

Dxel beenman nagueijn baya'n nan lidxaman.

16 Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xinxab luxdoom, abi' por xguialrniabee xinxab guin rnieeya'm guiáad ree b́en guzii laam dád zro' milia rüjn reeman gan por dxiin guin.

17 Dxel bidnalim Pab con dunujn, rbidxa'm rëbim:

—Bén guie ree rüjn xchiin Dios yu' xanyabaa, laa reeman gugojn lëjt xhienaag gaquidi perdon.

18 Zien dxej da't beenm zian, xt chi balenya' Pab, dxel bayejcaman rëbaman loj xinxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xinxab guin luxdoom.

19 Per chi gogbee ree b́en guzii laam guial ad zajctri güünm gan milia par laa reeman, dxel gunaaz reeman Pab con Silas, biné reeman laa reeman roylay loj guxtis.

20 Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree,

21 abi' ruluü reex costumbr ree ni ad zatiëbt ree yaguieen ree ad zajc tëët yaguieen ree, din ben Rom dunujn ree.

22 Dxel wajs gra ree b́en guin contr laa reeman, abi' gunabee ree guxtis guin gulëë xab Pab con Silas din quin reeman laa reeman con var.

23 Chi gulox gudiyn da't reeman laa reeman, dxel bilu' reeman laa reeman ladxguuib abi' gunabee reeman b́en rajp ro' ladxguuib guin din gapdxi'chaman laa reeman.

24 Chi bigueijn b́en rajp ro' ladxguuib guin zian, dxel bilu'man laa reeman xt ĺen cuart bigra yu' ĺen ladxguuib guin, guxhiiman guia' reeman loj tabl naal con caden.

25 Per garol guiaal, la'tgaj cabejdx canab Pab con Silas Dios, cayool t́ee reeman cant par laaman, dxel cucaagdiajg los demazri ree b́en yu' ladxguuib guin.

26 Dxel tijbzi golp guzulog xudoxh, niz ni niz guie rurliá xcimiant ladxguuib guin. Loj hor zii gajc bixal gra ree xportan abi' baxiec ree caden naxii gra ree b́en yu' ĺenan.

27 Chi baban b́en rajp ro' ladxguuib guin abi' baguiaaman zojbyal gra ree xportan, guléé xi espadaman din nugj́t laagajcaman guial gunaladxaman gra ree b́en yu' ladxguuib guin ma baxúün.

28 Dxel gurixdiaj Pab, ŕebaman lojman:

—Ad güünnaa lúj gajc, laa dugran nadxu' guie.

29 Laa gunab gajc b́en guin tijb guij, dxel ruxúünman guyuman, rnijman guial rdxebaman, bigzuxibaman loj Pab ńe loj Silas.

30 Dxel babéeman laa reeman, gunabdiidxaman loj reeman, ŕebaman:

—Dad, gol guna, ¿xhie rayal günan din güün Dios naj perdon?

31 Badxi' reeman laan, ŕeb reeman:

—Bililadx Dad Jesucrist, zian gaquil perdon con xfamilil.

32 Abi' be reeman xtiidx Dios lojman con loj gra ree b́en zojb lidxaman.

33 Zianz guxhin zii gajc gudiibaman lod nadxeelguijdx reeman, dxel gurobnijsaman con gra xfamilaman.

34 Abi' bignéman laa reeman lidxaman, dxel badéeman ni gudaw reeman. Guiaad laaman dád nix yu' luxdooman con gra xfamilaman Guial ma rililadx reeman Dios.

35 Chi bareguiaal, guxhaal ree guxtis guin suldad ree persi biguiedx reeman loj b́en rajp ro' ladxguuib guin guial guslaaman Pab con Silas.

36 Abi' ŕeb b́en rajp ro' ladxguuib guin loj Pab:

—Ma na ree guxtis guial guslaan ĺejt. Yan ma zajc yaguaiajdi ad chu'di xgab.

37 Per ŕeb Pab loj ree suldad guin:

—Nayajcan quijb ben Rom abi' gudiyn reeman dunujn delant loj ree b́en guiedx, ni'quid baneet reeman mod nadéedan cwent loj reeman con badxe' reeman dunujn ladxguuib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgaléé reeman dunujn.

38 Abi' bicojn ree suldad guin guxtis guin ree zian, dxel dád bidxeb reeman chi bigueijn reeman guial ben Rom naj Pab con Silas.

39 Dxel wej reeman bignab reeman perdon loj Pab con Silas babéé t́ee reeman laa reeman, ŕeb reeman loj reeman din yaza reeman luguiedx guin.

40 Chi barii reeman ladxguuib, wej reeman lidx Lidia. Zianz chi gulox guneené reeman los demazri ree b́en rililadx ree Jesucrist din chu' luxdoo reeman sudxi'ch reeman loj ni rililadx reeman, dxel baza reeman.

17

Bidxin ree Pab con Silas Tesalónica

1 Chi zé Pab con Silas, gudéd reeman niz Anf́ipolis ńe niz Apolonia zianz bidxin reeman luguiedx Tesalónica lod yu' tijb xyadoo ree b́en Israel.

² Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios.

³ Bagojnman balüü tēëman laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

⁴ Yu' ree bën Israel guin bililadx abi' bachajg reeman Pab con Silas. Në zien ree bën grieg rën Dios bililadx, nëtëë zien ree bëngunaa zojbloj bililadx Jesús.

⁵ Per ree bën Israel ad bililadxt Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx guin, abi' guyu reeman lidx Jasón, raguiil reeman Pab con Silas din cwëë reeman laa reeman guzuj reeman laa reeman loj ree bën guiedx guin.

⁶ Per guial ad badxejlt reeman laa reeman yagaj, dxel guxoobyuj reeman Jasón në ree ben ren bën rliladx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie,

⁷ abi' lidx Jasón zojb reex. Laa reex con gra ree bën nuchajg laa reex, ad caylujnt reex zi'c rniabee xley rey César, din rëb reex guial yu' zatijb rey la Jesús.

⁸ Chi biguiejn ree guxtis guin zian con ree bejn, gra loj xgab been reeman.

⁹ Per Jasón con los demazri ree bën guyu ladxgüiib guin gudijx reeman loj ree guxtis guin, dxel baslaa reeman laa reeman.

Bidxin Pab con Silas Berea

¹⁰ Guxhinzii gajc, guxhaal ree bën rliladx Jesucrist Pab con Silas luguiedx Berea. Chi bidxin reeman ni, wej reeman lën xyadoo ree bën Israel.

¹¹ Mazri benza'c naj ree bën Israel guin guial loj ree bën Israel zojb Tesalónica. Con gan bacaagdiajg reeman ni rëb Pab. Abi' guixie guixie rusiid reeman xtiidx Dios, din gagbee reeman waliqui ni rëb Pab ya.

¹² Zeel dád zien reeman bililadx Jesucrist, nëtëë zien bën grieg bililadx laaman zi'c ree xinguaaaw zi'c ree bëngunaa zojbloj niz ni.

¹³ Chi gogbee ree bën Israel zojb Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguuiw reeman bejn ree din guidxe'ch reeman Pab.

¹⁴ Per ree bën rliladx Jesucrist ad goglaat reeman, laa guxhaal gajc reeman Pab niz ro' nijsdoo. Guiáad Silas con Timoteo baya'n reeman mazri Berea.

¹⁵ Abi' ree bën biglu'nejz Pab, xt Atenas binë reeman laaman. Chi baza reeman ni, bignë reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶ La'tgaj cabëë Pab guidxin Silas con Timoteo luguiedx Atenas, guyunayaman guial baguaaman zien da't ni rajp ree bejn niz ni zi'c dios.

¹⁷ Zeel wejman lën xyadoo ree bën Israel bigneenëman laa reeman në los demazri ree bën rën Dios zi'c ree bën Israel, guixie guixie rnieenëman chutëëz bën rdxaaglojman niz galay guiedx guin.

¹⁸ Guneenë tēëman garol ree bën zinal ni balüü bën brii laj epicureo, në za garol ree bën estoicos. Abi' yu' reeman rëb:

—¿Xhienin rniee xin guin zeel rniee da'tix?

Yu' tēë reeman rëb:

—Rulüü xtiidx dios ren ree bën ad naguieenbeet ree catie'chix.

Rëb reeman zian guial caneenë Pab laa reeman xtiidzxa'c Jesucrist në xcwent guial babanman stijb.

¹⁹ Dxel binë reeman Pab tijb luar la Areópago, lod rado'p reeman. Abi' gunabdiidx reeman lojman, rëb reeman:

—¿Zajc nal ya xhie ree nicüb guin zidgalüül niz guie?

²⁰ Din rül diidx du lojn ni ad rayagbeetan, zeel rayënan yayagbeen xhie rën guiëban.

²¹ Graczi ree bën Atenas, con los demazri ree benzit zojb ni, zianczi za' reeman zian. Ruladx reeman téd reeman dxej, gucaagdiajg reeman o gü reeman ni naj ree nicüb.

²² Dxel guzuli Pab galay reeman lod la Areópago, rëbaman:

—Bën Atenas, por graczi ni ma baguian, ma gogbeen guial dád zien ree xdiosidi.

²³ Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rëb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

²⁴ 'Dios guin been guidxliuj con graczi ni yu' lojn, laaman rniabee xanyabaa në loj guidxliuj. Ad za'taman lën yadoo ni rüjn ree bejn.

²⁵ Ad riaadx tētaman chu güün xhienin par laaman, din laaman naj bën razaladx bi nabajnnë' ree, laaman razaladx guialnaban duloj ree në ree ni rayaadx ree.

²⁶ 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tēë cwe reeman.

²⁷ Din yaguiil reeman Dios majsi zi'c chi rgan bejn chi raguillaman xhienin, zian güün reeman din yadxejlanan. Majsi diidxliczi ad zijtt za'man par gra bejn.

²⁸ Din por Dios nabajn ree, por laaman raniib ree radxoo tēë ree, por laaman nadxu' ree loj guidxliuj. Zi'c rëb tēë ree xbénrignia'di, chi rëb reeman: “Dunuj ree nayajc xi'n Dios.”

²⁹ Zeel bal nayajc ree xi'n Dios, ad rayalt yaguieen ree xgab guial Dios najnë or, o plajt, o guiaj ya zi'c naj ni rüjn ree bejn zi'c naj xixgab reeman.

³⁰ Tiamp gualal cwëjb Dios been ree bejn zi'c naladx reeman guial achetdzi ragbee reeman, per yan gra ladczi canabeeman gra ree bejn din yayüjn reeman xgab por xtol reeman.

³¹ Din Dios ma gulej tijb dxej ni yadëed ree bejn cwent lojman, dxej ni güün xgualguxtisaman. Ma gulej tēëman Jesucrist din güünman gualguxtis guin, abi' din guiguien guial gulejman laaman par zian, basbanman laaman chi gütaman.

³² Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tēë reeman rëb:

—¿Zatijb dxej yasnuu yacaagdiajgan ni canal!

³³ Dxel baza Pab lod za' reeman.

³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zojbloj lën Areópago laman Dionisio, në stijb béngunaa la Dámaris në ree ben ren.

18

Bidxin Pab Corinto

¹ Dxel brii Pab Atenas zëman Corinto.

² Yagaj bidxaaglojman tijb bén Ponto laman Aquila, zëédaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bén Israel Rom. Dxel wej Pab bitixlojman laa reeman.

³ Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin.

⁴ Abi' beegaj dxej raziiladx ree bén Israel, rej Pab rigneeman xtiidx Dios lën xyadoo ree bén Israel, zi'c ree bén naj ree bén Israel zi'c ree bén ad najt bén Israel raguuilaman mod din chililadx reeman ni rëbaman.

⁵ Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios guneeman loj ree bejn, balüü tëëman bén Israel ree guial Jesús naj Cristo bén cabëz reeman.

⁶ Per guzuloj bidxe'ch reeman Pab abi' gunee reeman diidxguijdx contr laaman. Dxel gudxiyp xabaman zi'c tijb sen guial ad ruzoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bén ad najt bén Israel.

⁷ Dxel bariiman lën yadoo guin wejman lidx bén la Justo, rën bén zii Dios, gajxh gajc yadoo guin naj lidxaman.

⁸ Abi' Crispo, tijb bén rniabee lën xyadoo ree bén Israel, bililadxaman Dad Jesucrist con gra xfamilaman. Në zien ree bén Corinto bililadx chi biguiejn reeman xtiidx Jesucrist abi' gurobnijs reeman.

⁹ Tijb guxhin balüüloj Dios loj Pab, rëbaman lojman:

—Ad rdxebil, basnuu gunee da diidxan, ad gucwëëzil,

¹⁰ naj za'në' lüj, achutczzi zajc güün lüj xhienin, din luguiedx guie zien da't bejn naj par naj.

¹¹ Zianan zeel baya'n Pab Corinto tibijz garol, balüüman bén guin ree xtiidx Dios.

¹² Per chi goc Galión gobernador Acaya, bén Israel ree bachajg lasa' reeman persi gunaaz reeman Pab binë reeman laaman loj gobernador guin,

¹³ rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

¹⁴ Ma niniee Pab, chi gunee Galión rëbaman loj ree bén Israel guin:

—Bal niajcan tijb falt o tijb gualquia narooob beenman zeel zidnëdi laaman, züncwentan lëjt.

¹⁵ Per najn por ree diidx në por laj ree bejn nëtëë por xleydi, zeel lëjt gajc gol gunaj xhienaag güüdi, ad rëntan günan gualguxtis xcwent ree ni guin.

¹⁶ Abi' laa babëë gajcaman laa reeman roylay guin.

¹⁷ Dxel yagaj gajc gunaaz gra reeman Sóstenes, bén rniabee lën xyadoo ree bén Israel abi' gudijn reeman laaman, per ni'quid beencwentt gobernador guin laa reeman.

Badxin Pab Antioquia

¹⁸ Zienri ree dxej baya'n Pab Corinto. Dxel bazaadiidx nëman los demazri ree bén rililadx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guiyc Pab, por tijb pomejs ni beenman.

¹⁹ Chi bidxin reeman Éfeso, ni basa'n Pab Priscila con Aquila, abi' wejman lën xyadoo ree bén Israel zojb ree ni, bigneenëman bén Israel rado'p ree lën yadoo guin.

²⁰ Abi' guyën reeman niaglaa Pab ni mazri, per ad cwëjbtaman.

²¹ Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso.

²² Chi bidxinman Cesarea, dxel wejman Jerusalén bicajpdiozaman bën riladx ree Jesucrist, dxelri zëman Antioquia.

²³ Chi ma gojc xchej za'man Antioquia, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bën riladx Jesucrist.

Gutie'ch Apolos xtiidx Dios Éfeso

²⁴ Tiamp zii bidxin tijb bën Israel luguiedx Éfeso, laman Apolos, gojlaman Alejandría. Dád radxejlaman diidx par guinieeman abi' dád rajcaman xtiidx Dios.

²⁵ Basiidaman xtiidx Dios, dxel con gan balüüman bejn ree, zagdxë tëë rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman.

²⁶ Abi' Apolos, sin gualrdxeb guzuloj caneeman xtiidx Dios loj ree bën Israel lën xyadoo reeman, zianz chi bigueijn Priscila con Aquila ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios.

²⁷ Chi been Apolos xgab cheman niz Acaya, gra ree bën riladx Jesucrist bën za'në laaman, badxe' reeman luxdoo din cheman, abi' guxhaal reeman tijb gui'ch loj ree bën riladx Jesucrist bën zojb ree niz Acaya din yaca' reeman laaman zagdxë chi guidxinman niz ni. Chi bidxinman niz Acaya dád beenman yudar bën ma riladx ree Jesucrist guial gognë Dios laa reeman.

²⁸ Din delant loj gra ree bejn rëbaman guial ad laat zë ree bën Israel, abi' achutzi gojc nadxi' xtiidxaman guial graczi ni rëbaman naj diidxli, balüü tëëman loj xtiidx Dios gra luar lod rëb guial Jesús naj Cristo bën gulëjz reeman.

19

Bidxin Pab Éfeso

¹ La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidxaaglojman bëlzi ree bën riladx Jesucrist.

² Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguejntan guial yu' xSprijt Dios.

³ Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

⁴ Dxel rëb Pab loj reeman:

—Walican baroobnijs Waj bejn, bën bayüjn ree xgab por xtol reeman. Per rëbaman guial rayal chilladx reeman bën zëëd xijchaman abi' laaman naj Jesús, bën naj gajc Cristo.

⁵ Chi bigueijn reeman zian, dxel gurobnijs reeman por Dad Jesús.

⁶ Abi' chi guxhoob yaa Pab guiç reeman, dxel guyu xSprijt Dios luxdoo reeman, zianz guzuloj canee reeman diidx ren ree. Dxel guzuloj cudëëd reeman xtiidx Dios loj ree bejn.

7 Loj gra reeman naj cost chiptio'p xinguaaw.

8 Choon bëew wej Pab lèn xyadoo ree bèn Israel zobj ni. Sin guialrdxeb guneenëman laa reeman xtiidx Dios, guneenëman laa reeman abi' beenman nagueijn din güünman gan chililadx reeman xhienaag naj xguialrniabee Dios.

9 Per garol reeman gojc nad ad guyënt reeman nililadx reeman, al guzuloj gune reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bèn ma rililadx Jesucrist, binëman laa reeman lèn tijb xzcuel bèn la Tiranno. Ni balüüman laa reeman guixie guixie,

10 loj tio'p ijz beenman zian. Abi' graczi ree bèn zobj niz Asia, zi'c ree bèn Israel zi'c ree bèn ad najt bèn Israel, bacaagdiajg reeman xtiidx Dad Jesucrist.

11 Abi' por xguialrniabee Dios been Pab milagr narooob ree,

12 xt ree xbay Pab në ree lajd rtia lojman zi'c lantar rignë reeman loj ree bènragxuu, abi' rayajc reeman guialguijdx ni rajc reeman, rarii tëë ree xindxab yu' luxdoo reeman.

13 Per guyu bëlzi ree bèn Israel ziza rabëë reeman xindxab luxdoo ree bejn, abi' guyën reeman nüjnnë reeman dxiin laj Dad Jesucrist dxel rëb reeman loj ree xindxab guin:

—iPor Jesús bèn ruza't Pab, rniabeen lëjt, gol barii!

14 Zian naj ni been gajdx ree xi'ngaan tijb bèn Israel la Esceva, bèn goc tijb bixhioz rniabee ree bixhioz.

15 Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tëën chunin naj Pab, per lëjt ni'quid nünbeetan lëjt.

16 Abi' bèn yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lënu guin, ziladzi reeman nadxeelguijdx tëë reeman.

17 Graczi ree bèn zobj Éfeso, zi'c ree bèn Israel zi'c ree bèn ad najt bèn Israel, gogbee reeman gojc zian, dxel dád bidxeb reeman abi' baza't reeman Dad Jesús zagdxe.

18 Në zien ree bèn rililadx Jesucrist bidxin abi' delant loj gra ree bejn baneroo' reeman gra ni mal ma been reeman.

19 Nëtëë zien ree bèn been guialbidxaa bidxinnë xlibr reeman abi' baze'c reeman laa reen delant loj gra ree bejn. Chi babëë reeman cwent plac lasajc ree libr guin dxel cost tü'pchii mil milia plajt lasajc reen.

20 Abi' zian bire'ch xtiidx Jesucrist biguien tëë xguialrniabeeman.

21 Chi ma gudëd gojc zian, been Pab xgab cheman niz Macedonia në niz Acaya xt yadxinman Jerusalén. Rëb tëëman guial chi ma wejman Jerusalén dxelri cheman në Rom.

22 Abi' guxhaalaman tio'p bèn rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

23 Lèn ree dxej zii been ree bèn Éfeso nadxeb por xtiidx Jesús.

24 Din Demetrio, bèn rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bèn rüjnnëman dxiin.

25 Dxel bato'paman laa reeman con ree ben ren bèn rüjn gajc ree lasa' dxiin guin, abi' rëbaman loj reeman:

—Gol bacaagdiajg, lëjt ragbee guial loj dxiin guie raguieen ree gan milia ro'.

26 Per yan lëjt ruguiaa rigueijn tēēdi, Pab ziza cayëbix guial dios ni rüjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguiedx guie, nē guidib niz Asia.

27 Dxel nadxeb yasëēb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c nünbee reeman laan yan abi' achutri guidxga' xguialrniabee dios Diana, bēn rēn ree bejn guidib niz Asia nē guidib loj guidxliuj.

28 Chi bigueijn reeman zian, bidxe'ch reeman abi' gurixdiaj reeman rēb reeman:

—iBēn zojbloj naj Diana, xdios ree bēn Éfeso!

29 Abi' gurixdiaj ree bēn guiedx guin wajs reeman, gunaaz reeman tio'p ree bēn Macedonia, Gayo nē Aristarco, bēn rzanē ree Pab. Dxel guxoobyuj reeman laa reeman, binē reeman laa reeman lod rajc xgabil ree bēn guiedx.

30 Guyēn Pab niuman yagaj din ninieenēman bejn ree, per ad cwējbt ree xcompniaraman, bēn ma rliadx ree Jesucrist.

31 Nētēē loj ree guxtis Asia guin no'ch bēlzi ree xmiw Pab, laa reeman guxhaal ruson lojman guial mejorli ad chu'man ni.

32 Zianz gurixdiaj ree bēn guin rēb reeman ni rent ni ren, been reeman nadxeb abi' zien reeman ni'quid ragbeet par xhie bad'o'p reeman yagaj.

33 Dxel galay ben zien guin babēē ree bēn Israel tijb xcompniar reeman bēn la Lejandr din guinieenēman bēn guin ree. Dxel beenman sen loj ree bēn guin din yacwēēz ro' reeman din guinieeman por ree bēn Israel delant loj ree bēn guiedx guin.

34 Per chi gogbee reeman guial najman bēn Israel, tiblazujzi gurixdiaj reeman cost tio'p hor, rēb reeman:

—iBēn zojbloj naj Diana, xdios ree bēn Éfeso!

35 Dxel chi been squiarban luguiedx guin gan bacwēēz ro' reeman, dxel rēbaman:

—Bēn Éfeso, gra bēnguidxliuj ragbee guial luguiedx guie zianczi rnij ree bejn xyadoo dios Diana abi' rēn tēē ree bejn dios Diana biajb xanyabaa.

36 Lëjt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab.

37 Din bēn bidnēdi achet ni mal been reeman yadoo guin, ad wanee tēēt reeman diidxguijdx dux dios ree.

38 Bal Demetrio con ree xcompniaraman bēn rüjnnēman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman.

39 Per bal xhieri mazri rēndi, chi gac xgabil bēn guiedx dxel gacan reglad.

40 Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, zabi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

41 Chi gulox rēbaman zian, dxel bare'ch reeman.

20

Wej Pab Macedonia nē Grecia

1 Chi babedxe ree bēn Éfeso, gurejdx Pab bēn rliadx ree Jesucrist persi bagu'man luxdoo reeman. Dxelri bazaadiidxnēman laa reeman abi' zēman niz Macedonia.

2 Bitixlojman bēn rliadx ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia

³ lod guzuman choon bëew. Ma niuman loj barcw din niejman Siria, chi gogbeeman guial nuyën ree bën Israel nÿjn reeman laaman xhienin. Dxel mejorli beenman xgab bayejcaman niz Macedonia.

⁴ Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nëtëë Gayo, bën Derbe, con Timoteo, në Tíquico con Trófimo, bën niz Asia ree.

⁵ Gra reeman guned abi' gulëjz reeman Pab con naj Lujc guiedx Troas.

⁶ Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree,

⁸ guiáad lëñü ladya lod rado'pan dád zien ree guij re'c.

⁹ Tijb xinguiajg zobj ro' ventan lax Eutico. Guial xcej da't guneenë Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax.

¹⁰ Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

¹¹ Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa reeman xt bareguiaal. Chi bareguiaal bayunejzaman ziaman.

¹² Abi' xin gudidya' ro' ventan guin, nabanx zignë reeman laax, dxel dád nix yu' luxdoo reeman.

Wej Pab Mileto

¹³ Dxel dunujn badxu'n loj barcw baneedan bio'n par luguiedx Asón, lod baya'nan diidx yaca'n Pab, din beenman xgab niej guia'man ni.

¹⁴ Chi badxajg du lasa'n con laaman luguiedx Asón, dxel badxu'në'n laaman loj barcw bio'n lod la Mitilene.

¹⁵ Ni badxoon, chi bareguiaal badüüdan niz lod la Quío. Chi bareguiaal stijb badxinan lod la Samos. Dxel chi bareguiaal stijb badxinan Mileto, per chi gad yagaj guidxin badxu'dxen lod la Trogilio.

¹⁶ Been Pab xgab ad zejntaman Éfeso, ad guyëntaman niaglaaman niz Asia guial nuyënman diob nadxinman Jerusalén, din xixgabaman naj guial bal zajc yadxinman lanij Pentecostés.

Bazaadiidxnë Pab bejn ree Mileto

¹⁷ Chi nadxu'n Mileto, gunabee Pab bi't ree bën rniabee loj ree bën rliladx Jesucrist, bën zobj ree Éfeso.

¹⁸ Chi bidxin reeman dxel rëbaman loj reeman:

—Diizd dxej yaloy ni bialan niz Asia xt yan, lëjt ragbee xhienaag cayünan.

¹⁹ Loj guidib tiamp ni za'në'n lëjt cayünan sirv Jesucrist con pasens, majsi xt ronan abi' gra loj guialzi ma gudëëdan por ni rën ree bën Israel güünnë reeman naj.

²⁰ Per majsi zian ad bacwëëzt rnin lojdi ni naj ni zagdxe par lëjt, tant delant loj ree bejn në lidxidi balün lëjt.

21 Abi' zi'c ree b́en Israel ńe ree b́en ad najt b́en Israel, ma ŕen loj reeman din yayújn reeman xgab por xtol reeman yadxi' t́e loj reeman loj Dios chililadx t́e reeman Dad Jesucrist.

22 Yan ma yaya'n Jerusalén lod caxhaal xSprijt Dios naj, ad ragbeetan xhie cabéz naj ni.

23 Tijbzi ni ragbeen naj guial guidib lod ran rugojn xSprijt Dios naj guial ladxguuib ńe zro' da't gualzi naj ni cabéz naj.

24 Per par naj achet güünan por zian, majsi guiétan per con nix yu' luxdon cayünan ni rayal günan xt lod gactizan, günn t́e mandad ni banee Dad Jesús naj guial gatiechan xtiidxa'caman xhienaag ŕen Dios dunuj ree.

25 Yan naj ragbee guial ni'qui tijbidi b́en ma ben diidx loj xhienaag naj xguialrniabee Dios, ad zuguiaatrídi naj.

26 Zeel ganin lojdi yan guial ad achetri dol ra'pan bal id nabandi xnejz.

27 Din ma bagojnán ĺejt gra xhienaag naj xixgab Dios achetci baquiechan.

28 Yan, gol gojp ĺejt gajc, gol gojp t́e ree b́en rliladx Jesucrist, b́en ma banee xSprijt Dios lojdi din guiniadi laa reeman zi'c tijb b́en rajp xiil ree, din Jesucrist con xrejnman ma gudijxaman por xtol reeman.

29 Naj ragbee guial chi yazaan gui't ree ben ren zi'c gajci rtie'ch cuyojt xiil ree, zian naj xixgab reeman güünné reeman b́en rliladx ree Jesucrist.

30 Loj gajquidi grii ree b́en gulüü ganax ni rusquiee, din güün reeman gan güüncwent ree b́en rliladx Jesucrist xtiidx reeman luar güüncwent reeman xtiidx Dios.

31 Zeel gol guzujsin, gol gojp cudad, gol basaaladx, loj choon ijz ad bacwézt gunené'n ĺejt xt ronán banen ĺejt consejw.

32 Yan, compniar raliduladx ree Jesucrist, gusa'nán ĺejt con Dios con xtiidxa'caman. Laan rajp guialrniabee par gagnén ĺejt, din gusnuu gagbeedi xhienaag ŕenman guibandi gunee t́eeman lojdi ni ma ŕebaman gudéédaman loj ree b́en ma naj xbejnman.

33 Achut xmília achu t́eét xab rzéébladxan.

34 Ĺejt ragbee zagdxe guial con quijb yan benan dxiin persi gudawné'n b́en guzu ree con naj.

35 Abi' balün ĺejt guial zian rayal güün bejn dxiin din güünman yudar b́en ryaadx ree xhienin. Gol basaaladx xtiidx Dad Jesús chi ŕebaman: "Mazri nix yu' luxdoo b́en razaladx guial loj b́en rtia'."

36 Chi gulox ŕeb Pab zian, dxel bazuxibaman gurejdx gunabaman Dios con gra reeman.

37 Gra reeman biin, gudiidx reeman Pab abi' gudaw reeman laaman xid.

38 Dád guyunaya reeman por ni ŕebaman loj reeman guial ad zuguiaatri reeman laaman. Dxel biglu'nejz reeman laaman xt lod za' barcw.

21

Wej Pab Jerusalén

1 Ni basa'nán laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas ńegajcan riga' loj nijsdoo, abi' ni badxoon bio'n guiedx Pátara.

2 Ni badxaaglojn tijb barcw ni ma che niz Fenicia zianz badxu'n lojn.

3 Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin.

⁴ Ni badxaaglojn bén rliadx ree Jesucrist abi' badxu'në'n laa reeman gajdx dxej. Bén guin ree por xSprijt Dios rëb reeman loj Pab guial ad bal cheman Jerusalén.

⁵ Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios.

⁶ Dxel bazaadiidxnë'n laa reeman abi' badxë'pan loj barcw guiáad laa reeman zia lidx reeman.

⁷ Chi badxoon luguiedx Tiro bio'n luguiedx Tolemada, ni gulox dux viajn loj barcw, bio' tëen bugneenë'n bén zojb ree ni, bén rliadx ree Jesucrist abi' baya'nan con laa reeman tib dxej.

⁸ Chi bareguiaal, dunujn con Pab badxoon Tolemada bio'n Cesarea lod bio'n lidx Felip, bén rtie'ch xtiidx Jesucrist. Felip guin naj tijb ree bén gajdx cwabee din qui's reeman ni rayal tia' ree bënprob abi' baya'nan lidxaman.

⁹ Yu' tajp xi'ndxa'paman biixtijb ree abi' laa reem rudëëd xtiidx Dios loj ree bejn.

¹⁰ Ma gojc zien dxej nadxu'n lidx Felip, chi bi't tijb bén la Agabo nëgajcaman rudëëd xtiidx Dios loj ree bejn, zëëdaman niz Judea.

¹¹ Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bén Israel bén naj xcinch ni guie, abi' yayü reeman laaman loj ree bén ad najt bén Israel.

¹² Chi baguiejnan zian, dunujn con ree bén rliadx Jesucrist luguiedx guin baguieenan naguiejn loj Pab ad cheman Jerusalén.

¹³ Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiëtan Jerusalén por Dad Jesús.

¹⁴ Chi bayagbeen guial ad zaguieentan gan yadxoonan laaman chitëë cheman, achetri baguie'chan lojman, tijbzi ni raguie'chan lojman:

—Gac zi'c rniabee Dios.

¹⁵ Chi gudëd ree dxej guin dxel baguieenan purvinid bio'n Jerusalén.

¹⁶ Bunë'n bëlzi ree bén Cesarea rliadx ree Jesucrist, laa reeman binë dunujn lod baya'nan lidx tijb bén Chipre, ma gojc xchej rliadxaman Jesucrist, laman Mnasón.

Bignaj Pab Jacob

¹⁷ Abi' ree bén Jerusalén rliadx Jesucrist dád nix guyu luxdoo reeman baca' reeman dunujn.

¹⁸ Chi bareguiaal bunë'n Pab bugnajn Jacob, ni riga' gra ree bén rniabee loj ree bén rliadx Jesucrist.

¹⁹ Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bén ad najt bén Israel.

²⁰ Chi biguiejn reeman zian, baza't reeman Dios zagdxe, zianz rëb reeman loj Pab:

—Lüj ragbee guial entr loj ree bén Israel zien da't reeman ma bililadx Jesucrist, abi' gra reeman rëb guial rüjn naguiejn güün bejn zi'c rniabee xley Moisejs.

²¹ Ma biguiejn tëë reeman guial lüj culüü bén Israel ree, bén ad zojbt ree loj nacio Israel guial ad züjncwëntt reeman xley Moisejs, rëb tëël loj reeman guial ad rüjnt naguiejn chu' xi'n reeman sen ru ree bén Israel ad zinal tëët reeman dux costumbr ree.

22 Yan, ¿xhienaa gac? Laa reeman guchajgczi lasa' reeman chi gagbee reeman guial ma bi'til.

23 Zeel mejorli güün! ze: Yu' tajp ree xin no'ch du lojn xin rayal ree güün cumplid ni cwëb reex loj Dios.

24 Binë reex, gol been zi'c rëb loj ley din gaquidi naya, gudijx tëë por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali tëët ni bigueijn reeman xcwentil.

25 Abi' por ree bën ad najt bën Israel, bën ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tëë reeman rejn ni'qui bëël rberejn, ad sunë tëë reeman ben ren bën ad najt lacheel reeman.

Gunaaz ree bën Israel Pab

26 Dxel binë Pab guidap ree bën guin, abi' chi bareguiaal been reeman zi'c rniabee ley par gac reeman naya. Dxel guyu reeman lën yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinë tijb gaj reeman tijb be guiët zi'c tijb gon par Dios.

27 Chi ma yayaaloj gajdx dxej ni naj güün reeman zi'c rniabee ley, yu' ree bën Israel zëed niz Asia, baguiaa reeman Pab lën yadooro' Jerusalén abi' gurixdiaj reeman wajs reeman, gunaaz reeman laaman,

28 rëb reeman:

—¡Bën Israel, gol been yudar! Xin guie naj xin ziza gra lad caneeguidxix bën Israel ree në dux yadoo ree, rëb tëëx loj ree bejn guial ad güün reeman zi'c rniabee dux ley ree. Abi' ad tijbtzi laan, në ma badxe'x bën ad najt ree bën Israel lën dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

29 Rëb reeman zian guial baguiaa reeman Pab zizaman ni con tijb bën Éfeso bën la Tróximo, zeel gunaladx reeman binë Pab laaman lën yadooro' Jerusalén.

30 Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo guin laa basiaaw gajc reeman port guin ree.

31 Za mer nugüjt reeman laaman, chi bidxin ruson guin loj suldad rniabee ree suldad guial gra ree bën Jerusalén cayün nadxeb.

32 Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bën guin. Chi baguiaa ree bën guin bidxin suldad rniabee guin con ree xsuldadix, dxel bacwëëz gudijn reeman Pab.

33 Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tëë beenman.

34 Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree suldad.

35 Chi bidxin reex loj ree sliar lod yu' ree suldad guin, gulejn reex Pab guial dád nadoxh rüjn ree bën zien nal laa reex,

36 abi' gra reeman rbixdiaj, rëb reeman:

—¡Gol bagüjtix!

Gunee Pab loj ree bejn

37 Chi ma chu'në reex Pab lod yu' ree suldad guin, gunabdiidixaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya?

³⁸ ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejnl, bën bagüjt ree bejn?

³⁹ Dxel rëb Pab lojx:

—Bën Israel naj. Goolan luguiedx Tarso tijb ree guiedx zojbloj ni riga' niz Cilicia. Baneesii mod ganenë'n bën guie ree.

⁴⁰ Dxel cwëjb suldad guin, abi' guzuli Pab loj ree scliar guin beenman sen loj ree bën guin con yaaman din yacwëez ro' reeman. Chi bacwëez reeman, dxel guneenëman laa reeman diidx hebreo, rëbaman:

22

¹ —Lëjt bengol në los demazridi, gol bacaagdiajg ni ganin por naj.

² Chi biguejñ reeman caneenëman laa reeman diidx hebreo, mazri bacwëez reeman. Abi' basnuuman rëbaman loj reeman:

³ —Bën Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bën gulal ree. Guiáad naj guidib luxdon benan xgab güünan sirv Dios zi'cgajc lëjt yan.

⁴ Dxel guzunaalan bën rliladx ree Jesucrist, xt bagüjtan laa reeman abi' zi'c ree béngunaa zi'c ree xinguaaaw gunaaan badxe'n ladxguuib.

⁵ Bixhioz mazri zojbloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bën Israel ree, bën zojb ree luguiedx Damasco din chile' yaguilan bën rliladx ree Jesucrist luguiedx guin, ganaaz tëen laa reeman guidnë'n laa reeman Jerusalén din téd reeman casti.

Be Pab diidx xhienaag bililadxaman Jesucrist

(Hch. 9:1-19; 26:12-18)

⁶ 'Per chi za'n lunejz par Damasco, chi ma cadxinan ni cost garol dxej, dxejczí brüi tijb guij xanyabaa balaan bacha' guidibczí lod cazaan, ⁷ abi' breeyujñ. Dxel biguejñan cha' bën na: "Saulo, Saulo, ¿chexquiza zeel rzunalil naj?"

⁸ Abi' gunabdiidxan rën: "¿Chu lüj Dad?" badxi'man laan naman: "Naj naj Jesús, bën Nazaret, bën rzunalil."

⁹ Bën zinë' reen baguiaa reeman bacha' guin abi' bidxeb reeman, per ad bignia't reeman ni na cha' bën gunee naj.

¹⁰ Dxel gunabdiidxan rën: "¿Xhie rayal günan Dad?" Abi' na Dad Jesucrist lon: "Bixche, basnuu xnejzil wej Damasco. Ni na reeman gra ni rayal güünl."

¹¹ Abi' guial bascajy bacha' guin lon, dxel bën zinë' reen gunaaz reeman yan, biné reeman naj luguiedx Damasco.

¹² 'Ni zojb tijb bën la Ananías, rüjnman cumplid gra zi'c rniabee xley Moisejs. Abi' gra ree bën Israel zojb luguiedx Damasco nünbee laaman guial nabanman xnejz.

¹³ Ananías guin bidganaj naj, chi bi'taman naman lon: "Saulo, ma zajc yaguaal stjib." Loj hor guin gajc baguian stjib abi' baguian laaman.

¹⁴ Dxel naman lon: "XDios dux béngulal ree ma bacaabee lüj din gagbeel xhie rënman güünl, abi' guguaal Jesucrist guien tëel cha'man, bën rüjn zi'c rayal.

15 Din chigneel xtiidxaman loj gra ree bénguidxliuj, gü tēel diidx loj reeman ni baguiaal ni biguiejn tēel.

16 Yan, ad rbēzil mazri, guzuli gurobnijs tēe gurejdx gaj Dad Jesucrist din chisüdaman xtóilil.”

Be Pab diidx xhienaag wejman loj ree bén ad najt bén Israel

17 Chi baguiaalan Jerusalén, wan lēn yadooro' persi guredx gunaaban Dios, abi' guza' can zi'c rulüü cane'xhchalan.

18 Baguián Dad Jesús naman: “Baquiejn. Cari barii Jerusalén, din ad züjncwentt reeman ni guiēbil por naj.”

19 Abi' rēn lojman: “Dad, laa reeman ragbee guial naj wa gra lēn ree yadoo gunaazan bén rililadx ree lüj, badxe'n laa reeman ladxguib gudin tēen laa reeman.

20 Nē chi bagüjt reeman Esteban, bén gunee xtiidxil, laagajc naj za' ni rēn zagdx naj guiētaman abi' xt gunan xab ree bén bagüjt laaman.”

21 Per na Dad Jesús lon: “Wej, naj gaxhal lüj zijt loj ree bén ad najt bén Israel.”

Badxe' reeman Pab lod yu' ree suldad

22 Xt guintzi naga' loj bacaagdiajg reeman ni rēb Pab dxel guzuloj gurixdiaj reeman rēb reeman:

—¡Ad rayalt guiban xin guin! ¡Gol bagüjtix!

23 Abi' guial cabixdiajz cabixdiaj reeman, ruzaal xab reeman niz ladia ruzaal tēe reeman yuj niz ladia.

24 Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bén guin zian contr laaman.

25 Per chi guxhii reex Pab din quin reex laaman, rēbaman loj tijb ree suldad rniabee za' ni:

—¿Zajc quindi tijb bén Rom ya, chi gadidi gagbee xhie beenman?

26 Chi biguiejn suldad rniabee guin zian, dxel bicojnx suldad rniabee ree suldad guin, rēbix lojx:

—Gojp cudad ni güünnēl xin guin, din xin Roman.

27 Dxel wej suldad rniabee guin lod za' Pab, abi' gunabdiidxix lojman rēbix:

—¿Walin ya xin Rom lüj?

Badxi' Paban rēbaman:

—Walican.

28 Abi' rēb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rēbaman:

—Per naj diizd goolan najn bén Rom.

29 Chi biguiejn ree suldad niguin Pab, guial bén Rom najman, laa bisüd gajc reex. Xt nē suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

30 Chi bareguiaal, güyēn suldad rniabee guin niagbeechaawix chexc zeel za' ree bén Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz nē ree guxtis. Abi' babēex Pab bazujx laaman loj gra reeman.

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

² Dxel Ananías, bixhioz mazri zojbloj rniabee graczi ree bixhioz, gunabee-man bén za' ree gajxh cwè! Pab din ca'p reeman ro'man.

³ Per badxi! Paban rëbaman loj bixhioz guin:

—¿Ziangajc ca'p Dios ro'l, bén rusquiee! ¿Id zojbil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

⁴ Abi' ree bén za' yagaj rëb reeman lojman:

—¿Zian rusaglojl xbixhioz zojbloj Dios ya?

⁵ Dxel rëb Pab:

—Gol been perdon, ad gogbeetan guial laaman naj bixhioz mazri zojbloj. Din loj xtiidx Dios rëb: “Ad gusaglojl bén rniabee ladxil.”

⁶ Chi gogbee Pab guial garol reeman naj bénsaducew za garol reeman naj bénfarisew, dxel guneeman rejs rëbaman:

—Naj naj bénfarisew, xi'n bénfarisew naj. Abi' guial riladxan yaban ree bengüt zeel za' ree bejn contr naj.

⁷ Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lalá'.

⁸ Din bénsaducew ree ad riladxt reeman guial yaban ree bengüt, ad riladxt tët reeman guial yu' ree anjl në ree sprijt, per ree bénfarisew riladxt reeman gra ree ni guin.

⁹ Abi' been reeman naquie' yagaj. Dxel guzuloj bëlzi ree bénfarisew naj mextr ruluü ley, rëb reeman:

—Achet ni mal wayüjn bén guie. Wed tijb sprijt o tijb anjl guneel laaman, gol gojp cudad ad niad contr Diosan nadxu' ree.

¹⁰ Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabee bi't ree suldad din yabëe reex laaman galay ree bén guin, chinë tët reex laaman lod yu' ree suldad stijb.

¹¹ Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

¹² Chi bareguiaal, garol ree bén Israel baya'n reeman diidx din gugüjt reeman Pab, rëb tët reeman guial achet gaw reeman achet tët guie' reeman xt gugüjt reeman laaman.

¹³ Nadëd tiuu naj ree bén rëb zian.

¹⁴ Abi' wej reeman bigneenë reeman bixhioz ree bén rniabee ree bixhioz në ree xbengol ree bén Israel, rëb reeman loj reeman:

—Dunujn ma raguie'ch guial achetczi yadaawan xt chi ma bagüjtan Pab.

¹⁵ Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

¹⁶ Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab.

¹⁷ Zianz guneel Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëex tijb ruson lojman.

¹⁸ Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnē'n xin guie lojl din guneex tijb ruson lojl.

¹⁹ Abi' suldad rniabee guin gunaazix yaa xin guin, binēx laax tiblād, gunabdiidix lojx rēbix:

—¿Xhie rēnl nal lon?

²⁰ Abi' rēb xin guin lojx:

—Bén Israel ree ma baya'n reeman diidx din guiniab reeman lojl guixie din chinēl Pab loj ree guxtis, con gudxiib reeman guiyc guial rēn reeman gagbeechaaw reeman xhienaag naj xcwentaman.

²¹ Per ad bal chililadxil laa reeman, din nadēd tiuu naj ree bén cwēz laaman guquie'chloj reeman lunejz, abi' ma rēb reeman guial achet gaw reeman ache tētēt guiē' reeman xt gugūjt reeman laaman. Yan za'sin reeman cabēz reeman ni guiēbil.

²² Dxel rēb suldad guin loj xin guin:

—Baguiaj. Achu loj guiēbil ni ma nal lon.

Guxhaal reeman Pab loj gobernador Félix

²³ Dxel gunees suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', nē za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin.

²⁴ Abi' gunabee tēēx güün reex porvinid way cwib Pab, rēbix loj reex guial guinia reex Pab din guidxinman zagdxē loj gobernador Félix.

²⁵ Abi' guxhaalnēx laa reex tijb gui'ch ni rēb:

²⁶ “Naj Claudio Lisias, rugajpdiozan lūj gobernador Félix, lūj guial najl bén zojbloj.

²⁷ Bén Israel ree gunaaz xin guie ma nugūjt reeman laax. Per chi gogbeen guial xin Roman, dxel wan con ree da suldadan buglēēn laax loj reeman.

²⁸ Abi' guial rēnan gagbeen xhie rūjnx zeel rdxe'ch reeman laax, dxel bazun laax loj ree guxtis Israel.

²⁹ Dxel gogbeen guial por xcwent xley reeman zeel rdxe'ch reeman laax, per ad najtan ni rayal guiētix ni'qui guial chu'x ladxguiib.

³⁰ Nē guial ma gogbeen guial xixgab ree bén Israel naj gugūjt reeman laax, zeel cayxhalan laax lojl. Abi' ma rēn loj ree bén rdxe'ch laax guial con lūj güün reeman reglad ni rajp reeman contr laax. Laanan rugojnan lūj.”

³¹ Been ree suldad guin zi'c gunabee suldad rniabee guin abi' guxhin binē reex Pab luguiedx Antípatris.

³² Chi bareguiaal suldad zē ree guia' bayejc reex lod yu' ree suldad, guiáad ree suldad dxiiib way zinē reex laaman luguiedx Cesarea.

³³ Chi bidxin reex Cesarea, badēēd reex gui'ch guin loj gobernador guin, bayū tēē reex Pab lojman.

³⁴ Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zēēdaman,

³⁵ dxel rēbaman lojman:

—Chi gui't ree bén za' ree contr lūj, dxel gucagdiagan ni nal.

Abi' gunabeeman gap reex Pab lēn xpalas Herodes.

24

Ni gunees Pab loj gobernador Félix

¹ Chi goc gaay dxej, Ananías, bixhioz mazri zojbloj rniabee graczi ree bixhioz, bidxinman Cesarea con tio'p choon ree guxtis Israel nē tijb licenciad

laman Tértulo. Abi' wej reeman loj gobernador guin din cwe'c reeman xgualquia Pab.

² Chi bidxinné reex Pab, guzuloj Tértulo caneeman contr laaman, rëbaman loj gobernador guin:

—Quixtëë lüj dad gobernador, por lüj nadxu'dxen, në por xgualrajquil zien ree ni rüjn sirv cayajc du ladxan.

³ Gra ladczi za' ree bejn conform por gra ni cayüjnl dad gobernador Félix, lüj naj bén zojbloj, quixtëëczi lüj.

⁴ Per chitëë günlaan lüj mazri, rniaaban lojl din gucaagdiajguil ni yanan lojl tibrajtoczi.

⁵ Dunujn bayagbeen xin guie naj zi'c tijb gualguijdx loj ree bén Israel, guidibczi guidxliuj zizax rustijlix laa reeman abi' laax rniabee loj tib cwaa ree bén rniee reeman nazaren.

⁶ Abi' guyën tëëx nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan gualguxtis zi'c naj dux leyan.

⁷ Per laa bi't gajc suldad Lisias con ree xsuldadix, babëëxuu reex laax du lojn.

⁸ Abi' rëb suldad rniabee guin gual lojl gui't ree bén rbe'c xgualquia Pab, yan lüj gajc zajc guiniabdiidx lojx din gagbeel zagdxë gual walican ni ranan xcwentix.

⁹ Abi' ree bén Israel za' ni rëb reeman gual waliqui gra ni guin.

¹⁰ Dxel been gobernador guin sen loj Pab din guinieeman, abi' rëb Pab:

—Gual ragbeen diidz gocli rniabee nacion Israel, zeel ad yu'nawëëgtan yadxi'n ni rudxiib reeman guican.

¹¹ Abi' lüj gajc zajc cwe'quil ruson din gagbeel gual qui gojcri chiptio'p dxej badxinan Jerusalén din ganajchi'n Dios.

¹² Abi' achut banaaznë reeman naj cadildiidxnë'n, ni'qui gual gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguijdx guin.

¹³ Bén guie ree ad zajct na reeman lojl gual ni diidxli naj ni rudxiib reeman guican.

¹⁴ Per ni naj diidxli naj gual rliladxan Jesucrist, nejzcüb guin naj ni zinaalan, cayünan sirv loj xDios dux bëngulalan, abi' na ree bén guie gual ad xnejct Diosan, per cayünan zian gual rliladxan gra ni zëed loj ley në ni bacaa ree bén badëed xtiidx Dios loj ree bejn.

¹⁵ Abi' zi'cgajc rliladx ree bén guie Dios, ziangajc rliladxan laaman gual yaban ree bengüt stijb, zi'c ree bén goc benza'c në ree bén goc benmal.

¹⁶ Zeel rünan naguiejn gabajnan zagdxë chitëë xhie ganaladxan delant loj Dios ni'qui delant loj ree bejn.

¹⁷ Ma gojc zien ijz nariin, xt yan baye'c ladxan bidganë'n ni baxhaal ree bejn par ree bénprob, bidganë' tëën gon ni rayal gudëdan loj Dios.

¹⁸ Laan naj ni cayünan lën yadooro' Jerusalén chi bi't ree bén Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tëëtan wadijl.

¹⁹ Yan, bén gunaaz ree naj, laa reeman naj bén rayal su guie din na reeman xhie rünan xhie pornin rdxe'ch reeman naj.

²⁰ O balguiza, bén za' ree guie na reeman xhie da dolan badxejl reeman chi guzun loj gra ree guxtis Israel.

²¹ Tijbzi ni benan chi za'n galay reeman gurixdiajn rën: “Gual rliladxan yaban ree bengüt, zeel za' ree bejn contr naj yan.”

²² Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi gui't suldad Lisias, dxel gagbeen zagdxe xhienaag naj xcwentidi.

²³ Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoön tée reex chignaj ree xmiwaman laaman.

²⁴ Chi goc tio'p choon dxej, bidxin gobernador Félix stijb con lacheelaman Drusila, laaman naj bën Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist.

²⁵ Per chi guzuloj cayëbaman guial rayal guiban ree bejn xnejz, gucwëëz tée xixgab mal reeman, guial guidxin tée dxej yadëed ree bejn cwent loj Dios, dxel dád bidxeb gobernador guin abi' rëbaman loj Pab:

—Baguij. Ganetan lüj chi chu'n luar stijb.

²⁶ Per Félix në milian rhëzaman gudëed Pab lojman din guslaaman laaman, zeel gurejdxaman laaman zien volt din guinieenëman laaman.

²⁷ Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxe loj ree bën Israel, zeel basa'nman Pab ladxguib.

25

Gunee Pab loj Festo

¹ Chi goc choon dxej ni bidxin Festo Cesarea par chu'man guial gobernador, dxel wejman Jerusalén.

² Yagaj, bixhioz rniabee ree bixhioz con ree bën Israel mazri zobjloj, wej reeman lojman bile'c reeman xguialquia Pab,

³ abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz.

⁴ Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguijman ni,

⁵ abi' rëbaman loj reeman:

—Bën rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chii dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhிலaman lod rniabeeman, abi' gunabeeman chica' reex Pab.

⁷ Chi bidxinnë reex laaman, bën Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulütü reeman guial najn ni wali.

⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree bën Israel, ni'qui yadooro' Jerusalén, ni'qui rey César.

⁹ Per Festo guyënman naya'nman zagdxe loj ree bën Israel, dxel gunabdiidxaman loj Pab, rëbaman:

—¿RënI ya chel Jerusalén? Ni yanajn bal rajpI dol o ad rajptil dol ya ni rudxiib reeman guijquil.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüj ragbee zagdxe guial achet ni mal wayünan bën Israel ree.

¹¹ Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

¹² Dxel chi gulox guneenë Festo bën naj ree xbejnman, bën rëb ree ni rayal gac, rëbaman loj Pab:

—Lüj na tëdil loj rey César, yan lojman tëdil.

Za' Pab loj rey Agripa

¹³ Chi gudëd tio'p choon dxej, rey Agripa con xbéngunaaman Berenice bidxin reeman Cesarea bitixloj reeman gobernador Festo.

¹⁴ Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib.

¹⁵ Chi wan Jerusalén, bixhioz rniabee ree bixhioz con ree bën rniabee loj ree bën Israel gule'c reeman xguialquiax, gunab reeman ganabeen guiëtix.

¹⁶ Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bën cabe'c xguialquiamaan din guiëbaman walin ya o ad walitan ni rudxiib reeman guijcaman.

¹⁷ Zeel chi bi't ree bën Israel guin guie, achet guial niaglaan, bareguiaal gajc gure loj da yagxhilar, abi' gunabeen bidnë reex xin guin.

¹⁸ Per ree bën bi't gule'c xguialquiax, achet ni nadxeb na reeman zi'c gunaladxan ninia reeman por laax.

¹⁹ Tijbzi xguialquiax ni gule'c reeman naj por xcostumbr reeman në por tijb bën la Jesús, bën ma güjt, per Pab rëb naban Jesús guin.

²⁰ Abi' guial ad ragbeetan xhie günan por zian, dxel gunabdiidxan loj Pab bal rënch chex Jerusalén din gac reglad ni guin ree ni.

²¹ Per laax gunab tëd loj rey César din gac reglad ni rëb reeman por laax, zeel gunabeen yaawsix xt chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiaguil laax.

²³ Chi bareguiaal, dád zagdxe ca' xab rey Agripa con Berenice bidxin reeman con ree bën rniabee suldad con los demazri ree bën zobjbloj luguiëdx guin, bidxin reeman guyu reeman lënü lod gucaagdiagj reeman ni guiëb Pab. Dxel gunabee Festo bica' reex Pab.

²⁴ Abi' rëb Festo:

—Rey Agripa në los demazridi dad za'nëdi dunujn guie. Bën ruguiaadi guie, gra bën Israel, zi'c Jerusalén zi'cgajc guie ma bi't reeman bidganaj reeman naj rniab reeman guiëtix.

²⁵ Naj, achet xfaltix radxëjlan guial rayal guiëtix. Guiäd laax gunab tëd loj César Augusto lod gac reglad xcwentix, abi' ma benan xgab yaxhalan laax.

²⁶ Per ad radxëjltan ni gucan por laax loj gui'ch ni gaxhalan loj rey César, bën rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax.

²⁷ Din naj rulüü ad xnejzt naj yaxhalan tijb bën yu' ladxguiib loj rey César abi' ad zëtan xhie beenman.

¹ Dxel rëb rey Agripa loj Pab:

—Ma zajc guinieel por lüj.

Abi' gules yaa Pab guzuloj rëbaman:

² —Dád nix yu' luxdon guial bile' za'n lojl yan rey Agripa, par ganen lojl yadxi' tēen gra ni rudxiib ree bēn Israel guican.

³ Din lüj ragbee zagdxe gra xcostumbr ree bēn Israel, nē conin rüjn persi rdildiidx reeman. Zeel rniabab lojl gapil pasens gucaagdiajguil ni ganin.

Zi'c guban Pab gocli

⁴ Gra ree bēn Israel ragbee xhienaag gubajnan con laa reeman zi'c ladxan zi'c Jerusalén, diizd xindoon.

⁵ Ragbee tēe reeman abi' zajc na reeman laan bal rēn reeman, guial diizd xindoon najn bēnfarisew, abi' ree bēnfarisew naj bēn mazri zinal xley ree bēn Israel.

⁶ Abi' yan za'n guie, badēed reeman naj loj ree guxtis guial rliadxan yashan Dios bengüt ree zi'c beenman promeys loj ree dux bēngulal ree.

⁷ Gra guidxiptio'p cwa' ree bēn Israel cabéz dxej güün Dios zian, zeel rēn reeman laaman rüjn tēe reeman sirv lojman dxej guiaal. Abi' yan guial rliadxan laan zeel rbe'c ree bēn Israel da guialquian, rey Agripa.

⁸ ¿O nalaxidi ya nawēeg yashan Dios bengüt ree?

Be Pab diidx xhienaag guzunalaman bēn rliadx ree Jesucrist

⁹ 'Guia'xchej benan xgab rayal gūnan xhienin bēn rliadx ree Jesús, bēn Nazaret,

¹⁰ abi' zian benan Jerusalén. Con xtiidx ree bixhioz rniabee ree bixhioz, zien ree bēn rliadx Jesucrist badxe'n ladxguuib. Abi' chi rugüjt reeman laa reeman, nē naj rē guiētri reeman.

¹¹ Zien volt benan laa reeman xhienin din gūnan naguiejn gusa'n reeman guialrliadx reeman Jesucrist. Zian benan lēn gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

Be Pab diidx stijb xhienaag bililadxaman Jesucrist

(Hch. 9:1-19; 22:6-16)

¹² 'Abi' par zian za'n Damasco, con quijb xtiidx ree bixhioz rniabee ree bixhioz.

¹³ Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bēn zinē'n.

¹⁴ Abi' dugraczan bareeyuj, dxel biguiejnan cha' bēn gunee naj con diidx hebreo, naman: “Saulo, Saulo, ¿chexc zeel rzunalil naj? Lüj gajc rguuil xguialnaal zi'c go'n rudxeguaia' loj yag rulaagnē reeman laab.”

¹⁵ Dxel rēn: “¿Chu lüj Dad?” Badxi'man laan naman: “Naj naj Jesús bēn rzunalil.

¹⁶ Per bixche, guzuli, din balūlon lojl par güünl naj sirv gü tēel diidx ni baguiaal yan nē ni gulūn lojl.

¹⁷ Naj gaxhal lüj loj ree bēn Israel nē loj ree bēn ad najt bēn Israel, abi' naj gagnē' lüj chitēe xhie güün reeman lüj.

¹⁸ Gaxhalan lüj loj reeman din guixhialil loj reeman gusa'n reeman nejz mal, chinal reeman nejz zagdxe. Ad tiēbri reeman nabee xindxab laa reeman, chinal tēe reeman xnejz Dios. Abi' chilliidx reeman naj din gac xtol reeman perdon yayal tēe reeman ni rayal gra ree xbejn Dios, bēn ma naya ree delant lojman.”

Bazoob Pab diidx ni balüüloj lojman

¹⁹ 'Zian gojc, rey Agripa, bazoban diidx benan ni na Jesucrist lon chi guneeman naj diidx xanyabaa.

²⁰ Yaloj luguiedx Damasco gutiechan xtiidxaman, dxelri Jerusalén në guidib niz Judea në loj ree bën ad najt bën Israel. Rën loj reeman din yayüjn reeman xgab por xtol reeman, yadxi' loj reeman loj Dios güün tëë reeman ni rayal güün reeman din guiguien guial ma bidxaa mod naban reeman.

²¹ Abi' por zian, gunaaz ree bën Israel naj lën yadooro' Jerusalén, guyën reeman nugüjt reeman naj.

²² Per con xyudar Dios laa naj guie xt yan cusnuu cayün xtiidxaman loj gra ree bejn, zi'c ree bën zojbloj zi'c ree bën ad zojblojt. Abi' gra ni rën loj reeman naj ganax ni bacaa ree bën badëë xtiidx Dios loj ree bejn në ni bacaa Moisejs xhienaag naj ni gac,

²³ guial Cristo naj guial tédaman guialzi, guiëtaman. Per chi ma güjtaman yaloj laaman naj bën yaban loj ree bengüt, abi' gugojnman bën Israel ree në ree bën ad najt bën Israel xhienaag gap reeman perdon.

Nuyën Pab nililadx Agripa Jesucrist

²⁴ Chi cayëb Pab zian, dxel gudidxa' Festo rëbaman:

—¡Rajcguijquil Pab! guial tant rusiidil ma rajc guijquil.

²⁵ Per badxi' Pab laan rëbaman:

—Ad guictan rajc, gobernador Festo. Ni canin najn xnejz në diidxli.

²⁶ Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, din ad canin ni goc ralan lod achut zajc gagbee laan.

²⁷ ¿Rliladxil ni rëb ree bën badëëd xtiidx Dios loj ree bejn ya, rey Agripa? Naj ragbee guial rliladxil.

²⁸ Dxel badxi' rey Agripa laan rëbaman:

—Sta'nrazi nünl naj gan nililadxan Jesús.

²⁹ Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, në gra ree bën cucaagdiajg ni canin yan, guidxin dxej chililadxidi Jesús zi'c naj, majsi ad nët ree caden guie.

³⁰ Dxel bisu rey Agripa con gobernador Festo con Berenice në gra ree bën zojbnë laa reeman ni.

³¹ Chi bariica reeman tiblax guzulox cayünë lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguiib.

³² Dxel rëb rey Agripa loj Festo:

—Zile' naslaa reex, balidix niniab tédix loj rey César.

27*Baxhaal reeman Pab Rom*

¹ Chi rëb reeman ma yaxhaal reeman dunujn Italia, dxel bayü reeman Pab con sta'n ree bën yu' ladxguiib loj tijb suldad rniabee la Julio, laax rniabee tib cwaa ree suldad la Augusto.

² Abi' Cesarea badxu'n loj tijb xbarcw ree bën Adramitio, barcw ni ma grii chen guiedx riga' ree niz Asia. Në Aristarco bunë'n, bën Tesalónica, guiedx riga' niz Macedonia.

³ Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëëd reeman ni ryaadxaman.

4 Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitéë yachaaglojn zro' bi, din niz du lojn rliaj bi guin.

5 Badüüdan loj nijsdoo gajxh Cilicia në Panflia abi' badxinan Mira, tijb guiedx nulen Licia.

6 Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn.

7 Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo.

8 Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

9 Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab,

10 rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

11 Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab.

12 Abi' guial ad zagdxet tëtët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan nagueijn yadxinan Fenice, tijb guiedx nulen Creta lod ad rbi' tëtët bi, ni yadüüdan tiamp nayaag.

Gubi' tijb bidoxh loj nijsdoo

13 Dxel guzuloj cabi' tijb bi chaawladx ni zëed lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta.

14 Per ad wayajct xchej zio'n chi birii tijb bidoxh la Euroclidón loj nijs guin.

15 Abi' guzuloj bi guin culadxaan barcw guin. Në guial niz du lojn zëed bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan.

16 Dxel badüüdan xijch tijb yujdobëz la Claudia riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin.

17 Dxel chi gulox balë'pan canu guin loj barcw guin, batiejl reeman duu lad barcw guin chitéë yaze'nan. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin din cwentzi chinë barcw guin dunujn niz lod rucadxaa bi guin laan.

18 Chi bareguiaal, ziangajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin.

19 Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin.

20 Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueientri du luxdoon yalaan loj nijs guin.

21 Abi' guial ma gojc zien dxej ni achetctzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëtët nasëeb ree.

22 Per achet güünan, ad rdxebidi din ni'qui tijbidi ad zëjt, tijbzi barcw guin yaze'n.

²³ Din Dios rniabee naj, b́en cayünan sirv guxhaal tijb xi anjlaman balüüloj lon yan guiaal.

²⁴ Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree b́en zëéd loj barcw guie ad zuslaat Dios guiët reeman.”

²⁵ Zeel yan dad, gol badxe' luxdoodi zagdxe, din naj rriladxan Dios, ragbee tëën zagdxe guial gac zi'c na anjl guin lon.

²⁶ Per gag barcw guie niz ro' tijb yuj riga' loj nijsdoo.

²⁷ Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree b́en nulen barcw guin, guxhinzii zi'ct garol guiaal gogbee reeman guial zamer yadxinan loj yuj.

²⁸ Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx mejtr naxhit.

²⁹ Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guuib loj nijs guin din chile' sudxe barcw guin, abi' ma rën nejzdo reeman yareguiaal.

³⁰ B́en nulen ree barcw guin, been reeman b́en sta cuzaal ree ganch guuib guin loj nijs guin niz loj barcw guin, naabzi par calet reeman canu chu' reeman par guxüün reeman.

³¹ Per bagojn Pab suldad rniabee con ree xsuldadix, rëbaman loj reex:

—Bal id ree b́en guin yaya'n loj barcw guie, ad zalaatridi.

³² Dxel batüüg ree suldad guin ni naxii canu guin persi zinë nijs canu guin.

³³ Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëët wayawidi.

³⁴ Naj rni lëjt, gol gudaw din guibandi, din gradi ni'qui tijb guidxguijquidi ad zusëébtidi.

³⁵ Chi rëb Pab zian, cwa'man tijb guidaxtil, abi' badëëman quixtëë loj Dios niz loj gra reeman, dxel gula'man guidaxtil guin guzuloj cayawaman.

³⁶ Dxel bayu luxdoo gra reeman, guzuloj nëgajc laa reeman cayaw.

³⁷ Tio'pgayuu gayojnchiibixho'p nayajc dugran zio'pan loj barcw guin.

³⁸ Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

³⁹ Chi bareguiaal, b́en nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx gadëéd ro'n, abi' been reeman xgab badxig reeman barcw guin yagaj.

⁴⁰ Dxel batüüg reeman ni naxiinë ree ganch guuib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiac reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin.

⁴¹ Per wëëztiejn loj üx zien lod bigagan. Niz guijcan wëëz lën üx abi' ni'quid rniibtan, guiaad niz xan guin guzuloj cayze'nan con gojl rliaj nijs guin ladan.

⁴² Dxel nuyën ree suldad guin nugüjt reex b́en prejs guin ree, chitëë nixoobnijs reeman abi' nuxüün reeman.

⁴³ Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial b́en rajc rxoobnijs ree, yaløj laa reeman chu' loj nijs guin güün reeman naguiejn yarii reeman ro' nijs guin.

⁴⁴ Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

28

Bidxin Pab Malta

¹ Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs.

² Bén naj ree bén ni, dád benza'c gojc reeman con dunujn. Been reeman tijb bajl guial nayaag nètée guial cayal guia, abi' na reeman du lojn din yubiigan cwe' bajl guin.

³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëël lèn yag guin por xi xliaa bajl guin, abi' gudawya'b yaa Pab nalbëztib yaaman.

⁴ Chi baguiaa ree bén Malta guin nalbëz bëël guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

⁵ Per gudxijp yaa Pab abi' biajb bëël guin loj bajl guin, guiáad laaman achet gocaman.

⁶ Gra reeman cabëz saaguij yaaman, o dxejlczi yabaman guiëtaman. Per chi gojc xchej, chi baguiaa reeman achet gocaman, bachaa xixgab reeman abi' guzuloj réb reeman guial tijb dios najman.

⁷ Gajxh lod badxu'n naga' ree xguidxliuj tijb bén zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tée gojcaman con dunujn.

⁸ Nadxel naga' xdadaman, ragxuuman, yu'man xliaa rajc tée'man yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman.

⁹ Chi gogbee ree bénragxuu zojb ni ni goc, bi't reeman lod za' Pab persi bayünman laa reeman.

¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoön yagaj, banee reeman gra ni rayaadxan lunejz.

Bidxin Pab Rom

¹¹ Choon bëëw badxu'n loj yuj zii, dxelri badxu'n loj tijb barcw Alejandría, ni bitéd ni tiamp nayaag. Niz lucwaj barcw guin ca tio'p ree dxan bén la ree Cástor në Pólux.

¹² Dxel badxinan tijb guiedx la Siracusa, yagaj badxu'n choon dxej.

¹³ Abi' yagaj badxoön bio'n gadéd ro' nijsdoo xt badxinan guiedx la Regio. Chi bareguiaal, chi badxoön yagaj, brii tijb bi lad sur dxel ni barojp dxej badxinan luguiedx la Puteoli.

¹⁴ Yagaj badxaagan tio'p choon ree bén naj ree bén ni në reeman rliladx Jesucrist, dxel na reeman du lojn yaya'nné'n laa reeman abi' baya'nné'n laa reeman toxman. Zian gojc, dxelri zio'n Rom.

¹⁵ Guiáad ree dux compniaran bén rliladx ree Jesucrist, bén zojb ree Rom, ma ragbee reeman guial yadxinan yagaj. Dxel brii reeman bidgachaagloj reeman dunujn xt lod la Foro de Apio në luguiedx la Tres Tabernas. Chi baguiaa Pab laa reeman, babaaman abi' badéeman quixtée loj Dios.

¹⁶ Chi badxinan Rom, dxel bayü suldad rniabee guin bén prejs guin ree loj tijb ree suldad rniabee ni. Per cwëjb reeman gurej Pab stjib yu ren lod gojp tijb suldad laaman.

Gunee Pab xtiidx Jesucrist Rom

¹⁷ Chi goc choon dxej badxinan Rom, gurejdx Pab b́en Israel zojbloj ree ni. Chi badxajg lasa' reeman, dxel ŕebaman loj reeman:

—Compniar Israel, achet waýnan contr ree b́en Israel ni'qui contr xcos-tumbr ree dux b́engulal ree. Guiáad laa reeman gunaaz reeman naj Jerusalén, baýu reeman naj loj ree guxtis Rom.

¹⁸ Abi' ree b́en Rom guin chi gulox badédan cwent loj reeman, dxel nuyén reeman nuslaa reeman naj, guial gogbee reeman achet benan par guiétan.

¹⁹ Per ree b́en Israel guin badxoon reeman abi' zagdxeli gunaaban gadéedan loj rey César, per ad guial ra'ptan xhienin contr ree b́en Israel.

²⁰ Zeel guredxan léjt, din guidganajdi naj din ganin lojdi guial por ni riladxan guial yaban ree bengút zi'cgajc riladx gra ree du lasa' b́en Israel ree, zeel naxiin con ree caden guie.

²¹ Dxel ŕeb reeman lojman:

—Dunuyn ni'qui tijb xtiidx ree b́en Judea ad waca'tan lod na reeman xcwentil, né ni'qui tijb b́en duladx ree b́en raza ree Judea achet wana reeman du lojn contr lúj.

²² Per rayénan yaguiejnan xhienaag naj xixgabil, din dunuyn rayagbee guial gra ladczi rniee reeman contr religion cúb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadxé guneenéman laa reeman xhienaag naj xguialrniabee Dios. Beenman naguiejn chililadx reeman Jesús, baza't t́eéman lod rniee xcwent Jesús loj xlibr ley Moisejs né ni bacaa ree b́en badéé xtiidx Dios loj ree bejn.

²⁴ Yu' reeman bililadx ni ŕeb Pab, per yu' reeman ad bililadxt.

²⁵ Abi' guial ad rdxaagt gü reeman diidx, guzuloj bare'ch reeman. Dxel ŕeb Pab loj reeman:

—Waliqui ni ŕeb Isaías b́en badééd xtiidx Dios loj ree dux b́engulal ree guial ŕeb xSprijt Dios:

²⁶ Wej, güjdx loj ree b́en guin:

Majsi rigujejn reeman, per achetdzi chignia' reeman, abi' majsi ruguiaa reeman, per rulüü ad ruguiaat reeman.

²⁷ Din been luxdoo reeman gojl,

abi' rújn reeman zi'c rulüü ad ruguiaat reeman,

ad rigujejn t́eét reeman, chit́eé guguiaa reeman,

abi' guien reeman chignia' t́eé reeman.

Din ad rént reeman gui't reeman con naj,

abi' günan laa reeman perdon.

²⁸ Zeel gol gogbee guial diizd yan, loj ree b́en ad najt b́en Israel guire'ch diidx xhienaag gap reeman xperdon Dios, abi' laa reeman zaliladx reeman diidx guin ree.

²⁹ Chi gulox ŕeb Pab zian, dxel zia ree b́en Israel guin, cadildiidxné lasa' reeman.

³⁰ Tio'p ijz gurej Pab ni, yu lod gudixaman. Ni rnieenéman gra ree b́en rtixloj laaman.

³¹ Sin guialrdxeb ŕebaman loj reeman xhienaag naj xguialrniabee Dios, abi' guneeaman xtiidx Dad Jesucrist loj reeman sin guial chu nudxoon.

Gui'ch ni guxhaal San Pabl loj ree bén Rom rliladx Jesucrist

Rxhial San Pabl xtiidx Dios

¹ Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bén badëë xtiidx Dios loj ree bejn,

³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdiaa rey Davi zaman.

⁴ Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman gualrniabee.

⁵ Abi' par yaza't reeman, zeel bacaabeeman naj din gacan apóstol din guidiblagaa guidxliuj chu' bén chililadx laaman, bén guzoob tëë xtiidxaman.

⁶ Abi' në lëjt ma nayab loj ree bén gule Dios din gaquidi xbejn Jesucrist.

⁷ Zeel caxhalan gui'ch guie lojdi bén rën ree Dios, bén zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëë loj Dios por gradi, guial guidibczi ruza't reeman lëjt xhienaag rliladxidi Jesucrist.

⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaaban laaman por lëjt.

¹⁰ Ad rucwëëz tëët rbedx rniaaban Dios din guneeman mod guidganan lëjt, zi'c naj da xgaban diizd gocli.

¹¹ Din yu'czan gan guidganan lëjt din günan lëjt yudar con xtiidx Dios din sudxi'chidi lojn.

¹² Din güün tëedi naj yudar zian yaguieen du lasa' ree yudar loj gualrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, rënan gagbeedi guial zien volti da't ma benan xgab guidganan lëjt, din gacxhiey ree bén chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan lëjt.

¹⁴ Par naj naladxan da cwentan naj guial gulün chutëëz benan xtiidx Dios, bal najman bén ciuda o najman bén guiedxdoo ya, bal rignia'man o ad rignia'taman.

¹⁵ Zeel rënnejzdoon guidganan lëjt din gatiechan xtiidx Dios Rom.

Xgualrniabee xtiidxza'c Dios

¹⁶ Ad ratunë'tan xtiidxza'c Jesucrist. Din por diidxza'c guin ree zëed xgualrniabee Dios, din gra ree bén chililadx laan laa reeman loj dol, zi'c ree bén Israel zi'c ree bén ad najt bén Israel.

¹⁷ Din por xtiidxza'c Jesucrist ragbee ree bejn guial por gualrliladx reeman laaman ma naj reeman cwent sin dol: achet por stijb ni ren tijbzi por gualrliladx. Zian ca loj xtiidx Dios lod rëb: "Bén naban zi'c rën Dios, guidib tiamp ni nabanman rliladxaman laaman."

Dol ni rajp bejn

18 Dunuj ree rayagbee guial diizd xanyabaa źeéd xcastiro' Dios par ree b́en ad ridxga't laaman, b́en ad ŕujnt ree zi'c rayal, abi' zi'c naban reeman ruquie'ch reeman xtiidxli Dios.

19 Din ragbeechaaw reeman guial yu' Dios, abi' laagajcaman balüü bejn ree guial yu'caman.

20 Majsi ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa t́eēman naj Dios. Zeel ad zajct xhie gudxiib bejn guijc guial achet ragbeeman xcwent Dios.

21 Din majsi yu' ree bejn ragbee guial yu' Dios, per ad rajpt reeman laaman respejt zi'c rayal, ad rudéē t́eēt reeman quixt́eē lojman, aal xgab ren ree ŕujn reeman ni ad ŕujnt sirv abi' gaz ragdxa reeman.

22 Ŕeb reeman guial rajc da't reeman abi' mazri na tont reeman.

23 Din luar guiēn reeman Dios ni ad yu't dxej guiēt, ŕen reeman ni nit ree yu' dxej, ŕen reeman ni naj ree zi'c bejn, ni naj ree zi'c biguijn, zi'c ree be yu' tajp guia' nē ree b́eēl.

24 Zeel ma guléēladx Dios laa reeman loj xixgab mal reeman, abi' ŕujn reeman ni natu ree con ree ben ren.

25 Luar chinal reeman xdiidxli Dios, zinal reeman ni rusquiee ree. Abi' ŕen reeman rajp t́eē reeman respejt ni been Dios, luar guiēn reeman laaman guial beenman laa reen, abi' laaman rayal gap ree bejn respejt zianczi. Amén.

26 Zeel guléēladx Dios laa reeman loj ree ni dxuudx ŕujn reeman. Abi' zien ree b́engunaa ad nabantri ree xnejz, ŕen lasa' b́engunaa gajc reeman.

27 Ziangajc zien ree xinguaaaw ad nabantri xnejz, ŕen gajc lasa' xinguaaaw reex, xinguaaaw con xinguaaaw ŕujn reex ni dxuudx, ni natu. Abi' laagajc reex rguuil xcasti reex.

28 Abi' guial ad ridxga't reeman Dios, zeel guléēladx Dios laa reeman loj xixgab mal reeman, din güün reeman ganax ni ad rayalt güün reeman.

29 Ganax ni ad rayalt güün reeman ŕujn reeman, za'nē reeman xinguaaaw ren o b́engunaa ren, zien ree ni mal ŕujn reeman, rzéēbladx reeman gap reeman ni rajp ree ben ren. Dád nadédloj reeman, rugújt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbéē reeman xtiidxguijdx bejn.

30 Rnieeguijdx t́eē reeman bejn, ralen reeman Dios, ad rajpt reeman bejn respejt, rlies xvalor gajc reeman, ŕujn reeman benro'. Abi' rbéēguijc reeman ni mal ree, ad ruzoob t́eēt xtiidx xdad xniaa reeman.

31 Dád nad reeman, ad ŕujnt cumplid xtiidx reeman, ad ŕent lasa' reeman, ad raya t́eēt lasa' reeman.

32 Ragbeechaaw reeman ŕeb Dios guial chi guiēt ree bejn, dxel gra ree b́en ŕujn gra ree ni guin yayal casti. Per majsi zian, rusnuu gajc ŕujn reeman ni mal guin ree abi' xt rabaa reeman chi ŕujn ree ben ren zian.

2

Xguialguxtis Dios

1 Zeel chutéēz ĺuj guial ŕebil xhie casti rayal bejn, ad rajptil derejch guiēbil zian, din ĺuj gajc rayal casti guin guial cayújn zi'cgajc ŕujn reeman.

2 Per dunuj ree rayagbee guial Dios ŕujn guialguxtis zi'c rayal, chi rudéēdaman casti b́en ŕujn ree ni mal guin.

³ Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios.

⁴ Ad rëntil guialnaza'c Dios con lüj, ad rëntil guial rdaanman lüj rajp tëëman lüj pacens, ni'quid ragbeetil guial pacens guin rüjn lüj yudar din gapil tiamp par yayüjnl xgab por xtölil.

⁵ Per guial dád nadil, ad rëntil yajejquil loj Dios, zeel lüj gajc cayüjnxhie xtölil par dxej ni gudëed Dios casti, dxej ni güünman guialguxtis zi'c rayal.

⁶ Par gudëëman ni rayal tijbgaj bejn bal gonin beenman.

⁷ Gudëëdaman guialnaban tiblayaa loj ree bén ad radxagt rüjn naguiejn guiban zagdxe guial rüjn reeman naguiejn yayal reeman guialnaza'c yu' xanyabaa, rüjn tëë reeman naguiejn yaya'n reeman zagdxe loj Dios din gap reeman cuerp ni ad yu't dxej nit.

⁸ Per ree bén ad ruzoobt diidx, rdxe'ch Dios laa reeman abi' gudëëdaman laa reeman casti, din luar chinal reeman xtiidxliman, zinal reeman nejz mal.

⁹ Gra ree bén zinal nejz mal, naya sac reeman sagdiaj reeman, yaloj ree bén Israel dxel bén ad najt ree bén Israel.

¹⁰ Guiáad ree bén zë loj nejz zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bén Israel dxelri bén ad najt ree bén Israel.

¹¹ Din Dios tiblojzi rüjnman guialguxtis con gra bejn.

¹² Gra ree bén cayüjn dol sin guial ad nünbeet reeman ley badëed Dios loj Moisejs, tëd reeman casti sin ley guin. Guiáad ree bén cayüjn dol majsi ragbee reeman ley guin, laa reeman tëd casti zi'c rniabee ley guin.

¹³ Din ad guial guientzi bejn ley guin ma nayaman loj Dios, bén rüjn ree zi'c rniabee ley guin laa reeman naj bén naya loj Dios.

¹⁴ Per chi ad najt bejn bén Israel, abi' cayüjnman ni zagdxe sin guial güünbeeman ley guin, dxel ma cayüjnman zi'c rniabee ley guin majsi ad nünbeetaman laan, guialzi nünbeeman conin naj ni zagdxe con tëë nin naj ni mal, abi' guijc gajc reeman zëed xley reeman.

¹⁵ Din zi'c naban reeman, rguien guial guijc reeman zëed conin rayal güün reeman con tëë nin ad rayalt güün reeman luar gap reeman ley guin. Abi' laagajc reeman ragbee chí ma been reeman ni zagdxe o chi ma been reeman ni mal.

¹⁶ Zian gac chi güün Dios guialguxtis por gra ree ni naguie'ch ni rüjn bënguidxliuj. Abi' zi'c culün bejn ree guidibczí, laaman güün guialguxtis por Jesucrist.

Bén Israel ree në xley Moisejs

¹⁷ Yan, lüj guial najl bén Israel yu'guijquil guial rajquil ley badëe Dios loj Moisejs, abi' rüjnl nabë guial najl xbejn Dios,

¹⁸ rëbil guial ragbeel xhienaag rën Dios guibanl, abi' por xleyaman ragbeel conin naj zagdxe güünl.

¹⁹ Abi' naladxil zile' guzuxnejzil bén ad nünbeet ree ley guin në ree bén ad nünbeet xnejz Dios,

²⁰ naladxil zile' gulüül bén ad rajt ree në ree bén rajc ta'nzi, guial por ley guin ragbeel gra, ragbee tëël conin naj diidxli.

²¹ Per zi'c nabanl, ¿chexc zeel ad rulüüt lüj gajc luar gulüül ben ren? Din lüj rëb guial ad laat cwan bejn, abi', ¿chexquiza zeel rbanl?

²² Rëbil guial ad laa sunë bejn bén ad najt lacheelaman, abi' lüj, ¿chexquiza zeel rüjnl zian? Rëb tëël guial rdxe'chil ni naladx bejn naj dios, abi', ¿chexquiza zeel rbanl lën yadoo lod yu' ree Dios guin?

²³ Dád nabë rüjnl guial nünbeel ley, per rusa'nxtul Dios guial ad rüjntil ni rniabee ley guin.

²⁴ Ze'cli rëb loj xtiidx Dios: “Bén ad najt ree bén Israel rniee reeman Dios diidxguijdx por lëjt.”

²⁵ Diidxli rüjnqui sirv guial ru xcuerp bejn sen ni ru ree bén Israel, bal rünman zi'c rniabee xley Dios. Per bal id rünman zi'c rniabee ley guin, achet sirvan guial yu'man sen guin.

²⁶ Per bal tijb bén ad yu't sen guin nabanman zi'cgajc tijb bén rajc xley Dios majsi ad nünbeetaman laan, dxel ma nayabaman zi'c tijb bén yu' sen, majsi ad yu'taman sen guin.

²⁷ Bén rüjn zi'c naj xley Dios, majsi ad nünbeetaman ley ad yu' tëëtaman sen, gusa'nxtu'man lüj guial nünbeel ley guin yu' tëël sen guin, abi' ad rüjntil zi'c rniabee ley guin.

²⁸ Din ad guial rajlt bejn loj nacion Israel, ad guial yu' tëëtaman sen ni ru ree bén Israel ma najman bén Israel loj Dios,

²⁹ bén wali naj bén Israel loj Dios, guidib luxdooman zinalaman xnejz Dios, ad por guial yu'taman sen ru ree bén Israel, ad por xcostumbr tëët reeman, por guial naban reeman con xSprijt Dios. Abi' bén naban zian, Dios rlies xvaloraman sa'n ad bénguidxliujt.

3

¹ Zeel zanadi lon xhieczy gan naj bejn bén Israel o xhieczy gan chu'man sen ru ree bén Israel.

² Per naj gani lojdi guial gadxagayaa mod lasajc guial naj bejn bén Israel, din yalojxgaj loj ree bén Israel badëed Dios xtiidxaman.

³ Yan ad naladxidi por guial yu' ree bén ad zinalt xnejz Dios, ad züntraman cumplid ni rëbaman din xo güün Dios ni rëbaman güünman con ree bén zinal xnejzaman.

⁴ Din laaman ad yu't dxej guchaa xtiidxaman, majsi gra bénguidxliuj naj bén rusquiee, per Dios ad nëtaman rusquiee, zi'c rëb tiblajt loj xtiidxaman lod rëb: Gra bejn güünbee lüj guial rüjn cumplid xtiidxil, abi' achet zajc gudxiib reeman guijquil.

⁵ Per yu' bejn rüjn xgab guial bal por dol ni cayguieen ree rulüü guial benza'c naj Dios, ¿chexquiza zeel najman benmal rudëedaman bejn casti?

⁶ Per naj rni lojdi guial ad najt Dios benmal, din bal najman benmal xoza güün xguialguxtisaman con bénguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajctri guiëb Dios naj bejn bëndol.

⁸ Abi' mazri ma yaguieen ree ni mal din gui't ni zagdx, zi'c rëb ree bejn culün bejn ree, per Dios gudëed casti bén rëb ree zian.

Graczi bejn ma been dol

⁹ Zeel zi'c ma rnin por ree bén Israel, në por ree bén ad najt bén Israel, abi' ma ragbeedi guial ad zajct guiëbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree bëndol.

¹⁰ Zi'c ca tiblajt loj xtiidx Dios lod rëb:

Achutczí naj benza'c,
per ni'qui tijb bejn.

¹¹ Achutczí rignia',
Achutczí raguüil Dios.

¹² Gra reeman ma basa'n xnejz Dios.
Gra reeman ma zinal nejz mal.
Achutczí cayüjn ni zagdxé,
per ni'czi tijb bejn.

¹³ Zi'cgajczí tijb baa ni zøjbyal,
zian ganax ni dxuudx ririi ro' reeman.
Ganax diidx rusquiee rniee reeman.
Abi' xtiidx reeman naj zi'c xvenen bëël.

¹⁴ Ganax diidx mal ririi ro' reeman,
diidxguijdx ni rüjnnaa lasa' reeman.

¹⁵ Za'sin reeman din gugüjt reeman bejn.

¹⁶ Bantëöz guin zë reeman, rüjn reeman ni dxuudx ree.
Abi' rusagzi reeman bejn ree.

¹⁷ Ad nünbee tëtët reeman xhienaag naj gualrbajn bejn zagdxé.

¹⁸ Ad yu'guijct reeman gual rayal guidxébe reeman Dios.

¹⁹ Dunuj ree rayagbee gual gra ni zëéd loj xley Dios, naj par ree bén zinal ley guin, chitëé chu guiëb gual achut ragbee xhienin naj dol, laan naj par gagbee bejn gual najman béndol loj Dios.

²⁰ Din ad gual güünt bejn gra ni rniabee ley guin ma nayaman loj Dios, ley guin rulüü din gagbee bejn gual najman béndol.

Por gualrliladx ma naya bejn loj Dios

²¹ Per yan Dios ma balüü dunuj ree tijb nejz gual xhienaag yayajc ree naya lojman. Ad gual yaguieentzi ree zi'c rniabee ley guin, por ley guin në por ni bacaa ree bén badëé xtiidx Dios loj ree bejn.

²² Rayagbee ree gual rüjn Dios bejn cwent zi'c bén ad yu't xtol por gualrliladxaman Jesucrist, din par Dios tiblojzi naj bejn.

²³ Din gra bejn ma been dol, achutczí naya niz loj Dios.

²⁴ Per gual najman benza'c, ma beenman perdon dux tol ree sin gual yadijx ree, ma nayajc ree perdon por Jesucrist, bén gudix por dux tol ree chi gütaman loj crüjz.

²⁵ Dios guxhaal Jesucrist, din por xrejnman chu' perdon par bénguidxliuj. Abi' perdon guin naj par ree bén rliladx Jesucrist. Zian rguien gual graczi rüjn Dios xnejz, abi' bal guia'xchej ad beent xgualguxtisaman por dol ni been ree bejn, laan naj por pacens ni rajpaman con bejn,

²⁶ gual ma ragbeeman goc güün xgualguxtisaman. Zian rusnuu rulüüman gual graczi rüjnman xnejz, zeel rüjnman perdon xtol ree bén rliladx Jesucrist.

²⁷ Yan, ¿xhienaag yaguieen ree nabë? Achet yaguieennë' ree nabë, din ad gual yaguieent ree ley guin cumplid ma nayajc ree perdon, yayajc ree perdon por gual yaliduladx ree Jesucrist.

²⁸ Zeel rayagbee chaaw ree gual Dios rüjn perdon xtol ree bejn gual rliladx reeman Jesucrist, ad gual rüjnt bejn naguiejn güünman gra ni rniabee ley guin.

²⁹ ¿Wen xDiosi ree bén Israel naj Dios ya, ad nët ree bén ad najt bén Israel naj xDios laaman ya? Naj rni lojdi gual Dios naj par gra bejn,

³⁰ din tijbzi Dios yu', laaman rüjn perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel.

³¹ Ad naladixidi cayguieen ree ley guin tiblax guial raliduladx ree Jesucrist, din ad ziantan, guial raliduladx ree laaman rguien guial nadxu'guijc ree ley guin.

4

Xguialrliladx Abraham

¹ Yan, ¿xhie zajc yaguie'ch ree xcwent dux béngulax ree Abraham?

² Bal niyab Abraham zi'c tijb bén gad güün dol por ree ni beenman, guyu mod nünman nabé loj ree bejn, per ad lojt Dios.

³ Din rëb loj xtiidx Dios: “Guial bililadx Abraham Dios, zeel been Dios laaman cwent zi'c tijb bén ad beent dol.”

⁴ Chi rün bejn dxiin, milia ni rajxaman ad ni razaladxt reeman, rtia'man laan por dxiin ni rünman.

⁵ Per guial gac bejn perdon loj Dios, ad zajct guiëb bejn guial rayalaman perdon guin por ni beenman, din achut naya loj Dios. Perdon guin zëëdan guial rliladx bejn Jesucrist, zeel rün Dios bejn cwent zi'c bén ad yu't xtol.

⁶ Zi'c guneey rey Davi guial xiquilbaa ree bén been Dios cwent sin dol sin guial güün reeman xhienin par yayal reeman perdon guin.

⁷ Rëbaman:

Xiquilbaa ree bén been Dios perdon xtol,
bén ma badxi'caman xtol.

⁸ Xiquilbaa ree bén ma been Dios cwent sin dol.

⁹ Ad guneet Davi diidx guie ree naabzi par bén yu' ree sen ni ru ree bén Israel, guneeman diidx guin ree par gra ree bejn. Din zi'c ma raguie'ch ree, Dios been Abraham cwent zi'c bén ad yu't xtol guial bililadxaman laaman.

¹⁰ Abi' chi biyabaman zi'c bén ad yu't xtol, ni'qui gadaman chu' sen ni ru ree bén Israel, chi gad Abraham chu' sen guin mal nün Dios laaman cwent zi'c bén ad yu't xtol.

¹¹ Chi biabaman zi'c bén ad yu't xtol, dxel guyuman sen guin din sen guin naj guial ma nün Dios laaman cwent zi'c bén ad yu't xtol guial bililadxaman laaman. Zeel naj Abraham dad par ree bén rliladx Dios, majsi ad yu't reeman sen ni ru ree bén Israel, per por guialrliladx guin nün Dios laa reeman cwent zi'c bén ad yu't xtol.

¹² Naj tëë Abraham dad par ree bén majsi yu' sen guin per rliladx reeman zi'c bililadx Abraham Dios diidx chi gadaman chu' sen guin.

Promejs ni been Dios loj Abraham

¹³ Chi been Dios promeys loj Abraham në loj ree xdiaaman, guial gudëëdaman guidib guidxliuj loj reeman zi'c tijb ni bayal reeman, ad beent Dios promeys guin loj Abraham guial beenman zi'c rniabee ley, beenman promeys guin guial bililadxaman laaman, zeel beenman laaman cwent zi'c tijb bén ad yu't xtol.

¹⁴ Yan bal ganaxzi ree bén zinal ley guin tia' ni gudëë Dios, achet cwent naj guialrliladx ree bejn laaman, ache tëët cwent naj promeys ni been Dios loj Abraham.

¹⁵ Din ley guin najn par castizi, per lod ad yu't ley, ad yu't mod chu guiëb guial ad cayüjnt bejn ley guin cumplid.

¹⁶ Zeel chi been Dios promeys loj Abraham guial gudëëdaman ni rëbaman par gra ree xdiaaman, beenman promeys guin lojman guial bililadx Abraham guin laaman, din guiguien guial najman benza'c abi' ad parzi ree bén zinalt ley guin naj promeys guin, nëgajc par ree bén rliladx Dios zi'c bililadx

Abraham majsi ad rajpt reeman ley guin. Zeel naj Abraham dad par dugra ree.

¹⁷ Zi'c ca loj xtiidx Dios lod rëbaman loj Abraham: “Lüj gac dad par zien ree bénguidxliuj.” Zian naj promejs ni been Dios loj Abraham, Dios bén rusban ree rengüt abi' rnieeman xcwent ree ni gad chu' loj guidxliuj guie zi'c rulüü ma yu' reen.

¹⁸ Majsi ragbeechaaw Abraham guial ad zajctaman famil, per chi rëb Dios lojman zian, bililadxaman ni rëb Dios, bililadxaman guial gac gra ni rëbaman lojman. Zianan zeel najman dad par gra ree bén rliladx Dios zi'cgajc laaman. Zi'c rëb Dios lojman, chi rëbaman: “Zian gaquil famil, dád famil narooob gaquil.”

¹⁹ Cost tibgayuu ijz ma yu' Abraham naxdel, ragbeeman guial ma naj reeman bengol në xbéngunaaman Sara guial chu' xi'n reeman, per ad guyunawëëgtaman, bililadxaman ni rëb Dios lojman.

²⁰ Ad yu't dxej ad bililadxtaman ni rëb Dios. Diidxli bililadxaman laaman abi' rudëëman quixtéë lojman,

²¹ din guidiblagaa bililadxaman guial rajp Dios guialrniabee güünman zi'c ma rëbaman.

²² Zeel been Dios cwent Abraham zi'c tijb bén ad yu't xtol.

²³ Abi' lod rëb guial been Dios laaman cwent zi'c bén ad yu't xtol guial bililadxaman laaman, ad tijbtzi Abraham ruza't yagaj,

²⁴ nëgajc dunuj ree din ma raliduladx ree Dios. Abi' në dunuj ree ma nünman cwent zi'c bén ad yu't xtol, Dios bén basban Dad Jesucrist loj guialgüjt,

²⁵ Dad Jesucrist bén güt por dux tol ree, dxel babanman abi' por laaman ma naya ree loj Dios.

5

Chi ma naya bejn loj Dios

¹ Ma nün Dios dunuj ree cwent zi'c bén ad yu't xtol guial raliduladx ree laaman, zeel ma nadxu' ree zagdxe con laaman por xguialgüjt Dad Jesucrist.

² Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëëz ree yayal ree xanyabaa lod za'man.

³ Abi' ad ziantzi, në guial yu' du luxdoo ree zagdxe por guialzagdiaj ni radüüd ree, din rayagbee ree por guialzagdiaj guin yasiid ree yaya'p ree pasens.

⁴ Abi' por pacens guin yasiid ree yadaan ree ni gui'tzi, abi' guial yadaan ree ma zajc yadxin ree loj Dios.

⁵ Ni ralëëz ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bén ma baneeman duloj ree.

⁶ Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree béndol.

⁷ Dunuj ree rayagbee guial nawëëg naj chu' bén tiëb guiët por zatijb bejn. Ni'czi por tijb bén naban xnejz, o wed yu' bén tiëb guiët por tijb benza'c da't.

⁸ Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree béndol.

⁹ Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej.

10 Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxguí yan ad züjntaman dunuj ree perdon ya, guial ma nabajnnè' ree Jesucrist, bèn guxhal nejz par loj Dios.

11 Abi' ad laatzan, nè guial yu' du luxdoo ree nix radëed ree quixtëe loj Dios por Dad Jesucrist, din por laaman ma nadxu' ree zagdxe con Dios.

Adán nè Cristo

12 Por tijb xinguaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol.

13 Diidz chi gad ley ni badëed Dios loj Moisejs chu' mal yu' dol, per guial achet ley guyu nadxel, achut zajc guiëb guial cayüjn bejn dol.

14 Per majsi zian, bidxinczi dxej ni güt reeman, diidz xtiamp Adán xt xtiamp Moisejs, majsi ad beent reeman lasa' dol ni been Adán. Abi' tiampzii Adán gojc tijb sen par tijb bèn naj gui't.

15 Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, nè ni mazri zagdxe par zien ree bejn.

16 Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol.

17 Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bèn riladx guial por Cristo ma naj bejn naya guidiblagaa loj Dios, abi' gap reeman guialnaban tiblyaa con laaman.

18 Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon nè guialnaban loj Dios.

19 Din por tijb bèn ad bazoobt diidx gra bejn naj bëndol. Per ziangajc por tijb bèn bazoob diidx ma zajc gap bejn perdon loj Dios.

20 Abi' Dios badëe ley loj Moisejs, din por ley guin gagbee ree bejn guial cayüjn reeman dol. Abi' chi ragbee bejn guial cayüjnman zien dol loj Dios, ziangajc mazri benza'c naj Dios par güünman laaman perdon.

21 Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nüjnman dunuj ree cwent sin dol, abi' yaya'p ree guialnaban con laaman por dux Dad ree Jesucrist.

6

Ma bayëjt ree par dol per nabajnnè' ree Jesucrist

1 Ad naladxidi canin lojdi guial yaguieen ree dol mazri din guiën Dios dunuj ree mazri.

2 Din ad ziantan, ma bayëjt ree par dol ad rayaltri yaguieenz yaguieen ree dol.

3 Din gol bignia' guial chi barobnijs ree por Jesucrist, laan naj zi'c rulüü guial nè dunuj ree ma bayëjt con laaman.

4 Chi barobnijs ree rën guiëban guial ma baxa'tyuj ree con Cristo, ma bayëjt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c rën Dios.

5 Abi' bal chi barobnijs ree ma nayajc ree tijbzi con Jesucrist loj xguialgüjtaman, zi'c babanman ziangajc yaban ree.

⁶ Din dunuj ree rayagbee guial chi güt Jesucrist loj crüzj, gütaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj nawëëg güün dol dunuj ree gan din ad rniabeetri dol guin dunuj ree.

⁷ Din bén ma gütj por dol, ad rniabeetri dol guin laaman.

⁸ Abi' guial gütj Jesucrist por dux tol ree, zeel ma bayëjt ree par dol guin, yabajn tëë ree con laaman.

⁹ Din dunuj ree rayagbee guial chi baban Jesucrist ad yu'tri dxej guiëtaman din ad rniabeet guialgütj laaman.

¹⁰ Con tivoltizi gütj Jesucrist por xtol ree bejn, yan ma nabanman par Dios.

¹¹ Ziangajc lëjt gol been cwent guial ma gütjidi par dol, abi' ma nabandi par Dios guial ma najdi tijbzi con Dad Jesucrist.

¹² Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdXuudx lëjt gan.

¹³ Ad cwëëladx lëjt gajc loj dol par güündi ni mal, zagdxeli gol cwëjb nabee Dios lëjt, zi'c tijb bén ma gütj, abi' yabandi par laaman. Gol cwëjb nabeeman lëjt par güündi ni zagdx.

¹⁴ Zian ad zanabeetri dol lëjt, per ad por guial yu'guijctidi ni rëb ley ad güündi, ad zanabeetri dol guin lëjt por guial zinalidi guial rën Dios lëjt.

Ma gulaa ree loj dol

¹⁵ Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan.

¹⁶ Lëjt ragbee bal yu' chu rniabee dunuj ree, yazoob ree xtiidx bén rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon.

¹⁷ Per quixtëë Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi.

¹⁸ Abi' yan guial ad rniabeetri dol lëjt, ma nabandi din güündi zi'c rën Dios.

¹⁹ (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graloj ree ni mal, ziangajc yan guidiblagaa gol cwëjb nabee Dios lëjt din gac güündi ni zagdx guiban tëëdi zi'c rënman.

²⁰ Chi gunabee dol lëjt ni'quid guyutidi xgab nibajndi zi'c rën Dios.

²¹ Per, ç'xhieza gan beendi por ni mal ni beendi nadxel, ni mal ni ratunëdi yan guial ma ragbeedi por laan zëëd xcasti Dios?

²² Per yan guial ad rniabeetri dol lëjt ma zinalidi xnejz Dios, abi' laan naj ni zagdx din por zian ma zajc guibandi zi'c rën Dios gap tëëdi guialnaban tiblyaa con laaman.

²³ Din ni rüjn bejn gan por dol laan naj casti, per ni razaladx Dios naj guialnaban tiblyaa par ree bén ma naj tijbzi con dux Dad ree Jesucrist.

7

Ni naj zi'c guialruxhliia

¹ Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman.

² Laan naj zi'c chi ruxhliia bejn, ad zajct guxhliiaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliiaanëman ben ren.

³ Zeel bal naban lacheelaman abi' guchajgaman ben ren, dolan cayünman. Per bal ma güjt lacheelaman dxel achet ley gudxoon guial guxhliaanëman ben ren ad cayünj tēētaman dol.

⁴ Ziangajcan lējt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yaguieen ree zi'c rën Dios yaguieen ree.

⁵ Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti.

⁶ Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tēē mod ni nabajn ree, ma zajc yaguieen ree zi'c rën Dios por xSprijtaman bén nabajnnë' ree, ad guial nadxu'guijct ree ley guin.

Ley con dol

⁷ Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tēētan guial dol naj guialrzēēbladx, bal id rëb loj ley guin: "Ad sēēbladxil."

⁸ Per chi gogbeen guial ni mal naj guialrzēēbladx, mazri gojcxhiey da dolan por gra ni guzēēbladxan. Bal id yu' ley, ad zagbeet bejn xhienin naj dol.

⁹ Chi gadan günbee ley guin, par naj zagdxe naban. Per chi benbeen ley guin, gogbeen guial cayünan dol abi' por dol guin rayalan casti.

¹⁰ Bi't ley guin din gagbee bejn xhienaag guibanman, per par naj bi'tzan par gudēēdan naj casti.

¹¹ Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

¹² Zeel ad ni malt naj ley guin din loj Dios zēēdan abi' gra ni zēēd loj ley guin loj Dios zēēdan, abi' zagdxe xnejz tēē naj ni rëb loj ley guin.

¹³ Ad ley quint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

¹⁴ Dunuj ree rayagbee guial por Dios zēēd ley guin, per guial najn bénguidxliuj zeel zianczi rüjn dol guin naj gan.

¹⁵ Ad rignia'tan xhienin rajcan, din ad rüntan ni rënan, aal ni ad rëntan rünan.

¹⁶ Abi' chi rünan ni ad rëntan günan, zian ragbeen guial ni zagdxequi naj ley guin, din por ley guin ragbeen xhienin cayünan.

¹⁷ Zeel ad najtctzi rün guial rünan ni ad rëntan, rünan laan guial najn bëndol, abi' zianczi rüjn dol guin naj gan.

¹⁸ Din guial najn bénguidxliuj, ragbeen guial ni'czi ta'n ad najtan benza'c, majsi rënan günan ganax ni zagdxe, per ad rajctan.

¹⁹ Ad rüntan ganax ni zagdxe ni rënan günan, aal ganax ni mal rünan ni ad rëntan günan.

²⁰ Yan bal rünan ni ad rëntan günan, ad najtctzi rün par günan laan, rünan laan guial najn bëndol abi' zianczi rüjn dol naj gan.

²¹ Ragbeen guial majsi rënan günan ganax ni zagdxe, per laa za' gajc dol guin par güünan naj gan.

²² Dád ruladxan gra zi'c rniabee Dios günan,

²³ per yu' ni rudxoon günan laan, abi' ni rudxoon guin naj dol, guial sta naban dol guin luxdon abi' zianczi rüjn naj gan.

²⁴ ¡Prob naj! ¿Chu zajc yabëë naj loj casti rayalan por dol ni rünan guial naj naj bénguidxliuj?

²⁵ Per quixt ee Dios guial por dux Dad ree Jesucrist ma gulaan loj casti guin. Diidxliczi da xgaban naj guial g unan ganax ni rniabee Dios, per guial najn b enguidxliuj zeel zianczi r ujn dol guin naj gan.

8

Guialnaban runee xSprijt Dios

¹ Gra ree b en rliadx Jesucrist ad rayaltri reeman xcasti Dios, b en ad nabantri ree zi'ctzi r en reeman, laa reeman ma r ujn reeman naguiejn naban reeman ze'c rniabee xSprijt Dios.

² Din por xguialrniabee xSprijt Dios, b en runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal t eetri ree xcasti Dios.

³ Guial nayajc ree b enguidxliuj ad bile't n ujn ley dunuj ree yudar, ley ni bad ed Dios loj Moisejs. Per yan ma been Dios ni ad bile't n ujn ley guin. Laaman guxhaal Xi'n loj guidxliuj zi'cgajczi tijb b enguidxliuj persi g jgtaman por dux tol ree chit ee nabeeri dol dunuj ree.

⁴ Laaman been zian, din yaguieen ree ze'c r enman zi'cgajc tijb b en cay ujn ze'c rniabee ley guial ad nabantri ree zi'ctzi ray en ree, ma nabajn ree ze'c rniabee xSprijt Dios.

⁵ B en naban ree zi'ctzi naj xixgab reeman, mazri yu'guijc reeman g un reeman zi'ctzi r en reeman. Per ree b en naban ze'c rniabee xSprijt Dios, mazri yu'guijc reeman g un reeman ze'c rniabee Sprijt guin.

⁶ Guial yu'guijc bejn g unman zi'ctzi naj xixgabaman zeel z ed casti. Per b en yu'guijc g un ze'c rniabee xSprijt Dios, zajpaman guialnaban con Dios yabe'cdxe t ee Dios luxdooman.

⁷ B en yu'guijc ree guiban ze'ctzi naj xixgab reeman, rdxe'ch Dios laa reeman din ad r ent reeman guzoob reeman xtiidxaman ad rile' t eet g un reeman ze'c r enman.

⁸ Zeel b en naban ree zi'ctzi naj xixgab reeman, ad ruladxt Dios ni r ujn reeman.

⁹ Per l ejt ad nabantridi zi'ctzi naj xixgabidi, ma nabandi ze'c rniabee xSprijt Dios, bal wali ma nabann edi xSprijt Dios. Din b en ad nabann et xSprijt Dios, ad najtaman xbejn Cristo.

¹⁰ Per bal ma nabann edi Cristo, r en gui ban guial ma g jgtidi par dol, ma nabann edi xSprijt Dios din ma n ujn Dios l ejt cwent sin dol.

¹¹ Abi' bal ma nabann edi xSprijt Dios, b en basban Jesucrist loj ree beng t. Majsi gui tidi per zasban Dios l ejt din tia'di zatijb guialnaban por xSprijt Dios b en nabann edi.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree.

¹³ Din bal nabandi zi'ctzi naj xixgabidi, dxel yayalidi casti, per bal por xSprijt Dios b en nabann edi ma basa'ndi dol tiblad dxel ma gapidi guialnaban tiblayaa con Dios.

¹⁴ Gra ree b en rti ejb rniabee xSprijt Dios laa reeman, laa reeman naj xi'n Dios.

¹⁵ Din ad nabann et reeman xSprijt Dios par guidxeb reeman, ze'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: "iDad!"

¹⁶ Din xSprijt Dios rusni dunuj ree persi rayagbee ree guial ma nayajc ree xi'n Dios.

17 Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree gualzi zi'c laaman din yayal ree xanyabaa lod zojbaman.

18 Ma benan xgab guial achet lasajc gualrzagdiaj ni caydüüd ree yan guial loj gualnaza'c ni yaca' ree xanyabaa.

19 Abi' xt gra ree ni badxe' Dios loj guidxliuj, ma rën nejzdoo reen guidxin dxej guiguien chu ree nin naj xi'n Dios.

20 Din guidxliuj ma guxinan, per ad laatan rajp dol, Dios basa'n gac zian. Yan cabësi guidxliuj guin

21 yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie.

22 Per la'tgaj cabëz guidxliuj guin guidxin dxej guin, dunuj ree rayagbee guial dád naya cazagdiajn zi'c rzagdiaj tijb bëngunaa chi ma gal xi'nman.

23 Abi' ad tijbtizi guidxliuj guin cazajc zian, nëgajc dunuj ree guial naba-jnnë' ree xSprijt Dios zi'c tijb sen por ni guneë Dios duloj ree. Abi' cayzaagdiaj ree la'tgaj caylëz ree guidxin dxej ni guiguien guial nayajc ree xi'n Dios, dxej ni guidxaa dux cuerp ree chi yaya'p ree cuerp cüb.

24 Dunuj ree rayagbee guial gac zian, laan naj ni ralëz ree gualraliduladx ree ma nayajc ree perdon. Lëjt ragbee bal ni ralëz ree ma gojcan, ad zalëëztri reen din ad zajctri cwëz bejn ni ma gojc.

25 Per bal gad ni caylëz ree gac, ad rayalt yadxaq ree yalëëz ree gacan.

26 Abi' xSprijt Dios ragnë dunuj ree chi ad rayagbeet ree xhie yaguieen ree, din yu' dxej loj hor guin ad rile't yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiarguejn ree, dxel laaman rbejdx rniab Dios por dunuj ree.

27 Abi' Dios, bèn nünbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c rën Dios.

Achet zajc güün dunuj ree gan

28 Dunuj ree rayagbee guial gra ni cayza'c ree loj guidxliuj guie naj ni güün sirv par dunuj ree guial rayën ree Dios, dunuj ree guial bazooob ree xtiidxaman par yaguieen ree zi'c rënman.

29 Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj bèn nabee loj gra ree bèn naj Xi'n Dios.

30 Gra ree bèn ragbee Dios guial chililadx reeman laaman, rbejdxaman laa reeman din gac reeman xbejnman, rüjnman laa reeman cwent sin dol abi' rudëëman xanyabaa loj reeman lod zojbaman.

31 Yan, guial ma rayagbee ree gra ree ni guie, achet güünan chutëëz güün xcontr dunuj ree, dunuj ree rayagbee guial Dios gagnë dunuj ree.

32 Ad gurexuut Dios nudëë Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya?

33 ¿Chu zajc cwe'c dux gualquia ree nayajc ree bèn ma gulej Dios? Din Dios ma nüjn dunuj ree cwent sin dol.

34 Achut zajc na guial rayal ree casti, din Jesucrist güjt persi gudijxaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree.

35 Zi'c rën Cristo dunuj ree, achut zajc yala' dunuj ree con laaman. Ni'qui por gualyu'naya, o por gualzi, o por ni rüjn bejn dunuj ree, o por gualrliaan,

o por guial ryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman.

³⁶ Zi'c rëb loj xtiidx Dios:

Guial nayajcan xbejn, zianczi nadxu'n loj guialgüjt.

Rüjnnë reeman dunujn zi'c ree xiil ma naj guiët.

³⁷ Per ni'qui tijb ni guin ad zünjt dunuj ree gan guial ragnë Cristo dunuj ree, bén rën dunuj ree.

³⁸ Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëed gac,

³⁹ o ni zëed xanyabaa, o lën liuj, ni'qui tijb ni been Dios, achetczi achut tëët zajc chiquied guialrën Dios dunuj ree por dux Dad ree Jesucrist.

9

Dios gulej bén Israel ree

¹ Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt,

² guial guixie guixie dád yu'naya luxdoon, xt ni'quid radxejlt xhie günan.

³ Balzianclaa majsi ad zayaltan perdon, majsi güün Cristo naj tibläd, per bal zian chile' günan yudar bén ladx reen chitëë yaval reeman casti.

⁴ Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëënin güün reeman, baadë tëë xleyaman loj reeman. Rëbaman loj reeman xhienaag guiën reeman laaman, been tëëman promejs loj reeman.

⁵ Zëed reeman loj xdiaa ree bén been ree sirv loj Dios gulal, loj gajc ree bén zëed Cristo chi bi'taman loj guidxliuj, laaman naj bén nagle' zianczi rajp tëëman guialrniabee loj gra ni yu'. Amén.

⁶ Ad canitan guial ad zünjtri Dios xpromejsaman cumplid, ni canin naj guial ad grat ree bén Israel naj xbejn Dios.

⁷ Ad guial zëedt reeman loj xdiaa Abraham din gac reeman xdiaaman, din rëb Dios loj Abraham: “Diizd xi'n Isaac suloj xdiaal.”

⁸ Laan rulüü dunuj ree guial ad por guial najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham guial rilädx reeman xtiidx Dios zi'c Abraham.

⁹ Din Abraham bililadxaman Dios chi rëb Dios lojman: “Zatib ijz tiamp guie gajc guialan abi' dxej zii ree ma ca' Sar tijb xindobëz.”

¹⁰ Abi' ad laatzan. Grop ree xi'n Rebeca gojc xdad reex Isaac, bén goc dux béngulal ree,

¹¹⁻¹³ per chi gad reex gal, chi ad wayüjn tëët reex ni zagdxe ni'qui ni mal, rëb Dios loj Rebeca: “Xin yaløj guin laax güün sirv loj xinguiağ guin.” Zi'c rëb loj xtiidx Dios lod rëb: “Guyënan Jacob, per bidxe'chan Esau.” Zian rguien guial ma ragbee Dios chu rbeman ad por ni rüjnt bejn, laaman ma ragbee chu rucaabeeman.

¹⁴ Yan, ¿por zian yaguie'ch ree ya, ad rüjnt xguialguxtis Dios zi'c rayal? ¡Per ad ziantan!

¹⁵ Din Dios rëb loj Moisejs: “Yayan bén rënan yayan abi' bén rayal ree casti, bal rënan ad zudëedtän laa reeman casti.”

¹⁶ Zeel ad zile't yaya Dios bejn por xixgabzaman o por ni rüjnman, laaman mal ragbee chu rënan yayan.

17 Loj xtiidx Dios rëb guial rëbaman loj rey Egipto: “Naj ben lüy rey din guiguien da gualrniabeen din güünbee gra bénguidxliuj naj.”

18 Zeel rnin lojdi guial ma ragbee Dios chu yayaman chu tée güünman lurdoo gojl.

19 Per wed por zian nadi: “Bal zianan, ¿chexquiza zeel rdxe'ch Dios guial nayajc ree zi'c nayajc ree awa ad zajct yadxoon ree zi'c naj xixgabaman?”

20 Per, ¿chu naj bénguidxliuj din guinieeman Dios zian? Wen zajc guiëb tijb guiajs loj bèn been laan ya: “¿Chexc zeel beenl naj zian?”

21 ¿Nid bèn rüjn guiajs guin rüjnnë bajn guin zi'tctzi rënman ya? Laaman ruguiaa xhie güünnëman bajn guin, bal güünman guiajs güün dxiin guixie guixie o güünman guiajs güün dxiin dxej zobjlojzi ree.

22 Yan, ziangajc Dios ma ragbeeman chu rayal casti, abi' xt zajc laa nudëd gajcaman casti din guiguien xgualrniabeeman. Per gudaanman gojp téeeman pacens bèn ad ruzoobt ree diidx, bèn rayal ree nit.

23 Gudaanman laa reeman din guiguien guial laaman guinia xhienaag güünman, guial laaman naj bèn ca' gualrniabee abi' bayaman bèn ragbeeman diizd guia'xchej guial rayal reeman xanyabaa.

24 Abi' laa reeman naj dunuj ree bèn ma gurejdx Dios, loj ree bèn Israel në loj ree bèn ad najt bèn Israel.

25 Zi'c ca loj libr ni bacaa Oseas bèn badëe xtiidx Dios loj ree bejn, lod rëb:

Bèn ad najt ree da bejnan,
guiën loj reeman guial naj reeman da bejnan,
abi' ree bèn ad yu't bèn rën laa reeman,
naj guiën laa reeman.

26 Abi' lod rëb Dios loj ree bejn: “Ad da bejntan lëjt”.

Yagaj gac reeman xbejnman, laaman guial najman bèn naban.

27 Guiaad Isaías bèn badëe xtiidx Dios loj ree bejn, rëbaman por ree bèn Israel: “Majsi zien da't naj ree bèn Israel zi'c üx riga' ro' nijsdoo, per ta'nz naj ree bèn laa loj casti,

28 din Dios nayob güün cumplid xtiidxaman loj guidxliuj guie zi'c ma rëbaman.”

29 Abi' diizd gocli rëb Isaías loj ree bejn:

Bal nitiëjb dux Dad ree Dios
bèn rajp gra gualrniabee
ninijt gra ree dux béngulal ree,
diizd gocli mal gunijt dux diaa ree
zi'c gunit ree bèn Sodoma në ree bèn Gomorra.

Bèn ad najt ree bèn Israel ma naj reeman perdon loj Dios

30 Yan, ¿xhie yaguie'ch ree? Bèn ad najt ree bèn Israel ni'quid guyut reeman xgab xhienaag gac reeman perdon loj Dios, per yan ma naj reeman perdon guial rliladx reeman Jesucrist.

31 Abi' ree bèn Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan.

32 ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn”

33 zi'c ca loj xtiidx Dios lod rëb:

Ma gulen tijb bejn luguiedx Sión, bèn gac zi'c tijb guiaj
ni ladx guia' ree bejn abi' gusajban laa reeman.

Abi' b́en chililadx laaman ad yu't dxej yaya'nxtuman.

10

¹ Compniar raliduladx ree Jesucrist, ni ŕenan rniaab t́een loj Dios naj guial gac ree b́en Israel perdon.

² Din naj ragbee guial d́ad cayŭjn reeman nagueijn cayŭjn reeman sirv loj Dios, per diidxli ad rignia't reeman zagdxe xhienaag ŕen Dios gŭjn reeman.

³ Din ad rtiĕjbt reeman chililadx reeman xhienaag rayal gŭjn reeman din gac reeman perdon loj Dios, al zinal reeman zi'c naladx reeman gac reeman perdon, luar gŭjn reeman zi'c ŕen Dios din gac reeman perdon.

⁴ Din por Jesucrist bayaaloj zi'c rniabee ley gŭjn bejn, yan b́en rliladx ree laaman, ma naya reeman loj Dios.

⁵ B́en ŕen gac naya loj Dios guial zinalaman ley, ŕeb Moisejs guial b́en gŭjn zi'c tal ŕeb ley, zajpaman guialnaban la'tgaj cayŭjnman zi'c rniabee ley guin.

⁶ Per guial rajc bejn naya loj Dios por guial rliladxaman Jesucrist, naj guial ad zŭjntaman xgab: "ĶChuczi zajc chĕ'p xanyabaa?" (Din ŕen guiĕban guial ad rliladxtaman, abi' ŕenman guguaaaman guiat Cristo loj guidxliuj.)

⁷ Ad guiĕb t́eĕman: "ĶChu zajc che lod za' ree bengŭt?" (Din ŕen guiĕban guial ad rliladxtaman, abi' ŕenman guguaaaman yaban Cristo loj ree bengŭt.)

⁸ Per loj xtiidx Dios ŕeb: "Gajxh za' xtiidx Dios con lŭj, ryaadxzi gŭjn xgab guiĕb t́eĕl bal chililadxil laan." Din guialrliladx ni ratie'ch ree naj ze.

⁹ Bal yaneero'l guial Jesŭs naj Dad par lŭj abi' guidib luxdool chililadxil guial basban Dios laaman loj ree bengŭt, dxel ma najl perdon.

¹⁰ Din chi chililadx bejn Jesucrist con guidib luxdooan, diidz loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

¹¹ Abi' loj xtiidx Dios ŕeb: "Gra ree b́en chililadx laaman ad yu't dxej yaya'nxtu reeman."

¹² Laan ŕen guiĕb guial loj Dios tiblojzi naj bejn, achet gŭjn chutĕĕz najman, bal najman b́en Israel o ad najtaman b́en Israel. Din tijbzi Dios naj Dad par dugra ree, abi' d́ad benza'can con gra ree b́en rbejdx rniab laaman.

¹³ Din loj xtiidx Dios ŕeb: "Gra b́en yanab perdon loj Dios, gacaman perdon."

¹⁴ Per, Ķxhieza naag cwedx guiniab reeman laaman awa ad waliladxt reeman laaman? ĶAbi' xhieza naag chililadx reeman laaman awa ad wacaag-diajgt reeman xcwentaman? ĶXhienaag guiguiejn reeman xcwentaman awa achut b́en guinee xtiidxaman loj reeman?

¹⁵ ĶXhienaag chu' b́en gutie'ch xtiidxaman awa achut guixhiaal laa reeman? Loj xtiidx Dios ŕeb: "ĶNi za'cdxoon naj chi rdxin b́en zinĕ ruson zagdxe!"

¹⁶ Per ad grat bejn ridxga' xtiidxza'c Dios. Zi'c ŕeb Isaías: "Dad, Ķchu ma rliladx ni ranen por lŭj?"

¹⁷ Zeel guialrliladx zĕĕd por ni rigueijn bejn, abi' ni rigueijn bejn naj xtiidxza'c Jesucrist.

¹⁸ ĶWen nid wagueijn ree bejn laan ya? ĶPer naj rni guial ma bacaagdajg reeman laan! Din loj xtiidx Dios ŕeb:

Guidib guidxliuj ma bire'ch xtiidx Dios
abi' xt luar bigra lod nague'ch ma bigueijn reeman xtiidxaman.

¹⁹ Yan rŭnan xgab: ĶWen id rignia' ree b́en Israel xtiidx Dios ya? Per diidz guia'xchej bacaa Moisejs ni ŕeb Dios por laa reeman chi ŕebaman:
Naj gŭn dín tĕdlojdi por ni gŭnan

con ree bén ad najt bén Israel.

Në por ni gūnan con laa reeman,
majsı ad ragbeet reeman, abi' zadxe'chidi.

²⁰ Abi' sin guialrdxeb bacaa İsaías ni rëb Dios por ree bén Israel, chi rëbaman:
Bén naj ree bén Israel, majsı ad baguıilt reeman naj,
per badxejl reeman naj.

Abi' ma balūlon loj reeman,
majsı ad gunabdiidxt reeman por naj.

²¹ Bacaa tēē İsaías ni rëb Dios por ree bén Israel, chi rëbaman: “Dëchej za'n
rbedxan bejn ree abi' ad rënt reeman guzoob reeman diidx al rusagloj
reeman naj.”

11

Xixgab Dios

¹ Ad canitan lojdi guial ma gulëeladx Dios bén Israel ree, din ad ziantan.
Lëjt ragbee guial bén Israel naj abi' loj xdiaa Abraham zialan, guial zialan loj
xdiaa Benjamín.

² Diızd guia'xchej, gulej Dios bén Israel ree din gac reeman xbejnman, zeel
ad rbëeladxtaman laa reeman. ¿Nid rusaaladxidi tıblajt loj xtiidx Dios ya lod
zëed chi gule'c Elías bén badëë xtiidx Dios loj ree bejn xguialquia ree bén
Israel loj Dios? Chi rëbaman:

³ “Dad, ma bagüjt reeman gra ree bén badëë xtiidxil loj ree bejn ma
bachıjl tēē reeman xialtar reel, najzi baya'n abi' nëgajc naj rën reeman gugüjt
reeman.”

⁴ Per badxi' Dios xtiidxaman rëbaman: “Ma gulëcan gajdx mil bejn par naj,
bén ad wazuxibtzı ree loj dios la Baal.”

⁵ Yan ziangajc yu' ta'n bén Israel, por guial rayaman laa reeman gulejman
laa reeman par laaman.

⁶ Abi' bal guial rayaman laa reeman gulejman laa reeman, ad por ni
cayüjnt reeman, din bal nibejman laa reeman por ni cayüjn reeman dxel ad
por guial rayatraman laa reeman.

⁷ Zian gojc, bén Israel bén gule Dios, badxejl reeman laaman guial rliladx
reeman laaman. Per ree bén Israel ren gad reeman yadxıjl laaman, din
raguııl reeman laaman zi'c naladx reeman, ad raguiilt reeman laaman zi'c
rënman zeel beenman lıxdoo reeman gojl,

⁸ zi'c rëb loj xtiidx Dios lod rëb: “Basiaaw Dios xquiargıuejn reeman, abi'
naj reeman zian xt yandxej, majsı rugııaa reeman per ruluü ad rugııaat
reeman, abi' majsı rigııuejn reeman per ruluü ad rigııuejnt reeman.”

⁹ Rëb tēē Davi:

Xguialraw zagdxı reeman con gra xguialnaza'c reeman
laan gısqııee laa reeman guial zëqui reeman zagdxı.
Laa gısqııee laa reeman dın tēd reeman casti ni rayal reeman.

¹⁰ Yaya'n reeman zi'c tıjb bén ad rugııaat,
abi' sac reeman zi'c tıjb bén ca bëw xıjch.

Gac ree bén ad najt bén Israel perdon

¹¹ Ad canitan lojdi por guial ad rtiëjbt ree bén Israel gūn reeman zi'c rën
Dios zeel ma gunıjt reeman loj Dios, dın ad ziantan. Guzajc reeman zian dın
chu' mod gac ree bén ad najt ree bén Israel perdon, dın chıle' sëëbladx ree bén
Israel gap reeman perdon guın.

¹² Yan bal guial ad bazoobt ree b́en Israel diidx, beenan sirv par din yayal los demazri ree b́enguidxliuj xguialnaza'c Dios, b́en ad najt ree b́en Israel. Yan, ɽr̀ujndi xgab ya xhienaag g̀ūnle' Dios bejn ree chi tīeb ree b́en Israel g̀ūn reeman zi'c r̄en Dios?

¹³ Yu' ni r̄enan ganin l̄ejt b́en ad najt ree b́en Israel, l̄ejt ragbee guial Dios guxhaal naj din g̀un xtiidxaman lojdi abi' dád cayūnan naguiejn g̀unan zi'c rayal.

¹⁴ R̄enan guial ree b́en ladx reen b́en Israel ree s̄ēēbladx zi'c r̀unjdi din g̀ūn reeman zian din chile' gac reeman perdon.

¹⁵ Walican guial chi ad bazoobt ree b́en Israel xtiidx Dios, guyu mod gojc los demazri ree bejn perdon. ¡Per xi nix chi chililadx reeman xtiidx Dios! Laan naj zi'c chi yaban tijb bengüt zatijb.

¹⁶ Abi' zi'c chi beenle' Dios b́en Israel ree gual laan naj tijb sen guial g̀ūnle'man los demazri ree b́en Israel, ziangajc bal g̀ūnle' Dios xliuj tijb yag guidib yag guin ma nagle'.

¹⁷ B́en Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' l̄uj guial ad najtl b́en Israel najl zi'c tijb xidx yag olivo ni yu' dajn ni r̄guuid lod biru' xidx yag olivo guin, zeel rajpil guialnaban por xliuj yag guin.

¹⁸ Zeel ad naladxil guial mazri zagdxenajl guial loj yag oliv ni rnin naj ree b́en Israel. Per bal r̀ujnl xgab zian, basaaladx guial ad l̄ujt cudēē guialnaban loj xliuj yag guin, xliuj yag guin cunee guialnaban lojl.

¹⁹ Wed zanal: "Walican, per gurug xidx yag olivo guin persi guyu'n xluaran din gacan tijbzi con yag olivo guin."

²⁰ Waliquil, per xidx yag olivo ni canin naj ree b́en Israel, gurug reen guial ad bililadxt reen abi' l̄uj guyul xluar reen guial r̄liladxil. Zeel ad r̀ujnl nabē, zagdxeli gojp cudad.

²¹ Din bal b́en Israel ni canin naj ree xidx yag guin, ad bayat Dios laa reeman, ziangajc zajc saquil.

²² Gogbee guial benza'c naj Dios, per ziangajc diidxli r̀ujn xguialguxti-saman. Ma been xguialguxtisaman con ree b́en ad bazoobt xtiidxaman, abi' ma beenman ni zagdxen con l̄uj. Per rayal guibanl zi'c r̄enman, bal id z̄ujnl zian z̄ujn xguialguxtisaman con l̄uj.

²³ Abi' bal yayejc ree b́en Israel con Dios, abi' chililadx reeman perdon ni z̄ēēd por laaman, z̄ujnman laa reeman cwent con los demazri ree b́en Israel r̄liladx. Din laaman rajp guialr̄niabee par yayūjnman laa reeman tijbzi con los demazri ree b́en Israel.

²⁴ Din l̄uj guial ad najtl b́en Israel, l̄uj guial canin najl zi'c tijb yag olivo ni yu' dajn, zile' niajqul tijbzi con yag olivo zagdxen ni rnin naj ree b́en Israel, ¡diixgui ree b́en Israel ni ad ruzoobt ree xtiidx Dios, nid zayajc reeman tijbzi ya con los demazri ree b́en Israel bal guzoob reeman xtiidx Dios!

Gac ree b́en Israel perdon

²⁵ Compniar raliduladx ree Jesucrist, yu' ni ad ragbeetidi abi' r̄enan gag-beedan, chitēē g̀ūndi nabē. B́en Israel r̀ujn ree nad par guzoob reeman xtiidx Dios, cayajc zian xt chi ma bayaaloj bililadx ree b́en ad najt ree b́en Israel, b́en ma naj ree par chililadx xtiidx Dios.

²⁶ Chi ma gojc zian, dxel graczi ree b́en Israel ma g̀ūncwent xtiidx Dios. Zian gac reeman perdon, zi'c r̄ēb loj xtiidx Dios lod r̄ēb: Luguiedx Sión za b́en gagnē ree b́en z̄ēēd loj xdiaa Jacob. Din yariica reeman loj nejz mal zinal reeman.

²⁷ Dxel gac cumplid da diidxan,
Zi'c ma rën loj reeman guial gūnan perdon xtol reeman.

²⁸ Per yan guial dád nad ree bèn Israel par chililadx reeman xtiidxa'c Jesucrist, zian yu' mod persi rililadxidi guial ad najtidi bèn Israel. Abi' majsi zian, rën gajc Dios laa reeman zi'c beenman promejs loj ree xbéngul reeman.

²⁹ Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëeladx téëtaman bèn ma gulejman par laaman.

³⁰ Gocli ad binaltidi xnejz Dios, per yan por ree bèn Israel ad ruzoobt xtiidx Dios, ma balüüman lëjt guial rayaman lëjt.

³¹ Abi' bal yan ad ruzoobt ree bèn Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman.

³² Cwëjb Dios guial zi'c ree bèn Israel në ree bèn ad najt bèn Israel ad zuzoobt reeman xtiidxaman, din gac yayaman gra reeman tiblojzi.

³³ ¡Dád zro' naj xguialrignia' Dios, në xguialrajcaman con xguialnaza'caman! Achuf zajc gagbeechaaw xhienaag naj xixgab Dios o ni cayüjnman.

³⁴ Zi'c ca loj xtiidxaman lod rëb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiëb lojman xhienaag güünman?”

³⁵ ¿O chu ma badëë xhienin lojman din cwëzaman quixaman laaman?”

³⁶ Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

12

Guialnaban cüb

¹ Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gól basa'n lëjt loj Dios zi'c tijb gon ni ma nagle' ni yayuladx téëman, din guibandi zi'c rënman, abi' zian guiëndi laaman.

² Ad guibanridi zi'c naban los demazri ree bèn yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rën Dios guibandi. Zian gagbeedi conin naj zagdx, conin ruladxaman, con téënin naj xnejz.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabë guial mazri lasajquidi loj ree bejn. Zagdxeli gol been xgab por lëjt zi'c rayal, segun naj quiargueijn ni baneë Dios loj tijbgajdi.

⁴ Din zi'c xcuerp bejn zien la' najn, per ad tijbtzi ni rüjnan.

⁵ Ziangajc dunuj ree guial raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiargueijn ni baca' ree, zi'c naj ni guyën Dios baneeman dunuj ree. Zeel bal ma baneeman quiargueijn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree.

⁷ O bal baneeman quiargueijn par yaguieen ree sirv ben ren ree, rayal yaguieen reen zi'c rayal. Bën cwa' quiargueijn par gulüüman bejn ree xtiidx Dios, rayal gulüüman bejn ree.

⁸ O bën cwa' quiargueijn par gudëëman consejw loj ree bejn, rayal gudëëman consejw. Guiáad bën cwa' quiargueijn par yazaladxaman xhienin loj ree bejn, rayal yazaladxaman con guidib luxdooman. Abi' bën cwa'

quiarguejn par nabeeman, rayal gapaman cudad nabeeman zi'c rayal, o bén cwa' quiarguejn par güünman yudar bén cazagdiaj ree, rayal chu' luxdoodan zagdxe güünman laa reeman yudar.

Ni rayal güün ree bén rliadx Jesús

⁹ Gol guyèn lasa'di con guidib luxdoodi, gol basa'n ree ni mal tiblاد, gol binal ni zagdxe.

¹⁰ Gol guyèn gra ree bejn zi'c tijb bijchidi, ad rüjn lëjt gajc benro', gol gojp respejt lasa'di.

¹¹ Ad gaquidi bén ploj par güündi ni rayal güündi, con guidib luxdoodi gol been sirv loj Dios.

¹² Gol badxe' luxdoodi zagdxe por ni cabëzidi tia'di, gol gudaan tée loj ni rzagdiajdi, ad gucwëez cwedx guñiabidi Dios.

¹³ Chi xhie ryaadx xcompniaridi, bén rliadx ree Jesucrist, gol been reeman yudar. Gol gojc benza'c con ree bén ri't lidxidi.

¹⁴ Gol gurejdx Dios por ree bén rzunal lëjt par güün reeman lëjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

¹⁵ Gol badxe' luxdoodi nix con ree bén yu' luxdoo nix, per con ree bén yu' luxdoo naya, gol been naguiejn din gagbee reeman guial za'quidi con laa reeman.

¹⁶ Gol gubajn zagdxe con ree lasa'di, ad güündi nabë, gol gojc bén naxanlaxd. Ad nalaxidi mazri rajquidi guial loj ree ben ren.

¹⁷ Ad güündi ni mal bén rüjn lëjt ni mal, gol been naguiejn güündi ni zagdxe loj gra ree bejn.

¹⁸ Gol been naguiejn da't din cwenëdi bejn ree zagdxe.

¹⁹ Compniar raliduladx ree Jesucrist, ad rgu' gualxyajn luxdoodi con ree bén rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: “Naj naj bén rayal güün xguialguxtis, gudë tëen ni rayal bejn. Zian rëb dux Dad ree Dios.”

²⁰ Rëb tëëman: “Bal rliaan bén rdxe'ch lüj, badëed ni gawaman, o bal re'caman nijs, badëed ni guië'man, zian guguiaal yatuman.”

²¹ Ad bal tiëbil güün ni mal lüj gan, been ni zagdxe din güünl ni mal guin gan.

13

Royal yaya'p ree guxtis respejt

¹ Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëed gualrniabee ni rajp reeman.

² Zeel bén ad ruzoobt xtiidx ree bén rniabee guin, rën guiëban guial ad rënt reeman güün reeman zi'c rniabee Dios. Abi' ree bén rüjn zian laagajc reeman rguuil xcasti,

³ din bén rajp ree gualrniabee ad za't reeman par guchejb reeman bén rüjn ree ni zagdxe, za' reeman par guchejb reeman bén rüjn ree ni mal. Yan bal rën'l guibanl guial ad zadxebtil bén ca' ree gualrniabee, gubajn zagdxe din yaya'nl zagdxe loj reeman.

⁴ Din laa reeman cayüjn reeman sirv loj Dios din yalaj reeman lüj. Per bal cayüjnl ni mal, zadxebil bén ca' ree gualrniabee, din ad ca' xlia'tzi reeman gualrniabee guin, laa reeman cayüjn sirv loj Dios din gudëed reeman casti bén rüjn ree ni mal.

⁵ Zeel rayal guzoobidi xtiidx ree bén ca' ree gualrniabee, ad güündi zian naabzi par ad zayaltidi casti, gol been zian guial ragbeedi zian rayal güündi.

⁶ Gol gudijx tée impuest, din gusnuu nabee ree bén ca' ree gualrniabee, din laan naj mandad bayal reeman par güün reeman sirv loj Dios.

⁷ Zeel gol badëed ni rayal gudëedidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx bén rayal guzoobidi xtiidx, gol gojp respejt bén rayal respejt.

⁸ Gol been naguiejn gol baguix ni ralidi loj ree bejn, abi' ad rayalt gucwëez güëndi bejn ree. Din bén rën bejn ree, ma cayünman cumplid gra ni rniabee xley Dios.

⁹ Xmandamient Dios rëban: “Ad sunël ben ren bén ad najt lacheelil, ad gugüjtijl bejn, ad cwanl, ad sëëbladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient rëb: “Guyën ben ren ree zi'c rën lüj gajc.”

¹⁰ Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaaloj rünjman gra ni rëb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman.

¹² Mazri caydop tiamp guin, abi' mazri cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguiejn yaguieen ree ganax ni zagdxe din yunaal ree nejz zagdxe.

¹³ Rayal yabajn ree zagdxe zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman graloj vijs, o gualrdil o gualrdëdloj.

¹⁴ Gol basa'n lëjt gajc loj dux Dad ree Jesucrist, ad rayalt guibandi zi'ctzi rëndi.

14

Ad gusa'nxtudi bén qui rliladxri xtiidx Dios

¹ Zagdxe gol guneenë bén qui rliladxri Jesucrist ad gusa'nxtudi laaman guial mazri rajquidi guial lojman.

² Din yu' ree bén rliladx Jesucrist naladx reeman zajc gaw reeman xhietëez nin, per yu' ree bén qui rliladxri naladx reeman guial zagdxeli naj ad zajwt reeman bëël.

³ Bén rünj xgab guial zajc gawaman xhietëez nin, ad rayalt güünman tiblax bén naladx yu' ni ad zajct gaw bejn. Guiáad bén rünj xgab guial yu' ni ad zajct gaw bejn, ad rayalt guze'man bén naladx zajc gaw bejn xhietëez nin. Din niz loj Dios tiblojzi ma naj reeman xbejnman.

⁴ Zeel, ¿chu naj bejn din guze' xcompniaraman bén rliladx Jesucrist por niguinzi ree? Diosqui ragbee bal cayünman ni zagdxe o cayünman ni mal. Abi' bal ad wayignia'taman xhienaag güünman, dxel dux Dad ree Jesucrist rajp gualrniabee par gagnëman laaman güünman zi'c rayal.

⁵ Ziangajc yu' ree dux compniar ree bén raliduladxnë' ree Jesucrist naladx reeman guial yu' dxej zobjloj, yu'za ree bén naladx guial tiblojzi naj gra dxej, per achet güünan, tijbgaj bejn con ni naladxman naj zagdxe par laaman.

⁶ Din bén rünj xgab guial yu' dxej zobjloj, rünjman zian persi rënman Dios. Guiáad bén naladx guial tiblojzi naj gra dxej, rünjman zian persi rënman Dios. Abi' bén raw graloj, rawaman guial yu'guijcaman guial por Dios zëëdan abi'

rudëeman quixtëe lojman. Gui'ad bèn naladx guial yu' ni ad zajct gaw bejn, rünman zian guial naladxaman zian cayajpaman Dios respejt abi' rudëeman quixtëe lojman.

⁷ Ni'qui du tijb ree ad nabant ree por dux xgabzi ree, o ad zayëjtt ree por dux xgabzi ree.

⁸ Bal nabajn ree por dux Dad ree Jesucrist par laa tëeman nabajn ree. Abi' bal yayëjt ree por laaman par laa tëeman yayëjt ree. Zeel bal nabajn ree o yayëjt ree, par dux Dad ree Jesucrist ma nayajc ree.

⁹ Din par zian güjtaman abi' babanman, din gacaman Dad loj ree bèn naban nê loj ree bèn ma güjt.

¹⁰ ¿Chexquiza din guze' lasa'l bèn rlladx Jesucrist o güün lasa'l tiblad ya? Awa dugra ree rayal yadxu' loj Dios din yadëed ree cwent lojman.

¹¹ Zi'c ca loj xtiidxaman lod rëb:

Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn guiëb guial naj naj Dios.

¹² Abi' tijbgaj dunuj ree rayal yadëed ree cwent loj Dios, per por dunuj gajc ree.

Ad gusajbidi bejn loj dol

¹³ Zeel ad rayalt yaneeGUIJDX du lasa' ree bèn rlladx ree Jesucrist, zagdxeli yaguieen ree naguiejn yaya'p ree cudad chitëe por dunuj ree güün reeman dol.

¹⁴ Naj najn xbejn Jesús, ragbeen guial ad dolt naj gaw bejn xhietëeznin. Per par bèn naladx guial ad zajct gawaman xhietëeznin, par laaman dolan cayünman bal gawaman xhietëeznin.

¹⁵ Yan bal por ni rawil naladx tijb xcompniaril bèn rlladx Jesucrist guial dolan cayün, abi' bal id ridxga'l laaman rën guiëban guial ad rëntil laaman. Gojp cudad chitëe por ni rawzil güün xcompniaril dol, din nêgajc por laaman güjt Jesucrist loj crüz.

¹⁶ Ad güün! tijb ni guinieGUIJDX ree xcompniaril lüj, majsi lüj ragbee guial ad ni malt naj ni cayün.

¹⁷ Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tée luxdoo man nix por xSprijt Dios.

¹⁸ Abi' bèn naban zian guial zinalaman Jesucrist, cayünman zi'c rën Dios, zi'c ruladx tée bejn.

¹⁹ Zeel rayal yaguieen ree naguiejn yabajnnë! du lasa' ree zagdxë yabedxe tée du luxdoo ree, din yasnuu yayagbee ree xhienaag yunaal ree xnejz Dios.

²⁰ Gol gojp cudad chitëe por ni rawzidi gunijtdi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayün.

²¹ Zeel zagdxeli naj guial ad zajwtil bëel ad zë' tëetil vin o xhie stijb nin bal por laan güün xcompniaril dol.

²² Majsi lüj ragbee guial achet güünan gaw bejn xhietëeznin, per zagdxeli lüjzi con Dios. Naj rni guial, ¡xiqulbaa bèn ad yu'nawëegt luxdoo rawaman xhietëeznin!

²³ Per bèn yu'nawëeg luxdoo par gawaman xhienin, abi' gawaman laan laagajcaman ma cayün dol guial ad cayawtraman guidib ladxaman. Bal naladx bejn ad laat naj ni cayünman, dxel laagajcaman cayün dol.

15

Royal yaguieen ree ni naladx bejn naj zagdxe

¹ Yan, dunuj ree guial ma nadxu'dxi'ch ree loj ni raliduladx ree Jesucrist, rayal yaguieen ree yudar bén ad wazudxi'cht loj guialrliladx Jesucrist luar yaguieen ree ni rayentzi ree,

² dugra ree rayal yaguieen ree naguiejn din chu' luxdoo dux compniar ree zagdxe con dunuj ree. Abi' rayal yaguieen ree ni naladx reeman naj zagdxe, din chile' gusnuu güünbee reeman xnejz Dios.

³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: "Naj bayal gra ree diidx mal ni ninia reeman lojl."

⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në guialragnë chitëë yalenyä' ree yalëjz ree ni ralëjz ree yaca' ree.

⁵ Dios, bén razaladx pacens në guialragnë chitëë yalenyä' ree, laaman gagnë lëjt din guibandi nadxag con gra ree xcompniaridi zi'c naj xixgab Jesucrist.

⁶ Din tiblojzi guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bén ad najt bén Israel.

⁷ Zeel, zi'c baca' Jesucrist lëjt par gaquidi xbejnman, ziangajc gol guneeñë ree xcompniaridi zagdxe, bén rliladx ree laaman par guiliesidi xvalor Dios.

⁸ Gol basaaladx guial bi't Cristo loj guidxliuj par gulüüman bén Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rünjqui Dios cumplid xtiidxaman.

⁹ Bi't tëë Cristo loj guidxliuj din por laaman, bén ad najt ree bén Israel guilies reeman xvalor Dios guial rayaman laa reeman, zi'c ca loj xtiidxaman lod rëb:

Xt loj ree bén ad najt bén Israel guzatan lüj
guial najl benza'c.

Gol tëen cant ree par lüj.

¹⁰ Ziangajc rëb zatibljajt loj xtiidx Dios:

Lëjt bén ad najt ree bén Israel,
gol babaa zi'c rabaa ree bén Israel.

¹¹ Zatibljajt loj xtiidx Dios rëb:

Gra ree bén ad najt bén Israel.

Në los demazri ree bejn, gol gules xvalor Dios.

¹² Rëb tëë Isaías:

Loj xdiaa Isaí, grii tijb bén nabee bénguidxliuj ree,
xt ree bén ad najt bén Israel, chililadx laaman.

¹³ Dios bén ragnë dunuj ree ralëjz ree ni caylëjz ree, laaman yagu' luxdoodi zagdxe yabe'cdxe tëëman luxdoodi guial rliladxidi laaman, din cwëz da'tidi ni guneeman por xSprijt Dios.

¹⁴ Compniar raliduladx ree Jesucrist, naj ragbeechaaw guial zagdxe nandj con ree xcompniaridi, ma ragbee tëedi zagdxe xhienaag chinalidi xnejz Dios, xt rajc rudëedidi consejw rulüü tëë xcompniaridi.

¹⁵ Per majsi zian, tio'p choon lajt loj gui'ch guië bacan diidx naa, din yasaaladxidi xhienaag guibandi. Rünan zian por guialrniabee ni ma baneë Dios naj,

16 din gūnan sirv loj Jesucrist. Din da dxiinan naj gulūn bën ad najt ree bën Israel xtiidxza'c Dios din guiban reeman zi'c rēn Dios, din gac reeman naya niz lojman por xSprijtaman.

17 Ra'pan xhie gūnnē'n nabē, guial ragnē Jesucrist naj por ree dxiin cayūnan por Dios.

18 Per achetczi zajc guiēn bal id zēn guial por Cristo cayūnan laan, din laaman cayagnē naj persi cayūnan yudar bën ad najt ree bën Israel din gac chililadx reeman guzoob tēē reeman xtiidx Dios. Yan ma rliladx reeman laaman por ni rēn loj reeman nē por guial ruguiaa reeman xhienaag nabanān,

19 nē guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilirico.

20 Din zian naj da xgaban gūnan, gatie'chan xtiidxza'c Jesucrist. Per ad lod ma guzulajt ben ren con dxiin guie, gatiechanan lod ad waguiejntczi reeman xcwent Cristo,

21 zi'c ca loj xtiidx Dios lod rēb:

Bën ad waguiejnt ree xcwentaman, gūūnbee reeman laaman.

Guiāad ree bën ad wayagbeet xcwentaman, gagbee reeman laan.

Rūjn Pab xgab cheman Roma

22 Abi' guial wan guidibczi lod ma rnin lojdi, zeel ad wayajct gan guidganan lējt, majsī zianczi guyēnan nidganan lējt.

23 Per yan guial ma gulox gutiechan xtiidx Dios guidib niz guie, abi' guial ma gojc zien iiz ni rēnan guidganan lējt,

24 zeel rūnan xgab guidganan lējt chi gan España. Abi' chi gadēēdan guguian lējt, chi ma gojc tio'p choon dxej yu' luxdoon zagdxe guial za'n con lējt, dxel ma gūūndi naj yudar din gan España.

25 Per yan yalōj gan Jerusalén chigsa'nān tijb yudar par ree dux compniar ree bën rliladx ree Jesucrist.

26 Din bën Macedonia ree con ree bën Acaya bën rliladx gajc ree Jesucrist, been reeman xgab guto'p reeman yudar guin par ree bēnprob zojb ree Jerusalén, bēn rliladx ree Jesucrist.

27 Abi' por xixgab reeman guixhiaal reeman yudar guin, per zagdxe naj ni cayūjn reeman din mal nuzēēb reeman loj reeman. Din por ree bën Israel bidxin xtiidx Dios loj reeman, dxel yan laa reeman guial ad najt reeman bën Israel, zagdxen guial gūūn reeman yudar bën Israel ree zi'ctzi gac reeman.

28 Zeel chi ma balooxan dxiin guie, chi ma bayūn yudar guin, dxel gan España, abi' chi gadēēdan ladxidi dxel guidganan lējt.

29 Naj ragbee guial chi guidganan lējt, zien da't ni gūnee Dad Jesucrist par ganin lējt.

30 Yan por dux Dad ree Jesucrist nē guial rēn xSprijt Dios dunuj ree, rniaaban lojdi din gūūndi naj yudar yarejdx yanaab ree Dios por naj.

31 Gol gurejdx gunab Dios din gagnēman naj loj ree bën Judea, bën ad rliladxt ree Jesucrist, gol gurejdx tēē Dios por dux compniar ree bën rliladx ree Jesucrist, bēn zojb ree Jerusalén din tiēb reeman tia' reeman yudar ni chigsa'nān par laa reeman.

32 Dxel bal gagnē Dios ma chu' luxdon zagdxe guidganan lējt dxel ma zajc yaziiladxan la'tgaj za'n con lējt.

33 Dux Dad ree Dios bén rabe'cdxe du luxdoo ree, laaman gagnë gradi. Amén.

16

Rugajpdioz Pab bejn ree

1 Yan ni gui't Febe ladxidi, béngunaa ni naj dux compniar ree guial raliduladx ree Jesucrist, bén cayüjn tée sirv lën yadoo ni zojb guiedx Cncrea.

2 Gol baca'man zagdxe por Dad Jesucrist, zi'c rayal yaguieennë' ree dux compniar ree bén rliladx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

3 Gol bagajpdioz Aquila con xbéngunaaman Priscila, bén cayüjn ree naj yudar cayguieenan sirv loj Jesucrist.

4 Abi' laa reeman xt guzuj reeman loj gualgüjt por naj, zeel rudën quixtëe loj reeman. Abi' ad najtzi rudë quixtëe loj reeman në ree dux compniar ree bén rliladx ree Jesucrist bén ad najt ree bén Israel rudëe quixtëe loj reeman.

5 Gol bagajpdioz ree bén rliladx Jesucrist, bén rado'p ree lidx Priscila con Aquila. Gol bagajpdioz da miwan Epeneto, bén goc bén yaloj bililadx xtiidx Jesucrist niz Acaya.

6 Gol bagajpdioz Li, bén ma been da't lëjt yudar.

7 Gol bagajpdioz ree bén ladxan Adrónico con Junias, bén guyu'në' reen ladxguiib. Abi' ree xi apóstoles Jesús dád rën reeman laa reeman, abi' yaloj laa reeman bililadx Jesucrist guial lon.

8 Gol bagajpdioz Amplias, da miwan bén rën da'tan guial nayajcan xbejn Jesucrist.

9 Gol bagajpdioz Urbano, bén cayüjn naj yudar cayguieenan sirv loj Jesucrist. Gol bagajpdioz tée da miwan Estaquis.

10 Gol bagajpdioz Apeles, bén ma balüü guial diidxliczi rliladxaman Jesucrist, gol bagajpdioz tée xfamil Aristóbulo.

11 Gol bagajpdioz tée Herodión ben ladxan, në ree xfamil Narciso, bén ma rliladx Jesucrist.

12 Gol bagajpdioz Trifena në Trifosa, bén cayüjn ree sirv loj Jesucrist. Gol bagajpdioz tée Pérsida, bén naguieenbee ree guial dád cayüjnman sirv loj Jesucrist.

13 Gol bagajpdioz Rufo, bén diidxliczi zinal xnejz Dios, gol bagajpdioz tée xniaaman, bén rënan zi'c da nan.

14 Gol bagajpdioz Asíncrito, Flegonte, Hermas, Patrobas, Hermes në gra ree bén za' con laa reeman, bén ma rliladx ree Jesucrist.

15 Gol bagajpdioz Filólogo, Julia, në Nereo con bizanman, në Olimpas con gra ree bén rliladx Jesucrist bén za' ree con laa reeman.

16 Gol bagajpdioz lasa'di zi'c rayal. Dux compniar ree bén raliduladx ree Jesucrist bén za' ree guie, rugajpdioz reeman lëjt.

17 Compniar raliduladx ree Jesucrist, rniaaban lojdi din gapidi cudad con ree bén rlia' lasa' ree bejn, bén rusquiee ree bejn guial rulüü reeman ni ren ree guial loj ni ma basiididi. Ad gudixga'di laa reeman,

18 din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxza'c rüjn reeman gan bén ad ragbeetzi ree o bén ad ragbeeza'ct ree xtiidx Dios.

¹⁹ Per lèjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rēnan susindi par güündi ni zagdxē ad par güüntidi ni mal.

²⁰ Dios, bèn rabe'cdxe luxdoo bejn, laaman gagnē lèjt nayob chitēē güünri xindxab lèjt gan. Dux Dad ree Jesucrist gagnē lèjt.

²¹ Rugajpdioz Timoteo lèjt, bèn cayüjn naj yudar con xchiin Dios ni cayünan, nē ree bèn ladxan bèn la ree Lucio, Jasón, nē Sosípater, rugajpdioz reeman lèjt.

²² Nē Tercio, bèn cayüjn gui'ch guie rugajpdioz lèjt por dux Dad ree Jesucrist.

²³ Nētēē Gayo rugajpdioz lèjt, lidxaman za'n, runee tēē lidxaman rado'p ree dux compniar ree bèn rliladx ree Jesucrist. Nē Erasto, bèn naj tesorer luguiedx guie nē bèn la Cuarto ben rliladx Jesucrist, rugajpdioz reeman lèjt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radēēn quixtēē loj Dios din laaman zile' gagnē lèjt din gusnuu gagbeedi sudxi'ch tēēdi loj xtiidxza'c Jesucrist, zi'c ma balüün lèjt xhienaag din gaquidi perdon. Din zian naj xixgab Dios diidx chi gad guidxliuj gacchaaw, xgab ni ad gogbeet ree bejn diidx guia'xchej.

²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bèn badēē xtiidx Dios loj ree bejn zi'c gunabee Dios laa reeman, bèn naban goctēēz. Abi' guidibczi care'ch xtiidx Dios din chililadx ree bejn Jesucrist guzoob tēē reeman xtiidxaman.

²⁷ ¡Tijbzi Dios, bèn rajc gradooczi, rayal yaya'p reeman respejt zianczi por Dad Jesucrist! Amén.

Gui'ch yaløj ni guxhaal San Pabl loj ree bèn Corinto riladx Jesucrist

Rxhiaal Pab xtiidx Dios

¹ Naj Pab, Dios bacaabee naj gacan tijb xi apóstol Jesucrist. Za' Sóstenes guie con naj, bèn riladx Jesucrist.

² Caxhalan gui'ch guie par lèjt najdi bèn riladx xtiidx Dios luguiedx Corinto, lèjt guial ma nayadi delant loj Dios por Jesucrist, abi' ma bacaabee Dios lèjt gaquidi xbejnman bacaabee tèëman gra ree bèn gra lad bèn riladx ree Jesucrist, bèn naj Dad par dunuj ree nè par laa reeman.

³ Dux Dad ree Dios nè Dad Jesucrist güünle' lèjt, yabe'cdxe tèë reeman luxdoodi.

Rudëed Pab quixtëe loj Dios

⁴ Gra dxejczy rudëdan quixtëe loj Dios por lèjt zi'c ma gognëman lèjt guial riladxidi Jesucrist.

⁵ Nè guial najdi tijbzi con Jesucrist dád ma gognë Dios lèjt, baneeman lèjt quiarגיעjn dín guinieedi chignia' tèedi xtiidxaman.

⁶ Zian rguien guial diidxli naj ni ma biguiejndi por Cristo diizd chi guzuløj bililadxidi laaman.

⁷ Abi' zianczy rajpidi xyudar Dios la'tgaj rbëzidi dxej ni gui't Jesucrist zatijb.

⁸ Abi' Dios gagnë lèjt dín sudxi'chidi guidiblagaa loj ni riladxidi laaman, chitëe xhie xtolidi chu' dxej ni gui't dux Dad ree Jesucrist zatijb.

⁹ Dín Dios diidxli rüjn xtiidxaman cumplid, abi' laaman naj bèn gule lèjt dín gaquidi tijbzi con dux Dad ree Jesucrist.

Ad rayalt la' lasa' ree xbejn Jesucrist

¹⁰ Compniar raliduladx ree Jesucrist, rniaaban lojdi por Jesucrist dín guidxag cwedi, ad gaquidi tio'p lala', tijbzi gol gojc, tijbzi xgab gol been.

¹¹ Rnín lojdi zian compniar raliduladx ree Jesucrist, dín ma gogbeen guial yu' wadijl entr lèjt, zian bagojn ree xfamil Cloé naj.

¹² Guial garent garen rëb ree bejn, yu' reeman rëb: "Naj naj xbejn Pab", yu' tèë reeman rëb: "Naj naj xbejn Apolos", yu' reeman rëb: "Naj naj xbejn Béd", yu' tèë reeman rëb: "Naj naj xbejn Cristo."

¹³ Per naj rni lojdi guial Cristo tijbzi najman, dín ad najt gü't loj crüzj por lèjt, ad gurobnijs tèëtidi par gaquidi da bejnan.

¹⁴ Quixtëe Dios chi wan ladxidi achut mazri barobnijsan, Crispozi nè Gayo.

¹⁵ Chitëe guiëbidi guial gurobnijsidi par gaquidi da bejnan.

¹⁶ Barobnijs tèën xfamil Estéfanas, per ad rusaaladxtran chu mazri barobnijsan.

¹⁷ Dín ad guxhaal Cristo naj par gurobnijsan bejn ree, guxhaalaman naj par gatie'chan diidx xhienaag gap bejn perdon loj Dios. Ad cane tèëtan con diidx ni yadxaløj ree bejn naj luar cu'guijc reeman par xhie güjt Cristo loj crüzj.

Xguialrniabee Dios nè xquiarגיעjnman

¹⁸ Gra ni raguie'ch ree guial por xhie güjt Cristo loj crüzj, achet lasajcan par ree bèn zë loj nejz mal. Per par dunuj ree guial ma raya'p ree perdon,

dád lasajc xguialgüjtaman din zian rayagbee ree xhienaag naj xguialrniabee Dios.

¹⁹ Abi' loj xtiidx Dios rëb:

Gunijtan xquiargueijn ree bén ni rëb guial rajc da't reeman, abi' guscajyan xquiargueijn ree bén ni rëb guial rignia' da't reeman.

²⁰ Yan, ¿con ree bén rëb guial rajc da't reeman? ¿Con ree mextr rajc ley? ¿Con ree bén rëb guial rajc da't reeman xcwent ree ni yu' loj guidxliuj? Par Dios achet lasajc xquiargueijn bénguidxliuj.

²¹ Abi' por xquiargueijn Dios ragbeechaawaman guial ad zayünbeet bénguidxliuj laaman por xquiargueijn reeman, zeel beenman xgab yabëëman bejn loj casti por xtiidxaman ni caylüün bejn ree. Abi' ree bén yarii loj casti guin laa reeman naj bén rliładx laaman, majsi par ree ben ren achet lasajc ni canin por Cristo.

²² Din bén Israel ree rën reeman guguaa reeman milagr din chililadx reeman, abi' ree bén ad najt bén Israel rën reeman guien reeman ni mazri nawëëg din chililadx reeman.

²³ Per dunujn ni caylüün bejn ree naj par xhie güjt Cristo loj crüjz, abi' ree bén Israel rdx'e'ch reeman, guíaad par ree bén ad najt bén Israel achet sirv rüjn ni caylüün.

²⁴ Per par ree bén ma bacaabee Dios, zi'c ree bén Israel zi'c ree bén ad najt bén Israel, por Cristo rguien xguialrniabee Dios në xquiargueijnman.

²⁵ Din ni rulüü achet lasajc guial ni rüjn Dios, laan naj ni mazri lasajc loj xguialrajc bénguidxliuj. Abi' xt ni bigra xguialrniabee Dios laan naj ni mazri lasajc loj xguialrniabee bénguidxliuj.

²⁶ Gol gogbee compniar raliduladx ree Jesucrist guial ta'nzi ree bén rliładx laaman naj bén rignia' zi'c naladx ree bénguidxliuj, ta'nzi ree bén rliładx laaman rajp guialrniabee loj guidxliuj guie, abi' ta'nzi ree bén rliładx laaman naj ree bén za loj ree famil ni naj bén zojbloj.

²⁷ Abi' Dios gulej ree bén ni naladx ree bejn ad rajcza'ct din yaya'nxtu ree bén rajc da't, gulej tëëman bén ad ca't ree guialrniabee din yaya'nxtu ree bén ca' guialrniabee.

²⁸ Dios gule ree bén ni naladx ree bejn guial achet sirv laa reeman, bén ni naladx ree bejn guial achet lasajc reeman, bén ni achut naj loj guidxliuj guie din chiquiedaman xguialdxal ree bén naj ree chunin loj guidxliuj guie.

²⁹ Zianan zeel achut zajc güün benro' delant loj Dios.

³⁰ Yan por Dios ma najdi tijbzi con Jesucrist, dxel por laaman rtia'di xguialrajc Dios. Abi' guial raliduladx ree Jesucrist ad zayaltri ree casti, por laaman ma naya ree, nayajc tëë ree par laaman abi' ma raya'p ree perdon loj Dios.

³¹ Zianan din gac zi'c rëb loj xtiidx Dios lod rëb: “Bal yu' bén rën guilies xvalor gajc, luar güündi zian gol gules xvalor dux Dad ree Jesucrist.”

2

Xtiidx Jesucrist bén cwa loj crüjz

¹ Compniar raliduladx ree Jesucrist lëjt ragbee guial chi wan ladxidi, chi gunen xtiidx Dios lojdi, ad gunetan lojdi con ree diidx nabee o con ree diidx nawëëg par chignia'di.

² La'tgaj guzun con lëjt ad gunetan diidx ren ree lojdi, tijbzi xcwent Jesucrist bén cwa loj crüjz.

³ Abi' chi wan ladxidi zi'c tijb bèn ni ad yu't gojl, rniyczan guial rdxeban bialan lojdi.

⁴ Nè chi gunenè'n lèjt, chi gunen xtiidx Dios lojdi, ad gunenè'tan lèjt con ree diidx ni gūnan lèjt gan por da diidxan, benan gan rliadxidi Jesucrist por xyudar xSprijt Dios nè xguialrniabeeman.

⁵ Din guiguien guial ni rliadxidi Jesucrist zèedan por xguialrniabee Dios ad por xguialrajct bénguidxliuj.

Por xSprijt Dios nūnbee bejn laaman

⁶ Majsī chi ralūūn bèn ni ma rajc ree mazri xtiidx Dios, ralūūn laa reeman por guialrajc. Per ad por guialrajct ni yu' loj guidxliuj guie, lasa' guialrajc ni rajp ree bèn rniabee, guialrajc ni yu' dxej nit.

⁷ Ralūūn laa reeman por guialrajc ni zèed por Dios, din yanee ree zi'c naj xixgab Dios, xgab ni goc ni naguie'ch par ree bénguidxliuj, abi' xgab guin naj guial chilladx reeman Jesucrist, diidx chi gad guidxliuj gacchaaw been Dios xgab guin din gac yayal ree xanyabaa.

⁸ Laan naj tijb ni ad gogbeet ree bèn rniabee loj guidxliuj guie, din bal niagbee reeman dxel ad nucaat reeman dux Dad ree Jesucrist loj crūjz, bèn ca' guialrniabee.

⁹ Per loj xtiidx Dios rēb:

Achut waguiaa, achu tēēt waguiejn
abi' ni'quid wayūjnt bénguidxliuj xgab
por ni nagu'chaaw Dios par ree bèn rēn laaman.

¹⁰ Per dunuj ree ma balūū Diosan duloj ree por xSprijttaman bèn naban con dunuj ree, din xSprijt Dios gran ragbeeman, xt ni mazri naguie'ch ni zèed por Dios.

¹¹ Achut ragbee xhie xgab cayūjn tijb bejn. Xsprijtsaman ragbee xhie xgab cayūjnman. Ziangajc xSprijt Dios tijbzi laaman ragbee xhienaag naj xixgab Dios.

¹² Abi' dunuj ree guial ma zunaal ree xnejz Dios, ad nabajnt ree con tijb sprijt ni zèed loj guidxliuj guie, ma nabajn ree con Sprijt zèed loj Dios, dīn por xSprijt Dios yayagbee ree gra ni ma bazaladx Dios duloj ree guial najman benza'c.

¹³ Abi' laa reen naj ni caylūūn bejn ree, per ad por dux quiarguiejntan, xSprijt Dios culūū dunujn xhienaag yanen. Zian ralūūn xcwent Dios bèn ma nabannè xSprijttaman.

¹⁴ Per bèn ad nabannèt xSprijt Dios ad rliadxttaman ni zèed ree por Dios ni rulūū xSprijt Dios dunuj ree, dīn par laaman najn tijb ni ad rūjnt sirv. Zeel ad zajct chignia'man xcwent Dios dīn con xSprijtzī Dios zajc chignia' bejn ni rēn guieban.

¹⁵ Per bèn ma nabannè xSprijt Dios por Sprijt guin rignia'man ni naj xcwent Dios, abi' ni'qui tijb ree bèn ad nabannèt xSprijt Dios ad rignia't chexc zeel rignia'man ni guin ree.

¹⁶ Loj xtiidx Dios rēb: “¿Chu ma bignia' xixgab Dios? ¿Chu zajc gulūū Dios ni gūnman?” Per dunuj ree, naj dux xgab ree zi'c xixgab Cristo.

3

Compniar rūjn ree sirv loj Dios

¹ Compniar raliduladx ree Jesucrist, chi guzun con lèjt ad gunenè'tan lèjt zi'c ree bèn ma nabannè xSprijt Dios, gunenè'n lèjt zi'c ree bèn ad nabannèt xSprijt Dios, zi'c ree bèn quī guzuløjri rliadx Jesucrist.

² Diidx ad nawëëgt ree gunenë'n lëjt zi'c rudëë bejn lejch loj tijb xindobëz guial xo gawix ni raw bengol, zian gunenë'n lëjt diidx ad nawëëgt ree. Abi' ni'qui yan ad zile't ganenë'n lëjt zi'c ree bèn ma rignia' mazri xtiidx Dios.

³ Din sta nabandi zi'c naban gra ree bénguidxliuj. Nadëdloj lasa'di rdil tëëdi, zian rguien guial sta nabandi zi'c gra ree bénguidxliuj bèn ad zinalt ree xnejz Dios.

⁴ Din chi rëbidi: “Naj naj xbejn Pab”, o chi rëbidi ya: “Naj naj xbejn Apolos”, zian rguien guial sta cayüjndi zi'cgajc chutëëz bénguidxliuj.

⁵ Per naj rni lëjt: ¿Chu naj Pab o chu naj Apolos? Gol gogbee guial nayajczan tio'p ree bèn cayüjn sirv loj Dios persi bile' bililadxidi tijb gajc dunujn cayguieen dxiin ni banee Dios dunujn.

⁶ Yaguie'ch ree guial naj naj zi'c bèn rxübin abi' Apolos naj bèn rguiil, per por Dios cayagbeedi mazri xtiidxaman zi'c rusni'saman tijb cwaandoo.

⁷ Abi' zi'c bèn rxübin zi'c bèn caguuil mandadzi cayüjn reeman, Diosan naj bèn ni rusni's ni rxübin reeman.

⁸ Yan ziangajc naj con Apolos tijbzi mandad cayguieenan, rayagbeen guial zunee Dios dunujn ni rayalan bal xhienaag yaguieenan mandad ni baneaman yaguieen tijb gajc dunujn.

⁹ Zeel naj con Apolos nayajcan compniar cayguieenan xmandad Dios.

Yaguie'ch ree lëjt naj xguiniaa Dios lod cayguieenan dxiin o lëjt naj zi'c tijb yu ni cayüjn Dios.

¹⁰ Abi' naj guial catiechan xtiidxaman najn zi'c tijb albanil bèn ni rajp da't cudad din grii xchiinman zagdxe guial bacaabeeman naj günan xcimiant yu guin. Abi' ree bèn ni cusnuu culüü xtiidx Dios, laa reeman naj zi'c bèn cusnuu cayüjn yu guin. Per rayal gap reeman cudad xhienaag cales reeman yu guin,

¹¹ Din achut zajc guchaa cimiant ni ma benan, abi' cimiant guin naj guial rililadx Jesucrist.

¹² Abi' ree bèn ni cayguie'ch ree naj ree bèn ni cusnuu cales yu loj cimiant ni cayguie'ch ree naj gualrililadx Jesucrist, bal cayüjn reeman laan con or o con plajt o con ree guiaj zagdxe o con yag o con biqui o con balagya'.

¹³ Per chi guidxin dxej ni güün Dios xguialguxtisaman, dxel guiguien xhienaag naj xchiin reeman. Din dxej guin gac zi'c chi rajc prueb xhienin loj guij din guiguien xchiin tijb gajc bejn.

¹⁴ Abi' bal rüjn sirv ni beenman zi'c tijb bèn ni ruzoob tijb yu ni ad re'ct, zaca'man ni rayalaman por ni beenman.

¹⁵ Per bal che'c ni beenman, sacaman zi'c tijb bèn ni re'c lidx abi' penz rliaaman loj bajl, din zajcaman perdon per gusëëbaman gra.

¹⁶ Zeel gol gogbee guial lëjt naj zi'c tijb xyadoo Dios guial nabandi con xSprijt Dios.

¹⁷ Abi' bal chu bèn gutie'chdojn bèn rililadx ree Jesucrist, zunidloj Dios laaman guial ruse'nman xyadoo nagle'man ni canin naj lëjt guial najdi xbejnman.

¹⁸ Ad gusquiee lëjt gajc. Bal yu' tijbidi naladx guial rajc da'tidi guial loj ree bejn, zagdxeli gol been naya din gaquidi diidxli bënrajc da't.

¹⁹ Din delant loj Dios achet lasajc gualrajc bénguidxliuj, tib lajt loj xtiidxaman rëb: “Ad rudëë Dios mod grii zagdxe ni naj xixgab ree bèn naladx guial dá d nasin reeman par güün reeman tijb ni ad najt xnejz.”

²⁰ Rëb tëë loj xtiidxaman: “Dios ragbeechaaw guial xixgab ree bèn rajc da't achet lasajcan.”

²¹ Zeel ad rayalt chu guilies xvalor gajc guial najman xbejn tijb bejn o stijb bejn. Din xieendi ma naj gra.

²² Ma nulendi dunujn, naj Pab, Apolos n  B d. Xieendi naj guidxliuj, guialnaban, guialg jt, ni yu', n  ni qui chu'ri, xieendi naj gra.

²³ Abi' l jt ma najdi xbejn Cristo abi' Cristo naj Xi'n Dios.

4

Dxiin ni been ree b n naj ree xi ap stoles Jes s

¹ Gol baguiaa dunujn zi'ctzi xmojs Cristo par yasiidan bejn ree xhienaag naj xixgab Dios, xgab ni naguie'ch par bejn.

² Per l jt ragbee guial tijb mojs naj par g nman gra ni rayal g nman din gap reeman laaman confianz.

³ Zeel ad rutan xgab bal xhienaag ruguiaadi naj o bal xhienaag ruguiaa ree guxtis naj, din ni'qui naj ad zajct ganin xhienaag najn.

⁴ Din majsi bal naladxan guial achet ni mal way nan per ad por ziant ma ganin guial achet da faltan niz loj Dios, tijbzi dux Dad ree Jesucrist ragbee xhienaag cay nan.

⁵ Zeel ad rayalt yadxa lojdi chu cay jn zagdxe o chu ad cay jnt zagdxe, gol basa'n ree ni guin par dxej ni gui't Dad Jesucrist. Laaman gusguien conin naj diidxli, o bal wali ree baguieen ree xmandadaman guidib du luxdoo ree, dxej guin yayagbee ree xhie diidxza'c guiniee Dios por tijb gaj dunuj ree.

⁶ Compniar raliduladx ree Jesucrist, gra ree ni canin l jt wen par l jtan. Abi' Apolos con naj nayajcan tijb ejempl par l jt, din por dunujn gusiididi ad t dlaj guiliesidi xvalor bejn chit e por zian gusa'ndi trajs stijb bejn.

⁷ Din ni'qui tijb bejn ad lasajct mazri loj stijb bejn.  O xhie rajpidi ni ad baneet Dios lojdi? Abi' bal por laaman rajpidi ni rajpidi,  chexc zeel rlies xvalorgajquidi zi'c rul u ad por Diost rajpidi laan?

⁸ L jt naladxidi achet ryaadxidi, guial ma bayaaloy rignia'di abi' ad ryaadx-tridi dunujn. Abi' naladxidi najdi zi'c ree rey.  Per xinix niajquidi rey din nanabeen con l jt!

⁹ Yu' dxej naladxan guial dunujn nayajcan xi ap stoles Jes s, Dios basial dunujn yayajcan zi'c ree b n ad lasajct, zi'c ree benmal ni rayal guialg jt, abi' radxaloy ree anjl n  ree b nguidxliuj dunujn.

¹⁰ Abi' la'tgaj nayajcan zi'c ree b n ad yu't xquiarguiejn par b nguidxliuj guial ratie'chan xtiidxza'c Cristo, l jt rlies xvaloridi guial rignia' da'tidi guial riladxidi laaman. Dunujn nayajc zi'c b n ad yu't gojl gui ad l jt naladxidi yu' da'tidi gojl abi' rajp ree bejn l jt respejt gui ad dunujn ad r nt reeman dunujn.

¹¹ Xt yandxej sta cayzaagdiajn por guialrliaan, guial re'c nijs n  guial ryaadx du xaban. Zienloj ni r jnn  ree bejn dunujn, achet du lidxan.

¹² Abi' d d radxagan raguieenan dxiin din guidxel ni yadaawan. Chi ruzaal ree bejn diidxmal du guijcan radxi'nan con diidxza'c, abi' radaanan ni r jnn tzi reeman dunujn.

¹³ Abi' chi rnieeguijdx reeman dunujn, raneeza'cn 'n laa reeman. Xt yan nayajcan zi'c tijb guix par b nguidxliuj, nayajcan zi'c tijb ni ad r jnt sirv par laa reeman.

¹⁴ Ad cucatan gui'ch guie par gusa'nxtun l jt, cucan laan din gunen l jt consejw zi'cgajc da xi'n reen guial r nan l jt.

¹⁵ Din majsi gapidi zi'c chii mil ree bèn gusiid lëjt, per najzi naj zi'c tijb Dad par lëjt. Din por naj guzuloj rliadixidi Jesucrist chi basidan lëjt xtiidxxa'caman.

¹⁶ Zeel rniaaban lojdi din guibandi zi'c nabanan.

¹⁷ Din par zian rxhialan Timoteo guitixlojman lëjt, bèn rënan zi'c da xi'n'an laaman diidxli rliadixaman Jesucrist. Laaman gusaaladx lëjt xhienaag nabanan guial rliadixan Jesucrist, din zi'c nabanan naj ni cusidan bèn rliadix ree Jesucrist gra lod ran.

¹⁸ Yu' ree xcompniaridi naladx guial ad zitixlotran lëjt abi' rlies xvalor reeman guial naban reeman zagdxe.

¹⁹ Per Dios gunee permis din diob guitixlon lëjt dxel gagbeen wali reeman ya naban reeman zi'c rniee reeman o rnieez reeman.

²⁰ Din guial guiban zi'c rniabee Dios ad najtan diidxxi, rayal güün bejn zi'c rniabee Dios con xguialrniabeeman

²¹ Yan, ¿conin rëndi günan chi guitixlon lëjt, gadilë'n lëjt ya o guiënan lëjt ganenë'n lëjt diidxxa'c?

5

Xhienaag gac con bèn rüjn tijb dol

¹ Ma bacagdiagan guial tijb lëjt bèn rliadix ree Jesucrist nabannë xnarojpidi zi'c lacheelidi, ni'quiza ree bèn ad nünbeet Dios ad rüjnt lasa' dol guin.

² Abi' lëjt rüjndi benro', luar rüjndi benro' gol guyunaya gol babëë tëë bèn guin lojdi.

³ Majsi ad za'tan con lëjt, per rünan xgab por lëjt zi'cgajc rulüü za'n con lëjt, abi' ma benchaawan xgab xhie rayal bèn rüjn dol guin.

⁴ Zi'c guialrniabee ni banees Jesucrist naj, naj rni lëjt: "Gol bachajg lasa'di." Dxel gol gunaladx guial za'n con lëjt abi' por xguialrniabee Dad Jesucrist,

⁵ gol been bèn guin tiblax, gol basa'nman loj xinxxab din gagnaaman o sagdiajman por ni cayüjnman din gacaman perdon dxej ni gui't dux Dad ree Jesucrist.

⁶ Ad nixtan guial rlies xvalorgajquidi abi' rtiëjbidi rajc lasa' ree dol guin. Gol gogbee guial zi'c rüjn levadur cob par guiadxtil ziangajc con tijb bèn güün dol ma zë gajcan zian con gra ree lasa'di.

⁷ Zeel gol been naguiejn din gaquidi naya zi'c cob harin ni ad yu't levadur guijc. Din zi'c bagüjt ree bejn tijb xiil lanij pascw din yaya xtol reeman, ziangajc dunuj ree por xguialgüjt Jesucrist ma naya ree loj Dios.

⁸ Abi' guial yabaa ree por zian naj guial yabajn ree guidib du luxdoo ree zi'c rayal, zi'c guiadxtil ni ad no'cht levadur, luar yabajn ree con ree ni mal në ree dol zi'c babajn ree yaloj.

⁹ Abi' zi'c ma rnin lojdi loj stjib gui'ch ni ma guxhalan lojdi, ad guchajguidi bèn naban ree nadxuudx.

¹⁰ Ad canenë'tan lëjt zian por ree bèn ad rliadix Dios, bèn naban ree nadxuudx o rzëëbladix reeman ni ruguiaa'tzi reeman o naj reeman gubaan o rën reeman ni ren luar guiën reeman Dios, din bal zianan dxel ryaadx yariidi loj guidxliuj guie.

¹¹ Bèn ni canin lëjt naj ree bèn ni rëb naj ree xcompniaridi, bèn rliadix ree Jesucrist abi' naban reeman nadxuudx, o rzëëbladix reeman ni ruguiaatz reeman, o rën reeman ni ren ree luar guiën reeman Dios, o rbëë reeman xtiidx bejn, o naj reeman bengui', o bëngubaan. Xcompniaridi bèn naban ree zian ni'quid rayalt gawnëdi laa reeman.

12-13 Ad da cwenttan naj ganen por ree bèn ni ad najt dux compniar ree loj ni raliduladx ree Jesucrist bal rajp reeman dol o ad rajpt reeman dol, Dios naj bèn güün guialguxtis con laa reeman, per dux cwent ree naj guial yazuxnejz ree bèn naj ree dux compniar ree bèn rliladx ree Jesucrist. Zeel gol babëë bèn cayüjn dol entr lojdi.

6

Chi yu' wadijl entr ree bèn rliladx Jesucrist

1 Zi'c chi xhie rzajcnë tijb xcompniaridi bèn rliladx Jesucrist, ¿chexc zeel rëjdi loj guxtis din yabëëxnejzaman ni rzajquidi luar chedi loj ree xcompniaridi bèn rliladx ree Jesucrist?

2 ¿Id rliladxidi ya guial yu' dxej bèn rliladx ree Jesucrist laa reeman naj bèn güün xguialguxtis loj ree bénguidxliuj? Abi' bal yu' dxej güün xguialguxtis reeman loj bénguidxliuj, ¿chexquiza zeel ni ad nawëëgt ni rzajc ree xcompniaridi ad rajct rabëëxnejzidi?

3 ¿Id ragbeedi ya guial xt loj ree xianjl Dios yu' dxej yaya'p ree guialrniabee? ¡Abi' xt mazri zile' yalëëxnejz ree ni cayza'c ree loj guidxliuj guie!

4 Zeel zi'c chi xhie rzajcnë lasa'di, ¿chexc zeel zëdi loj ree bèn ad najt xbejn Cristo din yabëëxnejz reeman ni rzajquidi?

5 Canin lëjt ni guin ree din yatu lojdi. ¿Wen nid yu'czi tijb lëjt zajc yabëëxnejz ni rzajc lasa'di ya?

6 Per lëjt luar güündi zian aal rudëëd lasa'di loj ree bèn ni ad rliladx Dios.

7 Abi' natun guial gudëëd xcompniaridi loj guxtis guial cadilidi, mejorli gol gudaan ni rüjnnë reeman lëjt. Mejrli tiëbidi cuan reeman xieendi.

8 Per luar güündi zian, lëjtli cayüjn ree ni mal guin con ree xcompniaridi bèn rliladx ree Jesucrist. Rtia'di xieen reeman abi' rüjnnëdi laa reeman ni ad rayalt güünnëdi laa reeman.

9 ¿Id ragbeedi ya guial bèn naj ree benmal ad zut reeman loj xguialrniabee Dios? Gol gogbee guial loj xguialrniabee Dios ad zut ree bèn ni naban ree nadxuudx, në ree bèn rën ree ni ad najt ree Dios, në ree bèn za'në bèn ad najt lacheel reeman, në ree xinguaaw rüjn zi'c béngunaa në ree xin rën lasa' xinguaaw zi'c béngunaa.

10 Në ree béngubaan, në ree bèn rzëëbladx ni ruguiaatzi reeman, në ree bengui' con ree bèn rnieeguidx bejn, në ree bèn raguiil xhienaag chiquied reeman xieen bejn, ad zut reeman loj xguialrniabee Dios.

11 Yu'di gubajn zian guia'xchej, per yan ma nayadi delant loj Dios, ma najdi par Dios, abi' ma nayabidi zi'c tijb bèn ni ad wayüjnt dol por xguialrniabee Dad Jesucrist në por xSprijt Dios bèn ma nabannëdi.

Dux cuerp ree naj par Dios

12 Walican zajc yaguieen ree zi'ctzi rayën ree, per ad gratan naj zagdxe par güün bejn. Zajc gūnan zi'ctzi rënan, per ad zatiëëbtan xhie nabee naj.

13 Yu' ree bejn rëb: "Guialraw naj par lën bejn, abi' lën bejn naj par guialraw." Walican, per gunidloj Dios grop ree ni guin. Per ad walitan guial xcuerp bejn naj par güünman ni dxuudx ree con bèn ad najt lacheelaman. Din dux cuerp ree naj par Dios, abi' laaman rniabee dux cuerp ree.

14 Dxel zi'c basban Dios dux Dad ree Jesucrist, ziangajc yasbanman dunuj ree por xguialrniabeeman.

¹⁵ Gol gogbee guial ma najdi tijbzi con Cristo, guial dux cuerp ree ma naj tibliá' xcuerpaman. ¿Wen yaca' ree xcuerp Cristo ya ni cayguie'ch ree naj dux cuerp ree par yuné' ree tijb béngunaa dxuudx? ¡Ad rayalt gac zian!

¹⁶ ¿Nid ragbeedi ya guial chi runé bejn tijb bén ni ad najt lacheelaman, dxel ma najman tijbzi con bendxuudx guin? Lëjt ragbee guial loj xtiidx Dios rëb: "Grop reeman ma naj tijbzi."

¹⁷ Per bén ni ma naj tijbzi con dux Dad ree Jesucrist, najman tijbzi con laaman por xSprijt Dios.

¹⁸ Gol gojp da't cudad ad güündi ni dxuudx ree con bén ad najt lacheelidi. Xhietëéz dol ren ad ruxhiintan xcuerp bejn zi'c rxin xcuerpaman chi rüjnman ni dxuudx con bén ad najt lacheelaman.

¹⁹ Din gol gogbee guial lëjt naj xyadoo xSprijt Dios bén ma baneeman lojdi, dxel zian zi'c ma nabandi con xSprijt Dios ad rniabeetri lëjt gajc.

²⁰ Din par zian gudijx Jesucrist por dunuj ree chi gütaman loj crüjz. Zeel gol beennë xcuerpidi dxiin par güündi Dios bén zojbloj, din laaman naj bén rniabee lëjt.

7

Consejw xcwent guialruxhliia

¹ Yan, yadxi'n diidx xcwent ni gunabdiidxidi naj loj gui'ch ni guxhaalidi lon. Naj rni zagdxé naj guial ad zuxhliia bejn.

² Per chitëë güün bejn dol con stijb bejn, zagdxen guial tijb gaj xinguaaaw chu' lacheel o tijb gaj béngunaa chu' lacheel,

³ din gudëë xinguaaaw guin gust lacheelix abi' béngunaa guin gudëézaman gust lacheelaman.

⁴ Din chi ma baxhliia tijb béngunaa ad laatraman rniabee xcuerp, xinguaaaw guin naj xin rniabee laan. Ziangajc chi ma baxhliia xinguaaaw, ad rniabeetri xcuerpix, béngunaa guin ma rniabee laan.

⁵ Zeel xinguaaaw në béngunaa ad rayalt gudxoon xcuerpidi loj lacheelidi. Per bal ma bedi diidx con lacheelidi guial ad zugaalt lasa'di tio'p choon dxej din cwedx guiniabidi Dios, zagdxen. Per chi ma gudëé ree dxej guin, gol bachajg lasa'di stijb chitëë güün xindxab lëjt gan con ree xixgabidi.

⁶ Ad canitan lojdi guial najczi guxhliia bejn, per ad ni maltan guial guxhliiaadi.

⁷ Da xgaban naj guial xi nix gra ree bejn gac zi'c naj, per tijb gaj bejn ma bazaladx Dios xquiargueijnman guial xhienaag guibanman, bal guxhliiaaman o bal id zuxhliiaaman.

⁸ Par ree bén xtijb në par ree béngunaa bizëjb, naj rni guial zagdxeli yaya'n reeman zi'c naj.

⁹ Per bal id zadaan reeman guial ad zuxhliiaat reeman, dxel zagdxeli guxhliia reeman luar gudëéd xcuerp reeman casti guial taan reeman.

¹⁰ Guíaad ree bén ma baxhliia, ad da diidxntan ganin lojdi, xtiidx dux Dad ree Jesucristan guial ad zaro'nt béngunaa lacheelaman.

¹¹ Per bal tio'n lacheelaman ad rayalt guxhliiaanëman xin ren, zagdxeli naj yachajg lasa' reeman stijb. Ziangajc xinguaaaw ad najt yala' lacheelix.

¹² Yan, ni ganin ad ni guneet dux Dad ree Jesucristan, per naj rni lojdi: Bal yu' xinguaaaw rliladx Jesucrist abi' lacheelix ad rliladxt, abi' bal par béngunaa guin achet güünan, dxel ad najt yala' lasa' reex.

¹³ Ziangajc bal rliladx béngunaa guin abi' lacheelaman ad rliladxt, abi' bal par xinguaaaw guin achet güünan, dxel ziangajc ad rayalt yala' reeman.

14 Din xinguaaw ni ad rliadxt Jesucrist, züjnle' Dios laax guial rliadxlacheelix. Guiáad béngunaa ni ad rliadxt Jesucrist züjnle' Dios laaman guial rliadxlacheelaman, zian güünle' Dios xi'n reex. Din bal id naj zian, ad nayabt xi'n reex loj Dios zi'c tijb bèn ni ad wayüjnt dol.

15 Per bal xinguaaw o béngunaa ni ad rliadxt Jesucrist rënman yala' lacheelaman guial rliadxlacheelaman Jesucrist, yala'ri reeman. Bèn rliadxl ad zajct güünman naguiejn guibannè lacheelaman laaman din ad gurejdx Dios dunuj ree par yabajn ree con wadjil.

16 Din béngunaa guin ad ragbeetaman bal güünman gan chililadxlacheelaman, o bal xinguaaw guin ma rliadxl dxel ni'qui laax ad ragbeet bal güünx gan chililadxlacheelix.

17 Naj rni guial tijbgaj ree bèn ni ma rliadxl Jesucrist rayal guiban reeman loj guidxliuj guie zi'c ma bacaabee Dios laa reeman, yaya'n reeman zi'ctzi naj reeman chi guzuloj rliadxl reeman Jesucrist. Zianan naj ni cayèn loj ree dux compniar ree bèn rliadxl ree Jesucrist güün reeman.

18 Bal tijb bejn chi guzuloj rliadxlaman Jesucrist mal yu'man sen ni ru ree bèn Israel, yaya'nraman zian. O bal id yu'man sen guin chi guzuloj bililadxlaman Jesucrist, ad najt chu'man sen guin.

19 Din achet güünan bal yu' bejn sen guin o ad yu'taman sen guin, ni mazri lasajc naj guial güünman zi'c rniabee Dios.

20 Zeel gol baya'n zi'c najdi chi guzuloj bililadxidi Jesucrist.

21 Bal najl zi'c bèn nado' chi guzuloj bililadxil laaman, ad najtan ni chu'l xgab xhienaag güünl. Per bal zile' ad zajctril zi'c bèn nado', mazri zagdxebarii loj ni najl zi'c bèn nado' guin.

22 Bèn ni naj zi'c bèn nado' chi guzuloj bililadxlaman Cristo ma najman zi'cgajc bèn ni ad najt zi'c bèn nado' par güünman sirv loj Cristo. Abi' bèn ni ad najt zi'c bèn nado' chi guzuloj bililadxlaman Cristo, dxel Cristo ma rniabee laaman.

23 Lëjt ragbee guial ma gudijx Jesucrist zro' por lëjt, yan ma najdi par Dios. Ad rayalt tiëbidi nabee ree bénguidxliuj lëjt con ree ni rusquiee.

24 Zeel rnin lojdi compniar raliduladxl ree Jesucrist, gol baya'n zi'c najdi chi guzuloj bililadxidi Jesucrist.

25 Yan lëjt bèn ad waxhliaat ree, dux Dad ree Jesucrist achet rëbaman por zian. Per naj zajc gunen lëjt consejw xhienaag güündi, abi' da xgaban naj guial zaliladxidi ni ganin lojdi din guial raya Dios naj bacaabeeman naj cayünan mandad ni cayünan.

26 Zeel naladxan guial zi'c naj tarbajw ni caydüüd ree yan, zagdxeli naj guial ad zuxhliaatidi.

27 Bèn ni ma baxhliaa ad najt gusa'n lacheelaman. Guiáad bèn ni ad waxhliaat ad rayalt güünman naguiejn guxhliaaman.

28 Per bal rüjnl xgab guxhliaal, ad dolt naj guxhliaal. Ziangajc ree biinxdüb ni rën guxhliaa, ad dolt naj guxhliaa reem. Per rugojnan lëjt guial zienloj naj ni rzajc bèn ruxhliaa, abi' laan ad rëntan saquidi.

29 Ni rënan gagbeedi naj guial ma caydop ree dxej ni zio'p ree loj guidxliuj guie par yaguieen ree xmandad Dios. Zeel bèn ni ma baxhliaa ree gol been sirv Dios xt lod guneetzan lëjt zi'cgajc ree bèn ni ad waxhliaat.

30 Ni'qui gualrabaa, ni'qui gualrunaya, ni'qui guial rajp bejn xhienin loj guidxliuj guie achet zajc gudxoon guial güün bejn xmandad Dios.

31 Bèn ni ad ryaadxt ree xhienin loj guidxliuj guie, gol gunaladxl guial achet rajpidi, din gra ni yu' loj guidxliuj guie najn ni rdëd.

³² Ni rēnan naj guial ad zutidi xgab por ree ni yu' loj guidxliuj guie. Tijb xinguaaaw xtijb mazri rüjnx xgab por xmandad Dios, mazri rüjnx naguiejn güünx zi'c ruladx Dios.

³³ Per tijb xinguaaaw ni ma baxhliaa mazri rüjnx xgab por ree ni yu' loj guidxliuj guie, par laax mazri rüjn naguiejn yabaanē lacheelix laax.

³⁴ Dxel ti'o'p ma naj xixgabix, por Cristo nē por xbégunaax. Ziangajc tijb bégunaax ni ad waxhliaat mazri rüjnman xgab por ree xmandad Dios guidiblagaa rüjnman sirv loj Dios par güünman zi'c ruladxaman. Per tijb bégunaax ni ma baxhliaa mazri rüjnman xgab por ree ni yu' loj guidxliuj guie, mazri rüjnman naguiejn yabaanē lacheelaman laaman.

³⁵ Gra ni canin lojdi, canin laan par günan lējt yudar ad par gudxontan guxhliaadi, caninan din guibandi zi'c rayal xnejz dxel gol been gol gubajn tēē zi'c rēn dux Dad ree Jesucrist sin guial gudxoon xhienin lējt.

³⁶ Chutēēz xinguaaaw rüjn xgab guxhliaanē biin rnienēx abi' bal ma yu' biingunaa guin i'z par guxhliaam, güünri reex ni naladx reex naj zagdxe par laa reex. Bal guxhliaa reex, guxhliaari reex. Ad doltan guial guxhliaa bejn.

³⁷ Ziangajc chutēēz bèn ni ad rüjnt xgab guxhliaa, ad rayalt güünman xgab guial rüjn naguiejn guxhliaaman bal ma beenman xgab zagdxe guial ad zuxhliaataman. Din zagdxe gajcan bal id zuxhliaa bejn.

³⁸ Zeel rnin lojdi zagdxen guial chu guxhliaa, per mazri zagdxe bal id zuxhliaa bejn.

³⁹ Tijb bégunaax chi ma baxhliaaman, ad rayalt sunēman xinguaaaw ren chi nabannē lacheelaman. Per bal guiēt lacheelaman ma zajc tia' xin ren laaman per con tijb ree xcompniaraman xin riladx Jesucrist.

⁴⁰ Per naladxan guial mazri zagdxe guibanman bal id zuxhliaaman stijb. Zian rünan xgab guial nabannē'n xSprijt Dios zi'cgajc lējt.

8

Guialraw ni rbe'c ree bejn loj ni naladx reeman naj Dios

¹ Yan, ganin lojdi xcwent ree guialraw ni rbe'c ree bejn loj ree ni naladx reeman naj Dios. Dunuj ree rayagbee guial dugra ree rayignia' xhienaag yaguieen ree por ree ni guin, per yu' dxej por guialrignia' rlies bejn xvalor gajcaman. Per guialrēn lasa' bejn lasajc mazri din por guial rēn lasa' bejn zile' yaguieen yudar du lasa' ree din yasnuu yayignia' ree xhienaag rayal yabajn ree.

² Bal yu' bèn naladx guial ma bayaaloj rignia'man gra, cusquiee laagajcan din ryaadx da'tri chignia'man.

³ Per bèn ni rēn Dios, Dios nünbee laaman.

⁴ Yan por guial raw bejn guialraw ni ma gule'c reeman loj ree ni naladx reeman naj Dios, dunuj ree rayagbee guial achet guialrniabee rajp ree dios guin loj guidxliuj guie, din tijbzi Dios yu'.

⁵ Majsı yu' ree bejn naladx guial yu' zien ree dios bèn rniabee xanyabaa nē loj guidxliuj,

⁶ per dunuj ree rayagbee guial tijbzi dux Dad ree Dios yu' abi' por laaman yu' gra ni yu' por laa tēēman nadxu' ree loj guidxliuj guie. Tijbzi Jesucrist naj Dad par dunuj ree abi' por laaman yu' gra por laaman tēē raya'p ree guialnaban.

⁷ Per ad grat ree bejn rüjn xgab zian. Din yu' ree bèn ni guyēn graloj ni naladx reeman naj Dios, abi' yan guial qui bililadxri reeman Jesucrist naladx reeman guial dolan gaw tijb bejn guialraw ni ma gurej loj ree dios guin.

⁸ Dunuj ree rayagbee guial ad ni rawt bejn rüjn guiban bejn mazri zagdxe loj Dios, lasa'gajcanan bal yadaaw ree o ad zadaawt ree lasa' ree gualraw guin.

⁹ Per majsi lëjt ragbee guial zajc gawidi xhietëëznin, rayal gapidi cudad ad güündi guial ree bèn qui rliadxri Jesucrist güün reeman dol.

¹⁰ Din bal lüj guial achet naladxil rawil xhietëëznin, zøjbil cayawil gualraw ni ma gurej loj ree ni ad najt dios. Dxel guguiaa tijb ree bèn qui rliadxri Jesucrist lüj abi' nëgajcaman sëëbladx gaw gualraw guin majsi lën luxdooman naladxaman guial ad zagdxet naj ni cayüjnman.

¹¹ Dxel por xgualrajquil cayüjnl guial güünman dol guial ad nixt yu' luxdooman cayawaman ni guin ree, per badxe'guijc guial në por laaman güjt Jesucrist loj crüjz.

¹² Zeel bal rüjnl tijb ni naj ni mal par ree bèn qui rliadxri ree Jesucrist abi' rüjn reeman dol por lüj, dolan cayüjnl delant loj Cristo.

¹³ Bal por tijb ni rawan rüjn ree da compniaran dol, mejorli ad zawtran laan chitëë güünman dol por naj.

9

Ni zajc güün tijb apóstol

¹ Lëjt ragbee guial zajc günan ni rënan por gualrniabee ni ra'pan guial najn apóstol. Ma baguiaan dux Dad ree Jesucrist abi' lëjt naj ree bèn ni ma benan gan par laaman guial ma bililadxidi laaman.

² Bal yu' ree bèn ni ad nünbeet naj zi'c apóstol, per lëjt ragbee guial apóstol najn. Din zi'c ma rliadxidi Jesucrist dxel ma rguien guial diidxli najn apóstol.

³ Abi' par ree bèn ad rliadxt guial najn apóstol, ze naj ni rën loj reeman:

⁴ Ra'pan derejch guneec reeman ni gawan në ni guië'n.

⁵ Abi' zajc tëë guxhlian con tijb béngunaa naj dulasa' raliduladx ree Jesucrist din chinë'n laaman bantëëz guin gan, zi'c rüjn los demazri ree apóstoles con ree bijch Dad Jesucrist në Bëd.

⁶ ¿O najzi con Bernabé bayal yaguieenan xmandad Dios dux cwentan ya?

⁷ Per ni'qui tijb suldad ad rejt loj wadijl xcwentaman, yu'czi bèn rguijx xgaxtaman. Ziangajc bèn rxübin uv, ¿wen id zajc gawaman laan ya? Laadx bèn ni rajp vag ree, ¿wen id zajc guië'man xlejch reeb ya?

⁸ Abi' ad xixgabtzi bénguidxliujn canin lojdi, në loj ley ni badëë Dios loj Moisejs rëb zian.

⁹ Din loj ley guin rëb: “Ad gudxe'di guijxh ro' ree be gui'xh la'tgaj cayüjn reeb dxin.” Ad rëbt Dios zian gualzi yu'man laa reeb xgab,

¹⁰ rëbaman zian por dunuj ree. Din zi'c bèn rlia' yuj zi'c bèn rusia trigo, grop reeman yu'guijc guial yu' ni yaca' reeman.

¹¹ Yan ma balün lëjt xhienaag chinalidi xnejz Dios, ¿wen zro' da't yanaaban lojdi ya bal güündi dunujn yudar din gusnuu dux gualnabanan?

¹² Bal stijb ree bèn ni rusiid lëjt rila' rtia' reeman ni rayal gudëëdidi loj reeman, dxel ziangajc dunujn raya'pan mazri derejch güündi dunujn yudar.

Per majsi zian dunujn achet wanaaban lojdi zi'c naj derejch ni raya'pan, caydaanzan ni raza'can chitëë xhie cwib guijc guial ad zucaagdiajgtri ree bejn xtiidxza'c Jesucrist.

¹³ Lëjt ragbee guial gra ree bixhioz ni rüjn sirv lën xyadoo Dios, rtia' reeman tibda'n ni rinë ree bèn Israel loj Dios persi rila' rbajn reeman.

Ziangajc gra ree bixhioz ni rüjn ree sirv lule' yadoo guin lod rinë ree bejn be ree par Dios, në reeman rtia' ta'n ni rinë ree bejn persi rile' rbajn reeman.

¹⁴ Yan laagajcan rëb dux Dad ree Jesucrist por ree bën ni rulüü xtiidxza'caman, guial por ree bën ni rulüü reeman rayal guiban reeman.

¹⁵ Per naj achet cacana', ad caxhal tēetan gui'ch guie lojdi din guneedi xhienin. Din par naj zagdxeli naj guiētan luar chu' bën chiquied gualrabaa guin luxdon guial cusidan bejn ree xtiidxza'c Jesucrist.

¹⁶ Ad rayalt gales da valor gajcan guial cusidan bejn ree xtiidxza'c Jesucrist, din mandad guin naj ni bayalan. ¡Prob naj bal idan gusid bejn ree diidxza'c guin!

¹⁷ Zeel bal cayūnan mandad guin guial ruladxan gūnan laan, dxel yu' ni gaca'n. Per ni'qui bal id ruladxan gūnan mandad guin, laan bayal gūnan.

¹⁸ Abi' ni rūnan gan naj gualrabaa ni yu' luxdon majsi ad naxtan, majsi ad caca'tan ni rayal tia' bën ni rulüü xtiidxza'c Jesucrist, per cusnuu culūn diidxza'c guin ree bejn ree.

¹⁹ Abi' majsi ad yu't bën rniabee naj por mandad guin, per laa naj guie par gra ree bejn din gac gūnan sirv xbejn Cristo.

²⁰ Abi' chi za'n con ree bën Israel, rūnan naguiejn persi yu'guijc reeman guial nayajcan bën Israel din gūnan gan gac reeman xbejn Cristo. Chi za'n con ree bën Israel bën rüjn ree naguiejn chinal xley Moisejs dxel rūnan zi'c bën zinal ley guin, din gūnan gan gac reeman xbejn Cristo, majsi ragbeen guial ad rniabeet ley guin naj.

²¹ Abi' chi za'n con ree bën ad najt bën Israel, bën ad zinalt ree ley guin dxel majsi ragbeen guial Dios naj bën rniabee naj guial nabanana' zi'c rniabee Cristo, per rūnan naguiejn din guguaiaa reeman naj zi'cgajc tijb lasa' reeman din gac gūnan gan gac reeman xbejn Cristo.

²² Chi za'n con ree bën yu'nawēeg par gūn reeman o gaw reeman xhienin, dxel rūnan naguiejn din su reeman zagdxë con naj din gūnan laa reeman yudar gac reeman xbejn Cristo. Bantēez lod ran rūnan naguiejn din guguaiaa reeman naj zi'cgajc tijb lasa' reeman, din günczan gan majsi ta'nzi reeman gūnan gan gap reeman perdon por Cristo.

²³ Gra ree ni guie cayūnan guial rēnan xtiidxza'c Jesucrist, din tiblojzi güünle' Dios naj con gra ree bën riladx diidxza'c guin ree.

²⁴ Lējt ragbee guial chi yu' tijb carrer zien bejn ruxūn, per tijbzaman naj bën rtia' prem. Ziangajc lējt gol been naguiejn tia'di ni guneë Dios.

²⁵ Bën ni ruxūn ree rajp laagajc reeman cudad chitēë xhie gudxoon guxūn reeman. Rūjn reeman zian din güün reeman gan, abi' ni rüjn reeman gan naj tijbzi coron balag ni rigool cari. Per dunuj ree ni cayguieen ree naguiejn cayca' ree najn tijb prem ni ad yu't dxej nit.

²⁶ Abi' ragbeechaawan xhienin cayūnan, ad cayūntan zi'c tijb bën ni ruxūn sin guial gagbeen chexc, ad rüntan zi'c tijb bën ni rga'p sin guial gagbeeman ban ca'paman.

²⁷ Zeel cusagdiaj naj gajc din gac ganabee naj gajc gūnan zi'c rayal gūnan, chitēë guial culūn bejn ree xtiidxza'c Jesucrist achet yayalan delant loj Dios.

10

Guial rën ni ad najt ree Dios

¹ Compniar raliduladx ree Jesucrist, gol basaaladx guial dux bengol gulal ree bën binal ree Moisejs, gra reeman guza xan zaj ni guxhaal Dios abi' gra reeman gudëd loj nijsdoo ni la nijsdoo xnia.

² Zian biguien guial xbejn Moisejs naj reeman din gra reeman guzanë laaman xan zaj guin, abi' gudëd reeman con laaman loj nijsdoo guin. Zian gurobnijs reeman loj zaj guin në loj nijsdoo guin.

³ Gra tëë reeman gudaw guialraw ni bi't diizd xanyabaa.

⁴ Gra tëë reeman gu' nijs ni bazaladx Dios loj reeman, nijs brii lad tijb guiaj. Rën guiebän guial diizd nadxel mal naban Cristo con laa reeman lod zëzti reeman.

⁵ Per zien reeman ad beent zi'c ruladx Dios, abi' güjt reeman niz loj yujbidx niz lod guza reeman.

⁶ Gra nine gojc din yayagbee ree guial ad laat yaguieen ree lasa' ree ni mal ni been reeman.

⁷ Ad rayalt yayën ree ni rëb ree bejn naj ree Dios zi'c been zien ree dux bengol gulal ree, din rëb loj xtiidx Dios xcwent reeman: "Gurej reeman, gudaw reeman dxel bisu reeman been reeman ni dxuudx ree."

⁸ Ad rayal tëët güün bejn ni dxuudx con bën ad najt lacheelaman, zi'c been zien ree dux bengol gulal ree abi' tijb dxej güjt gajlbichoon mil reeman.

⁹ Ad zaneeguijdx tëët ree Dios zi'c been zien ree bèn guin, abi' gudaw bëël laa reeman persi güjt reeman.

¹⁰ Ad rayal tëët yaguie'ch ree guial ad cayüjnt Dios zi'c rayal, din zian been zien ree dux bengol gulal ree abi' guxhaal Dios tijb anjl bagüjt laa reeman.

¹¹ Gra ni guzac reeman cwan loj xtiidx Dios din yayagbee ree guial ad laat yaguieen ree zi'c been reeman, dunuj ree guial nabajn ree yan guial ma caydop dxej ni yadëëd ree bejn cwent loj Dios.

¹² Zeel bèn ni naladx za'dxi'ch loj xnejz Dios, mejorli gapaman cudad chitëë güün dol laaman gan.

¹³ Gra ni cazajquidi ad najtan ni ad rzajct bejn, din Dios ad zaro'nladxtaman lëjt. Ad zuslaat Dios saquidi tijb ni ad zadaantidi, abi' laaman güün lëjt yudar din gagbeedi xhienaag laadi loj ni cayajc.

¹⁴ Zeel compniar raliduladx ree Jesucrist, zi'c rënan lëjt rnin lojdi gapidi cudad ad goc guiëndi ni naladx ree bejn naj dios.

¹⁵ Naj ragbee guial najdi ganax bèn rignia', zeel lëjt gajc gol been xgab bal zagdxë naj ni canin lojdi.

¹⁶ Chi raguieen ree zi'c been dux Dad ree Jesucrist chi gudaw reeman guxhin bigra, dxel chi radü' ree vin ni ma gogle' rasaaduladx ree rejn ni ma guxhie'man chi gütaman por dux tol ree. Abi' chi radaaw ree guiadxtil zi'c beenman, laan naj tijb sen guial ma nayajc ree tijbzi con laaman.

¹⁷ Din majsi zien nayajc ree, per zi'c rlia' tijbzi guiadxtil par dugra ree, zian rguien guial ma nayajc ree tijbzi con Cristo.

¹⁸ Lëjt ragbee xhienaag rüjn ree bèn Israel chi rinë reeman tijb gon par Dios, abi' zi'c raw reeman tiblia' gon guin yu'guijc reeman guial ma naj reeman tijbzi con Dios.

¹⁹ Ad canitan lojdi por ree ni naladx ree bejn naj dios guial lasajc reen o guial lasajc guialraw ni gurej loj ree dios guin.

²⁰ Din bèn rüjn ree zian ad lojt Diosan rbe'c reeman guialraw guin ree, loj xindxaban rbe'c reeman laa reen. Abi' loj rëntan gaquidi tijbzi con ree xindxab guin.

²¹ Ad zacjt güündi zian par guiguien guial ma najdi tijbzi con ree xindxab guin, abi' gaw tëëdi guiadxtil con vin din guiguien guial ma najdi tijbzi con Cristo.

²² ¿O rëndi ya yache'ch ree Dios? ¿Wen mazri raya'p ree guialrniabee guial lojman ya?

Xhie zajc güün ree xbejn Dios

²³ Graczi zajc güün bejn, per ad gratan naj zagdxe guial güünman. Majsi gra zile' güün bejn, per ad gratan rüjn sirv par güün lasa'man yudar chinalaman xnejz Dios.

²⁴ Din ad rayalt yagueien ree xgab por dunujzi ree, rayal yagueien ree xgab por ree dux compniar ree.

²⁵ Zi'c chi rziidi bëël luguia', ad guiniabdiidxidi bal ma gurejn loj xdios reeman, chitëë xhie guinialadxidi chi gawidi laan.

²⁶ Din xieen dux Dad ree Dios naj guidxliuj con gra ni yu' lojn.

²⁷ Bal tijb bén ad waliladxt xtiidx Dios na lojdi guial chitawidi lidxaman, abi' bal réndi chedi gol chej. Gol gudaw gra ni guneë reeman lojdi ad xhie guiniabdiidxidi chitëë xhie naladxidi.

²⁸ Per bal yu' xcompniaridi na guial ni cunee bén guin cayawidi ma gurejn loj xdiosaman, ad gawidi laan por bén bagojn lëjt chitëë güünman xgab mal guial ad laaht cayüjndi, majsi lëjt ragbee guial xieen dux Dad ree Dios naj guidxliuj në ni yu' loj guidxliuj guin.

²⁹ Ad canitan lëjt xcwent guial xhie naladxidi, ni canin lëjt naj por ree xgab ni zajc güün stijb xcompniaridi por lëjt.

Per wed yu'di rüjn xgab: "Per, çchexc zeel ad züntan gra ni ragbeen ad najt ni mal por xixgabzi stijb bejn?"

³⁰ Wed rëb tëëdi: Naj ragbee guial rudën quixtëë loj Dios por gra ni rawan, çchexquiza zeel güün reeman xgab mal por naj?"

³¹ Per naj rni lojdi gra ree ni guin rayal gudxe'guijquidi din zi'c ni rawidi zi'c ni rë'di në gra ree ni rüjndi rayal güündi laan par güündi Dios bén zojbloj.

³² Gol gojp cudax xhienaag nabandi din zi'c ree bén Israel zi'c ree bén ni ad najt bén Israel con ree xcompniaridi bén rliladx ree Jesucrist ad züjnt reeman xgab mal por lëjt.

³³ Din zian rünan, rünan naguiejn chitëë xhie naladx bejn con naj. Ad rüntan ni rüjnzi naj yudar, rünan naguiejn din günan ni rüjn yudar zien ree bejn din gac gap reeman perdon loj Dios.

11

1 Zeel gol binal zi'c rünan, zi'c zinaalan zi'c been Cristo.

Xhie rayal güün ree bejn chi rbejdx rniab reeman Dios

² Naj dá d rabaanë'n lëjt guial rusaaladxidi naj, guial yu'guijquidi rüjn tëëdi zi'c balün lëjt.

³ Rën tëën gusaaladxidi guial Dios rniabee Cristo abi' Cristo rniabee xinguaaw abi' xinguaaw rniabee béngunaa.

⁴ Tijb xinguaaw chi rgu' xhienin guijquix par cwedx guiniabix Dios o gulüüx xtiidx Dios, natu naj ni cayüjnx.

⁵ Ziangajc chutëëz béngunaa cabejdx canab Dios o culüüman bejn ree xtiidx Dios, abi' achet xoob guijcaman, natu gajc naj ni rüjnman. Güünman cwent guial najman zi'c tijb béngunaa ni biaj guijc xt garej.

⁶ Zeel bal tijb béngunaa ad rëntaman guixhioob xhienin guijcaman, gugajli guijcaman. Per bal ragbeeman, guial natun guiyaj guijcaman xt garej, mejorli guixhioob xhienin guijcaman.

⁷ Per xinguaaw achet zajc chu' guijquix din Dios beenman laax zi'cgajczi laaman, zian rulüüx respejt ni rajpix Dios. Abi' béngunaa guial rxhioob xhienin guijcaman, zian rulüüman respejt ni rajpaman xinguaaw.

8 Din ad gojct xinguaaw con guxtil lad búngunaa, búngunaa guin gojc con guxtil lad xinguaaw.

9 Ad gojct xinguaaw par búngunaa, búngunaa guin gojc par xinguaaw.

10 Zeel búngunaa rayal guixhioob xhienin guijcaman din guiguien guial xinguaaw rniabee laaman zi'c ruluü ree anjl chu rniabee laa reeman.

11 Majsi delant loj Dios tiblojzi naj bejn, din bal id búngunaa niu achut xinguaaw niu, abi' bal id chu xinguaaw niu achut búngunaa niu.

12 Walican, guial con guxtil lad xinguaaw gojc búngunaa, per yan por búngunaa ri't xinguaaw loj guidxliuj, zeel zi'c xinguaaw con búngunaa por Dios yu' reeman loj guidxliuj.

13 Naj rni lëjt, lëjt gajc gol been xgab bal zagdxen cwedx guiniab tijb búngunaa Dios abi' achet naxhoob guijcaman.

14 Bejn gajc ragbee guial natun bal id zugaj guijc xinguaaw.

15 Per par búngunaa mazri zagdxe rguienman bal guyool guidxguijcaman, din rajpaman laan par gusiaawan guijcaman.

16 Bal chu ad za't conform por ni canin lojdi, per naj rugojn lëjt guial achet stijb costumbr raya'p ree, zian naj dux costumbr ree con los demazri ree bèn rliladx xtiidx Dios.

Ruxhiin reeman zi'c basa'n Dad Jesucrist gac

17 Yan xcwent ni ma ganin lëjt, ad zile't ganin guial zagdxe naj ni cayüjndi din chi radxaag lasa'di par cwedx guiniabidi Dios, al ni ad rayalt güündi rüjndi.

18 Yaløj rnin lojdi bigueijnan guial chi radxaag lasa'di par cwedx guiniabidi Dios ad raya'ntidi diidx, abi' tiblax rliladxanan.

19 Din nawëg najn guial ad zajct zian, abi' zian rguien chu diidxi zinal xnejz Dios.

20 Per por zianzi, achetri sirv rüjn guial radxajg lasa'di par gawidi xche zi'c been dux Dad ree Jesucrist.

21 Din tijbgajdi rüjn naguiejn diob gawidi, ad rbëjzt xcompniaridi. Abi' la'tgaj yu' ree bejn rliaan, yu'di raw da't abi' xt rzüdxidi guial rë'di zi'ctzi rëndi.

22 ¿Id yu' lidxidi ya lod gawidi guië' tëëdi zi'ctzi rëndi?, ¿o ad rëntidi xcompniaridi bèn rliladx ree xtiidx Dios ya, zeel rusa'nxtudi bënprob ree bèn achet rajp? Yan, ¿rëndi ya chu' luxdon zagdxe con lëjt por zian? ¡Per zian zi'c cayüjndi, ad zajct ganin lojdi guial zagdxe naj ni cayüjndi!

Ni bigra gudaw Jesucrist xche (Mt. 26:26-29; Mr. 14:22-25; Lc. 22:14-20)

23 Abi' ni balün lëjt, basidan laan por dux Dad ree Jesucrist guial guxhin ni bayü reeman laaman chi bigra gudawaman xche, cwa'man tijb guidxtil.

24 Abi' chi gulox badëëman quixtëë loj Dios dxel gula'man guidxtil guin, rëb gajman: "Guidxtil guie naj da cuerpan ni ma bayün par guiëtan por lëjt. Abi' chi güündi zian, gol beenan guial gusaaladxidi naj."

25 Ziangajc beennëman cojp ni yu' vin chi gulox gudaw reeman xche, dxel rëbaman: "Vin guie naj da rejnan ni gaxhie'n chi guiëtan par gaxhalan tijb nejz cüb guial xhienaag gac ree bejn perdon loj Dios. Abi' chi güündi zian, gol been guial gusaaladxidi naj."

26 Zeel, beegaj chi radxaag lasa'di par gawidi xche zi'c been dux Dad ree Jesucrist, chi rawidi guidxtil rë' tëëdi vin, zian ruluüdi guial güjtaman por lëjt, gol been zian xt chi gui'taman loj guidxliuj guie zatijb.

Xhienaag rayal gac xche

²⁷ Yan bal yu' bèn raw guiadxtil rē' tēēman vin xche guin, abi' ad yu' guijectaman ni rēn guiēb ni cayūjnman, dolan cayūjnman guial ad yu'guijectaman ni rēn guiēb xcuerp nē xrejn dux Dad ree Jesucrist.

²⁸ Zeel rayal güün bejn xgab xhienaag nabanman delant loj Dios dxel ma zajc gawaman guiadxtil guiē' tēēman vin xche guin.

²⁹ Din bèn raw guiadxtil guin con vin guin abi' ad yu'guijectaman ni rēn guiēb xcuerp Jesucrist. Laagajcaman caguuil xcasti.

³⁰ Din guial rūjn ree bejn zian zeel dād ziendi ragxuu, zien tēēdi ad yu't gojl abi' zien reeman ma güjt.

³¹ Per bal yaløjxgaj yaguieen ree xgab xhienaag nabajn ree loj Dios dxel ma zajc yadaaw ree xche guin, achetri xcasti Dios yayal ree.

³² Per ziangajc bal yu' xcasti Dios ni yayal ree, laan naj par guzuxnejzaman dunuj ree chitēē yaguieen ree dol, chitēē yayal ree casti ni rayal ree bèn ad rliadxt xtiidxaman.

³³ Zeel compniar raliduladx ree Jesucrist, chi radxaag lasa'di par gawidi, gol gulēz ree xcompniaridi din gawidi tijbzi.

³⁴ Per bal yu'di ad zajct cwēz guial ma rliaandi, zagdxeli gaw lidxidi chitēē yayalidi xcasti Dios guial ad zūjntidi zi'c rayal. Gra ni rayal ganin lojdi, chi guialan guidganan lējt dxel yanee ree.

12*Quiarguejn ni runee xSprijt Dios*

¹ Yan ganin lējt, quiarguejn ni runee Dios loj tijb gaj bejn por xyudar xSprijt Dios, din ad rēntan guibandi sin guial gagbeedi ni guin ree.

² Lējt ragbee guial chi gadidi güünbee Dios dxel gogdxadi, bidxga'di ni na ree bejn lojdi naj ree dios abi'za ni'quid rnieet reen.

³ Zeel gol gogbee, chutēēz bèn rnieeguijdx Jesucrist, rēn guiēban guial ad nabannētaman xSprijt Dios. Achu tēēt bejn zajc guiēb: "iJesucrist naj bèn rniabee naj!", bal id nabanman con xSprijt Dios.

⁴ Quiarguejn rent quiarguejn ren runee Dios dunuj ree, per Sprijt guin gajc naj bèn ragnē dugra ree.

⁵ Majsni ni rent ni ren naj xmandad Dios ni cayguieen ree, per laagajcaman naj bèn ni cayguieen ree sirv.

⁶ Abi' majsni garent garen cayūjn tijbgaj bejn, Dios gajc naj bèn ni cayūjn yudar tiblojzi.

⁷ Tijbgaj dunuj ree rulüü Dios ni rayal yaguieen ree con xyudar xSprijt Dios din yaguieen ree yudar dux compniar ree.

⁸ Din con xyudar xSprijt Dios yu' ree bèn ma ca' quiarguejn par guiniee reeman, yu' tēē ree bèn ma ca' quiarguejn par chignia' reeman diidxli xcwent Dios.

⁹ Abi' por xyudar xSprijt Dios yu' ree bèn ma cwa' guialrliladx ni guidibla-gaa. Yu' tēē ree bèn ma cwa' guialrniabee par yayūjn reeman bēnragxuu ree.

¹⁰ Yu' tēē ree bèn ma cwa' guialrniabee par güün reeman gadxagayaa ree milagr. Yu' ree bèn ma ca' quiarguejn par gudēēd reeman xtiidx Dios loj ree bejn. Yu' tēē ree bèn ma cwa' ree quiarguejn par gagbee reeman bal wali o ad walit ni canee bēn rēb guial caneeman xtiidx Dios. Yu' tēē reeman ma ca' quiarguejn par guiniee reeman gadxagayaa ree diidx, abi' yu' reeman ma ca' quiarguejn par yadēēd reeman tijb diidx par stijb diidx.

11 Per por xyudar gajc xSprijt Dios rüjn bejn ni guin ree, laaman ma ragbee conin rudëëman güün tijb gaj bejn ni naladxaman naj zagdxë.

Tijbzi cuerp nayajc dugra ree

12 Din zi'c dux cuerp ree majsi zien la' najn, per tijbzi nayajc ree. Ziangajc dunuj ree guial raliduladx ree Jesucrist majsi zien nayajc ree per tijbzi nayajc ree con laaman.

13 Din dugra ree barobnijs por tijbzi xSprijt Dios par yayajc ree tijbzi con gra ree dux compniar ree majsi nayajc ree bèn Israel o ad nayajc ree bèn Israel, bal nayajc ree zi'c bèn nado' o ad nayajc ree zi'c bèn nado', per tijbzi ma nayajc ree din dugra ree tiblojzi nabajn ree con xSprijt Dios.

14 Lëjt ragbee guial ad tibia'tzi naj xcuerp bejn, zien la' naj xcuerp bejn.

15 Yan bal guiëb guia' bejn: "Ad najtan tibia' xcuerp bejn din ad najtan yaa bejn." Per ad por ziant ad najt guia' bejn tibia'man.

16 Ziangajc majsi guiëb guidiajg bejn: "Ad najtan tibia' xcuerp bejn din ad najtan guiaaløjman", ad por ziant ad najtri guidiajgaman tibia' xcuerpaman.

17 Din bal guidib xcuerp bejn niajc guiaaløjman, ¿xhieza naag niguiejnman?, o bal guidib xcuerp bejn niajc guidiajgaman, ¿xhieza naag niuxi'man?

18 Per Dios ma ragbeeman banguin rayal guzoobaman tibia'gaj ni naj xcuerp bejn din gacaman zi'c rënman.

19 Din bal niajc xcuerp bejn tiblojzi, dxel ad najtran cuerp.

20 Per zi'c ma rnin lëjt majsi zien la' naj xcuerp tijb bejn per tijbzi naj guidiban.

21 Ad zajct guiëb guiaaløj bejn loj yaaman: "Ad ryaadxtan lüj." Ad zajct tëët guiëb guijc bejn loj guia'man: "Ad ryaadxtan lëjt."

22 Din luar lod ruluü ad rüjnza'ct sirv, laa reen naj ni mazri rüjn sirv.

23 Abi' ree luar lod ad rguient zagdxë, raguieen ree naguiejn din guiguien reen zagdxë. Guiaad ree luar naguie'ch, mazri raya'p ree cudad luar guin ree rata'cw reen din guiguien reen zagdxë.

24 Ad zro't radxu' ree xgab por ree luar ni rguien, mazri raya'p ree cudad luar naguie'ch ree zeel radojt ree xhienin din guiguien zagdxë dux cuerp ree. Zianan been Dios xcuerp bejn

25 din chitëë yaguieen ree xgab guial yu' lod ad rüjnt sirv, guidib dux cuerp ree rüjn yudar lasa'.

26 Chi rdoob tiblajt xcuerp bejn guidib xcuerp bejn rdoob, abi' bal nix yu' tiblajt xcuerp bejn guidib xcuerp bejn yu' nix.

27 Yan ziangajc guial nayajc ree tijbzi con Cristo dugra ree nayajc ree zi'c tijbzi cuerp par laaman, tijb gaj dunuj ree nayajc ree tibia' cuerp guin.

28 Abi' entr gra dux compniar ree bèn rliladx Jesucrist. Dios yaløj bacaabeeman bèn naj ree xi apóstoles Jesús, ni barojp bacaabeeman bèn gudëëd ree xtiidxaman loj ree bejn, bayon bacaabeeman bèn gulüü ree xtiidxaman bejn ree, dxel bacaabeeman bèn gap ree gualrniabee par yayüjn reeman bënragxuu ree. Bacaabee tëëman bèn güün ree gadxagayaa milagr. Bacaabee tëëman bèn ni güün ree yudar bejn ree. Bacaabee tëëman bèn ni nabee ree loj ree bèn rliladx xtiidxaman abi' bacaabeeman bèn ni rníee ree zien ree diidx.

29 Ad grat ree bejn naj apóstoles ad gra tëët ree bejn zajc gudëëd xtiidx Dios loj ree bejn, ad grat ree bejn zajc gulüü xtiidx Dios bejn ree. Ad grat ree bejn zajc güün milagr,

30 ad gra tëët ree bejn zajc yayüjn ree bënragxuu, abi' ad grat bejn zajc guiniee zienloj diidx ad gra tëët bejn zajc yayüjn tijb diidx zatijb diidx.

³¹ Per gol been naguiejn din gunee Dios lëjt quiarguiejn zagdxee ree, abi' naj ganin lëjt conin naj nejj mazri zagdxee chinalidi.

13

Xcwent guial rën bejn ree

¹ Din bal rajc rnien zienloj diidx ni rniece bénguidxliuj në xtiidx ree anjl yu' xanyabaa, per bal id rënan bejn najzan zi'c tijb guuib rzijdx o zi'c tijb plati ni yu' cha'.

² O bal nayalan nudëdan xtiidx Dios loj ree bejn, o nia'pan quiarguiejn par niagbeen gra ni zëed por Dios ni gad gagbee bejn, o nia'pan zienloj guialrignia' o nia'pan tijb guialrliladx Dios ni xt zile' guchan xliajt ree guial', per bal id rënan bejn ree achet lasajcan.

³ Ziangajc majsi gagui'san gra ni ra'pan loj ree bèn ni ryaadx laan abi' yayü da cuerpan din che'can, per bal id rënan bejn ree achet lasajc ni cayünan.

⁴ Guial rën lasa' naj gap pacens lasa' bejn, gac bejn benza'c con lasa'man, ad zadëdlojt lasa' bejn, ad züjnt bejn nabë, ad züjnt bejn benro' loj lasa'man.

⁵ Guial rën lasa' naj gap respejt lasa' bejn, ad gac bejn naxhien, ad yalenyaman, ad chu'xyajñ tëë lasa' bejn,

⁶ ad rayalt yabaa bejn por ni mal ni cayüjn bejn o ni cazajcaman, rayal yabaaman chi zë bejn xnejz.

⁷ Guial rën lasa' naj güün bejn perdon lasa'man ni güünnëtzi reeman laaman, abi' chililadx lasa'man, ad zadxag tëëtaman cwëzaman ni cabëzaman, taan tëëman ni rüjnnëtzi reeman laaman.

⁸ Guial rën lasa' ad yu't dxej loxan, per guialrajc yu' dxej loxan, ad zu tëëtri bèn ni rudëed ree xtiidx Dios loj ree bejn ni'qui ree bèn rniece zienloj diidx.

⁹ Din yan bal rayignia' ree, tibda'nzi naj ni rayignia' ree abi' bal radëed ree xtiidx Dios loj ree bejn, tibda'nzi rayagbee ree xcwentaman.

¹⁰ Per chi guidxin dxej yayignia' ree gran, dxel achetri lasajc ni rayagbee ree yan.

¹¹ Chi gocan xindoo gunen zi'c xindoo, benan xgab zi'c xindoo, go'pan xquiarguiejn xindoo. Per chi bidxin dxej gojcan bengol basa'nan gra guial xindoo tibläd.

¹² Ziangajc yan ad rayignia't ree gra zi'cgajc chi ad rguient zagdxee loj tijb guiaawajn, per chi guidxin dxej yadxin ree lod zojb Dios dxel yayignia' ree gra. Yan yu'zi ni rignia'n per chi guidxin dxej guidxinan lod zojb Dios dxel günbeen gra zi'c nünbeeman naj.

¹³ Choon naj ree ni ad yu't dxej lox, guialrliladx Dios, guialrbëz ni gunee Dios, në guial rën Dios dunuj ree. Per loj guiyon ree ni guin mazri lasajc guial rën Dios dunuj ree.

14

Guialrniece stijb diidx

¹ Gol been naguiejn gol guyën ree bejn, gol gurejdx gunab tëë Dios din guneeman xquiarguiejndi din güündi xmandadaman, per mazri rüjn naguiejn gapidi quiarguiejn par gudëedi xtiidx Dios loj ree bejn.

² Bén rniece tijb diidx ni ad rignia't gra bejn, güünman cwent guial achut caneeman. Tijbzi Dios caneeman guial achut rignia' xtiidxaman, tijbzi laaman ragbee ni caneeman per bejn ree ad ragbeet reeman ni rën guiëb ni caneeman.

³ Per tijb bèn rulüü xtiidx Dios bejn ree cayünman yudar xhienaag chinal bejn xtiidx Dios, cudëedaman consejw loj ree bejn ragu' tëëman luxdoo reeman.

⁴ Abi' bèn rniee tijb diidx ni ad rignia't gra ree bejn, par tijbzi laaman naj ni caneeman, per bèn rniee xtiidx Dios cayünman yudar gra ree xbejn Dios din gusnuu chinal reeman xnejzaman.

⁵ Bal zianclaa gradi niajc niniee zienloj ree diidx, per mejorlan bal zajc gulüüdi bejn ree xtiidx Dios. Din mazri lasajc guial guinee bejn xtiidx Dios guial loj guial guinieeman zienloj ree diidx, o bajtëë bal zile' guiëbaman loj ree bejn xhie rën guiëb ni rnieeman din güün sirv ni rnieeman gra ree bejn.

⁶ Din zi'c naj bal guitixlon lëjt compniar raliduladx ree Jesucrist, abi' ganen lojdi tijb diidx ni ad zignia'tidi, çxhieza sirv güunan lëjt bal id canin lojdi zagdxe ni balüü Dios naj o ni ragbeen o bal id canen xtiidx Dios lojdi zagdxe o xhietëëz zatijb ni rayal gusiididi?

⁷ Zi'c tijb ni rucwejdx reeman, zi'c tijb bidxa o tijb arp bal id zucwejdx bejn laan zagdxe ad zignia't ree bejn xhienin cucwejdxaman.

⁸ Ziangajc bal id zucwejdx reeman zagdxe trompejt loj wadijl, çxhieza naag chignia' reeman guial ma rayal suchaaw reeman par til reeman con ree bèn rayal tilnë reeman?

⁹ Yan ziangajc bal guinieenëdi bejn ree con tijb diidx ni ad rignia't reeman, çxhieza naag chignia' reeman ni rëbidi! Xlia'zi caneedi achut rignia' ni rnieedi.

¹⁰ Lëjt ragbee guial zienloj diidx yu' loj guidxliuj guie, per graczan yu' ni rëban par bèn rignia' laan.

¹¹ Per bal chu guinieenë naj con tijb diidx ni ad rignia'tan dxel benzit najman par naj abi' za naj benzit najn par laaman.

¹² Zeel zi'c rëndi gapidi quiargueijn por xyudar xSprijt Dios par güündi xhietëëz ni naj xchiin Dios, gol gunab loj Dios din yazaladxaman quiargueijn lojdi din gac güündi ni rüjn sirv par gra ree xbejn Cristo.

¹³ Zeel bèn ni rniee tijb diidx ni ad rignia't gra ree bejn, rayal guiniabaman loj Dios din gagnëman laaman din gac gusignia'man bejn ree ni rëbaman.

¹⁴ Din zi'c naj bal gabedx ganaaban Dios con tijb diidx ni ad rignia'tan dxel tijbzi da sprijtan ragbee ni canen, per naj ni'quid ragbeetan xhienin canen.

¹⁵ Zeel ni rayal güunan naj, gabedx ganaaban loj Dios con da sprijtan abi' gagbeen xhie rën guiëb ni canen. Ziangajc chi rolan cant ree par Dios rayal gagbeen chignia' tëen xhie rën guiëb ni cayolan.

¹⁶ Din bal rnieel diidx zagdxe ree loj Dios con diidx ni ad rignia't ni'qui lüj. Dxel bèn za' con lüj, ad zajc guiëbaman "Amén" chi ma gulox badëëdil quixtëë loj Dios guial ad rignia'taman ni rnieel.

¹⁷ Majsi nix da't badëëdil quixtëë loj Dios, per achetczi yudar beenl bèn za' con lüj par gagbeeman xhienaag chinalaman xnejz Dios guial ad bignia'taman ni rëbil.

¹⁸ Quixtëë Dios naj mazri rajc zien loj diidx guial loj gradi.

¹⁹ Per majsi zian chi za'n lod rado'p ree dux compniar ree bèn riladx ree Jesucrist par ganenë'n laa reeman, par naj mejorli naj ganenë'n laa reeman con gaay diidx per diidx ni chignia' reeman në ni güün laa reeman sirv din gulüü reeman ben ren ree luar ganenë'n laa reeman con chiimil diidx ni ad rignia't reeman.

²⁰ Compniar raliduladx ree Jesucrist, ad bal rüjnridi xgab zi'c xindobëz. Gol gojc zi'c xindobëz per guial ad züjntidi ni mal, per par güündi xgab gol been xgab zi'c bengol.

²¹ Loj xtiidx Dios rëb: “Gaxhalan bèn rniee ree diidx ren, bèn ad najt ree bèn niz guie din guinieenë reeman bèn guie ree. Per ni'qui zian ad zuzoobt reeman da diidxan, rëb dux Dad ree Dios.”

²² Zeel guial rniee zienloj diidx, najn tijb sen par ree bèn ad rlliladx xtiidx Dios din chililadx reeman. Per guial rulüü bejn ree ni rën Dios gagbee reeman, laan naj ni güün sirv par ree bèn ma rlliladx ad par bèn ad rlliladx.

²³ Per ni'qui zian chi radxaag lasa'di par gucaagdiajguidi xtiidx Dios, abi' bal suløj guiniee tijb gajdi gadxagayaa diidx ni achut rignia' abi' chu' ree bèn qui bililadxri xtiidx Dios o bèn ad waliladx ree xtiidxaman, ¿wen id zanaladx reeman ya guial guijquidi rajc?

²⁴ Per bal chu' bèn qui bililadxri o bèn ad waliladx abi' caneedi xtiidx Dios, dxel chi guiguiejnman ni caneedi, gagbeeman xhie dol cayüjn reeman, laagajcaman gagbee chu najman.

²⁵ Zian gagbeeman xhienaag nabanman dxel guzuxibaman cwedx guiniabaman Dios, abi' guiëbaman guial diidxli za' Dios con lëjt.

Gol been gra xnejz

²⁶ Gra ni canin lojdi compniar raliduladx ree Jesucrist, caninan din gagbeedi guial chi rado'pidi par gucaagdiajguidi xtiidx Dios, gradi zajc güün ni chile' güündi, bèn ni gool cant par Dios, bèn ni gulüü ree bejn, bèn gugojn bejn ree conin balüü Dios lojman, bèn guiniee diidx ren ni ad rignia't gra bejn në bèn gudëed xtiidxaman loj ree bejn. Per gra ni güündi güün sirv par güünan yudar los demazri ree xcompniaridi din gusunuu sudxi'ch reeman loj ni rlliladx reeman xtiidx Dios.

²⁷ Bal yu' bèn rniee tijb diidx ni ad rnieet gra bejn, tio'pzaman o choonzaman guiniee diidx ni rajcaman, abi' tijb gaj tijb gaj reeman guiniee, chu' tëe bèn ni guiëb loj ree bejn xhie rën guiëb ni rëb reeman.

²⁸ Per bal id yu' bèn zajc gugojn bejn ree xhienin rëb reeman con diidx ni rajc reeman, meyorli achet guiëb reeman delant loj ree bejn. Zagdxeli laazi reeman cwedx Dios lën luxdoo reeman.

²⁹ Abi' ree bèn gugojn delant loj gra ree bejn conin balüü Dios laa reeman, tio'pzi reeman o choon reeman guiniee. Abi' los demazri reeman gucaagdiajg bal zagdxequi naj ni canee reeman.

³⁰ Per bal tijb bèn zojb cucaagdiajg loj hor guin gulüü Dios laaman xhienin, rayal yacwëez bèn canee din gac gugojn bèn guin bejn ree xhie nin balüü Dios lojman loj hor guin.

³¹ Gra ree bèn ni bayal gudëed xtiidx Dios loj ree bejn, gradi zajc gugojn bejn ree xhienin balüü Dios lëjt, per tijb gajdi chi yayalidi din gra ree bèn cucaagdiajg gusiid reeman chu' tëe luxdoo reeman.

³² Gol badxe'guicj guial ree bèn rudëe xtiidx Dios loj ree bejn laagajc reeman rniabee laa reeman din guiniee reeman chi rayal guiniee reeman.

³³ Din Dios ad rëntaman tijb ni ad najt xnejz, rënman tijb ni naj xnejz din yabedxe luxdoodi con ree xcompniaridi.

Yan, zi'c rajc gra ree luar lod rado'p ree xbejn Cristo,

³⁴ loj hor ni ma cucaagdiajg reeman xtiidx Dios ad yu't permis guiniee ree béngunaa rayal guzoob reeman xtiidx xixinguaaw reeman zi'c rëb Dios güün reeman diidx gulal.

³⁵ Bal xhie rën reeman gagbee reeman, meyorli lidx reeman guiniabdiidx loj lacheel reeman, din natun guiniee tijb béngunaa loj hor ni cucaagdiajg reeman xtiidx Dios.

³⁶ Gol basaaladx guial ad lëjtij naj bèn yaløj cwa' xtiidx Dios ad tijb tëetzi lëjt ragbee xtiidx Dios din güündi zi'c naj xixgabidi.

³⁷ Bal chu bén naladx guial ma cwa'man quiarguejn par gudëëman xtiidx Dios loj ree bejn o por xSprijt Dios ma cwa'man xhie stijb quiarguejn, dxel laa gagbee gajcaman guial ni cucan loj gui'ch guie najn zi'c rniabee dux Dad ree Dios.

³⁸ Per bal id riladxaman ni canin lojdi loj gui'ch guie, ziangajc ad chililadx-idi xtiidxaman.

³⁹ Yan zi'c ma rnin lojdi compniar raliduladx ree Jesucrist, gol been naguiejn din gapidi quiarguejn din gudëëdi xtiidxaman loj ree bejn, ad bal gudxoondi guinee tijb ree xcompniaridi bén nriee tijb diidx ni ad rignia'tidi.

⁴⁰ Per gra ni rüjndi gol beenan xnejz, gol beenan zi'c rayal.

15

Baban Jesucrist loj ree bengüt

¹ Compniar raliduladx ree Jesucrist, rën tëen gusaaladxidi xtiidxza'c Jesucrist ni ma rnin lojd, diidxza'c ni ma bililadxidi loj ni za'dxi'chidi.

² Gol basaaladx guial por ree diidxza'c guin ma rajpidi perdon por xtolidi bal walidi zinalidi laan, per bal id zinalidi laan bililadx xlia'zidi laan.

³ Yalojxgaj balün lëjt ni basidan yaloj. Rnin lojdi guial Cristo güt por dux tol ree zi'c rëb loj xtiidx Dios.

⁴ Abi' biguie'chaman dxel ni goc choon dxej babanman zi'cgajc rëb loj xtiidx Dios.

⁵ Chi ma babanman, dxel balüülojman loj Bëd dxel loj los demazri ree apóstoles.

⁶ Zianz balüülojman në loj ree tijb cwaa ree bén riladx laaman, gojc reeman mazri de gaay gayuu bejn. Yu' reeman ma güjt, per mazri zien reeman stanaban.

⁷ Balüü loj tëëman loj Santiaaw dxelri loj ree apóstoles.

⁸ Ni bigra balüülojman lon, naj najn zi'c tijb xindo ni rajl chi ma gudëd tiamp ni rayal galix.

⁹ Din naj ta'nzi lasajcan loj los demazri ree apóstoles, abi' ad rayalt guirii lan apóstol guial basagzin bén riladx ree Jesucrist.

¹⁰ Per guial naj Dios benza'c zeel najn ni najn, abi' ad bayaxlia'tzaman naj din naj mazri ma benan xmandadaman guial loj los demazri ree xbejn Jesús, majsi diidxliczi ad da xtijbt naj cayünan ni cayünan, në con xyudar Dios cayünan laan.

¹¹ Zeel achet güünan bal por chunin biguiejndi xtiidx Dios bal por naj o por stijb ree xbejn Jesús, ni mazri lasajc naj guial ma biguiejndan abi' ma bililadxidan.

Yaban ree bengüt

¹² Yan zi'c ma balüün lëjt xtiidx Dios guial baban Cristo, ¿chexquiza zeel yu'di rëb ad zabant ree bengüt?

¹³ Bal id zaban ree bengüt, rën guiëban guial ad babant Cristo.

¹⁴ Abi' bal id baban Cristo dxel achet sirv ni caylüün lëjt, ache tëët sirv ni riladxidi laaman.

¹⁵ Dxel bal zianan, ganax diidx rusquieen caynan por Dios guial ma ranan ma baban Jesucrist. Abi' bal id walin guial yaban ree bengüt, dxel ad walitan guial baban Jesucrist.

¹⁶ Din bal id zaban ree bengüt, dxel ni'qui Jesucrist ad babantri.

¹⁷ Abi' bal id babanman, achet sirv guial riladxidi laaman ache tëët perdon yu' por xtolidi.

18 Bal naj zian, xt ree bèn ma güjt achet xperdon reeman majsi bililadx reeman Jesucrist.

19 Bal lojzi guidxliuj guie güün sirv ni baliladx ree Jesucrist dxel dunujzi ree nayajc ree bèn naban mazri naya guial loj chutëez bënan.

20 Per diidxiczi Jesucrist naj bèn baban, abi' laaman naj quijb bèn yaløj baban.

21 Abi' zi'c bidoonloj guialgüjt loj guidxliuj guie por tijb bejn, ziangajc por tijb bejn yaban ree bengüt.

22 Zi'c bidoonloj guialgüjt par gra ree bejn por Adán, ziangajc yan por Jesucrist ma yu' stjib guialnaban par ree bèn rliladx laaman.

23 Per gra gac zi'c rayal: Yaløj Jesucrist naj bèn baban, dxel chi gui'taman stjib dxel ma yaban ree bengüt bèn bililadx ree laaman.

24 Abi' chi ma beenman gan gunabeeman gra ree bèn rdxe'ch laaman, zi'c ree bèn rajp guialguxtis në ree bèn rajp graløj guial rniabee, dxel ma yayü xguialrniabeeman loj dux Dad ree Dios.

25 Din rayal nabee Cristo xt chi ma beeman gan canabeeman gra ree bèn rdxe'ch laaman.

26 Abi' ni chigra gunidlojman naj guialgüjt.

27 Loj xtiidx Dios rëb guial Dios badëë guialrniabee loj Jesucrist din nabeeman gra, per ad rënt guiëban guial në Dios rniabeeman din Dios badëëd guialrniabee lojman.

28 Abi' dxej ni ma rniabee Jesucrist loj gra dxel yayüman guialrniabee ni badëëd Dios lojman din ma nabee tijbzi Dios gra.

29 Yan bal id zaban ree bengüt, ¿chexquiza zeel yu' ree bèn rirobnijs xcwent ree bèn ma güjt, abi'za bal id zaban ree bengüt?

30 Achet sirv guial nadxu'n loj ni nadxeb gra hor.

31 Din rugojnan lëjt, gra dxej za'n loj guialgüjt, laan naj ni diidxli ni rnin lëjt zi'cgajc walin guial dad nix yu' luxdon con lëjt guial najdi xbejn Cristo.

32 Yan bal naabzi loj guidxliuj guie güün sirv ni cayünan dxel achet sirv ni basajc ree bèn Èfeso naj, naj reeman bendoxh zi'c ree bedoxh. Din bal id zaban ree bengüt mejorli yaguieen ree zi'c rëb ree bèn rëb: "Yadaaw ree yadü' tëë ree din guixie ma bayëjt ree."

33 Per naj rni lëjt ad tiëbidi gusquiee reeman lëjt. Din guial ridxga' xtiidx ree bèn ni ad zët xnejz, najzan par guxhiinan zi'c nabandi.

34 Zeel gol been xgab zi'c rayal ad bal rüjn tëëridi dol din yu'di ni'quid nünbeetidi Dios, zeel canin lojdi zian din yaya'nxtudi.

Xhienaag yaban ree bengüt

35 Per wed yu'di rüjn xgab: "¿Xhieza naag yaban ree bengüt? ¿Xhienaag naj cuerp ni gap reeman?"

36 Per xgab guin xgab tontzan. Din lëjt ragbee guial chi rxübin bejn tijb xhaj xhienin, chi rliejnan dxel rnijt xhaj ni guxübinman.

37 Ad cwaan ni rliejn guint rxübin bejn, xhajnan rxübinman, zi'c rüjn bejn con trigo o xhietëez stjib xhaj nin.

38 Per chi rliejnan ma najn cwaandoo zi'c rniabee Dios gacan, xhietëez xhaj nin ni rxübin bejn ma yu' cwaando ni guilienan.

39 Zi'c nadxaa xcuerp bejn con xcuerp ree be, nadxaa tëë bëjl con xcuerp ree biguijn.

40 Nadxaa tëë ree ni yu' xanyabaa con ree ni yu' guidxliuj, nadxaa naj guialza'cdxoon ree ni yu' xanyabaa con ree ni yu' loj guidxliuj.

41 Nadxaa xbacha' gubijdx guial loj bëw nadxaa tëë xbacha' ree bajl xanyabaa, xt ree bajl xanyabaa garent garen naj xbacha' reen.

42 Yan ziangajc gac con guial yaban ree bengüt. Cuerp ni rguie'ch rodxan, per cuerp ni gap bejn stijb ad yu't dxej godxan.

43 Cuerp ni rguie'ch rxinan, per chi yaban bejn stijb ma gapaman tijb cuerp za'cdxoon ni achet gac. Cuerp ni rguie'ch guin achet gojl yu'n, per chi yaban bejn stijb ma gapaman cuerp ni yu' gojl.

44 Rguie'ch cuerp ni rajp bejn loj guidxliuj guie, per chi yaban bejn stijb ma gapaman tijb cuerp ni güün sirv par xanyabaa. Din zi'c yu' cuerp par loj guidxliuj guie ziangajc yu' cuerp par xanyabaa.

45 Loj xtiidx Dios rëb guial yaløj Adán gojp guialnaban loj guidxliuj guie. Dxel bi't Jesucrist, bèn razaladx guialnaban loj ree bejn.

46 Ad yaløj rajp bejn guialnaban ni gapaman xanyabaa, yaløjxgaj rajpaman guialnaban loj guidxliuj guie dxel guialnaban xanyabaa.

47 Adán gojcaman con yuj zeel najman bénguidxliuj, per Jesucrist xanyabaa zëëdaman.

48 Gra ree bénguidxliuj naj xcuerp reeman zi'c goc xcuerp Adán loj guidxliuj guie, per chi guidxin dxej dxel gap ree bejn tijb cuerp lasa' cuerp ni rajp Jesucrist xanyabaa.

49 Din zi'c nayajc ree zi'c goc Adán loj guidxliuj guie, ziangajc yayajc ree zi'c naj Jesucrist xanyabaa.

50 Abi' rugojnan lëjt compniar raliduladx ree Jesucrist, cuerp ni raya'p ree loj guidxliuj guie ad zajct yayun xanyabaa lod canabee Dios. Din ni rodx ad zajct chu'n lod yu' ni ad rodxt.

51 Per rënan gagbeedi tijb ni achutczu wayagbee xt yan guial ad dugrat ree yayëjt, per dugra ree guidxaa zi'c nayajc ree, yaya'p ree cuerp ree.

52 Laan gac chi yaguiejn ree trompejt ni gugojn dunuj ree guial ma bidxin tiamp ni yarii ree loj guidxliuj guie, dxel tibrajtzi zi'tctzi chi ruchip guialloj bejn zian guidxaa zi'c nayajc ree. Chi guibejdx trompejt guin yaban ree bengüt dxel ad yu'tri dxej guiët reeman abi' hor zii ma bidxaa zi'c nayajc ree yan.

53 Din rüjn naguiejn guidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët.

54 Abi' chi ma bidxaa cuerp ni rodx por stijb cuerp ni ad yu't dxej godx guidxaa tëë cuerp ni rëjt por stijb cuerp ni ad yu't dxej guiët, dxejzii naj dxej ni ma gojc cumplid ni rëb loj xtiidx Dios lod rëb: "Xt guin ma bayaaløj gojc gan loj guialgüjt."

55 Nadxel tëë ma gojc cumplid zi'c rëb loj xtiidx Dios lod rëb: "Guialgüjt, ¿conza guial rüjnl gan? ¿Conza guial rusagzil bejn?"

56 Guialrusagzi guialgüjt naj por dol, abi' por ley ragbee bejn guial dol guin naj ni rniabee laaman.

57 Per quixtëe dux Dad ree Dios, bèn rüjn dunuj ree yudar par yaguieen ree gan por xguialgüjt Dad Jesucrist.

58 Zeel compniar raliduladx ree Jesucrist zi'c rënan lëjt rnin lojdi, gol guzudxi'ch ad chu' tëë luxdoodi tio'p. Guixie guixie gol been naguiejn güündi mazri xmandad Dios, din lëjt ragbee guial ad ni xlia'tzi gra ni cayüjndi par Dad Jesucrist.

¹ Yan por milia ni naj guto'pidi par güündi yudar stijb ree dux compniar ree bèn raliduladx ree Jesucrist, gol been zi'c gunabeen güün ree bèn riladx ree Jesucrist niz Galacia.

² Gazob dumingw tijb gajdi gol gule'c cintabl zi'ctzi beendi gan lèn toxman, din chi guialan ad rüntri naguiejn guido'pidi milia guin.

³ Abi' chi guialan, bèn ni gucaabeedi par gaxhalan laa reeman chigsa'n gon guin Jerusalén gaxhalan laa reeman con gui'ch ni guiëb chu naj reeman.

⁴ Abi' bal guguian guial rünj naguiejn gan dxel chinë'n laa reeman.

Xhienaag naj xixgab Pab

⁵ Yaløj gadëedan niz Macedonia dxel guialan Corinto guidganan lëjt.

⁶ Wed xchej gazun con lëjt. Wed guidib tiamp nayaag gazun con lëjt, dxel güündi naj yudar din gan lod naj gan.

⁷ Ad rëntan gadëedzi nejzan gaguixlon lëjt, rënan gaglaan con lëjt bal guneë Dios permis.

⁸ Per yan naj yaya'nan Éfeso xt lanij pentecostés,

⁹ din guie merczi yan catiëjb ree bejn cucaagdiajg reeman xtiidx Dios, abi' rulüü zien reeman chililadx laan, majsi zien gajc reeman rdxe'ch naj por zian.

¹⁰ Chi gui't Timoteo, gol been naguiejn din suman zagdxe con lëjt, din lasa'gajc xmandad Dios ni cayünan cayünman.

¹¹ Zeel achu lëjt guiniajgaa lojman, gol beenman yudar din gusnuu xnejzaman sin guial chu'man xgab, din gui'taman guie lod cabëëzan laaman con los demazri ree dux compniar ree.

¹² Abi' Apolos, naj guza'c laaman liaadx din nidnëman laa reeman nitixloj reeman lëjt, per ad guyëntaman ni'taman yan, per zi'tcaman guitixlojman lëjt chi guneë laaman tiamp.

Düidx bigra ni bacaa Pab loj gui'ch guie

¹³ Gol guzujsin gol guzujdxi'ch tëë loj ni riladxidi Jesucrist. Gol gudaan ni gui'tzi gol guzujdxi'ch tëë.

¹⁴ Gra ni güündi gol beenan guial rëndi bejn ree.

¹⁵ Compniar raliduladx ree Jesucrist, lëjt ragbee guial Estéfanos con xfamilaman laa reeman naj bèn yaløj bililadx Jesucrist niz Acaya, ragbee tëëdi xhienaag cayünj reeman yudar dux compniar ree bèn riladx ree Jesucrist. Zeel rnin lojdi:

¹⁶ Lasa' ree bèn guin gol bazoob xtiidx reeman con gra ree bèn cayünj xmandad Dios në ree bèn cayünj yudar cayajc mandad guin.

¹⁷ Dád nix guyu luxdon chi baguiaad Estéfanos guie, në Fortunato në Acaico. Din por laa reeman guza'can zi'cgajc chi za'n con gradi.

¹⁸ Laa reeman bagu' luxdon niz guie zi'c ragu' reeman luxdoodi, abi' lasa' ree bèn guin gol gojp reeman respetj.

¹⁹ Gra ree compniar rililadx Jesucrist niz Asia guie rugajpdioz reeman lëjt. Abi' Aquila con lacheelaman Priscila con gra ree xbejn Cristo bèn rado'p ree lidx reeman, rugajpdioz reeman lëjt, nayajc ree xbejn Cristo.

²⁰ Gra ree dux compniar ree bèn rililadx ree Cristo rugajpdioz reeman lëjt, gol bagajpdioz tëë lasa'di zi'c rayal.

²¹ Naj Pab, quijb naj cuca lëjtr guie ree par gugajpdiozan lëjt.

²² Bal yu' bèn ad rënt dux Dad ree Jesucrist, laaman ma rayal xcasti Dios. jDux Dad ree Jesucrist nayob gui'taman!

²³ Abi' dux Dad ree Jesucrist güünle' gradi.

²⁴ Zi'c nayajc ree xbejn Cristo tiblojzi rēnan gradi. Amén.

Gui'ch barojp ni guxhaal San Pabl loj ree bén Corinto rliadx Jesucrist

Rugajpdioz Pab bén Corinto rliadx ree Jesucrist

¹ Naj Pab, Dios bacaabee naj gacan xi apóstol Jesucrist, nê dux compniar ree Timoteo za' con naj. Naj cuca gui'ch guie par lèjt guial ma rliadxidi xtiidx Dios luguiedx Corinto nê los demazri ree bén riga' niz Acaya.

² Dux Dad ree Dios con Dad Jesucrist güünle' lèjt yabe'cdxe tëë reeman luxdoodi.

Tarbajw ni gudëd Pab

³ Quixtëë Dios xDad Dad Jesucrist, bén naj Dad bén raya dunuj ree naj tëëman Dios bén ragu' du luxdoo ree.

⁴ Laaman ragu' du luxdoo ree loj xhietëëz guialrzagdiaj ni radüüd ree din gac yalu' ree luxdoo ree bén cadëd xhietëëz guialzi, yalu' ree luxdoo reeman zi'c ragu' Dios du luxdoo ree.

⁵ Din majsi cayzaagdiaj da't ree guial nayajc ree xbejn Cristo, ziangajc dád ragu'man du luxdoo ree.

⁶ Abi' bal cayzaagdiajn, cayzaagdiajn din yaguienan lèjt yudar din chu' luxdoodi din laa tëëdi loj dol. Abi' bal cu'man du luxdoo, rgu'man du luxdoo din chu' luxdoodi din gac taandi lasa' ree guialzi ni caydüüdan.

⁷ Ad yu' nawëëgt du luxdoo con lèjt, din zi'cgajc cazagdiajdi ziangajc cayzaagdiajn dxel ziangajc yagu' Dios luxdoodi zi'cgajc ragu'man du luxdoo.

⁸ Compniar raliduladx ree Jesucrist, rayënan gagbeedi guial dád zro' naj ni baza'can niz Asia. Naya baza'can niz ni, par dunujn ad zadaantran, ad naguieentran nejz guial yabajnran mazri,

⁹ baguieenan xgab guial ma bayëjtan. Per baza'can zian din yadxë'guijcan guial achet zajc yaguien dunujzan sin xyudar Dios, bén rasban ree bengüt.

¹⁰ Laaman babëë dunujn loj guialgüjt guin abi' gagnëman dunujn loj lasa' ree ni nadxeb guin. Dunuj ree rayagbee guial gusnuu güünman dunujn yudar,

¹¹ mazri bal güündi yudar cwedx guiniabidi Dios por dunujn. Abi' bal zien ree bejn cabejdx canab Dios por dunujn dxel zien gajc reeman gudëëd quixtëë lojman zi'c cayagnëman dunujn.

Chexc ad wejt Pab Corinto

¹² Abi' ni rabaan rnin lojdi guial achetczi naduladxan guial rayagbeen nabajnan naya delant lojdi nê delant loj ree bénguidxliuj, abi' diidxli cayguieenan ni rayal yaguienan. Per ad cayguieentan zian por dux quiar-guiejnzan, cayguieenan zian por xyudar Dios.

¹³ Loj dux gui'chan ad racaatan ni ad zajct goolidi o ni ad zajct chignia'di. Balzianclaa chignia'di gra ni canin lojdi.

¹⁴ Zi'cgajc ta'ngaj cayagbeedi guial chi gui't Dad Jesucrist zatijb lèjt yabaadi con dunujn guiáad dunujn yabaan con lèjt.

¹⁵ Laan naj ni yu'guican, zeel yaloj benan xgab nidganan lèjt din nabaadi guial ma barojp volt bidganan lèjt.

¹⁶ Benan xgab nidganan lèjt chi nialan niz Macedonia, abi' chi nazaan Macedonia nialan nidganan lèjt stijb, dxel nagu'nejzidi naj par Judea.

¹⁷ Ad g undi xgab guial chi rnin guidganan l jt rnizan zian. Ad g undi xgab guial r nan zi'c r jn gra ree b nguidxliuj, ganin guialan abi' ragbeen guial ad zialtan.

¹⁸ Dios ragbee guial ad raguie'chtan yaguieenan ni rayagbeen ad zaguieentan.

¹⁹ Din Jesucrist Xi'n Dios, b n ni ma baguien xtiidx lojdi, naj con Silvano con Timoteo, ad najt Jesucrist b n na g unman ni ragbeeman ad z jntaman, laaman ganax diidxli rnieeman.

²⁰ Din por laaman rajc cumplid gra ree xpromejs Dios. Zeel por laaman raguie'ch ree "Am n" chi rad ed ree quixt e loj Dios.

²¹ Abi' Dios laaman cay jn dunuj ree yudar con l jt din yadxu'dxi'ch ree loj ni nayajc ree tijbzi con Cristo, Dios bacaabee dunuj ree din yayajc ree par laaman.

²² Laaman gule dunuj ree par laaman, abi' guxhaal xSprijtaman b n nabajnn ' ree zi'c tijb sen guial yaca' ree ni yaca' ree.

²³ Yan bal gadan ga Corinto zi'c benan xgab, Dios ragbee guial gadan ga guial ad r ntan gadil 'n l jt, abi' Dios gud ed naj casti bal id wali ni canin.

²⁴ Ad cayguieentan naguiejn yanabeen l jt xhienaag chililadxidi Jesucrist, din dunujn rayagbee guial diidxli za'dxi'chidi loj ni rliladxidi Jesucrist, ni cayguieenan naj guial yaguieenan l jt yudar din chu' luxdoodi nix guibandi.

2

¹ Zeel benan xgab ad zidganatan l jt yan, chit e chu'naya luxdoodi.

² Din bal gagu'nayan luxdoodi,  chuza cu' luxdon nix bal ma badxe'nayan luxdoodi l jt ragu' luxdon?

³ Zeel bacan zi'c bacan loj gui'ch ni guxhalan lojdi, din chi guialan ad cu'di luxdon naya luar cu'di luxdon nix. Abi' naj ragbee bal yu' luxdon zagdxex gradi yu' luxdoo zagdxex por zian.

⁴ Chi bacan gui'ch guie d d guyun xgab abi' guyunayan xt ronan bacan diidxnaa ni bacan loj gui'ch guie, per ad bacatan gui'ch guin par gagu'nayan l jt, bacanan par gagbeedi guial r n da'tan l jt.

Yu' perdon par b n badxe' falt

⁵ Bal yu' tijbidi ma badxe'naya naj, per ad najtzi guyunaya n gajc l jt guyunaya. Rnin n  l jt chit e gad edlajn guial ganin gracziidi guyunaya por zian.

⁶ Per naj rni lojdi compniar raliduladx ree Jesucrist, ma gojczy yan con casti ni ma bad edidi loj b n guin.

⁷ Yan gol beenman perdon gol bagu' t e luxdoooman chit e chu'naya luxdoooman xt ad zadxejlt xhie g unman.

⁸ Zeel rniaaban lojdi, gol been naguiejn din gagbeeman guial r ndi laaman zi'cgajc guy ndi laaman guia'xchej.

⁹ Gui'ch ni guxhalan lojdi gocli, guxhalanan din gagbeen bal ruzoobidi da diidxnan guial g undi gra ni ganin lojdi.

¹⁰ Yan chut ez b n g undi perdon, n gajc naj g n laaman perdon. Abi' b n ma benan perdon, bal yu' ni g nan perdon, benan laaman perdon delant loj Cristo por l jt

¹¹ chit e g un xinxab dunuj ree gan, din dunuj ree rayagbee xhienaag naj xguialrusquiee xinxab.

¹² Chi bidxinan guiedx Troas par ganen xtiidxza'c Jesucrist, dád gognë Dios naj par gūnan mandad guin ni.

¹³ Per ad nixt guza'can guial ad bidxaaglojtan dux compniar ree Tito. Zeel basa'nan bén guin ree abi' wan Macedonia.

Ragnë Jesucrist dunujn zianczi

¹⁴ Per quixtëë Dios guial por Jesucrist guixie guixie cayagnëman dunujn chitëë xhie güün dunujn gan abi' por dunujn cayagbee ree bejn xtiidxza'c Jesucrist, diidxza'c guin ree naj zi'c tijb ni rliaa nejxh ni rire'ch cha' guidibczi.

¹⁵ Abi' por Jesucrist dunujn nayajc zi'c tijb go'xh ni rliaa nejxh delant loj Dios, go'xh ni rdxin loj ree bén rliladx Jesucrist në loj ree bén ad rliladxt.

¹⁶ Par ree bén ad rliladxt laaman, dunujn nayajc zi'c tijb go'xh ni rugÿjt, per par ree bén rliladx laaman dunujn nayajc zi'c tijb go'xh ni runee gualnaban. Per, ¿chu zajc güün ree ni guin sin xyudar Dios?

¹⁷ Dunujn ad cayguieentan negojs con xtiidx Dios zi'c rÿjn garol ree bejn, dunujn raguieenan zi'c rayal, zi'c ma bacaabee Dios dunujn yaguieenan. Abi' Dios ragbee guial por guial nayajcan xbejn Cristo zeel raneen xtiidxman.

3

Nejz cüb ni yu' par yadxin ree loj Dios

¹ Chi ranan zian, ad naladxidi guial dunuj gajcan cayles dux valoran. Lëjt ragbee guial ad rÿjnt naguiejn yalüün tijb gui'ch lojdi par gagbeedi chu dunujn o yanaaban gui'ch lojdi ni güün dunujn yudar par gagbee ree bejn chu nayajcan zi'c rÿjn ree ben ren.

² Din lëjt gajc naj tijb gui'ch par dunujn, gui'ch ni yu' du luxdoon ni rool ree bejn ni nünbee tëë reeman.

³ Zi'c rulüü yaguie'ch ree lëjt naj tijb xtiidx Cristo ni bacaan, per ad bacaatanan con tint, bacaanan con xSprijt Dios bén naban, tijb ni ad cwat loj tijb guiaj nata', cwan luxdoo ree bejn.

⁴ Dunujn raya'p Dios confianz por Jesucrist,

⁵ abi' ad raguieentan xgab guial yu' ni raguieen dunujzan, din gra ni raguieenan, raguieenan laan con xyudar Dios.

⁶ Dios naj bén razaladx dunujn quiarguiejn par yagojnan bejn ree xcwent nejz cüb ni ma yu' par yadxin ree loj Dios, nejz cüb ni ad ryaadxt chinal bejn tijb ley ni zëed loj gui'ch, per rÿjn naguiejn chinalaman ni zëed por xSprijt Dios. Din ley castizi naj ni zidnën, per xSprijt Dios gualnaban naj ni rudëeman loj ree bejn.

⁷ Abi' majsi castizi naj ni zidnë ley ni badëë Dios loj Moisejs loj tijb guiaj nata', per dád bidiin bacha' loj Moisejs chi cwa'man ley guin, xt ad gojct nuguaa ree bén Israel lojman por bacha' guin, bacha' ni ta'ngaj ta'ngaj gunidlojn.

⁸ Bal chi bi't ley guin gojc zian, yan, imazri ni za'cdxoon naj guial gucaagdi-ajg ree bejn xcwent nejz cüb ni rulüü xSprijt Dios ni ma rajp bejn con Dios!

⁹ Din chi bi't ley ni ridnë casti par ree bejn, con bacha' bi'tan, yan, imazri ni za'cdxoon naj guial guien ree bejn xhienaag gac reeman naya delant loj Dios!

¹⁰ Abi' bal ni za'cdxoon gojc chi bi't xley Dios loj guidxliuj guie, yan achetczi lasajc gualza'cdxoon guin par gualza'cdxoon ni naj por nejz cüb ni ma rajp ree bejn con Dios.

¹¹ Abi' bal ni ad rüjnt sirv par gra tiamp, bi'tan con tijb ni za'cdxoon, yan mazri ni za'cdxoon naj ni ad yu't dxej nit.

¹² Abi' guial yu'guijc ree zian, zeel sin guialrdxeb caylüünan bejn ree.

¹³ Ad raguieentan zi'c been Moisejs, basiaaw lajd lojman chitëë gagbee ree bén Israel guial ziquied guialrulaa bacha' lojman, bacha' ni laa gunit gajc.

¹⁴ Per ad lojtzi Moisejs baaaw, ne gajc xquiargueijn ree bejn baaaw. Din xt yandxej chi rool reeman loj xtiidx Dios ni bacaa Moisejs, achet rignia' reeman, tijbzi por Jesucrist zajc chignia' reeman laan.

¹⁵ Per xt yandxej chi rool reeman ni bacaa Moisejs ad rignia't reeman guial sta nayaaw xquiargueijn reeman.

¹⁶ Per bén rililadx Jesucrist, laaman rxhial xquiargueijnman.

¹⁷ Din tijbzi naj Jesucrist con xSprijt Dios, abi' lod ma naban bejn con xSprijt Dios achetri rniabee laaman.

¹⁸ Zeel achetri nayaaw duloj ree zi'c been Moisejs, din dunuj ree nayajc ree zi'c guiaawajn lod rguien xbacha' Jesucrist abi' chaawladx cayajc ree zi'c rënman yayajc ree, abi' guixie guixie cusniman dunuj ree por xSprijtaman.

4

¹ Zeel zi'c ma baya Dios dunujn abi' gulejman dunujn par yaneen xtiidxa-man, ad zadxagtan yaguieenan mandad guin.

² Dunujn achet raquie'chan, achet ni ad rünjt sirv cayguieenan, ad caysquieentan bejn ree ad caychaa tëtän xtiidx Dios. Dunujn cayneen ni naj xtiidxli Dios, abi' bejn gajc ree zajc gagbee guial cayguieenan xnejz delant loj Dios.

³ Per bal yu' bén ni ad rignia't xtiidxza'c Jesucrist ni cayneen, ad rignia'taman laan guial ad zëtaman loj xnejz Dios.

⁴ Abi' xindxab rniabee loj guidxliuj guie ma bascajyix xquiargueijn reeman, guial ad rënt reeman chililadx reeman, chitëë gusni xtiidxza'c Jesucrist laa reeman abi' ad zajct guguaa reeman xguialrniabeeman, laaman guial najman zi'c gajczi Dios.

⁵ Ad caytie'chtan dux tiidx gajcan, ni caytie'chan naj xtiidxza'c Jesucrist, bén naj Dad par dunuj ree. Abi' ni ranazan lojdi guial cayguieenan sirv lëjt por guial rayënan Jesucrist.

⁶ Abi' laagajc Dios ni gunabee persi bani loj guidxliuj guie chi gule'cchaawaman laan, laagajcaman basni dux quiargueijnan, guxhalaman dux quiargueijnan din yayignia'n xhienaag naj xguialrniabeeman, guialrniabee raguiaa ree por Jesucrist.

Yabajn ree por guialrliladx

⁷ Gulejman dunujn par yaguieenan ni cayguieenan, majsi nayajczan zi'c guiajs bajn din guiguien guial gra guialrniabee zëëd por Dios ad por dunujtan.

⁸ Majsi graløj guialzi caydüüdan per ad ralenya'tan. Majsi rulüü achetri zajc yaguieenan, per radxejl gajc xhienaag yaguieenan.

⁹ Majsi xhietëëz rüjnnë bejn dunujn, per ad riro'nladxt Dios dunujn. Rguin reeman dunujn per ad runidlojt reeman dunujn.

¹⁰ Bantëëz guin zio'n nadxu'n loj guialgüjt zi'cgajc guzajc Jesucrist, per zian ralüün guial raya'pan xguialnabanman.

¹¹ Dxel la'tgaj naban, guixie guixie nadxu'n loj guialgüjt guial nayajcan xbejn Jesucrist, per zian ralüün guial raya'pan xguialnabanman, majsi guidxin dxej nit dux cuerpan.

¹² Nadxu'n loj guialgüjt guial caytie'chan xtiidx Jesucrist, per por zian ma rajpidi guialnaban delant loj Dios.

¹³ Loj xtiidx Dios rëb: "Guial bililadxan, zeel gunen ni gunen." Yan ziangajc guial raliduladxan xtiidx Dios zeel cayneen laan.

¹⁴ Din dunujn rayagbee guial Dios, bén basban dux Dad ree Jesucrist loj guialgüjt, ziangajc yasbanman dunuj ree guial ma nayajcan tijbzi con Jesucrist dxel lëjt con dunujn tijbzi chignëman dunuj ree lod zojbaman.

¹⁵ Din gra ni cayguieenan në gra ni cayza'can, cayza'can zian din yagüieenan lëjt yudar din gusnuu gacxhiey ni rliiladxidi Jesucrist. Zian ma gac ree bejn mazri zien gudëed reeman quixtëe loj Dios, guza't tëe reeman laaman zagdxe.

¹⁶ Zeel ad ralenya'tan. Din majsi cayo'xh dux cuerpan por mandad guin, per dux sprijtan guixie guixie caycüb Dios laan.

¹⁷ Achetczi lasajc ree gualzi ni caydüüdan loj guidxliuj guie din najn ni rdëd, per por gualzi guin ree rayalan xgualnaza'c Dios, gualnaza'c ni lasajc mazri abi' ad yu't dxej nitan.

¹⁸ Din dunuj ree ad cayguieent ree naguiejn yaya'p ree ni ragüiaa ree loj guidxliuj guie, cayguieen ree naguiejn din yaya'p ree ni ad ragüiaat ree. Din ni ragüiaa ree loj guidxliuj guie yu' dxej nit reen, per ni ad ragüiaat ree yan ad yu't dxej nit reen.

5

¹ Dunuj ree rayagbee guial dux cuerp ree naj zi'c tijb yu cenci par dux sprijt ree loj guidxliuj guie, yu ni yu' dxej nit. Per rayagbee ree guial xanyabaa Dios gunee dunuj ree stijb cuerp, cuerp ni ad gojct por bénguidxliuj zi'c rajc tijb yu, abi' cuerp guin yaya'p ree par tiblayaa.

² La'tgaj raya'p ree cuerp guie loj guidxliuj ralu' ree gualquia, par dunuj ree xi nix diob guidxin dxej yaya'p ree cuerp ni yaya'p ree xanyabaa.

³ Din ad ganaxtizi Sprijt yayajc ree xanyabaa, nëgajc cuerp yaya'p ree.

⁴ La'tgaj raya'p ree cuerp ni raya'p ree loj guidxliuj guie, cayzaagdiajn nadxu'n xgab por ni cayza'can. Ad ranatan guial rayënan yayëjtan, ni rayënan naj guial yaya'pan cuerp cüb ni yaya'pan par tiblayaa din nit dux cuerpan ni ryal nit.

⁵ Dios been dunuj ree zi'c nayajc ree abi' banee xSprijtaman duloj ree zi'c tijb sen guial gac zi'c naman gac.

⁶ Zeel zianczi raya'p ree confians, abi' dunuj ree rayagbee guial la'tgaj nabajn ree loj guidxliuj guie, zijt nadxu' ree guial lod zojb dux Dad ree Jesucrist.

⁷ Per dunuj ree zunaal reeman guial raliduladx ree laaman ad guial ragüiaat ree xhienaa gac.

⁸ Zeel raya'p ree confians guin, abi' ma rayën ree yasa'n ree cuerp ni raya'p ree loj guidxliuj guie din yo' ree yuchu' ree con Jesucrist.

⁹ Zeel achet güünan bal loj guidxliuj guie o bal xanyabaa, per ni rayën ree naj guial yagüieen ree zi'c rën Cristo.

¹⁰ Din dugra ree ryal yadxin lojman lod güünman guialguxtis din tijbgaj dunuj ree yaca' ni ryal ree, por ni zagdxe o por ni mal ni bagüieen ree loj guidxliuj guie.

Xhienaa gac bejn nejz par guidxinman loj Dios

¹¹ Zeel por respëjt ni raya'p ree Jesucrist, cayguieen ree naguiejn guidxga' ree bejn xtiidxaman. Abi' Dios ragbee guial dunuj ree cayguieen ree zi'c ryal, balzianclaa në lëjt güünbee dunujn guial dunujn cayguieencan xnejz.

¹² Ad caylest dux valoran, ni ray nan naj guial yabaadi guial gagbeedi ni naj diidxli por dunujn, din gac yadxi'di diidx loj ree b n r jn naguiejn yaya'n reeman zagdxe delant loj ree bejn luar g  n reeman xgab xhienaag naban reeman delant loj Dios.

¹³ Yan bal par bejn rajc duguijcan por ni cayguieenan, per cayguieenan laan por Dios. Abi' bal par l jt nad dguieenan zeel cayguieenan mandad guie, cayguieenan laan par yaguieenan l jt yudar.

¹⁴ Guial r n Cristo dunujn zeel cayguieenan ni cayguieenan, din dunujn rayagbee guial Cristo g jt par gra bejn abi' gra ree bejn ma naj zi'c beng t par dol.

¹⁵ Abi' Jesucrist g jtaman por gra bejn din b n chililadx ree laaman ad zabajntri reeman zi'ctzi r n reeman, ma guiban reeman zi'c r nman, laaman guial g jtaman por laa reeman abi' babanman stijb.

¹⁶ Zeel bal guia'xchej baguieen ree xgab guial naj Cristo tijbzi b nguidxliuj, per ad najtri dux xgab ree zian por laaman. Abi' ad rayidxga'tri ree guial chu naj bejn,

¹⁷ din chut  z b n ma naj tijbzi con Cristo, ma bidxaa mod ni nabanman. Ma nabanman garen guial loj ni gubanman guia'xchej.

¹⁸ Per gra nine naj por xyudar Dios, laaman been persi raya'p ree nejz par yadxin ree lojman por Jesucrist, abi' laaman gule dunujn din yagojnan bejn ree xhienaag din gap reeman nejz par guidxin reeman lojman.

¹⁹ Din tijbzi naj Dios con Jesucrist abi' por Jesucrist r jn Dios naguiejn gap ree bejn nejz par guidxin reeman lojman, por Jesucrist ma nayab ree bejn sin dol delant loj Dios, zianan naj ni bacaabeeman dunujn yagojnan bejn ree.

²⁰ Zeel dunujn nayajc b n canee por Cristo, cayd edan xtiidx Dios din gagbee ree bejn xhie rniab Dios g  n reeman. Abi' por Jesucrist ranaaban lojdi: Gol guzuj zagdxe con Dios.

²¹ Din Jesucrist achetdzi dol beenman, per por dux tol ree baslaa Dios g jtaman zi'c tijb b ndol din por laaman, cuguiaa Dios dunuj ree zi'c tijb b n ni ad way jnt dol.

6

¹ Zeel zi'c cayguieenan xmandad Dios, dunujn ranaab lojdi: Ad g  nbee xlia'di guial r n Dios l jt.

² Din loj xtiidxaman r b:

Chi bidxin dxej guidxga'n l j,

bidxga'n l j

abi' chi bidxin dxej gapil perdon

dxel beenan l j yudar.

Abi' dunujn rana lojdi guial ma bidxin dxej guin par l jt, ma bidxin dxej guidxga' Dios l jt n  dxej g  nman l jt perdon.

³ Dunujn ad cayguieentan tijb ni g  n guial ad zaliladxtri ree bejn Jesucrist, ad cayguieentan tijb ni gui b ree bejn guial ad cayguieentan zi'c bal  n bejn ree.

⁴ Par gra cayl  n bejn ree guial dunujn nayajc b n cay jn sirv Dios caydan t  n xhiet  z ni raza'can, zi'c guialzi, tarbajw, ni naya,

⁵ n  guial naa ni r jn ree bejn dunujn. N  guial rgu' reeman dunujn ladxg iib, rgu' t   reeman dunujn loj wadijl, ni radxagan guial tant zien ni raguieenan, ni ral  n bacaal, ne guialrliaan ni rad  dan.

6 Cayl u t en bejn ree chu nayajcan guial nabajnan zi'c rayal, guial rayagbeen conin naj diidxli, guial raya'pan pacens nayajc t en benza'c con ree bejn, guial nabajnan con xSprijt Dios, guial diidxli ray enan ben ren ree,

7 guial ranen ni naj diidxli, guial cay jn Dios dunujn yudar, n  guial rad en consejw loj ree bejn o radxi'n xtiidx ree bejn con xtiidx Dios.

8 Yu' dxej rajp ree bejn dunujn respejt, yu' t e dxej rnieeguijdx reeman dunujn. Yu' dxej rniee reeman diidxza'c ree por dunujn, yu' t e dxej rniee reeman dunujn diidxguijdx. R jnn  reeman dunujn zi'c b n rusquiee majsi diidxli naj ni raneen.

9 Yu' dxej r jn reeman zi'c b n ad n nbeet dunujn, majsi n nbee reeman dunujn. Majsi rul u ma yay jtan per ad ray jtan, abi' majsi xhiet ez r jnn  reeman dunujn per ad rug jtt reeman dunujn.

10 Majsi yu' naya du luxdoon, per raguieenan naguiejn din guiguien guial yu' du luxdoon nix. Majsi b nprob dunujn per por dunujn zien ree b n ma naj rijcw niz loj Dios guial ma ragbee reeman xtiidxaman. Majsi achet raya'pan loj guidxliuj guie, per achet rayaadxan.

11 B n Corinto, dunujn ma ranan gra por dunujn, achet ni naguie'ch par dunujn guial diidxli ray enan l jt.

12 Dunujn ad rlioxt ray enan l jt, l jt bal id r nridi dunujn.

13 Per naj rnieen  l jt zi'c rnieen  tijb dad gra xi'nman: Gol guy en dunujn zi'c ray enan l jt.

Nayajc ree zi'c xyadoo Dios naban

14 Gol gojp cudad xhie ree compromis g undi con ree b n ad rliladxt Dios, din garen naj xixgab ree b n ma zinal ree xnejz Dios guial loj xixgab ree b n contzi naban. Garen naj xixgab ree b n ridxga' xtiidx Dios guial loj xixgab ree b n ad ridxga't laan.

15 L jt ragbee guial ad zajct gac Cristo tijbzi con xindxab, ziangajc garen naj b n rliladx Cristo guial loj b n ad rliladxt laaman.

16 Garen naj ree b n rliladx dux Dad ree Dios guial loj ree b n rliladx ni naladx reeman naj dios. Din dunuj ree guial raliduladx ree Dios naban, dunuj ree nayajc xyadoodan zi'c r b tiblajt loj xtiidxaman lod r b:

Naj gabajnn ' laa reeman gazu t en con laa reeman bant ez guin che reeman.

Naj gac xDios reeman

abi' laa reeman gac da bejnan.

17 R b t e loj xtiidx Dios:

Gol barii loj ree ben mal, gol been tiblax.

Ad g undi ni dxuudx din yaca'n l jt,

18 abi' naj gac tijb Dad par l jt

guy ad l jt gaquidi da xi'ngaanan n  daxi'ndxa'pan.

Zian r b dux Dad ree Dios b n ca' gra guialrniee.

7

1 Ni guin ree naj ree promisejs ni ma been Dios con dunuj ree nayajc ree b n rliladx ree Jesucrist. Zeel rayal yaguieen ree naguiejn yabajn ree naya. Yasa'n ree tiblax dol, xgab mal, n  gra ree ni dxuudx. Abi' guixie guixie yaguieen ree naguiejn yabajn ree zi'c r n Dios por respejt ni raya'p reeman.

Rabaa Pab guial bay jn ree b n Corinto xgab por xtol reeman

2  Gol gojc benza'c con dunujn! Dunujn achet waguieenan l jt, achet ni mal waguieenan l jt ad wasquiee t etan l jt.

³ Ad naladxidi caneguijdxan l jt, din zi'c ma rnin lojdi diizd guia'xchej guial dunujn ray nan l jt, abi' majsi yay jtan o majsi yabajnan per tijbzi nayajcan con l jt.

⁴ D d ra'pan l jt confianz abi' d d rabaan n l jt. Majsi xhiet ez guialzi cayd udan, per zi'c rgu'di du luxdoo nix zeel d d rabaan, majsi xhiet ez cayza'can

⁵ Din diizd chi badxinan niz Macedonia achetctzi guial yaziiduladxan por gra ni cayza'can, zi'c ni r jnn  ree bejn dunujn n  guialnadxeb ni cayd udan.

⁶ Per Dios b n ragu' luxdoo ree b n yu'naya luxdoo, laaman bagu' du luxdoo chi bi't Tito guie.

⁷ Abi' ad guialzi bi'ttaman bayu du luxdoo nix, n  guial bagu'di luxdooan zeel bayu du luxdoo. Naman du lojn guial d d r ndi guguaadi naj, yu' t edi xgab yu'naya t edi por naj. Laan naj ni rabaan n guial yu'quidi xgab por naj.

⁸ Majsi naya guyu luxdoodi por gui'ch ni guxhalan lojdi, per achet naladxan. Majsi d d naya guyu luxdon chi guxhalanan guial ragbeen zunayadi tibladed,

⁹ per yan nix yu' luxdon, ad guial guyu nayatidi, yu' luxdoo nix din por guialguyunaya guin ma bay jndi xgab z di loj xnejz Dios. Guyunayadi abi' gudaandi zi'c r n Dios, abi' achet ni mal baguieenan l jt.

¹⁰ Din chi runaya luxdoo bejn zi'c r n Dios, guialrunaya guin r jn yudar persi ray jn bejn xgab por xtolaman, zian rarii bejn loj casti, abi' ad yu't dxej yay jn bejn xgab guial gulaaman loj casti guin. Per guial runaya luxdoo bejn abi' ad r jntaman naguiejn chu'man loj xnejz Dios, dxel ad zajct gapaman guialnaban delant loj Dios.

¹¹ Per l jt gol baguiaa zi'c ma been yudar guial guyunayadi abi' gudaandi zi'c r n Dios. Por guial guyunayadi nayob beendi naguiejn bazuxnejzidi ni ma rnin cay jn tijb l jt, abi' balendi bidxeb t edi por ni cay jnx. Dxel ma r nejzdoodi gazun con l jt, bad  t edi laax casti zi'c rayal. Por gra ni beendi zian biguien guial achet dol rajpidi por zian.

¹² Gui'ch ni guxhalan lojdi, ad guxhaltanan guialzi r nan xgab por b n cay jn dol guin o guial r nan xgab por b n cazagdiaj por xtol b n guin. Guxhalan gui'ch guin lojdi din gulu di loj Dios guial yu'guijquidi dunujn.

¹³ Laan naj ni rabaan n guial beenquidi zian.

Abi' yan mazri rabaan guial raguiaan Tito yu' luxdooan zagdxe baguiaadaman guial d d naza'c gojquidi con laaman.

¹⁴ Zeel ad basa'nxtutidi naj por gra zi'c bazatan l jt lojman. Din gra ni r n por l jt naj diidxli zi'c ragbeedi guial dunujn ganax diidxli raneen, abi' t e diidxli naj ni raguie'chan loj Tito por l jt.

¹⁵ Yan dad rusaaladxaman l jt guial rusaaladxaman xhienaag bazoobidi xtiidxaman n  gra respejt ni gopidi laaman chi guzuman con l jt.

¹⁶ D d nix yu' luxdon guial ra'pan l jt confianz par gra.

8

Guial rud ed gon con guidib luxdoo

¹ Yan compniar raliduladx ree Jesucrist, ray nan gagbeedi xhienaag cayagn  Dios b n rliilax ree Jesucrist niz Macedonia.

² Majsi xhiet ez cazajc reeman, per ad rucw ezt rguien guial d d rabaa reeman. Majsi d d b nprob reen, per dad rabaa reeman rud ed reeman cintabl par gagn  reeman bejn ree.

³ Naj ragbee guial diidxli been reeman yudar bejn ree xt lod baneetzan laa reeman. Laa reeman been yudar mazri guial loj ni baguieenan xgab, sin guial chu g  n laa reeman naguiejn.

⁴ D d been reeman naguiejn du lojn din yati jban guial n  laa reeman g  n yudar b n riladx ree Jesucrist,

⁵ abi' been reeman yudar mazri guial loj ni baguieenan xgab, laan naj guial diidxli ma basa'n laagajc reeman loj Dios, laan naj ni been reeman yaloj. Zeel yan ma za' reeman par g  n reeman ni yaguie'chan loj reeman guial r n reeman g  n reeman zi'c r n Dios.

⁶ Zeel yan zi'c ma guzuloj Tito cuto'paman yudar guin, raguie'chan lojman din gulox guto'paman laan entr l jt.

⁷ Dunujn rayagbee guial par gra zagdx e z di: Diidxli riladxidi Jesucrist, ragbeedi xcwentaman, achet ryaadxidi par guinieedi xtiidxaman, za'sindi par g  ndi laaman sirv r n t edi dunujn, yan gol been naguiejn din guiguien guial najdi benza'c par g  ndi yudar con ni ranan lojdi.

⁸ Ad r ntan l jt naguiejn guial gud edi ni rdo'p, per rugojnan l jt zi'c rabaa ree ben ren guial r jn reeman yudar, din bal r ndi gul udi guial diidxli r ndi xcompniaridi.

⁹ Din l jt ragbee zi'c naza'c Dad Jesucrist, b n basa'n gra gualnaza'c xanyabaa, abi' bi'taman loj guidxliuj zi'c tijb b n ni achet rajp din por laaman yal n  l jt xgualnaza'c Dios.

¹⁰ Zeel rnin lojdi guial zagdxen gulooxidi ni guzulojdi gudibijz. Yaloj l jt been xgabza'c guial g  ndi yudar, abi' laa guzuloj gajquidi.

¹¹ Yan zi'cgajc yu' luxdoodi nix guzulojdi, ziangajc gol babaa gusnuudi gud edi ni rdo'p zi'ctzi galguzujdi.

¹² Din chi diidxli r n bejn g  nman yudar, xhiet ez naag zajc g  nman yudar. Ad rayalt gud edaman xt ni ad rajptaman.

¹³ Ad canitan lojdi guial t didi tarbajw cwe'quidi xt ni ad rajptidi par g  ndi yudar b n ryaadx ree xhienin chit e xhie guiyaadx reeman, ni ray nan naj guial tibloj yaguieen dulasa' ree yudar.

¹⁴ Yan l jt zajc g  ndi yudar b n ryaadx ree xhienin, dxel despuejs g  n reeman l jt yudar con ni ryaadxidi. Zian tibloj yaguieen du lasa' ree yudar.

¹⁵ Loj xtiidx Dios r b: "B n bato'p zro' achet been sobr, abi' b n bato'p ta'nzi achet biaadxaman."

Tito con ree xcompniaraman

¹⁶ Quixt e Dios bad eman loj Tito lasa'gajc xgab r nan por l jt.

¹⁷ Yan chi raguie'chan lojman guidganajman l jt, laa cw b gajcaman guial ma r nman guguaaman l jt, ad beent naguiejn chu niniabee ni'taman.

¹⁸ Abi' con laaman cayxhaaln stijb dux compniaran b n ma n nbee ree dux compniar ree b n riladx ree Jesucrist guidibcz, guial rul uman bejn ree xtiidza'c Dios zagdx e.

¹⁹ Ma bacaabee t e ree dux compniar raliduladx ree Jesucrist laaman din saman con dunujn din g  nman dunujn yudar yune'n ni cado'p. Abi' yudar guin cado'pan din guiguien guial ray nan yaguieenan yudar stijb ree dux compniar ree, abi' por yudar guin guza't reeman Dad Jesucrist zagdx e.

²⁰ Zeel cwabee b n guie din saman con dunujn chit e xhie gucaaquia reeman dunujn por gra yudar ni cado'p ni naca'n par yugsa'nan.

²¹ Din dunujn ray nan yaguieenan gra zi'c rayal, ad naabtizi loj Dad Jesucrist, n  loj ree bejn.

²² Yan cayxhaalan Tito con bén guin cayxhaalnè'n laa reeman stijb dux compniaran bén ma balu'been zien volt guial diidxli rënman güünman yudar, abi' mazri yan guial dád rajpaman lëjt confians.

²³ Bal chu guiniabdiidx por Tito, gol güjdx guial da compniaran najman, laaman cayüjn naj yudar par günan lëjt yudar chinalidi xnejz Dios. Guiáad za' tio'p dux compniaran bén zè ree con laaman, dux compniar ree bén rliladx ree Jesucrist guxhaal laa reeman, abi' ruza't reeman Jesucrist zagdx.

²⁴ Yan gol balüü loj reeman guial diidxli rëndi bejn ree, din por laa reeman gagbee ree los demazri ree compniar rliladx Jesucrist xcwentidi, din guguaa tée reeman guial ni diidxli naj ni ma rën loj reeman xcwentidi.

9

Yudar par ree xbejn Jesucrist.

¹ Yan por yudar ni rayal yale'can par yaguieenan yudar dux compniar ree bén rliladx ree Jesucrist, ad ryaadxt ganin mazri xcwentan,

² din naj ragbee guial ruladxidi güündi yudar. Abi' xt nix yu' luxdon rën loj ree bén Macedonia guial lëjt bén Acaya diidz gudibijz cayüjndi naguiejn cayüjndi yudar, abi' gra ree bén Macedonia been naguiejn güün yudar chi biguiejn reeman zian.

³ Zeel caxhalan Tito con za tio'p ree dux compniar ree din guiguien guial waliqui ni ma gunen por lëjt xcwent yudar guin, din güündi naguiejn güündi yudar zi'c ma rën por lëjt.

⁴ Din bal guidnè'n tio'p choon ree bén Macedonia ad yadxaaglojn lëjt ad za'tidi porvinid, abi' natun par naj chitëe ganin natun par lëjt por confianz ni ra'pan lëjt.

⁵ Zeel benan xgab rën loj Tito con za tio'p dux compniar ree guial mejorli ned gaj reeman guidganaj reeman lëjt, din güün tée reeman yudar guloox guto'p reeman yudar ni ma nadi din ma najn purvinid chi gualan. Zian guiguien guial diidxli rëndi yazaladxidi ad gualzi canabeetan lëjt.

⁶ Naj rni lojdi bén rxübin ta'n, ta'n gajc raca'man, guiáad bén rxübin zro', zro' gajc raca'man.

⁷ Tijbgaj lëjt gol badëe zi'c naj xixgabidi gudëedi, ad mal gant ad naguiejn tëet, din Dios rënman bén razaladx guidib luxdoo.

⁸ Abi' Dios rajpaman gra gualrniabee par güünman lëjt yudar gapidi gra ni ryaadxidi chitëe xhie guiyaadxidi din güündi yudar zi'c rayal.

⁹ Loj xtiidx Dios rëb:

Bén ni rgui's ni rajpaman abi' rudëeman laan loj ree bénprob, ad yu't dxej yayanladx reeman ni zagdx ni rünman.

¹⁰ Yan Dios bén razaladx bin rxübin bejn, bén razaladx gualraw par ree bejn, laaman gulüü lëjt xhie güündi din gapidi gra ni rayal gapidi, din gac güündi yudar mazri bén ryaadx ree xhienin.

¹¹ Zian mazri naj ni gunee Dios lojdi din gusnuu güündi yudar yazaladxidi. Abi' por yudar ni guixhiaalnëdi dunujn par ree compniar rliladx ree Jesucrist, laa reeman gudëed quixtëe loj Dios.

¹² Abi' yudar guin ad züjntan sirv naabzi par loj ni ryaadx reeman laan, güünan sirv nè par gudëed reeman mazri quixtëe loj Dios.

¹³ Por yudar guin gagbee reeman guial cuzoobquidi xtiidxza'c Jesucrist zi'c riladxidi laan abi' guza't reeman Dios zagdxé por zian, në guial najdi benza'c rgui'sidi ni rajpidi par laa reeman në par gra ree bén ryaadx laan.

¹⁴ Abi' zën reeman lëjt, cwedx tëë reeman Dios por lëjt por xgab za'c ni banee Dios lojdi guial güündi yudar.

¹⁵ ¡Quixtëë Dios por ni ma bazaladxaman duloj ree por xi'nman, xt ni'quid radxejlt xhie yaguie'ch ree por zian!

10

Guialrniabee ni rajp Pab guial najman xi apóstol Jesucrist

¹ Naj Pab, yu' ree bén na guial benza'c naj chi za'n con lëjt, abi' chi za'n zijt sin guial rdxeb rdiilë'n lëjt. Per zi'cgajc ninieenë Cristo lëjt con respejt në con diidxza'c, rniaaban lojdi guial

² xi nix chi guialan guidganan lëjt ad rüjnt naguiejn gadilë'n bén rëb ree por da xgabzan cayünan ni cayünan, din ad rdxebtan ganenë'n laa reeman.

³ Walican nayajcan bénguidxliuj, per ad raguieentan naguiejn yaguieenan gan por dux xgabzan zi'c rüjn ree bén ad zinalt xnejz Dios.

⁴ Ad raguieentan naguiejn yaguieenan bejn ree gan por dux xgabzan, dunujn raguieenan gan por xguialrniabee Dios, guialrniabee ni zajc guse'n xhietëëz ni mal.

⁵ Por guialrniabee guin baguieenan gan loj ni rudxiib ree bejn duguijcan, abi' baguieen tëën gan loj guial nadxal reeman ni rudxoon güünbee reeman Dios. Zianan rase'nan xhietëëz xgab din chile' gucaagdiajg reeman xtiidx Jesucrist.

⁶ Abi' lëjt chi ma cuzoobidi xtiidx Dios diidxli, dxel dunujn ma nadxu'n par yazuxnejzan gra ree bén ad wazoobt diidx zagdxé.

⁷ Lëjt mazri ridxga'di zi'c ruguiaadi bejn. Bal yu' bén rüjn xgab guial diidxli najman xbejn Cristo, rayal cu'guijcaman guial nayajc ree xbejn Cristo zi'cgajc laaman.

⁸ Abi' majsi ganin lojdi mazri xcwent guialrniabee ni banee Dios lon, ad ratutan din laaman banee guialrniabee par günan lëjt yudar chignia'di mazri xcwent xnejzaman ad par gunijttan lëjt.

⁹ Ad naladxidi guial rënzan gucheban lëjt con ree da gui'chan.

¹⁰ Din yu' ree bén ni rëb guial diidx naa abi' sin guialrdxeb rniën'n lëjt loj ree da gui'chan, abi' chi za'n con lëjt ni'quid rulüüt lasajcan par lëjt, ni'quid radxat loj ree bejn ni rniën.

¹¹ Per naj rnin lojdi guial bén rëb ree zian rayal gagbee reeman guial zi'cgajc raneenë'n lëjt loj dux gui'chan chi nadxu'n zijt, ziangajc zajc yaguieenan chi nadxu'n con lëjt.

¹² Din dunujn ad raguieentan zi'c rüjn ree bén rlies xvalor gajc, per ni'czi ta'n ad raguieentan xgab yaguieenan zian. Din nitontzi rüjn reeman chi rlies xvalor gajc reeman, ruguiaa laagajc reeman xhienaag naj reeman par ree stijb xcompniar reeman.

¹³ Per dunujn ad ralest dux valor gajcan mazri guial loj ni rayal, din dunujn ranazan ni naj diidxli zi'c gulej Dios dunujn yaguieenan, yan ma cwëjbaman badxinan ladxidi.

¹⁴ Zeel ad güündi xgab guial cadëdtë caynabeen lëjt, din yaloj dunujn bio'p ladxidi par yasiidan lëjt xtiidxza'c Jesucrist.

¹⁵ Dunujn ad ralest dux valor gajcan por tijb ni been stijb bejn. Per ral ezan guial ni's xguialrliladxidi, din yasnuu yaguieenan l ejt yudar gusnuu g unbeedi ni rayal gagbeedi xhienaag rayal yaguieen ree.

¹⁶ Zian ma zile' yo'n mazri delant ladxidi par yatie'chan xtiidxza'c Jesucrist, per lod achut wazuloj chit e yales dux valor gajcan con ni ma been ben ren.

¹⁷ Bal yu' b en r en guilies xvalor gajc, mejorli guiliesaman xvalor dux Dad ree Dios.

¹⁸ Din ad b en rliest xvalor gajc naj b en raya'n zagdxe loj Dios, b en raya'n zagdxe naj b en rlies xvalor Dios.

11

Pab con ree ap ostoles b en rusquiee ree

¹ Yan,  xi nix taandi naj con tio'p choon ree da xgab tontan! Per naj rni lojdi gol gudaan naj.

² Naj r enan l ejt zi'cgajc r en Dios l ejt. Zi'cgajc tijb dad rajp xi'ndxa'p biin ni ma naj guxhliaa din chile' guidxinm naya loj xin tia' laam, zian r enan guidxin n l ejt loj Cristo naya sin dol.

³ Per rdxeban chu' b en gusquiee l ejt zi'c basquiee b e l Eva, abi' ad z jntridi xgab guidib luxdoodi xcwent Jesucrist.

⁴ Din chi ri't ben ren r uman diidx lojdi xcwent Cristo, per garen guial zi'c ma bal un l ejt, o chi ri't b en ren r uman diidx lojdi xcwent Sprijt, per ad lasa't xSprijt Dios b en ma nabannedi, o chi ri't ben ren lojdi naman xhienaag din gapidi perdon, per garen guial loj ni ma ranan lojdi, l ejt laa ridxga' gajquidi laa reeman.

⁵ Per naj rul u achet ryaadxan delant loj ree b en r eb laa reeman naj quijb xi ap ostoles Jes s.

⁶ Din majsi achet sirv naj par ganen, per ad ryaadxtan guialrignia' abi' l ejt ragbee guial diidxlin por gra ni ma baguiaadi baguieenan.

⁷ Per,  chuj ni ni malan benan ya guial ad bentan benro' lojdi persi benan gan gojquidi xbejn Cristo, n  guial ad baquijxtan l ejt chi basidan l ejt xtiidx Dios?

⁸ Ben renli ree b en naj ree xbejn Cristo cwa'n xmilia reeman persi beenan naj yudar la'tgaj guzun con l ejt persi basidan l ejt xtiidx Dios.

⁹ Abi' chi guzun con l ejt, chi biaadxan xhienin ad gunaabtant lojdi g undi naj yudar, b en Macedonia ree b en rliladx ree Jesucrist laa reeman bidn  ni biaadxan nadxel. Ad goct wanin lojdi guneedi xhienin par naj, ad yu' t et dxej ganin guial r jn nagueijn g undi naj yudar.

¹⁰ Zi'c najn xbejn Cristo rnin lojdi ni naj diidxli, guial niz Acaya Achutdzi zajc gudxoan guial chu' luxdon zagdxe guial gui n ni benan con l ejt.

¹¹ Abi'  chexc zeel benan zian con l ejt?  Guial ad r entan l ejt ya? Per Dios ragbee guial d d r enan l ejt.

¹² Abi' gusnuu g nan zi'c cay nan xt yandxej guial ad zanaabtczan lojdi g undi naj yudar, din chit e xhie guinee ree b en ruladx guilies xvalor gajc guial naj reeman xbejn Jes s guial zi'cgajc cayguieenan cay jn reeman.

¹³ Din laa reeman r bzi reeman guial naj reeman xi ap ostoles Jes s, rusquieezi reeman bejn ree r jnzi reeman zi'c rul u naj reeman xi ap ostoles Jes s.

¹⁴ Per xt ni'quid radxat loj bejn por zian, din xt xindxab zile' gul uloj loj bejn zi'c tijb xianjl Dios.

15 Dxel xt ni'quid radxat loj bejn guial b n ni cay jn ree xmandad xindxab r b reeman guial laa reeman cay jn xmandad Dios. Per laa reeman zayal reeman casti ni rayal reeman por ni cay jn reeman.

Tarbajw ni gud d Pab guial najman xi ap stol Jesucrist

16 Yan canin l jt stijb: Ad naladxidi guial ad nad dguientan, per bal r jndi xgab zian gol basa'n za naj ganen zi'c tijb b n ad nad dguient din n gajc naj gales da valoran majsi tibda'nzi.

17 Ad nat Dios guial gales da valoran zi'c cay nan, per gales da valoran zi'c tijb b n ad nad dguient.

18 Zi'c yu' zien ree b n rlies xvalor gajc por ni r jn reeman loj guidxliuj guie, yan ziangajc naj gales da valor gajcan.

19 Din guial najdi b n rignia' ad naw egt naj taandi b n ad nad dguient ree.

20 Rdaandi b n rniabee ree l jt r jn reeman zi'ctzi r n reeman, rdaandi b n rtia' ree ni rajpadi, b n rusquiee ree l jt, o rniee reeman lojdi ganax ree diidx nab  abi' xt rti jbidi r  z reeman ro'di.

21 Majsi natu'n par naj, per naj rni lojdi guial ad baya'ptan valor guial naguieenn 'n l jt zian.

Per bal rlies xvalor reeman por xhiedxitzinin, n gajc naj zajc gales da valoran. Canen lojdi zi'c tijb b n ad nad dguient, din ad xnejztan.

22 Per bal na reeman guial naj reeman b n Hebreo, n gajc naj naj b n Hebreo. Bal na reeman guial naj reeman b n Israel, ziangajc naj b n Israel gajc naj. Bal na reeman guial loj xdiaa Abraham z  d reeman, n gajc naj zial loj xdiaa Abraham.

23 Abi' bal na reeman guial xmandad Cristo cay jn reeman, naj mazri cay nan xmandadaman. Majsi zi'c rniee b n ad nad dguient rni n chi rnin zian, per diidxli guial naj mazri ma benan xmandad Cristo guial loj reeman. Abi' por zian mazri ma guyun ladxguib guial loj reeman, mazri ma gudijn ree bejn naj guial loj reeman abi' mazri zien volt ma guzun loj gualg jt.

24 Gaay volt ma gudijn ree b n Israel naj, abi' beegaj gudijn reeman naj zi'ctiubitap volt rugaz reeman duu ladan.

25 Choon volt gudijn reeman naj con yag, abi' tib volt bacaaguaiaj reeman naj. Choon volt ma wej barcw lod za'n xan nijsdoo, abi' tibdxej tibguaial baya'nan loj nijsdoo.

26 Guidibczi lod ma wan, gud  dan loj ree ni nadxeb chi gud  dan loj ree guiiw, loj ree b ngubaan, loj ree b n ladxan b n Israel ree n  loj ree b n ad najt b n Israel. Ma gud  d t  n loj ree ni nadxeb luguiedx ree, dajn ree, loj nijsdoo, n  loj ree b n rusquiee na reeman guial naj reeman xbejn Cristo.

27 D d ma guzaagdiajn. D d zien volt ma gul n bacaal, ma gulaanan, ma we'can nijs, abi' ma guyu dxej ni achetctzi gudawan. Ma gognajlan, ma biadax t   da xaban.

28 Abi' ad laatzanan ma guza'can, zien ree ni ma guza'can. Abi' guixie guixie r nan xgab por ree xbejn Cristo b n zojb ree niz lod ma wan.

29 Bal xhie cazajc tijb ree b n rililadx Jesucrist, cay nan xgab por laaman. Abi' bal cusquiee reeman tijb ree b n rililadx Jesucrist par g  nman dol, d d ralenan yu' t  n laaman xgab.

30 Bal r jn naguiejn gales da valor gajcan, tijbzi ni ganin por naj, naj por guialrzagdiaj ni ma gud  dan.

31 Abi' Dios xDad Dad Jesucrist, laaman b n rayal respejt guidib tiamp, laaman ragbee guial diidxli naj ni canen.

³² Tiamp chi canabee rey Aretas, wan luguedx Damasco dxel gunabee gobernador luguedx guin biaaw nejz par guiniaaz reeman naj.

³³ Per guyu ree b n ni badxe' naj l n tijb dx m abi' gulet reeman naj niz ro' ventan ni naj ro' ze' ni nayaw guiedx guin, zian gulaan loj gobernador guin.

12

Ni bal  loj lon

¹ Achet r jn bejn gan guial guilies xvalor gajcaman, per rayal ganin lojdi por ree ni bal  loj lon n  ree ni bal   Dad Jesucrist naj.

² Naj n nbee tijb xinguaaaw rliladx Jesucrist, ma gojc chidaj ijz wejx xanyabaa lod zojb Dios. Ad ragbeetan bal bin  xcuerpix o xsprijtzix wej, ad ragbeetan, tijbzi Dios ragbee.

³ Bal bin  xcuerpix o xsprijtzix wej, ad ragbeetan, tijbzi Dios ragbee. Per naj ragbee

⁴ guial wejx lod zojb Dios, lod bigueijnx diidx ni xt ni'quid radxejlt xhienaag ninieex laan guial ad rayalt gagbee gra bejn laan.

⁵ B n zii zajc galesan xvalor, per ad rliestan da valor gajcan, ni rnizan por naj por ree gualrzagdiaj ni ma gud edan.

⁶ Abi' majsi gales da valoran, ad cay ntan zi'c tijb b n ad nad dguient din ganax ni diidxli naj ni ganin. Per ad r ntan zian chit   yadxaloj bejn naj mazri guial loj ni rayal por ni ruguaa reeman r nan, o por ni rigueijn reeman rnien.

⁷ N  par chit   gales da valoran zro' por gra ni ma bal   Dios naj, cad edan tijb gualzi ni naj zi'cgajc zi'c chi yu' tijb gui ejch tiblajt bejn. Laan naj xchiin xindxab par g  nnaax naj chit   gales da valoran.

⁸ Choon volt ma canaaban loj Dios din chiquiedaman gualzi ni cad edan,

⁹ per laaman na lon: "Zi'c r nan l j achet gac, din mazri rguien da gualrniabeen chi cazagdiaj bejn." Zeel rabaan por ree gualrzagdiaj ni cad edan din guiguien guial nabanan con xgualrniabee Cristo.

¹⁰ Rabaan por xhiet  z gualrzagdiaj ni cad edan, o n  chi rnieeguijdx bejn naj, o chi ryaadxan xhienin, o chi xhie r jn bejn naj, n  gra ree tarbajw ni cad edan, guial cad edan laan guial r nan Cristo. Din chi cazaagdiajn dxel mazri ra'pan xyudar Cristo.

Yu' Pab xgab por ree b n rliladx Cristo luguedx Corinto

¹¹ Gunen 'n l jt por naj gajc zi'c tijb b n ad nad dguient, per l jt rajp dol guial benan zian. Din l jt naj b n rayal guilies da valoran delant loj ree b n ni r b guial laa reeman naj quijb xi ap stoles Jesucrist. Din majsi tijbzi b n ad r jnt sirv naj, per achet ryaadxan delant loj reeman.

¹² Chi guzun con l jt ad balenya'tan guial g nan milagr ree n  gra los demazri ree ni badxalojdi ni benan n  graloj ree ni benan ni been sirv zi'c sen guial diidxli najn xi ap stol Jesucrist.

¹³ Gra zi'c ma benan con gra ree compniar rliladx Jesucrist lod ma wan, ma benan laan con l jt. Tijbzi ni ad bentan con l jt naj guial ad rnitan lojdi guial g undi naj yudar con gra ni ryaadxan la'tgaj guzun con l jt, per bal gunequijdxan l jt por zian ;Gol been naj perdon!

¹⁴ Yan ma cay nan xgab guidganan l jt stijb, laan naj ni yayon volt guidganan l jt. Abi' ni'qui yan ad zanitan lojdi guial g undi naj yudar, ad ni rajptidi r nan, l jt naj b n r nan. Din ad xi'nt bejn rguuil xhienaag guibanman, dad guin ree rguuil xhienaag guiban ree xi'n reeman.

¹⁵ Abi' majsi gra ni ra'pan g nan gaxt, o majsi yadib da cuerpan par g nan l jt yudar, per achet g n n. Majsi rul   chi mazri r nan l jt, ta'nzi r ndi naj.

¹⁶ Walican guial ad gunaabtan lojdi niagn di naj nuneedi xhienin, per yu' ree b n r b guial benan zian din nasinan par gusquien l jt.

¹⁷  Wen basquieen l jt ya chi guxhalan b n bidganaj ree l jt?

¹⁸ N  chi r n loj Tito guial gui'taman guidganajman l jt abi' guxhalan laaman con stijb dux compniar ree b n rliladx Jesucrist,  wen yu' ni basquiee Tito lojdi ya?  Nid zi'c laaman zi'c naj tiblojzi naj xgab raguieenan ya abi' zi'cgajc r nan r jnman?

¹⁹ Por gra ni ma ranan lojdi, ad naladxidi guial caylaj dunuj gajcan, din achet waguieenan l jt. Dios ragbee guial zi'c nayajcan xbejn Cristo cayneen n l jt, abi' gra ni caynan lojdi najn par yaguieenan l jt yudar chinalidi xnejz Dios guial ray nan l jt.

²⁰ Din rdxeban guial chi guialan guidganan l jt ad zadxaaglojtan l jt zi'c r nan, abi' l jt ad zuguaatidi naj zi'c r ndi guguaadi naj. Rdxeban gadxaaglojn l jt con wadijl, gualnad dloj, gualrdxe'ch, gualrlies xvalor gajc, gualrniee guiidx lasa', guial ruza't bejn, guial r jn benro' n  guial ad nadxagtri lasa'di.

²¹ Rdxeb t en guial chi guidganan l jt stijb abi' yaya'nxtun por l jt delant loj Dios. Abi' d d chu' naya luxdon por zien ree lasa'di b n ad rb zt ree r jn dol, b n ad ray jnt ree xgab zi'c naban reeman. Ad rucw  z rzun  reeman b n ad najt lacheel reeman, ad rucw  z t  t reeman vijs ni rajp reeman o stijb ree ni ad r jnt sirv ni r jn reeman.

13

Diidx bigra bacaa Pab loj gui'ch guie

¹ Yan ni yayon volt guidganan l jt. Chi guialan, gra ni nadi por stijb ree xcompniaridi, rayal chu' tio'p o choon testiw din guiguien guial diidxli naj ni canadi.

² Abi' zi'c r n loj ree b n ni cay jn dol chi bialan bidganan l jt ni barojp volt zi'cgajc ma rnin loj gradi, laagajcan canin lojdi yan za'n zijt guial chi guialan guidganan l jt stijb, achetzi ni t d zezi par ree b n ni cay jn dol.

³ Zian gagbeedi ni r ndi gagbeedi guial Jesucrist cunee diidx ni rayal ganin lojdi. Abi' Jesucrist achet ryaadxaman par g nman zi'c rayal g nman con l jt abi' con l jt cul   xgualrniabeeman ni rajpaman.

⁴ Walican g jt Jesucrist loj cr jz zi'c tijb b n ad rajpt gualrniabee, per yan nabanman por xgualrniabee Dios. Abi' zi'c g jtaman zi'c tijb b n ad rajpt gualrniabee ziangajc dunuj ree rul   ad raya'pt ree gualrniabee, per zi'c nayajcan xbejn Cristo raya'pan xgualrniabee Dios par yaguieenan ni rayal yaguieenan con l jt.

⁵ L jt gajc gol been xgab bal walidi rliladxidi Jesucrist. L jt gajc gol been xgab xhienaag nabandi. Gol gogbee guial ma nabandi con Jesucrist, bal id rnieezidi guial rliladxidi laaman.

⁶ Balzianclaa gagbeedi guial dunujn diidxli raliduladxan laaman.

⁷ Abi' rarejdxan Dios por l jt chit   g undi ni mal, ad par yaya'ntan zagdex delant loj ree bejn, cayguieenan zian par g undi ni naj zagdex, majsi par ree bejn ad cayguieentan zi'c rayal.

⁸ Per ad zajct yaguieenan tiblad ni naj diidxli, dunujn caynazan ni naj diidxli.

⁹ Zeel yu' du luxdoon nix achet güünan ni cayza'ctzan din chile' sudxi'chidi loj ni rliladxidi. Abi' rarejdxan Dios din gagbeedi guidiblagaa xhienaag guibandi xnejz.

¹⁰ Abi' caxhalan gui'ch guie lojdi dxelri guidganan læjt, din chi gualan guidganan læjt ad ryaadxt gadilë'n læjt por guialrniabee ni baneé Dad Jesucrist lon, guialrniabee ni baneeman lon par günan læjt yudar chignia'di mazri zagdxé xnejz Dios, ad par gunijttan læjt.

¹¹ Yan compniar raliduladx ree Jesucrist par guloxan gui'ch guie, naj rni læjt: Gol badxe' luxdoodi zagdxé, gol been naguejn gol gubajn zi'c rayal, gol bagu' luxdoodi gol gubajn tée zagdxé, gol babe'cdxe luxdoodi con ree xcompniaridi. Abi' Dios bén rën dunuj ree rabe'cdxe téeéman du luxdoo ree laaman gagnë læjt.

¹² Xhietëéz hor ni radxaag ree xcompniaridi, gol bagajpdioz lasa'di zi'c rayal.

¹³ Gra ree dux compniar ree bén rliladx ree Jesucrist niz guie rugajpdioz reeman læjt.

¹⁴ Dad Jesucrist güünle' gradi, guial rën Dios læjt abi' xSprijtaman gagnë læjt zianczi. Amén.

Gui'ch ni guxhaal San Pabl loj ree bén Galacia rliladx Jesucrist

Rugajpdioz San Pabl bén rliladx ree Jesucrist

¹ Naj Pab najn apóstol, per ad bénguidxliujt bacaabee naj ad laa tēet reeman guxhaal naj, najn apóstol por Jesucrist nē por dux Dad ree Dios bén basban laaman loj guialgūjt.

² Gra ree dux compniar ree bén za' ree guie con naj ragajpdiozan lējt najdi bén rliladx Jesucrist niz Galacia.

³ Dux Dad ree Dios nē Dad Jesucrist gūnle' lējt yabe'cdxe tēe reeman luxdoodi.

⁴ Jesucrist gūjt por dux tol ree persi babēēman dunuj ree loj gra ree ni mal ni yu' loj guidxliuj guie zi'c goc xixgab dux Dad ree Dios.

⁵ Zeel rayalczi yaya'p reeman respejt zianczi. Amēn

Achetri diidx ren ni zajc yabēē dunuj ree loj dol

⁶ Dád radxalon guial dád cari cabēēladxidi xtiidx Dios, abi' laaman guial rēn Jesucrist lējt zeel gurejdxaman lējt. Per lējt diidx ren ma ridxga'di

⁷ abi' ni'quid xtiidx Diosan. Diidxliczi yu' ree bén rēn gagdxadi abi' rēn reeman guxhaa reeman zi'c naj xtiidx Cristo.

⁸ Per bal yu' bén rulūū lējt diidx ren ree guial loj ree diidx ni ma balūn lējt par gaquidi perdon, laaman ma rayal xcasti Dios, majsi chutēēznin majsi naj gajc o majsi tijb xi anjl Dios.

⁹ Zi'c ma rnin lējt abi' yan ma rninan zatijb: Bal chu rulūū lējt diidx ren ree guial loj xtiidx Cristo ni ma bililadxidi, laaman ma rayal xcasti Dios.

¹⁰ Ad raguiltan mod guial yaya'nān zagdxē loj ree bénguidxliuj, rūnan naguiejn din yaya'nān zagdxē loj Dios. Din bal gūnan naguiejn yaya'nān zagdxē loj ree bénguidxliuj dxel ad cuzobtran xtiidx Cristo.

Xhienaag gojc zeel gojc Pab apóstol

¹¹ Compniar raliduladx ree Jesucrist, rēnan gagbeedi guial xtiidx Cristo ni ma balūn lējt ad bénguidxliujt gulēēguijc laan.

¹² Abi' ad cwa'tanan ad basid tēētan laan por bénguidxliuj, Jesucrist gajc naj bén balūū laan naj.

¹³ Lējt ma biguiejn guial chi guyu'n loj xreligion ree bén Israel, guzunaalan bén rliladx ree xtiidx Dios din gūnan laa reeman ni mal abi' benan naguiejn din gusa'n ni rliladx reeman.

¹⁴ Abi' naj mazri guzudxi'chan loj religion guin guial loj ree lasa' zidnē'n tijbzi guial benan naguiejn benan gra ree xcostumbr ree dux béngulalan.

¹⁵ Per guial rēn Dios naj, diizd chi gadan guial loj guidxliuj mal gulejman naj. Dxel chi beenman xgab.

¹⁶ Balūūloj xi'nman lon din gatiechan xtiidxza'caman loj ree bén ad najt bén Israel. Abi' chi goc zian achut loj bignabdiidxan,

¹⁷ ad watan Jerusalén nignan bén ma naj ree xi apóstoles Jesús gocli diizd chi gadan gac xi apóstol Jesús, laa wa gajcan niz Arabia dxel baye'can niz Damasco stijb.

¹⁸ Chi goc choon iij dxel wan Jerusalén persi benbeen Bēd abi' guzun con laaman chiin gubijdx.

¹⁹ Per achut apóstol ren baguaan tijbzi Jacob bijch Dad Jesucrist.

²⁰ Gra ni canin lèjt naj diidxli abi' Dios ragbeechaaw guial ad rusquieetan.

²¹ Dxelri wan niz Siria nè niz Silicia.

²² Per ree bèn rliadx Cristo, bèn zojb ree niz Judea ad wayünbeet reeman naj naxdel.

²³ Rguiejnzi reeman rëb ree bejn: “Bèn guzunal dunuj ree yaloj par güünman dunuj ree ni mal yan ma catie'chaman xtiidx Jesucrist, majsi yaloj beenman nagueijn din yasa'n ree ni raliduladx ree Jesucrist.”

²⁴ Abi' rudëe reeman quixtëe loj Dios guial nè naj ma rliadx Cristo.

2

Bachajg Pab bèn naj ree apóstoles

¹ Chi goc chidaj ijz, dxel wan Jerusalén zatijb. Binë'n Bernabé con Tito,

² din Dios na guial gan ni. Abi' Jerusalén guin badxaag dulasa'n tijb luar con ganax ree bèn rniabee loj ree xbejn Cristo persi benë'n laa reeman diidx por xtiidx Jesucrist ni culün bèn ad najt ree bèn Israel. Benan zian din ad rëntan guial ni ma benan o ni cayünan gacan dxiin xlia'.

³ Per ni'qui Tito bèn guzu ni con naj, majsi najman bèn grieg ad beent reeman laaman nagueijn chu'man sen ni ru ree bèn Israel.

⁴ Din guyu tio'p choon ree bèn Israel been reeman zi'c rulüü naj reeman dux compniaran persi gojc bachajg reeman dunujn par gula'ch reeman conin ad raguieentran guial ma raliduladxan Jesucrist din gac nabee reeman dunujn yaguieenan zi'c rniabee ley.

⁵ Per ni'czi tilda'n ad batiëjbtan nüjn reeman dunujn gan, din ad rayëntan cwëälaxidi xtiidxli Jesucrist ni ma zinalidi.

⁶ Abi' ree bèn rniabee loj ree xbejn Jesucrist achetri na reeman lon guial rayal günan, majsi chutëez naj reeman din delant loj Dios tiblojzi naj bejn.

⁷ Luar ninia reeman xhie mazri nünan, laa gogbee gajc reeman guial Dios gulej naj din gatiechan xtiidxza'c Jesucrist loj ree bèn ad najt bèn Israel, zi'cgajc gulejman Bëd din gutie'chaman diidxza'c guin ree loj ree bèn Israel.

⁸ Abi' Dios bèn bacaabee gajc Bëd din gacaman apóstol loj ree bèn Israel, laagajcaman bacaabee naj din gacan apóstol loj ree bèn ad najt bèn Israel.

⁹ Zeel Jacob, Bëd con Waj bèn rniabee ree mazri loj ree bèn rliadx Jesucrist, gogbee gajc reeman guial Dios naj bèn banee naj guialrniabee guin. Abi' banee yaa reeman zi'c tijb sen guial ma nayajcan compniar guial ma za' tëe reeman conform guial naj con Bernabé yuglüün bèn ad najt ree bèn Israel, guiáad laa reeman gulüü reeman bèn Israel ree.

¹⁰ Ni gunabzi reeman du lojn din yaguieenan yudar bënprob ree, abi' laan naj ni ruladxan günan.

Gudilë Pab Bëd

¹¹ Per chi we Bëd guiedx Antioquia, dxel gudilë'n laaman guial ad cayüjntaman zi'c rayal.

¹² Guial yaloj gudawnëman bèn ad najt ree bèn Israel. Per chi bidxin ree bèn guxhaal Jacob guiedx Antioquia, dxel ad bachajgtraman bèn ad najt ree bèn Israel guial bidxebaman xhie niëjb ree bèn zinal ley.

¹³ Nè los demazri ree bèn Israel bèn rliadx ree Jesucrist bèn zojb ree ni nè reeman been zi'c been Bëd abi' xt nè Bernabé been zian.

¹⁴ Zeel chi baguian guial ad cayüjnt reeman zi'c rëb loj xtiidxza'c Jesucrist, dxel rën loj Bëd delant loj gra reeman: “Lüj najl bèn Israel abi' ad nabantil zi'c

laa reeman, ¿chexc zeel rüjn naguejn guiban ree bén ad najt ree bén Israel zi'c naban ree bén Israel?

Guialrliladx Jesús rabëe bejn loj dol

¹⁵ 'Dunuj ree nayajc ree bén Israel diidz chi bayajl ree abi' ad yu't dxej babajn ree sin xley Dios zi'c ree bén ad najt bén Israel.

¹⁶ Per dunuj ree rayagbee guial achut zajc gac naya niz loj Dios por guial zinal bejn ley, gacaman naya guial rliladxaman Jesucrist. Zeel në dunuj ree ma raliduladx Jesucrist din yayajc ree naya delant lojman guial raliduladx reeman, ad guial cayguieent ree zi'c rniabee ley. Din achut zajc gac naya delant loj Dios guial zinalaman ley.

¹⁷ 'Yan bal cayguieen ree naguejn yayajc ree naya delant loj Dios, laan rulüü dunuj ree guial nayajcqui ree béndol, ¿wen mazri béndol cayüjn Cristo dunuj ree ya? ¿Dunuj ree rayagbee guial ad ziantan!

¹⁸ Din bal ma basa'nan xley Moisejs, abi' yaye'can con ley guin zatijb dxel naj gajc cayün naj béndol.

¹⁹ Zeel ma basa'nan ley guin din gabajnan par Dios.

²⁰ Abi' rünan cwent guial në naj güjt chi güt Cristo loj crüjz dxel ad nabantri da xtijban, ma nabannë'n Cristo. Abi' yan zi'c nabanan, ma nabanan zi'c rliladxan Xi'n Dios, bén rën naj güjt tëeman por naj.

²¹ Abi' ad rüntan tiblax guial rën Dios dunuj ree, din bal nile' niajc bejn naya niz loj Dios guial rüjn bejn zi'c rniabee xley Moisejs dxel achetri lasajc guial güjt Cristo."

3

Guialrliladx Jesucrist rquied dol

¹ ¿Bén Galacia, chexc zeel ad radëdguientidi! ¿Chu bascajy xquiarguejndi? Awa chi balün lëjt, delant loj gradi bagojnan lëjt par xhie güjt Cristo loj crüjz.

² Yan rënzax gagbeen: ¿Nabannëdi xSprijt Dios ya guial rüjndi zi'c rniabee xley Moisejs o por guial rliladxidi xtiidx Jesucrist ni ma bacaagdiajguidi?

³ Xipxi nadidi zeel awa ma nabannëdi xSprijt Dios abi' yan naladxidi guial din yayaaloj gaquidi zi'c rën Dios rayal chinalidi ley.

⁴ ¿Wen achet lasajc guialrzagdiaj ni gudëdidi ya, o guzagdiaj xlia'zidi ya?

⁵ Chi runeex Dios xSprijtaman lojdi abi' rüjnman milagr ree delant lojdi, ¿wen rüjnman zian ya por guial zinalidi xley Moisejs o por guial ma bililadxidi xtiidx Jesucrist ni ma bacaagdiajguidi?

⁶ Gol basaaladx guial Abraham por guial bililadxaman Dios, been Dios laaman cwent zi'c tijb bén ad wayüjnt dol.

⁷ Zeel gol gogbee guial gra ree bén rliladx Dios, laa reeman naj zi'c xi'n Abraham.

⁸ Diidz gocli mal ragbee Dios guial majsi loj ree bén ad najt bén Israel yu' ree bén güünman cwent zi'c bén ad wayüjnt dol guial rliladx reeman laaman. Din tiblajt loj xtiidxaman rëb guial rëbaman loj Abraham: "Günle'n gra ree bénguidxliuj por lüj."

⁹ Zeel rüjnle' Dios gra ree bén rliladx laaman zi'cgajc beenle'man Abraham guial bililadxaman laaman.

¹⁰ Gra ree bén zinal xley Moisejs yu' casti par laa reeman din loj gajc libr ley guin rëb: "Bén ad zinalt güün gra zi'cgajczi rëb loj ley guin, yayalaman casti."

11 Zeel rayagbee ree ad zile't gac bejn naya loj Dios por guial rüjnman zi'c rniabee ley. Din loj xtiidx Dios rëb: “Bén rliiladx Dios rajpaman guialnaban delant lojman guial ma nünjman laaman cwent sin dol.”

12 Per ley guin ad rniabtan chililadx bejn laan, loj libr ley guin rëb: “Bén güün zi'c gajczi rniabee ley, zajpaman guialnaban.”

13 Jesucrist badxi'ca dunuj ree loj xmaldicion ley din laaman bayal casti ni rayal ree por ley guin, din loj libr ley guin rëb: “Ma zë maldicion guijc bén rëjt loj crüjz.”

14 Zian guzajc Jesucrist par chile' güünle' Dios bén ad najt ree bén Israel, zi'c beenle'man Abraham. Abi' guial rliiladx reeman Jesucrist zeel ma naban reeman con xSprijt Dios zi'c tal rëb Dios diizd guia'xchej.

Xley Moisejs në xpromejs Dios

15 Yan compniar raliduladx ree Jesucrist ganin lëjt xhienaag rüjn ree bénguidxliuj: Chi rajs tijb gui'ch abi' rgu' bejn laan firm, dxel achut zajc guse'n laan o gucaa guijc ree diidx ni ca loj gui'ch guin.

16 Ziangajc gol gogbee, chi been Dios promejs guial güünle'man Abraham con xdiaaman, ad rëbt loj xtiidx Dios guial güünle'man “bén zëed ree” loj xdiaa Abraham. Ad rëbtan zien bejn, rëban tijbzi bejn, din laaman rëb günl'e'n “Bén zëed” loj xdiaaman. Abi' bén zëed loj xdiaaman laaman naj Cristo.

17 Abi' ni canin lëjt naj guial xley Moisejs bi'tan tajpgayuu gajlbichii ijz despuejs ni been Dios promejs con Abraham, zeel ad zajc guse'n ley guin promejs ni ma been Dios.

18 Din bal par yaca' ree ni rëb Dios loj Abraham rayal yaguieen ree zi'c rniabee ley, dxel ad promejstran. Per Dios bazaladx loj Abraham ni rëbaman por promejs ni beenman lojman.

19 Wed zanabdiidxidi lon, çpar xhieza rüjn ley guin sirv? Badëë Dios ley guin din gagbee bejn guial najman bëndol, abi' been ley guin sirv xt dxej ni bi't Bén zëed loj xdiaa Abraham zi'c tal been Dios promejs con laaman diizd guia'xchej. Bén naj ree xianjl Dios badëë ley guin loj Moisejs, abi' Moisejs badëed laan loj ree bejn.

20 Per chi been Dios promejs con Abraham achutczi badëed xtiidxaman, quijb laaman guneenë Abraham.

Xhie sirv rüjn ley

21 Ad naladxidi canin guial ley guin za' contr xpromejs Dios. Canin bal por ley guin zajc gap bejn guialnaban delant loj Dios, dxel ma ragbee bejn guial ma nayaman loj Dios guial zinalaman ley. Per ad ziantan

22 din loj xtiidx Dios rëb guial dol rniabee gra bejn din gra ree bén chililadx Jesucrist tia' reeman gra ni rëb Dios.

23 Chi gad guialrliladx Jesucrist guidoonloj, gunabee ley dunuj ree, zi'c chi nayaaw bejn balëez ree guidoonloj guialrliladx Jesucrist.

24 Zeel par dunuj ree ley guin naj ni balüü dunuj ree xhienaag yabajn ree abi' gunabeen dunuj ree xt dxej ni baguieenbee ree Jesucrist din güünman dunuj ree cwent zi'c tijb Bén ni ad wayüjnt dol guial raliduladx ree laaman.

25 Per yan guial ma raliduladx ree Jesucrist ad rüjntri naguiejn gulüü ley guin dunuj ree.

26 Din guial raliduladx ree Jesucrist ma nayajc ree xi'n Dios.

27 Abi' guial barobnijs ree por Jesucrist zeel ma nayajc ree tijbzi con laaman din ma nabajnnë' reeman.

²⁸ Abi' zi'c b n Israel zi'c b n ad najt b n Israel, zi'c b n naj zi'c b n nado' zi'c b n ad najt zi'c b n nado', zi'c xinguaaw zi'c b ngunaa, par Cristo tiblojzi nayajc ree din ma nayajc ree tijbzi con laaman.

²⁹ Zeel bal ma nayajc ree xbejn Cristo dxel ma nayajc ree zi'cgajc xi'n Abraham abi' yayal ree ni r b Dios loj Abraham diizd gulal.

4

¹ Ni canin naj: Zi'c tijb xindo rayal ni rajp xdadix, la'tgaj najx xindoo achet guialrniabee rajpix, zi'cgajc tijb mojs, majsi xieenx naj gra ni rajp xdadix.

² Abi' yu' ree b n rajp laax yu' t e ree b n rniabee laax n  ree ni rajpix, xt chi guidxin dxej ni r b xdadix tia'x ni rayalix.

³ Ziangajc dunuj ree, zi'c tijb xindoo bayajc ree yaloy guial bunaalldxi'ch ree gra ree xcostumbr ree b nguidxliuj.

⁴ Abi' chi bidxin dxej gojc zi'c r b Dios gac, guxhaal xi'nman Jesucrist loj guidxliuj guie, tijb b nguidxliuj gojc xniaaman. Abi' gubajnman zi'c rniabee ley ni basa'n Moisejs duloy ree

⁵ persi bile' bab eman dunuj ree loj ley guin bile' t e nayajc ree Xi'n Dios.

⁶ Abi' guial nayajc ree xi'n Dios, guxhaalaman xSprijt Jesucrist persi nabajnn e reeman, abi' por Sprijt guin raguie'ch ree: " Dux Dad ree Dios!"

⁷ Zeel ad nayajctri ree zi'c mojs, ma nayajc ree xi'n Dios, ma rayal ree ni gunee Dios por Cristo.

Yu' Pab xgab por ree b n rliiladx Jesucrist

⁸ Yaloy chi gadidi g unbee quijb Dios, beendi sirv loj ree ni naladxidi naj Dios, per diidxli ad Diost reen.

⁹ Per yan guial ma n nbeedi Dios o guial ma n nbeeman l jt,  chexc zeel r ndi yabi'di g undi graloy ni ad r jnt sirv ni beendi yaloy?  Chexc zeel r ndi gaquidi zi'c b n nado' loj ree ni guin ree zatijb?

¹⁰ Abi' yan guial sta zin di cwent xhie dxej o xhie b ew o xhie tiamp o xhie ijz naj ni zobjloy par l jt par g undi xhienin zi'c goc xcostumbridi.

¹¹ D d rdxeban por l jt, doolgui basid xlia'zan l jt.

¹² Zeel rniaaban lojdi compniar raliduladx ree Jesucrist, gol gubajn zi'c nabanan, zi'c benan persi gogbeedi guial tiblojzi nayajc ree. Ad canitan lojdi guial xhie ni mal ma beendi naj

¹³ din l jt ragbee guial yaloy chi basidan l jt xtiidzxa'c Jesucrist, ragxuun nadxel.

¹⁴ Per majsi zian, gudaandi naj. Ad beentidi naj tiblad ad gul eladx t etidi naj, bidxga'di naj zi'c tijb xianjl Dios o zi'cgajc Jesucrist.

¹⁵ Naj ragbee guial bal zile'n xt guaialojdi zajc cw edi par guneedan lon. Laadx yan,  conzan guial rabaan di naj?

¹⁶  O al rdxechidi naj ya guial rnin ni naj diidxli lojdi?

¹⁷ Rnin lojdi guial ree b n cay jn naguiejn guial guidxga'di xtiidx reeman, ad zagdxt r n reeman l jt, xixgab reeman naj din gusa'ndi ni basidan l jt abi' mazri guidxga'di xtiidx reeman.

¹⁸ Ad ni malt naj guial gui n bejn lasa' bejnman, per par ni zagdxe n  zianczi, ad chi za'tzan con l jt.

¹⁹ Par naj l jt naj zi'c da xi'nan. Abi' cazaagdiajn por l jt zatijb, zi'c rzagdiaj tijb b ngunaa chi rajl xi'nman. Abi' gusnuu gazaagdiajn xt chi ma zinalidi Jesucrist diidxli zi'c rayal.

²⁰  Bal zianclaa za'n con l jt din ganen n quijb l jt, per yan ad ragbeetan xhienaag g nn n l jt!

Agar con Sara

²¹ Per gol guna, lëjt bén rën ree guiban zi'c rniabee ley. ¿Wen id wayignia'di ni rëb loj ley ya?

²² Loj ley rëb guial guyu tio'p xi'n Abraham: Guyu xi'nman con tijb béngunaa brii laj Agar bén goc xmojsaman, guyu tää stijb xi'nman con quijb xbéngunaaman bén brii laj Sara.

²³ Xi'n Abraham con béngunaa goc xmojsaman, guyux guial bagaal Abraham laaman. Per xi'nman xin guyu con quijb xbéngunaaman guyux ad por guial bagaaltzi Abraham xbéngunaaman, nē par gac cumplid promejs ni been Dios lojman.

²⁴ Yan, Sara nē Agar laa reeman naj ejempl por tio'p nejz ni yu' par chinal bejn. Tijb nejz guin naj guial chinal bejn ley ni badëéd Dios loj Moisejs ruguia' Sinaí, abi' bén zinal ree ley guin naj reeman zi'c bén nado' loj ley guin zi'c goc Agar loj Abraham.

²⁵ Lëjt ragbee guial niz Arabia naj guia' Sinaí, abi' ree bén niz ni rníee reeman guia' guin Agar. Per yan Jerusalén naj zi'c guia' guin, din gra ree bén zëéd niz Jerusalén, bén zinal ree ley, laa reeman naj zi'c bén nado' loj ley.

²⁶ Per dunuj ree du ladx ree naj Jerusalén ni yu' xanyabaa abi' Jerusalén guin ad najtan zi'c ni nado' loj ley guin zi'c ad gojct Sara loj Abraham.

²⁷ Loj xtiidx Dios rëb:

Babaa béngunaa ni ad zajct chu' xi'n.

Babaa da't guial ad nünbeetil guialrzagdiaj

ni rdëd béngunaa ni rajl xi'n.

Din bén ad rut xi'n, mazri zien xi'nman chu'

guial loj bén ru xi'n.

²⁸ Rnín lojdi compniar raliduladx ree Jesucrist, zi'c gol Isaac guial bililadx Abraham xtiidx Dios guial gac zian, ziangajc dunuj ree ma nayajc ree xi'n Dios guial raliduladx ree xtiidxaman.

²⁹ Abi' lën ree dxejzii, xi'n Agar baze'x xi'n quijb xbéngunaa Abraham, ziangajc yan bén zinal ree ley ruze' reeman dunuj ree nabajnnë' ree xSprijt Dios, guial ma nayajc ree xi'n Dios,

³⁰ Per, ¿xhie rëb loj xtiidx Dios? Rëban: “Balaagdxa xmojsil con guidib xi'nman, din ad rayalt gac tio'p lala' ni rayal tia' xi'n quijb xbéngunaa.”

³¹ Zeel compniar raliduladx ree Jesucrist, dunuj ree ad nayajct ree zi'c xi'n bén naj zi'c bén nado' guin, nayajc ree zi'c xi'n quijb xbéngunaa Abraham guial ad rniabeet ley dunuj ree.

5

Gol guzujdxi'ch loj ni rliladxidi xtiidx Dios

¹ Cristo naj bén babëë dunuj ree loj ni rniabee ley dunuj ree. Zeel gol guzujdxi'ch, ad bal guibandi zatijb zi'c bén nado' guial güündi zi'c rniabee ley.

² Naj Pab rnín lëjt. Bal rudi sen zi'c rniabee ley, achet lasajc guial rliladxidi Jesucrist.

³ Abi' rnín lëjt zatijb: Chutëëz bén ru sen guin rayal güünman zi'c tal rniabee ley.

⁴ Lëjt guial rüjndi xgab guial güündi zi'c rniabee ley ma najdi naya delant loj Dios, laan rën guiëb guial ad najtridi xbejn Cristo ad yu'guijc täätridi guial rën Dios lëjt.

5 Per dunuj ree por xSprijt Dios në guial raliduladx ree Jesucrist nadxu'guijc ree guial yadxin ree naya delant loj Dios.

6 Din chi ma naj bejn tijbzi con Cristo achet lasajc bal yu'man sen o ad yu'taman sen. Ni mazri lasajc naj guial chililadxaman Cristo. Abi' por guialrliladx guin zajc yabajn ree zagdxe yayèn dulasa' ree.

7 Lëjt ma zëdi zagdxe. ¿Chu na lojdi guial ad zidxga'tidi ni naj diidxli?

8 Din xgab guin ad zëëdtan por Dios, bën gule lëjt.

9 Zeel gol gojp cudad “din con ta'nnijt zajc gusquiee reeman gradi.”

10 Per naj ra'pan Cristo confians guial ad zusa'ntidi ni basidan lëjt. Abi' Dios gudëëd casti bën cusquiee ree lëjt, majsi chutëëznin.

11 Bal rën guial rüjn naguiejn chu' ree bejn sen, ad zazunaltri ree bën Israel naj. Ziangajc bal guiën guial rayal chu' ree bejn sen, rën guiëban guial achet lasajc guial güjt Cristo loj crüjz.

12 Balzianclaa gra ree bën ruslen lëjt guial rayal chu'di sen, jmejorli gutüüg laagajc reeman tiblayaa!

13 Din lëjt ma gulaadi loj ley, per ad guial ad rniabeetri ley lëjt din güündi ni rëntzidi, rayal guiëndi güün tëë yudar lasa'di.

14 Din con tijbzi mandamient ma been bejn gra zi'c rniabee xley Dios. Mandamient guin rëb: “Guyën ben ren zi'c rën lüj gajc.”

15 Per bal rdxe'ch lasa'di abi' rdilidi, gol gojp cudad chitëë zianzi la' lasa'di.

Guialnaban ni runee xSprijt Dios

16 Zeel rnin lojdi: Gol gubajn zi'c rniabee xSprijt Dios guibandi. Ad guibanridi zi'ctzi naj xixgabidi.

17 Din guial rbajn bejn zi'ctzi naj xixgabaman, ad najtan zi'c rniabee xSprijt Dios guiban bejn. Abi' zi'c rniabee xSprijt Dios guiban bejn, ad najtan guial guiban bejn zi'ctzi naj xixgabaman. Ni'qui laan ni'qui zi'c rniabee xSprijt Dios ad najtan tibloj. Zeel ad zajct guiban bejn zi'ctzi rënman.

18 Per bal xSprijt Dios naj bën rniabee lëjt dxel ad rniabeetri ley lëjt.

19 Yan laa rguien gajc con ree nin zëëd con xixgabzi ree bejn: Guialrzunë xinguaaaw ren o bëgunaa ren, guialrüjn bejn nidxuudx, guialrajp bejn gadxagayaa vijs,

20 guial rën bejn graloj ni naladxaman naj Dios, guial rüjn bejn guialbidxaa, guialrdxe'ch lasa', guialrdil, guialrzëëbladx ni rajp bejn, guialralenya', guialrlies xvalor gajc, guialrlia' lasa' bejn, guial ru loj tibcwaa bejn o stib cwaaman,

21 guialrdëdloj, guialrugüjt bejn, guialrzüdx, guialnala në xhietëëz ni mal lasa' ree ni guin. Rugojnan lëjt zi'cgajc ma rnin lojdi yaloj, bën cayüjn ree lasa' ree ni guin ad zayalt reeman lod rniabee Dios.

22 Per ni zëëd por xSprijt Dios naj, guialrën lasa' bejn, guialrabaa, guialrga'dxe luxdoo, guial yu'pacens, guialnaxanladx, guial rajc naza'c, guial rüjn cumplid xtiidx,

23 guial rüjn naya, guialrniabee bejn xixgab mal gajcaman. Abi' ad yu't ley ni rudxoon guial güün bejn ni guin ree.

24 Abi' ree bën ma naj xbejn Cristo ma basa'n reeman gra dol, në gra ree ni mal ni rën reeman güün reeman din ma güjt Cristo por gra dol.

25 Yan bal ma nabajn ree con xSprijt Dios rayal yabajn ree zi'c rniabee Sprijt guin yabajn ree.

26 Ad yales dux valor gajc ree, ad yache'ch du lasa' ree, ad yadëdloj du lasa' ree.

6

Yaguieen du lasa' ree yudar

¹ Compniar raliduladx ree Jesucrist, rmin lějt, bal chu xcompniaridi rŭjn dol gan, lějt guial ma rajquidi mazri xtiidx Dios gol guneeněman con ganax ree diidxza'c, din rayal cu'guijquidi guial něgajc lějt zajc gŭn dol lějt gan.

² Gol gogně lasa'di loj xhietěz gualzi ni rdědidi, zian ma cayŭjndi ni rniabee Cristo gŭndi.

³ Bal yu' b́en ni naladx guial rajcaman gra abi' achetczi rajcaman, dxel laagajcaman cusquiee laaman.

⁴ Tjibgaj bejn rayal gŭn xgab bal nabancaman xnejz. Abi' bal nabanman xnejz, tjibzi laaman rayal yabaa luar gŭnman xgab guial nabanman zagdx loj gra ree bejn.

⁵ Din tijbgaj dunuj ree rayal yaya'p ree xhienaag yabajn ree.

⁶ Chutěz b́en cusiid xtiidx Dios, rayal gŭnman yudar b́en culŭ laaman con ni ryaadxaman.

⁷ Ad gusquiee lějt gajc, din achut zajc guze' Dios. Ni rxŭbin bejn laagajcan yato'paman.

⁸ Bal nabanman zi'ctzi naj xixgabaman zadxin dxej yayalaman casti. Per b́en naban zi'c rniabee xSprijt Dios, por Sprijt guin yayalaman guialnaban tiblyaa delant loj Dios.

⁹ Ad rayalt yadxag ree guial yaguieen ree ni zagdx, din bal id zadxag ree chi guidxin dxej yaca' ree ni yayal ree.

¹⁰ Zeel beegaj gunen dunuj ree rayal yaguieen ree yudar bejn ree, abi' mazri con dux compniar ree b́en rliladx ree Jesucrist.

Xconsejw Pab

¹¹ Gol baguiaa xi narooob ree lejtr ni cucan par lějt con quijb yan.

¹² B́en cayŭjn ree nagueijn chu'di sen, rŭjn reeman zian par yaya'n reeman zagdx loj ree bejn luar sagdiaj reeman guial rliladx reeman Jesucrist.

¹³ Per ni'qui ree b́en yu' sen guin ad rŭjnt reeman gra zi'c rěb ley guin. Rěnzi reeman chu'di sen guin din gŭn reeman nabě guial ma been reeman gan yu'di sen guin.

¹⁴ Per naj achet por ni gŭnan nabě, tjibzi por gualgŭjt Dad Jesucrist. Abi' guial gŭjtaman loj crŭjz ma basa'nan gra ree ni mal yu' loj guidxliuj guie abi' ma gŭjtan par ree ni mal guin.

¹⁵ Din chi ma naj bejn tjibzi con Cristo, achet lasajc bal yu' bejn sen o ad yu'taman sen. Ni mazri lasajc naj guial ma bachaa zi'c nabanman.

¹⁶ Abi' ree b́en ma zinal xnejz Cristo, Dios yaya laa reeman yabe'cdxe tēēman luxdoo reeman ně gra ree b́en diidxli naj xbejn Dios.

¹⁷ Diizd yan ad rěntran chu guche'ch naj. Din dib ni ca ree ladan laa reen rulŭŭ guial najn xiapó stol Jesucrist.

¹⁸ Compniar raliduladx ree Jesucrist, dux Dad ree Jesucrist gŭnle' gradi. Amén.

Gui'ch guxhaal San Pabl loj ree b́en ́Efo rliladx Jesucrist

Rugajpdioz San Pabl b́en ́Efo ree

¹ Naj Pab, najn tijb xi apóstol Jesucrist por xgualrniabee Dios. Cuan gui'ch guie par lějt guial diidxli zinalidi xtiidx Jesucrist, lějt guial ma najdi xbejn Dios luguiedx ́Efo.

² Dux Dad ree Dios nē Dad Jesucrist gūinle' lějt yabe'cdxe tēē reeman luxdoodi.

Rūjnle' Dios b́en rliladx ree Jesucrist

³ Quixtēē Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diidz xanyabaa con graloj guialnaza'c din gac yunaal ree xtiidxaman.

⁴ Laaman bacaabee dunuj ree por Dad Jesucrist diidz chi gad guidxliuj gacchaaw din yabajn ree naya sin dol lojman.

⁵ Abi' guial rēnman dunuj ree, diidz guia'xchej beenman guial yayajc ree xi'nman por Jesucrist zi'c beenman xgab gac.

⁶ Zeel ad racwēēt raza't ree Dios zagdxe guial dád benza'c najman, ma beenle'man dunuj ree por Xi'nman Jesucrist, b́en rēnman,

⁷ b́en ma gudijx por dunuj ree chi guxie' xrejnman, abi' ma gojc perdon dux tol ree guial dád rēn Dios dunuj ree.

⁸ Zeel dád zro' guialrajc nē gualrignia' ma bazaladxaman duloj ree,

⁹ abi' ma balūūman duloj ree xhienaag naj xixgabaman diidz gocli, zi'cgajczi ma beenman xgab gac.

¹⁰ Guíaad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa nē loj guidxliuj.

¹¹ Nētēē guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diidz guia'xchej, din laaman rūjn gra zi'c rēnman gac.

¹² Abi' laaman ma been zian, din dunuj ree nayajc ree b́en yaloj bililadx Jesucrist, yayajc ree b́en guza't laaman zagdxe por xgualrniabeeman.

¹³ Nēgajc lějt chi biguejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rēb Dios guial gunee-man xSprijtaman, dxel yan guial ma nabannēdi laaman, laaman naj zi'c tijb sen ni rulūū guial ma najdi par Dios.

¹⁴ Guial ma nabannē xSprijt Dios dunuj ree, yaca' ree ni rēb Dios gunee-man chi ma bara xbejnman za' xanyabaa, din chitēē yacwēēz yaza't reeman zagdxe por xgualrniabeeman.

Rniab Pab quiarguejn loj Dios

¹⁵ Abi' guial ragbeen rliladxidi Dad Jesús rēn tēēdi los demazri ree b́en naj xbejn Dios,

¹⁶ zeel ad rucwēēt rudēn quixtēē loj Dios por lějt, beegaj rbedx rniaaban laaman.

¹⁷ Laaman naj Dios rniabee diidz xanyabaa, xDad Dad Jesucrist. Rniaaban lojman yazaladxaman quiarguejn lojdi din chignia'di ni gulūūman lojdi gusnuu tēē gūinbeedi laaman mazri.

18 Rniaaban lojman din guixhialaman xquiarguejndi din chignia'di xhie rën guiëb ni rbëzidi diizd chi bacaabeeman lëjt, chignia' tēedi guial ni za'cdxoon narooob tēë naj ni nagu'chaaw Dios par ree bèn naj xbejnman.

19 Rniaab tēen lojman guial gagbeedi guial dád narooob naj xguialrniabee-man ni cayagnë dunuj ree raliduladx reeman. Laagajc guialrniabee narooob guin balüü Dios

20 chi basbanman Jesucrist abi' gule'caman laaman xladbeeman xanyabaa

21 lod badëeman guialrniabee lojman ni mazri lasajc guial loj gra ree guialrniabee, në loj gra guialguxtis në loj gra gobiarn. Abi' mazri lasajc guialrniabee guin guial loj gra ree guialrniabee yu', në ni qui chu'ri ree loj guidxliuj guie.

22 Dxel basa'n Dios gran loj Jesucrist, bacaabeeman laaman din nabeeman gra ree bèn rliladx laaman.

23 Guiáad ree bèn rliladx laaman, guidiblagaa nabannëman laa reeman abi' bantëez guin za'man din laaman guidiblagaa rniabee.

2

Nayajc ree perdon guial rën Dios dunuj ree

1 Gocli gojquidi zi'c bengüt loj Dios por ree ni mal në por ree dol

2 ni beendi guial binalidi nejz mal been tēedi zi'ctzi rën xindxab güüdi, sprijtmal ni nabannë gajc ree bèn ad ruzoobt xtiidx Dios.

3 Du gra ree ziangajc babajn ree guia'xchej. Baguieen ree zi'ctzi bayën ree, zi'ctzi goc dux xgab ree, abi' zi'cgajc rayal ree bèn ad ruzoobt xtiidx Dios casti, ziangajc nayal ree casti.

4 Per guial raya da't Dios dunuj ree rën tēeman dunuj ree,

5 zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon.

6 Chi basbanman Jesucrist nëgajc dunuj ree basbanman abi' zi'c rulüü ma nadxu'në' ree Jesucrist xanyabaa.

7 Dios been zian din dxej zëed ree guiguieen guial dád rënman dunuj ree, abi' benza'c tēë najman con dunuj ree por Jesucrist.

8 Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial rliladx zëed xperdon Dios.

9 Ni'quid por ni zagdxe ni ma baguieent ree zëed perdon guin chitëë chu guilies xvalor gajc.

10 Por Dios nadxu' ree loj guidxliuj guie abi' por Jesucrist bachaaman mod babajn ree yaløj din yaguieen ree ni zagdxe zi'c beenman xgab yaguieen ree diizd gocli.

Tijbzi nayajc ree por Jesucrist

11 Zeel lëjt bèn ad najt ree bèn Israel, gol basaaladx xhienaag guzajquidi yaløj. Bèn Israel ree gulëälaj lëjt bèn ad yu't ree sen guial yu' reeman sen zi'c rniabee ley.

12 Tiamp zii ad beenbeetidi Jesucrist, ad gojctidi cwent loj ree bèn Israel ad gojc tēetidi cwent guial ralididi ni rëb Dios gudëeman loj ree xbejnman. Contzi gubajndi achet gulëjzidi ad gubajnnë tēetidi Dios.

13 Per yan guial ma rliladxidi Jesucrist, lëjt guial guzujdi zijt loj Dios, por xrejñ Jesucrist ma bibiguidi lojman.

14 Din Jesucrist babe'cdxe du luxdoo ree. Laaman bisud gualrdxe'ch ni rudxoon gac ree b́en Israel tijbzi con ree b́en ad najt b́en Israel.

15 Abi' por xgualgújt Jesucrist gulox gra ree costumbr rniabee xley ree b́en Israel gúun ree bejn, laaman been persi gojc ree b́en Israel con ree b́en ad najt b́en Israel zi'c tijbzi guiedx cúb gual ma nayajc ree tijbzi con laaman. Zian babe'cdxeman luxdoo ree bejn.

16 Din por xgualgújt Jesucrist loj crújz ma gulox gualrdxe'ch lasa' ree b́en Israel con ree b́en ad najt b́en Israel, abi' ma nadxu'né' ree Dios zagdxe gual ma nayajc ree tijbzi por Jesucrist.

17 Abi' laaman bidgagojn dugra ree, zi'c ree b́en Israel zi'c ree b́en ad najt b́en Israel xhienaag yadxu'né' ree Dios zagdxe.

18 Dxel por Jesucrist grop cwa a ree bejn ma rajp nejz par loj Dios gual tijbzi naj xSprijt Dios nabajnné' ree.

19 Zeel ad najtridi zi'c b́en zéed lod ren, zi'c benzit loj Dios, ma najdi cwent loj ree xbejnman, ma najdi tijbzi con ree xbejnman.

20 Lějt naj zi'c zze' tijb yu ni cayajc, guiáad ree xi apóstoles Jesús con ree b́en baděe xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guiaj zobjloy ni cayajcné yu guin.

21 Abi' gual yagaj guzuloy cayajs yu guin, dxel cayě'pzi cayě'p ze' guin ni cayguie'ch ree najdi din yayajc ree tijbzi xyadoo Dios con Jesucrist.

22 Nē yan gual ma najdi tijbzi con Jesucrist ma naj tēedi tijbzi con los demazri compniar raliduladx reeman dín yayajc ree tijbzi yadoo lod za' Dios por xSprijtaman.

3

Cwabee Pab din chigneeman xtiidxza'c Jesucrist

1 Por zianan yu'n ladxguiib, naj Pab gual cayūnan sirv loj Jesucrist din gūnan yudar lějt b́en ad najt ree b́en Israel.

2 Lějt ragbee gual naj Dios benza'c zeel baneeman dxiin guin lon dín gūnan lějt yudar chignia'di xtiidxaman.

3 Abi' laaman balūū naj xhienaag naj xixgabaman diidz gulal, zi'cgajczi ma rnin lojdi diidz guia'xchej.

4 Chi goolidi laan, gagbeedi gual ma ragbeen xhienaag naj xixgab Dios par Jesucrist.

5 Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balūūman laan loj ree xi apóstoles Jesús nē loj ree b́en baděe xtiidx Dios loj ree bejn.

6 Abi' ni goc zi'c tijb ni naguie'ch par ree bejn naj gual por xtiidxza'c Jesucrist, nē ree b́en ad najt b́en Israel ma rayal ni guděe Dios loj ree b́en Israel gual ma naj reeman tijbzi, dxel ziangajc ma nayab reeman loj promejs ni been Dios por Jesucrist.

7 Naj cugojn xtiidxza'c Jesucrist loj ree bejn, ad gual rayalt gūnan dxiin guin. Gual naj Dios benza'c, zeel bazaladxaman gualrniabee lon par gūnan laaman sirv.

8 Naj naj b́en bigra b́en lasajc ta'nz loj gra ree xbejn Dios, per gual naj Dios benza'c, bacaabeeman naj dín gūn diidx loj ree b́en ad najt b́en Israel xcwent xgualnaza'c narooob Jesucrist,

9 nē par gugojnan zagdxe gra reeman xhienaag naj xixgab Dios b́en been gra, xgab ni ad balūū gajtaman loj ree bejn.

¹⁰ Din yan zi'c naj ree bèn rliadlx Jesucrist, gagbee gra ree bèn rajp gualrniabee xanyabaa gual gra lojczy gualrajc rajp Dios.

¹¹ Abi' diidz chi gad guidxliuj gacchaaw mal been Dios xgab gual gac zian. Yan ma gojcan cumplid por Dad Jesucrist.

¹² Nè gual raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman.

¹³ Zeel rnin lojdi ad runayadi por ree gualzi ni cadëedan por lëjt, din zagdxen par lëjt.

Dád rën Jesucrist dunuj ree

¹⁴ Zeel ruzuxiban loj dux Dad ree Dios;

¹⁵ laaman naj Dad loj gra ni yu' loj guidxliuj nè xanyabaa.

¹⁶ Abi' rniaaban lojman por xgualrniabee narobaman yazaladxaman lëjt gojl nè gualrniabee por xSprijtaman din yayu luxdoodi,

¹⁷ guibannè tèedi Jesucrist gual rliadlxidi laaman. Din zian zi'c diidxli zinalidi zi'c rën Jesucrist dunuj ree,

¹⁸ dxel ma zajc gagbeedi con los demazri ree compniar raliduladx ree laaman gual gudëdlaj abi' xt banczi naaloj zro' rënman dunuj ree.

¹⁹ Zeel rniaaban loj Dios gagbeedi plact rënman dunuj ree, gual mazri zro' najn gual loj ni raguieen ree xgab, abi' zian guidiblagaa guibannëdi Dios.

²⁰ Laaman, gual rajpaman gualrniabee par güünman mazri gual loj ni raguieen ree xgab o mazri gual loj ni ranaab ree lojman por xSprijtaman bèn nabajnnè' ree,

²¹ abi' rayal yaza't reeman zagdxe gra dxej nè gra tiamp por Jesucrist, dunuj ree gual raliduladx ree Jesucrist. Amén.

4

Nayajc ree tijbzi por xSprijt Dios

¹ Naj, yu'n ladxguiib gual cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree bèn ma naj ree xbejnman.

² Gol gojc benza'c nè bèn naxanladx, gol gojp pacens gol gudaan tèë lasa'di gual rën lasa'di.

³ Gol been naguiejn gusnuu gaquidi tijbzi con xyudar xSprijt Dios bèn rabe'cdxe du luxdoo ree par yayajc ree tijbzi.

⁴ Dunuj ree nayajc zi'c tijbzi cuerp, abi' dugra ree nabajnnè' xSprijt Dios, abi' zi'c ma nayajc ree xbejn Dios, ziangajc ralëjz ree ni guneeman.

⁵ Tijbzi Dad, tijbzi gualrliladlx nè tijbzi gualrrirobnijs raya'p ree.

⁶ Din tijbzi Dios yu', bèn naj Dad par dugra ree, rniabeeman dugra ree, nabannëman dugra ree rüjn tèëman ujs dugra ree.

⁷ Per tijb gaj dunuj ree ma naj ni yaguieen ree, zi'ctzi ni banee Jesucrist yaguieen ree.

⁸ Zianan zeel rëb loj xtiidx Dios:

Chi bayë'paman xanyabaa,
beenman gan loj gra gualrniabee,
abi' badëëdaman loj ree bejn ni rayal güün reeman.

⁹ Abi', çxhie rën guiëb lod rëb "bayë'paman"? Rën guiëban bi'taman loj guidxliuj.

¹⁰ Guiáad Jesucrist bèn bi't loj guidxliuj, laagajcaman naj bèn bayë'p xanyabaa persi canabeeman guidib guidxliuj nè xanyabaa.

¹¹ Abi' ma badëëman loj ree bejn ni rayal güün reeman, yu' reeman bayal gac apóstoles, yu'za reeman bayal gac bèn rudëë xtiidx Dios loj ree bejn, yu'

reeman bayal guitie'ch xtiidxaman, yu' tēē reeman bayal gudēē consejw gulūū tēē reeman bèn rliladx ree laaman.

¹² Zian bacaabee Jesucrist bejn ree din gusiid los demazri ree bèn rliladx laaman, gac tēē gūūn reeman laaman sirv, gusnuu tēē gūūnbee reeman laaman,

¹³ xt yayaaloy yaliduladx ree yaguieenbee tēē ree Xi'n Dios guidiblagaa, din yayaaloy yayignia' ree xhienaag rayal yunaal ree Jesucrist.

¹⁴ Dxel ad zayajctri ree zi'c ree xindoo rliladx xhietēēznin, ad zayajctri ree zi'c tijb ni rnē bi niz ni niz guie por graloy ni rū ree bèn raguuil mod gusquiee ree bejn,

¹⁵ rayal yayēn du lasa' ree, yadū ree diidx yunaal tēē ree ni diidxli din gusnuu yayignia' ree yaguieen tēē ree zi'c rēn Jesucrist bèn rniabee dunuj ree.

¹⁶ Din por Jesucrist nayajc ree tibloj gra ree compniar raliduladx ree laaman. Por laaman nadxajg dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayēn dulasa' ree por Jesucrist.

Guialnaban cūb con Jesucrist

¹⁷ Yan por Jesucrist rnin lējt: Ad bal guibanridi zi'c naban ree ben ad nūnbeet Dios, din laa reeman naban zi'ctzi naj xixgab reeman,

¹⁸ nacay xquiarguejn reeman, ad rajpt reeman guialnaban rēn Dios gap reeman, guial ad rignia't reeman ache tēēt naladx reeman.

¹⁹ Ma been luxdoo reeman gojl, ma gulēēladx laagajc reeman abi' cusnuu cayūjn reeman graloy nidxuudx.

²⁰ Per lējt ad beenbeetidi Jesucrist din guibandi zian,

²¹ bal walidi ma biguejndi xcwentaman bal wali tēēdi ma basiididi diidxli zēēd por laaman.

²² Gol basa'n zi'c gubandi yaloy, din ruxhiinzi zi'c gubandi yaloy con xgabmal ni basquiee lējt guial beendi zi'ctzi guyēndi.

²³ Gol been naguiejn guidxaa xixgabidi guidiblagaa

²⁴ din gaquidi zi'c tijb bencūb been Dios zi'c rēnman, con tijb guialnaban naya nē zi'c rayal por xdiidxliman ni ma biguejndi.

²⁵ Zeel ad bal rniieridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist.

²⁶ Bal rdxe'chidi, ad gūūndi dol. Ad gudxe' guialrdxe'ch guin luxdoodi dēchej,

²⁷ chitēē tiēbidi gūūn xindxab lējt gan.

²⁸ Bēn rban, rayal gucwēēz cwanman abi' gūūnman dxiin, din con dxiin zagdx gūūnman dxel ma rajpaman con xhie gūūnman yudar bēn ryaadx ree xhienin.

²⁹ Ad rnnee tēēdi diidxguijdx, gol gunee ganax diidxzagdx ni gūūn yudar chignia' ree ben ren bēn gucaagdiajg ree laan din gūūnan laa reeman sirv.

³⁰ Ad rgu'nayadi xSprijt Dios, bēn ma nabannēdi zi'c tijb sen guial ma najdi xbejnman par dxej ni guidxindi lojman.

³¹ Gol basa'n tiblal gra guialralenya', guialrdxe'ch, guialralen lasa', guialrguidxa'nē lasa', guialrniee diidxguijdx loj lasa' nē graloy ni mal.

³² Gol gojc benza'c, gol baya lasa'di gol been tēē lasa'di perdon zi'c been Dios lējt perdon por Jesucrist.

5

Zi'c rayal guiban ree Xi'n Dios

¹ Zi'c ma najdi xi'n Dios bèn rënman, gol been naguiejn güündi zi'c laaman.

² Gol gubajn zagdx, gol guyën lasa'di zi'c guyën Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

³ Yan lëjt guial ma najdi xbejn Dios, ad rayalt guiniee loj lasa'di diidx dxuudx, ni'qui graløj ree ni ad rüjnt sirv ad rzëëbladx tēedi gra par lëjt.

⁴ Ad rnieedi diidxguijdx ree, diidxont ree, diidx ni ad rayalt guinieedi din ad ni zagdxet reen. Mazri zagdx, gol badëë quixtëe loj Dios.

⁵ Din lëjt ma ragbee guial ree bèn naban nadxuudx nē ree bèn rüjn ni ad rüjnt sirv, nē ree bèn rzëëbladx gap gra (mazri yu'guijx reeman ni guin ree luar guien reeman Dios), dxel ad zile't chu' reeman lod rniabee Jesucrist con Dios.

⁶ Gol gojp cudad achu gusquiee lëjt con ree diidx ad rüjnt wen, din por ree ni guin zëed xcasti Dios par ree bèn ad ruzoobt diidx.

⁷ Zeel ad güündi zi'c rüjn reeman.

⁸ Gocli gubajndi zi'c tijb bèn nayaaw xquiargueijn, per yan guial ma najdi tijbzi con Jesucrist, laaman naj biani par lëjt. Zeel gol gubajn zi'c ree bèn ma zinal biani guin,

⁹ din guial chinal bejn biani guin ma zile' güünman ni zagdx, zi'c rayal, nē ni naj diidxli.

¹⁰ Gol been naguiejn gol been zi'c ruladx Dios.

¹¹ Ad nē lëjt güün ni ad rüjnt ree sirv ni rüjn ree bèn nayaaw xquiargueijn, gol guneenē reeman din gagbee reeman ni rüjn reeman.

¹² Din xt ratu bejn güman ni rüjn reeman ralan.

¹³ Per por xtiidx Jesucrist laa gagbee gajc reeman xhienin rüjn reeman.

¹⁴ Din zianan zeel rëb loj xtiidx Dios:

Batie'ch xbaaalil, lüj guial zinalil nejz mal.

Bariica loj dol din gusni Jesucrist xquiargueijn.

¹⁵ Zeel gol gojp cudad xhienaag nabandi, ad gontzi guibandi, gol gubajn zi'c bèn yu' xquiargueijn.

¹⁶ Gol been naguiejn guibandi zi'c rayal naga yu' tiamp, din lën ree dxej guie ad xnejztri naban bejn.

¹⁷ Zeel ad gontzi nabandi zi'c naj xixgabidi, gol beenli naguiejn chignia'di xhienaag rën Dios guibandi.

¹⁸ Ad südxidi, din gualrzüdx guin ruxhiin bejn. Zagdxeli gol cwëjb nabee xSprijt Dios luxdoodi guidiblagaa.

¹⁹ Chi rünē lasa'di diidx, gol baza't ni ca loj ree salmos, loj ree himno, nē gra loj ree cant ni naj par Dios. Abi' guidib luxdoodi gol biil gol baza't tēe Dios zagdx.

²⁰ Abi' guixie guixie gol badëed quixtëe loj dux Dad ree Dios por Dad Jesucrist por gra ni rüjnman par dunuj ree.

Zi'c rayal guibannē lasa' ree bèn rliladx Jesucrist

²¹ Gol bazoob xtiidx lasa'di por respejt ni rajpidi Jesucrist.

²² Nē lëjt bēngunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist.

²³ Din xinguaaw ree rniabee lacheel zi'c rniabee Jesucrist bèn rliladx ree laaman, bèn babëe laa reeman loj dol abi' naj reeman xbejnman.

²⁴ Abi' zi'c ruzoob ree bèn rililadx Jesucrist xtiidxaman, ziangajc ree béngunaa rayal guzoob xtiidx lacheel reeman.

²⁵ Négajc lèjt xinguaaaw nuxhlaa ree, gol guyèn lacheelidi zi'c rën Jesucrist bèn rililadx ree laaman, abi' xt gùjtaman por laa reeman

²⁶ persi bisüdaman xtol reeman, basiaman laa reeman por xtiidxaman në por guialriobnijs,

²⁷ din guidxin reeman lojman nix da't në ni'qui tijb ni mal, sin falt o dol ren ree, guidxin reeman lojman nayadxuj sin döl.

²⁸ Yan ziangajc ree xinguaaaw baxhlaa, rayal guièn lacheel reex zi'c rën laagajc reex. Abi' xin rën lacheel, laa gajquixan rën.

²⁹ Din ni'qui tijb bejn ad rdx'e'cht laagajcaman, ruyaanli laagajcaman rniajchi' tée laagajcaman zi'c rüjnné Jesucrist dunuj ree nayajc ree bèn rililadx laaman

³⁰ guial nayajc ree tijbzi con laaman.

³¹ Zeel zi'c rëb loj xtiidx Dios: "Xinguaaaw gusa'n xdad xniaax din gaquix tijbzi con lacheelix abi' grop reex ma naj tijbzi bejn."

³² Dád nawëëg naj par chignia' bejn diidx guie ree, per caninan din zian naj Jesucrist con ree xbejnman.

³³ Yan, xinguaaaw ree, gol guyèn lacheelidi zi'c rën lèjt gajc. Guiáad lèjt béngunaa, gol gojp respejt lacheelidi.

6

¹ Nè lèjt najdi xi'n, guial zinalidi Jesucrist, gol bazoob xtiidx ree xdadidi, din zian rayal güündi.

² Abi' mandamient yaloj ni rëb guial yu' ni yaca' ree bal yaguieen ree ni rëb: "Gojp respejt xdad xniaal,

³ din guibanl zagdxe guiban tée'l xchej loj guidxliuj guie."

⁴ Négajc lèjt dad na ad gusagdiaj xi'ndi chitéë guidxe'ch reex por zian. Mejorli gol basni's reex zagdxe, gol guneené reex gol balüü tée reex zi'c rën Dios.

⁵ Nè lèjt bèn rüjn ree xchiin bejn, gol bazoob xtiidx bèn naj xpatrondi loj guidxliuj guie. Con guidib luxdoodi gol gojp respejt gol bazoob tée xtiidx reeman, gol gunaladx xchiin Jesucristan cayüjndi.

⁶ Gol been reeman sirv ad chi ruguiaatzi reeman lèjt par yaya'ndi zagdxe loj reeman, gol gunaladx guial Jesucristan cayüjndi sirv guial diidxli cayüjndi zi'c rën Dios güündi.

⁷ Gol been dxiin con gan, gol gunaladx xchiin Jesucrist cayüjndi, ad xchiint bénguidxliuj.

⁸ Din lèjt ma ragbee guial tijbgaj bejn majsi bèn rüjn xchiin bejn o bèn ad rüjnt xchiin bejn, per gudëé Jesucrist ni rayalaman zi'ctzi naj ni zagdxe beenman.

⁹ Négajc lèjt bèn naj ree patron, gol gojc benza'c con ree xmojsidi, ma gojczy rusagzidi laa reeman, din lèjt ragbee guial bèn rniabee laa reeman në lèjt yu'man xanyabaa, abi' ad rbetaman loj bejn.

Gol guzudxi'ch loj ni rililadxidi

¹⁰ Rni tée'n lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooabaman.

¹¹ Gol gojp lèjt gajc con xguialrniabee Dios din sudxi'chidi chitéë güün xindxab lèjt gan con ree ni rusquiee.

¹² Din ad cayguieent ree naguiejn yaguieen ree gan loj tijb ni naj bëel në dxijt, caydijl ree con gra loj sprijtmal zi'c ree ni rajp guialrniabee, guialguxtis në gra loj xsprijt xindxab ni yu' ni canabee tëë loj guidxliuj guie.

¹³ Zeel gol gojp lëjt gajc con xguialrniabee Dios din chile' taandi xhietëez loj guialzi gui't sudxi'ch tëëdi loj xhietëez ni saquidi.

¹⁴ Gol guzudxi'chcliza por ni diidxli ni ma ragbeedi, gol basnuu tëë zi'c ryal guibandi.

¹⁵ Gol guzusin par guinieedi xtiidxza'c Jesucrist din por laan yadxu' ree zagdx con Dios.

¹⁶ Gol badxe'guijc tëë guial guialrliladx ni rajpidi naj ni ragnë lëjt loj gra ni zëed por xindxab.

¹⁷ Në ni been Dios perdon xtolidi, laan naj ni rutëë lëjt, guiáad xtiidxaman naj zi'c tijb espad ni runee xSprijt Dios lojdi.

¹⁸ Ad gucwëez cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx tëëman por gra ree xbejnman.

¹⁹ Gol gurejdx gunab tëëman por naj din yazaladxaman naj diidx ni ryal ganen din ganen sin guialrdxeb xtiidxza'c Jesucrist ni zidnë perdon.

²⁰ Dios bacaabee naj par ganen xtiidxza'caman, abi' por zian yu'n ladxguiib. Per gol gurejdx gunab Dios chitëë gadxeban gün xtiidxaman zi'c ryal günan.

Diidx bigra ca ree loj gui'ch guie

²¹ Tíquico, tijb du lasa' ree bèn rayën da't ree, abi' diidxli cayünjman dunuj ree yudar cayguieen ree sirv Jesucrist, laaman gugojn lëjt gra xhienaag za'n xhie tëë cayünan,

²² din par zianczi caxhalan laaman din gugojnman lëjt xhienaag nadxu'n niz guie yagu' tëëman luxdoodi.

²³ Rniaaban loj Dios guial gra ree bèn rliladx Jesucrist, cwe'cdxeman luxdoo reeman guiën tëë lasa' reeman, chililadx tëë reeman laaman në Dad Jesucrist,

²⁴ güünle' tëëman gra ree bèn wali rën Dad Jesucrist.

Gui'ch guxhaal San Pabl loj ree bèn Filipos rliladx Jesucrist

Rugajpdioz Pab bèn rliladx ree Jesucrist

¹ Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi bèn rliladx Jesucrist luguiedx Filipos, në par ree bèn rniabee lojdi ruluü tää reeman xtiidx Dios në ree bèn rüjn yudar bèn rliladx ree Jesucrist.

² Dux Dad ree Dios në Dad Jesucrist güünle' lëjt, yabe'cdxe tää reeman lëjt.

Rbejdx rniab Pab Dios por ree bèn rliladx Jesucrist

³ Zianczi chi rasaaladxan lëjt, rudèn quixtää loj da Dadan Dios.

⁴ Abi' zianczi chi rbedx rniaaban laaman dád nix ru luxdon, rbedx rniaaban laaman por gradi.

⁵ Din diidx dxej ni guzuloj rliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan.

⁶ Ragbeechaawan guial diidx chi guzuloj rliladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb.

⁷ Najczi guial günan xgab zian por gradi, din rusaaladxan lëjt, zi'c chi yu'n ladxguiib ziangajc chi culün conin naj diidxli xcwent Dios din tibloj cayüjnle'man dunuj ree.

⁸ Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt.

⁹ Rniaab tään lojman din mazri guiën lasa'di, abi' guixie guixie gusnuu guixhialaman xquiarguejndi din gagbeedi ni rayal güüdi,

¹⁰ Din chile' cwedi ni naj mazri zagdxe. Abi' zian guibandi naya sin dol niz loj Dios, chitää xhie naman contr lëjt dxej ni gui't Dad Jesucrist stijb.

¹¹ Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respekt guilies tää reeman xvaloraman.

Yabajn ree par Cristo

¹² Compniar raliduladx ree Jesucrist, rënan gagbeedi guial graczi ni guza'can cayüjn reen yudar persi care'ch xtiidxza'c Jesucrist.

¹³ Abi' yan, gra ree bèn yu' lën palas në gra ree bèn zojb niz guie ragbee reeman guial yu'n ladxguiib por guial najn xbejn Jesucrist.

¹⁴ Abi' chi baguiaa ree compniar raliladxnë' ree Jesucrist guial yu'n ladxguiib, mazri guzudxi'ch reeman abi' zien da't reeman guyu luxdoo guttie'ch reeman xtiidx Jesucrist sin gualrdxeb.

¹⁵ Per diidxliczi yu' reeman rtie'ch xtiidx Jesucrist guial rdëdloj reeman naj abi' rën reeman gac reeman mazri bèn zojbloj. Per yu' reeman rtie'ch xtiidxaman guial naj xixgab reeman zagdxe.

¹⁶ Yu'za reeman guial rën reeman Jesucrist, catie'ch reeman xtiidxaman abi' ragbee reeman guial yu'n ladxguiib guial za'dxi'chnë'n xtiidxaman guial najcan diidxli.

¹⁷ Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiay reeman naj mazri lën ladxguiib guie.

¹⁸ Per achet güünan majsi zagdxe naj xixgab reeman o ad zagdxet ya, contzi ma catie'ch reeman xtiidx Jesucrist, laan naj ni rabaanë'n abi' mazri yabaan.

¹⁹ Din ragbeen guial yariin loj ni cadëëdan guial cabejdx canabidi Dios por naj në guial cayagnë xSprijt Jesucrist naj.

²⁰ Naj ragbee guial ad yu't dxej guslaa Dios naj yaya'nxtun, sin gualrdxeb gulün bejn ree xhienaag ra'pan respejt Jesucrist majsi nabanen o majsi guiëtan.

²¹ Din par naj la'tgaj nabanen cayünan laaman sirv, abi' bal guiëtan mazri zagdxen din ma gazun con laaman.

²² Per bal gabajnran loj guidxliuj guie, gusnuu gūnan sirv loj Cristo zi'c ryal, per ad ragbeetan conin naj zagdxe par naj.

²³ Din loj grop ree ni guin dād nawëëgan par gaben conin gūnan, tijb rënan yaca' Dios naj din gazun con Cristo, laan naj mazri zagdxe par naj,

²⁴ per por lëjt rüjn naguiejn gabajnran.

²⁵ Abi' naj ragbeen guial gabajnran din gūnan lëjt yudar gusnuu chinalidi xnejz Dios, din chu' luxdoodi gusnuu chililadxidi Jesucrist.

²⁶ Abi' chi guidganan lëjt stijb, chu' ni yabaanëdi gudëë tëëdi quixtëë loj Jesucrist por ni beenman por naj.

²⁷ Per ganin lëjt, gol been naguiejn gol gubajn zi'c ryal, zi'c rëb loj xtiidx Jesucrist. Din bal guidganan lëjt o bal id zialan, per rënan guiguiejn guial za'dxi'chidi nadxag tëë lasa'di abi' tiblojz cayüjndi naguiejn catie'chidi xtiidx Jesucrist.

²⁸ Ad guidxebidi bén rdxe'ch lëjt. Zian guiguiejn guial ma canijt reeman loj Dios, per lëjt zian guiguiejn guial ma rajpidi perdon zëed loj Dios.

²⁹ Din ad cwabeetidi par chililadxzidi Jesucrist, cwabeedi në par sagdiajdi por laaman.

³⁰ Lëjt con naj tiblojz caydüüd ree tarbajw par yatie'ch ree xtiidx Jesucrist, ma baguiaadi xhienaag rdëëdan tarbajw por xtiidxaman abi' yan caguiejnidi guial cusnuu cayünan mazran.

2

Nadxag yadxu' ree por Jesucrist

¹ Yan, zi'c ma yu' luxdoodi zagdxe por Cristo, zi'c ma yu' luxdoodi nix guial rusnuu rën lasa'di, në zi'c ma nabannëdi xSprijt Dios në zi'c yu' luxdoodi nix con lasa'di, në zi'c raya lasa'di.

² Gol basnuu gol gubajn zian din yagu'di luxdoon nix. Gol gubajn, gol guyën tëë lasa'di tibloj, gol gojc tijbzi, gol been tëë tijbzi xgab.

³ Ad sëëbladixidi güündi gan loj ree lasa'di o guilies xvalor lëjt gajc, mazri zagdxe gol been naya, gol been tëë xgab guial stijb lasa'di mazri lasajc guial lojdi.

⁴ Ad bal chu'di xgab por lëjtzi, gol guyu xgab por stijb lasa'di.

⁵ Gol been xgab zi'c been Jesucrist xgab.

⁶ Din majsi laaman naj Dios, per ad guzudxi'chtaman guial niëjbaman laaman naj Dios.

⁷ Basa'n xgualrniabeeman persi bi'taman loj guidxliuj guie zi'c tijb mojs abi' gojlaman zi'c tijb bénguidxliuj.

⁸ Abi' chi gocaman zi'c tijb bénguidxliuj beenman naya abi' bazoob xtiidx xDadaman, xt güjtaman loj crüjz, majsi ni natu naj guial rëjt loj crüjz.

⁹ Zeel dād gualrniabee narooob badëë Dios lojman, badëë tëëman lojman laj bejn ni mazri lasajc loj gra laj bejn.

¹⁰ Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, në gra ree ni yu' loj guidxliuj, nëtëë ree ni yu' lën liuj.

11 Abi' gra bejn guiëb guial Jesucrist naj Dad, zian guilies reeman xvalor dux Dad ree Dios.

Xbejn ree Jesucrist naj zi'c tijb guij ni rulaa bacha'

12 Zeel compniar raliduladx ree Jesucrist, zi'c rënan lëjt abi' rnin lëjt guial zi'c bazoobidí da diidxan chi guzun con lëjt, ziangajc gol bazoob da diidxan mazri yan guial za'n zijt. Con gualrdxeb në con respejt gol been zi'c rayal güün ree bén ma naj perdon.

13 Din por Dios zëed xgabza'c ni rüjndi, abi' laaman ragnë lëjt din güüнди zi'c rënman.

14 Gol been gra ni rayal güüнди, achet guial ad zayuladxtidi achet tëët guial tildiidxidi,

15 chitëë xhie guinee bejn lëjt o chitëë xhie xfaltidi yadxeyl reeman. Lëjt najdi xi'n Dios gol gubajn naya niz loj ree bén ad zinalt xnejz Dios, bén rüjn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay,

16 guial za'dxi'chnëdi xtiidx Dios ni zidnë guialnaban. Abi' zian yabaan por lëjt dxey ni gui't Jesucrist stijb guial gagbeen ad bentan dxiin xliá' ad bízaa tëëtan xliá'.

17 Din guial riladixidi Dios laan naj zi'c tijb gon par laaman, abi' nix yu' luxdon majsi guiëtan din yaaaloy gon guin guial rabaanë'n gradi.

18 Yan ziangajc gol babaa, gol babaa zi'c rabaan.

Timoteo në Epafrodito

19 Dad Jesucrist gagnë naj din diob gaxhalan Timoteo lod zojbidi din xhienladxan chi gagbeen xhienaag riga'di.

20 Din tijbzi Timoteo yu' lëjt xgab zi'c yu'n lëjt xgab. Achut bén ru lëjt xgab zi'c laaman.

21 Graczi reeman ru xgab per por laagajc reeman, ad rut reeman xgab por ni rën Jesucrist güün reeman.

22 Per ma ragbeedi xhienaag naj Timoteo, ma ragbeedi xhienaag cayünman naj yudar persi catiechan xtiidx Jesucrist. Cayünman naj yudar zi'c rüjn bejn xDadaman yudar.

23 Zeel rënan gaxhalan laaman din guitixlojman lëjt, gagbeezan xhienaag gariican loj cwent guie

24 Dad Jesucrist gagnë naj din diob guidgana quijb naj lëjt.

25 Abi' rulüü rüjn naguiejn gaxhalan da miwan Epafrodito ladxidi. Lëjt guxhaal laaman din güünman naj yudar loj ree ni ryaadxan. Abi' zian cayünman naj yudar, tiblojzi cayzaagdiajn.

26 Dád rënman guidganajman lëjt abi' dád yu'man xgab guial gogbeedi gogxuuman.

27 Abi' walican gogxuuman zamer niëjtaman. Per baya Dios laaman, abi' ad laatzaman, nëgajc naj bayaman, chitëë chu'naya luxdon mazri zi'c ma guyu nayan.

28 Zeel diob gaxhal gajcan laaman din yabaadi chi guguaadi laaman stijb chitëë chu'naya tëen mazri.

29 Gol babaa, gol bacaman guial najman tijb du lasa' ree bén riladix Jesucrist. Zian gol guyën gra ree bén naj zi'c laaman.

30 Din zamer niëjtaman guial rüjnman sirv loj Jesucrist, guzujman loj guialgüjt guial beenman naj yudar loj ni ad bile't nüjn quijb lëjt naj yudar.

3

Ni mazri lasajc

¹ Yan, compniar raliduladx ree Jesucrist, gol badxe' luxdoodi zagdxre por Dad Jesucrist. Par naj achetan guial ganin lějt diidx ni ma rni gajcan tijb, din par lějt lasajc ree diidx guin chitěe chu' ni gusquiee lějt.

² Gol gojp cudad con ree bentont, b́en ad nadědguient, benmal, b́en rŭjn ree naguiejn din chu' ree bejn xsen b́en Israel.

³ Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman b́en nabajnně' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr.

⁴ Majsı zajc gales da valoran guial zinaalan gra ree costumbr, per bal yu' b́en rlies xvalor gajc, nęgajc naj zajc gŭn zian.

⁵ Din chi goc toxman goolan, badxe' reeman naj sen ni ru ree b́en Israel. Abi' b́en Israel naj, loj xdiaa Benjamín zialan, rnien diidx Hebreo din xi'n ree b́en rnıee diidx Hebreo naj. Benan gra ni rniabee ley din b́enfarısew gojcan.

⁶ Benan zi'cgajczi rŭjn ree b́enfarısew, zeel xt guzunaalan b́en rliladx ree Jesucrist din gŭnan laa reeman ni mal, benan gra zi'c tal rniabee ley abi' achut zajc nięb guial ad cayŭntan zi'c rayal.

⁷ Gra ni benan nadxel, par naj dád lasajcan nadxel, per yan achet lasajcan par naj, din yan Cristo mazri lasajc.

⁸ Abi' achet ni mazri lasajc guial loj ni nŭnbeen Dad Jesucrist, por laaman gra ni benan nadxel ma basa'nan tıblad, naj reen zi'c tijb guix par naj din nabee Cristo naj guidıblagaa,

⁹ abi' gacan tijbzi con laaman. Ad naladxtan por guial rŭnan zi'c rniabee ley achet dol ra'pan niz loj Dios, naladxtan por guial rliladxtan Jesucrist, din por gualrliladx guin ma naya bejn loj Dios.

¹⁰ Zeel rėnan gŭnbeechaawan Cristo, gŭnbee tēen guialrniabee ni basban laaman, rėn tēen gadaanan xhıetěez loj guialrzagdıaj ni gaděedan zi'c gu-daanman, ma guidxin dxej gacan zi'c rayal gacan por xguialgŭjtaman.

¹¹ Din yu'guican guial yabanan zi'c baban Jesucrist.

Ni gunee Dios xanyabaa

¹² Ad canıtan lojdi guial ma bayaaloj benan gra o guial najn benza'c, per cayŭnan naguiejn din gacan zi'c rėn Cristo gacan diızd chi guzuloj rniabeeman naj.

¹³ Compniar raliduladx ree Jesucrist, naj rni lějt guial ad wayaalojt gŭnan zi'c rayal, per cayŭnan naguiejn din yayanladxtan gra ni benan gocli din gac gusunun par delant,

¹⁴ din yayaaloj gŭnan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

¹⁵ Abi' dunuj ree guial ma rayagbee ree zagdxre ni rėn guięb xtiıdx Dios, rayal yaguieen ree xgab zian. Per bal garen naj xıxgabıdi guial loj ni canin lojdi, Dios gulŭŭ lějt conin naj diıdxli.

¹⁶ Per rŭjn naguiejn yabajn ree zi'c ma rayignia' ree.

¹⁷ Compniar raliduladx ree Jesucrist, gol gubajn zi'c nabanan, gol baguiaa tēe xhıenaag naban ree b́en naban zi'c nabanan.

¹⁸ Din zien volt ma rnın lojdi abi' yan caydxi'nan zatıjb, xt ronan canin lějt guial zien ree bejn naban zi'c ree b́en ad rliladxt guial gŭjt Cristo loj crŭjz por dux xtol ree.

¹⁹ Abi' ree b́en guin castızi naj ni rběz laa reeman din mazri ruladx reeman gŭn reeman ni dxuudx. Abi' luar yatu reeman por ni rŭjn reeman aal mazri

rlies xvalor reeman guial mazri r jn reeman xgab por ree ni yu' loj guidxliuj guie.

²⁰ Per dunuj ree ma nayab ree xanyabaa abi' cayl jz ree guial diizd xanyabaa gui't Dad Jesucrist b n gudix por dux tol ree.

²¹ Laaman naj b n guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' g nman zian con guialrniabee ni rajpaman par nabeeman gra.

4

Gol badxe' luxdoodi zagdxe por Dad Jesucrist

¹ Zeel compniar raliduladx ree Jesucrist, r nan l jt r n t en guidganan l jt, l jt rgu' luxdon zagdxe, abi' najdi zi'c tijb prem par naj, gol guzujdxi'ch loj ni rliladxidi Dad Jesucrist.

² Yan, rniaaban loj Evodia n  loj S ntique din guidxag cwe reeman guial naj reeman compniar loj ni rliladx reeman Dad Jesucrist.

³ Abi' ziangajc l j compniar ni cayguieen dxiin tijbzi, rniaaban lojl din g n n yudar b ngunaa guin ree din laa reeman been naj yudar bire'ch xtiidx Jesucrist n  Clemente con ree ben ren, gra reeman ma yu' laj loj libr ni yu' laj ree b n guiban tiblayaa con Dios.

⁴ Zianczi gol badxe' luxdoodi zagdxe por Dad Jesucrist. Naj rni l jt iGol badxe' luxdoodi zagdxe!

⁵ Gol been naguiejn g n bee gra bejn l jt guial najdi benza'c. Gol badxe'guijc guial zamer gui't Dad Jesucrist zatijb.

⁶ Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol bad  t e quixt e lojman.

⁷ Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagn  l jt din yayaalyuj luxdoodi yayaalyuj t e xquiarguejndi guial ma najdi tijbzi con Jesucrist.

Gol badxe'guijc ganax ni zagdxe

⁸ Naga gad lox g nan gui'ch guie, compniar raliduladx ree Jesucrist, rnin l jt gol badxe'guijc ganax ni diidxli, ni rayal respejt n  ni naj xnejz. Gol badxe'guijc ganax ni r jn sirv, ni naj zagdxe n  ni rayal g n b n z  xnejz. Gol badxe'guijc gra ni naj zagdxe n  ni guilies bejn xvalor.

⁹ Gol been zi'c basidan l jt, zi'c ma bal n l jt, gol been zi'c rnin l jt zi'c ma baguiaadi benan, zian gagn  Dios l jt b n rabe'cdxe luxdoo ree bejn.

Ni bad ed ree b n filipos loj Pab

¹⁰ D d rabaan por Dad Jesucrist guial ma basaaladxidi naj. Ad canitan bayanladxidi naj, canin zian guial ad gojctri n jndi naj yudar.

¹¹ Ad canitan zian guial cayaadxan xhienin din ma basidan gad edan con ni ra'ptzan.

¹² Ragbeen xhienaagan chi naban bejn loj guialprob ragbee t en xhienaaan chi achet ryaadx bejn, din ma basidan rdaanan ni z edtzi, bal rawan o bal id rawan, bal r jnan naj sobr o bal ryaadxan.

¹³ Rajc rdaanan ni z edtzi con xyudar Jesucrist.

¹⁴ Per zagdxe naj ni beendi guial beendi na yudar loj ni cazaagdiajn.

¹⁵ Ragbee t edi guial chi briin niz Macedonia din suloj gatie'chan xtiidxza'c Jesucrist, l jtzi bazaladx xhienin lon guial loj gra ree guiedx lod ma rliladx reeman xtiidx Jesucrist, zi'c benan l jt yudar ziangajc beendi naj yudar.

¹⁶ Ziangajc chi guzun luguiedx Tesalónica chi biaadxan xhienin, bëlczî volt beendi naj yudar.

¹⁷ Ad caygultan mod din güündi naj yudar mazri, ni rënan naj guial mazri yaya'ndi zagdxê loj Dios.

¹⁸ Ma baca'n gra ni guxhaalidi con Epafrodito, yan xt sobr rüjnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios.

¹⁹ Zeel Dios gunee lëjt gra ni ryaadxidi por ree ni za'c ni rajpaman xanyabaa con Dad Jesucrist.

²⁰ ¡Abi' por guialrniabee ni rajp dux Dad ree Dios, rayalczi yaya'p reeman respejt goctëéz! Amén.

Rugajpdioz ree bèn rliladx Jesucrist bèn Tesalónica ree

²¹ Gol bagajpdioz gra ree bèn ma naj xbejn Jesucrist, guiáad gra ree bèn rliladx Jesucrist bèn za'në' reen guie, rugajpdioz reeman lëjt.

²² Gra ree bèn zojb ree guie, bèn ma naj ree xbejn Jesucrist, në gra ree bèn rüjn sirv loj rey, në reeman rugajpdioz lëjt.

²³ Dux Dad ree Jesucrist güünle' gradi. Amén.

Gui'ch guxhaal San Pabl loj ree bén Colosas rliladx Jesucrist

Rxhiaal Pab xtiidx Dios

¹ Naj Pab, najn tijb xi apóstol Jesucrist, din zian rën Dios. Naj con Timoteo nayajcan compniar raliduladxan Jesucrist,

² caycaan gui'ch guie par lëjt guial diidxli zinalidi xtiidx Jesucrist, lëjt guial najdi xbejn Dios luguiedx Colosas. Dux Dad ree Dios güünle' lëjt cwe'cdxe tëëman luxdoodi.

Rbejdx Pab Dios por ree xbejn Jesucrist

³ Beegaj chi rarejdxan Dios, xDad Dad Jesucrist, radëëdan quixtëë lojman por lëjt.

⁴ Din ma baguiejnan xhienaag rliladxidi Jesucrist xhie tëë naag rëndi gra ree bén naj ree xbejnman.

⁵ Guial cabëzidi yayalidi guialnaza'c yu'chaaw xanyabaa. Gogbeedi laan chi biguiejndi xtiidxza'c Jesucrist ni naj diidxli.

⁶ Abi' ree diidxza'c guin ni ma bacaagdiajguidi, gra ladczi ma care'chan. Abi' gra ladczi ma caliladx ree bejn laan zi'cgajc guzaquidi chi biguiejndi guial naza'c Dios abi' diidxli rënman lëjt.

⁷ Lëjt gogbee diidxli guin ree chi balüü Epafra laa reen lëjt. Laaman cayüjn dunujn yudar abi' dád rayënan laaman, din laaman diidxli cayüjn sirv loj Jesucrist delant lojdi.

⁸ Abi' tëë laaman be diidx du lojn xhienaag rën lasa'di guial yu' xSprijt Dios luxdoodi.

⁹ Zeel diizd chi baguiejnan xhienaag nabandi, ad racwëëzt rarejdxan Dios por lëjt din chignia'di zagdxe xhienaag rënman güündi gunee tëëman lëjt gra loj guialrajc guixhial tëëman xquiarguiejndi por xSprijtaman.

¹⁰ Abi' zian guibandi zi'c rayal guiban ree bén rliladx Jesucrist, din güündi zi'c tal ruladxaman abi' gusnuu güündi ganax ree ni zagdxe gusnuu tëë güünbeedi Dios mazri.

¹¹ Abi' ranaaban lojman din con xguialrniabee za'cdxoonman gagnëman lëjt din sudxi'chidi, taan tëëdi xhietëëz loj guialzi tëëdi sin guial yaleny'a'di.

¹² Abi' xt nix chu' luxdoodi gudëëdi quixtëë loj dux Dad ree Dios guial basiaman lëjt din yayalidi ni rayal ree xbejnman, bén zinal ree xnejzaman.

¹³ Laaman babëë dunuj ree loj xguialrniabee xindxab xindxab abi' bagu'man dunuj ree loj xguialrniabee xi'nman Jesucrist bén rënman,

¹⁴ abi' gudijxaman por dux tol ree, yan ma raya'p ree perdon loj Dios.

Por xguialgüjt Jesucrist ma nadxu'në' ree Dios zagdxe

¹⁵ Achut zajc guguaa Dios, per Jesucrist naj zi'c gajczi naj Dios. Abi' laaman mal rniabeenëman Dios diizd chi gad guidxliuj gacchaaw.

¹⁶ Por Jesucrist gojc gra ni yu' xanyabaa në loj guidxliuj, zi'c ni ruguaa bejn zi'c ni ad ruguaataman. Abi' por laaman yu' graloj guialrniabee në graloj guialguxtis ni rajp ree ni ad rajt ruguaa ree bejn. Gran gojc por laaman në par laaman.

¹⁷ Mal yu' Jesucrist diizd guia'xchej chi gad guidxliuj gacchaaw, laaman dxiibguijc gra abi' rniabeeman gra.

¹⁸ Abi' laa tëëman rniabee gra ree bèn rliladx laaman, bèn ma naj ree xbejnman. Laaman naj bèn yaløj abi' yaløj laaman baban loj ree bengüt din guiguien gual tijbzi laaman rajp gualrniabee loj gra.

¹⁹ Din bayuladx Dios gac Jesucrist zi'c gajczi naj Dios.

²⁰ Abi' por Jesucrist gra bénguidxliuj ma za' zagdx con Dios, zi'c ni yu' loj guidxliuj zi'c ni yu' xanyabaa. Za' bejn zagdx con Dios por xgualgüt Jesucrist loj crüzj.

²¹ Gocli ad gojctidi tijbzi con Dios, gojquidi zi'c bèn bidxe'ch laaman gual beendi ganax ni mal.

²² Per yan ma za'di zagdx con Dios por ree gualzi ni gudëd Jesucrist chi gütaman loj crüzj din gac guidxindi lojman naya sin dol chitëë xhie naman lojdi.

²³ Per par zian rayal sudxi'chidi loj gualrliladx ni rajpidi, ad gucwëez chinalidi xtiidxza'c Jesucrist ni ma biguejndi. Abi' diidxza'c guin gajc ree ma bire'ch guidib guidxliuj. Abi' naj naj tijb ree bèn catie'ch diidxza'c guin ree.

Bacaabee Dios Pab din güünman sirv loj ree xbejn Dios

²⁴ Abi' yan nix yu' luxdon por gualzi ni cadëëdan gual rünan lëjt yudar abi' lasa'gajc gualzi ni gudëd Jesucrist cadëëdan din chile' günan yudar bèn rliladx ree laaman bèn ma naj ree xbejnman.

²⁵ Din Dios bacaabee naj par günan sirv loj ree xbejnman. Abi' laaman banee dxiin guin naj din gulün lëjt xtiidxaman zi'c tal najn.

²⁶ Diisd tiamp gulal ad bignia't ree bejn zagdx ni rën guiëb xtiidx Dios. Per yan ma balüüman ni rën guiëban loj ree xbejnman.

²⁷ Din gugojn reeman bèn ad najt ree bèn Israel xhienaag naj xgualnaza'c za'cdxoonman. Abi' ni ad balüüt Dios loj ree bejn tiamp gulal naj gual nabannë Jesucrist lëjt abi' por laaman ragbeedi zagdx gual yu' dxej yayalidi xanyabaa.

²⁸ Abi' dunujn batie'ch xtiidx Jesucrist, baneenë'n bejn ree, balüü tëën laa reeman con gra quiarguejn ni runee Dios din chi guidxin reeman lojman por Jesucrist ma naj reeman zi'c rënman gac reeman.

²⁹ Abi' naj dád cayünan naguiejn cayünan dxiin guie con gualrniabee ni baneeman naj.

2

¹ Rënan gagbeedi gual cayün da'tan naguiejn cayünan lëjt yudar, në ree bèn zøjb guiedx Laodicea në gra ree bèn ad wayünbeet naj.

² Cayünan naguiejn din yayu luxdoo reeman din gusnuu guiban reeman tijbzi, guiën lasa' reeman chu' tëë xquiarguejn reeman din chile' güünbee reeman ni ad balüüt Dios bejn ree gulal abi' laaman naj Jesucrist,

³ por laaman zëëd gra gualrajc në gualrignia'.

⁴ Canin diidx guie ree lojdi chitëë chu gusquiee lëjt con ree xtiidx zagdx reeman.

⁵ Majs ad za'tan con lëjt, per yu'guican lëjt abi' rabaan gual cayüjndi zi'c rayal, za'dxi'ch tëëdi loj gualrliladxidi Jesucrist.

⁶ Zeel zi'c ma rliladxidi Dad Jesucrist, ziangajc gol gojc tijbzi con laaman.

⁷ Gol been naguiejn gol binalaman guidiblagaa, gol guzudxi'ch loj gual rliladxidi laaman zi'c ma basiididi ad gucwëez tëë gudëedi quixtëë loj Dios.

Gualnaban ni rudëëd Jesucrist

⁸ Gol gojp cudad, ad tiëbidi güün ree bén rën gusquiee lëjt gan con ree ni rulüü reeman o con ree diidx ni ad rüjnt sirv ni zëed por ree costumbr o por ree gualrniabee yu' loj guidxliuj, din ad zëedt reen por Jesucrist.

⁹ Din zi'cgajczi naj Dios, ziangajczi naj Jesucrist.

¹⁰ Abi' nabannëdi Dios guidiblagaa gual najdi tijbzi con Jesucrist, din laaman rniabee loj gra gualrniabee në loj gualguxtis.

¹¹ Abi' tëë gual ma najdi tijbzi con Jesucrist ma yu'di xsenman, per ad lasa't sen ru ree bén Israel, sen yu'di por laaman najn gual ma basa'ndi dol tibläd.

¹² Chi gurobnijsidi, laan rën guiëb gual güjtidi con Jesucrist abi' babandi con laaman stijb gual riladxidi Dios rajp gualrniabee persi basbanman Jesucrist loj gualgüjt.

¹³ Gocli gojquidi zi'c bengüt delant loj Dios por xtolidi në por gual ad guyutidi sen ni ru ree bén Israel. Per yan por Jesucrist, ma been Dios dux tol ree perdon abi' ma raya'p ree gualnaban con Jesucrist.

¹⁴ Ma badxi'ca Dios dux tol ree ni bayal nadijx ree zi'c rniabee xleyaman, badxi'caman dol guin ree chi güt Jesucrist loj crüzjz abi' laaman naj bén gudijx laan por dunuj ree.

¹⁵ Abi' zian beenman gan gra loj ree gualguxtis në loj gra gualrniabee zëed loj xindxab. Basa'nxtuman laa reeman loj ree bejn, beenman laa reeman gan gual güjtaman loj crüzjz.

Gol been xgab ni yu' ree xanyabaa

¹⁶ Zeel achut rayal gula'ch lëjt por ni rawidi në ni rë'di o por gual ad rüjntidi cwent dxej lanij o dxej ni yu' bëëw cüb o dxej raziladx ree bejn.

¹⁷ Din gra ree ni guin naj zi'c tijb xbala Jesucrist abi' yan laaman naj bén ma bi't.

¹⁸ Ad tiëbidi gutiaalguiiw Bén rën ree anjl zi'c Dios lëjt, par gusa'ndi xnejz Dios, din laa reeman rulüü naj reeman Bén naxanladx, per ad najt reeman laan rëb tëë reeman gual yu' ni rulüüloj loj reeman. Dxel laagajc reeman rlies xvalor por xixgab gajc reeman.

¹⁹ Per laa reeman ad nabannët reeman Jesucrist, Bén rniabee dunuj ree. Abi' por laaman caysnuu cayignia' ree xhienaag yunaal ree xnejzaman din yadxajg du lasa' ree yayajc ree tijbzi con Jesucrist zi'c naj xixgab Dios.

²⁰ Yan bal walidi ma güjtidi con Jesucrist par ree ni rbëëgujic ree bënguidxliuj, çchexquiza zeel ruzoobidi xtiidx ree Bén rëb:

²¹ "Ad rayalt gugaalil ni guin, ad gawil ni guin, ad guiniaazil ni guin?"

²² Gra ree mandamient guin yu' dxej nit reen, din bënguidxliuj gulëëgujic laa reen.

²³ Diidxliczi rulüü lasajc da't ree mandamient guin gual tant rüjn ree bejn naguiejn güün reeman laa reen cumplid abi' rüjn reeman Bén naxanladx dxel rusagzi laagajc reeman, per achetczi lasajc ree mandamient guin par gucwëëz reen ni mal rzëëbladx reeman güün reeman.

3

¹ Zeel bal ma rajpidi gualnaban cüb con Jesucrist, gol been naguiejn gol been xgab ni yu' ree xanyabaa lod za' Jesucrist xladbee Dios.

² Ad güündi xgab ganax ree ni yu' loj guidxliuj, gol been xgab mazri ni yu' ree xanyabaa.

³ Gol gunaladx ma güjtidi par ree ni yu' loj guidxliuj abi' ma rajpidi gualnaban delant loj Dios por Jesucrist.

4 Abi' chi gui't Jesucrist stijb, bèn runee dunuj ree guialnaban, nē lējt yayal guibannē laaman loj xgualrniabee za'cdxoonman.

Zi'c rayal guiban ree bèn rliadx Jesucrist

5 Yan, gol basa'n gra ree ni mal riga' loj guidxliuj guie. Ad sunēdi bèn ren bèn ad najt lacheelidi. Gol basa'n ni ad rūjnt ree sirv, nē ree xgabmal nē ree ni mal yu'di gan gūndi. Ad sēēbladx tēēdi gapidi gra loj ni yu' loj guidxliuj din bèn rūjn zian laan rēnman mazri luar Dios.

6 Abi' por ree ni guin zēēd xcasti Dios par ree bèn ad ruzoob xtiidxaman.

7 Lasa' ree ni mal guin beendi chi gadidi gūnbee Jesucrist.

8 Per yan gol basa'n gra ree ni mal guin zi'c gualrdxe'ch, gualralen lasa', gualrūjn ni mal lasa', gualrnieeguijdx nē gual rniee diidxguijdx.

9 Ad rusquiee loj lasa'di, din ad nabantridi zi'c gubandi gocli chi beendi ni mal ree,

10 din yan ma bidxaa mod nabandi. Ma najdi zi'c bencüb guial chigagaj ma cayajquidi zi'c rēn Dios gaquidi din gūnbeedi Dios mazri zagdxe, bèn runee lējt guialnaban.

11 Abi' chi ma rliadx bejn Jesucrist, achet gūūnan chutēēz najman, bal najman bèn grieg o bèn Israel, bal yu'man sen ru ree bèn Israel o ad yu'taman laan ya, bal najman benzit o najman bèn zojb dajn, bal najman zi'c bèn nado' o ad najtaman zi'c bèn nado' Per ni mazri lasajc naj gualrliladxaman Jesucrist, bèn rniabee za' tēēman con dugra ree.

12 Abi' Dios rēn lējt, zeel gulejman lējt din gaquidi xbejnman. Zeel gol baya bejn ree, gol gojc benza'c, gol gojc bèn naxanladx, ad gaquidi bendxal, gol gojp pasens lasa'di.

13 Ad yalenyā'nē lasa'di. Gol been tēē perdon lasa'di bal xhie rūjnnē reeman lējt. Zi'c been Dad Jesucrist lējt perdon ziangajc gol been perdon bejn ree.

14 Gol badxe'guijc gualrēn lasa' naj ni mazri lasajc. Abi' gualrēn lasa' guin rūjn yudar din guidxaa gūiban bejn.

15 Gol cwējb nabee Jesucrist lējt din yabedxe luxdoodi, din par zian gulej Dios lējt par gaquidi tijbzi por Jesucrist gol badēē tēē quixtēē lojman por zian.

16 Gol badxe'guijc da't xtiidx Jesucrist, gol balüü gol guneenē tēē lasa'di zi'c rayal. Gol badēē quixtēē loj Dios con ree cant nē ree salmos nē los demazri ree cant ni naj par Dios.

17 Xhietēēz ni gūndi ni guiniee tēēdi, yaloj xgaj gol basaaladx Dad Jesús abi' por laaman gol badēēd quixtēē loj dux Dad ree Dios.

Zi'c rayal guiban tijb famil

18 Lējt bēngunaa yu' ree lacheel, gol bazoob xtiidx lacheelidi, din zian rayal gūūn bèn rliadx Jesucrist.

19 Abi' ziangajc lējt xinguaaaw yu' ree lacheel, gol guyēn lacheelidi ad gusagzi tēēdi laa reeman.

20 Nē lējt xin naj ree xi'n, gol bazoob gra xtiidx ree xDadidi, din zian ruladx Dios.

21 Abi' ziangajc lējt dad na, ad gusagdiaj xi'ndi chitēē guidxe'ch reex abi' yalenyā' reex.

22 Lējt bèn rūjn ree xchiin bejn, gol bazoob gra xtiidx xpatrondi loj guidxliuj guie. Ad chi ruguaatzi reeman lējt par yaya'ndi zagdxe loj reeman, guidib luxdoodi gol been xchiin reeman por respejt ni rajpidi Dad Jesucrist.

²³ Xhietēez nin gūindi, gol beenan con gan. Gol gunaladx loj Jesucrist cayūndi sirv, ad lojt b́enguidxliuj.

²⁴ Din lējt ma ragbee guial zian yu' ni tia'di loj Dad Jesucrist guial cayūndi laaman sirv.

²⁵ Per par ree b́en rūjn ni mal, laa reeman yayal casti por ni mal been reeman, din Dios ad rbetaman loj bejn.

4

¹ Nēgajc lējt b́en naj ree patron, gol been zi'c rayal con ree b́en rūjn xchiindi, gol gojc tēē benza'c con laa reeman, din lējt ragbee guial xanyabaa yu' b́en rniabee lējt.

² Gol guzusin, gol gurejdx Dios ad bal gucheeladxidi, gol badēē quixtēē lojman.

³ Gol gurejdx tēē Dios por dunujn din guixhialaman nejj din gac yatie'chan mazri xtiidx Jesucrist ni ad wayūnbeet ree bejn. Abi' por ree diidx guin yu'n ladxguuib.

⁴ Gol gurejdx Dios din gac gatiechan diidx guin ree loj ree bejn zi'c rayal din gac chignia' reeman laan zagdx.

⁵ Gol gubajn zagdx delant loj ree b́en ad waliladxt Jesucrist gol guneē tēē xtiidxaman loj reeman beegaj chi chu' mod.

⁶ Chi rūdi diidx, gol be diidx xnejz din yayuladx bejn ni rnieedi gagbee tēēdi xhienaag yadxi'di ni rniabdiidx reeman lojdi.

Rxhiaal ree xbejn Jesucrist xtiidx Dios

⁷ Tíquico, tijb du lasa' ree, b́en rayēn ree, b́en diidxli cayūjn naj yudar cayūnan sirv loj Jesucrist, laaman gugojn lējt gra xhienaag za'n niz guie.

⁸ Par zian caxhalan laaman din gugojnman lējt xhienaag nadxu'n niz guie din yagu' tēēman luxdoodi.

⁹ Abi' con laagajcaman caxhalan Onésimo, tijb du lasa' ree b́en rayēn gajc ree, b́en naban zi'c rayal, b́en naj b́en ladxidi. Laa reeman gugojn lējt gra ni cayajc niz guie.

¹⁰ Aristarco, b́en yu'nē'n ladxguuib, laaman rxhiaal xtiidx Dios lojdi. Nēgajc Marcw, bijchwin Bernabé rugajpdioz lējt. Abi' ma bagojnman lējt chunin naj Marcw, bal gui'taman guidganajman lējt, gol baca'man zagdx.

¹¹ Abi' nēgajc Jesús, b́en la gajc Justo, rxhiaal xtiidx Dios lojdi. Loj gra ree b́en Israel riladx Jesucrist, laaz reeman cayūjn naj yudar caytie'chan xtiidx Dios abi' laaz reeman naj b́en cagu' luxdon.

¹² Nē Epafras, b́en ladxidi, rxhiaal xtiidx Dios lojdi. Laaman cayūjn sirv loj Jesucrist. Gra dxejzci rbejdxaman Dios por lējt din sudxi'chidi chinalidi xnejz Dios gūin tēēdi gra zi'c rēnman.

¹³ Naj ragbee zagdx guial dád ruman xgab por lējt, nē por ree b́en Laodicea, nē por ree b́en Hierápolis.

¹⁴ Lujc, doctor rayēn da't ree, nē Demas, nē reeman rxhiaal xtiidx Dios lojdi.

¹⁵ Gol bagajpdioz ree dux compniar ree b́en riladx ree Jesucrist, b́en zojb ree luguiedx Laodicea. Gol bagajpdioz tēē Ninfas con los demazri ree xbejn Jesucrist b́en rado'p ree lidxaman.

¹⁶ Chi ma gulox biilidi gui'ch guie, dxel gol guxhaalan loj ree b́en riladx Jesucrist, b́en zojb ree luguiedx Laodicea, din nē reeman gool laan. Nē gui'ch ni guxhalan loj reeman rayal yaxhaal reeman lojdi din nēgajc lējt gool laan.

¹⁷ Abi' gol g jdx loj Arquipo din g nman cumplid ni ma bacaabee Dad Jesucrist g nman.

¹⁸ Naj Pab, quijb naj cuca lejtr guie ree par gugajpdiozan l jt. Gol basaaladx guial yu'n ladxguiib. Dios g nle' lejt. Am n.

Gui'ch yaloj guxhaal San Pabl loj ree b́en Tesalónica rliadx Jesucrist

¹ Naj, Pab con Silvan nē Timoteo, cayxhaalan gui'ch guie par lējt najdi b́en rliadx Jesucrist luguiedx Tesalónica, dux Dad ree Dios nē Dad Jesucrist gūinle' lējt yabe'cdxe tēē reeman luxdoodi.

Rudēē Pab quixtēē loj Dios

² Guixie guixie radēēn quixtēē loj dux Dad ree Dios por gradi, rasaaladx tēēn lējt chi rarejdx ranaaban laaman.

³ Nē zianczi chi rarejdx ranaaban laaman, nadxe'duguijcan ni ma beendi guial rliadxidi laaman, nē guial rēn lasa'di, nadxe'duguijc tēēn guial cadaandi cabēzidi gui't Dad Jesucrist stijb.

⁴ Compniar raliduladx ree Jesucrist, dunujn rayagbee guial Dios rēn lējt, gulej tēēman lējt.

⁵ Din chi baneen xtiidxza'caman lojdi, ad diidxtizi balūūn lējt, balūūn lējt con xguialrniabee xSprijt Dios abi' rayagbeen guial diidxli naj ni caynan lojdi. Lējt ragbee xhienaag babajnan chi badxu'nē'n lējt, babajnan zian din yaguieenan lējt yudar xhienaag guibandi.

⁶ Abi' lējt nabandi zi'c babajnan lojdi nē zi'c balūū Jesucrist, abi' por xSprijt Dios babaadi bililadxidi ni banan lojdi, majsi dád guzagdiajdi.

⁷ Zian najdi tijb ejempl par gra ree b́en rliadx Jesucrist niz Macedonia nē niz Acaya.

⁸ Por lējt bire'ch xtiidxaman ad tijbtizi luarzii ree, gra ladczi ruza't reeman xhienaag rliadxidi Dios, xt ni'qui chetri ryaadx yaguie'chan.

⁹ Din laagajc reeman rū diidx xhienaag baca'di dunujn chi budganajn lējt, xhie tēē naag basa'ndi ni naladxidi naj ree dios persi binalidi quijb Dios naban abi' guzuloj cayūjndi laaman sirv.

¹⁰ Rū tēē reeman diidx xhienaag cabēzidi gui't Jesucrist Xi'n Dios diidz xanyabaa, b́en basbanman loj ree bengüt, Jesús b́en rabēē dunuj ree loj casti ni zēēd.

2

Ni been Pab luguiedx Tesalónica

¹ Lējt ragbee, compniar raliduladx ree Jesucrist, guial ad budganaj xlia'tzan lējt,

² majsi lējt ragbee guial luguiedx Filipos guna ree bejn diidxguijdx du lojn nē graloj ree guialzi badēēd reeman dunujn. Per Dios baneē dunujn valor persi badūn xtiidxza'caman lojdi, majsi xhietēēz raza'can por ree b́en rdxe'ch dunujn.

³ Din ad baneenē'tan lējt diidx rusquiee, o par yaguieennē'n lējt zi'ctzi rayēnan ya, o par yasquieen lējt,

⁴ per zi'c bacaabee Dios dunujn din yaneen xtiidxza'caman guial baguiaa-man zile' yaguieenan ni rayal yaguieenan, laanan naj ni radūn ad par yaya'ntan zagdxe loj ree bejn, par yaya'nān zagdxe loj Dios, b́en ragbee gra ni yu' luxdoo bejn.

⁵ Lëjt ragbee guial ad yu't dxej baneen'ën lëjt zagdxë naabzi par guiëndi dunujn, ache tëët guijc badxiiban din yaca'n xmiliadi. Dios ragbee guial laan naj diidxli.

⁶ Ad radiiltan guza't ree bejn dunujn zagdxë, ad radiil tëëtan guza'tidi dunujn zagdxë, o guza't ree ben ren dunujn zagdxë,

⁷ majsi guial nayajcan xiapótol Jesucrist, raya'pan derejch yanabeen lëjt güündi xhienin par dunujn, per ad raguieentan zian. Lëjt ragbee guial benza'c bayajcan chi badxu'n'ën lëjt, zi'cgajczi tijb na rusni's rniaj tëë xi'n.

⁸ Abi' guial tant rayënan lëjt, ad tijbtzi xtiidx Dios baneen lojdi, në dux guialnabanan bayënan naneen por lëjt, guial tant rayënan lëjt.

⁹ Abi' lëjt ragbee compniar, guial dád baguieenan dxiin. Dxej guiaal baguieenan dxiin, chitëë yalu'n xchiindi guial güündi dunujn yudar yabajnan la'tgaj balüün lëjt xtiidxza'c Dios.

¹⁰ Lëjt në Dios ragbeechaaw guial chi badxu'n'ën lëjt, babajnan xnejz zi'c rayal, abi' achet chile' gudxiibidi du guijcan, lëjt bën rililadx ree Jesucrist.

¹¹ Lëjt ragbee xhienaag baneen lëjt consejw, xhie tëë naag balu'n luxdoodi zi'c rüjn tijb dad con ree xi'nman.

¹² Ma banan lojdi din guibandi zi'c rayal guiban bën ma naj ree xbejn Dios, bën rbejdx lëjt din yayalidi xanyabaa lod rniabeeman.

¹³ Zeel në dunujn ad racwëézt radëen quixtëë loj Dios, guial chi biguiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx bénguidxliuj. Abi' diidx guin ree naj ni rusni xquiarguiejndi, lëjt guial rililadxidi Jesucrist.

¹⁴ Abi' lëjt compniar raliduladx ree laaman, ma guzajquidi zi'c guzac ree xbejn Dios, bën Israel zojb ree niz Judea, bën rililadx ree Jesucrist. Din zi'cgajc basagdiaj ree bën ladxidi lëjt, ziangajc basagdiaj lasa' bën Israel reeman laa reeman.

¹⁵ Abi' tëë ree bën Israel bagüjt reeman Dad Jesús, zi'cgajc bagüjt reeman bën badëed ree xtiidx Dios loj ree bejn, balaagdxä tëë reeman dunujn, ad rüjnt reeman zi'c rën Dios, abi' contzi gra bejn rdxe'ch reeman.

¹⁶ Rudxoon reeman yalüün bën ad najt ree bën Israel xhienaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

Guyën Pab nejman Tesalónica stijb

¹⁷ Compniar raliduladx ree Jesucrist, chi basa'nän lëjt tio'p choondxej, majsi ad raguiaatan lëjt, per rasaaduladxan lëjt, abi' rayën nejzdoon yaguiaan lëjt stijb.

¹⁸ Dád bayënan nudganajn lëjt. Naj Pab, zien volt da't guyënan nidganan lëjt, per badxoon xindxab niaj zian.

¹⁹ Per yan sta rayënan yudganajn lëjt, din ni ralëjzan naj guial lëjt ragu' du luxdoodi zagdxë. Lëjt naj dux chiinan ni rabaan'ën yubliugn'ën loj Dad Jesucrist chi gui'taman stijb.

²⁰ Lëjt naj bën rabaan'ën rlies tëëdi dux valoran.

3

¹ Zeel chi badxu'n luguiedx Atenas, ad radaantran, ma rayënan yayagbeen xhienaag za'di, dxel baguieenan xgab baya'n du xtijban ni.

² Abi' baxhaal dux compniaran Timoteo, bën cayguieenn'ën xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rililadxidi,

³ din ni'qui tijbidi ad zalenya't por ree gualzi ni cadëdidi, lëjt ragbee gual zian yaza'c ree.

⁴ Chi badxu'në'n lëjt, banan gual dád zien loj gualzi yadüüd ree, abi' lëjt ragbee gual laan naj ni ma gojc.

⁵ Zeel ad gudaantran, abi' guxhalan Timoteo din gagbeen xhienaag zinalidi ni riladxidi, din rdxeban gusquiee xindxab lëjt, abi' achetri sirv nüjn ni baguieenan por lëjt.

⁶ Per yan ni ma baguiaad Timoteo ni bidganajman lëjt, ma bagojnman dunujn gual zinalidi zagdxë ni riladxidi Jesucrist në zi'c rën lasa'di. Laaman na gual zianczi yu' luxdoodi zagdxë rasaaladxidi dunujn, abi' dád ma rëndi guguaadi dunujn, zi'cgajc rayënan yaguiaan lëjt.

⁷ Zeel, compniar raliduladx ree Jesucrist, majsi graloj tarbajw në gualzi caydüüdan, per dád nix yu' du luxdoon raguiejnan gual zagdxë zinalidi ni riladxidi.

⁸ Abi' yan mazri nix ma bayu du luxdoon gual ma bayagbeen za'dxi'chquidi loj ni zinalidi xnejz Dád Jesucrist.

⁹ Dxel xt ni'quid radxejltan xhienaag yadëen quixtëë loj Dios por lëjt, gual dád nix yu' du luxdoon lojman por lëjt.

¹⁰ Dxej guiaal radi'n ranaaban lojman din guneeman mod yudganajn lëjt, abi' lox yanan lojdi ni ryaadx gagbeedi xcwent gual riladxidi Jesucrist.

¹¹ Dux Dad ree Dios në Dad Jesucrist gagnë dunujn din gac yudganajn lëjt.

¹² Abi' Dad Jesucrist gagnë lëjt din gusnuu guiën lasa'di mazri, guiën tëëdi gra lasa' bejndi zi'c rayënan lëjt.

¹³ Laaman gagnë lëjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stijb con gra ree xbejnman.

4

Zi'c rën Dios guiban ree xbejnman

¹ Yan, compniar raliduladx ree Jesucrist, raza'can lëjt liaadx, rana tëen lojdi por laaman, gual zi'c nabandi yan zi'c ma balüün lëjt guibandi, din güüdi zi'c rën Dios, gol been naguiejn gol basnuu mazri guibandi zi'c rënman.

² Din lëjt ma ragbee gra ni guxhaal Dad Jesús dunujn yanan ni güüdi.

³ Ni rën Dios naj gual guibandi naya lojman, gual ad güüdi nidxuudx ree con ree bën ad najt lacheelidi.

⁴ Gol gogbee gual tijbgaj lëjt royal guibannë lacheelidi zagdxë zi'c rën Dios con respet,

⁵ ad chu' lacheelidi naabzi par grii xgustidi zi'c rüjn ree bën ad nünbeet Dios.

⁶ Ni'qui tijbidi ad rayalt güünaladx lasa'di, gusquiee lasa'di güüdi xhie nidxuudx con lacheel reeman. Din dux Dad ree Dios zudëëdaman casti gra ree bën rüjn zian, zi'c ma banan lojdi zi'c ma bagojnman lëjt.

⁷ Din Dios ad gurejdxaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya.

⁸ Zeel bën ad ridxga't ni ma banan lojdi, ad bénguidxliujtan ad ridxga'taman, Diosan ad ridxga'taman, bën razaladx xSprijt duloj ree.

⁹ Yan, xcwent gual guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di,

¹⁰ abi' laan naj ni cayüjndi con gra dux compniar ree bën rliadix ree Jesucrist niz Macedonia. Per raza'can lëjt liaadix din gusnuu guiën lasa'di mazri.

¹¹ Gol been tëë naguiejn guibannë lasa'di zagdxë, gol guyu xgab xchiindi, zi'c ma rana lojdi güüнди dxin,

¹² din guibandi zagdxë loj ree bën ad rliadix Jesucrist në chitëë xhie guiyaadixidi.

Ni gac chi gui't Dad Jesucrist

¹³ Yan, compniar raliduladix ree Jesucrist, ad rayëntan guibandi sin guial gagbeedi xcwent ree bengüt, chitëë chu'nayadi zi'c ree bën ad rliadix Jesucrist.

¹⁴ Din bal raliduladix ree guial güjtaman abi' babanman stijb, ziangajc raliduladix ree guial ree bën ma güjt, bën bililadix ree laaman, yasban Dios laa reeman por Jesucrist.

¹⁵ Zeel zi'c ma rayignia'n xtiidixaman, dunujn rana lojdi guial gra ree xbejnman, bën sta naban ree chi gui'taman stijb, ad zanedt reeman loj ree xbejnman bën ma güjt ree.

¹⁶ Din dxejzii guiguien cha' bën rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiät Dad Jesucrist diidz xanyabaa, abi' yaloj ree xbejnman bën ma güjt ree yaban stijb.

¹⁷ Guiáad dux compniar ree bën sta naban ree dxejzii, yadxaag ree con ree bën baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblyaa.

¹⁸ Zeel gol bagu' luxdoo lasa'di con ree diidix guin.

5

¹ Yan, compniar raliduladix ree Jesucrist, xhie dxej gac zian o goc gac zian ya, ad rüjnt naguiejn ganinan lëjt.

² Din lëjt ragbeechaaw guial zi'cgajczi ri't tijb béngubaaan guxhin, chi achut rbëz laaman, zian guidxin dxej gui't Dad Jesucrist stijb.

³ Chi guiëb ree bejn: "Zagdxë zio' ree, achet gac", dxel dxejczzi gui't guialzi par laa reeman ni ad zariit reeman loj, zi'c chi rdxin hor ragnaa lën béngunaa chi ma gal xi'nman.

⁴ Per lëjt compniar, ad zëtridi loj nejzmal din guiniaaz dxej ni gui't Dad Jesucrist lëjt zi'c chi ri't tijb béngubaaan.

⁵ Din graczi di ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay.

⁶ Zeel ad najt guial yabajn ree zi'c tijb bënnaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguiendxuj.

⁷ Bën zinal ree nejzmal zi'c tijb bënnaayëjs, zi'c tijb bengu', zian zinal reeman nejz guin.

⁸ Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialrliladix ni ma raya'p ree në loj ni rën Dios dunuj ree, abi' yadxu'dxi'ch tëë ree në loj ni ma raliduladix ree guial ma raya'p ree perdon. Abi' zi'c tijb xin suldad yu' xcascwix ni rutëë yaya'p tëë reen zi'c tijb ni gutëë dunuj ree loj ni mal

⁹ Din ad gurejdxat Dios dunuj ree par yalay ree xcastiman, gurejdxaman dunuj ree din yalay ree perdon por Dad Jesucrist,

¹⁰ bën güt por dunuj ree, din majsi nabajn ree o ma bayëjt ree chi gui'taman stijb, per yo' ree yuchu'në' reeman.

¹¹ Zeel gol bagu' luxdoo lasa'di gol been tëë yudar lasa'di din gagbeedi mazri xtiidx Dios zi'c ma cayüjndi.

Ni rayal güün ree bén rlıladx Jesucrist

¹² Compniar raliduladx ree Jesucrist, raza'can lëjt liaadx, gol gojp respejt bén rusiid ree lëjt xtiidx Dios, bén ruluü ree lëjt rnieenë tëë reeman lëjt xhienaag chinalidi Jesucrist.

¹³ Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdx.

¹⁴ Ranaab tëën lojdi compniar, gol guneenë ree bén ad rënt güün dxiin, gol bagu' luxdoo ree bén ralenya'në xnejz Dios, gol been tëë yudar bén ad za'dxi'cht ree loj xnejzaman, gol gojp pacens gra reeman.

¹⁵ Gol been naguiejn ad güüdi ni mal bén rüjn ree lëjt ni mal, zagdxeli gol gojc benza'c con lasa'di në con gra ree bejn.

¹⁶ Gol badxe' luxdoodi zagdx zianczi.

¹⁷ Ad gucwëéz cwedx guiniabidi Dios.

¹⁸ Gol badëë quixtëë lojman por gra, din zian rënman güüdi, lëjt najdi xbejn Jesucrist.

¹⁹ Ad rbexuudi nabee xSprijt Dios lëjt.

²⁰ Gol bidxga' ni rniee ree bén rudëéd xtiidxaman.

²¹ Yaløj xgaj gol gogbee zagdx xhietëëznin, dxel gol been ni naj zagdx.

²² Gol gubi'ca loj gra ree ni mal.

²³ Dios, bén rabe'cdxe luxdoo bejn, laaman gagnë lëjt din gaquidi lojman naya guidiblagaa. Laaman gagnë xcuerpidi, gagnëman xsprijtidi në guidi-bлагаadi din gaquidi nayadxuj lojman dxej gui't Dad Jesucrist.

²⁴ Abi' Dios güün zian, din laaman, bén rbejdx dunuj ree par güünman dunuj ree xbejnman, rüjn xtiidxaman cumplid.

Düidx bigra ca ree loj gui'ch guie

²⁵ Compniar raliduladx ree Jesucrist, gol gurejdx gunab Dios por dunujn.

²⁶ Gol badëë xtiidx Dios da cwentan loj gra ree compniar rlıladx Jesucrist.

²⁷ Abi' por laaman, naj rni lojdi rniabee tëën lëjt: Gol biil gui'ch guie loj gra ree compniar rlıladx laaman.

²⁸ Dux Dad ree Jesucrist güünle' lëjt.

Gui'ch barojp guxhaal San Pabl loj ree b́en Tesalónica rlliladx Jesucrist

¹ Naj, Pab con Silvan nē Timoteo, cayxhaalan gui'ch guie par lējt rlliladxidi Jesucrist luguiedx Tesalónica, lējt najdi xbejn dux Dad ree Dios nē xbejn Dad Jesucrist.

² Dux Dad ree Dios nē Dad Jesucrist güünle' lējt yabe'cdxe tēē reeman luxdoodi.

Rudēēd Pab quixtēē loj Dios

³ Guixie guixie radēēn quixtēē loj Dios por lējt compniar raliduladx ree Jesucrist, dín zian rayal yaguieenan guial mazri cusnuu rlliladxidi laaman, abi' tǐjb gajdi mazri ma rēn lasa'di.

⁴ Zeel dád nix yu' du luxdoon raza'tan lējt loj gra ree xbejn Dios, raguie'chan loj reeman pacens ni rajpidi nē guialrliladx ni rajpidi, rdaan tēēdi gra ree ni rǔjnnē ree bejn lējt nē gra ree guialzi ni cadēdidi.

⁵ Zian rguien xnejz naj xguialguxtis Dios, guial gulejman lējt din yayalidi lod rniabeeman, dín por laan cadēdidi guialzi.

⁶ Abi' guial gra ni rǔjn Dios naj xnejz, zeel gudēēdaman casti gra ree b́en cudēēd lējt casti.

⁷ Guíaad lējt cadēdidi guialzi yan, guneeman lējt guialraziiladx con dunujn, dxej ni gulüüloj Dad Jesucrist diizd xanyabaa galay xbianiman ni naj zi'c bajl, con ree xianjlaman b́en ca' ree mazri guialrniabee.

⁸ Dxel gudēēdaman casti b́en ad bayagbeet ree Dios, b́en ad guyēnt ree nuzoob xtiidzxa'c Dad Jesucrist.

⁹ Gudēēdaman laa reeman casti tiblayaa, su reeman zijt par Dios nē par xguialrniabee za'cdxoonman.

¹⁰ Zian gac dxej ni gui't Dad Jesucrist, dín guza't ree bejn laaman zagdx ree xbejnman, yadxa tēē loj gra reeman laaman, abi' nē lējt, dín ma bililadxidi xtiidxaman ni badün lojdi.

¹¹ Zeel ad racwēēzt rarejdx ranaaban Dios por lējt din gagnēman lējt guibandi zi'c rayal, zi'c guredxaman lējt guibandi. Ranaab tēēn lojman guial con xguialrniabeeman gac cumplid gra xixgabzagdxedi nē gra ni rǔjndi guial rlliladxidi laaman.

¹² Abi' zian guiliesidi xvalor Dad Jesucrist, guíaad laaman guilies xvaloridi guial laaman con dux Dad ree Dios rēn reeman dunuj ree.

2

Gulüüloj b́en ca' xguialrniabee xinxab

¹ Yan, compniar raliduladx ree Dad Jesucrist, xcwent guial gui'taman stǐjb nē guial yadxaag ree con laaman, raza'can lējt liaadx,

² ad bal tiēbidi tibrajtzi gusquiee ree bejn lējt, b́en rēb ree ma bidxin dxej gui't Dad Jesucrist. Ad guidxebidi gucaagdiajguidi zian, o na ree bejn guial tǐjb sprǐjt rēb loj reeman zian, o dunujn baxhaal gui'ch loj reeman lod raguie'chan zian.

³ Ad tiēbidi chu gusquiee lējt, dín chi gad dxej guin guidxin, yalojxgaj guidxin ree dxej ni ad zuzoobtri bejn xtiidx Dios. Abi' gulüüloj tǐjb b́en güün ganax ni rēn xinxab, b́en ma naj par gabijl.

⁴ Laagajc laaman guilies xvalor, abi' yalenman gra ni nünbee bejn zi'c Dios në gra ni rnijachi' bejn zi'c dios, xt cweman lën xyadoo Dios, abi' guiëbaman guial laaman naj Dios.

⁵ Gol basaaladx guial zian rnin lojdi chi guzunë'n lëjt.

⁶ Abi' yan lëjt ma ragbee chu cutëë chitëë gulüülojman, la'tgaj guidxin dxej rayal gulüülojman.

⁷ Ma cayajc ree xgabmal guin, per yu' bën cutëë gac reen cumplid. Chi ma bisüd bën cutëë guin,

⁸ dxel gulüüloj benmal guin, abi' Dad Jesucrist con tijbzi gulüjbaman gugüjtaman laaman, dxel con xbianiman ni guidnëman gunidlojman laaman.

⁹ Benmal guin por xindxab gui'taman, abi' dád gapaman guialrniabee. Güünman zien ree ni yadxalaj ree bejn, güün tëëman zien ree milagr par gusquieeman.

¹⁰ Con gralaj ree ni mal gusquieeman bën canijt ree loj Dios, guial ad guyënt reeman ad cwëjb tëët reeman nililadx reeman ni diidxli zile' nuslaa laa reeman loj dol.

¹¹ Zeel ruslaa Dios gusquiee gra ree ni guin laa reeman, abi' guililadx reeman ni ad najt ni diidxli,

¹² din yayal gra reeman casti, guial ad bililadxt reeman ni diidxli guin, din mazri bayuladx reeman been reeman ni mal.

Sudxi'ch reeman loj ni rliladx reeman

¹³ Compniar, rën Dad Jesucrist lëjt. Zianczi rayal yadëen quixtëë loj Dios por lëjt, din diizd guia'xchej ma bacaabeeman lëjt din laadi loj casti, guial ma nayadi por xSprijt Dios në guial ma bililadxiidi ni naj diidxli.

¹⁴ Par zian gurejdx Dios lëjt gaquidi xbejnman chi badün xtiidzxa'c Dad Jesucrist lojdi, din yayalidi xanyabaa lod za'man.

¹⁵ Zeel, compniar raliduladx ree Jesucrist, gol guzujdxi'ch gol binal tëë ni balüün lëjt chi badxu'në'n lëjt, në ni ma banan lojdi loj gui'ch ren.

¹⁶ Abi' Dad Jesucrist gajc në dux Dad ree Dios bën rën dunuj ree, bën ragu' du luxdoo ree zianczi, bën banee tëë ni ralëjz ree guial najman benza'c,

¹⁷ laaman yagu' luxdoodi gagnë tëëman lëjt din sudxi'chidi din gra ni guinieedi güün tëëdi gac zagdx.

3

Rën Pab cwedx guiniab reeman Dios

¹ Yan, compniar raliduladx ree Jesucrist, gol gurejdx gunab Dios por dunujn din diob guire'ch xtiidx Dad Jesucrist gralad, abi' guza't reeman xtiidxaman zagdx ze'cgajc beendi.

² Gol gurejdx gunab tëëman din yabëëman dunujn loj ree benmal, loj ree bendxuudx ad nabant xnejz, din ad grat bejn rliladx xtiidx Dad Jesucrist.

³ Per laaman zianczi rüjn xtiidxaman cumplid, abi' laaman gagnë lëjt din sudxi'chidi, guinia tëëman lëjt chitëë güündi ni mal.

⁴ Dunujn rayagbeechaaw guial laaman cayagnë lëjt cayüjndi gusnuu tëë güündi ni banan lojdi.

⁵ Gagnëman lëjt din guiëndi bejn ree zi'c rën Dios laa reeman gap tëëdi pacens zi'c gojp Dad Jesucrist pacens.

Rüjn nagueijn güün bejn dxiin

⁶ Yan, compniar raliduladx ree Jesucrist, por laaman ranabeen lëjt: Gol bariica loj chutëez compniar gaz za' ad rënt güün dxiin, bën ad naban tët zi'c balüün lëjt.

⁷ Din lëjt ragbee xhienaag guibandi din guibandi zi'c nabajnan. Dunujn ad badxu'në'tan lëjt sin gual naguieenan dxiin,

⁸ achu tët banee xlia' ni badaawan. Lëjt ragbee gual dád baguieenan naguiejn baguieenan dxiin, dxej guiaal baguieenan dxiin chitëë yalu'n xchiindi gual güündi dunujn yudar din gac yabajnan.

⁹ Majsı zajc nanabeen lëjt nüjndi dunujn yudar, per baguieenan dxiin par yalüün xhienaag rayal guibandi güündi zi'c raguieenan.

¹⁰ Chi badxu'në'n lëjt, ranan lojdi: Bën ad rënt güün dxiin, ad zajw gajctaman.

¹¹ Per yan baguiejnan gual yu'di gaz za' ad rëntidi güündi dxiin, abi' rudi loj ni ad rayaltidi.

¹² Par bën zii ree dunujn rana ranabee tēen laa reeman por Dad Jesucrist yabedxe reeman, güün reeman dxiin din guiban reeman.

¹³ Guiáad lëjt compniar, ad yaleny'a'di güündi ni naj zagdx.

¹⁴ Bal yu' tijbidi ad ruzoobt diidx gual güündi ni ranan loj gui'ch guie, gol baguiaa chu benan, ad guchajg tēedi laaman din yatu lojman.

¹⁵ Per ad guguaadi laaman zi'c tijb bën rdxe'chidi, gol baguiaaman zi'c tijb bijchidi, gol guneenēman din guibanman zagdx.

Diidx bigra ca ree loj gui'ch guie

¹⁶ Dad Jesucrist bën rabe'cdxe luxdoo bejn, laaman yabe'cdxe luxdoodi guixie guixie në loj gra. Laaman sunë lëjt.

¹⁷ Naj, Pab, quijb naj cuca ree lejtr guie par gugajpdiozan lëjt. Zian rünan con gra ree da gui'chan, zian naj ree da lejtran.

¹⁸ Dad Jesucrist güünle' gradi.

Gui'ch yaloj guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xiapóstol Jesucrist por xgualrniabee Dios bén rüjn perdon dux tol ree në por Jesucrist bén rayagbee ree gui't stijb.

² Cudan gui'ch guie par lüj Timoteo, din par naj lüj naj zi'cgajc da xi'nan guial tiblojzi raliduladx Jesucrist. Dux Dad ree Dios në Dad Jesucrist güünle' lüj, yayaman lüj yabe'cdxe tëëman luxdool.

Rëb Pab loj Timoteo xcwent ree bén rusquiee

³ Zi'c rnin lojl chi briin za'n niz Macedonia, guial yaya'nl guiedx Éfeso din nabeel tio'p choon ree bejn ni chitëë rulüü reeman bejn ree ni ad najt diidxli.

⁴ Ad chililadx reeman ni rbëëguijc ree bejn, ad guidxga' tëë reeman ban za reeman, o chu rajc reeman xbengol gulal reeman, din ad ni guint ree gagnë laa reeman par gusunuu chililadx reeman xtiidx Dios.

⁵ Canabeen lüj din güün reeman zian din guiguien guial diidxli rën lasa' reeman, achet naladx reeman din guiguien tëë guial guidib luxdoo reeman rliladx reeman xtiidx Dios.

⁶ Din yu' reeman ad rüjntri zian guial ganax ree ni ren ni ad rüjnt ree sirv rü reeman.

⁷ Rën reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rën guiëb ni rniece reeman ni'quid rignia't reeman ni naladx reeman naj zagdxe culüü reeman bejn ree.

⁸ Dunuj ree rayagbee guial zagdxe naj ley guin par bén rignia' xhie sirv rüjnan.

⁹ Abi' rayagbee ree guial ad baneet Dios ley guin par ree bén naban xnejz niz lojman, baneeman ley guin par tëd ree bejn casti, bén naban ree zi'ctzi naj xixgab reeman, bén ad ruzoobt ree diidx, bén ad yu'guijct ree Dios, bén rüjn ree dol, bén ad rajpt ree Dios respejt, bén ad rüjnt ree naguiejn guiën reeman Dios, bén rugüjt xdad xniaa, në par gra ree bén rugüjt bejn,

¹⁰ rüjn tëën sirv par xcasti ree bén za'në xinguaaaw o béngunaa ren, par ree xin ruladx lasa' xinguaaaw gajc o béngunaa ruladx lasa' béngunaa gajc, në par ree bén rban bejn ree par guto' reeman laa reeman zi'c mojs, nëtëë par ree bén rusquiee në ree bén ruza't Dios par sudxi'chnë xgualrusquiee reeman në par gra ree bén rüjn xcontr ni naj diidxli.

¹¹ Diidxli guie ree naj ni zëëd ree loj xtiidxza'cdxoon Jesucrist. Dux Dad ree Dios, bén rayal respejt, laaman naj bén basa'nnë naj diidx guin ree din gatiechan laa reen.

Xhienaag baya Dios Pab

¹² Quixtëë Dad Jesucrist laaman cayagnë naj, rajp tëëman naj confianz abi' bacaabeeman naj par gatiechan xtiidxaman,

¹³ majsi yaloj gunen laaman diidxguijdx abi' guzunaalan bén rliladx ree laaman din günan laa reeman ni mal abi' dád naya bennë'n laa reeman. Per Dios bayaman naj guial ad bignia'tan ni cayünan din gad naj chililadx Jesucrist.

¹⁴ Abi' dád benza'c gojcaman con naj, balüüman naj xhienaag chililadxan balüü tëëman xhienaag guiënan Dad Jesucrist.

¹⁵ Diidxli ni ganin lëjt, rayal chililadx bejn: guial Jesucrist bi't loj guidxliuj par güünman xtol bejn perdon, abi' loj gra ree bejn naj naj mazri bëndol.

¹⁶ Per majsi najn mazri bëndol, baya Dios naj abi' gojp Jesucrist naj pacens din gagbee ree bën chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblyayaa con Dios.

¹⁷ Zeel zianczi rayal yaya'p reeman respejt yaza't tée reeman zagdxe guial najman rey bën ad yu't dxej guiët, abi' rajpaman guialrniabee par tiblyayaa guial tijbzi laaman naj Dios abi' achut rajc ruguiaa laaman. Amén.

¹⁸ Timoteo, par naj lüj naj zi'c da xi'n'an zeel rnin lüj been zi'c guneë reeman xcwentil diidz yaløj, abi' zi'c tijb suldad ni rej loj wadijl ad guidxebil niz loj ree bën za' ree contr xtiidx Dios.

¹⁹ Guzudxi'ch loj ni rililadxil Jesucrist, been tée ganaxzi ree xgab zagdxe par güünl zi'c rayal. Din yu' ree bejn guial ad rüjnt reeman zian, yan ma banijt reeman ni rililadx reeman Dios.

²⁰ Zian ma guzajc ree Himeneo con Lejandr, zeel ma bayün laa reeman loj satanás din gusiid reeman guial ad rayalt guinieë reeman Dios diidgüjdx.

2

Xhienaag cwedx guiniab bejn Dios

¹ Yaløjdo ni rnin lojdi naj guial cwedx guiniabidi Dios, cwedx guiniabidi laaman por gra ree bënguidxliuj, gudëëd tée di quixtëë lojman.

² Rayal yarejdx yanaab ree Dios por ree rey në por gra ree guxtis loj guidxliuj din chile' yabajn ree zagdxe gusnuu tée yabajn ree zi'c rën Dios.

³ Din laan naj ni zagdxe ni rayuladx tée dux Dad ree Dios, bën rüjn perdon dux tol ree,

⁴ bën rën guial gra bejn gac perdon guidxin tée dxej gagbee bejn xhie rën guiëb xtiidxliiman.

⁵ Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bënguidxliuj.

⁶ Güjtaman loj crüjz persi gudijxaman por xtol gra ree bënguidxliuj, zian naj ni balüü Dios bejn chi bidxin dxej bacaabeeman gac zian.

⁷ Zeel bacaabeeman naj gacan xi apóstol Jesucrist din gatiechan xtiidxaman, në par gusidan bën ad najt ree bën Israel conin naj diidxli, xhie tée naag chililadx reeman Jesucrist, walin ad rusquieetan.

⁸ Yan rënan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guialrdxe'ch në sin wadijl.

⁹ Rën tëen guial ree bëngunaa su reeman zi'c rayal, ad tédlay suchaaw reeman con or, në ree perl në ree vistid zagdxe o guial tédlay güünchaaw guidxgüjcx reeman.

¹⁰ Din mazri zagdxe güün reeman ni naj zagdxe, zi'c rayal güün ree bëngunaa ni ma zinal xnejz Dios.

¹¹ Abi' rayal gucaagdiajgzi reeman ache guinieë reeman chi rülüü ree xinguaaw xtiidx Dios.

¹² Din ad zatiëëbtan guial gülüü tijb bëngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee bëngunaa xinguaaw, rayal gucaagdiajgzaman.

¹³ Din Dios, yaløj Adán beenchaawaman, dxelri Eva.

¹⁴ Din ad Adánt basquieë reeman, yaløj Eva basquieë reeman, abi' por guialrusquieë guin beenman dol.

¹⁵ Per zajc gac béngunaa perdon, bal güün xchiinman zagdxe guial najman na, bal gusnuu chililadxaman Dios, guiënman bejn ree guiban tēëman xnejz.

3

Xhienaag guiban ree bén rniabee

¹ Gol badxe'guijc da diidxan: Bal chu bén rën gap gualrniabee loj gra ree bén rliladx Jesucrist par gulüüman laa reeman xnejz Dios, zagdxequi naj ni rënman güünman.

² Per bén rajp gualrniabee guin rayal güünman zi'c rayal chitëë chu guinieeguidx laaman. Rayal chu' tijbzi lacheelaman, guibanman zagdxe chu' tēë xquiarguejnman din gap ree bejn laaman respekt. Gacaman benza'c con ree bén rdxin lidxaman, gac tēëman tijb Bén rignia' par gulüüman bejn ree.

³ Ad rayalt gacaman bengui', ni'qui Bén rguuil wadijl ad rayal tēët yaguiil-aman mod par tia'man xmilia ree bejn, rayal gacaman benza'c con chutëëz, gac tēëman Bén naxanladx ad zazëëbladx tēëtaman milia.

⁴ Rayal nabee lidxaman zi'c rayal din gulüü ree xi'nman xhienaag gap reex respekt guzoob tēë reex diidx.

⁵ Din bal id rajc rniabee lidxaman, ¿xhieza naag nabeeman Bén rliladx ree Jesucrist?

⁶ Zeel tijb Bén qui guzulojri rliladx Jesucrist, ad rayalt nabeeman loj ree Bén ma rliladx chitëë guilies xvalor gajcaman abi' yayalaman lasa' casti ni bayal xindxab.

⁷ Bén rajp gualrniabee guin xt ree Bén ad rliladxt Jesucrist rayal güünbee laaman guial najcaman benza'c chitëë yaya'nxtuman abi' güün xindxab laaman gan.

Ni güün ree Bén rüjn yudar Bén rniabee ree

⁸ Yan ziangajc ree Bén ma cwabee par güün reeman yudar Bén rniabee ree, rayal güün reeman zi'c rayal din gap ree bejn laa reeman respekt, güün cumplid xtiidx reeman, ad guié' tēë reeman, ad yaguiil tēë reeman mod par tia' reeman xmilia ree bejn.

⁹ Con xgabza'c chinal reeman ni ma balüü Dios dunuj ree.

¹⁰ Zeel yalojxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din güün reeman yudar Bén rniabee ree.

¹¹ Ziangajc ree béngunaa ni ma cwabee par güün reeman yudar, rayal güün reeman zi'c rayal din gap bejn laa reeman respekt ad zaneeguidxdt reeman bejn, rayal guiban reeman zagdxe abi' güün cumplid xtiidx reeman.

¹² Abi' ree xinguaiaaw cwabee guin par güün reex yudar Bén rniabee loj ree xbejn Cristo, tijbzi lacheel reex rayal chu', nabee tēë lidx reex con xi'n reex zi'c rayal.

¹³ Din Bén rüjn ree sirv zi'c rayal ad respektzi rajp bejn laa reeman, sin gualrdxeb ma zile' guiëb reeman xhienaag rliladx reeman Jesucrist.

Naroob naj Bén raliduladx ree

¹⁴ Gagnë Dios chile' guialan guidganan lüj. Per cucan gui'ch guie,

¹⁵ din bal gaglaan ma ragbeel xhienaag guiban bejn delant loj los demasri ree xbejn Dios, Bén ma naj ree xbejn Dios naban, abi' za'dxi'ch reeman rulüü tēë reeman xtiidxliman.

¹⁶ Dunuj ree rayagbee guial dád Bén naroob najman, Bén raliduladx ree: Bi'taman loj guidxliuj zi'c tijb bénguidxliuj, rëb xSprijt Dios guial laaman naj Bén naya

abi' baguiaa ree anjl laaman bi'taman loj guidxliuj.
 Bre'ch xtiidxaman loj ree bén ad najt bén Israel,
 guidibczi bililadx bejn laaman abi'
 baca' Dios laaman xanyabaa.

4

Bén rusa'n ree guialrliladx reeman Jesucrist

¹ Ma bagojnchaaw xSprijt Dios guial zëed ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiidx ree bénrusquiee nê gra ree ni zëed por xinxxab.

² Mazri guidxga' reeman bénrusquiee ree, bén wed rüjnz ree, bén achetri ree rzajc guial rüjn reeman dol din ma naya' reeman zian.

³ Guiëb reeman guial ad najt guial guxhlaa ree bejn ad zajw tëët reeman graloj. Per Dios badxe' graloj guialraw par gaw ree bén rliladx laaman, bén ma ragbee ree conin naj diidxli abi' gudëed reeman quixtëe lojman.

⁴ Din gra ni badxe' Dios naj zagdxe, achet ni rayal cwexuu bejn tia'man bal gudëeman quixtëe chi cayawaman laan.

⁵ Din chi rarejdx ranaab ree Dios con xtiidxaman rüjnle'man guiyc ni yadaaw ree.

Bén rüjn sirv zagdxe loj Jesucrist

⁶ Zeel bal rulüül bén rliladx ree Jesucrist zi'c ma rnin, dxel cayünquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx guin nê ree diidxza'c ni zinalil.

⁷ Per ad guidxga'l ni rbëëguiyc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rën Dios.

⁸ Zagdxe naj par güün bejn graloj ejercijs par gacaman gojl, per loj gra xhietëznin mazri lasajc guiban bejn zi'c rën Dios. Din ad lojtzi guidxliuj guie güün sirv guial naban bejn zi'c rën Dios, nêgajc xanyabaa lod gap bejn guialnaban tiblyaa.

⁹ Dunuj ree rayagbee guial ni diidxli naj ree diidx guie, abi' rayal chililadx gra bejn laan.

¹⁰ Zeel majsi cayza'can ni cayza'can, per cayguieenan ni cayguieenan guial raliduladxan Dios naban, bén naban par güünman yudar gra ree bejn, per mazri bén rliladx ree laaman.

¹¹ Zian rayal gusiidil bejn ree güjdx tëe loj reeman din güün reeman zian.

¹² Gojp cudad chitëe guiëb ree bejn guial achet sirv lüj guial ad wayajctil bengol. Mejrli been naguejn din gaquil tijb ejempl par ree bén rliladx Jesucrist, zi'c xhienaag rül diidx, zi'c nabanl, zi'c rën ben ren ree, zi'c rliladx Dios nêtëe por ree xixgabza'quil.

¹³ La'tgaj guialan, basnuu biil xtiidx Dios loj ree bejn, guneenë reeman balüü tëe reeman xhie rën guiëb xtiidx Dios.

¹⁴ Ad yayanladxil güünl zi'c rayal güünl por quiarguejn ni banee Dios lojl chi badxiib yaa ree bengol guijqul chi gogbee reeman guial lüj naj bén gule Dios.

¹⁵ Badxe'guiyc diidx guie ree din gagbee gra ree bejn guial cusnuu zël delant.

¹⁶ Gojp lüj con ni rusiidil bejn ree. Guzujdxi'ch loj ni ma ragbeel, zian yabëe lüj gajc loj casti yabëe tël bén cucaagdiajg ree xtiidxil.

5

Xhienaağ gūin Timoteo con ree bēn rliładx Jesucrist

¹ Ad tilnēł tijb bengol, badēēman consejw zi'cgajc xdadil, abi' xin naj ree xinguiağ, badēē reex consejw zi'cgajc bijchil.

² Ziangajc bēngunaa bengol ree badēē reeman consejw zi'cgajc xniaal, abi' biinguiag ree, badēē reem consejw zi'cgajc bizanl con xgabza'c.

³ Bidxga' ree bēngunaa bizējb ni diidxli achut rajp.

⁴ Per bal tijb bēngunaa bizējb guin yu' ree xi'n o xiajg, dxel yaløj laa reex gusiid guidxga' xfamil, gūin reex yudar din yaguijx reex ni baslaa xdad xniaa reex laa reex. Din zian naj zagdxē, zian tēē ruladx Dios.

⁵ Bēngunaa naj diidxli bēn bizējb, bēn ad rajptri chunin loj guidxliuj guie, tijbzi Dios naj bēn yu'guijcaman gūin laaman yudar dxel ad rucwēēt rbejdx rniabaman laaman dxej guiaal.

⁶ Per tijb bēngunaa bizējb ni rūjn ni rēntzi, laaman naj zi'c tijb bengūt guial ad yu'guijctaman Dios.

⁷ Bagojn gra ree diidx guie bēn ma rliładx ree Jesucrist chitēē chu guinieeguijdx laa reeman.

⁸ Din bēn ad rūjnt yudar xcompniar, abi' ni'qui xfamilaman bēn zojb ree lidxaman ad rūjntaman yudar, laaman ma basa'n ni rliładxaman abi' piorli najman guial loj ree bēn ad rliładx Jesucrist.

⁹ Ad tia'l laj chutēēz bēngunaa bizējb par gac reeman yudar, naabzi ree bēngunaa bizējb bēn ma nadēd ree gayojn ijj abi' ad guzunētaman ben ren la'tgaj naban lacheelaman.

¹⁰ Bal nūnbee tēē ree bejn laaman guial beenman ganax ree ni rūjn sirv, bal baslaa ree xi'nman zi'c rayal, bal badēē lidxaman baya'n ree bejn bal gojcaman benza'c con ree bēn rliładx Jesucrist bēn bidxin ree lidxaman, bal beenman yudar bēn rzagdiaj ree, bal been tēēman nagueijn beenman ganax ni zagdxē.

¹¹ Per ad tia'l laj ree bēngunaa bizējb benguiag ree, din despuejs rēn reeman guxhliaa reeman abi' ad rūjntri reeman ni rayal gūin reeman por Cristo guial rēn reeman guxhliaa reeman stijb.

¹² Dxel rūjn reeman dol guial ad rūjntri reeman ni ma been reeman compromis con Cristo.

¹³ Abi' tēē ree benguiag guin zē reeman yu yu, zianz rajc reeman costumbr achetzi rūjn reeman. Abi' ad laatzan, rzuloj ruza't reeman bejn, ru reeman loj xhietēēznin abi' rniee reeman ni ad rayalt guiniee reeman.

¹⁴ Zeel rēnan guial bēn naj ree bēngunaa bizējb benguiag, mejorli guxhliaa reeman stijb, bēn' xi'n reeman nabee tēē lidx reeman zi'c rayal, chitēē gudēēd reeman mod guinieeguijdx ree bēn ralen ree dunuj ree laa reeman.

¹⁵ Din yu' ree bēngunaa bizējb ma guro'nładx reeman xnejz Dios abi' ma zinal reeman xnejz xindxab.

¹⁶ Abi' bal tijb bēn rliładx Jesucrist naj xfamilaman tijb bēn baya'n bizējb, dxel laaman rayal gūin yudar bēngunaa bizējb guin chitēē gacan mazri carg par ree dux compniar ree bēn rliładx ree Jesucrist. Zian gūin reeman yudar bēngunaa bizējb diidxli achutri rajp loj guidxliuj guie.

¹⁷ Bēn rliładx ree Jesucrist rayal gap reeman respējt bēn rniabee laa reeman nē ree bēn rniee rulūū tēē xtūidx Dios zi'c rayal, gudēē tēēdi loj reeman gra ni ryaadx reeman.

¹⁸ Din loj xtiidx Dios rëb: “Ad gudxe'di guijxh ro' ree begui'xh la'tgaj cayünj reeb dxiin”, rëb tëë loj xtiidx Dios: “Rayał gax bën rünj dxiin”.

¹⁹ Ad guidxga'di ni rudxiib ree bejn guijc tijb ree bën rniabee ree bën rliładx Jesucrist, bal id yu' tio'p choon ree bejn rëb gual diidxli naj ni rniee reeman por laaman.

²⁰ Per bal tijb bën ma ca' gualrniabee rusnuu rünjman dol, rayał guineeñel laaman delant loj gra reeman din guidxeb los demazri reeman.

²¹ Yan por Dios, por Jesucrist në por ree anjl ni ma gulejman, naj rni badxe'guijc been tëë zi'c ma rnin ad cwel loj ree bejn, tiblojzi been con gra reeman.

²² Gojp cudad cwel tijb bën ni nabee din ad ragbeetil bal yu' ni mal cayünjman, dxel güün ree bejn xgab gual nëgajc lüj ruladx ni cayünjman. Gojp cudad graloj ree dol.

²³ Në gual guië't guië't ragxuu lënl gual ad nadaant lënl, ad rë'l nijs lagajzi mejorli gu' tıbda'n vin.

²⁴ Yu' reeman laa rguien gajc xhie dol cayünj reeman diidz chi gad reeman gudëed cwent loj Dios, per yu' reeman ad rguient xhie dol cayünj reeman xt chi yadëed reeman cwent loj Dios.

²⁵ Ziangajc yu' ree bën ni laa rguien gajc ni zagdxe ni cayünj reeman, abi' yu' reeman ni'quid rguient ni zagdxe ni cayünj reeman, per yu' dxej gagbee ree bejn laan.

6

¹ Gra ree mojs rayał gap reeman respejt xpatron reeman chitëe chu guinee diidxguijdx contr Dios o contr xtiidxaman ni caylün.

² Abi' bal rliładx patron guin Jesucrist dxel rayał gap reeman laaman mazri respejt gual nëman rliładx Jesucrist zi'cgajc laa reeman. Abi' tëë rayał güün xchiin reeman zi'c rayał gual cayünj reeman sirv tijb xcompniar reeman bën rliładx Jesucrist compniar ni rën reeman. Zian balüü ree bejn güjdx tëë loj reeman din güün reeman zian.

Guialnaza'c ni naj diidxli

³ Bal yu' bën rulüü diidx ni ad najt zi'c xtiidzxa'c Dad Jesucrist ni'qui zi'c raliłuladx ree Jesucrist ad rulüütaman bejn ree,

⁴ najzaman bendxal. Din ruladxaman tildiidxaman abi' ni'quid xnejt rnieeman, dxel ni zëed gualnadëdloj, gual rdxe'ch, gual rniee diidxguijdx abi' ad rliładxtri lasa' reeman,

⁵ ad rucwëezt rdil reeman por ree ni ad rünjt sirv ni yu' guijc reeman gual ad ragbeet reeman ni naj diidxli, dxel naladx reeman gual chililadx reeman Jesucrist ma gac reeman ben rijcw. Bën naj ree zian, biquied loj reeman.

⁶ Dad ben rijcw naj bejn chi ma rliładxaman Jesucrist, per bën za' conform con ni rajptzaman.

⁷ Din achet budnë' ree loj guidxliuj ache tëët zajc yunë' ree chi yayëjt ree.

⁸ Bal raya'p ree ni yadaaw ree në lajd ni yadojt ree con laan rayał yaya'n ree conform.

⁹ Per ree bën rzëëbladx gac reeman rijcw loj guidxliuj guie ad rıle't sudxi'ch reeman, laa rünj gajc xindxab laa reeman gan. Mazri rünj reeman xgab ni ad rünjt sirv abi' rünj reeman ni ad rayalt güün reeman ni rünj persi rnijt reeman.

¹⁰ Din gual rzëëbladx milia laan naj xliuj gra ni mal. Abi' yu' reeman por gualrzëëbladx guin ma basa'n reeman ni rliładx reeman Dios abi' laagajc reeman cusagdiaj laa reeman.

Ni rayal güün Timoteo

¹¹ Per lüj Timoteo, xbejn Dios, briica loj ree ni mal guin. Been naguiejn guibanl zagdxe, guibanl zi'c rën Dios, bililadxaman, gojc Bén naxanladx, gojp pacens guyën tée ree ben ren.

¹² Been da't naguiejn guzudxi'ch loj ni rliladxil xtiidx Jesucrist. Ad gusëebil guialnaban ni naj guialnaban tiblyaaa, din par zian gulejman lüj abi' rëbil delant loj zien ree bejn xhienaag rliladxil Jesucrist.

¹³ Yan, por Dios Bén razaladx guialnaban loj gra ni yu' loj guidxliuj në por Jesucrist Bén ni gunee sin guialrdxeb loj Poncio Pilato, naj rniabee lüj

¹⁴ din guzoobil diidx güünl ni rnin lojl, sin guial guchaal xhienin chitëe guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb.

¹⁵ Gui'taman dxej ni nabee Dios gui'taman, Dios Bén rayal respejt Bén naj tijbzi Dios rajp tëëman gra guialrniabee, Bén naj xrey ree rey naj tëëman xDad ree dad.

¹⁶ Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc tëët guguaa bejn laaman. ¡Par laaman naj respejt në guialrniabee par tiblyaaa! Amén.

¹⁷ Bén naj ree benrijcw loj guidxliuj guie, güjdx loj reeman ad güün reeman benro' ad cu'guijc tée reeman guial ni rajp reeman najn par tiblyaaa, din guialnaza'c ni rajp bejn yu' dxej yaran. Mejrli cu'guijc reeman Dios Bén naban din laaman razaladx da't dunuj ree graloj din chu' du luxdoo ree nix.

¹⁸ Güjdx loj reeman din güün reeman ni zagdxe, güün reeman zien ree ni rüjn sirv, cu' tée luxdoo reeman zagdxe güün reeman yudar Bénprob ree.

¹⁹ Abi' zian guto'p reeman guialnaza'c ni güün laa reeman yudar loj ree dxej ni zëed din yalay reeman guialnaban tiblyaaa xanyabaa.

Xconsejw Pab

²⁰ Timoteo, badxe'guijc ni rayal güünl, Ad guidxga'l diidxdxuudx ree xcwent ree ni ad rüjnt ree sirv, ni'qui ree diidx rusquiee, ni'qui ree diidx ni rü ree Bén ni naladx guial rajc da't reeman abi'za ad walit ni rajc reeman.

²¹ Din yu' ree Bén rüjn zian yan, abi' ma basa'n reeman guialrliladx reeman Dios.

Dios güünle' lüj Timoteo. Amén.

Gui'ch barojp guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xi apóstol Jesucrist, Dios gule naj din gatiechan diidx por promeys ni beenman guial gudëédaman guialnaban tiblayaa loj ree bën rliiladx Jesucrist.

² Naj caxhal gui'ch guie par lüj Timoteo bën rënan zi'c da xi'nän. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

Guialrülüü xcwent Jesucrist

³ Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bën rünan sirv con guidib luxdon zi'c been ree da bengol gulalan been reeman laaman sirv.

⁴ Chi rusaaladxan ni biinl, ma rën nejzdoon guguan lüj din yayu luxdon zagdxe.

⁵ Yu'guican guial lüj diidxli rliiladxil Jesucrist, yaloj xnaxüsil Loida con xniaal Eunice bililadx laaman zian, zeel ragbeechaawan guial ziangajc rliiladxil laaman.

⁶ Zeel rnin lojl, been naguiejn din guiguien quiarguiejn ni banee Dios lojl chi badxib yan guijquil.

⁷ Din ad baneet Dios xSprijtaman duloj ree par yadxeb ree, banee xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdxe.

⁸ Zeel ad yatul guinieel xtiidx Dad Jesucrist, ad yatu nëtëël naj yu'n ladxguuib por laaman, con xyudar Dios gudaan guialzi ni rayal tädil guial gutie'chil xtiidxza'c Jesucrist.

⁹ Din Dios ma beenman perdon dux tol ree abi' ma gulejman dunuj ree din yabajn ree zi'c rënan, ad por ni baguient ree, diidx chi gad guidxliuj gacchaaw beenman xgab guial por Jesucrist gulüüman dunuj ree xhienaag rënan dunuj ree.

¹⁰ Yan bi't Jesucrist bën güt por dux tol ree, rayagbee ree guial diidxli rën Dios dunuj ree. Abi' Jesucrist naj bën biquied guialrniabee loj guialgüjt abi' zian biguien guial yu' guialnaban, guialnaban tiblayaa par ree bën rliiladx xtiidxaman.

¹¹ Zeel gulej Dios naj din gacan xi apóstol Jesucrist, din ganen xtiidxaman gulü tëën laan bën ad najt ree bën Israel,

¹² abi' por zian cadëëdan guialzi ni cadëëdan. Per ad ratutan por zian, din naj ragbee chu rliiladxan, abi' ragbeen guial laaman rajp guialrniabee par cu'chaawaman ni basa'nän lojman xt dxej ni gui'taman stijb.

¹³ Badxe'guijc binal tëë ree diidxza'c ni ma balün lüj, tant zi'c rliiladxil Dios në zi'c rën ree lasa'l guial ma nayajc ree tijbzi con Jesucrist.

¹⁴ Abi' con xyudar xSprijt Dios bën naban con dunuj ree, gojp ni banee Dios güünl.

¹⁵ Lüj ragbee guial gra ree bën zojb niz Asia ma gulëëladx reeman naj, loj reeman no'ch Figelo con Hermógenes.

¹⁶ Dios gagnë ree xfamil Onesíforo, din laaman dád zien volt bagu'man luxdon. Abi' ad batunëtaman naj yu'n ladxguuib,

¹⁷ naabzi bi'taman Rom baguüilaman naj xt lodzi badxejlanan naj.

18 Abi' lüj ragbee guial dád beenman dunuj ree yudar chi badxu' ree Éfeso. Xi nix chi gui't Dad Jesucrist stijb, yaya da'taman laaman.

2

Zi'c tijb xsuldad Jesucrist

1 Gui'ad lüj xi'ngaan, guzujdxi'ch loj yudar ni raya'p ree por Jesucrist.

2 Abi' ni bigueijnl rën delant loj zien ree bejn, balüün loj ree bën diidxli rliadax, bën ni zajc gulüü ree ben ren.

3 Zi'c tijb suldadza'c, zian gudaan ree guialzi, zi'c najl xbejn Jesucrist.

4 Ni'qui tijb bën naj suldad ad rut loj ni ad najt xcwent ree suldad par chile' yaya'nman zagdx ree bën rniabee laaman.

5 Ziangajc bën ni rguijt xhie tijb nin, rayal quitaman xnejz din chile' tia'man prem.

6 Abi' bën rüjn dxiin dajn, yalaj xgaj rüjn da'taman dxiin din gac yaca'man guialnaza'c.

7 Been xgab ni canin lojl, abi' Dad Jesucrist gagnë lüj din chignia'l gra.

8 Basaaladx Jesucrist, bën güt abi' babanman, bën zëed loj xdiaa rey Davi, zian naj xtiidxza'caman ni catiechan.

9 Abi' por zian cadëedan guialzi, xt naxiin lën ladxguiib zi'c tijb benmal, per xtiidx Dios ad naxiitan.

10 Zianan zeel rdaanan gra par gūnan yudar bën ni ma naj ree par Dios, din gap reeman perdon por Jesucrist yaya' tēē reeman guialnaban za'cdxoon ni naj par tiblayaa.

11 Waliqū ree diidx ni rëb:

Bal ma bayëjt ree con laaman,

ziangajc yabajn ree con laaman.

12 Bal radaan ree xhietëez ni raza'c ree,

ziangajc yanabee ree con laaman.

Bal raguie'ch ree guial ad naguieenbeet reeman,

ziangajc guiëbaman guial ad nūnbeetaman dunuj ree.

13 Bal id raguieen ree cumplid dux tiidx ree,

per laaman rüjn cumplid xtiidxaman

din ad zajct guidxaa zi'c najman.

Tijb bën raya'n zagdx con xchiin

14 Güjdx loj ree bejn din gusaaladx reeman ni guie ree, abi' por Dios güjdx loj reeman guial ad rdliidix reeman por ree ni ad rüjnt yudar, ruxhiinzan bën ni riguiejn ree laan.

15 Been xt lod chile' güünl din yaya'n l zagdx ree loj Dios, din chibiguil lojman zi'c tijb bën ni rüjn dxiin abi' achet ni gustu laaman, guial cayüjnl xnejz con xtiidx Dios.

16 Ad gü l diidx ni ad rüjnt sirv, ni ad rüjnt yudar bejn ree. Din bën rüjn ree zian zi'cri zinal reeman nejz mal,

17 abi' xtiidx reeman naj zi'c tijb guialguijdx ni rigaa. Lasa' ree bën guin naj Himeneo con Fileto,

18 din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rüjndxa reeman xguial-rliadax tio'p choon ree bejn.

19 Per xtiidx Dios ad zajct guidxaa zi'c tijb guiaj ni zojbdxi'ch. Abi' loj xtiidx Dios rëb: "Dios nūnbee bën naj ree xbejnman", rëb tēē loj xtiidxaman:

“Graczi ree bèn rëb guial nünbee reeman Dios rayal gusa'n reeman gra ni mal.”

²⁰ Lën tijb yu narooB, ad ganaxt ree ni or yu' o ni plajt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tée reen ma naj dxej rüjn reen sirv.

²¹ Yan ziangajc bën ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdxe.

²² Zeel basa'n xixgab xinguiag, xgab ni ad rüjnt sirv, gubajn xnejz. Binal guialrliladx, guialrën lasa' në guial yabedxe luxdoo con los demasri ree bën ni con guidib luxdoo rbejdx rniab Dad Jesucrist.

²³ Ad tildiidxil por tijb ni ad züjntil gan, o por tijb ni ad lasajct par tildiidxil, din lüj ragbee guial por zian rzuloj wadijl.

²⁴ Abi' tijb bën ni rüjn sirv Dad Jesucrist ad rayalt gacaman bën ruladx wadijl, rayal gacaman benza'c con chutëéz, rayal gacaman tijb bën ni gac guluü ree bejn, gacaman bën pacens

²⁵ guzuxnejz tëeman con ree diidzxadxe bën ni rüjn ree xcontr ni naj diidxli. Abi' rupent zian güün Dios guial yayüjn reeman xgab din gagbee reeman ni naj diidxli.

²⁶ Par laa reeman loj xtramp xindxab ni rniabee laa reeman güün reeman ni rënman.

3

Xhienaag gac ree bejn dxej ni bigra ree

¹ Rayal tée gagbeel Timoteo guial dxej ni bigra ni zëed ree, dád nawëég gacan par ree bejn guial guiban reeman.

² Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdal guiniee reeman, guinieeguijdx reeman Dios con ree bejn. Ad zuzooBtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios,

³ ad zëntri reeman ad zaya tëetri reeman bejn ree. Ganax diidx rusquiee guiniee reeman bejn ree, ad zucwëézt güün reeman ni dxuudx ree, dád bën nayaaladx gac reeman, abi' guidxe'ch reeman ni naj zagdxe.

⁴ Yayü reeman laagajc ree bën ni rajp laa reeman confians, sin guialrdxeb guiniee reeman xhietëéz ni gui't guijc reeman, dád guillies xvalor reeman, mazri ma güün reeman ni rëntzi reeman guial loj zi'c rën Dios.

⁵ Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bën ni naj ree zian.

⁶ Din loj reeman no'ch bën ni ru ree lidx ree bejn, abi' rüjn reeman gan béngunaa ni naban ree con gadxagayaa ree dol, con gadxagayaa ree xgab ni ad rüjnt sirv, tibrajtzi rliladx reeman laa reeman

⁷ béngunaa guin ree zianczi rusiid reeman, per ad ragbeetci reeman ni diidxli.

⁸ Gulal bën ni brii ree laj Janes con Jambres bejn xcontr reeman Moisejs. Yan ziangajc naj ree bën ni za' ree contr ni naj diidxli, laa reeman ma guxin xquiaguiejn reeman, ad zinaltri reeman zi'c rayal chililadx reeman.

⁹ Per ad xchejt güün reeman zian, din gra ree bejn gagbee guial rusquiee reeman zi'c goc con Janes në Jambres.

Rniabee Pab sudxi'ch Timoteo loj ni basiidaman

¹⁰ Per luj Timoteo, ragbeel zagdxe xhie rulun bejn ree, xhienaag naban, xhienaag naj da xgaban, xhienaag riladnan, xhienaag ra'pan pacens, xhienaag renan bejn ree, xhienaag rdaanan,

¹¹ xhie ma been ree bejn naj, xhie tee ree guialzi ma gudëedan. Luj ragbee xhienaag guza'can luguiedx Antioquia, Iconio con Listra. Dád ma guzaagdiajn por gra ni ma been ree bejn naj, per Dios babëe naj loj gra ree guialrzagdiaj guin.

¹² Abi' dunuj ree rayagbee guial gra ree ben ni ren guiban zi'c ren Dios guialriladnan reeman Jesucrist, naj sagdiaj reeman por ni guun ree bejn laa reeman.

¹³ Per ree ben mal con ree ben rusquiee, zi'cri zinal reeman nejz mal, rusquiee reeman bejn ree rusquiee tee laagajc reeman.

¹⁴ Per luj basnuu guzudxi'ch loj ni ma basiidil, ne loj ni ma riladnan, din luj ragbee chu ree nin basiid luj.

¹⁵ Abi' luj diidz xindool nunbeel xtiidx Dios, diidx ni zile' guun luj yudar gagbeel xhienaag naj perdon ni zeed por guialriladnan Jesucrist.

¹⁶ Gra ni zeed loj xtiidx Dios, por Dios zeedan. Abi' rujnan sirv par gusiid bejn bejn ree, par gudëe bejn consejw, par guzuxnejz bejn bejn ree, ne par gagbee bejn xhienaag rayal guibanman,

¹⁷ din gagbee xbejn Dios guidiblagaa din guunman graloj ni naj ni zagdxe.

4

¹ Delant loj Dios ne delant loj Jesucrist, ben gui't zi'c tijb rey par guunman guialguxtis loj ree ben naban ne loj ree ben ma gujt, naj rni lojl,

² gutie'ch xtiidx Dios. Been naguiejn gunee xtiidxaman ad chi yu'tzi mod. Been naguiejn chililadnan ree bejn ni rnieel, gudile ree ben ad ruzoob diidx, badëe tee consejw loj ree bejn, baluu reeman sin guial yalena'l.

³ Din zadxin dxej ad zatiëjbt ree bejn gucaagdiajg reeman ni naj diidxli, ma guun reeman zi'ctzi ren reeman, zaguiil reeman zien ree ben guluu laa reeman ganax ni ruladnan reeman gucaagdiajg reeman.

⁴ Ad zidxga'tri reeman ni naj diidxli, mazri ma guidxga' reeman ni rbëëgujic ree bejn.

⁵ Per luj Timoteo, gubajn nadëdguien, gudaan xhietëez guialrzagdiaj tedil, gutie'ch xtiidxza'c Jesucrist, been mandad ni banee Dios lojl guunl.

⁶ Din naj zamer gugujt reeman naj, ma zidbig guialgujt par naj.

⁷ Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal gunan abi' ad basa'ntan ni riladnan.

⁸ Yan prem ni rayalan ma cabëzan naj, prem ni gunee Dad Jesucrist lon chi guidxin dxej, ben rujn guialguxtis zi'c rayal. Abi' ad lotzan gunee man prem guin, ne loj gra ree ben yu' luxdoo nix cabëz reeman laaman.

Ni rayal guun Timoteo

⁹ Been naguiejn diob guidganajl naj,

¹⁰ din Demas ma guro'nladnan naj guial mazri ruladnan ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiaad Tito zëman niz Dalmacia.

¹¹ Tijbzi Lujc za' con naj. Chi gui'til tanë Marcw din zile' guunx yudar gutie'chix xtiidx Dios.

¹² Tiqico ma guxhalan laaman luguiedx Éfeso.

¹³ Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tëël guidnël da gui'ch reen.

¹⁴ Lejandr bën naj herrer, dád zien ree ni mal ma beenman naj, per con Dios yaguijxaman gra ni beenman.

¹⁵ Gojp cudad con laaman, din laaman dád rüjn xcontraman ni ranee ree.

¹⁶ Yaløj chi guzun loj ree guxtis achutczí been naj yudar, graczi reeman guro'nladx naj. Gagnë Dios ad zidxga'taman ni been reeman.

¹⁷ Per Dad Jesucrist been naj yudar banee tëëman naj gojl persi baloox gutiechan xtiidxaman, persi biguiejn ree gra ree bën ad najt bën Israel laan. Zian baslaa Dios naj, zi'c rliaa tìjb bejn loj beedx.

¹⁸ Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. ¡Par laaman naj respejt gra tiamp në zianczi! Amén.

Diidx bigra ca loj gui'ch guie

¹⁹ Bagajpdioz Prisca në Aquila në ree xfamil Onesíforo.

²⁰ Erasto baya'nman Corinto, guiáad Trófimo ragxuuman basa'nan laaman luguiedx Mileto.

²¹ Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bën rliladx Jesucrist rugajpdioz reeman lüj.

²² Dad Jesucrist gagnë lüj, abi' Dios güünle' gradi. Amén.

Gui'ch guxhaal San Pabl loj Tito

Rxhiaal Pab xtiidx Dios

¹ Naj Pab cayünan Dios sirv, naj najn xiapóstol Jesucrist par günan yudar bén ma naj ree par Dios xhienaag chililadx reeman laaman din gagbee tëe reeman diidxli xhienaag guiban reeman delant loj Dios,

² din yu'guijc ree guial zian yaya'p ree guialnaban tiblyaa delant loj Dios. Diizd chi gad guidxliuj gacchaaw, rëbaman guial yazaladxaman guialnaban guin, abi' dunuj ree rayagbee ree zagdxe guial ad rnieet Dios diidx rusquiee.

³ Abi' chi bidxin dxej ni gule Dios guial gogbee ree bejn xtiidxaman laaman balüü xtiidx, abi' naj bayal catiechan xtiidxza'caman laan naj ni guxhaalaman naj günan, bén ni rüjn dux tol ree perdon.

⁴ Cuan gui'ch guie par lüj, Tito, guial najl zi'c da xi'nan guial tiblojzi raliduladx Jesucrist. Dux Dad ree Dios con Jesucrist bén güt por dux tol ree, yaya reeman lüj, güünle' reeman lüj yabe'cdxe tëe reeman luxdool.

Dxiin ni been Tito guiedx Creta

⁵ Naj basa'n lüj niz Creta din güünl ni ryaadx günan ni. Abi' tijbgaj luguiedx gucaabeel bén ni nabee ree loj ree xbejn Cristo zi'c ma rnin.

⁶ Chi gucaabeel laa reeman rayal gucaabeel bén ni naban ree zi'c rayal chitëe chu guinieeguijdx laaman, bén ni yu' tijbzi lacheel, rliidx tëe ree xi'nman Jesucrist, bén ni nünbee ree bejn guial ad nabant ree xi'nman zi'ctzi rën reex ad najt tëet reex xin rusagloj.

⁷ Din bén rajp guialrniabee loj ree xbejn Cristo, lojman riga' gra ni naj por Dios, zeel rüjn naguiejn guibanman zi'c rayal. Ad rayalt güünman xgab guial tijbzi ni guiëbaman güün sirv, ad rayalt gacaman bënralenya', ad rayalt gacaman bengui', ni'qui ben ruladx wadijl, ad zaguiil tëëtaman mod xhienaag tia'man xmilia ree bejn.

⁸ Rayal gacaman bén ni gudëe lidx yaya'n ree bejn chi rüjnan naguiejn, bén ruladx güün ganax ni zagdxe, gac tëe nabee laagajcaman. Rayal gacaman benza'c, guibanman zi'c rayal delant loj Dios në delant loj ree bejn, ad rayalt guibanman zi'ctzi rënman.

⁹ Rayal chinalaman diidxli ni ma basiidaman, din chile' gusiidaman bejn ree diidxza'c guin ree din guzuxnejz tëëman bén ni rnieeguijdx ree xtiidxli Dios.

¹⁰ Din dád zien ree bén ad ruzoobt diidx yu'. Ganax diidx rusquiee rniee reeman abi' rusquiee reeman bejn ree, abi' loj ree bén Israel ni rulüü ley loj reeman no'ch mazri lasa' ree ben guin.

¹¹ Lasa' ree bén guin ad rayaltri yatiëb ree gulüü reeman bejn ree, din dád zien ree yu ma beendxa reeman gra tijb famil guial rulüü reeman laa reeman ni ad rayalt naabzi par güün reeman gan milia.

¹² Tijb gajc bén ladx reeman bén rëb reeman naj bén badëe xtiidx Dios loj ree bejn, laaman rëb guial ree bén Creta ganax diidx rusquiee rniee reeman, dád nadoxh reeman, dád bén nala naj reeman abi' achetctzi rën reeman güün reeman.

¹³ Abi' waliman, zeel gudilë reeman con diidxdoxh din chile' chinal reeman xtiidx Cristo zi'c rayal,

¹⁴ ad guidxga'ri reeman ni rbëëguijc ree bén Israel, ad güün teë reeman ni rniabee ree bén ni ma guro'nladx ree ni naj diidxli.

¹⁵ Bén naya ree xquiarguejn, achet xgab mal rüjn reeman. Per ree bén rüjn ganax xgabdxuudx, bén ad rliladxt, achetdzi xgab zagdx ree rüjn reeman guial ad nayat xquiarguejn reeman, ganax ree xgab mal yu' guijc reeman.

¹⁶ Laa reeman rëb guial nünbee reeman Dios, per rëbzi reeman din ad rüjnt reeman ni rën Dios. Dád bendxuudx naj reeman rusagloj tée reeman, ni'qui tijb ni rüjn sirv ad rajct rüjn reeman.

2

Ni rayal gulüü Tito

¹ Per lüj Tito, balüü ree bejn gra zi'c tal naj xtiidxa'c Dios.

² Balüü ree bengol din guiban reeman zagdx, gustëdguien reeman din gap bejn laa reeman respejt, guidib luxdoo reeman chililadx reeman, guiën reeman bejn ree, taan tée reeman xhietëz ni sac reeman.

³ Ziangajc ree béngunaa bengol rayal guiban reeman zi'c rayal guiban ree xbejn Cristo. Ad rayalt gü reeman xtiidx bejn, ad gac reeman bengu'. Rayal gulüü reeman bejn ree xhienaag naj ni zagdx,

⁴ rayal gulüü reeman béngunaa guiaj ree din guiën lacheel reeman con xi'n reeman,

⁵ din guiban tée reeman naya delant loj Dios, nadëdguien, guinia lidx reeman, gac reeman benza'c guzoob tée reeman xtiidx lacheel reeman chitëe chu guinieeguidx xtiidx Dios.

⁶ Ziangajc lüj Tito, badëe consejw loj ree xinguaaw guiaj din guiban reex nadëdguien.

⁷ Been naguejn din güünl gra xnejz din guguaa reex xhienaag güün reex ni naj zagdx. Chi rülüül laa reex, balüü reex zagdx zi'c rayal,

⁸ con ganax ree diidx zagdx chitëe xhie gudxiib ree bejn guijquil, din yaya'nxtu ree bén ni rdxe'ch dunuj ree guial achet yadxejl gudxiib reeman dugujc ree.

⁹ Badëe tée consejw loj ree bén naj ree mojs din guzoob gra xtiidx xpatron reeman, gac reeman benza'c ad yadxi'ro' reeman.

¹⁰ Ad cwan reeman xhie xieen xpatron reeman, gac reeman bén confians din guguaa gra ree bejn xhienaag naban reeman guial niza'cdxoon naj xtiidx dux Dad ree Dios bén rüjn dux tol ree perdon.

¹¹ Abi' Dios ma balüüman plact rënman dunuj ree, abi' guial rënman dunuj ree zile' gac gra ree bejn perdon.

¹² Guial rënman dunuj ree rayagbee ree guial rayal yasa'n ree ni mal con ree ni ad rüjnt sirv ni rayën ree yagueen ree loj guidxliuj guie, din yabajn ree nadëdguien, zi'c rayal, zi'c rën Dios yabajn ree loj guidxliuj guie

¹³ la'tgaj caylëz ree dxej za'cdxoon ni gac cumplid xtiidxa'caman zi'c ma naman duloj ree guial gui't dux Dios ree Dad Jesucrist con xgualrniabee-man, bén been perdon dux tol ree.

¹⁴ Laaman gü't por dunuj ree din yabëëman dunuj ree loj gra dol abi' basiaman dunuj ree din yayajc ree xbejnzaman abi' yagueen ree naguejn yagueen ree ganax ni zagdx.

¹⁵ Gra ni ma rnin lojl balüün laa reeman sin gualrdxeb badëed reeman consejw, bazuxnejz reeman con gualrniabee ni ca'l. Ad tiëbil gusagloj reeman lüj.

3

Ni rayal güün ree bén rliladx Jesucrist

¹ Basaaladx reeman din güün reeman ni rëb ree bën rniabee laa reeman nē ni rëb ree guxtis, gac reeman bën nacaagdiajg susin tēē reeman par güün reeman ni naj zagdxē.

² Ad guinieeguijdx reeman bejn ree, ad quuil reeman wadijl, gac reeman benza'c nē bēnchaawladx con chutēēz bēnan.

³ Gocli nēgajc dunujn baguieenan zi'ctzi bayēnan, ad bazoobtan diidx, badxu'n loj nejz mal, baguieenan ni bayēntzan nē zi'ctzi naj dux xgaban. Baguieenan ganax ni ad najt zagdxē, bayajcan bēn nadēdloj, bidxe'ch ree bejn dunujn abi' badxe'ch gajcan laa reeman.

⁴ Per chi bidxin dxej dux Dad ree Dios bēn baguijx por dux tol ree, balüüman loj ree bejn guial najman benza'c rēn tēēman bejn.

⁵ Laaman been dux tol ree perdon, per ad guial baguieent ree xhie ni rüjn sirv, guial bayaman dunuj ree. Laaman basia dunuj ree yan ma nayajc ree naya delant lojman, abi' por xSprijtaman ma raya'p ree guialnaban cüb.

⁶ Por Dad Jesucrist bēn baguijx por dux tol ree, Dios bazaladx dunuj ree zro' da't xSprijtaman.

⁷ Dxel zi'cgajc laaman ma nulabaman dunuj ree sin dol guial najman benza'c, yayal ree guialnaban tiblyaa ni ralējz ree.

⁸ Laan naj diidxli. Zeel rēnan gusnuu gugojnl diidx guie ree bēn ni rliladx ree Dios din güün reeman naguiejn güün reeman ni naj zagdxē. Abi' nine ree naj ni zojbloj nē ni güün sirv par gra ree bejn.

⁹ Per ad guidxga'l diidx ni ad rüjnt ree sirv ni rniee ree bejn, ad guidxga'l xtiidx ree bēn ni ru ree xgab mazri chunin naj diidxli xdiaa gulal ree bejn. Ad guidxga' tēēl bēn ni rdildiidx ree por xley Moisejs, din ad najtan ni zojbloj achet tēēt lasajc ni rniee reeman, achetdzi sirv rüjn ree ni guin.

¹⁰ Bal por tijb lējt rzuloj rlia' lasa' ree xbejn Cristo, guneenēman tib volt o tio'p volt, abi' bal id ruzoobaman xtiidxil mejorli babēēman lojdi.

¹¹ Din lüj ragbee guial lasa' ree bēn guie ma guro'nladx reeman ni naj diidxli abi' laagajc reeman cunijt laa reeman por xtol reeman.

Ni rayal güün Tito

¹² Chi gaxhalan Artemas o Tíquico lod zojbil, been da't naguiejn tagnaj naj luguiēdx Nicópolis, din ni ma benan xgab gadēēdan tiamp nayaag.

¹³ Been tēē yudar Apolos nē licenciad Zena zi'ctzi gaquil. Badēē gra ni ryaadx reeman din chinal xnejz reeman chitēē xhie guiyaadx reeman.

¹⁴ Nē ree dux compniar ree rayal gusiid güün ni naj ni zagdxē, güün reeman yudar chi rüjn naguiejn güün reeman yudar chitēē guiban xlia'zi reeman.

Diidx bigra ca ree loj gui'ch guie

¹⁵ Gra ree bēn za' con naj rugajpdioz reeman lüj. Bagajpdioz sii gra ree bēn rēn dunujn por guialrliladx ni raya'pan. Dux Dad ree Dios güünle' gradi. Amén.

Gui'ch guxhaal San Pabl loj Filemón

1 Naj Pab, yu'n ladxguuib guial rtiechan xtiidx Jesucrist. Naj, në Timoteo raxhaalan gui'ch guie par lüj Filemón, nayajc ree compniar ratie'ch ree xtiidxaman, lüj ragbee rayën da'tan lüj.

2 Raxhaal tëën gui'ch guie par gra ree bën rliladx Jesucrist bën rado'p ree lidxil, në par Apia nètëë par Arquipo, bën naj dux compniar ree caytie'ch ree xtiidx Jesucrist.

3 Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rudëë Pab quixtëë loj Dios por Filemón

4 Beegaj chi rbedx rniaaban Dios rudën quixtëë lojman por lüj,

5 din ma cwa'n ruson guial dád rënrl rliladx tëël Dad Jesús dád rën tëël gra ree bën ma naj xbejn Dios.

6 Rniaab tëën lojman guial lüj cayüjnl dunujn yudar par yatie'ch ree mazri xtiidx Jesucrist, gusnuu gagbeel gra ni zagdxë ni raya'p ree guial ma nayajc ree tijbzi con Jesucrist.

7 Dád nix yu' luxdon rabaa tëën guial rënrl dux compniar ree bën rliladx ree Jesucrist, dín por lüj bijch ma bayu luxdoo reeman zagdxë.

Rniee Pab por Onésimo

8 Zeel majsi ra'pan guialrniaabee par ganin conin rayal güünl guial najn tijb xi apóstol Jesucrist,

9 per guial rayën du lasa', zagdxeli rniaaban lojl, naj Pab, ma najn tijb bengol abi' yan yu'n ladxguuib guial rtiechan xtiidx Jesucrist,

10 rniaaban lojl por Onésimo, bën naj zi'c da xi'nan guial ma bililadxaman xtiidx Jesucrist ni ben lojman lën ladxguuib guie.

11 Gocli achet sirv been Onésimo lüj, per yan zi'c rüjnman naj sirv ziangajc güünman lüj sirv.

12 Yan caydxi'n laaman lidxil, gunajchi'man zi'c rniajchi'l naj.

13 Guyënan nizujman con naj dín nünman naj yudar luar lüj, la'tgaj yu'n ladxguuib guial rtiechan xtiidx Jesucrist.

14 Per ad guyëtan nünan xhienin sin xtiidxbeel din xhietëëz favor güünl por naj ad züjntilan naguiejn, güünlan guial guiënl.

15 Bal brieri Onésimo lidxil tıbladëd, per gojc zian din chile' sunëman lüj tıblayaa,

16 per ad zi'ctri tijb mojs, mazri zagdxë guial loj tijb mojs, zi'c tijb bijchil bën rënrl. Dád rënan laaman, per lüj rayal guiënl laaman mazri ad zi'ctzi tijb bejn, rayal guiënl laaman zi'c tijb bijchil por Jesucrist.

17 Yan bal walil nayajc ree compniar por Jesucrist, baca' Onésimo gunaladx naj gajcan.

18 Bal yu' xhie beenman lüj, o bal yu' xhie ralaman lojl, naj yaguix laan.

19 Abi' naj Pab, quijb naj cuca diidx guie ree: Naj yaguixan, majsi rulüü ad rüjnt naguiejn ganin lojl dín gusaaladxil guial xt xguialnabanl ralil lon.

20 Yan been naj favor guin guial rënrl Jesucrist, zian bagu' luxdon guial nayajc xbejn Jesucrist.

21 Naj caxhal gui'ch guie lojl abi' ragbeechaawan guial guzoobil da diidxan, ragbee tëën guial mazri naj ni güünl guial loj ni canin lojl.

²² Been tëë porvinid lënü lidxil lod yaya'nan, din zi'c cabejdx canabidi Dios, ragbeen tiëbaman guidganan lëjt.

Diidx bigra ca ree loj gui'ch guie

²³ Epafra, bën yu'në'n ladxguiib guial ratie'chan xtiidx Jesucrist, rugajpdiozaman lüj.

²⁴ Nëgajc Marcw, Aristarco, Demas në Lujc, bën cayüjn gajc ree naj yudar caytie'chan xtiidx Jesucrist në reeman rugajpdioz lüj.

²⁵ Dad Jesucrist güünle' lëjt.

Gui'ch par ree bèn Hebreos

Ma gunee Xi'n Dios xtiidx xDadaman

¹ Tiamp gulal, Dios guneenë ree dux béngulal ree zien volt në gadxagayaa mod por ree bèn badëë xtiidx Dios loj ree bejn,

² per yan ma guneenëman dunuj ree por Xi'nman. Dios been gra ni yu' xanyabaa në loj guidxliuj, por Xi'nman. Abi' gra basa'n loj Xi'nman.

³ Laaman naj xbacha' za'cdxoon Dios, laaman naj zi'cgajczi naj Dios. Abi' laaman naaz gra ni yu' por gualrniabee ni rajpaman.

Xi'n Dios naj mazri bèn zobjloj guial loj ree anjl

⁴ Zianan zeel laaman naj mazri bèn zobjloj loj ree xianjl Dios din laaman naj quijb Xi'n Dios. Chi gulox guzajcaman ni guzacaman par yayajc ree naya por dux tol ree, dxel gurejman xanyabaa xladbee xDadaman Dios bèn rajp gra gualrniabee

⁵ Din ad yu't dxej rëb Dios loj ree anjl:
Lüj naj da xi'nan,

abi' diizd yan gulün guial lüj naj da xi'nan.

Achut tëët loj anjl rëbaman:
Naj gac Xdadil, abi' lüj gac da xi'nan.

⁶ Per chi guxhaal Dios Xi'nman loj guidxliuj, Xi'nman bèn rajp gualrniabee zi'cgajc laaman, dxel rëbaman:

Gra ree da anjlan,
gol guyën da Xi'nan, gol gojp tëëman respejt.

⁷ Abi' chi gunee Dios por ree anjl, rëbaman:
Naj rün ree da anjlan zi'c bi, rün tëën laa reeman zi'c bajl.

⁸ Per por Xi'nman rëbaman:
Dad Dios, xgualrniabeel naj par tiblayaa,
abi' guidib tiamp nabeel zi'c rayal.

⁹ Lüj ruladxil ni naj zagdxe
abi' rdxe'chil ni mal.
Zeel Dios bèn naj xDiosil
baneeman lüj mazri guial rabaa guial loj gra ree bèn za'nël.

¹⁰ Rëb tëëman:
Dad, diizd yaloj lüj been guidxliuj në xanyabaa
con gra ni yu' loj reen.

¹¹ Gra reen yu' dxej nit reen,
per lüj ma nabanl tiblayaa.
Gra reen yayox zi'c tijb lajd,

¹² gusie'til laa reen zi'c rusie't bejn xabaman,
abi' zuchaal laa reen zi'c ruchaa bejn xabaman,
per lüj ad yu't dxej guidxaa zi'c najl
abi' zianczi gapil guialnaban.

¹³ Ad yu't dxej rëb Dios loj tijb ree xianjlaman:
Gurej da ladbeen xt gūnan gan nabeel bèn rdxe'ch ree lüj.

¹⁴ Din gra ree anjl naj sprijt cayüjn ree sirv loj Dios, abi' rxhiaalaman laa reeman din gūn reeman yudar bèn ni gap ree guialnaban tiblayaa delant loj Dios.

2

Ad yasa'n ree diidx ni yabëë dunuj ree loj dol

¹ Zeel rüjn naguiejn yayidxga' ree xtiidx Dios ni ma bacaagdiajg ree chitëë yasa'n ree xnejzaman ni ma zunaal ree.

² Din zi'c goc cumplid gra xtiidx Dios ni gunee ree anjl diizd gocli, bën ad bazoobt diidx, bën been ree dol, laa reeman bayal casti ni rayal reeman.

³ ¿Xhieza naag laa ree loj casti bal në dunuj ree ad zayidxga't xtiidx Dios ni rugojn dunuj ree par yayajc ree perdon? Awa laagajc Dad Jesucrist bagojn xcwent perdon guin diizd yaloj, abi' ree bën biguiejn laan, laa reeman bagojn dunuj ree.

⁴ Yan zi'c ma cwa' bejn gualrignia' rent gualrignia' ren por xSprijt Dios zi'c naj xixgabaman, abi' por ree sen në ree milagr con los demazri ree ni radxaloj bejn, zian ma balüü Dios guial ni diidxli naj ree diidx guin.

Jesucrist rabëë bejn loj dol

⁵ Dios ad badëëtaman gualrniabee loj ree xianjlaman par nabee reeman lod yaya'p ree gualnaban cüb ni cayza't ree,

⁶ din yu' tiblajt loj xtiidx Dios lod rëb bejn:

Dios, ¿chu naj bénguidxliuj zeel rusaaladxil laaman?

¿Chu naj xi'n bénguidxliuj zeel rüjnl xgab por laaman?

⁷ Guyu tijb tiamp ni baletil xi valoraman guial loj ree anjl.

Per despuejs ma beenl laaman bën zojbloj,

badëël gualrniabee lojman din nabeeman gra ree ni beenchaawil,

⁸ abi' gra basa'nl lojman.

Chi badëë Dios gualrniabee lojman par nabeeman gra, achetctzi ni baya'n ni ad zanabeetaman majsi dunuj ree sta ad cayguiaat ree guial nabeeman gra.

⁹ Per dunuj ree rayagbee guial guyu tiamp ni balet Dios xvalor Jesús guial loj ree anjl. Yan ma ca'man gualrniabee abi' rajp bejn laaman respejt por guialzi ni gudëdaman chi gütaman por gra bejn, abi' zian gojc guial rën Dios dunuj ree.

¹⁰ Por Dios yu' gra, abi' laaman rniabee gra ni yu', abi' rënman chu' zien ree xi'nman xanyabaa. Zeel por guialzi ni gudëd Jesucrist bayaaloj bazoobaman xtiidx Dios, abi' tijbzi por laaman ma zajc yaya'p ree perdon.

¹¹ Bën ma naya ree delant loj Dios, por Jesucrist naya reeman. Abi' tant Jesucrist tant ree bën ma naya por laaman, tijbzi Dios naj xdad reeman. Zeel ad ratut Jesucrist rëbaman loj reeman: Da bichan.

¹² Zi'c ca tib lajt loj xtiidx Dios lod rëb:

Gün diidx loj ree da bichan xcwentil,

abi' chi yadxaag lasa' reeman golan

cant ree ni guza't lüj zagdx.

¹³ Rëb tëëman:

Tijbzi Dios yu'guican gagnë naj;

abi' rëbaman:

Laa naj guie con ree da xi'nman xin bazaladx Dios naj.

¹⁴ Abi' zi'c bénguidxliuj tibloj najman rejn con bëë, ziangajc gojc Jesucrist chi bi'taman loj guidxliuj persi gojc gütaman, abi' por xgualgütaman beenman gan loj gualrniabee ni gop xindxab loj gualgüt.

¹⁵ Zian beenman persi babëëman bejn ree loj gualnadxeb xieen gualgüt, bën ni guidib tiamp ni naban reeman rdxeb reeman gualgüt zi'c rdxeb bejn xpatronman.

¹⁶ Din laaman ad bi'ttaman loj guidxliuj par gagnëman anjl ree, bi'ttaman par gagnëman bèn naj ree xdiaa Abraham.

¹⁷ Zeel gojcaman zi'cgajczi bénguidxliuj, persi bidxin dxej gojcaman tijb bixhioz zobjloj delant loj Dios, bixhioz ni raya bejn, bèn rüjn tée cumplid xtiidx Dios persi gojc gudijxaman por xtol ree bejn.

¹⁸ Abi' guial laagajcaman guzagdiaj been tée xindxab guial ad zuzoobta-man xtiidx Dios, zeel laaman zajc gagnë ree bèn ni cayün xindxab naguiejn güün reeman dol.

3

Jesús naj mazri bèn zobjloj guial loj Moisejs

¹ Zeel compniar, lëjt guial ma najdi xbejn Dios, lëjt guial ma bacaabeeman lëjt par gaquidi xi'nman, gol badxe'guijc Jesucrist guial laaman naj bixhioz zobjloj, bèn raliduladx ree, bèn guxhaal Dios loj guidxliuj.

² Din Jesucrist bazoobaman xtiidx Dios bèn bacaabee laaman zi'c bazoob Moisejs xtiidx Dios delant loj ree bèn Israel.

³ Per mazri rayal Jesucrist respejt guial loj Moisejs guial mazri zobjlojman, zi'c tijb bèn ni rüjn yu mazri ruza't reeman laaman zagdxe guial loj yu guin.

⁴ Gra yu yu'czi tijb bèn rüjn laan, per Dios laaman been gra ni yu'.

⁵ Abi' Moisejs bazoobaman xtiidx Dios, beenman sirv lojman chi badëedaman xtiidxaman loj ree bèn Israel persi bagojnman laa reeman ni rëb Dios.

⁶ Per Jesucrist guial najman Xi'n Dios, laaman rniabee loj gra ree xbejn Dios. Abi' dunuj ree nayajc ree xbejn Dios bal yasnuu yadxu'dxi'ch ree loj ni raliduladx ree laaman sin guial yalenyä' ree abi' yalëéz ree xt dxej bigra.

Gol guzujdxi'ch loj xnejz Dios

⁷ Zeel, zi'c rëb xSprijt Dios:

Bal rucaagdiajguidi xtiidx Dios yan dxej,

⁸ ad cwexuudi zi'c been ree bèn ad bacaagdiajgt xtiidxaman chi been reeman laaman prueb chi guzu reeman loj yujbidx.

⁹ Abi' yagaj naj lod ad bacaagdiajgt ree xbéngulalidi xtiidx Dios majsi baguiaa reeman milagr ni beenman delant loj reeman loj tiuu ijz niz loj yujbidx.

¹⁰ Zeel bidxe'ch Dios bèn guin ree, abi' rëbaman: "Xgab ren rüjn reeman, ni'quid rüjnt reeman naguiejn din gagbee reeman xhienaag rënan güün reeman."

¹¹ Zianan zeel bidxe'ch Dios abi' rëbaman guial ad yu't dxej gap reeman xguialraziiladx Dios.

¹² Zeel gol gojp cudad compniar raliduladx ree Jesucrist, chitéë chu' tijbidi guial por xixgab malidi ni rudxoon chililadxidi, guibi'cadi loj xnejz Dios bèn naban.

¹³ Mejrli guixie guixie gol guneenë gol badxe' tée luxdoo ree lasa'di naga yu' tiamp, chitéë ad zuzoobtridi xtiidx Dios guial ma been dol lëjt gan.

¹⁴ Din bal ma nayajc ree xbejn Cristo, zianczi rayal yadxu'dxi'ch ree loj ni raliduladx ree laaman zi'c baliduladx ree laaman diisd guia'xchej.

¹⁵ Abi' zi'c ma rnin lojdi, loj xtiidx Dios rëb:

Bal rucaagdiajguidi xtiidx Dios yan, ad bal gaquidi nad zi'c goc ree bèn ad bazoobt xtiidx Dios gocli.

¹⁶ Abi', ¿chuzä ree nin ad bazoobt xtiidx Dios majsi biguiejn reeman ni gunee-man? ¿Nid bèn Israel ni babëë gajc ree Moisejs Egipton ya?

¹⁷ Abi', ¿nid laagajc reeman bidxe'ch Dios loj tiuu ijz ya por dol ni been reeman abi' zien reeman güjt loj yujbidx?

¹⁸ Abi', ¿nid bén guin gajc reen rëb Dios loj ya guial ma beenchaawaman xgab guial ad zut reeman lod gap reeman xguialraziiladxaman, guial ad bazoobt reeman xtiidxaman?

¹⁹ Zian rayagbee ree guial ad gojpt reeman gualraziiladx guin guial ad bililadxt reeman ni rëb Dios loj reeman.

4

¹ Zeel yan guial sta raya'p ree promisejs ni been Dios guial yaya'p ree xguialraziiladxaman, rayal yaya'p ree cudad chitéë awa raya'p ree promisejs guin yaya'n tijb dunuj ree guial ad zaya'pt ree gualraziiladx guin.

² Din dunuj ree ma bacaagdiajg ree xtiidxa'c Jesucrist zi'cgajc laa reeman, per laa reeman achet sirv been guial bacaagdiajg reeman diidx guin ree, guial ad bililadxt reeman laan.

³ Per dunuj ree guial ma baliduladx ree xtiidx Dios, ma raya'p ree gualraziiladx guin, sa'n por ree bén ad bililadxt rëb Dios:

Guial bache'ch reeman naj zeel ma benan xgab guial ad zajpt reeman da gualraziiladxan.

Diisd chi gule'cchaaw Dios guidxliuj baloox xchiinman,

⁴ zi'c rëb loj xtiidxaman por dxej ni raziiladx bejn:

Chi gulox been Dios gra xchiinman

dxel ni goc gajdx dxej baziiladxaman.

⁵ Per par ree bén ad bazoobt xtiidxaman rëbaman:

Ad yu't dxej gap reeman da gualraziiladxan.

⁶ Bén biguiejn ree xtiidx Dios yaløj, ad gojpt reeman gualraziiladx guin guial ad bazoobt reeman xtiidxaman, per sta yu' ree bén ryaadx gap gualraziiladx guin.

⁷ Zeel chi gudëd zien ijz, Dios gulëëca zatijb dxej ni naj yandxej. Abi' zi'c ma rnin guial rëb rey Davi tib lajt loj xtiidx Dios:

Bal rigujejndi xtiidx Dios yandxej,

gol bazoob xtiidxaman.

⁸ Din bal por Josué niajp ree bén Israel gualraziiladx, ad nuza'tt Dios zatijb dxej.

⁹ Zeel xt yandxej yu' gualraziiladx guin par ree xbejn Dios.

¹⁰ Din bén rajp xguialraziiladx Dios, raziiladxaman xieen gra xchiinman zi'c baziiladx Dios chi gulox been xchiinman.

¹¹ Zeel rayal yaguieen ree naguiejn yaya'p ree gualraziiladx guin, chitéë chu güün zi'c been ree bén ad bazoobt xtiidx Dios.

¹² Din xtiidx Dios nabanán rajp tëën gualrniabee. Mazri rëëzan guial loj tijb espad ni nadoxh grop lad, rëëzan lën luxdoo bejn në lën xsprijtaman. Xt lën dxijt në lën yob rëëzan, abi' por laan ragbee bejn bal ni mal o ni zagdxe naj ni rënman güünman.

¹³ Achetzi ni been Dios zajc guiguie'ch lojman, din gradooczan ruguiaaman, abi' lojman naj yadëed ree cwent.

Jesús naj bixhioz mazri zojbloj

¹⁴ Zeel guial ma raya'p ree bixhioz ni mazri zojbloj, abi' laaman naj Jesucrist Xi'n Dios, bén ma zojb xanyabaa, rayal yasnuu yadxu'dxi'ch ree loj ni raliladx ree laaman.

¹⁵ Din Jesucrist bén naj dux bixhioz zojbloj ree laaman zajc gagnë dunuj ree chitéë güün dol dunuj ree gan. Din në laaman guzajc graløj zi'cgajc cayza'c ree, per laaman ad yu't dxej beenman dol.

¹⁶ Zeel con confianz ma zajc yabiig ree loj Dios yarejdx yanaab reeman, bèn rën dunuj ree par yayaman dunuj ree. Abi' guial rënman dunuj ree, laaman gagnë dunuj ree loj hor ni yayën ree chu güün dunuj ree yudar.

5

¹ Gra bèn rajc bixhioz mazri zobjloj, Dios gulej laaman loj ree bejn persi rbejdx rniabaman Dios por ree bejn. Abi' lojman rudëë bejn gon par Dios në ree be ni guiët por ree xtol ree bejn.

² Abi' guial bénguidxliuj gajc naj bixhioz guin, zeel ragbeeman xhienaag rzajc bejn. Zeel rile' rajpaman pacens bèn ni ad ragbeet xhienin rüjn, në ree bèn ad zinalt xnejz Dios.

³ Abi' guial yu' chi rüjn bixhioz guin dol zeel nëman rugüjt tijb be zi'c gon par Dios por xtolaman, zi'cgajc rüjnman por ree bejn.

⁴ Abi' achut zajc guiëb guial gacaman bixhioz zobjloj, Dios naj bèn rbe laaman zi'c guleman Aarón.

⁵ Ziangajc gojc con Jesucrist, ad laataman rëb guial gacaman bixhioz zobjloj par dunuj ree, Dios bacaabee laaman, chi rëbaman:

Lüj naj da Xi'n'an, abi' diidz yan
gulün guial lüj naj da Xi'n'an.

⁶ Ziangajc rëb zatib lajt loj xtiidx Dios por Jesucrist:

Lüj naj bixhioz par tiblayaa zi'c goc Melquisedec bixhioz.

⁷ Chi guban Jesucrist loj guidxliuj guie dád biinman gurejdx gunabaman Dios bèn zajc yabëë laaman loj guialgüjt ni gudëdaman. Dxel bidxga' Dios Jesús badëëman laaman valor guial bazoobaman gra xtiidxaman.

⁸ Majs Xi'n Dios najman, per basiidaman bazoobaman diidx majsi guzag-diajman.

⁹ Abi' guial guidiblagaa beenman gra ni rën Dios güünman, zeel por laaman tiblayaa ma yu' perdon par gra ree bèn guzoob xtiidxaman.

¹⁰ Abi' Dios naj bèn gule laaman par gacaman bixhioz zobjloj zi'c goc Melquisedec bixhioz.

Royal yasnuu yaguieenbee ree xtiidx Dios

¹¹ Dád zien ni yu' ganin lëjt por ree ni guin, per nawëëg najn par ganinan zi'c rënan guial dád nen rignia'di.

¹² Ma gojc xchej da't nünbeedi xtiidx Dios, yan bal zajcan, lëjt ma royal guluü ben ren ree, per lëjt sta ryaadx chu' bèn guluü lëjt xtiidx Dios stijb ni basiididi guia'xchej. Lëjt naj zi'c tijb xindoo ni rë' ganax lejch luar gawix graloj.

¹³ Abi' gra ree bèn naj zi'c xindoo ad wayajct gaw graloj, ad zile't gagbee reeman conin naj xnejz.

¹⁴ Per ree bèn ni cusnuu cayignia' xtiidx Dios, laa reeman naj zi'c bèn ma raw graloj guial ma rignia' reeman conin naj zagdxë con tëënin naj ni mal.

6

¹ Zeel royal yaguieen ree naguiejn mazri yayignia' ree xtiidx Jesucrist, luar yaye'c ree yasiid ree xtiidxaman ni ma basiid ree guia'xchej. Zagdxeli naj zian luar yasiid ree naabzi xhienaag yasa'n ree ni mal ni baguieen ree yaloj, o xhienaag yaliduladx ree Dios,

² o xhienaag tiobnijs bejn, o xhienaag yadxiib du yaa ree guijc bejn, o xhienaag yasban Dios bengüt ree, o xhienaag güün Dios xguialguxtisaman chi guidxin dxej yadëëd ree cwent lojman,

³ zagdxeli naj guial yasnuu ree yasiid ree xtiidxaman. Abi' Dios gagn  dunuj ree din chile' yaguien ree zian.

⁴ Din b n ma ragbee ree xcwent Dios, b n ma n nbee ree xcwent ree ni yu' xanyabaa, b n ma gubajn ree con xSprijt Dios,

⁵ abi' bayuladx reeman xtiidxa'c Dios, ma ragbee t e reeman xhienaag nabee Dios,

⁶ dxel rusa'n reeman guial chinal reeman xtiidxa'c Jesucrist, par laa reeman d d naw eg naj chu' reeman loj xnejz Dios, din zi'c rulu  cucaa reeman Jesucrist Xi'n Dios loj cr jz zatijb din guze' ree bejn laaman.

⁷ B nguidxliuj ree naj reeman zi'c tibli'a' guidxliuj ni r ' guibidx guia ni ryajb, abi' bal rajc da't guiniaa guin par b n r jn dxiin lojn dxel r jnle' Dios laan.

⁸ Per bal ganax gui ejch n  ree gui'xh mal rliejn lojn, dxel ad r jntan sirv, abi' mazri z ed gajxh casti par guidxliuj guin abi' casti guin naj guial che'can.

Ni nuzujdxi'ch dunuj ree loj xnejz Dios

⁹ Ad caynatan zian por l jt, din dunujn rayagbee guial zagdxen cay jndi, guial zinalquidi ni rayal g undi din laadi loj xcasti Dios.

¹⁰ Abi' laaman r jn xguialguxtisaman zi'c rayal, abi' ad zayanladxtaman ni zagdxen ni beendi n  guial ma bal udi guial r ndi laaman, abi' beendi yudar cusnuu t e cay jndi yudar dux compniar ree b n raliduladx ree Jesucrist.

¹¹ Per dunujn ray nan guial gusnuu g undi zian xt dxej chigra, sin guial yaleny'a'di din yayalidi ni cab zidi tia'di.

¹² Ad gaquidi b n ploj, gol been zi'c been ree b n bililadx Dios sin guial-yaleny'a' tia' reeman ni r b Dios tia' reeman.

¹³ Chi been Dios promejs loj Abraham, baza't laagajcaman din achut b n mazri lasajc guial lojman,

¹⁴ abi' r baman loj Abraham: "Naj diidxli g nle' l j abi' d d zien ree xdiaal chu'."

¹⁵ Abi' Abraham guyuman pacens ad balenya'taman persi cwa'man ni r b Dios gud eman lojman.

¹⁶ Chi r jn bejn jurar, r jnman jurar por stijb b n mazri lasajc guial lojman din guiguien guial diidxliqui g nman ni r baman.

¹⁷ Ziangajc yan, guial r n Dios gul uman loj ree b n ni tia' ni r baman guial ad yu't dxej guchaa xixgabaman por promejs ni beenman, zeel beenman jurar.

¹⁸ Tio'p ni ad zaze'nt been Dios, beenman promejs been t eman jurar abi' rayagbee ree guial ad rnieetaman diidx rusquiee. Zianan zeel nadxu' ree valor zubiig ree loj Dios din g nman dunuj ree yudar guial ma raya'p ree confianz guial gac zi'c ma r baman.

¹⁹ Abi' guial rayagbee ree guial gac zi'c ma r b Dios, zeel nadxu'dxi'ch ree loj xtiidxaman zi'c nuzujdxi'ch tijb ganch guib tijb barcw. Abi' guial nadxu'dxi'ch ree diidz xanyabaa z edan,

²⁰ lod ma guyu Jes s par guixhialaman nejz par dunuj ree, b n ma naj bixhioz zobjloj tiblayaa zi'c goc Melquisedec.

7

Jes s naj bixhioz zi'cgajc gojc Melquisedec

¹ Melquisedec gojc rey Salem gojc t eman xbixhioz Dios b n yu' xanyabaa. Chi baza Abraham loj wadijl lod beenman gan rey gudiln  ree laaman, dxel bigchaagloj Melquisedec laaman, abi' beenle'man Abraham.

² Dxel loj gra ree ni been Abraham gan, beenman laan chii lala' abi' bad eman tijban loj Melquisedec. Melquisedec r en gui ban "rey ni r jn xguialguxtis zi'c rayal", Abi' guial gojcaman xrey Salem r en gui ban "rey rabe'cdxe luxdoo ree bejn", din Salem r en gui b "ni rabe'cdxe luxdoo ree bejn".

³ Melquisedec guin achut ragbee chu naj xDadaman, o xniaanman o chu ree nin naj xdiaaman. Achut ragbee goc gojlaman goc t  e g jtaman. Laaman goc bixhioz zi'cgajc Jes s Xi'n Dios b en ma naj bixhioz par tiblayaa.

⁴ Gol been xgab xi b en lasajc gojc Melquisedec nadxel. Zeel xt dux b ngulal ree Abraham bad e tib part loj chii ni beenman gan loj ree rey ni gudiln eman.

⁵ Loj ley r b guial ree bixhioz Israel ni z ed loj xdiaa Lev  rajp reeman derejch tia' reeman tib part loj chii ni rajp ree b en Israel, majsi tijbzi loj xdiaa Abraham z ed gra reeman.

⁶ Melquisedec majsi ad z edtaman loj xdiaa Lev , per cwa'man tib part loj chii ni been Abraham gan. Dxel beenle'man Abraham b en cwa' xpromejs Dios.

⁷ Abi' dunuj ree rayagbee guial b en r jnle' stijb bejn, mazri lasajcaman guial loj b en r jnle'man.

⁸ Per gra ree bixhioz ni rtia' tib part loj chii la' ni rajp ree bejn, r jt gajc reeman zi'cgajc dunuj ree. Sa'n Melquisedec b en cwa' tib lia' ni been Abraham gan, loj xtiidx Dios ruza't laaman zi'c rulu  sta nabanman.

⁹ Yan zi'c rulu  yaguie'ch ree guial Lev  con ree bixhioz ni z ed loj xdiaaman b en ni rtia' ree tib part loj chii ni rajp ree bejn n  reeman bad e tib part guin loj Melquisedec loj hor ni bigchaagloj Melquisedec dux b ngulal ree Abraham.

¹⁰ Din chi bigchaagloj Melquisedec dux b ngulal ree Abraham, ad wayut Lev , per loj xdiaa Abraham z ed Lev .

¹¹ Bal por ree bixhioz Levitas nile' niajc bejn naya delant loj Dios por ley ni guyu par ree b en Israel, dxel ad r jntri naguiejn ni't stijb bixhioz b en naj zi'c Melquisedec ad zi'ct Aar n.

¹² Din chi bidxaa bixhioz n gajc ley bidxaa,

¹³ din dux Dad ree Jesucrist laaman naj bixhioz guin. Per ad lojt xdiaa ree bixhioz z edaman, loj diaa ren z edaman abi' ni'qui tijb ree xdiaaman ad gojct bixhioz.

¹⁴ Dunuj ree rayagbee guial loj xdiaa Jud  z ed dux Dad ree Jesucrist abi' Moisejs ad baza'ttaman diaa guin chi r baman chu reenin gac bixhioz.

¹⁵ Per laa rguien gajc guial Jesucrist naj bixhioz zi'cgajc Melquisedec,

¹⁶ guial ad lojt xdiaa Lev  z edaman zi'c r b loj ley par gac bejn bixhioz, najman bixhioz guial rajpaman gualrniabee guibanman tiblayaa.

¹⁷ Din ze r b loj xtiidx Dios por laaman:

L j naj bixhioz par tiblayaa,

lasa' bixhioz ni goc Melquisedec.

¹⁸ Zianan zeel gojc ley guin tiblad guial ad beentan sirv guial n jn bejn zi'c rniabee ley guin.

¹⁹ Ad bile't n jn ley guin gan nibajn bejn zagdxe delant loj Dios. Per luar ley guin zagdxe naj gualrliladx ni raya'p ree din por gualrliladx guin ma raya'p ree nejz par yadxin ree loj Dios.

²⁰⁻²¹ Gulal chi ru bejn rajcaman bixhioz, achet promejs been Dios, per chi bacaabee Dios Jes s gacaman bixhioz, Dios been promejs zi'c ca tibljt loj xtiidxaman lod r b:

Dux Dad ree Dios ma been promejs abi' ad zuchaat xixgabaman:

“Lüj naj bixhioz par tiblayaa, lasa' bixhioz ni goc Melquisedec.”

²² Zeel zian zagdxé naj nejz cüb ni guxhal Jesús par yadxin ree loj Dios.

²³ Gulal zien gojc ree bixhioz per gual rdxin dxej réjt reeman ad bile't niajc reeman bixhioz par tiblayaa.

²⁴ Per Jesús ad yu't dxej guiétaman ad yu' tées dxej lox gual najman bixhioz.

²⁵ Zianan zeel ríle' rabéëman bejn ree loj xcasti Dios, bén rën ree gap nejz par guidxin reeman loj Dios por laaman, din laaman rajpaman gualnaban par tiblayaa par cwedx guiniabaman Dios por laa reeman.

²⁶ Zeel laaman naj bixhioz zobjloj bén rayaadx ree gagné dunuj ree. Din laaman naj bén naya nali, achet ni mal rüjnman, nayaman loj Dios, garen najman gual loj bédol, abi' zobjbaman xanyabaa cwé' Dios.

²⁷ Laaman ad ryadxt güünman zi'c rüjn ree bixhioz zobjloj gual guixie guixie rugüjt reeman be gui'xh zi'c gon par Dios. Yaloj por xtol gajc reeman dxel por xtol ree ben ren. Per Jesús con tib volt güjtaman por dux tol ree, ad ryaadxtri guiétaman stijb.

²⁸ Por ley bile' gojc ree bejn bixhioz zobjloj majsi ad nayaalojt naya reeman niz loj Dios. Per despuejs rëb Dios gual diidxliczi xi'nman gac bixhioz zobjloj, laaman nayaaloj nayaman niz loj Dios zianczi.

8

Jesús naj dux bixhioz zobjloj ree

¹ Loj gra diidx ni caydü ree ni mazri lasajc naj gual Jesucrist naj dux bixhioz zobjloj ree, bén ni ma zobj xanyabaa xladbee Dios bén rniabee.

² Ni ma rüjnman sirv gualbixhioz, lën yadoo ni bazoob Dios, ad bénguidxliujt.

³ Gra ree bixhioz zobjloj loj guidxliuj guie xchiin reeman naj gual riné reeman gon rugüjt téë reeman be ree zi'c gon par Dios. Ziangajc Jesucrist bén naj dux bixhioz zobjloj ree yu' ni badéëman loj Dios.

⁴ Abi' bal sta za' Jesucrist loj guidxliuj guie ad niajctaman bixhioz, gual ma yu' ree bixhioz ni riné ree gon loj Dios zi'c rniabee ley ni basa'nné Dios Moisejs.

⁵ Per gra ni rüjn ree bixhioz loj guidxliuj guie, najzi reen zi'c tijb bala, zi'c tijb sen xhienaag naj ree ni yu' xanyabaa. Dunuj ree rayagbee gual najzi reen zi'c tijb sen din chi ma cadxin gajxh güün Moisejs yadoo, dxel rëb Dios lojman: “Baguiaa zagdxé din güünl zi'cgajczi balün lüj ruguia' Sinaí.”

⁶ Per mazri zagdxé naj ni rüjn Jesucrist, bén bayal naj dux bixhioz zobjloj ree, din mazri zagdxé naj nejz cüb ni guxhalaman din chile' yadxin ree loj Dios. Abi' por nejz cüb guin mazri zagdxé naj ree xpromejs Dios par bejn.

⁷ Bal por ley nile' nibajn bejn zagdxé delant loj Dios, dxel ad rüjnt naguiejn niu nejz cüb.

⁸ Per baguiaa Dios gual ad cayüjnt ree bejn zi'c rayal zeel rëbaman: Naj rni gual guidxin dxej gaxhalan nejz cüb par ree bén Israel në ree bén Judá.

⁹ Per nejz cüb guin ad najtan zi'c ley ni basa'nan loj xbéngulalidi chi babën laa reeman Egipto.

Abi' gual ad bazoobt reeman da diidxan zeel gulëladxan laa reeman, zian rëb Dios.

¹⁰ Rëb téëman:

Zian ma baya'n diidx gac con ree bejn chi guidxin dxej guijc reeman yasa'nan da leyan

abi' lèn luxdoo reeman gucanan.

Dxel naj gac xDios reeman, abi' laa reeman gac da bejnan.

¹¹ Dxejzii ree ad rüntri naguiejn gusiid ree bejn lasa' reeman.

Ni'qui bijch reeman par güünbee reeman naj,

din gra reeman güünbee naj,

diizd xindobéz xt bengol.

¹² Abi' naj gүн perdon gra ree ni mal ni ma been reeman,

abi' ad yu't dxej gusaaladxan xtol reeman.

¹³ Chi rëb Dios guial guixal nejz cüb guin rën guiëban guial achetri sirv rünj nejz gulal guin ni gop ree bejn par guidxin reeman lojman, abi' ni ad rüntri sirv nayob nitan.

9

Yadoo ni yu' loj guidxliuj në yadoo ni yu' xanyabaa

¹ Dunuj ree rayagbee guial chi binal bejn ley ni cayguie'ch ree naj nejz gulal, loj ley guin zëed xhienaag guiën bejn Dios, xhie tëë naag rayal güün reeman tijb yadoo loj guidxliuj guie.

² Lën yadoo guin guzëeb tijb lajd persi gojcan tio'p lën. Tijb lënan ni naj niz ro' port, lod brii laj lod nada abi' lën guin guzobj ni ru gandel në tijb mex ni gudxib ree guidahtil ma gogle'.

³ Dxel stijb lën guin xijch lajd guin brii laj lod mazcsi nada.

⁴ Lën guin guyu tijb altar ni or lod rgu' reeman goxyl në tijb caj ni brii laj xcax xpromejs ree Dios. Abi' caj guin nadüüban or zi'c lënan zi'c xijchan. Lën caj guin yu'chaaw guiaj ni ca ree guidxii xmandamient Dios në xvar Aarón ni бага' con stijb re or ni guyuchaaw mana.

⁵ Dxel guijc caj guin guzobj tio'p xfigur ree anjl bén la ree querubines abi' con xhiil reeman rusiaaw reeman guijc lod ruuob bixhioz zobjloj xrejn ree be por xtol ree bejn. Per por yan ad rünjnt naguiejn guzatan mazri ree ni guin lojdi.

⁶ Chi gulox been reeman gra zi'c rayal gac lën tijb yadoo loj guidxliuj guie, dxel guixie guixie guyu ree bixhioz lën yadoo guin per naabzi lod brii laj lod nada, lod rguieen reeman ni rayal güün reeman par Dios.

⁷ Per stijb lën guin lod la mazcsi nada, tijbzi bixhioz zobjloj ru ni tib volt lën tib iiz. Abi' ad zajct chu'man bal id zinëman xrejn ree be din güün Dios perdon xtolaman në xtol ree bejn.

⁸ Por ree ni guin rulüü xSprijt Dios dunuj ree guial la'tgaj rünj sirv lod brii laj lod nada ad yu't mod chu' bejn lod la mazcsi nada.

⁹ Gra ree ni guin najzi reen tijb ejempl par dunuj ree yan, din gon në ree be ni binë ree bejn par Dios, ad beent reen sirv par nayaaløj ninialadx reeman guial ma naya reeman loj Dios.

¹⁰ Gra ree costumbr ni gop reeman zi'c ree con ni gudaw reeman, në ree ni gu' reeman në gra ree ni rayal güün reeman din naladx reeman guial ma naj reeman naya, laan naj ni gunabee ley güün ree bejn xt dxej ni bachaa Dios gra.

¹¹ Din yan ma bi't Jesucrist, bén naj bixhioz zobjloj par dunuj ree, abi' por laaman ma raya'p ree yaya'p tëë ree ni ma rëb Dios yaya'p ree. Abi' mazri zagdxë naj lën yadoo lod ma guyuman mazri lasajc yadoo guin guial ad zobjtan loj guidxliuj guie ad gojc tëëtan por ree bénguidxliuj guie.

¹² Jesucrist ma guyuman lën yadoo lod nada da't, per ad con xrejt ree go'n dobéz o xrejn ree dxib, guyuman con quijb xrejnman. Laaman con tib volt

guyuman, ad rüjnt naguiejn güünman zian stijb abi' por laaman raya'p ree perdon par tiblayaa.

¹³ Tiamp gulal xrejn ree dxib o xrejn ree go'n o cobdëj ni we'c ree vagdobëz ruuroob bixhioz gui'c ree bejn persi naladx reeman ma naya reeman. Yan bal zian naladx reeman guial raya'n reeman naya,

¹⁴ diidxgui con xrejn Jesucrist nid zanaduladx ree ya guial ma naya ree niz loj Dios xcwent dux tol ree, din chile' yaguieen ree ni rën Dios bén naban. Din por xgualrniabee xSprijt Dios, Jesucrist bén ad beentczi dol, badëe laagajcaman zi'c tijb gon par Dios.

¹⁵ Zeel por Jesucrist ma raya'p ree tijb nejz cüb par yadxin ree loj Dios. Din por xgualgüt Jesucrist ma yu' perdon par dux tol ree në xtol ree bén ni binal ley, gra ree bén naj xbejn Dios zian yaca' ree ni rëb Dios yaya'p ree par tiblayaa.

¹⁶ Din zi'cgajc tijb bén rlies tijb gui'ch guial chu yaya'nnë ree ni rajpaman, ad züjnt gui'ch guin dxiin xt chi ma güjtaman.

¹⁷ La'tgaj naban bén guin achet sirv rüjn gui'ch guin, rüjnan sirv xt chi ma güjtaman.

¹⁸ Zeel diizd tiamp gulal par guzuloj been sirv ley ni basa'n Dios loj Moisejs, bagüjt reeman tio'p choon ree be gui'xh persi gulëë reeb rejn.

¹⁹ Din chi gulox bagojn Moisejs gra ree bejn gra ni zëed loj xley Dios dxel cwa'man guidxlad xiil ni nayë' culor xnia bacaaman laan gui'c tib xidx yag ni la hisopo, dxel badxe'man laan loj nijs ni no'ch xrejn ree go'n dobëz con xrejn ree dxib dxel bacojpaman laan loj libr ley në gui'c ree bejn

²⁰ rëbgajman: "Rejn guië naj tijb sen guial ma baneë Dios xleyaman lojdi par güüendi laan cumplid."

²¹ Bacojp tëëman rejn guin lën yadoo në gui'c gra ree ni rüjnnë ree bixhioz dxiin lën yadoo.

²² Ley guin gra gunabeen gagle' con rejn din guiguien guial ma naya reen delant loj Dios, din sin rejn achet perdon par dol yu'.

Xrejn Jesucrist rquied dol

²³ Zeel par guiguien guial ma naya ree ni beennë ree bixhioz dxiin lën yadoo guin, gojc naguiejn bagüjt reeman be ree persi beenle' reeman ni guin ree. Per ni guin ree najzi reen zi'c tijb xsen ni yu' ree xanyabaa, din par ree ni yu' xanyabaa ryaadx rejn mazri lasajc guial loj xrejn ree be.

²⁴ Abi' Jesucrist ad lënt yadoo ni been bénguidxliujn guyuman, yadoo ni najzi tijb sen guial xhienaag naj xanyabaa, ma guyuman xanyabaa lod caneeman por dunuj ree loj Dios.

²⁵ Jesucrist ad biaadxt niëjtaman zien volt por dol ree, ad beentaman zi'c been ree bixhioz zobjloj guial gazobijz binë reeman xrejn ree be lën yadoo lod brie laj lod nada da't.

²⁶ Din bal id zian, zien volt niëjtaman diizd chi gocchaaw guidxliuj. Per chi bidxin dxëj bi'taman, con tib voltzi badëe laagajcaman par guiëtaman din chiquied dux tol ree.

²⁷ Zi'cgajc gra bejn tib voltzi rëjt reeman, dxel zëed ni yadëed reeman cwent loj Dios.

²⁸ Ziangajc Jesucrist tib voltzi badëe laagajcaman par guiëtaman din quixaman por xtol ree bejn. Abi' chi gui'taman stijb ad zi'ttaman por dol, gui'taman din chignëman bén cabëz ree laaman.

10

Ad leyt riquied dol

¹ Ley ni basa'nnë Dios Moisejs najzan tijb sen xcwent ree ni gac, per ad por ziant gojc ni rayal gac. Din majsi gazobijz güjt ree be par Dios zi'c gunabee ley güün bejn, per ad guyut dxej ni naladx reeman guial ma bayaaloy naya reeman loj Dios.

² Din bal ninaladx reeman guial ma naya reeman con tib volt ni bagüjt reeman be ree par Dios, dxel ad ryaadxtri nüjn reeman zian guial ma ragbee reeman achetri xtol reeman.

³ Per ad gunaladxt reeman zian, gazobijz rusaaladx xtol reeman chi rugüjt reeman be ree par Dios,

⁴ din xrejn ree go'n në xrejn ree dxib ad zajct chiquiedan xtol ree bejn.

⁵ Zeel chi bi't Jesucrist loj guidxliuj, rëbaman loj Dios:

Ad rëntil xrejn ree be

ni'qui los demazri ree ni ridnë bejn par lüj,

zeel baneel naj cuerp ni ra'pan loj guidxliuj guie.

⁶ Ad rëntril guial ruze'c reeman be ree par lüj

ni'qui xrejn ree be ni ridnë reeman por xtol reeman.

⁷ Zianan zeel rën:

“Laa naj guie, Dad Dios,

zialan par günan zi'c rën,

zi'c ca loj libr por naj.”

⁸ Jesucrist yaloy rëbaman guial ad rënt Dios xrejn ree be, ni'qui los demazri ree ni rinë bejn par laaman, ni'qui guial ruze'c reeman be ree por xtol reeman zi'c rniabee ley güün reeman.

⁹ Chi gulox rëb Jesús zian, dxel rëb tëëman: “Laa naj guie, Dad Dios, zialan par günan zi'c rën.” Zianan baloox Jesucrist guial rinal ree costumbr ni rëb loj ley abi' guxhalaman tijb nejz cüb par yadxin ree loj Dios.

¹⁰ Yan ma nayajc ree naya delant loj Dios guial ma been Jesucrist zi'c rën Dios, badëëd laagajcaman güjtaman por xtol ree bejn, con tib volt par tiblayaa, ad ryaadxt güünman zian stijb.

¹¹ Gra ree bixhioz Israel guixie guixie za' reeman cayüjn reeman gra ni rniabee ley güün reeman, abi' guixie guixie rugüjt reeman be ree par Dios. Abi' majsi zien volt rüjn reeman zian per ad rquiedt guialrugüjt be guin ree xtol ree bejn.

¹² Per Jesucrist con tib volt badëëd laagajcaman güjtaman por xtol ree bejn, ad ryaadxt güünman zian stijb. Dxel gurejman xladbee Dios,

¹³ lod cabëzaman guidxin dxej nabeeman loj gra ree bén rdx'e'ch laaman.

¹⁴ Din laaman con tib volt badëë laagajcaman güjtaman por xtol ree bejn dxel tiblayaa ma naya ree bén riladx laaman.

¹⁵ Abi' dunuj ree rayagbee ree guial walin din por xSprijt Dios zëed ree diidx ni ca loj xtiidx Dios guial rëb Dios:

¹⁶ Zianan ma baya'n diidx gac

con ree bejn chi guidxin dxej:

Guijc reeman gusa'n da leyan

abi' lën luxdoo reeman gucanan

¹⁷ Abi' rëb tëëman:

Ad yu't dxej gusaaladxan xtol reeman

në graloy ree ni mal ni ma been reeman.

¹⁸ Abi' zi'c ma yu' perdon par dol, ad rüjntri naguiejn guiët ree be por dol.

Royal yubiig ree loj Dios

19 Zeel compniar raliduladx ree Jesucrist sin gualrdxeb ma zajc yadxin ree lod zojb Dios por xrejn Jesucrist,

20 din chi bad ed xcuerpaman persi g jtaman, guxhalaman tijb nejb c b ni zidn e gualnaban par dunuj ree.

21 Yan zi'c ma rniabee Jesucrist dunuj ree, b en naj bixhioz zojbloj xanyabaa,

22 con guidib du luxdoo ree ma zajc yubiig ree loj Dios con tijb gualrliladx ni wali ree raliduladx ree laaman, con tijb quiarguiejn naya sin xgab mal, con tijb cuerp ni ma baya loj dol, zi'c chi qui badiibri dux cuerp ree con nijs naya.

23 Zeel royal yadxu'dxi'ch ree loj ni raliduladx ree Dios, din laaman z jn cumplid xtiidxaman zi'c ma r baman.

24 Royal yaguieen ree xgab xhienaag yalu' ree luxdoo ree dux compniar ree yay n t e du lasa' ree yaguieen t e ree ni naj zagdx e.

25 Ad rayalt yaguieen ree zi'c r jn ree b en ad rejtri ree lod radxaag lasa' ree dux compniar ree par chignia' reeman mazri xtiidx Dios, royal yalu' ree luxdoo du lasa' ree, abi' mazri yan gual ma rayagbee ree gual ma zidyob dxej gui't Jesucrist stijb.

26 Din bal ma rayagbee ree xtiidxli Jesucrist abi' baguieen ree xgab yaguieen ree mazri dol, dxel ad yu'tri por chu zajc yayajc ree perdon.

27 Ni cab esi dunuj ree naj xgualguxtis doxh Dios, tijb bajl lod yayal ree b en ad ruzoobt xtiidxaman.

28 Chi bal id been tijb bejn zi'c rniabee ley ni basa'nn e Dios Moisejs, abi' yu' tio'p choon testiw gual ad beent b en guin zi'c rniabee ley guin, dxel ad yu'tri mod laaman loj gualg jt ni rayalaman.

29 Yan gol been xgab, [xixpi mazri castiro' yayal b en rnieeguijdx xSprijt Dios b en ragn e dunuj ree! B en ni naladx gual achet lasajc Xi'n Dios, abi' r jnman desprejs xrejnman, rejn ni rul u  gual gac zi'c r b Dios, rejn ni rusia xtol bejn.

30 Dunuj ree rayagbee gual r b Dios: "Naj royal g n gualguxtis, naj gud e ni royal bejn." R b t eman: "Dios naj b en ni yaca' cwent por ni cay jn bejn."

31 [Abi' nadxeb yayal bejn xcasti Dios b en naban!]

32 Per l jt gol basaaladx xhienaag guzajquidi chi qui beenbeeridi xtiidxli Jesucrist. Gudaandi gra gualzi ni gud didi.

33 Yu'di zien loj da't gualzi bad ed ree bejn l jt, abi' baze' reeman l jt delant loj ree bejn, yu' t edi ad gul eladxtidi b en guzac ree zian.

34 Ad gul eladxtidi b en ni guyu ree ladxg uib, abi' chi baca' ree bejn gra ni rajpidi, babaagajquidi gual ma ragbeedi mazri lasajc ni rajpidi xanyabaa, n e ree ni rajpidi ni, taan reen tiblayaa.

35 Zeel ad gusa'ndi gualrliladxidi Jesucrist, din por gualrliladx guin d d zagdx e naj ni tia'di.

36 R jn naguiejn gapidi pacens din chile' g  ndi zi'c r n Dios, zian tia'di ni ma r baman guneeman lojdi.

37 Din loj xtiidx Dios r b:

Nayob, d d nayob gui't b en naj gui't,
ad zaglaataman.

38 Abi' b en naban zi'c r nan,
guidib tiamp ni nabanman rliladxaman naj.
Per bal gusa'nman ni rliladxaman naj,
ad zabaan tan laaman.

39 Per dunuj ree ad nayajct ree zi'c ree b n rusa'n ni rliladx reeman Jesucrist abi' rayal reeman casti, dunuj ree nayajc ree b n rliladx Jesucrist diidxli par chit e yayal ree casti.

11

Guialrliladx Dios

1 Yan,  xhienin naj guialrliladx? Guialrliladx naj guial guidiblagaa yaliduladx ree gac zi'c cayl jz ree gac, n  guial waliqui ni raliduladx ree ni ad raguaat ree.

2 Dux b ngulal ree baya'n reeman zagdxe delant loj Dios guial bililadx reeman laaman.

3 Zi'c raliduladx ree Dios, dunuj ree rayagbee guial con xtiidxaman beenman xanyabaa n  guidxliuj n  gra ni raguaa ree, achetczi ni beenman con ree ni raguaa ree yan.

4 Guial bililadx Abel Dios, zeel zagdxe naj gon ni bad eman guial loj Ca n, abi' baya'nman zagdxe delant loj Dios abi' cwa' Dios gon ni bazaladx Abel lojman. Zian majsi ma g jt Abel, per sta rguiajt xhienaag bililadxaman Dios.

5 Guial bililadx Enoc Dios zeel ad g jttaman, guidib nabanman ziaman xanyabaa abi' ad badxejlt ree bejn laaman guial ma zign  Dios laaman. Per chi gadaman chign  laaman, loj xtiidx Dios r b guial bayuladx Dios zi'c gubanman.

6 Abi' achut zajc g  n zi'c r n Dios bal id rliladxaman laaman. Chut ez b n r n gap nejz par guidxinman loj Dios rayal chililadxaman guial yu' Dios chililadx t eman guial laaman rud e ni r baman gud eman loj ree b n raguiil laaman.

7 Guial bililadx No  Dios dxel chi r b Dios lojman guial gac ree ni gadaman guguaa gac bazoobaman xtiidxaman, beenchaawaman tijb barcw din laaman con ree xfamilaman loj ni r b Dios gac. Dxel por guialrliladx guin biguien guial gra b nguidxliuj rayal casti ni r b Dios, abi' baya'n No  zagdxe delant loj Dios guial bililadxaman xtiidxaman.

8 Ziangajc Abraham guial bililadxaman Dios, bazoobaman xtiidxaman chi r baman lojman din grii ladxaman cheman lod tia'man guidxliuj ni gud ed Dios lojman. Abi' brii ladxaman ni'quid ragbeetaman banguin cheman.

9 Guial bililadxaman Dios, gubajman zi'c benzit loj guidxliuj ni r b Dios gud edaman lojman. Gurejman l n ree carp ni naj n  guid, ziangajc Isaac n  Jacob n  laa reeman rayal guidxliuj guin.

10 Gubajn Abraham zian guial ragbeeman chisobaman luguiedx ni beenchaaw Dios, guiedx ni ad yu't dxej nit.

11 Ziangajc Sara, por xguialrliladxaman, majsi ma najman bengol par chu' xi'nman, per guyuman gojl par gacaman na abi' guyu tijb xi'nman guial bililadxaman guial r jn Dios cumplid xtiidxaman.

12 Zian gojc majsi bengol da't ma naj Abraham per gojcaman famil. D d zien ree xdiaaman guyu zi'c ree bajl xanyabaa, zi'c ree  x ni riga' ro' nijsdoo ni ad zile't guiyab.

13 Gra ree b n ma bazatan xt bidxin dxej g jt reeman bililadx reeman Dios, majsi ad baguaat reeman gojc cumplid gra ree promeys ni been Dios loj reeman, per guial rliladx reeman ragbee reeman guial zajc zi'c r b Dios abi' rabaa reeman. Laa reeman ragbee guial tio'p choon dxejzi z ed reeman loj guidxliuj guie ad tiblyaat.

14 Abi' ree b n rn ee zian, zian rguienchaaw guial sta rguuil reeman lod diidxli gac ladx reeman.

15 Din bal por guidxliuj lod guza reeman cayüjn reeman xgab, dxel zile' nayejc reeman ni stijb.

16 Per laa reeman mazri rüjn reeman xgab por tijb luar lod naj mazri zagdxe, mazri rüjn reeman xgab por xanyabaa. Zeel Dios ad ratutaman najman xDios reeman abi' ma beenchaawaman luar lod guiban reeman xanyabaa.

17 Guial bililadx Abraham Dios, dxel chi been Dios laaman prueb din gugüjt xi'nman Isaac din gudë́edaman laaman zi'c gon par Dios, cwëjb Abraham majsi tijbzi Isaac guin naj xi'nman, majsi ragbee të́eman guial rëb Dios lojman:

18 "Por xi'nl Isaac gacxhie j da't xdiaal."

19 Per Abraham yu'guijcaman guial rajp Dios guialrniabee xt par yasbanman bengüt ree, abi' zi'c rulüü baban xi'nman stijb chi gudë́edaman prueb guin.

20 Ziangajc Isaac por guialrliladxaman Dios dxel chi beenle' ree xi'nman Jacob con Esaü, rëbaman xhienaag gac con tijbgaj reeman.

21 Abi' ziangajc Jacob guial bililadxaman Dios ziangajc beenle'man grop ree xi'n Xiëb chi ma guidxin hor guiëtaman. Dxel cwa' yagriadxaman abi' gurejdx gunabaman Dios.

22 Ziangajc Xiëb guial bililadxaman Dios, chi ma guidxin hor guiëtaman, rëbaman guial grii ree b́en Israel Egipto, abi' rëbaman loj reeman xhienaag güünnë reeman xdxijtaman.

23 Por guial bililadx ree xdad xniaa Moisejs Dios chi gol Moisejs guin, baquie'ch reeman laax choon bëw guial baguiaa reeman najx xindoza'cdxoon, abi' ad bidxebt reeman guial rëb b́en naj rey guial guiët gra ree xindobëz.

24 Abi' chi goc Moisejs guin bengol, guial bililadxaman Dios, gojc xixgabaman cwexuuman niajcaman xi'n xi'ndxa'p rey Egipto.

25 Par laaman zagdxeli naj sagdiajman con ree xhén Israelaman, luar nüjman dol niro'nladxaman laa reeman din niajpaman ni rënman, ni ad rdaant ree par tiblayaa.

26 Par laaman mazri lasajc sagdiajman zi'c Cristo luar niajpaman gra ree guialnaza'c ni yu' Egipto, dín mazri yu'guijcaman guialnaza'c ni yayalaman delant loj Dios.

27 Guial bililadx Moisejs Dios, briiman Egipto, ad bidxebtaman majsi balen rey Egipto. Guzudxi'chaman zi'c rulüü ruguiaaman Dios b́en ad zajct guguiaa ree bejn.

28 Në guial bililadx Moisejs Dios, beenman lanij pascw, abi' gunabeeman baroob ree b́en Israel rejn ro' xport lidx reeman, dín chi téd xianjl guialgüjt, ad zugüjtaman xi'n yaløj ree b́en Israel.

29 Guial bililadx ree b́en Israel Dios, gudë́d reeman zi'c loj yujbidx lod bixal loj nijsdoo la nijsdoo xnia. Per chi guyën ree b́en Egipto nidëd reeman, loj hor guin bayaaw nijs guin dxel gu' reeman nijs abi' güjt reeman.

30 Guial bililadx ree b́en Israel Dios, chi baza' gajdx dxej ni biaw reeman guiedx Jericó, dxel bazaj ze' ni nayaw guiedx guin.

31 Abi' Rahab b́en goc bëngunaa dxuudx luguiedx Jericó, guial bililadxaman ad güjtaman chi güt ree los demazri ree b́en ladxaman b́en ad bazoobt ree diidx, guial baca'guan b́en Israel ni we ree bigla'ch luguiedx guin.

32 Yan, ¿xhie mazri ganin lojdi? Ad zadaant tiamp guin ganin lojdi xcwent Gedeón, Barac, Sansón, Jefté, Davi, Samuel në xcwent ree b́en badëë xtiidx Dios loj ree bejn.

³³ Gra reeman bililadx Dios abi' been reeman gan loj zien ree nacion, been xguialguxtis reeman zi'c rayal, baguiaa reeman gojc cumplid ni r b Dios loj reeman abi' basiaaw reeman ro' ree beedx.

³⁴ Guzuj reeman loj bajl ro' abi' achet goc reeman, gulaa reeman loj guialg jt con espad, guyu reeman gojl chi rulu czi ad yu't reeman gojl, guzudxi'ch reeman loj wadijl abi' balaagdxa reeman benzit ni gudil  reeman.

³⁵ N  ree b ngunaa ni g t ree xfamil, por guial bililadx reeman Dios baban ree xfamil reeman stijb.

Per yu' ree bejn majsi g jt reeman, per par laa reeman mazri zagdxe guzadiaj reeman loj ree b n bag jt laa reeman, luar nusa'n reeman guialrliladx reeman Dios par gap reeman stijb guialnaban c b ni mazri lasajc.

³⁶ Yu' t e reeman guzagdiaj baze' ree bejn laa reeman, gudijn ree bejn laa reeman, xt guxh  ree bejn laa reeman con caden abi' guyu reeman ladxguuib.

³⁷ Yu' reeman bag jt ree bejn con guiaj, yu' t e reeman bag jt reeman gul exh n reeman laa reeman con sierr, g jt t e reeman con espad. Yu' t e reeman biza gra lad najcw reeman guid xab xiil n  guid xab dxib, probza laa reeman naya biza reeman, graloj beenn  ree bejn laa reeman.

³⁸ Biza reeman niz loj yujbidx, niz ruguia' ree, n  graloj l n ree guiajbiliaa. B n guin ree ad rayal nibajn reeman loj guidxliuj guial d d benza'c gojc reeman.

³⁹ Abi' majsi biguien guial gra reeman diidxli bililadx reeman Dios, per ad cwa't reeman ni r baman loj reeman.

⁴⁰ Din laaman beenman xgab tijb ni mazri zagdxe par dunuj ree, abi' ad gojc gajt ni r baman loj reeman din tijbzi yaca' ree ni r baman con laa reeman.

12

yunaal ree Jes s

¹ Zeel, zi'c ma bacaagdiaj ree por zien ree bejn xhienaag bililadx reeman Dios, rayal yasa'n ree tiblax gra dol n  gra ree ni rudxoon yaguieen ree zi'c rayal, ad zalenya' t et ree yunaal ree nejz ni ma bal u Dios dunuj ree.

² Rayal yadxeguijc ree Jesucrist din por laaman z ed guialrliladx ni raya'p ree abi' por tijbzi laaman rayaal guialrliladx ni raya'p ree. Gudaanman guialzi ni gud daman loj cr jz, ad batutaman g jtaman zian din ragbeeman guial chi ma gulox guzagdiajman, dxel gui't guialrabaa. Abi' yan ma zojbaman xladbee Dios xanyabaa.

³ Gol been xgab xhienaag guzagdiaj Jesucrist chi basagdiaj ree b ndol laaman, chit e yadxaguidi, ad yalenyadi por ni cazajquidi.

⁴ Din majsi cusagdiaj ree bejn l jt guial cay jndi naguiejn ad cay jntidi dol, per ad wazujtidi loj guialg jt por zian.

⁵  Wen ma bayanladxidi ya xhienaag bane Dios l jt consejw najdi xi'nman? Loj xtiidxaman r b:

Xi'n, bidxga' zi'c runee dux Dad ree Dios l j consejw, ad bal yalenyal chi guzuxnejzaman l j.

⁶ Din r jnnaaman b n ni naj ree xi'nman, ruzuxnejzaman laa reeman guial r nman laa reeman.

⁷ Zeel gol gudaan guialzi, din zagdxe najn par l jt. R jnn  Dios l jt zi'c r jnn  bejn xi'nman,  wen yu' dad ad ruzuxnejzt xi'n ya?

⁸ Yan bal id ruzuxnejz Dios l jt zi'c r jnn  gra ree xi'nman, r n gui ban guial ad najtidi xi'nman diidxli, ad najtaman xDadidi.

⁹ Lèjt ragbee guial chi bayajc ree xindoo, gudijn dux dad ree dunuj ree din yacaagdiajg ree xtiidxaman abi' raya'p reeman respejt. Yan, çchexc di ad ree yazoob xtiidx dux Dad ree Dios bèn yu' xanyabaa, din yaya'p ree guialnaban con laaman?

¹⁰ Dux dad ree ruzuxnejzaman dunuj ree por tio'p choon dxej ni zio'p ree loj guidxliuj din yaguieen ree zi'c ni naladxaman naj zagdx. Per Dios ruzuxnejzaman dunuj ree par tijb ni mazri zagdx par dunuj ree, ruzuxnejzaman dunuj ree din yabajn ree naya zi'c laaman.

¹¹ Diidxiczi achet guialnaa naj nix loj hor ni cadëdilán, ragnaalil. Per ree bèn ni rusiid ruzoob diidx zian, laa reeman naban zagdx, naalyuj delant loj Dios.

Ad cwëëladxidi xtiidx Dios

¹² Zeel gol bagu' luxdoodi, gol badëed valor lèjt gajc zi'c tijb bèn raca'ladx chi ma badxag da'taman.

¹³ Gol been naguiejn gol gubajn xnejz, din ree bèn ragdxa xhie güün reeman, ad gusa'n reeman xnejz Dios, chu' luxdoo reeman zagdx chinal reeman laan.

¹⁴ Gol been naguiejn guibandi zagdx con gra ree bejn, gol gubajn naya delant loj Dios din bèn ad nabant naya ad zile't guguaaman dux Dad ree Dios.

¹⁵ Gol gojp cudad chitëë chu' tijbidi gusa'n tiblád zi'c rën Dios gagnëman lèjt chitëë chu' tijbidi gac zi'c gui'xh nala ni rünj guialquia abi' guxhiinan gra xcompniaridi.

¹⁶ Ni'qui tijbidi ad rayalt sunëdi bèn ad najt lacheelidi, ad cwe'quidi tiblád ni zagdx ni zëed ree por Dios chitëë saquidi zi'c guzac Esaú, por tijb guialraw bato'man guialrniabee ni rayalaman guial najman bèn yaloj loj bijchaman.

¹⁷ Abi' lèjt ragbee guial chi guyën Esaú nünle' xdadaman laaman ad beenle'taman laaman zi'c rayalaman. Majsi dád biinman gunabaman laan, per ad bile't nuchaaman ni beenman.

¹⁸ Lèjt gadidi chibig lod ad najt par gugaalidi zi'c gubig ree bèn Israel gulal guijc guia' Sinai lod baguiaa reeman cayajc bajl guijc guia' guin, baguiaa reeman go'xh ya's ni basiaaw guijc guia' guin abi' rbi' gaj tijb bidoxh yagaj zi'c bidojn.

¹⁹ Dxel biguiejn reeman bibejdx tijb trompejt abi' biguiejn reeman cha' Dios guneenëman laa reeman. Per guial tant bidxeb reeman biguiejn reeman cha'man dád guzajc reeman laaman liaadx ad rnieenëman laa reeman.

²⁰ Din ragbee reeman guial nawëëg naj ni gunabee Dios güün reeman chi rëbaman: “Chutëëz bejn o be gui'xh ni gugaal guijc guia' guie rayal guiëtaman o guiëtib con guiaj o con lans.”

²¹ Nadxeb naj ni baguiaa reeman xt Moisejs rëb: “Rnijn guial tant rdxe-ban.”

²² Per lèjt ma bibiguidi loj Dios, ad guzajctidi zian. Ma yu' nejz par guidxindi ruguia' Siôn, xanyabaa lod naj Jerusalén ladx Dios bèn naban, lod nadxag lasa' ree zien da't ree anjl,

²³ dád nix yu' luxdoo reeman rën reeman laaman lod yadxajg lasa' ree xbejn Dios bèn ni ma ca ree laj loj libr xanyabaa. Ni zojb Dios, bèn yanab cwent loj gra bejn, ni tëë za' xSprijt ree bèn guban zi'c rayal laa reeman ma naya reeman por Dios.

²⁴ Ni gajc zojb Jesucrist, bèn guxhal nejz cüb ni raya'p ree par yadxin ree loj Dios. Chi güüt Abel xrejnman gunab gac guialguxtis, per con Jesucrist ad gojct zian, güjtlanan, guxhie' tëë xrejnman par yaya'c ree perdon.

²⁵ Zeel gol gojp cudad gol bidxga' Dios, laaman najman bèn rnieenē dunuj ree. Din bal bèn ni ad bidxga't ree xtiidx Moisejs bèn badēēd xtiidx Dios loj guidxliuj guie ad gulaat reeman loj casti ni rayal reeman, diidxgui dunuj ree nid zayal ree xcasti Dios ya bal id zayidxga' ree xtiidx Jesucrist, bèn guza diidx xanyabaa din guinieenēman dunuj ree.

²⁶ Chi gunee Dios bēngulal ree ruguia' Sinaí, binij guidxliuj. Per yan ma rēbaman: “Gunin guidxliuj zatijb, per ad guidxliujtzi, nē xanyabaa.”

²⁷ Chi rēb Dios guial güünman zian zatijb, rēn guiēban guial gunijman gra ni beenman, din chiquied ni rayal chiquied din yaya'n ni ad rayalt chiquied.

²⁸ Zeel rayal yadēēd ree quixtēē loj Dios guial ma rayal ree lod canabee-man, lod ad yu't dxej nit, abi' con respejt nē gualrdxeb yaguieen ree ni ruladxaman.

²⁹ Din dux Dios ree naj zi'c tijb bajl ni ruze'c gra.

13

Xhienaag güün bejn ni yayuladx Dios

¹ Ad cwēz guiēndi xcompniaridi bèn riladx ree Jesucrist.

² Ad yayanladxidi gudēē lidxidi yaya'n ree bèn ri't, din zian yu' ree bèn baca' ree xianjl Dios sin guial gabgee reeman chunin.

³ Gol basaaladx bèn yu' ree ladxguiib, gol gunaladx guial nē lējt yu' ladxguiib con laa reeman. Gol been tēē xgab por ree bèn ni cazagdiaj, gol gunaladx guial nē lējt cazagdiaj.

⁴ Gol gojp respejt gualruxhliaa, ad gusquiee lacheelidi. Din Dios zudēēdaman casti bèn za'nē xinguaaaw o bēngunaa ren, nē gra ree bèn ni rüjn ree ni dxuudx con ree bèn ad najt lacheel reeman.

⁵ Ad sēēbladxidi milia, gol baya'n conform con ni rajpidi din Dios ma rēb: “Gra dxej za'n con lüj, abi' ad yu't dxej gabēladxan lüj.”

⁶ Abi' con confianz zajc yaguie'ch ree:

Da Dadan Dios naj bèn ragnē naj

ad rdxebtan majsi xhietēēz güünnē ree bejn naj.

⁷ Gol basaaladx ree bèn ni gunabee ree lojdi, bèn ni balüü ree lējt xtiidx Dios. Gol been xgab xhienaag gubajn reeman gol binal tēē zi'c bililadx reeman Jesucrist.

⁸ Abi' Jesucrist laagajcaman nieey, laagajcaman yan nē zianczi.

⁹ Ad tiēbidi gusquiee graloj ni rulüü ree bejn lējt, din ad najt reen zi'c rayal chinalidi Cristo. Mazri zagdex gol gojp confianz xyudar Dios din guibandi xnejz luar chinalidi costumbr xcwent guial xhie zajc gawidi o xhie ad zajc gawidi, din costumbr guin ree achet yudar rüjn ree delant loj Dios.

¹⁰ Dunuj ree raya'p ree tijb bèn güt por dunuj ree, laaman naj zi'c tijb xgon bejn por xtolaman, gon ni ad zajc gaw ree bixhioz rüjn ree sirv lēn yadoo guin.

¹¹ Bixhioz zojbloj guin, laaman rinē xrejn ree be ni rudēēd ree bejn zi'c gon por xtol reeman, rinēman rejn guin lēn yadoo lod rayal chinēman laan. Dxel ree begüt guin re'c reeb ro' guiedx lod achut zojb.

¹² Ziangajc gojc con Jesucrist, ro' guiedx Jerusalén güjtaman par gusiaman bejn xtol reeman por xrejnman.

¹³ Zeel yunaal ree Jesucrist majsi gulēē reeman laaman luguiedx Jerusalén, nē majsi xhietēēz gualxtu o gualrzagdiaj yadüüd ree zi'c laaman.

¹⁴ Din loj guidxliuj guie ad raya'pt ree tijb guiedx lod ma nabajn ree tiblayaa, dunuj ree caylējz ree lod yabajn ree tiblayaa.

¹⁵ Zeel con xyudar Jesucrist ad yacwëez ree yadëed ree quixtëe loj Dios, laan naj gon yadëed ree lojman, abi' zian raxhoobdol ree guial nayajc ree xbejnman.

¹⁶ Ad yayanladxidi güündi ni zagdxe güün tée lasa'di yudar con ni gactzidi, din laa reen naj ni ruladx Dios.

¹⁷ Gol bazoob xtiidx ree bén rniabee lojdi, bén rulüü ree lëjt xtiidx Dios. Gol gojp reeman respejt din laa reeman ruguiaa lëjt din chinalidi xtiidx Dios, guial ragbee reeman yadëed reeman cwent loj Dios. Gol been ni yabaané reeman ad ni cu'nayat laa reeman, din guial ad ruzoobt diidx achet sirv güünan lëjt.

¹⁸ Gol gurejdx gunab Dios por dunujn. Dunujn rayagbee guial achet ni mal cayguieenan, abi' rayënan guial gra ni yaguieenan, yaguieenan laan xnejz.

¹⁹ Rniaaban lojdi din cwedx guiniabidi Dios por naj, din guneeman permis diob guialan din gazun con lëjt zatijb.

Diidx bigra ni bacan loj gui'ch guie

²⁰ Dios bén rabe'cdxe luxdoo ree bejn, bén basban Jesucrist, rajpaman dunuj ree zi'c rajp tijb bejn xiil, por xguialgüjtaman zianczi ma raya'p ree nejz par yadxin ree loj Dios,

²¹ laaman gagnë lëjt par gra ni naj zagdxe din chile' güündi zi'c rënman. Laaman gagnë dunuj ree din yayajc ree zi'c rënman guial ma nayajc ree tijbzi con Jesucrist. ¡Laaman rayal yaya'p ree respejt zianczi! Amén.

²² Compniar raliduladx ree Jesucrist, ad naroobt gui'ch guie, per rniaaban lojdi ad yaleny'a'di por ree diidx ni canin lëjt cunen lëjt consejw.

²³ Rugojn tëen lëjt guial ma barii dux compniar ree Timoteo ladxguiib abi' bal nayob gui'taman niz guie, dxel du gropan yo'p yudganajn lëjt.

²⁴ Gol bagajpdioz gra ree bén rniabee lojdi bén ni rulüü ree lëjt, në gra ree dux compniar ree bén rliladx ree Jesucrist. Abi' ree bén Italia rugajpdioz reeman lëjt.

²⁵ Dios güünle' gradi. Amén

Gui'ch bacaa Santiaaw

Rxhiaal Santiaaw xtiidx Dios

¹ Naj naj Santiaaw, cayūnan xchiin Dios nē xchiin Dad Jesucrist, rugajp-diozan gra ree bēn naj xdiaa Israel, nare'chidi guidib guidxliuj.

Quiargueijn zēēd loj Dios

² Gradi compniar raliduladx ree Jesucrist, rnin lējt, gol babaa majsi xhi-
etēez loj gualrzagdiaj tēdidi.

³ Lējt ragbee, chi rdēdidi gralojn gual riladxidi Dad Jesucrist, zian rusi-
ididi gapidi pasens.

⁴ Per gol been naguiejn gūūn pasens guin lējt yudar din gaquidi zi'c rēn
Dios, gusuudi loj xnejzaman, chitēē guiyaadxidi xhienin.

⁵ Bal chu lējt riaadx chu' mazri xquiargueijn, gol gunab xquiarguejndi loj
Dios. Laaman gunee gra ni riaadxidi, ad zabexuutaman guneeaman laan.

⁶ Per rayal chililadxidi gual guneeaman laan, ad rayalt chu' nawēēguidi, din
bēn ru nawēēg luxdoo naj zi'c xtūjp nijsdoo ni rinē bi ni guiezi.

⁷ Bēn naj zian ad cwēzidi gunee Dios ni guiniabidi,

⁸ din bēn ru nawēēg, ad rūjntaman tijbzi xgab, ad rinal tēētaman tijbzi nejz.

⁹ Lējt gual najdi bēnprob gol babaa, din loj Dios najdi bēn zojbloj.

¹⁰ Guiāad lējt benrijcw, gol babaa gual ma ragbeedi achet lasajc gualrijcw
loj Dios, din gualrijcw guin najn ni tēd zi'c rdēd guiaa rial dajn.

¹¹ Lējt ragbee chi rbēē loj gubijdx gojl, dxel rucwiidxan gui'xh, rba'y ree
xguiaan, dxel ad nixtri rguienan. Ziangajc benrijcw yu' dxej guiētaman majsi
galay gra ree ni rajpaman.

Bēn rdaan ree rdēd loj gualrzagdiaj

¹² Chabaa bēn rzudxi'ch loj xnejz Dios rdaan tēēman xhietēez rzajcaman
gual riladxaman Jesucrist. Chi ma gudaanman loj gualrzagdiaj, tia'man
coron rayalaman, laan naj gualnaban tiblayaa ni cwēb Dios yazaladxaman
loj ree bēn rēn laaman.

¹³ Bal chu rūjn xgab gūūn ni mal, ad najtan ni naladxaman gual Dios
rudxe' xgab guin guijcaman. Din ad yu't dxej guiēn Dios gūūnman ni mal,
ni'quid rgu' tēētaman xgab guijc bejn gūūnman ni mal.

¹⁴ Xixgabmal gajc bejn rudēē laaman gan gūūnman ni mal.

¹⁵ Zeel por xgabmal guin rūjn bejn dol, dxel chi ma rniabee dol guin
laaman, stijbzi xcasti Dios rayalaman.

¹⁶ Gradi compniar raliduladx ree Jesucrist, diidxli rēnan lējt, ad gusquiee
lējt gajc.

¹⁷ Graczi xgab zagdxe nē gra ni za'c zēēd loj Dios, bēn been gra ree bajl yu'
xanyabaa. Ad yu't dxej guidxaaman, zianczi rūjnman ni zagdxe.

¹⁸ Gual guyēnman, zeel baneeman gualnaban tiblayaa duloj ree, gual ma
raliduladx ree xtiidxaman, din yayajc ree zi'c ree bin yaloj yaca'man loj gra
ree ni beenman.

¹⁹ Zeel yan ma ragbeedi nine ree.

Royal yasa'n ree gra ni mal riga' loj guidxliuj

Rēnan lējt, zeel rnin lojdi gradi compniar raliduladx ree Jesucrist: Gol
guzujsin din gucaagdiajguidi, ad yoobladxidi gual guinieedi ni'qui gual
yalendi,

20 din b́en ralen ad zajct gũnman ni r̄en Dios.

21 Zeel gol gul̄el̄adx gra ni ad najt zagdx̄e n̄e gra ni mal riga' loj guidxliuj guie, gol gojc b́enchaawl̄adx, gol bazoob xtiidx Dios ni ma bacaagdiajguidi, din laan yab̄e l̄ejt loj dol.

22 Per gol been zi'c r̄eb xtiidxaman, ad aal rucaagdiajgzidan, chit̄ē cusquiee l̄ejt gajc.

23 Din b́en rucaagdiajgzi laan abi' ad r̄jntaman zi'c ma bacaagdiajgaman, najman zi'c tijb b́en ruguiaa loj guiaawajn,

24 per chi ma ziaman, rayanladxaman xhienaag naj lojman.

25 Per b́en ad rayanladxt ni bacaagdiajgaman r̄jnman nagueijn chig-nia'man xtiidx Dios mazri, din laan nayaaloj rab̄ē t̄een dunuj ree loj dol. Rzudxi'chaman loj nejj guin, r̄jn t̄eeman ni r̄en Dios. B́en gũn zian chu' luxdooman zagdx̄e por ni cayũnman.

26 Bal chudi naladx zinalidi xnejz Dios zagdx̄e per ad rajptidi cudad xhienin guinieedi, cusquiee l̄ejt gajc, dxel achet lasajc guial naladxidi zinalidi xnejz Dios.

27 Din par dux Dad ree Dios b́en zinal xnejzaman zagdx̄e naj b́en r̄jn yudar xindo biz̄ejb ree n̄e ree b́engunaa biz̄ejb chi rzagdiaj reeman, rajp t̄eeman cudad chit̄ē yabaman loj ni mal riga' loj guidxliuj.

2

Ad rayalt yalej ree loj ree bejn

1 Gradi compniar raliduladx ree Jesucrist b́en rniabee, ad rayalt cwedi loj ree bejn.

2 Yaguei'ch ree, chu' tijb bejn lod rado'p̄idi, najcwaman lajd zagdx̄e yu' t̄ēe guib̄n̄il or yaaman, chu' t̄ēe tijb b́enprob najcwaman lajd senci,

3 abi' mazri gũncwentidi b́en najcw lajd zagdx̄e guin, guīebidi lojman: "Gurej guie, laan naj luar zagdx̄e", guīaad loj b́enprob guin guīebidi: "Yagaj guzuli o gurej luyuj zii ya."

4 Chi r̄jndi zian, ¿nid cabedi bejn loj gajquidi ya?, ¿nid rula'chidi ya chi r̄jndi gra ree xgabmal guin?

5 Gradi compniar raliduladx ree Jesucrist, r̄enan l̄ejt, gol bacaagdiajg nine: Dios gule b́en naj ree b́enprob loj guidxliuj din chililadx da't reeman laaman, din yayal reeman lod rniabeeman zi'c cw̄ebaman loj ree b́en r̄en laaman.

6 Guīaad l̄ejt rusa'n xtudi b́enprob ree. Wen, ¿id benriwcw guin ree rusagzi l̄ejt ya rudxig t̄ēe reeman l̄ejt loj guxtis?

7 ¿Id laagajc reeman r̄nieeguidx Jesucrist ya, b́en naj b́enlasajc? Zi'c najman Xi'n Dios, ziangajc najdi xi'n Dios, guial nuchajguidi laaman.

8 Bal walidi r̄jndi ni ca loj xley Dios, zi'c ca loj xtiidxaman ni r̄eb: "Guȳen bejn ree zi'c r̄en l̄uj gajc", dxel zagdx̄equi cayũjndi.

9 Per bal mazri r̄jncwentidi tijb bejn guial loj stjibaman, dxel ma cayũjndi dol, ma rajp̄idi dol guial ad r̄jntidi cumplid xley Dios.

10 Din bal chut̄ēz zinal gra ni ca loj ley guin per ad r̄jntaman tijb ni rayal gũnman, ma cusaglojman guidib ley guin.

11 Dios gajc r̄eb: "Ad sun̄el xinguaaw ren o b́engunaa ren", r̄eb t̄eeman: "Ad gugũjtil bejn." Per bal id za'n̄el xinguaaw o b́engunaa ren ya per rugũjtil, dxel ma cusagloj xley Dios.

12 Zeel gol gunēe gol been t̄ēe zi'c ree b́en yad̄ēd cwent diidxli loj Dios por xtiidxaman ni rab̄ēe dunuj ree loj dol.

13 Din b́en ad rayat ree lasa', ad zayat Dios laa reeman dxej gũin xguial-guxtisaman. Per b́en raya ree lasa' ad najtan ni guidxeb reeman dxej guin.

Royal yaguieen ree ni r̄en Dios

14 Zeel rnin l̄ejt, ¿xhie sirv gũin bal chu guīeb, r̄iladxan Dios, abi' ad r̄jntaman ni r̄enman? ¿Wen, guialzi r̄iladxaman ya gacaman perdon?

15 Yaguie'ch ree, tijb dux compniar ree, b́en r̄iladx Jesucrist, najman xinguaaw o b́engunaa ya, guiyaadx xabaman con ni gawaman,

16 abi' guīeb tijb l̄ejt loj reeman: "Yaguiajdi zagdxe, gawidi zagdxe ad gagnajl t̄ēedi." Per bal id rud̄ēedi ni riaadx reeman, ¿xhieci gan guīebidi zian?

17 Ziangajc rzajc b́en r̄eb r̄iladx Dios abi' ad r̄jntaman ni r̄enman, achet lasajc guial r̄ebaman r̄iladxaman laaman.

18 Xt zajc chu na lojl: "L̄j̄n na r̄iladxil Dios, guīaad naj r̄unan ni r̄enman." Yan balũũ naj guial r̄iladxil laaman guial ad r̄jntil ni r̄enman, guīaad naj gul̄un guial r̄iladxan guial r̄unan zi'c r̄enman.

19 Zagdxe r̄j̄nl bal r̄iladxil yu' tijbzi Dios, per n̄e ree xindxab r̄iladx zian, abi' xt rnij reex guial rdxeb reex.

20 Zeel ad bal natontil, bignia' achet lasajc guial chililadx bejn Dios bal id r̄j̄nman ni r̄enman.

21 Basaaladx, dux b́engulal ree Abraham, bayagbee Dios laaman zi'c b́en ad beent dol, guial beenman ni guȳen Dios, chi r̄ebaman lojman din nuḡj̄t xi'nman Isaac nud̄ē t̄ēeman laax zi'c gon lojman.

22 Ma qui ruguiaal, guial bililadxaman, zeel beenman ni guȳen Dios. Guial beenman zian, zeel biguien guial diidxli bililadxaman laaman.

23 Zian gojc cumplid ni ca loj xtiidx Dios, lod r̄eb: "Bililadx Abraham Dios, zeel bayagbeeman laaman zi'c b́en ad beent dol", bayagbee t̄ē ree bejn laaman zi'c tijb xmiw Dios.

24 ¿Ma bignia'di yan ya? Rayagbee Dios bejn zi'c tijb b́en ad wayũjnt dol guial r̄j̄nman ni r̄enman, ad guialzi r̄ebtaman r̄iladxaman laaman.

25 Ziangajc gojc con tijb b́en brii laj Rahab, b́en goc b́engunaa dxuudx, bayagbee Dios laaman zi'c b́en ad beent dol guial beenman ni r̄en Dios, chi bad̄ēd lidxaman baquie'chloj tio'p ree b́en Israel we ladxaman biquiaa reeman xhienaag chu' ree xsuldad reeman, been t̄ēeman laa reeman yudar persi zia reeman nejz ren.

26 Din b́en achet xspr̄j̄t ad zajc guibanman. Ziangajc rzajc tijb b́en r̄iladx Dios: bal id zũj̄nman zi'c r̄enman, achet lasajc guial r̄ebaman r̄iladxaman laaman.

3

Du l̄idx ree naj zi'c tijb luar lod guidxa ni mal

1 Gradi compniar r̄aliduladx ree Jesucrist, rnin l̄ejt: Ad bal ziendi guīen gac mextr gulũũ xtiidx Dios, din ma ragbeedi, dunujn guial ralũũn xtiidxaman, mazri zro' naj guialguxtis ni gũin Dios con dunujn bal id zaguienanan zi'c rayal.

2 Du graczi ree r̄j̄n xhiet̄ēz dolan gan yu' dxej, per bal chu l̄ejt ad r̄j̄nt dol ni'qui tijb diidxguijdx ad r̄iri t̄ēet ro'di, najdi b́en naya delant loj Dios, rajc t̄ē r̄niabee l̄ejt gajc.

3 L̄ejt ragbee, chi ralu' ree fren ro' ree way din che reeb lod raȳen ree, zian raguien ree gan ranabee reeb.

⁴ Ziangajc ree barcw, majsi narooob reen, majsi por mazt rucadxaa bidoxh laa reen, per con tijb guiibdobëz ni la timón, con laan ma zajc chinë bejn laan lod rëntzaman.

⁵ Ziangajc naj du lüdx ree, najn ni dobëz, per narooob guialquia rüjnan. Najn zi'c tijb guij dobëz, per majsi najn ni dobëz, rüjnan guialquia narooob ruze'can dajn narooob.

⁶ Du lüdx ree naj zi'c tijb guij, zajc yanee në' reen ganax ni mal yu' loj guidxliuj. Bal id zaya'p ree cudad, du lüdx gajc ree guxhiin dunuj ree, dxel zianczi grii diidx zëéd loj xindxab du ro' ree.

⁷ Rayagbee ree guial graloj ree bedoxh zajc gagnadoo, xt në ree be rzuj në ree bëél nëtëé ree be yu' loj nijs, yan ma gognadoo reeb por ree bénguidxliuj.

⁸ Per lüdx bejn achut wayüjn gan nabee laan, najn zi'c tijb ni ad zajct gagnadoo, zi'c tijb ni guidxa venen rugüjt.

⁹ Con du lüdx ree ranee ree diidx zagdxé par dux Dad ree Dios, abi' con laagajcan raneguijdx ree bejn, bën been gajc Dios zi'c najman.

¹⁰ Gradi compniar ralidulacx ree Jesucrist, du ro' ree ririi diidx zagdxé në diidxguijdx, per ad rayalt gacan zian.

¹¹ Lëjt ragbee, lod rajch nijs zagdxé ad zajct grii nijs naxij,

¹² ad zajc tëët tia aceitunas loj yag higo, ad za zajct tia higo loj yag uv, ad zajc tëët grii nijs zagdxé lod ririi nijs naxij.

Ni rüjn bën ca' quiargueijn rudëé Dios

¹³ Bal chu lëjt naladx rajc rignia' tëé gra xtiidx Dios, rayal gacaman bënchaawladx guiban tëéman zi'c rayal, zian guiguien guial yu' xquiargueijnman.

¹⁴ Per bal guidxa guialnadëdloj luxdoodi rën tëédi gra par lëjt gajc din gaquidi mazri bën zojbloj, ad güündi benro' guial rajquidi xtiidx Dios, cusquieezidi guial rüjndi zian.

¹⁵ Lasa' quiargueijn guin ad Diost rudëé laan, xquiargueijn gajc bën riga' loj guidxliuj guien, zëéd tëén loj xindxab.

¹⁶ Din lod yu' guialnadëdloj lod yu' tëé bën rën gra par laagajcaman, ni yu' wadijl në gra loj ni mal.

¹⁷ Per bën rajp quiargueijn runee Dios, yaløj rüjnman naguieijn guibanman zagdxé lojman, gac tëéman bën ad rüjnt nabë, në benza'c, gap tëéman bejn ree pasens, yayaman bejn ree, gacaman benza'c con ree bejn, ad zabejtaman loj ree bejn güün tëéman cumplid ni guinieeman.

¹⁸ Bën rüjn ree naguieijn ribajn sin wadijl, raguuil reeman mod guinieenë reeman bejn zagdxé, zian rbajn reeman zi'c rën Dios.

4

¹ ¿Ban zëéd guial ralen lasa'di në guial rdilidi? ¿Id zëédan por xgabmal ni rüjndi ya?

² Rzëébladxidi gapidi ni ad rajptidi, zeel xt rugüjt lasa'di din tia'di ni rëndi, rdëdloj tëédi bejn ree, abi' bal id zajc gapidi ni rajp reeman, dxel ralen lasa'di abi' rdilidi. Per diidxliczi ad rajptidi ni rëndi, din ad rniabtidan loj Dios.

³ Abi' bal rniabidan, ad runeetaman laan, din ad rniabtidan par güündi ni zagdxé, rënzidan din guibandi zi'ctzi rëndi.

⁴ ¿Bën rusquiee! ¿Id ragbeedi ya guial chu rinal ni mal yu' loj guidxliuj ad zajct gaquidi xmiw Dios? Zeel bal chu rën chinal ni mal guin, laagajcaman za' contr Dios.

⁵ Ad ca xlia'tzi loj xtiidxaman lod rëb: “Badxe! xSprijt Dios du luxdoo ree, rënman Sprijt guin, xt neelojman laaman.”

⁶ Dád zro' naj yudar rüjn Dios dunuj ree, zi'c ca loj xtiidxaman lod rëb: “Dád naza'c Dios con ree bën rüjn naya lojman, per ad rüjn cwenttaman bën rüjn ree benro'.”

⁷ Zeel gol bazoob xtiidx Dios, ad gudëedi mod güün xindxab lëjt gan, zian chiquiedix loj xnejzidi.

⁸ Gol gubig loj dux Dad ree Dios din güün cwentaman lëjt, guiáad lëjt bëndol, gol bariica loj dol, guiáad ree bën yu' nawëeg luxdoo guial chinalidi xnejz Dios, con guidib luxdoodi gol binalaman.

⁹ Gol guyu xgab, gol guyu naya gol biin tée por xtolidi, luar guxijdxidi gol biin, luar chu' luxdoodi nix gol guyu naya,

¹⁰ gol been naya loj Dios, din guiliesaman xvaloridi.

Ad rayalt yala'ch du lasa' ree

¹¹ Gradi compniar raliduladx ree Jesucrist, ad bal rnieeguijdx lasa'di, din bën rnieeguijdx o bën rula'ch lasa', ma caneeguijdxaman cula'ch tēeman xley Dios. Bal rula'chidan, ad cayüntridi zi'c rniabeen, lëjtle ma canabee laan.

¹² Per tijbzi Dios basa'n ley guin rüjn tēeman guialguxtis, laaman ca' guialrniabee guial yabēeman nē guial gunijtaman. Per lüj, çchu najl zeel rula'chil bejn?

Dux guialnaban ree naj ni tibrajtzi

¹³ Yan gol bacaagdiajg nine lëjt bën rëb ree: “Yan o guixie ya yo'n loj tijb ciuda, ni yadxu'n tib ijz, yaguiēenan negojs lod yaguiēenan gan zro' da't milia.”

¹⁴ Ni'quid ragbeetidi xhie gac guixie, din dux guialnaban ree naj zi'c tijb bēj rguien tibrajt, stibrajt ma gunidlojn.

¹⁵ Zagdxeli naj guiēbidi: “Bal gunee Dios dunujn guialnaban, yaguiēenan nine o ni ni ya.”

¹⁶ Per lëjt mazri zinalidi xtiidx dxalidi, abi' laa reen naj ni mal.

¹⁷ Zeel bën ragbee xhienaag güünman ni zagdxabi' ad rüjntaman laan, ma cayünman dol.

5

Ni rüjn ree benrijcw

¹ |Lëjt, najdi benrijcw! Gol bacaagdiajg nine, gol biin gol gurixdiajg tēē, din ma zēēd lod sagdiajdi,

² tant zien ni rajpidi xt rxin reen, guiáad xabidi xt raw be laa reen.

³ Gra or nē plajt ni rajpidi xt rzobēj reen, laagajc reen rulüü ni mal rüjndi, laagajc reen gac zi'c tijb bajl gustib lëjt. Ma zidyob güün Dios xguialguxtisaman, guiáad lëjt gule'cchaaw ni lasajc ree loj guidxliuj guie.

⁴ Gol baguiaa, laa ree bën been xchiindi canab din quixidi laa reeman, xt Dios bën ca' gra guialrniabee ma biguiejn guial caygu' reeman guialquia.

⁵ Nabandi zi'ct rëndi, per cusni'szidi ni ad züjnt lëjt sirv chi guidxin dxej güün xguialguxtis Dios.

⁶ Din xt baguiilidi mod persi bagüjtidi bën ad beent ree xhienin, abi' achet gojc nüjn reeman chitēē niējt reeman.

Royal yarejdx ree Dios yaya'p tēē ree pasens

⁷ Gradi compniar raliduladx ree Jesucrist, gol gojp pasens xt dxej gui't dux Dad ree Jesucrist stijb, zi'c rdaan tijb bèn rüjn dxiin dajn, rbëzaman guia yaloj xt guia bigra din yalesaman ni guxübinman.

⁸ Ziangajc lëjt gol gojp pasens, ad yalenya'di, din ma zidyob dxej gui't dux Dad ree Jesucrist.

⁹ Rni tëën lëjt, ad yalenya' nè lasa'di, chitëë xhie casti yayalidi, din ma zidyob dxej güün xguialguxtis Dios.

¹⁰ Gol binal zi'c been ree bèn badëë xtiidx Dios loj ree bejn, gojp reeman pasens gudaan tëë reeman graloj guialrzagdiaj gudëd reeman.

¹¹ Rayagbee ree guial xiquilbaa ree bèn rdaan loj guialrzagdiaj. Ma biguejndi xcwent bèn brii laj Job, xhienaag gudaanman chi guzagdiajman, ragbee tëëdi xhienaag beennë Dios laaman, chi gulox gudëdaman loj gra guialrzagdiaj guin, din Dios dád naza'caman raya tëëman bejn ree.

¹² Gol gojp cudad chi rüjndi xhie compromisan loj bejn, ad guza'tidi Dios o xhie stijbnin ya, chitëë gudëed Dios lëjt casti, zagdxeli naj guinieedi diidxli güün tëë xtiidxidi cumplid.

¹³ Bal chu lëjt cazagdiaj, gol gurejdx Dios, o bal yu' luxdoodi zagdxe, gol biil par laaman.

¹⁴ Guiáad bal ragxuu tijb lëjt, rayal guinieedi bèn rniabee ree lëjt guial najdi bèn rliladx Jesucrist, din cwedx reeman Dios por laaman quieëb tëë reeman laaman sejt por laj Jesucrist.

¹⁵ Bal cwedx reeman Dios con guidib luxdoo reeman, zayajc bënragxuu guin, yales Dios laaman, abi' bal xhie dolan ma beenman, güünman laan perdon.

¹⁶ Zeel gol baxhoobdol loj lasa'di gol gurejdx tëë Dios por lasa'di din yayajquidi, din tijb bèn zinal xnejz Dios, chi rbejdxaman laaman, rüjn cwentaman laaman.

¹⁷ Zi'c bèn brii laj Elías bèn badëë xtiidx Dios loj ree bejn, gojcaman bënguidxliuj zi'cgajc dunuj ree, abi' chi gudi'n gunabaman loj Dios guial ad zalt guia, dxel ad golt guia choon ijz garol.

¹⁸ Chi guredxaman Dios zatijb, zianz bazuloj gol guia, dxel bayu guial-naza'c loj guidxliuj.

¹⁹ Gradi compniar raliduladx ree Jesucrist, bal chu lëjt rarii loj xnejz Dios abi' por stijb bëjn yayejquidi,

²⁰ gol gogbee guial chutëëz bèn rasiejc tijb bëndol loj nejz zagdxe chitëë chinalaman ni mal, laaman rabëë bëndol guin loj casti, abi' majsi ma beenman zien dol, gran gac perdon.

Gui'ch yaløj bacaa San Pedr

Rxhial Bëd xtiidx Dios loj ree bejn

¹ Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bën bire'ch gra lad abi' zøjbidi guiedx riga' ree niz Ponto, Galacia, Capadocia, Asia Menor në Bitinia.

² Ma gulej dux Dad ree Dios lëjt diidz gocli, zi'c goc xixgabaman. xSprijtaman gulëeca lëjt din guzoobidi diidz gac tēē luxdoodi naya delant lojman por xrejn Jesucrist. Zro' güünle' Dios lëjt yabe'cdxe tēēman luxdoodi.

Ni ralëjz ree gunee Dios

³ Quixtēē Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios.

⁴ Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tēēt dxej nitan.

⁵ Guial rililadxidi Dios, laaman rnaij lëjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lëjt perdon.

⁶ Zeel rabaa da'tidi majsi tēdidi graloj guialrzagdiaj tiblädēd,

⁷ din por guialrzagdiaj guin guiguien chu diidxli rililadx Dios, zi'c rüjnnē reeman or, rudēēd reeman laan loj bajl din gagbee reeman bal najn ganax or. Or guin najn ni rniidloj, zeel mazri lasajc guialrliladx laaman, bal chu taan xhietēēz loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiáad ree bejn në ree anjl guza't reeman laaman zagdxe gap tēē reeman laaman respejt guial rusnuu rililadxidi laaman.

⁸ Ad waguiaatidi Jesucrist per rēndi laaman, abi' yan rililadxidi laaman majsi ad waguiaatidi laaman, dād nix yu' luxdoodi abi' tant nix yu' luxdoodi, xt ad radxejlt xhienaag guiēbidi,

⁹ din lëjt ragbee, guial rililadxidi, ma nüjn Dios lëjt cwent zi'c ree bën achet xtol.

¹⁰ Diidz gocli, bën badēē ree xtiidx Dios loj ree bejn basiid reeman been tēē reeman naguiejn niagbee reeman xhienaag güün Dios bejn ree perdon, abi' rēb reeman xhienin güün Dios par lëjt guial najman benza'c.

¹¹ Por xSprijt Jesucrist gogbee reeman diidz gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tēē gac zian.

¹² Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrniabee Sprijt zēēd xanyabaa. Nē ree anjl ma rēn nejzdoo gagbee nine ree.

Ze ryal guiban ree xi'n Dios

¹³ Zeel gol guzusin gol bastēdguien tēē, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb.

¹⁴ Zi'c ree xi'n Dios nazobdiidz reeman, ad bal guibanridi zi'c gubandi gocli chi gadidi güünbee laaman.

¹⁵ Laaman gule lējt, zeel gol been naguiejn guibandi naya delant lojman, din laaman naj bēn naya nali.

¹⁶ Zi'c rēb loj xtiidxaman: “Gol gubajn naya delant lon, din naj naj bēn naya nali.”

¹⁷ Yan bal rnieedi Dios “Dad”, bēn rŭjn xguialguxtis tibloj, bal conin rŭjn tijb gaj bejn, rayal gapidi laaman respejt guidib tiamp guibandi loj guidxliuj guie.

¹⁸ Din lējt ragbee guial babēēman lējt loj costumbr ni basa'nnē ree xbéngulalidi lējt, costumbr ni ad rŭjnt ree sirv, abi' lējt ragbee guial gojx din yariidi loj ree, per ad gojxt con ree ni rnijt, zi'c or o plajt ya,

¹⁹ gojx con xrejn za'cdxoon Jesucrist ni guxhie'man loj crŭjz chi gŭtaman zi'c tijb xiil zagdxē be ad naxint, be rugŭjt reeman par Dios por xtol ree bejn.

²⁰ Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rēnman lējt.

²¹ Zeel por laaman rliladxidi Dios bēn basban laaman badēē tēēman guialrniabee lojman, yan con guidib luxdoodi ma rliladxidi Dios rbēz tēēdi ni guneeman.

²² Yan, guial ma ruzoobidi xtiidxaman ni naj diidxli, ma naya luxdoodi delant lojman din guiēn lasa'di zi'c rayal, zeel gol guyēn lasa'di con guidib luxdoodi.

²³ Din ma bidxaa mod nabandi, zi'c rulŭū gojlidi stijb, abi' guialnaban zinalidi ad zēēdtan por tijb bēn nit, zēēdan por xtiidx Dios, diidx naban, diidx ni ad zanijt,

²⁴ din loj xtiidxaman rēb:

Gra bénguidxliuj naj zi'c gui'xh dajn,

guiáad ni rajp reeman naj zi'c xguiaa gui'xh guin.

Rbidx gui'xh guin, abi' riadj xguiaan,

²⁵ per xtiidx Dios ad yu't dxej nitan.

Abi' laan naj xtiidxza'c Jesucrist ni ma biguejndi.

2

¹ Zeel gol basa'n gra ni mal, gra ni rusquiee, ad bal rŭjnzidi, gol basa'n guialnadēdloj nē guial rnieeguidx lasa'di.

² Zi'c re'c ree xindo quigojlnějzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengŭt con gra ree bēn nuchajg Jesucrist chi gui'taman stijb,

³ bal walidi ma ragbeedi guial naj Dios benza'c.

Jesucrist naj zi'c guiaj naban

⁴ Gol bibig loj Jesucrist, laaman naj zi'c guiaj naban. Been ree bénguidxliuj laaman tiblād, per par Dios najman bēn lasajc, laaman gule laaman.

⁵ Ziangajc lējt, guial ma rliladxidi Jesucrist, najdi zi'c ree guiaj naban ni cayajcnē yadood Dios. Najdi bixhioz naya luxdoo rŭjn sirv lojman, din nabandi zi'c ruladx Dios, laan naj ni rudēēdi lojman zi'c gon por Jesucrist.

⁶ Rēb loj xtiidx Dios:

Gol baguiaa, guzoban tijb guiaj zagdxē luguiedx Jerusalén.

Laan naj guiaj nabee, guiaj zojbloj, nilasajc tēē.

Bal chu chililadx laan,

ad yu't dxej yaya'nxtuman.

⁷ Par lējt, guial rliladxidi Jesucrist, laaman naj zi'c guiaj lasajc da't. Per par ree bēn ad rliladxt rajc cumplid ni rēb loj xtiidx Dios, lod rēb:

Guiaj ni gulëëgo'n ree bën rüjn yu,
yan laan naj guiaj zøjbloj.

⁸ Rajc tëë cumplid ni rëb stib lajt loj xtiidxaman, rëban:

Laaman naj guiaj rirejl guia' ree bejn,
abi' rureeyujn laa reeman.

Rzajc reeman zian, guial ad ruzoobt reeman xtiidx Dios, zian rajc ni rëbaman xcwent reeman.

⁹ Per lëjt naj bën guleman, najdi bixhioz rüjn ree sirv lojman, guial najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdxë rüjnman. Laaman babëë lëjt loj nejz mal, persi bagu'man lëjt loj xnejz za'cdxoonman.

¹⁰ Gocli achutczï najdi, per yan ma najdi xbejn Dios. Gocli ad ragbeetidi guial raya Dios lëjt, per yan ma ragbeedi.

Zi'c rayal guiban ben rliadx Dios

¹¹ Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianczï din gusa'n ree bejn xnejz Dios.

¹² Gol gubajñ zagdxë loj ree bën ad nünbeet laaman, zian majsi rnieeguidx reeman lëjt yan, rëb reeman najdi benmal, per chi guguaa reeman guial zagdxë naj ni cayüjñdi, dxel guza't reeman laaman zagdxë, dxëj ni yadëëd reeman cwent lojman.

¹³ Guial rliadxidi Dad Jesucrist, gol bazoob xtiidx gra ree bën rniabee loj guidxliuj guie. Gol bazoob xtiidx pristent rniabee xnaciondi

¹⁴ në xtiidx gubernador bën rxhiaalaman din gudëëdaman casti bën rüjn ree ni mal guilies tëëman xvalor ree bën rüjn ni zagdxë.

¹⁵ Din rën Dios güündi ni zagdxë ree din gucwëëzidi ro' ree bentont ad rignia't abi' rnieeguidx reeman lëjt.

¹⁶ Zajc güündi zi'c rëndi, per ad por ziantzi güündi ni naj ni mal, gol been zi'c rayal güün ree xbejn Dios.

¹⁷ Gol gojp respejt gra bejn zi'c rayal, gol guyën ree bën rliadx Jesucrist, gol bidxeb Dios, gol gojp tëë respejt pristent rniabee xnaciondi.

Gol gudaan loj guialrzagdiaj

¹⁸ Lëjt bën naj ree mojs, gol bazoob xtiidx ree xpatrondi, gol gojp tëë reeman respejt, ad bën najtzi ree benza'c raya tëë reeman lëjt, në ree bën naj bendxuudx.

¹⁹ Din zagdxë naj guial chu rdaan loj guialrzagdiaj, majsi ad rayaltaman laan, rdaanman laan guial rënman güünman ni ruladx Dios.

²⁰ Bal chu lëjt rzagdiaj por ni mal rüjñdi, achet lasajcan, per bal rzagdiajdi por ni zagdxë rüjñdi abi' rdaandi loj guialrzagdiaj guin, laan lasajc delant loj Dios,

²¹ din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman.

²² Ad yu'tczï dxëj beenman dol abi' ni'qui tijb diidx rusquiee ad briit ro'man.

²³ Chi rëb reeman diidxguidx lojman, ad badxi'taman laan con diidxguidx, chi basagzi reeman laaman, ad rëbtaman loj reeman guial yaguijx reeman ni cayüjñnë reeman laaman, graczan basa'nman loj Dios bën rüjn xguialguxtis zi'c rayal.

24 Guzagdiaj Jesucrist loj crüzj por dux tol ree persi babëëman dunuj ree lojn din yabajn ree zi'c rën Dios, abi' por lod bidxeelguidxaman ma bayünman du luxdoo ree naya.

25 Gocli gubajndi zi'c xiil rzëëb, per yan ma najdi xbejn Jesucrist bën rën lëjt rajp tëëman lëjt zi'c tijb bën rajp xiil.

3

Zi'c rayal guiban ree bën ca' lasa'

1 Në lëjt bëngunaa ma yu' ree lacheel, gol bazoob xtiidx lacheelidi, din bal chu lacheelidi ad riladxt xtiidx Dios, per chi guguaaa reex zi'c nabandi, dxel guililadx reex. Ad rüjnt naguiejn xhie guiëbidi loj reex,

2 chililadx reex guial guguaaa reex nabandi zi'c rayal rajp tëëdi laa reex respejt.

3 Chi rzujchaawidi, ad bal rdëdlaj rünchaaw guidxguijquidi ni'qui guial güündi ujs ganax ni or o gacwidi ganax lajd lasajc.

4 Mazri zagdxë naj guial güündi naguiejn gac luxdoodi naya delant loj Dios, gol gojc benza'c në bën chaawladx, din laan ad yu't dxej nitan, abi' laan mazri lasajc delant lojman.

5 Din zian gubajn ree bëngunaa binal ree xnejzaman goc da't, bililadx reeman laaman bazoob tëë reeman xtiidx lacheel reeman.

6 Zian been Sara, bazoob xtiidx lacheelaman Abraham, abi' guneeman laaman "Dad". Gaquidi zi'c xi'n Sara, bal rüjndi ni zagdxë sin guialrdxëb.

7 Ziangajc lëjt xinguaaw, gol gubajnnë lacheelidi zagdxë, gol gojp reeman respejt ad gualzi najt reeman bën nada, rayal güündi zian guial në reeman rayal guialnaban tiblayaa razaladx Dios, guial najman benza'c. Zian gol gubajn, chitëë xhie gudxe' nawëëg lëjt chi cwedx guiniabidi laaman.

Xhie rayal güündi chi xhie güün në reeman lëjt

8 Zeel rnin loj gradi: Gol gubajnnë lasa'di zagdxë, gol bachajg lasa'di, gol been xgab tijbzi, gol guyën lasa'di zi'c rayal, gol gojc benza'c në bën chaawladx.

9 Ad yadxi'di ni mal rüjn ree bejn lëjt, ad yadxi'di diidxguidx ni na reeman lojdi, gol gurejdx Dios din gagnëman laa reeman, din Dios gulej lëjt par gagnëman lëjt.

10 Din rëb loj xtiidxaman:

Bën rën guiban zagdxë chu' tëë luxdooan zagdxë, rayal gapaman cudad ad guinieeman diidxguidx ad guinieë tëëman diidx rusquiee.

11 Cwëëladxaman ni mal, güünman ni zagdxë güün tëëman naguiejn guibannë ree lasa'man zagdxë, zian rayal guibanman zianczi.

12 Din dux Dad ree Dios rniaj bën rüjn ree ni rëman rüjncwënt tëëman xtiidx reeman chi rbejdx reeman laaman, per ralenman bën rüjn ree ni mal.

13 Achut güün lëjt ni mal, bal cayüjndi naguiejn güündi ni zagdxë.

14 Per xiquilbaadi bal cusagdiaj bejn lëjt guial cayüjndi ni zagdxë. Ad chu'di xgab ad guidxëb tëëdi por zian,

15 gol gojp respejt gol badxe'guijc tëë dux Dad ree Jesucrist. Gol guzujsin din yadxi'di xtiidx ree bën guiniabdiidx lojdi xcwënt ni riladxidi, per gol badxi' xtiidx reeman zagdxë con diidx zagdxë ree.

16 Gol gubajn zagdxë din guiguien guial achet ni mal yu'guijquidi din yaya'nxtu ree bën rnieeguidx lëjt, guial rüjndi ni zagdxë riladx tëëdi Jesucrist.

¹⁷ Mazri zagdxe naj sagdiaj bejn guial güünman ni zagdxe, bal zian rën Dios, luar sagdiajman guial güünman ni mal.

¹⁸ Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree béndol, zian guxhala-man nejz din gac yadxin ree loj Dios, güjtaman zi'c bénguidxliuj per babanman por xSprijtaman.

¹⁹ Chi gadaman yaban, wej xSprijtaman bigneenëman xsprijt ree bengüt lod nayaaw reeman.

²⁰ Sprijt guin ree naj xsprijt ree bén ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzi bejn gulaa loj nijs banijt guidxliuj tiamp zii.

²¹ Nijs guin naj zi'c guialriobnijs ni rulüü guial ma nayajc ree perdon. Guialriobnijs guin ad rënt guiëban guial najn par gusian dux cuerp ree, rulüün guial caynaab ree loj Dios din yaya dux quiargueijn ree, guial ma raya'p ree guialnaban cüb guial baban Jesucrist loj ree bengüt,

²² bén bayë'p xanyabaa abi' za'man xladbee Dios lod canabeeman anjl ree në ree sprijt ca' guialrniabee.

4

Gol beennë quiargueijn ni banee Dios dxiin

¹ Zeel zi'c gudëd Jesucrist loj guialrzagdiaj, në lëjt rayal taan lojn. Din por guialrzagdiaj guin rüjn bejn dol tibläd,

² din güünman zi'c rën Dios guidib xguialnabanman luar güünman zi'c naj xixgabaman.

³ Xchej da't gubajndi zi'c naban ree bén ad nünbeet Dios, gubajndi zi'ctzi guyëndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzüdx da'tidi, guyën tëëdi ni ad najt ree Dios, laan naj ni rbijxhlädx Dios.

⁴ Per yan guial ad zinaltridi zi'c naban ree bén naban zian, zeel radxa loj reeman, rnieeguijdx tëë reeman lëjt.

⁵ Per rayal yadëëd reeman cwent loj Dios bén za' par güün xguialguxti-saman con ree bén naban në ree bén ma güjt.

⁶ Din në ree bén ma güjt bigueijn xtiidx Dios chi guban reeman loj guidxliuj guie, din guiban reeman loj Dios majsi par ree bénguidxliuj ma güjt reeman.

⁷ Ma zidyob dxex nit guidxliuj, zeel gol bastëdguien gol guzujsin tëë din cwedx guiniabidi Dios con guidib luxdoodi.

⁸ Ad yayanladxidi guial guiën lasa'di zi'c rayal, din bén rën lasa' rüjnman perdon majsi xhietëëz rüjnnë reeman laaman.

⁹ Bal yu' tijb xcompniaridi rniab luar lidxidi din yaya'nman, gol badëëdsii lidxidi con guidib luxdoodi ad yalenyä'di.

¹⁰ Loj tijb gajdi ma banee Dios quiargueijn din güündi ni rayal güündi. Zeel gol been lasa'di yudar con ni rajc rüjndi, din guiguien guial cayüjndi zi'c rayal con quiargueijn ni bazaladxaman lojdi.

¹¹ Bal chu lëjt ca' quiargueijn par gulüü xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bén ca' quiargueijn par güünman yudar dux compniar ree, rayal güünman laan con gojl razaladx Dios lojman. Gra ni cayüjndi, gol beenan din guza't ree bejn Dios zagdxe por Jesucrist, bén rayal respejt në guialrniabee zianczi. Amén.

Gol gudaan gra guialrzagdiaj

¹² Gradi compniar raliduladx ree Jesucrist, rēnan lējt, zeel rnin lojdi, ad ru nawēēguidi guial zro' naj loj guialrzagdiaj cadēdidi, din laan naj zi'c prueb par lējt. Ad rudi xgag chexc zeel cazajquidi zian.

¹³ Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaadi xbianiman dxej gui'taman stijb.

¹⁴ Xiquilbaadi bal chu na diidxgujdx lojdi guial zinalidi Jesucrist, din gra dxejczj za'nē xSprijt Dios lējt, bēn ca' guialrniabee.

¹⁵ Achet lasajc bal cazagdiajdi guial bagūjtidi bejn, o por guialgubaan, o por guial rūjnđi ni mal o guial rudi lod ad rayaltidi.

¹⁶ Per bal chu cazagdiaj guial zinalaman xnejz Jesucrist, ad rayalt yatuman, rayal gudēeman quixtēē loj Dios guial ma najman xbejn Jesucrist.

¹⁷ Gol gogbee, guial rtiējb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree bēn ad rēnt guzoob xtiidxza'caman.

¹⁸ Nacli ree bēn zinal xnejz Dios nawēēg naj guial yaguaaj reeman xanyabaa, piorli ree bēndol bēn ad nūnbeet ree Dios, xhieczi naag naj luar lod yayal reeman.

¹⁹ Zeel bēn cazagdiaj ree zi'c naj xixgab Dios, rayal gusnuu gūūn reeman ni zagdxe gusa'n tēē reeman gran loj Dios, laaman gagnē laa reeman. Laaman bazaladx guialnaban rūjn tēēman zi'c rayal.

5

Consejw par ree bēn rliladx Jesucrist

¹ Yan rēnan gudēdan consejw loj ree bēn rniabee ree lojdi, naj guial ca'n guialrniabee zi'cgajc laa reeman, naj tēēn testiw xcwent ni guzagdiaj Jesucrist, zi'cgajc laa reeman guguan xbianiman dxej gui'taman stijb, zeel rēnan guiēn nine ree loj reeman.

² Rnin lojdi, gol gunaj ree xbejn Jesucrist, bēn rayal ree gulūūdi din gusnuu chinal reeman xnejz Dios. Ad gūūndi dxiin guin guialzi ragbeedi rayal gūūndi laan, gol beenan guial yu'di gan gūūndi laan, con guidib luxdoodi gol beenan, ad bal gūūndi laan guialzi rzēēbladxidi milia.

³ Ad guial ca'tidi guialrniabee din nabeedi zi'c tal rēndi, rayal guibandi zagdxe din guguaa ree bēn rliladx Jesucrist din guiban reeman zian,

⁴ din chi gui't bēn rniabee dunuj ree stijb, dxel guneeman tijb niza'cdxoon ni ad yu't dxej nit.

⁵ Ziangajc lējt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tēē xtiidx ree xcompniaridi, din: Ralen da't Dios bēn rūjn ree benro', per dād benza'can con ree bēn rūjn naya.

⁶ Zeel gol been naya loj Dios, bēn ca' gra guialrniabee, din guiliesaman xvaloridi chi guidxin dxej.

⁷ Gol basa'n gra xgab yu'di loj Dios, din laaman rnij lējt.

⁸ Gol guzujsin, gol gojp cudad, din xindxab xin ralen da't lējt, za'x zi'c tijb beedx rliaan, rguuilix chu gūūnx gan.

⁹ Zeel ad tiēbidi gūūnx lējt gan, gol guzujdx'i'ch loj ni rliladxidi, din ragbeedi guial zi'c cazagdiajdi, ziangajc cazagdiaj ree bēn rliladx Jesucrist guidib guidxliuj.

¹⁰ Per chi ma gudēdidi ta'n loj guialrzagdiaj, dxel gagnē Dios din gusnuu gūūndi naguiejn guibandi zi'c rēnman, su tēēdi rejs, sudxi'chidi, gap tēēdi segur guial zinalidi xnejzaman. Laagajcaman naj Dios cayūjn dunuj ree

yudar loj gra ni cayza'c ree, abi' ma gulejman dunuj ree din yayal ree tiblyayaa lod rniabeeman guial nachajg ree Jesucrist.

¹¹ Laaman rayal respejt, din tijbzi laaman ca' guialrniabee zianczi. Amén.

Diidx bigra ca ree loj gui'ch guie

¹² Silvan, tijb dux compniar ree, bèn ragbeen naban zi'c rën Dios, laaman been gui'ch guie din ganin lojdi tio'p choon diidx, par gunen lëjt consejw nètëë par gugoynan lëjt guial diidxli rën Dios lëjt, zeel gol basnuu gol guyënman gol guyën tëë lasa'di.

¹³ Bèn rliladx ree Jesucrist, bèn ma gulej Dios zi'cgajc lëjt, bèn zojb ree Babilonia, rugajpdioz reeman lëjt. Në Marcw xin nūnan zi'c da xi'nan rugajpdioz lëjt.

¹⁴ Guial rën lasa'di, gol bagajpdioz lasa'di xhietëëz horan radxaaglojdi. Yabe'cdxe Dios luxdoodi guial ma nuchajguidi Jesucrist.

Gui'ch barojp bacaa San Pedr

Rxhiaal Bêd xtiidx Dios loj ree bejn

¹ Naj, Simón Bêd, najn tijb xi apóstol Jesucrist rün tēen sirv lojman, cucan gui'ch guie par lëjt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bën rabëë bejn ree loj dol.

² Güünle' Dios lëjt mazri, yabe'cdxe tēēman luxdoodi guial ma nünbeedi laaman nē dux Dad ree Jesucrist.

Zi'c rayal gac ree xbejn Jesucrist

³ Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tēē ree naya delant lojman, din ma naguieenbee ree Dios bën gule dunuj ree guial ca'man guialrniabee naj tēēman benza'c.

⁴ Zeel ma beenman promejs du loj ree, promejs narooob ree ni lasajc ree, abi' por laa reen ma yu' xSprijt Dios luxdoodi, ma been tēēdi tiblad gra ree ni ad rüjnt sirv nē ree ni mal riga' loj guidxliuj guie.

⁵ Zeel gol been naguiejn por guialrliladx ni rajpidi gol gubajn zagdx, din guial guibandi zagdx, dxel mazri ma gagbeedi xhienaag guibandi.

⁶ Abi' guial gagbeedi xhienaag guibandi, ma zajc gucweëz xixgabmalidi, abi' guial gucweëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios,

⁷ dxel guial guibandi naya delant lojman, ma zajc guiën lasa'di, abi' guial guiën lasa'di, ma zajc guiëndi gra ree bejn.

⁸ Bal yu'guijquidi nine ree cusnuu tēē cayüjndi naguiejn guibandi zian, dxel ad naban xlia'tzidi, ad beenbee xlia' tēētidi dux Dad ree Jesucrist.

⁹ Per bën ad rüjnt naguiejn guiban zian, laaman naj zi'c tijb bēnütia'p o zi'c tijb bën ad ruguiaat zijt, ma bayanladxaman guial biquied Dios xtolaman ni beenman guia'xchej.

¹⁰ Zeel rnin lojdi, compniar raliduladx ree Jesucrist, zi'c ma bacaabee Dios lëjt ma gulej tēēman lëjt, gol been naguiejn gol guzudxi'ch loj xnejzaman, din bal sudxi'chidi, ad zayajbtridi loj dol.

¹¹ Zian gapidi nejz nali din chu'di lod rniabee dux Dad ree Jesucrist tiblayaa, bën babëë dunuj ree loj dol.

¹² Zeel zianczi ganin nine ree lojdi din gusaaladxidi laa reen, majsi ma ragbeedan, majsi ma zinal tēēdi ni diidxli ni ma bacaagdiajguidi.

¹³ La'tgaj nabanen loj guidxliuj guie, naladxan rayal gunen consejw lojdi con ree diidx guin.

¹⁴ Din por dux Dad ree Jesucrist ma gogbeen guial ma zidyob dxej yazaan loj guidxliuj guie.

¹⁵ Zeel cayün da'tan naguiejn rnienē'n lëjt, din gusaaladxidi da diidxan majsi ma güjtan.

Bën baguiaa ree xguialrniabee Jesucrist

¹⁶ Chi ranan lojdi xhienaag naj xguialrniabee Jesucrist xhie tēē naag gui'taman stijb, ad balëëguijctan ni banan lojdi. Din con quijb du lojn baguiaa xbianiman

¹⁷ chi biguien cha' Dios diizd xanyabaa, gulesaman xvaloraman baza't tēēman laaman zagdxē, rēbaman: "Xin guie naj da xi'nān, rēnan laax rabaanē' tēēn laax."

¹⁸ Abi' dunujn nayajc bēn biguien cha' Dios diizd xanyabaa chi nadxu'nē'n Jesús ruguia' zii, lod biguien xbianiman.

¹⁹ Zianan zeel mazri raliduladxan ni rēb ree bēn badēēd xtiidx Dios loj ree bejn, zeel zagdxē naj bal yu'guijquidi ni rēb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lējt chaawladx cusnuu cayagbeedi xcwent Dios xt chi gui't Jesucrist stijb, bēn naj bajl rusni par dunuj ree, dxel ma gagbeedi graczan zi'c tal najn.

²⁰ Per gol gogbee guial ni'qui tijb xtiidx Dios ad zajct chignia' bejn por xixgabzaman.

²¹ Din bēn badēēd ree xtiidx Dios loj ree bejn, ad guneet reeman xtiidxaman zi'c goczi xixgab reeman, guneē reeman ni basajb xSprijt Dios guijc reeman.

2

Bēn ruliū ree diidx rusquiee (Judas 4-13)

¹ Zian zi'c guyu ree bēn rusquiee loj ree bēn Israel tiamp gulal rēb reeman rudēēd reeman xtiidx Dios loj ree bejn, ziangajc chu' ree bēn rusquiee guliū lējt ni rusquiee ree, yaguuil reeman mod dīn guliū reeman lējt ni ad najt diidxli par gagdxadi. Ad zatiējbt reeman nabee Jesucrist laa reeman, majsi baguixaman xtol reeman, zeel ad zaglaat gunijt Dios laa reeman.

² Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios.

³ Abi' guial rzēēbladx reeman milia, yaguuil reeman xhie ni rusquiee guliū reeman lējt dīn tia' reeman xmiliadi, per ziangajc ad zalaat reeman loj xcasti Dios ni cabēz laa reeman, dīn diizd gocli mal yu' casti ni yayal ree bēn rūjn zian.

⁴ Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabēz reeman dxej gūūn xguialguxtisaman.

⁵ Ad been tēētaman perdon benmal guyu ree tiamp gulal, banijtaman laa reeman con nijs. Tijbzi Noé bēn balūū xhienaag chinal ree bejn xnejz Dios, laazaman naj bēn gulaa con zagajdx ree bejn.

⁶ Ziangajc chi been xguialguxtis Dios con ree guiedx Sodoma nē Gomorra, baze'caman laa reen xt bayajc reen cobdēj, abi' laan naj ejempl par ree bēn guiban nadxuudx zi'c ree bēn guiedx zii ree.

⁷ Per baslaa Dios bēn brii laj Lot, bēn guban zi'c rēn Dios guyu tēēman xgab guial baguiaaman zi'c guban ree benmal guin.

⁸ Abi' guial gubajnman zagdxē, zeel guixie guixie guyunaya da'taman por ree nidxuudx biguiejnman baguiaa tēēman been ree bēn guin.

⁹ Rajc rūjn Dios yudar bēn ruzoob ree xtiidxaman xhietēēz loj prueb cadēd reeman, abi' ma naj xhie gūūnnēman benmal ree dxej gūūn xguialguxtisaman.

¹⁰ Laan naj ni yayal ree bēn naban zi'ctzi rēn reeman, ad rēnt reeman nabee Jesucrist laa reeman, dād nad reeman, ad ratut reeman, ad rdxeb tēēt reeman rnieeguijdx reeman bēn naj ree xianjl Dios.

¹¹ Abi' ni'qui ree xianjl Dios, majsi rajp reeman mazri gojl nē gualrniabee, per achet diidxguijdx rēb reeman lojman contr laa reeman.

¹² Lasa' ree bén guin naban reeman zi'c ree be, ad yu't xquiarguejñ reeman abi' rnieeguijdx reeman ni ad rignia't reeman, guidiblagaa rñjn reeman ni rëntzi reeman sin xgab. Zi'c ree be zëedzi reeb loj guidxliuj guie par guiniaaz reeb din guiët reeb, ziangajc laa reeman por nidxuudx rñjn reeman ma cusëëb laagajc reeman,

¹³ abi' yaguijx reeman gra ni rñjnnë reeman bejn ree.

Rabaa da't reeman guial rñjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rñjndi chi rawidi tijbzi, abi' rabaa da't reeman guial rusquiee reeman lëjt.

¹⁴ Ad zajct guguaa reeman tijb béngunaa sin guial ad zñjnt reeman xgabdxuudx, ad rucwëët rñjn reeman dol rusquiee tëe reeman bén ad rignia'za'ct ree xtiidx Dios din güün reeman dol, abi' dád nasin reeman par güün reeman gan ni rzëëbladx reeman, laa reeman ma naj par yayal reeman xcasti Dios.

¹⁵ Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bén badëëd xtiidx Dios loj ree bejn, xi'n bén brii laj Beor, chi guyënman nñjnman gan milia por ni mal nñjnman.

¹⁶ Per chi zëman zigüeenman ni mal guin, bacwëez Dios laaman, basneeman xburaman zi'c tijb bejn, zian bacwëez Dios xixgabtontaman.

¹⁷ Yan bén rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tëët dxej yarii reeman.

¹⁸ Ganax ree diidx nabë rü reeman, diidx ad rñjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bén qui cusa'nri ree nejzmal.

¹⁹ Rëb reeman guial achut rayal nabee bejn, per ad rignia't reeman guial nidxuudx rñjn reeman rniabee laa reeman, din graczi ni ad rajct rucwëez rñjn ree bejn, laan naj ni rniabee laa reeman.

²⁰ Chi ma beenbee ree bejn dux Dad ree Jesucrist guial laaman naj bén babëe dunuj ree loj dol ma basa'n tëe reeman nidxuudx yu' ree loj guidxliuj guie, abi' rtiëjb reeman rniabeen laa reeman stijb, dxel piorli guiban reeman guial chi gad reeman güünbee laaman.

²¹ Zagdxeli naj ad nñjnbeet reeman xnejzaman, guial beenbee reeman laan abi' basa'n reeman xtiidxza'caman ni ma bigueiejñ reeman.

²² Con laa reeman rajc cumplid diidx ni rëb: "Rayaw bë'cw ni bayëbib, guiáad cüch qui gojzri con nijs naya rayub loj nizbajn."

3

Ni gac chi gui't Jesucrist stijb

¹ Gradi compniar raliduladx ree Jesucrist, rën da'tan lëjt, nine naj gui'ch rarojpx rxhialan par lëjt. Loj grop gui'ch guie cayünan nagueiejñ ganenë'n lëjt din güündi xgab zi'c rayal.

² Gol basaaladx ni rëb ree bén badëëd xtiidx Dios loj ree bejn tiamp gulal, gol basaaladx tëe xtiidx dux Dad ree Jesucrist, bén babëe dunuj ree loj dol, xtiidxaman ni balüü ree apóstoles lëjt.

³ Gol badxe'guijx, chi ma zidyob nit guidxliuj, chu' ree bén guze' lëjt abi' guiban reeman zi'ctzi rën reeman.

⁴ Abi' na reeman lojdi: "¿Gon promejs been Jesucrist guial gui'taman stijb? Ma güjt gra ree dux béngulal ree, abi' graczi ni yu' loj guidxliuj guie sta naj gajc diidx chi gocchaaw guidxliuj."

⁵ Na reeman zian, guial ad rënt reeman yayagbee reeman guial diidz tiamp gulal mal yu' xanyabaa në guidxliuj abi' por xgualrniabee Dios brieri guidxliuj guin loj nijs.

⁶ Gojc xchej, dxel con nijs gajc banijt Dios bën gocli ree.

⁷ Per xanyabaa në guidxliuj raguiaa ree yan, ma naj guial gunijt Dios laa reen con bajl por xgualrniabeeman dxej ni güün xgualguxtisaman con ree bën ad ruzoobt xtiidxaman.

⁸ Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijz, guiaad timil ijz naj zi'c tib dxej.

⁹ Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰ Zi'c tal ri't tijb bēngubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiaad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

¹¹ Yan, guial ma ragbeedi xhienaag nit guidxliuj, rüjn naguiejn guibandi naya sin dol zi'c rën Dios.

¹² Con gan gol gulējz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii.

¹³ Per dunuj ree caylējz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

¹⁴ Zeel rnin lojdi compniar raliduladx ree Jesucrist, la'tgaj cabēzidi gac ree ni guin, gol been da't naguiejn din guidxaagloj Dios lējt naya sin dol, riga'dxenē tēē lasa'di.

¹⁵ Gol badxe'guijc, guial dux Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bën rayēn da't ree, ziangajc naman lojdi loj ree xtiidxaman, zi'ctzi naj quiarguejn ni bazaladx Dios lojman.

¹⁶ Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawēg guial chignia' bejn, dxel bën ad rajtctzi ree në ree bën ad zinalt xtiidx Dios con guidib luxdoo, ruchaa reeman ni rën guiēb xtiidx Pab, zi'cgajc rüjnnē reeman ni zēēd ree loj xtiidx Dios, zeel laagajc reeman cusēēb laa reeman.

¹⁷ Compniar raliduladx ree Jesucrist, rēnan lējt, zeel yan guial ma ragbeedi nine ree, gol gojp cudad chitēē güün ree bën rën ree gusquiee lējt gan, chitēē gucwēēz sudxi'chidi loj xnejz Dios.

¹⁸ Zagdxeli gol been naguiejn güünbeedi mazri dux Dad ree Jesucrist, bën baguijx dux tol ree, gol been tēē naguiejn gagbeedi mazri guial rën da'taman dunuj ree. Laaman rayal respejt gra tiampczi.

Gui'ch yaløj bacaa San Juan

Jesucrist runee guialnaban tiblayaa

¹ Gui'ch guie naj par gugoynan lëjt xcwent Jesucrist, bën mal yu' gocli diizd chi gad guidxliuj gacchaaw. Ma bacaagdiajgan, ma baguiaan ni beenman, baguiaan laaman zagdxe, ma baqui' tēen laaman con quijb du yaan. Laaman naj bën runee guialnaban,

² ma bi'taman loj guidxliuj, ma baguiaan laaman, dunujn nayajc testiw ragojn tēen lëjt xcwentaman. Laaman naj bën runee guialnaban tiblayaa, najman bën guzunē Dios diizd gocli bi't tēeman loj guidxliuj.

³ Zeel ragoynan lëjt ni ma baguiaan ni ma baguiejn tēen din gaquidi tijbzi con dunujn zi'c nayajcan tijbzi con dux Dad ree Dios con xi'nman Jesucrist.

⁴ Ragoynan lëjt nine ree loj gui'ch guie din chu' luxdoodi zagdxe, zi'c yu' du luxdooon zagdxe.

Royal yanaab ree loj Dios din güünman dux tol ree perdon

⁵ Ni ne naj ni balüü Jesucrist dunujn, yan ragoynan lëjt guial naj Dios biani, achetzi dol nabannēman.

⁶ Bal yaguie'ch ree nadxu'nē' reeman abi' zunaal gajc ree neyz mal rasquiee ree ad zunaalt ree diidxli.

⁷ Per bal yunaal ree xbiani Dios zi'c za'man, guial achet xtolaman, dxel ma nayajc ree tijbzi con du lasa' ree. Abi' xrejñ xi'nman Jesucrist chiquied gra dux tol ree.

⁸ Bal yaguie'ch ree achet dux tol ree yu', rasquiee dunuj gajc ree, ad cayguie'ch tēet ree diidxli.

⁹ Per bal yaxhoobdol ree loj Dios, rayagbee ree zagdxe guial güünman ni naman, güünman perdon dux tol ree, chiquied tēeman gra ni mal yu' du luxdoo ree.

¹⁰ Per bal yaguie'ch ree ad waguieent ree dol, raguieen reeman zi'c bēn rusquiee, ad raliduladx tēet ree xtiidxaman.

2

Bën rēn Dios rayal guzoobaman xtiidxaman

¹ Xi'n, rucan nine ree par lëjt chitēē güündi dol. Per bal chu lëjt rüjn dol, raya'p ree bën guiniee por dunuj ree loj Dios, laaman naj Jesucrist bën ad wayüjntczi dol.

² Por xguialgüjtaman naj dux tol ree perdon, abi' ad dux toltzi ree, nē gra xtol ree bēnguidxliuj.

³ Bal razoob ree xtiidx Dios, zian raya'p ree segur guial ma naguieenbee reeman zagdxe.

⁴ Per bal chu rēb: "Nünbeen Dios", abi' ad ruzoobtaman xtiidxaman, rusquieeman, din ad walit ni rēbaman.

⁵ Per bēnruzoob xtiidxaman, diidxli rēnman laaman con guidib luxdooan, zian rayagbee ree guial ma nabajnnē' reeman.

⁶ Bën rēb nabannēman Dios, rayal guibanman zi'c guban Jesucrist.

Bën zinal ree xnejz Dios rēn lasa' reeman

⁷ Gradi compniar raliduladx ree Jesucrist, diidx canin lojdi yan ad diidx cüb reen, xtiidx gajc Jesucristan ni ma bigueiejndi diizd yaløj, laagajcanan canin lojdi yan.

⁸ Per canin laa reen zi'c rulüü diidx cüb reen, din por Jesucrist në por lëjt ma rguien guial ma cusa'ndi ni mal abi' zinalidi ni zagdx.

⁹ Bal chu rëb zinal xnejz Dios abi' ralen lasa'man, sta zinalaman nejz mal.

¹⁰ Bén rën lasa' zinalaman xnejz Dios, abi' ma naj nawëëg guial güün dol laaman gan.

¹¹ Per bén ralen lasa', nabanman loj nejz mal, ad ragbeetaman ban cheman, din nejz mal guin basa'n laaman zi'c tijb bénlutia'p.

¹² Xi'n, rucan gui'ch guie par lëjt, din ma gojc xtolidi perdon por xguialrni-bee Jesucrist.

¹³ Cucan nine ree par lëjt guial najdi bén ma rignia' mazri chunin naj Jesucrist. Bén ma yu' gocli diizd chi gad guidxliuj gacchaaw, cucan ni ne ree par lëjt bén ma rignia' ta'n chunin naj Jesucrist din ma beendi gan ad züjntidi ni zëéd loj xinxab, cuca tëen nine ree par lëjt bén qui guzuløjri ree cayignia' chunin naj Jesucrist din ma nünbeedi dux Dad ree Dios.

¹⁴ Bacan nine ree par lëjt guial ma rignia'di mazri chunin naj Jesucrist bén ma yu' gocli diizd chi gad guidxliuj gacchaaw, baca tëen nine ree par lëjt guial ma rignia'di ta'n chunin naj Jesucrist, din za'dxi'chidi zinal tëedi diidxli xnejz Dios con guidib luxdoodi, ma been tëedi gan ad züjntidi ni zëéd loj xinxab.

¹⁵ Ad sëëbladxidi ni ad najt zagdx ni rüjn ree bejn loj guidxliuj, bal chu rën mazri ni riga' loj guidxliuj guie, ad rëntaman dux Dad ree Dios,

¹⁶ din achetczi ni mal yu' loj guidxliuj guie zëéd loj Dios, ni rajc gajc loj guidxliuj guien, rüjn reeman zi'c naj xixgab dxuudx reeman, rzëëbladx reeman gap reeman gra ni ruguiaa reeman, rüjn tëe reeman benro' por gra ni rajp reeman.

¹⁷ Per guidxliuj guie yu' dxej nitan con guidib ni mal yu' lojn, per bén naban zi'c rën Dios rajpaman guialnaban tiblayaa con laaman.

Yunaal ree ni naj diidxli

¹⁸ Xi'n, rnin lojdi ma zidyob dxej nit guidxliuj, din ma bigueiejndi guial rayal gui't tijb bén su contr Jesucrist guiëb tëeman laaman naj Jesucrist. Yan zien ree bén ralen laaman ma balüüloj, zeel rayagbee ree guial ma zidyob dxej nit guidxliuj.

¹⁹ Bén ralen ree Jesucrist, duløj gajc ree brii reeman nayajc ree bén rliladx Jesucrist, per diidxliczi ad najt reeman dux bejn ree, din bal niajc reeman dux bejn ree, naya'n reeman duløj ree guial raliladx ree Jesucrist, per gojc nine din guiguien guial ad grat reeman naj dux bejn ree.

²⁰ Jesucrist banee xSprijt Dios lojdi, abi' por laaman gradi ma ragbee ni naj diidxli.

²¹ Cucan nine par lëjt, ad guial ad ragbeetidi conin naj ni diidxli, cucanan guial ma ragbeedan, abi' lëjt ragbee guial ni'qui tijb ni rusquiee ad zajct gui't loj ni diidxli guin.

²² Yan, ¿chu naj bén rusquiee? Bén rusquiee naj bén rëb guial ad Jesúst naj bén guxhaal Dios loj guidxliuj. Bén rëb zian naj zi'cgajc naj bén za' contr Jesucrist guial ad rliladxtaman Dios ni'qui xi'nman Jesucrist.

²³ Din chutëez bén rëb guial ad najt Jesucrist Xi'n Dios, laaman ad nünbeet dux Dad ree Dios, per bén rëb Jesucrist naj Xi'n Dios në dux Dad ree Dios nünbeeman.

²⁴ Zeel gol binal diidx ma bigueiejndi diizd guia'xchej chi bililadxidi Jesucrist. Bal chinalidi diidx guin ree, dxel ziz nabannëquidi dux Dad ree Dios con xi'nman Jesucrist.

²⁵ Abi' ni ma rëb Jesucrist guneeman naj guialnaban tiblyaa.

²⁶ Cucan diidx guie ree par lëjt por ree bën rën gusquiee lëjt.

²⁷ Per nabannëdi xSprijt Dios, bën banees Jesucrist, ad riaadxidi bën gulüü lëjt, din Sprijt guin gajc rulüü lëjt gra, abi' ganax diidxli ad ni rusquieet, zeel gol gubajn zi'c rniabeeman din gusunuu gaquidi tijbzi con Jesucrist.

²⁸ Yan rnin lojdi xi'n, gol binal xnejz Jesucrist, chitëe yadxeb ree chi gulüülojman, ad zaya'nxtu tëet ree lojman chi gui'taman.

²⁹ Lëjt ragbee guial rüjn Dios zi'c rayal, ragbee tëedi guial graczi ree bën rüjn zi'c rayal, laa reeman naj xi'n Dios.

3

Bën naj ree xi'n Dios

¹ Gol been xgab, plact rën dux Dad ree Dios dunuj ree, zeel balëe dulaj ree xi'n Dios, abi' waliczan nayajc ree xi'nman. Per bën ad zinalt ree xnejz Dios ad nünbeet reeman dunuj ree zi'c xi'nman, din ad nünbeet reeman laaman.

² Gradi compniar raliduladx ree Jesucrist, rënan lëjt, rnin lojdi: Ma nayajc ree xi'n Dios, majsi ad rayagbeet ree xhienaag yayajc ree chi gui't Jesucrist stijb, per raya'p ree segur guial yayajc ree zi'c najman, din xt nadxel yaguaia ree diidxliczi xhienaag najman.

³ Graczi ree bën rililadx guial gac zian, rüjn reeman naguiejn guiban reeman naya delant loj Dios zi'c laaman, guial achet xtolaman.

⁴ Per graczi ree bën ad zinalt ni rniabees Dios, cayüjn reeman dol, din dol naj guial ad rüjnt reeman ni rniabeeman.

⁵ Lëjt ragbee guial bi't Jesucrist loj guidxliuj din chiquiedaman xtol ree bejn, abi' laaman ad guyutczu dxej ad yu' tëet dxej nünman dol.

⁶ Zeel bën naj ree tijbzi con laaman rüjn reeman naguiejn ad rüjnt reeman dol, per graczi bën rüjn dol zianczi ad wayignia't reeman chu najman, ad wayünbee tëet reeman laaman.

⁷ Xi'n, ganin lëjt, ad bal tiëbidi chu gusquiee lëjt, din bën cayüjn ni rën Dios, laaman naya delant lojman zi'c naya Jesucrist delant lojman.

⁸ Per bën yu' loj dol xbejn xindxaban, din xindxab rüjn dol diizd yaløj, abi' Jesús Xi'n Dios bi'taman loj guidxliuj par zianczi din güünman gan loj xgualrniabee xindxab.

⁹ Zeel ni'qui tijb ree bën ma zinal xnejz Dios ad rusnuutri rüjn dol, din ma nabannëman Dios, ad rayal tëetri güünman dol din ma najman xi'nman.

¹⁰ Laa rguien gajc chu reenin naj xi'n Dios chutëe reenin naj xi'n xindxab, din chutëez ad rüjnt ni rën Dios ad rën tëet lasa'man, dxel ad najtaman xi'n Dios.

Royal yayën du lasa' ree

¹¹ Abi' lëjt ma bigueiejndi xtiidx Dios diizd guia'xchej guial royal yayën dulasa' ree.

¹² Ad rayalt yaguieen ree zi'c been Caín, cwëjbaman gunabee xindxab laaman, zeel bagüjt bijchaman. Caín been zian, din beenman ganax ni mal, guiáad bijchaman been ni zagdxë.

¹³ Zeel gradi compniar raliduladx ree Jesucrist, ad gagdxadi bal yalen ree bënguidxliuj lëjt guial ma zinalidi xnejz Dios.

¹⁴ Dunuj ree rayagbee guial ad nayajct ree zi'c bengüt par laaman, ma raya'p ree gualnaban delant lojman, guial rayën du lasa' ree. Per Bén ad rënt lasa', sta najman zi'c bengüt par Dios.

¹⁵ Graczi Bén ralen lasa' najman zi'c Bén rugüjt bejn, abi' lëjt ragbee, tijb Bén rugüjt bejn ad rajptaman gualnaban tiblayaa delant loj Dios.

¹⁶ Ma rayagbee ree conin naj guial rën lasa', guial güjt Jesucrist por dunuj ree, yan ziangajc dunuj ree rayal yayën dulasa' ree xt yayëjt ree por laa reeman.

¹⁷ Per bal chu tijb dunuj ree ad riaadxt xhienin loj guidxliuj guie abi' ruguiaaman tijb Bén cayaadx laan abi' ad rüjntaman laaman yudar, dxel, ¿xhienaag guiëbaman guial rënman Dios?

¹⁸ Xi'n, ganin lëjt, ad con diidxtizi yaguie'ch ree guial rayën dulasa' ree, rayal guiguien guial rayën dulasa' ree por ni raguieen ree.

Raya'p ree segur guial za' në Dios dunuj ree

¹⁹ Zian rayagbee ree cayzoob ree xtiidx Dios, abi' raya'p ree segur guial cayguieen ree ni rayal yaguieen ree delant lojman.

²⁰ Per bal cayguieen ree zian abi' sta ragbee du luxdoo ree guial ad cayguieent ree zi'c rayal, rayal yayagbee ree guial Dios naj mazri benro' guial duløj ree, abi' laaman ragbee gra.

²¹ Zeel zi'c rënan lëjt rnin lojdi, bal ragbee du luxdoo ree guial cayguieen ree ni zagdxe, dxel raya'p ree segur guial cayguieen ree ni zagdxe delant loj Dios.

²² Laaman gunee graczi ni yanaab ree lojman guial razoob ree xtiidxaman ni rniabeeman, abi' raguieen ree nagueijn raguieen ree ni ruladxaman.

²³ Ni ne naj ni rniabeeman yaguieen ree guial yaliduladx ree Jesucrist naj xi'nman yayën tëë dulasa' ree zi'c gunabeeman dunuj ree.

²⁴ Bén rüjn ree ni rniabee Dios, laa reeman nabannë Dios abi' Dios nabannë laa reeman, rayagbee tëë ree guial za'man con dunuj ree por xSprijtaman Bén baneeman duløj ree.

4

Bén ad rliladxt Jesucrist ad yu't xSprijt Dios luxdoo man

¹ Gradi compniar raliduladx ree Jesucrist, rënan lëjt, rni tëen lojdi: ad rliladxidi chutëez Bén rëb rnieeman xtiidx Dios. Yaløj xgaj gol gogbee zagdxe bal wali reeman xtiidx Diosan rniee reeman o ad laatanan ya, din loj guidxliuj guie ziza zien ree Bén rusquiee, rëb reeman rniee reeman xtiidxaman.

² Yan din gagbeedi chu reenin rniee xtiidx Dios: Laa reeman naj Bén rliladx guial Jesucrist bi't zi'c bénguidxliuj. Bén rliladx ree zian yu' xSprijt Dios luxdoo reeman.

³ Per Bén ad rliladxt ree zian ad yu't xSprijtaman luxdoo reeman, laa reeman naj Bén ralen Jesucrist. Ma biguejndi guial rayal gui't tijb Bén su contr laaman. Abi' diidz yan ma za' sprijt guin guidxliuj, zeel zien ree Bén ralen Jesucrist ma yu' loj guidxliuj guie.

⁴ Per lëjt xi'n ma najdi xi'n Dios, guiáad ree Bén ralen Jesucrist ad zajct güün reeman lëjt gan, din mazri narooob gualrniabee ca' Bén nabannë lëjt guial loj Bén nabannë Bén zinal ree nejz mal loj guidxliuj guie.

⁵ Bén za' ree contr Jesucrist rüjn reeman xgab tijbzi ni riga' loj guidxliuj guie rniee reeman, guiáad ree Bén ad rliladxt Jesucrist rüjncwent reeman ni rëb reeman.

⁶ Per dunuj ree ma nayajc ree xbejn Dios, abi' bën ma nünbee ree Dios rucaagdiajg reeman ni ranee ree, guiáad ree bën ad nünbeet Dios ni'quid rüjncwentt reeman ni ranee ree, zian rayagbee ree chu nabannë xSprijt Dios bën rulüü dunuj ree diidxli chutëenin nabannë sprijt ni rulüü ganax ni rusquiee.

Rën Dios dunuj ree

⁷ Rënan lëjt, rnin lojdi rayal yayën dulasa' ree, din guialrën lasa' zëed loj Dios. Gra bën rën lasa' naj xi'n Dios nünbee tëe reeman laaman.

⁸ Abi' bën ad rënt lasa' ad wayünbeetaman Dios, din guialrën lasa' zëed loj Dios.

⁹ Balüü Dios guial rënman dunuj ree, din majsi tijbzi xi'nman Jesucrist, guxhaalaman laaman guidxliuj din yaya'p ree guialnaban delant loj Dios por laaman.

¹⁰ Rën Dios dunuj ree. Ad dunujt ree bayën laaman, yaløj laaman guyën dunuj ree, zeel guxhaal xi'nman Jesucrist persi güjtaman por dux tol ree, zeel ma yu' perdon par dunuj ree.

¹¹ Rënan lëjt, zeel rnin lojdi, zi'c rën Dios dunuj ree, ziangajc rayal yayën dulasa' ree.

¹² Majsi achut waguiaa laaman, per bal rayën dulasa' ree, nabannë'qui ree Dios, abi' diidxli rayën reeman.

¹³ Dunuj ree rayagbee guial nabannë' reeman abi' laaman za' con dunuj ree, din ma baneë xSprijtaman duloj ree.

¹⁴ Abi' dunuj gajcan baguiaa ragojn tëen guial guxhaal Xi'n Dios loj guidxliuj guie persi güjtaman por xtöl gra ree bejn.

¹⁵ Chutëez rëb guial Jesucrist naj Xi'n Dios nabannëman Dios, abi' Dios nabannë laaman.

¹⁶ Dunuj ree rayagbee raliladx tëe ree guial rën Dios dunuj ree. Por laaman zëed guial rayën dulasa' ree. Abi' bën rën lasa' nabannëman Dios, guiáad Dios nabannë laaman.

¹⁷ Bal wali rayën ree Dios zi'c rënman, ad najtan ni yadxeb ree dxej güün xguialguxtisaman, din ma nayajc ree tijbzi con laaman, zi'c naj Jesucrist tijbzi con laaman. Din guidib dux guialnaban ree nabannë' reeman loj guidxliuj guie.

¹⁸ Bën rën Dios, ad rdxebtaman, din bën rën laaman diidxli, ad rdxebtraman, per bën ad rënt laaman rdxebaman, din rüjnman xgab casti ni yayalaman, zeel bal chu rdxeb, ad walitaman rënman laaman.

¹⁹ Dunuj ree rayën Dios, din yaløj laaman guyën dunuj ree.

²⁰ Bal yu' bën rëb: "Rënan Dios", abi' ralen lasa'man, rusquieeman. Din bal id rën lasa'man bën ruguiaaman, çxhienaag guiënman Dios bën ad waguiaaman?

²¹ Laagajcaman na: Bën rën Dios rayal guiën lasa'man.

5

Guial raliduladx ree Jesucrist zeel raguieen ree gan loj ni mal

¹ Gra ree bën rüladx guial Jesús naj bën guxhaal Dios, laa reeman naj xi'nman. Bal chu rën dux Dad ree Dios, në gra ree xi'nman rënman.

² Chi rayën ree Dios raguieen tëe ree ni rniabeeman, dxel rayagbee ree guial rayën ree gra ree xi'nman.

³ Guial guiën bejn Dios naj guial güünman ni rniabeeman. Abi' ad nawëegt naj guial güünman ni rniabeeman,

⁴ din gra bèn naj xi'nman ma rüjn gan loj ree ni mal yu' loj guidxliuj guie. Abi' guial raliduladx ree, zeel ma raguieen ree gan loj ree ni mal guin.

⁵ Bén rliadx guial Jesús naj Xi'n Dios, tijbzi laaman zajc güün gan loj ree ni mal yu' loj guidxliuj.

Ni rulüü Dios dunuj ree xcwent Jesucrist

⁶ Jesucrist bi't loj guidxliuj, gurobnijsaman guxhie' tõe xrejman loj crüzj. Ad gurobnijszaman, në guxhie' xrejman. XSprijt Dios naj testiw, laaman rü diidxli xcwent ree nine.

⁷ Choon testiw yu' xanyabaa: xDadaman Dios, Jesucrist në xSprijt Dios, guiyon reeman naj tijbzi Dios.

⁸ Yu' tõe choon testiw loj guidxliuj: XSprijt Dios, në guial gurobnijs Jesucrist con ni guxhie' xrejman loj crüzj, guiyon reen rü diidx tijbzi.

⁹ Bal raliduladx ree ni na ree bejn, mazri rayal yaliduladx ree ni na Dios xcwent xi'nman Jesucrist, din xtiidxaman mazri lasajcan.

¹⁰ Bén rliadx Xi'n Dios, laaman rliadx ni rëb Dios xcwentaman. Per bèn ad rliadx laaman, rüjnman Dios zi'c bèn rusquiee, din ad rliadxaman ni rëbaman xcwent Xi'nman.

¹¹ Abi' ni rëbaman naj guial ma baneeman guialnaban tiblayaa duloj ree, guialnaban guin zëed por xi'nman.

¹² Bén za'në Xi'n Dios tijbzi, laaman naban tiblayaa delant loj Dios, per bèn ad za'nët laaman tijbzi, laaman ad ca't guialnaban guin.

Ni bigra ca loj gui'ch guie

¹³ Cuan nine ree par lëjt najdi bèn rliadx Jesucrist Xi'n Dios din gagbeedi guial ma ca'di guialnaban tiblayaa delant loj Dios.

¹⁴ Rayagbee ree zagdxe: chi yanaab ree xhienin lojman, rüjncwentaman dunuj ree, bal yanaab ree zi'c rënman.

¹⁵ Bal rayagbee ree rüjncwentaman dunuj ree chi ranaab ree xhienin, ziangajc rayagbee ree zagdxe guial guneeman ni ranaab ree.

¹⁶ Bal chu dunuj ree rayagbee guial tijb dunuj ree cayguieen dol ni zajc gac perdon, rayal cwedxaman Dios por laaman zian gudëe Dios guialnaban tiblayaa lojman, bal zajc gac dol guin perdon. Yu' dol ni ad zajct gac perdon, abi' ad canitan guial cwedxidi Dios por bèn rüjn dol guin.

¹⁷ Graczi ni mal naj dol, per yu' dol ni zajc gac perdon.

¹⁸ Rayagbee ree guial bèn ma naj ree xi'n Dios ad rusnuutri rüjn reeman dol, din Jesucrist Xi'n Dios naj bèn rniaj laa reeman, abi' xindxab ad zajctri nabeex laa reeman.

¹⁹ Rayagbee ree guial nayajc ree xbejn Dios, per ree bénguidxliuj, bèn ad najt ree xbejn Dios, xindxab rniabee laa reeman.

²⁰ Rayagbee tõe ree guial Jesucrist Xi'n Dios ma bi'taman loj guidxliuj guie, guxhalaman dux quiarguejn ree, persi baguieenbee ree bèn naj quijb Dios. Yan nadxu'në' reeman tijbzi por Xi'nman Jesucrist. Tijbzi laaman naj Dios, por laa tõe man yu' guialnaban tiblayaa.

²¹ Xi'n, gol gojp cudad chitëe chinalidi ni naladx ree bejn naj Dios.

Gui'ch barojp bacaa San Juan

Rxhiaal Waj xtiidx Dios loj ree bejn

¹ Naj, bèn rniabee loj ree bèn rliadx Jesucrist, rxhialan gui'ch guie lojdi najdi bèn gulej Dios rliadx tëëdi Jesucrist, diidxli rënan lëjt, abi' ad tijbtizi naj, në gra ree bèn zinal xtiidx Dios.

² Rënan lëjt guial ma nabannë' ree xtiidx Dios abi' laan nabannë dunuj ree zianczi.

³ Dux Dad ree Dios con Xi'nman Jesucrist güünle' lëjt, yaya reeman lëjt, yabe'cdxe tëë reeman luxdoodi guial zinalidi xtiidxaman rën tëë lasa'di.

Rniabee Dios yayën du lasa' ree

⁴ Dád nix guyu luxdon chi gogbeen yu' ree xcompniaridi, diidxli zinal xtiidx Dios naban tëë reeman zi'c rniabee dux Dad ree Dios.

⁵ Yan, zi'c rënan lëjt najdi dux compniar ree, gol been wen gol guyën lasa'di. Ni canin lojdi ad nicübtan, diidx ni bacaagdiajg gajquidi diizd guia'xchejn.

⁶ Guial rën Dios naj guial guiban bejn zi'c rniabee Dios, abi' ni rniabee-man ni bacaagdiajgudi diizd guia'xchej naj guial rayal guiban bejn, guiën lasa'man.

Bén rusquiee ree bejn

⁷ Rnin zian, din gra ladczi guidxliuj ziza zien ree bèn rusquiee ree bejn, guial ad rliadxt reeman bi't Jesucrist loj guidxliuj zi'c bejn, bèn rüjn zian rusquieeman abi' za'man contr Jesucrist.

⁸ Gol gojp cudad chitëë gusëëbidi ni rayalidi por ni cayüjndi, din tia'di gra ni rayalidi delant loj Dios.

⁹ Chutëëz bèn racaa guijc zi'c balüü Jesucrist bejn ree ad nabannëtaman Dios, per bèn zinal xtiidx Jesucrist zi'c balüüman bejn ree, laaman nabannë Dios con Xi'nman.

¹⁰ Bal chu gui't lidxidi abi' ad rulüütaman xtiidx Dios zi'c balüü Jesucrist, ad cu'di laaman lënü, ad güüncwent tëëdi ni rnieeman.

¹¹ Din bèn rüjncwent xtiidxaman, rën guiëban guial ma za'man conform con ni rusquiee bèn guin.

Diidx bigra ca ree loj gui'ch guie

¹² Zien ree ni rënan ganin lëjt, per ad rëntan gucanan loj gui'ch, din wed ad zaglaat guialan guidganan lëjt din ganenë' quijb naj lëjt din chu' du luxdoo ree zagdxe tijbzi.

¹³ Bèn naj ree bèn ma gulej Dios, dux compniar raliduladx ree Jesucrist bèn zojb ree niz guie, rugajpdioz reeman lëjt.

Gui'ch bayon bacaa San Juan

Rugajpdioz Waj Gayo

¹ Naj, bën rniabee loj ree bën rliadx Jesucrist, rxhialan gui'ch guie par lüj Gayo najl da miwan diidxli rënan lüj.

² Zi'c rënan lüj rniaaban loj Dios zi'c zël zagdx loj xnejzaman ziangajc grii zagdx gra ni cayüjnl guneë tēēman lüj guialnadaan.

³ Dád nix guyu luxdon chi guna garol dux compniar ree guial diidxli nabanl zi'c rëb loj xtiidx Dios.

⁴ Achet mazri ni rgu' luxdon zagdx zi'c chi riguejnan guial diidxli naban ree da compniaran zi'c rëb loj xtiidx Dios.

⁵ Zi'c rënan lüj Gayo, rnin lojl guial zagdx da't naj ni cayüjnl con dux compniar ree bën rliadx Jesucrist abi' mazczi zagdx naj ni rüjnl con ree bën zëäd lood ren.

⁶ Din laa reeman na delant loj gra ree bën rliadx Jesucrist, bën rado'pnë' reen guie, guial gunajchi'l laa reeman, zeel zagdx güünl guial güünl laa reeman yudar con ni ryaadx reeman guial cayüjn reeman sirv loj Dios din gusnuu xnejz reeman.

⁷ Din brii reeman zigtie'ch reeman xtiidx Jesucrist abi' ad rtiëjbt reeman tia' reeman ni rudëe ree bën ad rliadxt laaman.

⁸ Zeel dunuj ree bën raliduladx ree Jesucrist, rayal yaguieen ree yudar bën catie'ch ree xtiidxaman, zian yaguieen ree yudar guire'ch ni naj diidxli.

Ad ruzoobt Diótréfes diidx

⁹ Ma guxhalan tijb gui'ch loj ree dux compniar ree bën rliadx ree Jesucrist, per Diótréfes guial ruladxaman nabeeman ad rüjncwenttaman dux tiidxan.

¹⁰ Zeel bal guidganan lëjt dxel ganenë'n laaman xcwent guial rnieeguidxaman rniee tēēman diidx rusquiee contr dunujn abi' ad tijbtzi laan rüjnman nē ad rudëet lidxaman yaya'n dux bejn ree bën zëäd ree lood ren, ad rtiëjb tēētaman gudëäd lidx ree ben ren yaya'n reeman, abi' ree bën rudëäd lidx ad rtiëjbtaman chu' reeman lën yadoo.

¹¹ Zi'c rënan lüj Gayo rnin lojl ad chinalil neyz mal, been ni naj ni zagdx din bën rüjn ni zagdx laaman naj xbejn Dios per bën zinal ni mal ad nünbeetaman Dios.

¹² Graczi reeman ruza't Demetrio zagdx guial binalaman zi'c rayal, laa nen gajc xhienaag nabanman xt dunujn raza't laaman zagdx abi' lüj ragbee guial diidxli naj ni raguie'chan.

Diidx bigra ca ree loj gui'ch guie

¹³ Zien ni rënan ganin lojl per ad rëntan gucanan loj gui'ch,

¹⁴ din wed ad zaglaat guialan guidganan lüj, dxel ganenë' quijb naj lüj.

¹⁵ Yabe'cdxe Dios luxdool, dux miw ree bën riga' ree guie rugajpdioz lüj, bagajpdioz tēē gra dux miw ree.

Gui'ch bacaa San Judas

Rugajpdioz Judas b n naj ree b n gule Dios

¹ Naj, Judas bijch Santiaaw, cay nan sirv Jesucrist, cucan gui'ch guie par l jt najdi b n ma gulej dux Dad ree Dios guial r nman l jt, abi' dux Dad ree Jesucrist canaj l jt.

² Gusnuu yaya Dios l jt, yabe'cdxeman luxdoodi gui n t edi laaman.

B n ad rnieet ree diidxli

(2Pe. 2:1-17)

³ Gradi compniar raliduladx ree Jesucrist, r nan l jt, diizd gocli guy nan nixhialan gui'ch lojdi, din gagbeedi xcwent xhienaag naj perdon ni raya'p ree delant loj Dios, per yan ma bidxin dxej r jn naguiejn gaxhalan gui'ch guie lojdi din ganin lojdi din guiniadi guialrliladx ni ma raya'p ree, ni nayaaloj, guial nayajc ree xbejn Jesucrist.

⁴ Din yu' ree b n r jn b n rliladx naabzi par go'ch reeman lojdi. B n guin ree diizd gocli ma ragbee Dios guial rayal reeman casti, din ad rdxebt reeman laaman, rudxiib reeman guijc naj Dios benza'c, abi' naban reeman zi'ctzi r n reeman. Ad rti jbt reeman nabee Jesucrist laa reeman, laaman naj tijbzi dux Dad ree b n rniabee dunuj ree.

⁵ Majsi ma ragbeedi ni ganin l jt, per ganinan din gusaaladxidi guial majsi bab e Dios b n Israel ree Egipto, per despuejs banijtaman b n ad bililadx ree laaman.

⁶ N  ree anjl ad bazoobt xtiidx Dios niniabee reeman lod bad eman loj reeman, basiaawaman laa reeman lod nacay da't xt dxej g un xguialgux-tisaman.

⁷ N t e ree b n Sodoma con ree b n Gomorra con ree guiedx gure gajxh, ad laat gubajn reeman, been reeman gra loj nidxuudx zi'ctzi guy n reeman, zeel basagzi Dios laa reeman, banijtaman baze'c t eman laa reeman, laan naj ni rayal yaguaiaa ree chit e yaguieen ree zian.

⁸ Per ni'czi zian, yan ziangajc r jn ree b n raguuil mod par go'chzi reeman lojdi, r jn reeman xgab guial zajc g un reeman zi'ctzi r n reeman, ruxhiin laagajc reeman, ad rti jb t et reeman nabee Jesucrist laa reeman, rnieeguijdx t e reeman b n naj ree xianjl Dios.

⁹ Per chi gudildiidx ree arcangel Miguel con xindxab guijc xcuerp Moisejs, ni'quid bayaxt anjl guin ni jbaman diidxguijdx loj xindxab guin, tijbzi ni r baman naj: "Ladxaa Dios gusa'nan l j."

¹⁰ Abi' yan b n raguuil gajc ree mod go'ch reeman lojdi, rnieeguijdx reeman ni ad rignia't reeman, per nidxuudx r jn reeman, ad r jnt reeman laan xgab, contzi r jn reeman laan zi'c ree be guial ad r jnt reeb xgab. Zian cus eb laagajc reeman delant loj Dios.

¹¹ ¹Prob laa reeman!, guial zinal reeman ni mal zi'c been Ca n, mazri zinal reeman milia zi'c been Balaam, gui t t e reeman zi'c g t Cor  chi guy nman niniabeeman luar Moisejs.

¹² Laagajc reeman ruxhiin lanij r jndi chi rado'pidi din gawidi tijbzi, guidiblagaa ad ratut reeman raw reeman ad r jn t et reeman xgab por ree bejn, r jnz reeman xgab par cha l n reeman. Naj reeman zi'c zaj ni ad n t guia ni rin  bi, zi'c ree yag rbidx abi' ria'xh reen guial ad rtiat reen.

¹³ Naj reeman zi'c xtüjp nijsdoo chi rajsan zro' da't, din zi'c ririi bichijn loj nijs guin, ziangajc sin guialxtu rüjn reeman nidxuudx ree, naj tēē reeman zi'c ree bajl xanyabaa ni basēēb xnejz, dxel tiblayaa ma rayal reeman lod nacay da't.

¹⁴ Abi' bēn brii laj Enoc, laaman gojc gajdx loj ree xdiaa Adán, guneeman xcwent ree bēn guin chi rēbaman: “Naj baguiaa dux Dad Dios zidnē zien da't ree xianjlaman

¹⁵ zidgaguiēen xguialguxtisaman con gra ree bejn, din guiēbaman xhie casti rayal ree benmal por gra ni mal been reeman né por diidxguijdx ni guneē reeman laaman guial naj reeman bēndol.”

¹⁶ Lasa' ree bēn guin achetctzi ruladx reeman, abi' graczi rnieeguijdx reeman. Zianczi rüjn reeman zi'ctzi rēn reeman, abi' zianczi ruza't laagajc reeman zagdxe ruza't tēē reeman bejn ree zagdxe din cwentzi güün ree bēn guin ni rēn reeman.

Mod rayal guiban ree xbejn Dios

¹⁷ Per lējt compniar raliduladx ree Jesucrist, rēn da'tan lējt, gol basaaladx guial bēn goc ree xi apóstoles Dad Jesucrist

¹⁸ rēb reeman: “Chi ma zidyob nit guidxliuj, chu' ree bēn guze' gra ni zēēd loj Dios güün tēē reeman zi'ctzi naj xixgabdxuudx reeman.”

¹⁹ Lasa' ree bēn guin naj bēn rlia' lasa' ree bēn ma zinal xnejz Dios, abi' naban reeman zi'ctzi rēn reeman, ad yu't xSprijt Dios luxdoo reeman.

²⁰ Per lējt compniar raliduladx ree Jesucrist, gol guzudxi'ch loj ni rliladxidi, din guialrliladx guin zēēd loj Dios. Gol gurejdx gunab Dios con xyudar xSprijtaman.

²¹ Gol basnuu gol binal guial rēn Dios la'tgaj cabēzidi guidxin dxex guneē Jesucrist guialnaban tiblayaa duloj ree guial rayaman dunuj ree.

²² Gol been yudar bēn sta yu' nawēēg ree luxdoo.

²³ Gol been yudar bēn zē ree loj nejzmal, zi'c rüjn tijb bēn rüjn yudar bēn cayajb loj bajl, gol guyēn reeman per ad chu'ladxidi zi'c rüjn reeman, gol gojp cudad chitēē yabidi loj xtol reeman.

Diidx bigra ca ree loj gui'ch guie

²⁴ Yu' tijbzi Dios ca' guialrniabee par guiniaman lējt, chitēē yabidi loj dol, din chu' luxdoodi zagdxe sin dol chi guidxindi xanyabaa lod za'man.

²⁵ Laaman naj tijbzi Dios bēn babēē dunuj ree loj dol por dux Dad ree Jesucrist, rayalaman respejt din gra naj xieenman, tijbzi laaman ca' guialrniabee con guialguxtis diidz gocli, yan con gra tiampczi. Amén.

Ni balüü Jesucrist loj San Juan

¹ Ni ne ree naj ni ma balüü Dios loj Jesucrist din në laaman gulüü laan loj ree xbejnman, din gagbee reeman conin ma zidyob gac. Abi' Jesucrist guxhaal xianjlaman din gulüüman ni guin ree lon, naj Waj xbejn Jesucrist, bën cayün laaman sirv.

² Abi' canin ni diidxli xcwent xtiidx Dios, xcwent Jesucrist në xcwent gra ree ni baguian.

³ Xiquilbaa ree bën ni rool, në ree bën rucaagdiajg në ree bën ridxga' ni ca loj gui'ch guie ni rugojn xcwent ree ni gac, din ma zidyob gac reen.

Rxhiaal San Juan gui'ch loj guigajdx ree yadoo

⁴ Naj Waj cucan gui'ch guie par lëjt najdi xbejn Cristo, lëjt bën naban ree loj guigajdx ree xguiedx Asia. Dux Dad ree Dios, bën gui't bën naj Dios diizd gocli në yan, në guigajdx ree sprijt za' lod canabeeman, në Jesucrist, laa reeman güünle' lëjt yabe'cdxe tēē reeman luxdoodi.

⁵ Jesucrist been gra ni naj güünman, laa tēēman goc bën yaloj baban loj ree bengüti abi' laaman rniabee gra ree bën rniabee loj guidxliuj. Laaman rën dunuj ree abi' con xrejman basiaman dux tol ree

⁶ abi' beenman dunuj ree zi'c bën rniabee, been tēēman dunuj ree bixhioz rüjn sirv xDadaman Dios. Zeel Jesucrist rayalaman respejt në guialrniabee zianczi. Amén.

⁷ ¡Gol gogbee guial gui'taman loj zaj! Gra ree bejn guguaa laaman xt ree bën ni guliiz lans cwē'lēnman, abi' gra ree bēnguidxliuj goon da't chi guguaa reeman laaman. Laan naj diidxli. Zian gac.

⁸ Dux Dad ree Dios bën rajp gra guialrniabee. Laaman gui't, laaman naj Dios diizd guia'xchej, në yan, laaman rēb por laagajcaman: "Naj naj zi'c lejtr A con Z, lejtr ni rzuloj në ni rlioxnē alfabeto, naj ca' gra guialrniabee."

Baguiaa San Juan xguiarlriabee Cristo

⁹ Naj Waj tijb ree lasa'di bën riladx Jesucrist. Tijbzi nadxu' ree loj xguiarlriabeeman, tijbzi cayzaagdiaj ree abi' caydaan ree por laaman. Naj guyu'n ladxguiib loj yuj riga' loj nijsdoo lod la Patmos guial rtiechan xtiidx Dios në gra ree ni ragbeen xcwent Jesucrist.

¹⁰ Chi yu'n ladxguiib loj yuj riga' loj nijsdoo guin, guyu tijb dumingw chi guza'can zi'c bën rniē'xhchaal por xguiarlriabee xSprijt Dios, abi' xichan biguiejn zi'c cha' trompejt abi' biguien rejs da't cha' tijb

¹¹ bën ni rēb:

—Naj naj zi'c lejtr A con Z, lejtr ni rzuloj në ni rlioxnē alfabeto, din tijbzi naj naj bën rniabee. Bacaa loj gui'ch gra ni cuguaal dxel guixhiaalil gui'ch guin loj guigajdx cwaa ree da bejnman bën zojb ree niz Asia, luguiedx Éfeso, Esmirna, Pérgamo, Tiatira, Sardis, Filadelfia në Laodicea.

¹² Dxel chi badxi' lon par guguian chunin rnieenē naj dxel baguian gajdx ree candeler or.

¹³ Abi' galay ree candeler guin baguian tijb ni naj zi'c tijb bejn, najcwaman tijb lajd yool xt gua'man, abi' naxii tijb cinch or luxdooan.

¹⁴ Naquichbēj guijcaman zi'c naj guidxlad xiil, zi'c naj guiajnayaag naquich naj guidxguijcaman abi' zi'c bajl re'criani guaialojman.

¹⁵ Abi' guaia'man rdiinan bacha' zi'c guuib ni la bronze chi yu'n loj guij, abi' cha'man naj rejs zi'c rüjn nijs naquie' chi guiajtan.

16 Guiáad yaaman ladbee ca'man gajdx bajl xanyabaa. Abi' ro'man ririi tijb Espad ni nadoxh da't grop lad, guiáad lojman rulaa bacha' zi'c chi rusni gubijdx gojl da't.

17 Dxel chi baguian laaman biajban guia'man zi'c bengüt. Per laaman guxhoob yaa ladbeeman guican, naman:

—Ad rdxebil, naj naj bén rniabee diizd guia'xchej abi' par tiblyaaa.

18 Ma güjtan, per yan ma babanan, abi' ma naban tiblyaaa, abi' naj rniabee gualgüjt në gabijl.

19 Yan bacaa ni ma baguiaal në ni cuguiaal në ni qui gacri.

20 Ni në rën guiëb guigajdx ree bajl xanyabaa ni baguiaal yan ladbee, në guigajdx ree candeler or. Guigajdx ree bajl xanyabaa guin rën guiëban gajdx ree bén rniabee guigajdx cwaa ree da bejnan niz Asia, abi' guigajdx candeler or guin rën guiëban guigajdx cwaa ree da bejnan.

2

Diidx par ree bén Éfeso

1 Yan bacaa ni guixhiaalil loj bén rniabee ree da bejnan luguiedx Éfeso. Bacaa: “Bén ni ziza galay ree candeler or, bén ni ca' gajdx ree bajl xanyabaa con yaa ladbeeman, laaman na lojdi:

2 Naj ragbee xhie cayüjndi. Naj ragbee xhie tarbajw cadëdidi, ragbee tëen guial ad ralenya'tidi. Naj ragbee guial ad rdaantidi bén mal ree, abi' ma beendi prueb bén na ree naj xi apóstoles Jesucrist majsi achut naj reeman abi' ma gogbeedi guial ganax diidx rusquiee rniee reeman.

3 Naj ragbee guial rajpidi pacens abi' ma guzagdiajdi guial rëndi naj sin guial yaleny'a'di.

4 Per yu' ni ad ruladxtan rüjndi: guial ad rëntridi naj zi'c guia'xchej.

5 Gol basaaladx xhienaag guyëndi naj guia'xchej guial zi'c cayüjndi yan. Gol bayüjn xgab, gol been zi'c beendi guia'xchej, bal id züjndi zian, nayob gaxhalan casti par lëjt abi' ad zajctridi biani par los demazri ree bejn, bal id zayüjndi xgab.

6 Per yu' ni cayüjndi zi'c rayal, guial rdxe'chidi ni rüjn ree ben nicolaítas, zi'cgajc rdxe'chan por ni rüjn reeman.

7 Bén rën ree gucaagdiajg, gol bacaagdiajg ni rniee xSprijt Dios par ree da bejnan: Bén ni güün gan loj dol, naj gudë ni gawaman ni rtia loj yag ni runeë guialnaban ni zojb xanyabaa lod zojb Dios.”

Diidx par ree bén Esmirna

8 Yan bacaa ni guixhiaalil loj bén ni rniabee ree da bejnan luguiedx Esmirna. Bacaa: “Bén rniabee diizd guia'xchej në par tiblyaaa, bén ni güüt abi' babanman stijb, laaman na lojdi:

9 Naj ragbee xhienaag cadëdidi tarbajw por ni rüjn bejn lëjt, ragbee tëen loj guialprob ni nabandi majsi diidxli najdi benrijcw guial ma zinalidi xtiidx Dios, abi' ragbeen xhienaag rnieeguijdx bejn lëjt, bén ni na ree naj reeman bén Israel xbejn Dios majsi laa reeman naj xbejn xindxab.

10 Ad rdxebtidi guialzi ni tëdidi din xindxab güünx gan din cu' ree bejn tio'p choondi ladxguib par guiguien guial diidxli zinalidi xnejz Dios. Chii dxej tëdidi guialzi guin ree, per gol guzujdx'i'ch xt dxej guiëtidi, abi' naj yazaladx lëjt guialnaban tiblyaaa.

11 Bén rën ree gucaagdiajg gol bacaagdiajg ni na xSprijt Dios par ree da bejnan: Bén güün gan loj dol, achetri güün guialgüjt ni rarojp laaman.”

Diidx par ree bén Pérgamo

12 Yan bacaa ni guixhiaalil loj bén rniabee ree da bejnan luguiedx Pérgamo. Bacaa: "Bén ca' espad ni nadoxh grop lad ro', laaman na lojdi:

13 Naj ragbee guial luguiedx zobjidi xindxab rniabee ni. Per majsi zian lëjt za'dxi'chidi con naj ad rucwëëzt rlliladxidi naj ni'qui lën ree dxej ni bagÿjt reeman Antipas, tijb ree xcompniaridi bén ad bacwëëzt bililadx naj, bén bagÿjt reeman ladxidi lod rniabee xindxab.

14 Per yu' ree ni ad ruladxtan rÿjndi. Tijb ni ad ruladxtan rÿjndi naj guial lojdi no'ch ree bén ad rusa'nt ni basiid Balaam bejn ree, bén rëb loj Balac xhienaag guzaalguiiwaman bén Israel ree din gaw reeman guialraw ni ma gurej loj ree xdios Balac guin, në par been reeman graloj ree nidxuudx con ree bén ad najt lacheel reeman.

15 Stijb ni ad ruladxtan naj guial lojdi no'ch ree bén ad rucwëëzt rÿjn zi'c rÿjn ree bén nicolaïtas.

16 Zeel gol bayÿjn xgab por ni rÿjndi, bal id zÿjndi zian nayob gaxhalan casti din gÿnan guialguxtis con laa reeman con espad ni rirri ro'n.

17 Bén rën ree gucaagdiajg, gol bacaagdiajg ni na xSprijt Dios par ree da bejnan: Bén rÿjn gan loj dol, naj gudë mana gawaman, guialraw xanyabaa ni ad nÿnbeet ree bejn. Gudë tÿën tijb guiaj naquichdoo lod ca laj cÿbaman ni achutczu ragbee, tijbzi bén tia' guiaj guin gagbee."

Diidx par ree bén Tiatira

18 Yan bacaa ni guixhiaalil loj bén rniabee ree da bejnan luguiedx Tiatira. Bacaa: "Xi'n Dios, bén re'criani guiaaloz zi'c bajl, bén rdiin bacha' guia' zi'c guuib ni la bronce, laaman na lojdi:

19 Naj ragbee ni cayÿjndi, ragbeen xhienaag rëndi naj, xhienaag rlliladxidi naj, xhie cayÿjndi por naj abi' ad ralenya'tidi. Naj ragbee guial mazri zagdxe cayÿjndi yan guial loj guia'xchej,

20 Per yu' ni ad ruladxtan cayÿjndi: Rdaandi Jezabel, béngunaa ni na rudëd xtiidx Dios. Abi' rtiëjbidi ruluüman da bejn reen dxel ruzaalguiiwaman laa reeman rÿjn reeman ni dxuudx ree con ree bén ad najt lacheel reeman, abi' raw reeman guialraw ni ma gurej loj ree xdios ree bénguidxliuj.

21 Ma badën tiamp din yayÿjman xgab, din gusa'n xguialdxuudxaman, per ad rëntaman.

22 Zeel yan gaxhalan guialguijdx par laaman, gaaman gagxuuman. Abi' bén rÿjn ree zi'c rÿjnman, bal id reeman guchaa mod ni naban reeman ziangajc zro' naj guialzi ni tÿd reeman,

23 gugÿjtan gra ree bén ma been xgab guiban zi'c naban béngunaa guin. Zian gagbee ree da bejnan guial naj ragbee xhie yu' guicj bejn xhie tÿë yu' luxdooman, xhie xgab rÿjnman. Naj gune lëjt ni ryalidi bal gonin rÿjndi.

24 Par gra ree da bejnan bén zobj ree luguiedx Tiatira, lëjt bén ad zinalt ree zi'c rusiid Jezabel guin bejn ree, lëjt guial na reeman ad ragbeetidi xt ni bigra xcwent xindxab guial ad ridxga'tidi laa reeman, achetri ni ganin lojdi,

25 tijbzi ni rnin lojdi: Gol guzujdxi'ch loj ni ma ragbeedi xt chi guialan stijb.

26 Bén gÿün gan loj dol, abi' gusnuu gÿünman zi'c rënan guidib tiamp ni guibanman, naj gudë guialrniabee lojman din nabeeman loj ree nacion.

27 Nabeeman loj ree nacion guin zi'c tijb bén ni ca' tijb var guuib, zi'czi rlia' bejn tijb guiajs zian gÿünnëman bén ni ad rënt ree guzoob diidx. Gudën guialrniabee guin lojman zi'c banee da Dadanan lon,

28 gudë tÿën lojman bajl xanyabaa ni rliejn rsiladoo.

29 Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

3

Diidx par ree bén Sardis

1 Yan bacaa ni guixhiaalil loj bén rniabee ree da bejnan luguiedx Sardis. Bacaa: “Bén naban con guigajdx ree xSprijt Dios abi' ca'man gajdx bajl xanyabaa, laaman na lojdi: Naj ragbee gra ni cayüjndi ragbee tēen guial ma güjtidi, majsi par ree bejn nabandi.

2 Zeel gol batie'ch xbaaalidi, gol been naguiejn chitēē nit ni sta cayüjndi, din naj ruguian guial ad cayüjntidi xnejz delant loj da Dadan Dios.

3 Gol basaaladx ni ma biguiejndi nē ni ma basiididi, abi' gol been zian, gol bayüjn xgab zi'c ni cayüjndi. Din bal id zatie'ch xbaaalidi zi'c cayüjndi, dxel zi'c ri't tijb bēngubaan ziangajc chi gagbeedi ma bi't casti par lējt.

4 Per luguiedx Sardis, yu' tio'p choon ree bejn sta naya, laa reeman naj bén gacw lajd naquich abi' sa reeman con naj, din rayal reeman laan.

5 Bén güün gan loj dol, chi guidxin hor, zian gacwaman lajd naquich abi' ad zuse'n tēetan lajman loj xlibr guialnaban. Abi' delant loj Dios nē loj ree anjl guien guial laaman naj da bejnan.

6 Bén rën ree gucaagdiajg, gol bacaadiajg ni rëb xSprijt Dios par ree da bejnan.”

Diidx par ree bén Filadelfia

7 Yan bacaa ni guixhiaalil loj bén rniabee ree da bejnan luguiedx Filadelfia. Bacaa: “Bén naya nali, bén naj diidxli, bén rajp guialrniabee loj gra zi'c gojp rey Davi guialrniabee, tijbzi laaman rajp guialrniabee par guixhialaman tijb nejz ni achut zajc gusiaaw o gusiaawaman tijb nejz ni achut zajc guixhial, laaman na lojdi:

8 Naj ragbee gra ni cayüjndi. Gol gogbee guial majsi ad rajptidi guialrniabee, per naj ma guxhal tijb nejz din guitie'chidi da diidxan sin guial chu gutēē lojdi, din zinalquidi da diidxan abi' ad goct rëbidi guial ad najtidi da bejnan.

9 Lējt guguaa ni günan con ree xbejn xindxab bén rëb ree naj reeman bén Israel xbejn Dios, abi' rusquieezi reeman. Guguaadi ni günan laa reeman, gulgazuxib reeman lojdi, gagbee tēē reeman xhienaag rēnan lējt.

10 Abi' zi'c ma bazoobidi diidx gapidi pacens guial chinalidi da diidxan, ziangajc ganan lējt chi guidxin dxej gui't guialzi loj guidib guidxliuj, zi'c tijb prueb par gra ree bēnguidxliuj.

11 Nayob guialan loj guidxliuj stijb. Gol guzujdxi'ch loj ni ma ragbeedi chitēē tia' ben ren ni royalidi.

12 Bén güün gan loj dol, naj gudē lojman tijb luar zojbloj lēn yadoo zojb xanyabaa lod naban da Dadan Dios, ni guibanman tiblayaa. Dxel tiblajtaman guca laj da Dadan Dios con lan nicüb, con laj ladx da Dadan Dios ni la Jerusalén cüb ni naj xanyabaa lod zojbaman.

13 Bén rën ree gucaagdiajg, gol bacaagdiajg ni rëb xSprijt Dios par ree da bejnan.”

Diidx par ree bén Laodicea

14 Yan bacaa ni guixhiaalil loj bén rniabee ree da bejnan luguiedx Laodicea. Bacaa: “Bén ni rüjn cumplid xtiidx, bén ni been gra ni rayal güünman, bén naj diidxli, bén rniabeenē Dios diidx gocli chi gad guidxliuj gacchaaw, laaman na lojdi:

¹⁵ Naj ragbee gra ni cayüjndi. Ad najtidi zi'c nijs nayaag o zi'c nijs laa. jBalzianclaa tiblyaa niajquidi zi'c nijs nayaag o zi'c nijs laa!

¹⁶ Per lëjt najdi zi'c nijs nayool, ni'qui nadxa' ni'quidza nayaagt, dxel zi'c laa rabëë gajc ro' bejn nijs nayool guin, zian ma rënan gabëladxan lëjt.

¹⁷ Lëjt rëb guial najdi benrixcw, rajpidi gra abi' achet ryaadxidi. Per ad ragbeetidi guial achet rajpidi, najdi bënprob, bën zibëël, achet sirv lëjt, najdi bënluetia'p niz lon guial ad nabantidi xnejz.

¹⁸ Zeel rnin lojdi, zi'c rzii bejn ganax or, zian gol been naguiejn gapidi gra da yudaran, din gaquidi rijcw delant lon. Abi' zi'c chi rzii bejn lajd naquich din guiguienman naya, zian gol bayün xgab din guiguie'ch xguialxtudi abi' guiguiendi naya delant lon. Në chi rzii bejn tijb rumed par guiaaloj bejn din guguaaman zagdx, zian gol been naguiejn din gapidi da guial rignia'n din guguaadi zagdx.

¹⁹ Rdilnë'n abi' ruzuxnejzan gra ree bën rënan. Zeel gol bagu' luxdoodi gol bayün tëë xgab xhienaag nabandi.

²⁰ Gol gogbee guial naj cabedx lëjt, zi'c chi rniece tijb bejn rulidx stijb bejn. Cabëësan chu guidxga' naj, zi'c chi rgu' bejn stijb bejn din gaw reeman tijbzi. Abi' bën guidxga' naj ma nabannë'n laaman abi' laaman nabannëman naj.

²¹ Bën güün gan loj dol naj gudë cwë'n cweman lod canabeen, zi'cgajc naj chi gulox benan gan loj dol, gure cwë' da Dadan Dios lod canabeeman.

²² Bën rën ree gucaagdiajg, gol bacaagdiajg ni na xSprijt Dios par ree da bejnan.”

4

Rlies reeman xvalor Dios xanyabaa

¹ Chi gulox bacan diidx guie ree, baguian niz ladia dxel baguian tijb port naxal xanyabaa. Abi' bën guneenë gajc naj diidz guia'xchej bën naj cha' zi'c trompejt, laaman na lon:

—Wë'p guie din gulün lüj ni gac ree chi ma gojc ree ni rnin lojl.

² Loj hor zii gajc por xguialrniabee xSprijt Dios, chi gogbeen ma za'n xanyabaa yagaj baguian tijb yagxhil zagdx, zi'c xi yagxhil tijb rey, lojn zojb tijb bejn.

³ Abi' bën zojb loj yagxhil guin rulaaman bacha' zi'c ree guiaj zagdx ni lasajc wayëjx, ni la jaspe në cornalina. Abi' guijc yagxhil guin ca tijb guidgij ni rulaa bacha' zi'c guiaj zagdx ni la esmeralda.

⁴ Abi' gadëd ro' yagxhil guin baguian zagajlbitap ree yagxhil zagdx abi' loj ree yagxhil guin zojb ree gajlbitap ree bengol najcw reeman lajd naquich yu' coron or guijc reeman.

⁵ Abi' lod za' yagxhil ni za' galay los demasri ree yagxhil guin, yagaj ririi ree bacha' zi'c chi rë'p nijs në ree naquie' zi'c chi rbidxa' guziaaw. Abi' delant loj yagxhil guin re'c gajdx ree guij ni naj ree guigajdx xSprijt Dios.

⁶ Baguia tëën delant loj yagxhil guin zi'c nijsdoo, per nayadxujn zi'c tijb guiaawajn.

Abi' cwë' yagxhil guin za' tajp ree be, tijb gaj reeb za' tib xquin gaj yagxhil guin abi' guidib niz xijch reeb në niz loj reeb yu' guiaaloj reeb.

⁷ Tijb reeb naj zi'c beedx, be barojp guin naj zi'c go'n, be bayon guin naj lojb zi'c loj bejn, be badajp guin naj zi'c bisia ni cazuj.

⁸ Tijb gaj ree be guin yu' xho'p xhiil reeb, abi' xijch xhiil reeb në lën xhiil reeb yu' zien da't guiaaloj reeb. Abi' dxej guiaal ad rucwëëzt rëb reeb: Naya nalil, naya nalil naya nalil najl dux Dadan Dios, lüj guial ca'l gra guialrniabee,

løj guial najl Dios diidz guia'xchej në yan abi' gui'til.

⁹ Beegaj chi rlies ree be guin xvalor bén ni zojb loj yagxhil guin, bén naban tiblayaa, beegaj ruza't reeb laaman zagdxë rudëëd reeb quixtëë lojman,

¹⁰ guigajlbitap ree bengol zojb yagaj, bazuxib reeman lojman, bén ni zojb loj yagxhil abi' nabanman tiblayaa, abi' ruzuxib reeman lojman rudxiib xcoron reeman niz lojman, rëbgaj reeman:

¹¹ Dux Dad ree Dios, løj rayal guiya'p respejt, diidzxa'c në gualrniabee.

Din løj beenchaaw gra ni yu'

abi' løj rëb guial chu' gra ni yu',

abi' yu' reen.

5

Tijb gui'ch ni nadüüb con bén naj zi'c xi xiil Dios

¹ Dxel baguian guial bén zojb loj yagxhil zagdxë ni naj zi'c xyagxhil tijb rey, ca'man tijb gui'ch yaaman ladbee. Gui'ch guin zi'c lojn zi'c xijchan ca lejtr abi' nadüüban, abi' naguiidan con gajdx se chitëë chu guixhial laan.

² Loj hor guin baguian tijb anjl bén gojl da't, rbidxa'man rejs rëbaman:

—ÇChu rayal chiquied ree se guie abi' guixhial loj gui'ch guie?

³ Per ni'qui xanyabaa, ni'qui loj guidxliuj, ni'qui lën liuj ad bidxejl Bén ni rayal guixhial gui'ch guin, ni'qui par guguaaman ni ca loj gui'ch guin.

⁴ Abi' naj dád binan chi baguian guial achut rdxejl guixhial loj gui'ch guin në par guguaaman ni ca loj gui'ch guin.

⁵ Dxel na tijb ree bengol guin lon:

—Ad roon, baguiaa nial ma yu' tijb Bén ni rayal guixhial loj gui'ch guin abi' chiquiedaman guigajdx se guin din ma beenman gan loj gra, laaman Bén naj zi'c tijb beedx loj xdiaa Judá por gualrniabee ni rajpaman, laaman za loj xdiaa rey Davi.

⁶ Abi' chi baguian, dxel baguian guial galay lod za' yagxhil zagdxë ni naj zi'c xyagxhil tijb rey, lod za' guidap ree be guin galay ree bengol ni riga' yagaj, za' tijb Bén naj zi'c xi xiil Dios rguien xsen lod bidxeelguijdxaman chi gütaman. Abi' yu' gajdx xcajchaman con gajdx guiaalojman, guigajdx guiaalojman naj guigajdx xSprijt Dios Bén rxhiaalaman guidib guidxliuj.

⁷ Bibig Bén naj zi'c xiil guin cwa'man gui'ch guin ladxaa Bén zojb loj yagxhil guin.

⁸ Chi cwa'man gui'ch guin, guidap ree be za' gajxh cwë' yagxhil guin në gra guigajlbitap ree bengol guin bazuxib reeman lojman. Tijb gaj ree bengol guin ca' reeman tijb gaj arp ca' tëë reeman cojp or ni guidxa goxyaal, go'xh guin naj xtiidx ree xbejn Cristo chi rbejdx rniab reeman Dios.

⁹ Bengol guin ree rool reeman tijb cant cüb ni rëb:

Løj rayal tia' gui'ch guin

abi' guixhialil se ni naguiidnën.

Din løj gūjtil

abi' con xrejnl ni guxhie'l gudijxil

por graloj bejn din gac reeman xbejn Dios,

achet güunan xhietëëz diidz rniece reeman,

o xhie loj diaa, o xhie guiedx o xhie nacion zëëd reeman.

¹⁰ Beenl laa reeman rey

been tëël laa reeman bixhioz par dux Dad ree Dios,

abi' laa reeman nabee loj guidxliuj.

¹¹ Baguia tëen bigueijn tëen cha' zien ree anjl gadëd ro' yagxhil zagdxë guin con guidap ree be guin në ree bengol guin. Abi' bénguixiujczi naj reeman por mil naj reeman.

¹² Abi' dád rejs rníee reeman rëb reeman:

Bén naj zi'c xi xiil Dios, bén güt,
laaman rayal tia' guialrniabee,
laaman rayal gap guialnaza'c,
quiarguejn, në gojl,
respejt, guza't reeman laaman zagdxë,
guilies tëë reeman xvaloraman.

¹³ Dxel bigueijnan cha' gra ree ni been Dios, zi'c ni yu' ree xanyabaa, loj guidxliuj në ni yu' ree lën liuj në ree ni yu' loj nijsdoo, rëb reen:
Bén zobj loj xyagxhil guialrniabee në bén naj zi'c xi xiilaman,
par laa reeman naj
respejt, diidxza'c, guialrniabee,
abi' guilies reeman xvalor reeman
zianczi në par tiblyaaa.

¹⁴ Chi gulox rëb reen zian, dxel guidap ree be za' yagaj rëb reeb:

—Amën.

Abi' guigajlbitap ree bengol za' yagaj bazuxib par gap reeman laaman respejt, bén ni naban zianczi në par tiblyaaa.

6

Guigajdx ree se

¹ Dxel baguian biquied bén naj zi'c xi xiil Dios se yaloj guin, abi' zi'c chi rbidxa' guziaaw zian bigueijnan gunee tijb ree be guin, rëbib:

—jGuda!

² Dxel baguian gulentie tijb way naquich, abi' bén dxiib laab ca'man tijb xi arcw flejch. Abi' cwa'man tijb coron guial ma beenman gan, dxel briiman persi ziguieenman gan mazri.

³ Chi biquied bén naj zi'c xi xiil Dios se barojp guin bigueijnan rëb be barojp guin:

—jGuda!

⁴ Dxel gulentie tijb way xnia, abi' bén dxiib laab ca'man tijb espad narooob në guialrniabee par gustijlaman bejn ree loj guidxliuj din gugüjt lasa' reeman.

⁵ Chi biquied bén naj zi'c xi xiil Dios se bayon, bigueijnan rëb be bayon guin:

—jGuda!

Dxel baguian gulentie tijb way ya's, abi' bén dxiib laab ca'man tijb xijglibr.

⁶ Abi' galay guidap ree be guin bigueijnan cha' tijb bén rëb:

—Tib quil trigo lasajcan tib dxej dxiin abi' choon quil cebada lasajcan tibdxej dxiin, per ache güünl sejt në vin.

⁷ Chi biquied bén naj zi'c xi xiil Dios se badajp guin, bigueijnan rëb be badajp guin:

—jGuda!

⁸ Dxel baguian gulentie tijb way naguiëch, abi' bén dxiib laab laman guialgüjt, abi' zinal gabijl laaman. Cwa' reeman guialrniabee par gugüjt reeman tib part loj tajp lala' ree bénguidxliuj. Yu' reeman guiët por wadijl, o por guialrliaan, o por guialguijdx, o por ree be doxh yu' loj guidxliuj.

⁹ Chi biquied bén naj zi'c xi xiil Dios se bagaay guin, baguian xan altar za' ree xsprijt ree bén bagüjt reeman guial bililadx reeman guzujdx'i'ch tëë reeman loj xtiidx Dios.

¹⁰ Abi' rbidxa' reeman rejs rëb reeman:

—Dios, Dad bén rniabee, lüj naj bén naya nali abi' rüjnl zi'c rayal, ¿za plact gaglaal par güün xguialguxtisil con ree bén ni bagüjt dunujn loj guidxliuj din yaguijx reeman ni been reeman?

¹¹ Dxel tijb gaj reeman cwa' tijb lajd naquich, abi' bagojn reeman laa reeman din cwëz reeman stibda'n yaza' lasa' reeman, din ryaadxri guiët ree xcompniar reeman zi'c güt reeman, bén ni cayüjn gajc ree sirv Dios.

¹² Chi baguian biquied bén naj zi'c xi xiil Dios se baxo'p guin, dxel guxu rejs da't abi' gubijdx gojcan nagas zi'c tijb lajd ya's. Guiáad bëw gojcan naxnia zi'c rejn,

¹³ abi' ree bajl xanyabaa biajb reen loj guidxliuj zi'c ryajb ree higo ni ya' loj yag higo chi rbi' bidoxh.

¹⁴ Dxel gunidloj xanyabaa zi'c tijb gui'ch ni rdüüb, abi' gra ree guia' në ree yuj riga' ree loj nijs bachaa xliajt reen.

¹⁵ Abi' ree rey në gra ree bén rniabee loj guidxliuj, në ree bén rniabee ree suldad në ree bén rijcw, në ree bén yu' gojl par gra, në ree bén naj zi'c bén nado', në ree bén ad najt zi'c bén nado', gra reeman baquie'chloj lën guiajbiliaa në lën ree yalaj.

¹⁶ Abi' rëb reeman loj ree guia' në loj ree yalaj:

—Gol biajb du guijcan, gol baquie'ch tëë dunujn loj bén zojb loj xyagxhil guialrniabee në loj xcasti bén naj zi'c xi xiil Dios,

¹⁷ din ma bidxin dxej doxh ni gudëëd reeman casti, abi', ¿chu zajc taan casti guin?

7

Tibgayuu tiuubitap mil ree bén Israel

¹ Chi gulox baguian ni guin ree, baguian tajp ree anjl za' reeman guidap xquin guidxliuj par gucwëëz reeman bi ni zëëd guidap xquin, chitëë guibi' bi loj guidxliuj, ni'qui loj nijsdoo, ni'qui ree loj yag.

² Dxel baguian stijb anjl zëëdaman niz lod rliejn gubijdx, ca'man xse Dios naban. Abi' dád rejs guneenëman guidap ree anjl guin, bén ni ca' ree guialrniabee par güün reeman ni güün reeman con guidxliuj në con nijsdoo,

³ rëbaman loj reeman:

—Ad xhie güündi guidxliuj, ni'qui nijsdoo, ni'qui ree yag, xt chi ma gulox bacaa ree xse dux Dios ree lucwaj ree xbejnman.

⁴ Dxel biguejnan bël reeman cwa se guin lucwaj. Por gra ree bén Israel, tibgayuutiubitap mil reeman cwa se guin lucwaj.

⁵ Din chiptio'p mil ree bén zëëd loj xdiaa Judá cwa se guin, në chiptio'p mil ree bén zëëd loj xdiaa Rubén në chiptio'p mil ree bén zëëd loj xdiaa Gad.

⁶ Në chiptio'p mil ree bén zëëd loj xdiaa Aser, në chiptio'p mil ree bén zëëd loj xdiaa Neftalí, në chiptio'p mil ree bén zëëd loj xdiaa Manasés,

⁷ con chiptio'p mil ree bén zëëd loj xdiaa Simeón, chiptio'p mil ree bén zëëd loj xdiaa Leví, në chiptio'p mil ree bén zëëd loj xdiaa Isacar,

⁸ chiptio'p mil ree bén zëëd loj xdiaa Zabulón, chiptio'p mil ree bén zëëd loj xdiaa José, chiptio'p mil ree bén zëëd loj xdiaa Benjamín cwa se guin lucwaj reeman.

bënguixiuj najcw lajd naquich

⁹ Dxel baguian bénguixiuj ree, per bénguixiuj ree ni'qui chut zajc gulab laa reeman, bén ni za ree gadxagayaa guiedx, gadxagayaa diaa, bén rniee ree gadxagayaa diidx bén za ree gra lad në gadxagayaa nacion. Za' reeman delant loj xyagxhil bénnriabee në delant loj bén naj zi'c xi xiilaman. Najcw reeman lajd naquich ca' tée reeman zijn.

¹⁰ Abi' rëb reeman rejs da't:
Dunuñ raya'pan perdon por dux Dadan Dios
bén zojb loj xyagxhil guialrniabee
në por bén naj zi'c xi xiilaman.

¹¹ Abi' gadëd ro' yagxhil guin con guidap ree be ni za' yagaj con guigajlbitap ree bengol, gadëd yagaj za' gra ree anjl abi' bazuxib reeman delant loj xyagxhil Dios xt basajb guijc reeman liuj par gap reeman laaman respejt,

¹² rëb reeman:
¡Amén! guialrniabee, gojl,
guialrajc, respejt, diidxza'c,
guialrlies xvaloraman në quixtëë,
naj reen par dux Dad ree Dios zianczi në par tiblyayaa. Amén.

¹³ Loj hor zii tijb ree bengol guin gunabdiidx lon:

—¿Chu ree bén ni najcw lajd naquich guin, ban tée ree bénan?

¹⁴ Badxi'nán rën:

—Ad ragbeetan Dad, lüj ragbee.

Dxel naman lon:

—Laa reeman naj bén guzagdiaj da't abi' naquich xab reeman guial ma naya reeman ma biquied xtol reeman con xrejn bén naj zi'c xi xiil Dios.

¹⁵ Zeel za' reeman delant xi yagxhil Dios, abi' dxej guiaal cayün reeman sirv lod zojbaman. Abi' bén zojb loj yagxhil guin ma za'man con laa reeman, abi' laaman gap laa reeman.

¹⁶ Ad yu'tri dxej guiliaan reeman, ad ze'c tée reeman nijs, ad zudxüü tée gubijdx laa reeman, ad zagnalaa tée reeman.

¹⁷ Din bén naj zi'c xi xiil Dios bén za' galay lod za' xi yagxhil Dios, laaman gap laa reeman zi'c tijb bén rajp ree xiil abi' chinëman laa reeman lod rajch nijs ni runee guialnaban. Dxel Dios laaman gutiaa loj reeman gra ree nijs brii loj reeman chi biin reeman.

8

Guigajdx se

¹ Chi biquied bén naj zi'c xi xiil Dios se ni goc gajdx guin, bayajcdxe xanyabaa cost garol hor.

² Dxel baguian gajdx ree anjl za' reeman delant loj Dios, cwa' reeman gajdx trompejt.

³ Dxel bi't stijb anjl con tijb chaabacwi ni or, guzuliman delant lo altar guin abi' yu' bén badëëd zien yaal din cu'man goxyaal guin loj altar or ni za' delant loj yagxhil zagdx ni naj zi'c xyagxhil tijb rey, din tijbzi chë'pnë goxyaal guin xtiidx gra ree xbejn Dios, diidx ni rniee reeman chi rbejdx rniab reeman laaman.

⁴ Dxel diidx ladxaa anjl guin brii goxyaal guin con ree xtiidx ree xbejn Dios, diidx ni rniee reeman chi cabejdx canab reeman laaman, abi' wë'p reen niz loj Dios.

⁵ Dxel bacha anjl guin chaabacwi guin guij ni yu' loj altar guin abi' bazurlojman laan loj guidxliuj. Abi' dád rejs guridxa' guziaaw, gojc naquie', wë'p nijs, abi' bi't xudoxh.

Trompejt ree

⁶ Dxel guigajdx ree anjl ni ca' ree trompejt guin, guzujchaaw reeman par gucwejdx reeman laan.

⁷ Chi bacwejdx anjl yaloj guin trompejt ni ca'man, biajb guiajyabaa loj guidxliuj no'chan bajl në rejn. Dxel cost gurol guidxliuj we'c con ree yag në ree gui'xh naga' yu' lojn.

⁸ Chi bacwejdx anjl barojp guin trompejt ni ca'man, dxel zi'c naj guia'ro' ni cacaguij naj ni biajb loj nijsdoo, abi' cost garol nijsdoo bayajcan rejn loj hor guin.

⁹ Abi' cost garol ree be ni naban loj nijsdoo güjt reeb abi' cost garol ree barcw ni yu' loj nijsdoo gunidloj.

¹⁰ Chi bacwejdx anjl bayon guin trompejt ni ca'man, dxel biajb bajl xanyabaa ni narooob ni cacaguij zi'c chi rtiaguij guied, loj cost garol guiiw ni yu' në cost garol ree lod rajch nijs biajban.

¹¹ Bajl xanyabaa ni biajb lan Ajenjo, abi' cost garol nijs guin ree gojc nala abi' dád zien ree bejn güjt guial bayajc ree nijs guin nala.

¹² Chi bacwejdx anjl badajp guin trompejt ni ca'man, abi' cost garol gubijdx bicajy, cost garol bëëw në cost garol ree bajl xanyabaa bicajy. Abi' guial bicajy reen, dxel cost garol dxej në guiaal ad basnit.

¹³ La'tgaj cuguian ni guin ree, biguiejnan zi'c chi rzuj tijb bisia xanyabaa. Dxel biguiejnan cha' tijb anjl rbixdiajman rëbaman:

—iProb, per prob, per probza ree bën ni yu' loj guidxliuj por zachoon trompejt ni ryaadx gucwejdx za choon ree anjl!

9

¹ Chi bacwejdx anjl bagaay guin trompejt ni ca'man, dxel baguian zi'c tijb bajl xanyabaa ni biajb loj guidxliuj, abi' bajl xanyabaa guin cwa'n guibliaw par guixhialan ro' bizë ni ad yu't lod rliox.

² Chi guxhalan ro' bizë guin tijb go'xh yo'xhchab brii lën bizëë guin zi'c chi ririi go'xh lën tijb horn narooob, xt bascajy go'xh guin gubijdx në bi.

³ Abi' lën go'xh guin brii ree bi'tsu abi' bire'ch reeb loj guidxliuj, abi' cwa' reeb gualrniabee par gac reeb bedoxh zi'cgajc nixüb.

⁴ Per gunabee reeman laa reeb chitëë xhie güün reeb guixya' ree, ni'qui ree yag, ni'qui ree gui'xh naga'. Naabzi ree bën ni ad yu't ree xse Dios lucwaj.

⁵ Per ad par gugüjtt reeb bejn, naabzi par sagdiaj reeman gaay bëëw. Abi' lod rudidxa' reeb riyajnan zi'c ryajn lod rudidxa' nixüb.

⁶ Lën ree dxejzii quuil ree bejn guialgüjt, per ad zadxejlt reeman laan. Guiën reeman guiët reeman per ad zëjt reeman.

⁷ Bi'tsu guin ree naj reeb zi'c naj ree way ni ma za' par che reeb loj wadijl, guijc reeb yu' zi'c coron or, abi' loj reeb naj zi'c loj bejn.

⁸ Abi' guidxguijc reeb naj zi'c guidxguijc béngunaa, guiáad dxidlay reeb naj zi'c dxidlay beedx.

⁹ Guidib luxdoo reeb nada'cwan zi'c guuib, abi' xhiil reeb rüjnan naquie' zi'c rajc naquie' chi ruxüünnë ree way carrejt loj wadijl.

¹⁰ Abi' xbaan reeb naj zi'c xbaan ree nixüb, abi' con lupuntan rudidxa' reeb. Con xbaan reeb yu' reeb gojl par gusagdiaj reeb bejn ree loj gaay bëëw.

¹¹ Anjl ni rniabee bizë ni ad yu't lod rliox laaman rniabee ree bi'tsu guin. Anjl guin con diidx Hebreo laaman Abadón, abi' con diidx grieg laaman Apolión, diidx guin ree rën guiëb reen bën ruloox.

¹² Zian rliox guialzi yaloj, dxel gui't zatio'p guialzi.

¹³ Chi bacwejdx anjl baxo'p trompejt ni ca'man, dxel biguiejnan tijb cha' bejn briin galay ree cajch ni za' guidap xquin altar or ni za' delant loj Dios.

¹⁴ Cha' bén biguiejnan rëbaman loj anjl baxo'p bén ca' trompejt guin:

—Baslaa guidap ree anjl ni naxii ro' guiiw ro' ni la Eufrates.

¹⁵ Zian bidxin or, bidxin dxej, bidxin bëëw në ijz ni naj par laa guidap ree anjl guin din gugüjt reeman garol ree bénguidxliuj.

¹⁶ Abi' biguiejnan bël naj xsuldad reeman bén dxiib ree way. Naj reeman tio'pgayuu millon.

¹⁷ Ze baguian way guin ree con ree bén dxiib laa reeb: Bén dxiib ree way guin, guidib luxdoo reeman nada'cw guiiw culor xnia, ni sul në ni naguiëch. Abi' guijc ree way guin naj reen zi'c guijc ree beedx, abi' ro' reeb ririi bajl, go'xh në azufre.

¹⁸ Abi' garol ree bénguidxliuj güjt por bajl guin, go'xh guin në azufre guin ni ririi ro' reeb.

¹⁹ Con ro' ree way guin rugüjt reeb bejn ree, abi' con xbaan reeb rucheel-guijdx reeb din lupunt xbaan reeb najn zi'c guijc bëël.

²⁰ Per los demarsi ree bén ni ad güjtt por ree gualzi guin, ad basa'nt reeman ni mal rüjn reeman. Ad bacwëëzt rën reeman xindxab ree con ree Dios ni naj or, plajt, bronce në ree dios guiaj con ree dios yag, dios ni ad rajct ruguiaa, ad rajct riguijcn ad rajct tëët rza reeman.

²¹ Ad bacwëëz tëët rugüjt reeman bejn ree, ad basa'n tëët reeman gual-bidxaa, ad basa'n tëët reeman ni dxuudx ni rüjn reeman con bén ad najt lacheel reeman, ad basa'n tëët reeman gualgubaa.

10

Tijb anjl ca' gui'ch

¹ Dxel baguian stijb anjl bén gojl da't, zidguiajtaman xanyabaa lën tijb zaj abi' guijcaman dxiib tijb guidgij. Lojman naj zi'c gubijdx, abi' guia'man naj zi'c tio'p bajl ziool.

² Dxel ca'man tijb librdoo naxal lojn. Abi' bazuj guia' ladbeeman loj nijsdoo, abi' guia'man lad ruvejs bazujman laan loj guidxliuj.

³ Dxel guridxa'man rejs da't zi'c rbidxa' beedx, chi guridxa'man guridxa' gajdx ree guziaaw.

⁴ Chi gulox guridxa' gajdx ree guziaaw guin, ma nucan ni rëb guigajdx ree guziaaw guin chi biguiejnan cha' tijb bén na lon diizd xanyabaa:

—Ad gucaal ni gunee guigajdx ree guziaaw guin, din ad rayalt gagbee ree bejn laan.

⁵ Abi' anjl ni baguian za'li loj nijsdoo në loj guidxliuj gules yaa ladbeeman xanyabaa,

⁶ abi' badëë xtiidxaman por bén naban tiblayaa, bén been xanyabaa, guidxliuj në nijsdoo, në gra ni yu' xanyabaa, loj guidxliuj në loj nijsdoo gual ad zaglaatri gac ni rayal gac.

⁷ Din chi gucwejdx anjl ni goc gajdx trompejt ni ca'man dxel ma bidxin dxej gac zi'c naj xixgab Dios, zi'c bagojnman loj ree bén badëë xtiidx Dios loj ree bejn bén ni rüjn ree sirv lojman.

⁸ Dxel zatijb gaj gunee bén ni guneenë naj diizd xanyabaa, naman:

—Wej bica' librdoo ni zoybyal loj ladxaa anjl ni za' loj nijsdoo në loj guidxliuj.

⁹ Dxel wan lod za' anjl guin, rën lojman din guneeman librdoo guin lon, dxel naman lon:

—Cwa'n gudawan. Ro'l guiatan nejxh zi'c dxijn, per lënl nala yaban.

¹⁰ Dxel cwa'n librdo guin ladxaa anjl guin, abi' gudawanan. Ro'n biguiaj-tan nejxh zi'c dxijn, per chi gulox gudawanan nala biguiajtan lënan.

¹¹ Dxel bagojn reeman naj guial gusnuu gugojnan bejn ree ni na Dios gac con zien ree nacion, rey ree në ree guiedx, xhietëez diidx rniee reeman.

11

Tio'p ree testiw

¹ Abi' baneeman tijb var ni rtia'beenë bejn, naman lon:

—Bisu bica'bee xyadoo Dios në altar, dxel gulabil bën cayajp ree Dios respejt lën yadoo guin.

² Per ad tia'beel lule' yadoo guin din lule' guin ma badëë Diosan loj ree bën ad najt ree bën Israel, laa reeman naj bën gusagdiaj ree bën Jerusalén loj choon ijz garol.

³ Abi' naj gaxhalan tio'p ree da bejnan din guza't reeman naj. Grop reeman gacw lajd ya's, abi' laa reeman guinee da diidxan choon ijz garol.

⁴ Grop ree bën guin naj grop ree yag olivo në grop ree candeler ni za' loj dux Dad ree Dios bën rniabee loj guidxliuj.

⁵ Bal chu bën rën güünnë laa reeman xhienin, ro' reeman grii bajl din gugüjt reeman bën rdxe'ch ree laa reeman. Zian guiët ree bën rën güün laa reeman xhienin.

⁶ Grop ree bën guin rajp reeman guialrniabee par gusiaaw reeman xanyabaa chitëë gal guia loj choon ijz garol guin chi guinee reeman da diidxan. Rajp tëe reeman guialrniabee par guchaa reeman nijs gacan rejn, abi' zajc guiniab reeman din gui't graloj guialzi loj guidxliuj bëltëez volt rën reeman.

⁷ Per chi ma bayaaloj tiamp ni guinee reeman da diidxan, dxel tijb monstruo, tijb be doxh grii lën bizë ni ad rliox, be guin ca'pnë laa reeman abi' güünb laa reeman gan abi' gugüjtib laa reeman.

⁸ Dxel gaa xcuerp reeman lunejz luguiedx Jerusalén lod güt xdad reeman Jesucrist loj crüzj, luguiedx ni naj yan zi'cgajc Sodoma në Egipto.

⁹ Dxel graloj ree bejn bën rniee ree gadzagayaa diidx, bën gralad ree, bën za graloj ree nacion zuguaa reeman gaa xcuerp ree bën guin lunejz choon dxej garol, per ad zatiëjbt reeman guiguie'ch ree bën guin.

¹⁰ Abi' ree bën naban loj guidxliuj dád yabaa reeman guial ma güjt ree bën guin, abi' guial tant yabaa reeman xt yazaladx reeman xhie renin loj lasa' reeman, din par laa reeman dád basagdiaj ree bën guin laa reeman.

¹¹ Per chi ma bayaaloj choon dxej garol guin, yasban Dios bën guin ree dxel chixche reeman abi' gra ree bën guguaa dád guidxeb reeman.

¹² Dxel dád rejs biguien cha' tijb bën ni guneë xanyabaa, rëbaman loj grop ree bën guin:

—Gol wë'p guie.

Abi' wë'p reeman xanyabaa lën tijb zaj delant loj gra ree bën rdxe'ch laa reeman.

¹³ Hor ni bayë'p reeman xanyabaa bi't tijb xudoxh abi' zien ree ni bize'n luguiedx guin abi' gajdx mil bejn güjt. Guiaad gra ree bën ad güjt dád bidxeb reeman abi' gules reeman xvalor Dios bën yu' xanyabaa.

¹⁴ Zian rliox guialzi rarojp, dxel laa zëed gajc guialzi ni rayon.

Trompejt ni goc gajdx

¹⁵ Chi bacwejdx anjl ni goc gajdx guin trompejt ni ca'man, dxel rejs da't biguien cha' ree bejn xanyabaa rëb reeman:

Ma bidxin dxej yaya'n gra xguialrniabee
guidxliuj loj dux Dad ree Dios
në loj Jesucrist abi' nabee reeman zianczi në tiblayaa.

¹⁶ Guigajlbitap ree bengol zojb loj xyagxhil reeman delant loj Dios, bazuxib
reeman xt basajb loj reeman liuj gojp reeman laaman respejt,

¹⁷ rëb reeman:

Dux Dadan Dios, lüj rajp gra guialrniabee
abi' najl Dios yan në diizd gocli abi' gui'til.
Quixtëë lüj guial ma culüü xguialrniabee naroo bil ni rajpil
abi' ma guzulojl canabeel.

¹⁸ Bénguidxliuj ree bidxe'ch reeman,
per ma bidxin dxej gulüü xguialrdxe'chil.
Ma bidxin dxej güün xguialguxtisil con ree bengüt
par gudëel ni rayal tia' ree xbejnl
bén badëed ree xtiidxil, në ree bén bililadx lüj.

Në ree bén rajp lüj respejt.

Ma bidxin dxej ze'c ree benzobjloj në ree bén ad zojblojt tia' reeman ni rayal
reeman,
dxel gunidlojl Bén ruxhiin ree loj guidxliuj.

¹⁹ Chi gulox rëb reeman zian, bixal xyadoo Dios xanyabaa dxel biguien
xcaj promejs ni been Dios diizd gocli. Dxel guzuloj rë'p nijs, rajc naquie',
rëez guziaaw, bi't xudo'xh abi' dád zro' biajb guiajyabaa.

12

Tijb béngunaa në tijb dragon

¹ Dxel gojc tijb sen ro' xanyabaa. Balüüloj tijb béngunaa nadüübaman
gubijdx, abi' nuzuj guia'man loj bëëw abi' guijcaman yu' coron ni gocchaaw
con chiptio'p bajl xanyabaa.

² Yu' xi'n béngunaa guin abi' rbixdiajman ragnaa lénman guial ma gal
xi'nman.

³ Per gojc stijb sen xanyabaa. Balüüloj tijb dragon ro', tijb bedoxh najb
culor xnia. Yu' gajdx guijquib, chii xcajchib yu' tëë tijb coron tijb gaj guijquib.

⁴ Abi' con xbaanb bazaalib cost garol bajl xanyabaa loj guidxliuj. Dxel
guzujb loj béngunaa guin din gawib xi'nman naabzi galix.

⁵ Gojl xi'n béngunaa guin tijb xindo niguiaaw, abi' laax nabee loj guidxliuj
con tijb var guilib. Dxel biquied reeman laax loj xniaax, bidxinx lod zojb Dios
lod canabeeman.

⁶ Abi' béngunaa guin baxüünman par niz lod naj ganax yujbidx, lod ma
beenchaaw Dios par laaman, lod gudëed reeman ni gawaman choon iij
garol.

⁷ Dxel guyu wadijl xanyabaa, anjl ni la Miguel con ree xi anjlaman gudijlnë
reeman dragon guin con ree xi anjlib.

⁸ Per ad beent be guin gan con ree xi anjlib loj anjl Miguel con ree xi
anjlanan, dxel ad gojctri nibajn be guin xanyabaa con ree xi anjlib.

⁹ Zianan zeel bazaal reeman dragon guin loj guidxliuj con ree xi anjlib.
Dragon guin naj bëël gulal ni la xindxab në satanás xin rusquiee gra ree
bénguidxliuj.

¹⁰ Dxel biguien cha' tijb bejn rejs da't diizd xanyabaa rëbaman:

—Ma bidxin dxej baslaa Dios dunuj ree, ma bidxin xguialrniabeeman
chi nabeenëman Jesucrist, din ma biquied Bén rbe'c xguialquia ree dux

compniar ree, bén rdxinnë ree guialquia guin loj dux Dad ree Dios dxej guiaal.

¹¹ Abi' dux compniar ree been reeman gan por rejn ni guxhie' bén naj zi'c xi xiil Dios në por ni rëb reeman xhienaag riladix reeman xtiidx Dios, ad bidxebt reeman majsi niëjt reeman.

¹² Zeel gol badxe' luxdoodi nix gra ree bén zojb xanyabaa per; jprobza lëjt bén zojb ree loj guidxliuj në ree be yu' loj nijsdoo! Din ma biguiajt xindxab lod zojbidi, dád rdx'e'chix guial ragbeex sta'nz dxej raya'n par laax.

¹³ Chi baguiaa dragon guin guial ma biajbib guidxliuj, dxel briinalib béngunaa naj xniaa xindo guin.

¹⁴ Dxel badëë reeman tio'p xiil béngunaa guin zi'c xiil bisiaro' din gac suman loj bëël guin xt lod naj ganax yujbidix, lod gudëëd reeman ni gawaman choon ijz garol.

¹⁵ Abi' gulëë ro' dragon guin tijb guiw nijs din chinën béngunaa guin.

¹⁶ Per bixal loj guidxliuj persi gu'n guibidix nijs gulëë ro' dragon guin. Zian been guidxliuj béngunaa guin yudar.

¹⁷ Dxel dád bidxe'ch dragon guin béngunaa guin, abi' zitilnëb sta'n ree bén ni za loj xdiaaman, bén ruzoob ree xtiidx Dios zinal tëë reeman xtiidx Jesucrist.

13

Tio'p ree bedoxh

¹ Wej dragon guin bisub ro' nijsdoo. Abi' naj baguia guial brii tijb monstroo loj nijsdoo, tijb bedoxh be yu' gajdx guijc, chii xcajchib abi' loj tijb gaj cajch guin yu' tijb gaj coron, abi' loj guigajdx guijquib ca tijb diidx ni rnieeguijdx Dios.

² Bedoxh ni baguian naj zi'c tijb tigr, per guia'b najn zi'c naj guia' ojs, abi' ro'b najn zi'c ro' beedx. Dxel dragon ni guzu ro' nijsdoo badëëdib loj monstroo guin xluarib lod rniabeeb abi' gualrniabee' ca'b par nabeeb.

³ Tijb guijc monstroo guin baguian tijb lod nadxeelguijdx ni rulüü ad zusbajnt laab, per bayajc lod nadxeelguijdx guin abi' gra ree bénguidxliuj badxalaj abi' binal reeman monstroo guin.

⁴ Dxel gojp da't reeman respet dragon guin guial badëëdib gualrniabee loj monstroo guin gojp da't tëë reeman respet monstroo guin, rëb reeman:

—¿Chu naj zi'c monstroo guin abi' chu zajc til con laab?

⁵ Monstroo guin gojccaaw ro'b par guilies xvalor gajquib, abi' guinieeguijdxib Dios, gojpib gualrniabee par güünb zian loj choon ijz garol.

⁶ Abi' guneeguijdxib Dios, guneeb diidxmal ree por laaman, por xyadooman në por gra ree bén zojb xanyabaa.

⁷ Gojp monstroo guin permis par sub contr ree xbejn Dios abi' güünb laa reeman gan. Abi' gojpib gualrniabee par nabeeb gralaj ree bejn, bén ni rniee ree gadxagayaa diidx, bén gra lad ree, gra ree nacion.

⁸ Gra ree bén ad cat laj loj xlibr gualnaban diizd chi gad guidxliuj gacchaaw, loj xlibr bén naj zi'c xi xiil Dios bén güt por ree bejn, gra reeman gap da't respet monstroo guin.

⁹ Bén rën ree gucaagdiajg, gol bacaagdiajg.

¹⁰ Bén naj che ladxguib, cheman ladxguib. Bén naj guiët con espad, con espad guiëtaman. Zeel bén naj ree xbejn Dios ad yadxaguidi ad gucwëëz tëë chililadxidi Dios.

¹¹ Dxel baguian stijb monstroo ren briib loj guidxliuj, yu' tio'p xcajchib zi'c xcajch xiil, per cha'b naj zi'c cha' dragon.

¹² Abi' lasa'gajc guialrniabee ca' monstroo ni brier loj nijsdoo lasa'gajcan ca'b abi' por laab gojp da't ree bejn respejt monstroo ni brier loj nijsdoo, monstroo ni bayajc lod nadxeelguijdx ni rulüüczi gugüjt laab.

¹³ Abi' monstroo ni brier loj guidxliuj në gajquib rüjn milagr narooob ree, xt rajc rniabeeb rguiajt bajl diizd xanyabaa xt loj guidxliuj delant loj ree bejn.

¹⁴ Zian rusquieeb bēnguidxliuj ree por ree milagr ni rüjnb delant loj monstroo ni brier loj nijsdoo, abi' rniabeeb rüjn ree bēnguidxliuj tijb xfigur monstroo ni brier loj nijsdoo, monstroo ni bidxeelguijdx con espad abi' gubajnb.

¹⁵ Abi' monstroo ni brier loj guidxliuj xt gojpib guialrniabee par gudēēdib guialnaban loj xfigur monstroo ni brier loj nijsdoo, par guiniee figur guin në par gugüjtib gra ree bēn ni ad rajpt respejt figur guin.

¹⁶ Gunabee tēē monstroo ni brier loj guidxliuj gra ree bejn, zi'c ree bengol zi'c ree xindoo, benrijcw ree në ree bēnprob, bēn naj ree zi'c bēn nado' në ree bēn ad najt zi'c bēn nado', din chu' sen yaa reeman ladbee o lucwaj reeman.

¹⁷ Abi' achut zajc sii o guto' ya bal id ca reeman sen guin, abi' sen guin naj laj monstroo guin o xinumbriib.

¹⁸ Guie ryaadx guialrignia'. Bēn rajp guialrignia' cwēē xcwentaman con xnumbr monstroo guin, abi' numbr guin naj xho'pgayuu gayojnbixho'p. Con numbr guin ririi laj tijb bēnguidxliuj.

14

Cant ni biil tibgayuu tiuubitap mil ree bejn

¹ Baguia tēēn guial za' bēn naj zi'c xi xiil Dios guijc dajn ni la Sión. Bēn naj zi'c xi xiil Dios za'man con tibgayuu tiuubitap mil ree bejn, graczi reeman ca lucwaj reeman laj bēn naj zi'c xi xiil Dios në laj xDadaman.

² Abi' biguiejnan tijb naquie' xanyabaa zi'c naquie' rüjn zil da't nijs, o zi'c rguien rbidxa' guziaaw rejs da't, o zi'c chi rusijdx zien ree bejn arp.

³ Dxel rool reeman tijb cant cüb delant loj yagxhil lod zobj bēn rniabee në loj guidap ree be za' yagaj në loj ree bengol guin. Ad zile't chu gusiid cant guin, naabzi ree bēn tibgayuu tiuubitap mil guin, laa reeman naj bēn gulaa loj ree bēnguidxliuj.

⁴ Abi' laa reeman naj ree xinguaaaw ni ad bagaalt bēngunaa, gojc reeman naya abi' zinal reeman bēn naj zi'c xi xiil Dios bantēēz guin rejman. Laa reeman naj ree bēn gulaa loj ree bēnguidxliuj abi' zi'c guialnaza'c yalaj ni rinē bejn loj Dios zian naj reeman delant loj Dios në delant loj bēn naj zi'c xi xiil Dios.

⁵ Ad goct basquiee reeman, nayadxuj reeman delant loj Dios.

Ruson ni badēē guiyon ree anjl

⁶ Dxel baguian tijb anjl rzujman xanyabaa con tijb ruson ni naj par tiblayaa par gugojnman gra ree bēn naban loj guidxliuj, xhietēēz diidx rniee reeman, o xhietēēz loj diaa zēēd reeman, o xhietēēz ciuda o nacion zēēd reeman.

⁷ Dxel dād rejs gunee anjl guin rēbaman:

—Gol bidxē Dios, gol gules xvaloraman, din ma bidxin hor yadēēd ree bejn cwent lojman. Gol gojp da't respejt bēn been xanyabaa, guidxliuj në nijsdoo në lod rajch nijs.

⁸ Dxel rēb stijb anjl:

—Ma biajb, ma biajb Babilonia din zi'c chi rusüdx tijb bejn stijb bejn, zian ma basquiee ciuda narooß guin gra ree bénguidxliuj gual güün reeman graloj ree nidxuudx, graloj ree dol ro'.

⁹ Dxel rejs da't gunee anjl bayon guin rëbaman:

—Bal chu gap da't monstroo guin respejt con xfigurib abi' tiëbaman tia xsenb lucwajman o yaaman,

¹⁰ bén zii yayal xcasti narooß Dios, zro' da't gudëëdaman laaman casti. Abi' sagdiajman loj bajl ni caye'c azufre delant loj ree xianjl Dios në delant loj bén naj zi'c xi xiil Dios.

¹¹ Ad yu' tëët dxej yayü' bajl guin. Ni'qui radxe ni'qui guiaal achet gualraziiladx par ree bén rajp da't respejt monstroo guin con xfigurib, o bén ca ree xsenb.

¹² Zeel bén naj ree xbejn Dios bén ruzoob ree xtiidxaman abi' rliiladx reeman Jesucrist, ad rayalt yalenyä' reeman.

¹³ Biguejñ tëën cha' bén ni na lon diizd xanyabaa:

—Bacaa ni ganin lojl: “Diizd yan xiquilbaa ree bén rëjt con gualrliladx Jesucrist.”

Dxel rëb xSprijt Dios: “Walican din ma yaziiladx reeman xcwent ree gualzi ni gudëd reeman abi' chinë reeman gualbenza'c reeman.”

Gualnaza'c ni runee guidxliuj

¹⁴ Dxel baguian tijb zaj naquich abi' loj zaj guin zojb zi'c tijb bejn. Yu' tijb coron or gujcaman abi' yaaman ca'man tijb hoz ni nadoxh ro'.

¹⁵ Dxel brii stijb anjl lën yadoo abi' rejs da't guneeaman bén ni zojb loj zaj guin rëbaman:

—Badxe' xi hosil, batüüg ree gualnaza'c loj guidxliuj din ma gojl reen ma bidxin tiamp ni yado'p reen.

¹⁶ Abi' bén zojb loj zaj guin badëëd xi hosaman loj guidxliuj abi' bato'paman gualnaza'c loj guidxliuj.

¹⁷ Dxel brii stijb anjl lën yadoo ni naj xanyabaa, ca' gajcaman tijb hoz ni nadoxh ro'.

¹⁸ Dxel niz loj altar brii stijb anjl bén rajp gualrniabee par bajl, abi' dád rejs guneeñeman bén ca' hoz ni nadoxh ro' guin, rëbaman lojman:

—Badxe' xi hosil ni nadoxh ro', batü' ree uv ni yu' loj guidxliuj din ma gojl reen ma gojl tiamp ni yado'p reen.

¹⁹ Dxel badëëd anjl guin xi hosaman loj guidxliuj guin, abi' bato'paman uv guin ree loj guidxliuj. Abi' badxe'man uv guin ree lod guixii reen, laan rën guiëb lod yu' xcasti Dios.

²⁰ Dxel xijch ciuda guin bixii ree uv guin abi' lën lod bixii ree uv guin birii rejñ. Rejn guin bixie'n loj guidxliuj zi'ct choon gayuu kilometro abi' wë'pan zi'ct xt niz ro' ree way.

15

Bén naj ree xi anjl Dios con guigajdx ree gualzi

¹ Dxel baguian stijb senro' xanyabaa, tijb sen ni diidxli badxaloj bejn: Baguian gajdx ree anjl con gajdx gualzi. Gualzi guin ree naj gajdx ni chigra gac din con gualzi guin ree gusiaaloj Dios xcastiman.

² Baguia tëën zi'c nijsdoo, per najñ zi'c tijb vidr xculor bajl. Dxel lojn za' ree bén been ree gan loj monstroo, loj figur con loj xnumrib, ca' reeman arp ni badëëd Dios loj reeman.

³ Abi' cayool reeman xcant Moisejs xbejn Dios në xcant bén ni naj zi'c xi xiil Dios, rëb cant guin:

Naroob në ni diidxli radxaloj bejn
 naj ree ni rüjnl, dux Dadan Dios Bén rajp gra gualrniabee.
 Xnejz da't në zi'c rayal rüjnl,
 lüj gual rniabeel gra ree bénguidxliuj.

⁴ ¿Chu ad zadxebt lüj?

¿Chu ad zuza'tt lüj zagdxe, dux Dadan Dios?

Tijbzi lüj naj bén naya nali

abi' bénguidxliuj gui't gap da't reeman lüj respejt

gual ma balüül bejn ree gual xnejz rüjnl.

⁵ Chi gulox baguian ni guin ree, dxel baguian bixal luar lod mazri nagle' lën xyadoo Dios xanyabaa.

⁶ Abi' lën yadoo guin brii gajdx ree anjl bén ca' ree gajdx ree gualzi, najcw reeman lajd naquich ni rdiin bacha', abi' naxii tijb cinch or luxdoo reeman.

⁷ Abi' tijb guidap ree be ni za' lod za' Dios, badëëb loj tijbgaj ree anjl guin tijb cojp or ni guidxa xcasti Dios bén naban guidib tiamp në par tiblyaa.

⁸ Abi' lën yadoo guin gudxan xgo'xh xbacha' Dios në xgualrniabeeman. Achut gojc niu lën yadoo guin xt chi ma gulox guigajdx ree gualzi ni zidne ree anjl guin.

16

Cojp ni guidxa ree xcasti Dios

¹ Dxel biguejnan cha' bejn rejs da't guneeman diizd lën yadoo guin, rëbaman loj guigajdx ree anjl guin:

—Gol chej, gol bigla't xcasti Dios ni yu' loj guigajdx ree cojp guin loj guidxliuj.

² Dxel wej anjl yaloj guin, bala'taman ni yu' loj xcojppaman loj guidxliuj. Abi' gra ree bén ni yu' xsen montruo guin bén gop da't ree respejt xfigurib, brii guiadxyoodx lad reeman, ni rdoob da't.

³ Abi' anjl barojp guin bala'taman ni yu' loj xcojppaman loj nijsdoo. Abi' nijs guin bayajcan rejn zi'c xrejn tijb bengüt abi' gra ree be naban loj nijs guin güjt.

⁴ Anjl bayon guin bala'taman ni yu' loj xcojppaman loj ree guiiw në lod rajch ree nijs abi' nijs guin ree bayajc reen rejn.

⁵ Abi' biguejnan rëb anjl ni rniabee ree nijs guin:

—Xnejz naj ni cayüjnl në zi'c cayüjn xgualguxtisil, Dad Dios, lüj naj bén naya nali, najl Dios yan në diizd gocli.

⁶ Din bénguidxliuj ree guxhie' reeman rejn bagüjt reeman xbejn reel në ree bén badëëd ree xtiidxil. Zeel ma badëëdil rejn guië' reeman, abi' zian rayal reeman.

⁷ Abi' niz loj altar biguejnan cha' stijb bén rëb:

—Walican, Dad Dios bén rajp gra gualrniabee. Xnejz në zi'c rayal cayüjn xgualguxtisil.

⁸ Abi' anjl badajp guin bala't ni yu' loj xcojppaman loj gubijdx din guze'can bejn ree zi'c bajl.

⁹ Gra reeman we'c por xgualnalaa da't gubijdx guin. Per ni'qui zian ad bayüjnt reeman xgab por xtol reeman, ad baza'tt reeman Dios zagdxe guneeguidxli reeman laaman, laaman gual najman bén rniabee ree gualzi guin.

¹⁰ Anjl bagaay guin bala'taman ni yu' loj xcojppaman lod rbej monsturo ni rniabee guin, abi' bicajy loj guidxliuj, abi' xt rawya' lüdx ree bejn por gualzi ni cadéd reeman.

¹¹ Per ni'czi zian ad basa'nt reeman ni mal ni rüjn reeman, al mazri been reeman por gualzi ni gudéd reeman në por guiadx ni gudxib lad reeman, guneeguijdx reeman Dios bén zojb xanyabaa.

¹² Anjl baxo'p guin bala't ni yu' loj xcojppaman loj guiwro' la Eufrates abi' gubidx nijs loj guiiw guin. Zian bixal nejb din téd ree rey bén zëéd ree lad lod rliejn gubijdx.

¹³ Dxel baguian ro' dragon guin, con ro' monsturo guin në ro' bén rusquiee rëb rudëë xtiidx Dios loj ree bejn brii choon ree sprijt mal ni naj zi'c bidx.

¹⁴ Guiyon ree sprijt guin naj xsprijt xindxab, abi' rüjn reen milagr abi' rej reen lod za' gra ree rey loj guidxliuj persi rado'p reeman din til reeman con Dios bén rajp gra gualrniabee, dxej ni gui'taman guidguieenman gan loj gra reeman.

¹⁵ Rëb Jesucrist:

—Gol badxe'guic gual dxejczy gualan zi'c chi ri't tijb xingubaan tijbzi golp. Xiquilbaa ree bén rbëz naj, bén za'sin ree chi gualan din chitëë yaya'nxtu reeman zi'c chi rniaaz bén za' zibëël.

¹⁶ Sprijt mal guin ree bato'p gra ree rey ni yu' loj guidxliuj tijb luar lod la Armagedón con diidx hebreo.

¹⁷ Abi' anjl bagajdx guin bala't ni yu' loj xcojppaman loj bi, abi' diizd lën yadoo ni yu' xanyabaa niz lod za' xyagxhil bén rniabee, biguien rejs da't cha' bén rëb:

—Ma bayaaloy gojc ni rayal gac.

¹⁸ Abi' guzuloy rë'p nijs, rajc naquie', rbidxa' guziaaw dxel bi't xudoxh, tijb xudoxh ni ad goct wayi't diizd guzuloy yu' bejn loj guidxliuj, din xu guin naj ni mazczi ni doxh.

¹⁹ Abi' gula' ciuda narooob guin gojcan choon lala', dxel guidib guidxliuj bize'n ree ciuda në ree guiedx. Abi' Dios ad bayanladxtaman Babilonia par gudëë xcasti ro'man loj ciuda narooob guin.

²⁰ Abi' gunijt ree gra yuj riga' loj nijsdoo në ree guia'.

²¹ Biajb tëë guiajyabaa guic ree gra ree bénguidxliuj, dxel tijbgaj ree guiaj yabaa guin na' reen cost tiuu quil. Abi' ree bejn guneeguijdx reeman Dios, por ree gualzi guin, gual dád ni doxh gojc chi biajb ree guiajyabaa guin.

17

Gualguxtis ni güün Dios con béngunaa dxuudx

¹ Abi' tijb guigajdx ree anjl guin bi'taman naman lon:

—Guda din gulün lüj casti ni rayal béngunaa dxuudx ni zojb loj nijsro',

² laaman goc xtuu ree rey ni yu' loj guidxliuj, abi' zi'c rusüdx tijb bejn stijb bejn, zian bazaalguiiwaman bejn ree loj guidxliuj con ree ni ad rüjnt sirv ni rüjnman.

³ Abi' por xSprijt Dios binë anjl guin naj lod naj ganax yujbidx. Ni baguian tijb béngunaa dxuibaman tijb monsturo xnia, abi' guidib ladib ca diidxguijdx par Dios, yu' gajdx guiquib con chii xcajchib.

⁴ Abi' béngunaa guin najcwaman lajd murad në ni xnia, najcchaawnën ganax or në ree guiaj zagdxë në ree perl. Abi' ca'man tijb cojp or guidxa ree ni nabixhladx lojn në ree ni dxuudx ni rüjnman.

⁵ Abi' lucwajman ca tijb letrer ni achutczi rignia' ni rën guiëban, rëb loj letrer guin: “Babilonia, ciuda narooB ni naj xniaa ree béngunaa dxuudx në xniaa ree ni dxuudx ni rajc loj guidxliuj,”

⁶ Dxel gogbeen guial rzüdx béngunaa guin con xrejn ree xbejn Dios, con xrejn ree bën ni güt guial guneë reeman xtiidx Jesús. Abi' dád badxalon chi baguian zian.

⁷ Dxel na anjl guin lon:

—¿Chexc zeel dád radxalojl? Naj gusignia' lüj ni rën guiëb béngunaa ni baguiaal në monstroo ni dxiibaman, be ni yu' gajdx guijc con chii xcajch.

⁸ Monstroo ni baguiaal, laab naj be guban gocli, per yan ad nabantrib. Per gulüülojb lën bizë ni ad yu't lod rliox dxelri nidlojb tiblayaa. Abi' ree bën naban loj guidxliuj, bën ni ad cat ree laj loj xlibr guialnaban diidz gocli chi gad guidxliuj gacchaaw, laa reeman yadxaloj chi guguaa reeman monstroo ni guban gocli, be ad nabant yan per gui'tib.

⁹ 'Guie ryaadx quiarguejn. Guigajdx guijc monstroo guin rën guiëban gajdx guia' lod zojb béngunaa guin

¹⁰ rën tëë guiëban gajdx ree rey. Gaay ree rey guin ma gudëed xguialrniabee, abi' bën baxo'p guin naj bën canabee yan. Dxelri nabee bën bagajdx guin, per ad xchejt nabeeman.

¹¹ Abi' monstroo ni guban gocli, abi' yan ad nabantrib, laab gac rey baxujn, per loj gajc gajdx ree rey guin grii rey gac xhujn dxel yayalib lod rayalib casti par tiblayaa.

¹² 'Guidxii cajch ni baguiaal rën guiëb chii ree rey ni ad wazulojt nabee. Per chi tia' reeman guialrniabee, ad xchejt nabee reeman con monstroo guin.

¹³ Abi' guidxii ree rey guin yaya'n reeman diidx abi' yayü xguialguxtis reeman con xguialrniabee reeman loj monstroo guin,

¹⁴ abi' til reeman con bën naj zi'c xi xiil Dios. Per güün bën naj zi'c xiil guin laa reeman gan din laaman naj Dad loj gra ree dad, naj tëëman rey loj gra ree rey. Abi' bën za' ree con bën naj zi'c xi xiil Dios, laa reeman naj bën bazoob xtiidx Dios, bën ma naj ree par laaman abi' diidxli zinal reeman xnejz Dios.

¹⁵ Na tëë anjl guin lon:

—Nijs ni baguiaal lod zojb béngunaa dxuudx guin laan rën guiëb graloj ree bën rnieë graloj ree diidx, bën gra lad ree, bën zëed ree gra loj ree nacion.

¹⁶ Abi' monstroo guin con guidxii xcajchib ni baguiaal, guidxe'ch reeman béngunaa dxuudx guin, tio'nladx reeman laaman, gusa'n reeman zibëëlamán, gaw reeman xbëëlamán abi' guze'c reeman laaman.

¹⁷ Dios yazaladx loj guidxii ree rey guin quiarguejn din güün reeman zi'c rënman. Yaya'n reeman diidx din yayü xguialrniabee reeman loj monstroo guin, xt gac cumplid ni rëb Dios gac.

¹⁸ Abi' béngunaa ni baguiaal, laaman naj ciuda narooB ni rniabee ree rey yu' loj guidxliuj.

18

Biajb guiedx Babilonia

¹ Chi gulox baguian ni guin ree, dxel baguian stijb anjl zidguiajtaman xanyabaa. Rajpaman zro' guialrniabee, abi' xbacha'man basni guidib guidxliuj,

² abi' rnieeman rejs da't rëbaman:

—Ma biajb, ma biajb Babilonia ma naj ciuda narooob guin zi'c lidx ree xindxab, zi'c lidx ree graloj ree sprijt mal, zi'c lidx ree graloj ree be ni rzuj, bedxuudx ree be rijxhxadx ree bejn.

³ Din zi'c chi rusüdx bejn stijb bejn, zian ma batiaalguiiw ciudaro' guin gra ree bénguidxliuj par güün reeman graloj ree ni dxuudx. Abi' ree rey yu' ree loj guidxliuj ma been reeman ni dxuudx guin ree con ciuda guin, abi' ree bén rüjn negojs loj guidxliuj ma naj reeman rijcw por graczi ree ni dxuudx rajc ni.

⁴ Dxel biguiejnan cha' stijb bén gunee diizd xanyabaa rëbaman:

—Gol brii loj ciuda guin, da bejn reen, chitëë go'chidi loj ree dol ni rajc ni chitëë tëdidi gualzi ni gac ree loj ciuda guin.

⁵ Din dád zien xtol reeman zeel ma bidxinan xt xanyabaa, abi' Dios ad zayanladxtaman ni mal guin ree.

⁶ Gol beennë ciuda guin zi'cgajc beennën ben ren ree, gol been din yaguijnan xcastin tio'p volt mazri gual loj ni beennën bejn ree abi' gol basagdiajn tio'p volt mazri gual loj ni basagdiajn ben ren ree.

⁷ Gol basagdiaj ciuda guin naya zi'c babaan chi beenan ni dxuudx ree, abi' zi'c beenan xgab rëban: “Zooban guie zi'c tijb bén rniabee, ad najtan bén bizëjb ad yu' tëët dxej chu'nayan.”

⁸ Zeel tijbzi dxej guidxajg lasa' ree gualzi par ciuda guin, zi'c gualgüjt, gualrunaya, gualrliaan, dxel che'can con bajl. Din narooob xgualrniabee dux Dad ree Dios bén gudëëd casti ciuda guin.

⁹ Abi' ree rey ni yu' loj guidxliuj, bén babaa ree gual been reeman ni dxuudx con ciuda guin, zoon reeman, naya sagdiaj reeman chi guguaa reeman go'xh ni caye'can.

¹⁰ Abi' zijt su reeman chi guguaa reeman casti ni cadëdan, dxel guiëb reeman:

—iProbza lüj, probza lüj Babilonia, ciuda narooob ni guyu gojl par gra! Din tibrajtzi bi't casti par lüj.

¹¹ Abi' ree bén rüjn negojs loj guidxliuj zoon reeman zu tëë luxdoo reeman naya por ciuda guin, din achutri sii ni ruto' reeman,

¹² zi'c or, plajt, guiaj zagdxe ree, perl, lajd zagdxe ree, lajd sed ree culor murad con ni xnia, në graloj ree tabl ruree nejxh në graloj ree ni been reeman con ree tabl zagdxe, bronze, guiib con marmol në marfil.

¹³ Ad zajc tëetri guto' reeman canel në graloj ree ni ruree nejxh, ad zajctri guto' reeman goxyaal, mirra, perfum, vin, sejt oliv, harin zagdxe, trigo, go'n, xiil, way, carrejt, ad zajc tëetri ree guto' reeman bejn ree.

¹⁴ Abi' guiëb reeman loj ciuda guin:

—iAd rajptril gualnaza'c ni bayuladx da'til, tiblayaa ma banijtil zi'c gubanl con gra ree ni za'c ni gopil!

¹⁵ Gra ree bén been negojs, bén gojc ree rijcw por ciuda guin, zijt su reeman gualrdxeb reeman casti ni cadëd ciuda guin. Zoon reeman, zazagdiaj reeman, zunaya reeman.

¹⁶ Abi' guiëb reeman:

—iProbza, probza ciuda narooob guin! Laan gual guzujchaawan con ree lajd zagdxe, lajd culor murad con ni xnia, laan gual guzujchaawan con or, con perl në con guiaj zagdxe

¹⁷ din, i tibrajtzi gunidloj gra ree gualnaza'c guin!

Gra ree bén zë lën barcw, zi'cgajc xcapitan ree barcw, gra ree mariner në los demazri ree bén rüjn dxiin lën barcw, guzudxe reeman zijt

¹⁸ chi baguiaa reeman go'xh ni cayë'c ciuda guin, abi' gurixdiaj reeman rëb reeman:

—¿Goc guyu tijb ciuda lasa' ciuda ro' guie?

¹⁹ Abi' baroob yuj guiyc reeman, roon reeman abi' guyunaya luxdoo reeman rëb reeman:

—¡Probza!, probza ciuda narooob guin por xgualnaza'can gra ree bën been negojs bën rajp ree barcw gojc reeman rijcw, din tibrajtzi guinidlojn.

²⁰ Dxel biguien cha' bën na:

—Per lëjt bën zobj ree xanyabaa, lëjt najdi xi apóstoles Jesucrist, lëjt bën rudëd ree xtiidx Dios në los demazri ree bën naj xbejn Dios, gol babaa por ni cazaj ciuda guin din zian cayüjn Dios xgualguxtisaman por ni beennë ciuda guin lëjt.

²¹ Abi' tijb anjl gojl da't, gulesaman tijb guiaj narooob, zi'c tijb guiaj mulin abi' bazaalaman laan loj nijsdoo rëbaman:

—Zi'c bazalbin guiaj guie con guidib da gojlan zian nidoxh sac ciuda narooob Babilonia, abi' achutri guguiaa Babilonia guin stijb.

²² Ad zaguietri ree cha' arp, ni'qui ree xinrucwejdx, ni'qui ree bidxa, ni'qui ree cha' trompejt ad zaguietri loj ciuda guin. Achutri bejn güün dxiin ni, ni'qui xnaquie' mulin ad zaguietri ni.

²³ Achetri guiyc che'c loj ciuda guin, achutri guxhliaa. Gra ree bën been negojs loj ciuda guin ganax bën zobjloj gojc reeman loj guidxliuj, abi' ciuda guin basquieen gra ree nacion con ree ni dxuudx ni beenan.

²⁴ Abi' loj ciuda guin bagüjt reeman bën badëd ree xtiidx Dios, në ree bën rliiladx Dios, abi' por ciuda guin bagüjt reeman los demasri ree bën ma güjt loj guidxliuj.

19

¹ Chi gulox baguian biguiejn tëen zian, dxel dád rejs biguiejnan cha' zien da't ree bën canee xanyabaa rëb reeman:

¡Quixtëe Dios! Por dux Dad ree Dios

zëd perdon, respejt në guialrniabee,

² din laaman waliman abi' xnejz rüjn xgualguxtisaman,

ma badëdaman casti béngunaa dxuudx ni bazaalguiiw

bénguidxliuj ree con ree xni malaman,

ma been Dios gualguxtis con laaman persi baguijxaman ni bagüjtaman xbejnman.

³ Abi' biguiejnan rëb reeman stijb:

—¡Quixtëe Dios! Ad yu't dxej yayü' go'xh ni caye'c ciuda guin.

⁴ Abi' guigajlbitap ree bengol con guidap ree be naban guin bazuxib reeman delant loj xyagxhil Dios par gap da't reeman laaman respejt, rëb reeman:

—¡Quixtëe Dios! ¡Diidxza'c guin ree naj par laaman!

⁵ Abi' niz lod za' yagxhil guin biguiejnan cha' bën rëb:

Gradi zi'c bengol zi'c xindoo

gol gules xvalor dux Dad ree Dios,

lëjt rüjndi laaman sirv abi' rajpidi laaman respejt.

Xgualruxhliaa bën naj zi'c xi xiil Dios

⁶ Biguiejn tëen zi'c chi rguien cha' zien da't bejn, o zi'c xnaquie' nijsro', o zi'c chi rbidxa' da't guziaaw, rebaman:

¡Quixtëe Dios! Din ma canabee dux Dad ree Dios,

bën ca' gra guialrniabee.

⁷ Yan yadxe' du luxdoo ree zagdxé, yabaa ree yales tée ree xvaloraman. Din ma bidxin dxej guxhliaa bén naj zi'c xi xiilaman abi' bén gac lacheelaman ma za'chaawaman.

⁸ Najcwaman lajd zagdxé, ni naquich, naya rulaa téeen bacha'. Din lajd naquich guin rēn guiēban ni zagdxé ni been ree xbejn Dios.

⁹ Abi' na anjl guin lon:

—Bacaa: “Xiquilbaa ree bén naj gui't loj xguialruhxliaa bén naj zi'c xi xiil Dios.”

Na tée anjl guin:

—Ni guie ree naj xtiidxli Dios.

¹⁰ Dxel bazuxiban loj anjl guin par ga'p da'tan laaman respejt, per naman lon:

—Ad güünl zian. Din zi'cgajc lüj xmandadzi Dios cayguieen, zi'cgajc gra ree lasa'l bén wali ree rüjncwent xtiidx Jesucrist. Gojp da't respejt Dios.

Din por Jesús zēed ni rniece ree bén rudēed xtiidx Dios.

Bén dxiib tijb way naquich

¹¹ Dxel baguian zojbyal xanyabaa baguia téeen tijb way naquich. Bén dxiib laab laman: Bén ruzoob xtiidxaman nē bén wali, din xnejz rüjn xguialguxtisaman nē xwadijlaman,

¹² guiaalojman rulaan bacha' zi'c bajl abi' zien ree coron yu' guijcaman, tib lajtaman ca laj tijb bejn ni achut rignia', tijbzi laaman ragbee xhie rēn guiēban,

¹³ guidib rejnzi xabaman, abi' laman Xtiidx Dios.

¹⁴ Abi' ree xsuldadaman bén yu' xanyabaa zinal reeman laaman dxiib reeman way naquich, najcw reeman lajd zagdxé ni naquich ni naya tée.

¹⁵ Ro'man ririi tijb espad ni nadoxh ro', con espad guin gudēedaman casti bēnguidxliuj, nē con var guiib nabeeman laa reeman. Zi'c rē'p bejn guijc uv par guixiin, zian gudēedaman loj reeman casti narooob ni zēed por Dios bén rajp gra guialrniabee.

¹⁶ Loj xcajpaman con cüdaman ca ree diidx ni rēb: “Rey bén rniabee loj ree rey nē Dad bén rniabee loj ree dad.”

¹⁷ Dxel baguian tijb anjl za'liman loj gubijdx, dád rejs rbidxa'man, rbejdxa-man gra ree be ni rzuj xanyabaa, rēbaman:

—Gol guda, gol bachajg lasa'di lod gunee Dios ni gawidi zro' da't,

¹⁸ zi'c xbēel ree rey, xbēel ree capitan, xbēel ree bén achut rüjn gan, zi'c xbēel ree way, xbēel ree bén rbib laa reeb, xbēel gra ree bejn, zi'c xbēel ree bén naj zi'c bén nado' nē xbēel ree bén ad najt zi'c bén nado', zi'c xi bēel ree bengol nē ree xindoo.

¹⁹ Dxel baguian monstroo con ree rey yu' loj guidxliuj nē ree xsuldad reeman, nadxag lasa' reeman par til reeman con bén dxiib way naquich guin con ree xsuldadaman.

²⁰ Per laa reeman gunaaz reeman monstroo guin con bén rusquiee rēb rudēe xtiidx Dios loj ree bejn, bén rüjn milagr niz loj monstroo guin. Abi' por ree milagr guin basquieeman bén guyu ree xsen monstroo guin gojp tée reeman respejt xfigurib. Abi' monstroo guin con bén rusquiee ni rēb rudēe xtiidx Dios loj ree bejn, groy reeman guidib naban reeman bazaal reeman laa reeman loj bajl lod caye'c azufre.

²¹ Abi' los demazri ree xbejn monstroo guin güjt reeman con espad ni ririi ro' bén dxiib way naquich guin, abi' gudaw ree be ni rzuj xanyabaa laa reeman, xt gudxa lēn reeb gudaw ree xbēel reeman.

20

Ti mil ijz

¹ Dxel baguian zidguiajt tijb anjl xanyabaa, ca'man xguibliaw bizë ni ad yu't lod rliox, ca' tēeman tijb caden narooob.

² Abi' gunaazaman dragon, bëel gual ni la xindxab në satanás, guxhiiman laab con caden guin por timil ijz.

³ Dxel bazaalaman laab lën bizë ni ad yu't lod rliox abi' basiaawdxi'chaman bizë guin chitëë gusquieeri reeb bejn ree loj guidxliuj xt chi ma bayaaløj timil ijz dxel yariib lën bizë guin tibläd.

⁴ Dxel baguian yagxhil zagdxë ree lasa' xyagxhil ree rey, lojn zojb ree bën ni ma cwa' guialrniabee par güün reeman guialguxtis. Baguia tēen xsprijt ree bën ni biru' yëjn guial gutie'ch reeman xtiidx Dios në gra ni ragbee reeman por Jesús. Laa reeman ad gojpt respejt monstroo guin ni'qui xfigurib abi' ad cwëjbt reeman niu xsenb lucwaj reeman o yaa reeman. Abi' baguian baban reeman stijb, dxel gunabee reeman con Cristo timil ijz.

⁵ Laan naj ni yaløj ni yaban ree bengüt, per stijb ree bengüt ad zabant reeman xt yaza' timil ijz.

⁶ ¡Xiquilbaa ree bën yaban yaløj! Laa reeman ma naya niz loj Dios abi' ad zayaltri reeman guialgüjt rarojp, laa reeman gac xbixhioz Dios con xbixhioz Cristo abi' nabeenë reeman laaman timil ijz guin.

⁷ Chi ma bayaaløj timil ijz guin, dxel yarii xindxab guin lod nayaawix

⁸ Par gusquieex bejn ree guidib guidxliuj. Gusquieex Gog në Magog din guchajg lasa' ree xbejn reeman din güün reeman wadijl. Abi' guido'p zien da't reeman zi'c üx ni riga' ro' nijsdoo.

⁹ Gra lad gui't reeman, guido'p reeman gadëd lod za' ree xbejn Dios në gadëd ro' guiedx lod rënman. Per laaman diizd xanyabaa guixhiaalaman bajl ni guze'c bën guin ree xt yadëj reeman.

¹⁰ Abi' xindxab ni basquiee laa reeman laax chu' loj bajl lod caye'c azufre, lod ma za' monstroo con bën rusquiee rëb rudëë xtiidx Dios loj ree bejn, lod ad yu't dxej yarii reeman lod sagdiaj tēë reeman dxej guiaal.

Yadëed ree bejn cwent loj Dios

¹¹ Dxel baguian tijb yagxhil zi'c xi yagxhil rey, tijb yagxhil narooob ni naquich. Lojn zojb tijb bejn abi' delant lojman biquied guidxliuj në xanyabaa, gunidloj reen tiblyayaa.

¹² Dxel baguian guial delant loj yagxhil guin lod zojb Dios, ni za' ree bengüt, zi'c ree bengol zi'c ree xindobëz. Abi' bixal loj ree libr, dxel bixal loj stijb libr ni la xlibr guialnaban. Dxel been Dios xguialguxtisaman con ree bengüt guin zi'c ca loj ree libr guin xcwent ree ni been reeman.

¹³ Nijsdoo bayü xbengütan, abi' guialgüjt bayü xbengütan, abi' ree bengüt ni za' lod cabëz reeman guidxin dxej ni yadëed reeman cwent loj Dios, bibig reeman yagaj din güün xguialguxtis Dios con laa reeman bal conin been reeman.

¹⁴ Dxel guialgüjt con lod guzu ree bengüt gulëz reeman guidxin dxej yadëed reeman cwent loj Dios, grop reen bazaal reeman loj bajl, bajl guin naj guialgüjt barojp.

¹⁵ Abi' loj gajc bajl guin bayal ree bën ad cat laj loj xlibr guialnaban.

21

Xanyabaa cüb con guidxliuj cüb

¹ Chi gulox baguian ni guin ree, dxel baguian tijb xanyabaa cüb con tijb guidxliuj cüb, din xanyabaa con guidxliuj ni guyu diidz yaloj ma gunijt reen, ziangajc nijsdoo.

² Dxel baguian Jerusalén cüb, xguiedx narooob Dios zidguiajtan xi xanyabaa Dios. Dád za'chaawan zi'c rzujchaaw tijb biingunaa chi ma guxhliiam con xin gac lacheelim.

³ Abi' dád rejs biguejnan cha' bèn gunee lod za' xyagxhil Dios, rëbaman:

—Ma za' Dios con ree bejn, guibannëman laa reeman abi' laa reeman gac xbejnman, guiáad laaman suman con laa reeman abi' gacaman xDios reeman.

⁴ Laaman gutiaa loj reeman nijs biin reeman, dxel achetri guialgüjt chu', guialroon, guialrunaya në gualzi, din gra ree ni guyu gocli ma gudëd reen.

⁵ Abi' bèn zojb loj yagxhil guin, naman:

—Gra cayünan nicüb.

Na tëëman:

—Bacaa ree diidx guie, din laa reen naj diidxli ni rayal chililadx bejn.

⁶ Dxel naman:

—Ma gojc ni rayal gac. Naj naj zi'c A con Z, din tijbzi naj rniabee diidz guia'xchej në par tiblyaaa. Bèn re'c nijs, naj yazaladx nijs lojman nijs ni ririi lod rajch nijs ni runee guialnaban.

⁷ Bèn ni güün gan loj dol, laaman yayal gra ree ni guin. Abi' naj gac xDiosaman guiáad laaman gac da xi'nan.

⁸ Per ree bèn rdxeb sudxi'ch loj ni rliladx reeman naj, bèn ad rliladxt ree naj, bèn ruladx ree güün ganax ni mal, bèn rugüjt ree bejn, bèn rüjn ree nidxuudx con ree bèn ad najt lacheel reeman, bèn rüjn ree gualbidxaa, bèn rën ree ni naladx reeman naj ree Dios, në gra ree bèn rusquiee, laa reeman rayal loj bajl lod caye'c azufre, bajl guin naj guialgüjt rarojop.

Jerusalén cüb

⁹ Dxel tijb guigajdx ree anjl bèn ca' ree guigajdx ree cojp ni guidxa guigajdx ree gualzi bigra guin, bi'taman lod za'n, naman lon:

—Guda, din gulün lüj biinxdüb ni gac lacheel bèn naj zi'c xi xiil Dios.

¹⁰ Abi' por Sprijt binë anjl guin naj guijc tijb guia' narooob, guijc tijb guia' ya. Ni balüüman naj Jerusalén, xciuda narooob Dios zidguiajtan xi xanyabaa Dios.

¹¹ Rulaan bacha' por xbacha' Dios. Abi' bacha' guin naj zi'c xbacha' tijb guiaj lasajc, guiaj zagdx ni la Jaspe, nayni zi'c tijb vidr.

¹² Gadëd ro' ciuda guin naj tijb ze' narooob, tijb ze' ya con chiptio'p ree port, abi' tijb gaj ro' ree port guin za' tijb gaj ree anjl. Lad ree port guin ca zi'c la guidxiptio'p cwaa ree bèn Israel, tijb gaj lad port guin ca zi'c la tibcwaa gaj reeman.

¹³ Choon ree port guin naj niz lod rliejn gubijdx, abi' choon reen naj niz lod rëëz gubijdx, za choon ree port guin naj niz lad norte, za choonan naj niz lad sur.

¹⁴ Abi' con chiptio'p guiaj naj xcimiant ze' guin, dxel loj ree guiaj guin ca laj ree guidxiptio'p ree xi apóstoles bèn naj zi'c xi xiil Dios.

¹⁵ Anjl ni guneenë naj ca'man tijb var or din tia'beenëman ciuda guin con ree port guin con ze' guin.

¹⁶ Ciuda guin najni ni cuadrad, zi'cgajc zioolan ziangajc gulajgan. Cwa'bee anjl guin laan con var or ni ca'man, xi mididan naj tio'p mil tio'p gayuu kilometro, zi'c guyoolan ziangajc yan, ziangajc gulajgan.

¹⁷ Dxel cwa'man midid ze' guin, abi' ze' guin najn gayojnbitap mejtr zi'c naj xmidid bénguidxliuj zi'c bare'xh anjl guinan.

¹⁸ Ze' guin gojcnën guiaj ni la Jaspe, abi' ciuda guin najnën ganax or, zi'cgajczi naj vidr nayni.

¹⁹ Xguiaj cimiant ze' guin najcchaawnën gadxagayaa ree guiaj zagdxé. Guiaj yaløj guin najcchaawnën con guiaj ni la Jaspe, guiaj barøjp guin najcchaawnën guiaj ni la zafiro, guiaj bayon guin najcchaawnën guiaj ni la ágata, guiaj badajp guin najcchaawnën guiaj ni la esmeralda,

²⁰ Guiaj ni bagaay guin najcchaawnën guiaj ni la ónice, guiaj ni baxo'p guin najcchaawnën guiaj ni la cornalina, guiaj bagajdx guin najcchaawnën guiaj ni la crisólito, guiaj goc xhujn najcchaawnën con guiaj ni la berilo, guiaj goc gaa najcchaawnën guiaj ni la topacio, guiaj ni goc chii najcchaawnën guiaj ni la crisoprasa, guiaj ni goc chiptib najcchaawnën guiaj ni la jacinto, guiaj ni goc chiptio'p najcchaawnën guiaj ni la amatista.

²¹ Gra guidxiptio'p ree xport ciuda guin gojcnë reen con chiptio'p ree perl, tijb gaj perl guin najné tijbgaj port. Abi' nejz narooob ni naa galay ciuda guin najn ganax or, zi'c tal naj tijb vidr ni rdëd biani grop xijch.

²² Ni'qui tijb yadoo ad baguiatan loj ciuda guin din dux Dad ree Dios bën ca' gra guialrniabee con bën naj zi'c xi xiilaman, laa reeman naj xyadoo ciuda guin.

²³ Abi' loj ciuda guin ad rüjnt naguiejn gusni gubijdx ni'qui bëew, din xbacha' Dios rusni ni abi' bën naj zi'c xi xiilaman laaman naj bajl ni.

²⁴ Bén zëed ree lod rent lod ren sa reeman loj bacha' guin, bën ma naj ree perdon. Abi' ree rey loj guidxliuj guie guidné xguialza'cdxoon reeman loj ciuda guin.

²⁵ Xport ciuda guin ad yu't dxej yaaw reen radxe, abi' ni ad zut guiaal.

²⁶ Gra xguialza'cdxoon con gra xguialzagdxé ree bën zëed lood rent lood ren, guidxin reen loj ciuda guin.

²⁷ Per ad yu't dxej chu' ni dxuudx loj ciuda guin, ni'qui ree bën rüjn ni dxuudx ni'qui ree bën rusquiee, bën cazi ree laj loj xlibr guialnaban ni ca' bën naj zi'c xi xiil Dios, laaz reeman chu' loj ciuda guin.

22

¹ Balüü tée anjl guin lon tijb guiiw naya ni razaladx guialnaban, naynidxuj zi'c tijb guiaawajn. Ririi nijs guin lod za' xyagxhil Dios con bën naj zi'c xi xiilaman,

² abi' zën galay loj nejz narooob ni naa galay ciuda guin. Galay nejz guin naa guiiw guin, abi' grop lad guiiw guin zojb yag ni runee guialnaban ni rtia chiptio'p loj ninejxh, gazobëew ridxaa ninejxh ni rtia lojn. Abi' ree xbalag yag guin rüjn reen sirv par gac bejn nadaan.

³ Achetri ni mal chu' ni, abi' Dios con bën naj zi'c xi xiilaman cwe loj xi yagxhil reeman guíaad ree xbejn reeman gap da't laa reeman respejt.

⁴ Abi' ni guguiaaløj reeman Dios, bën ni ca ree lajman lucwaj.

⁵ Achetri guiaal chu' ni, ad ryaadxt bajl ni'qui gubijdx din dux Dad ree Dios gusni ni, abi' ma nabee reeman tiblayaa con laaman.

Ma zidyob gui't Jesucrist

⁶ Dxel na anjl guin lon:

—Diidx guie ree naj ni diidxli ni rayal chililadx ree bejn. Abi' Dios bën razaladx diidx loj ree bën rudëed xtiidxaman loj ree bejn, laaman guxhaal xi anjl din gulüüman bejn ree ni ma zidyob gac.

⁷ Dad Jesucrist rëb guial nayob gui'taman.

¡Xiquilbaa ree bën ridxga' ni ca loj libr guie ni rugojn ni gac!

⁸ Naj Waj, baguian biguiejn tëën ni guin ree. Abi' chi gulox baguian biguiejn tëën ni guin ree, dxel bazuxiban par ga'p da'tan respejt anjl ni balüü ree ni guin lon.

⁹ Per naman lon:

—Ad güünl zian. Din naj zi'cgajc lüj, xmandadzi Dios cayguieen, zi'cgajc ree xcompniaril bën rudëed ree xtiidx Dios, në ree bën ridxga' ree ni ca loj libr guie. Zeel Dios gojp da't respejt.

¹⁰ Na tëëman lon:

—Ad guquie'chil diidx ni zëed ree loj libr guie, diidx ni rugojn ree ni gac, din ma zidyob gac reen.

¹¹ Gol basa'n ree ben mal con xni mal reeman, abi' ree bën naban nadxuudx zu naban reeman nadxuudx bal zian ruladx reeman. Per bën rüjn ree zi'c rayal gusnuu güün reeman zi'c rayal abi' ree bën naban zi'c rën Dios gusnuu guiban reeman zi'c rën Dios.

¹² Rëb Jesucrist:

—Gol badxe'guijc guialan nayob guialan, abi' guidne'n ni rayal tijbgaj bejn bal gonin been tijbgaman.

¹³ Naj naj zi'c lejtr A con lejtr Z, lejtr ni rzulojnë ni rlioxnë tëë alfabeto, din tijbzi naj rniabee diidx guia'xchej në par tiblyaa.

¹⁴ Xiquilbaa ree bën ni naj zi'c ree bën ma gudiib xab guial ridxga' reeman xtiidx Dios, din gac chu' reeman niz ro' xport ciuda guin din gap tëë reeman derejch gaw reeman ni nejxh ni rtia loj yag runee guialnaban.

¹⁵ Abi' xijch ciuda guin yaya'n ree benguijdx, bën rüjn ree guialbidxaa, bën rüjn ree ni dxuudx con ree bën ad najt lacheel reeman, bën rugüjt ree bejn, bën ni rajp ree respejt ni naladx reeman naj dios, në ree bën ruladx cwëëguijc ni rusquiee rniee tëë reeman diidx rusquiee ree.

¹⁶ —Naj Jesús ma guxhal da anjlan din gugojnman lëjt gra ree ni guie din guiëbidi laan loj gra ree bën rliadx naj. Naj naj quijb xdiaa rey Davi, loj xdiaaman zialan. Naj naj zi'c bajl nayni ni rliejn rsldoo.

¹⁷ XSprijt Dios con biinxdüb ni gac lacheel bën naj zi'c xi xiil Dios rëb reeman:

—Guda.

Abi' bën rigujejn rniee reeman zian, rëb gajcaman:

—Guda.

Chutëez bën re'c nijs, gol guda, abi' bën rën zajc guië'man nijs runee guialnaban lagajzi.

¹⁸ Gra ree bën rigujejn ree diidx ni zëed loj libr guie ni gac, naj rni lojdi bal chu bën gucaa guijc ni zëed loj libr guie, ziangajc zusro' Dios guialzi ni zëed loj libr guie par laaman.

¹⁹ Ziangajc bal chu chiquied xhie diidx guijc ree diidx ni zëed loj libr guie ni gac ziangajc chiquied Dios guijc ni rayalaman loj yag runee guialnaban ni ruza't libr guie ad zayu tëëtaman loj xciuda Dios ni ruza't libr guie.

²⁰ Bën ragbee guial diidxli naj gra ree ni guie, rëbaman:

—Walín, nayob guialan.

Zian gacan Dad Jesús, ¡Guda!

²¹ Dad Jesús güünle' gradi. Amén.